


Chyoiyúng
chyumlaiká:
dangshikaq asik; Zaiwa



New Testament in Zaiwa

Chyoiyúng chyumlaiká: dangshikaq asik; Zaiwa New Testament in Zaiwa

copyright © 2009 Wycliffe Bible Translators, Inc.

Language: Zaiwa

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9781921445408

The New Testament

in Zaiwa

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files dated 29 Jan 2022

23f9fc55-a8a4-59ef-9513-707ec336b0ee

Contents

Mahte	1
Markuq	78
Lukaq	127
Yohan	211
Lagyo	274
Romaq	349
1 Korinhtuq	384
2 Korinhtuq	418
Galatiq	440
Ehpesu	452
Hpilipi	463
Kolose	471
1 Htesaloni	479
2 Htesaloni	486
1 Timohti	490
2 Timohti	499
Tituq	505
Hpilemon	509
Hebre	511
Yakuq	537
1 Petruq	546
2 Petruq	556
1 Yohan	562
2 Yohan	571
3 Yohan	573
Yude	575
Shing-rán	578

MAHTE
é Gabú Danglù
Laiká
(The Gospel of
Matthew)

Yesuq É Byùxik Shap Kyô É Hkyô

Luk 3:23-38

¹ Abraham é awut ashín, Dawiq é yhangzo yhangshu,* Yesuq Hkrisduq é byùxik labaù gi, a-ô mâ é eq rajung za nghut lhê.

² Abraham gi, Isak lé hkû; Isak gi, Yakup lé hkû; Yakup gi, Yudaq eq yhanggu yhangmâng pé lé hku é nghut lhê;
³ Yudaq gi, Hparet eq Zera lé hkû, haú nhik é yhângnu gi, Tamar nghut ri.

Hparet gi, Hesrun lé hkû; Hesrun gi, Ram lé hkû;

⁴ Ram gi, Aminada lé hkû;

Aminada gi, Nashon lé hkû;

Nashon gi, Salamun lé hkû;

⁵ Salamun gi, Buaq lé hkû;

Buaq é yhângnu gi, Rahap nghut ri.

Buaq gi, Obet lé hkû;

Obet é yhângnu gi, Ruh-taq nghut ri.

Obet gi, Yese lé hkû;

⁶ Yese gi, Hkohlâm Dawiq lé hkû;

Dawiq gi, Sholumon lé hkû; Sholumon é yhângnu gi, Uriaq yhangmyi dut wú sù nghut ri.

⁷ Sholumon gi, Rehoboam lé hkû; Rehoboam gi, Abiyaq lé hkû;

Abiyaq gi, Asa lé hkû;

⁸ Asa gi, Yehoshaphat lé hkû;

Yehoshaphat gi, Yoram lé hkû;

Yoram gi, Uzi-aq lé hkû;

⁹ Uzi-aq gi, Yohtam lé hkû;

Yohtam gi, Ahaza lé hkû;

Ahaza gi, Hezekiaq lé hkû;

¹⁰ Hezekiaq gi, Manase lé hkû;

Manase gi, Amon lé hkû;

Amon gi, Yosiaq lé hkû;

¹¹ Yosiaq gi, Babelon má shúm dut huí é hkûn, Yehkoniasq eq yhanggu yhangmâng pé lé hku é nghut ri.

¹² Babelon má shúm dut huí é htâng má,

Yehkoniasq gi, Shalahtila lé hkû;

Shalahtila gi, Zerubabelaq lé hkû;

¹³ Zerubabelaq gi, Abiut lé hkû;

Abiut gi, Eliakim lé hkû;

Eliakim gi, Azor lé hkû;

¹⁴ Azor gi, Zaduk lé hkû;

Zaduk gi, Ahkim lé hkû;

Ahkim gi, Eliut lé hkû;

¹⁵ Eliut gi, Eliaza lé hkû;

Eliaza gi, Mahtan lé hkû;

Mahtan gi, Yakup lé hkû;

* **1:1** Awut ashín eq yhangzo yhangshu gâ é lé, Chyúmdang ra-am má, "yhangzo" ga le bo tô lhê.

16 Yakup gi, Mariq é yhanglâng Yosep lé hku é nghut ri;

Mariq gi, Hkrisduq gâ é Yesuqlé hku é sù nghut ri.

17 Haû mù, Abraham é pyat mai Dawiq é pyat jé shoq gi, byùxik raxe myi xik; Dawiq pyat mai Babelon má shúm dut huí é hkùn jé shoq gi, byùxik raxe myi xik; shúm dut huí é hkùn mai Hkrisduq† é pyat jé shoq gi, byùxik raxe myi xik nghut ri.

*Yesuq Hku Lé Lo É Hkyô
Luk 2:1-7*

18 Yesuq Hkrisduq hku lé lo é hkyô gi, a-ô mâ é eq rajung za nghut ri: Yesuq é yhângnu Mariq gi, Yosep èq dúng tô é sù nghut ri; nghut kôlhang, yhangnhik a zùm shi má, yhang gi, Chyoiyúng Woi-nyí mai zogûng dut bê nghut ri. 19 Yhâng é yhumsîng hpó Yosep gi, dingmán sù nghut luí, yhang lé byu pê hí má hoq a kâm lhoq hpu nau é yanmai, tsik za lhoq kâng pyám râ dâ ri.

20 Nghut kôlhang, yhang haû su myit nyi é hkùn, yhupmoq má, haû Yhumsîng é maumang lagyo gi, yhang lé, lé htoq shit luí, "Dawiq é yhangzo yhangshu Yosep ê, haû náng é yhumsîng myhí Mariq lé hâng yù râ hkyô lé, hkâ-myit chiq; haí mù gâ le, yhang wun tô é zoshâng gùng gi, Chyoiyúng Woi-nyí dông lo é nghut lhê. 21 Yhang gi,

yuqzo rayuq hkû râ nghut luí, nàng gi, zoshâng haû lé, Yesuq nghù myìng myhíng byi ra râ nghut lhê; hkâsu mù gâ le, Yhang gi, Yhâng é byu pé lé, yhangmoq é yubak mara mai hkyi yù râ sù nghut lhê." ga taí ri.

22 Shí hkyô banshoq gi, Garai Gasâng èq, haû myiqh-toi dông taí é dang lé lhoq dik é nghut ri. 23 Myiqh-toi dang haû gi, "Haû zomyi gyíng gi, zogûng dut luí, yuqzo rayuq hkû râ nghut lhê; Yhâng é myìng lé gi, Emanuelaq ga kó râ nghut lhê."* gâ ri. Hau é lichyúm gi, "Garai Gasang gi, nga-nhúng eq rahá nghut nyi lhê." gâ é nghut lhê.

24 Yosep gi, yhup bûn lo é hkùn, haû Yhumsîng é mau-mang lagyo taí é eq rajung za, Mariq lé, yhangmyi dông yhúm má shuí yù bê nghut ri. 25 Nghut kôlhang, yhang gi, yuqzo haû hku é hkùn jé shoq, Mariq eq gungsho a zùm nghut ri. Yuqzo haû lé, yhang gi, Yesuq ga myhíng byi ri.

2

*Buihtoq Hkyam Mâ É
Hpaqchyí Bò Bang*

1 Herut hkohkâm up nyi é u lé, Yuda mau mâ é Betlehem wà má Yesuq lé hku é nghut ri. Hau htâng, buih-toq hkyam mâ é hpaqchyí bò bang gi, Yerusalem wà mó má jé lé kômù, 2 "Haû hku lé lô bê Yudaq byu pê é Hkohkâm gi,

† 1:17 Grik dong Hkrisduq gâ é gi, xù but hui Sù gâ é lichyúm nghut mù, Hebre dong Mesaiá gâ é eq rajung za nghut lhê. * 1:23 Esai 7:14

hkâmá nghut lhê lú? Yhâng é kyî lé, buihtôq hkyam má ngamoq myàng luî, Yhang lé noq râ matú jé lé é nghut lhê." ga luî, myî akô nghut ri.

³ Herut hkohkâm gi, haú hkyô lé wó gyo jáng myit myô nyi ri; hau htoq agó, Yerusalem wà mó mâ é lhunglhang bang le, myit myô bum akô nghut ri. ⁴ Haú mù luî, yhang gi, byu pê é hkyangjong agyi pé eq tarâ sará pé banshoq lé, ji tsîng yù mù, haú Hkrisduq hkâmá hku lé lô râ nghut é hkyô lé myî ri. ⁵ Haú hkûn, yhangmoq gi, "Yuda mau Betlehem wà má nghut lhê. Hkâsu mù gâ le, shí hkyô eq séng luî, haú myiqhtoi kâ tô é má,

⁶ "Yudaq mau mâ é Betlehem wà ê, nàng gi, Yudaq mau mâ é wà pé má, je tiq sù a nghut; hkâsu mù gâ le, ngá é Israelaq byu pé lé upzúng râ Zau gi, náng chyáng mai htoq lô râ nghut lhê."*

ga bo tô ri." ga tû tai akô.

⁷ Hau htâng, Herut gi, haú hpaqchyî bò bang lé haq ji yù mù, kyî lé htoq shit é ahkyíng lé, yhangmoq chyáng mai hkyak wó myî sê yù bê nghut ri. ⁸ Haú mù, yhang gi, "Nungmoq, zoshâng haú lé rago ê ho wú keq. Ngò le, Yhang lé ê wó noq râ matú, Yhang lé nungmoq ê myâng eq yhang, ngo lé lo shit kyo keq." ga tai luî, haú bang lé

Betlehem wà shut nhang kat bê nghut ri.

⁹ Yhangmoq gi, haú hkohkam é dang lé gyô yu é htâng má, htoq e ló bekô nghut ri. Haú buihtôq hkyam má yhangmoq myang é kyî gi, haú zonú nyi é ahtoq ang ang má ló nô é jé shoq, yhangmoq é hí má e ló byî ri. ¹⁰ Yhangmoq gi, kyî haú lé myàng jáng, gyai yhang gabú bum akô nghut ri. ¹¹ Yhangmoq gi, haú yhûm má wang e ló kô é hkûn, zonú eq yhângnu Mariq lé myàng kômù, hkyihput htuq luî, haú zonú lé noqkuq akô; hau htâng, yhangmoq é sutdek pé lé le hpóng luî, hîng, namngón jung loban eq mura* pé lé yù mù, Yhang lé chyunghuq byî akô nghut ri. ¹² Yhangmoq gi, Herut chyáng a dum taú ló râ matú, yhupmoq má, yhangmoq lé sidiq byî é hui kômù, hkyô gó hkat dông yhangmoq é mau shut taú ló bekô nghut ri.

Egutug Ming Shut H pang E É Hkyô

¹³ Yhangmoq ló byuq é htâng má, haú Yhumsing é maumang lagyo rayuq gi, Yosep lé yhupmoq má htoq shit mù, "Toq aq! Haú zoshâng eq yhângnu lé, Egutuq ming shut shuí hpang ê aq. Ngò, nang lé dum ji yu é ahkyíng jé shoq, haú má nyi nyi keq. Haí mù gâ le, Herut gi, zoshâng haú lé sat râ matú, ho nyi bê nghut ri." ga tai ri.

* 2:6 Mihka 5:2

* 2:11 Mura gi, chi wó kut jung xù nghut lhê.

14 Haû mù, yhang gi, toq luí, myín lé yhang, zôshang me lé shuí chûng mù, Egutuq ming shut e ló bê nghut ri. 15 Yhangmoq gi, Herut shi é jé shoq, haú má nyi nyi akô. Haû gi, "Ngá zo lé, ngò, Egutuq ming mai wut htoq yû bê nghut lhê."* ga, haû Yhumsing èq myiqhtoi dông taí é dang lé lhoq dik é ru nghut lhê.

16 Herut gi, yhang lé, hpaqchyí bò bâng èq mhaû pyám tô é lé sé jáng, nhikmo-yo bê nghut ri; haû mù, yhang gi, haû hpaqchyí bò bâng chyáng mai wó sê yu é ahkyíng lé sôn wú mù, Betlehem wà eq hau é awui ayàm mâ é wà pé má nyi é, í zân mai a-ô mâ é yuqzo pé banshoq lé, sat pyám nhang ri. 17 Haû gi,

"Ramaq gâ é jowò má, yón kuq é eq ngau garû é htê lé wó gyô ri;

Rahkelaq gi, yhang zô pé a nyi byuq lo kô é yan-mai, ngau nyi é eq nhik a wó títng dut ri."*²

ga luí, 18 myiqhtoi Yeremiaq dông taí tô é dang lé lhoq dik é nghut ri.

Nazaret Wà Má Dum Taú Lo É Hkyô

19 Herut shi byuq é htâng, Egutuq ming má, haû Yhumsing é maumang lagyo gi, Yosep chyáng yhupmoq dông lé htoq shit mù, 20 "Toq aq, haû zôshang me lé shuí chûng

mù, Israelaq ming má taú ló aq; hkâsu mù gâ le, haû zoshâng lé sat naû bang shi byuq bekô nghut ri." ga taí ri.

21 Haû mù, Yosep gi, zôshang me lé shuí chûng mù, Israelaq ming shut taú ló bê nghut ri. 22 Nghut kôlhâng, yhang gi, Yuda mau má, Arhkela-uq, yhângwa Herut é hkó má xoq up nyi é hkyô lé wó gyo jáng, haú má a wám ló lo nghut ri. Yhupmoq má sidiq byí é huí é eq rajung za, yhang gi, Galile mau shut e ló mù, 23 Nazaret gâ é wà má ló nyi nyi bê nghut ri. Haû mù, "Yhang lé, Nazaret wà byù ga râ nghut lhê." ga luí, haû myiqhtoi pé dông taí tô é dang lé lhoq dik é nghut ri.

3

Wui-myhup Sará Yohan Shui Hen É Hkyô

Mrk 1:1-8; Luk 3:1-18; Yhn 1:19-28

1 Haú yoq má, Wui-myhup Sará Yohan htoq lô mù, Yuda mau mâ é yoso má hko kyô é gi, 2 "Myit lhíng keq; hkâsu mù gâ le, mauhkûng mingdán gi, chyâng lò bê* nghut ri." gâ ri.

3 Haú yuq gi,

"Haû yoso má, byù rayuq garû taí é htê gi,

'Haû Yhumsing é matú, hkyô hen to keq; Yhâng é matú, hkyô lhoq nyhang to keq.' gâ ri."*²

ga myiqhtoi Esai-aq taí tô é sù yuq nghut ri.

* 2:15 Hos 11:1 ✨ 2:17 Yer 31:15 * 3:2 Mauhkûng mingdán gi, chyâng lò bê gâ é lichyúm gi, Garai up râ ahkyíng chyâng lò bê gâ é nghut lhê. ✨ 3:3 Esai 40:3

⁴Yohan gi, gola-uq shomaú eq saí é mebu wut mù, yhâng é hpyidum má gi, shokuq hpyihit hit ri. Yhâng é zoshuq gi, dinggám eq yosô byo-î pé nghut ri. ⁵Yerusalem wà mó mâ é bang, Yuda mau ban-shoq mâ é bang eq Yodan làng awui ayàm lhunglhang mâ é bang gi, yhâng chyáng htoq e bum akô. ⁶Yhangmoq gi, yhumsing é mara lé yín yû kôluí, yhâng chyáng mai Yodan làng má wui-myhup hkám yu bum akô nghut ri.

⁷Nghut kôlhang, yhang gi, yhang wui-myhup hkám byí é jang má, Hparishe pé eq Saduke pé myo myo lé lo nyí kô é lé myàng jáng, yhangmoq lé taí é gi, "Duq htân lhangmuí amyû pé ê, jé lô râ yubak dam mai wó hpan lut kó sháng gaq ga, nungmoq lé ó yuq taí pûn é lúh? ⁸Myit lhang hkyô eq gingdán é ashi pé zui keq. ⁹'Ngamoq gi, Abraham é yhangzo yhangshû pé nghut lhê.' nghû luí, yhumsing é i-myit unghkaú má hkâlum to kó. Hkâsu mù gâ le, ngò, nungmoq lé taí kyo kôlé, Garai Gasang gi, luqgok shí pé mai, Abraham é matú yhangzô pé wó hpan htoq kat lhê. ¹⁰Ahkuí lhang, Garai Gasang gi, Yhâng é wazung lé haú sikkâm wang pé má tô to bê nghut ri; haú mù, ge é ashi a zui é agàm hkangmó lé gi, htuq lhêng pyám mù, myi má dú kat pyám râ nghut lhê.

¹¹Ngò gi, nungmoq myit lhang kó sháng gaq nghû, wui eq za wui-myhup hkám byí

lhê. Nghut kôlhang, ngá htoq má wum-o a-tsam je bo é sù rayuq, ngá htàng má jé lé lô shirâ nghut luí, ngò gi, Yhâng é hkyí-tsung chùng byí râ lhang a gingdán; Yhang gi, Chyoiyúng Woi-nyí má le, myi má le, nungmoq lé wui-myhup hkám byi râ nghut lhê. ¹²Yhang gi, loq má byò chung to mù, guq chyaráng mâ é guq bùm lé hik sân pyám luí, já é guq cham lé gi, guqchyí má tsing kat to mù, guqsôm lé kúm gi, hkâ-nhám le shi byuq a sê é myí eq nyhé hkyô pyám râ nghut lhê." gâ ri.

Yesuq, Wui-myhup Hkâm Yu É Hkyô

Mrk 1:9-11; Luk 3:21-22

¹³Haú hkûn, Yesuq gi, Yohan chyáng wui-myhup hkám yù râ ga, Galile mau mai Yodan làng má jé lé lo ri. ¹⁴Nghut kôlhang, Yohan gi, "Ngò sheq Náng chyáng wui-myhup hkám yù râ sù ru nghut lhê nhing! Nàng sheq ngá chyáng lé lo lhê lúh?" ga luí, lhom taí hkûm ri.

¹⁵Haú hkûn, Yesuq gi, "Dingmán hkyô banshoq lé, nga-nhúng lhoq dik râ é yanmai, Ngo lé wui-myhup hkám byi laq." ga tû taí ri. Haú mù, Yohan le, gyo byi bê nghut ri.

¹⁶Yesuq gi, wui-myhup hkám yù eq yhang, wui mai htoq lo ri. Haú hkûn, mauhkûng bóng lô mù, Garai Gasang é Woi-nyí gi, hpûngkyui gunghkyâng sù é đông mai, Yhâng ahtoq má lé

gyô nô tô é lé, Yhang myang kat ri. ¹⁷ Haú hkûn, "Shí yuq gi, Ngò chyitdap é Ngá zo nghut lhê; Yhâng é ahtoq má Ngò gabú myit ngón nyi lhê." ga mauhkûng mai danghtê htoq lo ri.

4

Yesuq, Gúnglaú Huí É Hkyô
Mrk 1:12-13; Luk 4:1-13

¹ Hau htâng má, Chyoiyúng Woi-nyí gi, Yesuq lé, nat Tsadán èq gunglaú é hui nhâng râ matú, yoso shut shuí ê ri. ² Yesuq gi, zoshuq gám é myi xê nyí myi xê myìn jé jáng, zòmút hui bê nghut ri. ³ Haú hkûn, gunglaú sù gi, Yhâng chyáng lé mù, "Nàng, Garai Gasâng é Yhangzo nghut le gi, luqgok shí pé lé muk dut nhâng aq." ga taí ri.

⁴ Haú jáng, Yesuq gi, "Byù gi, muk èq za asak duì râ a nghut; Garai Gasâng é nhut mai htoq lo é mungdang hkanmó èq sheq asak duì râ nghut lhê.* ga luí, Chyúmdang má kê tô ri." ga yhang lé tú taí ri.

⁵ Haú hkûn, nat Tsadán gi, Yesuq lé, chyoiyúng myuq* má shuí ê mù, noqkuq yhum je myhang é shúhtâng htoq má yap nhang to luí, ⁶ "Nàng, Garai Gasâng é Yhangzo nghut le gi, byam gyó kat wú aq. Hkâsu mù gâ le, 'Náng é matú, Garai Gasang gi, Yhâng é maumang

lagyô pé lé taí to râ nghut mù, luqgok má Náng é hkyî a ló htung shoq, yhangmoq é loq èq Nang lé lhom bún yú kó râ nghut lhê.*

ga luí, Chyúmdang má kê tô ri." ga taí ri.

⁷ Nghut kôlhang, Yesuq gi, "Haú Yhumsîng, nungmoq é Garai Gasang lé, wó chyam wú râ a nghut.* ga luí le, Chyúmdang má kê tô ri." ga, yhang lé tú taí ri.

⁸ Nat Tsadán gi, Yesuq lé, gyai yhang myhang é bùm htoq má shuí doq ló mù, mingkan má joq é mingdán pé banshoq eq haú pê é hkikhkâm hkyô lé tûn shit ri. ⁹ Hau htâng, yhang gi, "Nàng hkyihput htuq mù, ngo lé noq é nghut jáng, shí pé banshoq, Nang lé ngò byi râ." ga, Yesuq lé taí ri.

¹⁰ Haú hkûn, Yesuq gi, "Tsadán nàng, ló byuq aq! Hkâsu mù gâ le, 'Haú Yhumsîng náng é Garai Gasang lé za, nàng noqkuq dojaú ra râ nghut lhê.* ga luí, Chyúmdang má kê tô ri." ga, yhang lé taí ri.

¹¹ Haú mù, nat Tsadán gi, ló byuq bê nghut luí, maumang lagyô pé gi, Yesuq lé, lé dojaú nyi akô nghut ri.

Yesuq Mungdang Hko Hi
Ló É Hkyô

Mrk 1:14-15; Luk 4:14-15

¹² Yesuq gi, Wui-myhup Sará Yohan htóng gyó é hkyô

* 4:4 Tarâ Pun 8:3 * 4:5 chyoiyúng myuq gi, Yerusalem lé gâ lhê. * 4:6 Hkya-on 91:11-12 * 4:7 Tarâ Pun 6:16 * 4:10 Tarâ Pun 6:13

lé wó gyo jáng, Galile mau shut dum taû lô bê nghut ri. ¹³ Yhang gi, Nazaret wà mai htoq lô mù, Zebulun eq Nahtali mau mâ é nhông yàm má joq é Kaperna-um wà má lô nyi nyi ri. ¹⁴ Haû gi, myiqhtoi Esai-aq laiká má,

¹⁵ "Zebulun mau eq Nahtali mau, wuimau mâ é hkyô, Yodan làng yàm, tûngbaù pé nyi é Galile mau ê,

¹⁶ mauchut hkaû má nyi nyi é bang, maubó mó lé myàng bê nghut ri;

shí wup hkaû má nyi to bâng é matú, maubó lô bê nghut ri."^{*}

ga kê tô é dang lé lhoq dik râ matú nghut ri.

¹⁷ Haû hkûn mai, Yesuq gi, "Myit lhîng keq! Mauhkûng mingdán gi, chyâng lò bê nghut ri." ga, mungdang hko hi e lô bê nghut ri.

Yesuq É Chángzo Hí Dut Bang

¹⁸ Yesuq gi, Galile nhông yàm má hkyô sô wún é hkûn, Petruq gâ é Simun eq yhanggu Andre nhiktâng lé myang ri. Yhangnhik tâng gi, ngozo kóng zo su nhik nghut mù luí, nhông má gùn dú nyi akô nghut ri. ¹⁹ Haû mù, Yhang gi, haû nhiktâng lé, "Ngá htâng cháng keq; Ngò, nungnhik lé, byù lé châng kóng su nhik dut nhâng râ nghut lhê." ga taí ri. ²⁰ Haû hkûn, yhangnhik gi, radá dâm, gùn pé lé tô pyâm to

luí, Yhang htâng cháng bekô nghut ri.

²¹ Yesuq gi, jowò haû mai xoq sô e lô le, Zebedi é yhangzo, Yakuq eq yhanggu Yohan nhiktâng lé myang ri. Yhangnhik gi, yhangnhik é yhângwa Zebedi eq rahá, lhaí hkaû má gùn hpo nyi akô. Yhangnhik lé, Yesuq wut kat jáng, ²² yhangnhik gi, radá dâm, yhangnhik é yhângwa eq lhaí haû lé, tô pyâm to kôluí Yesuq htâng cháng bekô nghut ri.

*Nò Bang Lé, Yesuq Lhoq Gê Byí É Hkyô
Luk 6:17-19*

²³ Yesuq gi, Galile mau ra-mau gón má htoq ê mù, tara-jong pé má, mhoqshit luí, mauhkûng mingdán eq sêng é gabú danglù lé, hko kyo uchyang, byu pê chyâng mâ é nòhpyo ajung jung huí bang eq noli nojàng amyù myû dap bang lé, lhoq gê byí wún ri.

²⁴ Yesuq eq sêng é hkyô lu-dang gi, Suriq ramau gón má byo myín lô mù, byu pé gi, awáng nòhpyo ajung jung huí é bang, hkê-nhô jamjaû nyi é bang, nat gang wang júng é bang, mhûngtuq tuq é bang, gùngjum shi é bang lé, shuí lé lô kôluí, Yhang gi, haû bang lé lhoq gê byí ri. ²⁵ Galile mau, Dekapoli,† Yerusalem, Yuda mau eq, Yodan làng tû tap mâ é byù moq mó gi, Yesuq htâng châng bum akô nghut ri.

^{*} 4:16 Esai 9:1-2 † 4:25 Dekapoli gâ é gi, Grik đông myuq raxê lé gâ lhê.

5

*Hkungsô Wó É Tarâ**Luk 6:20-23*

¹ Yesuq gi, byù moq mó lé myàng jáng, bùm má doq ló luí, ló zung tô ri. Haú hkûn, Yhâng é chángzô pé gi, Yhâng chyáng lé lô kôjáng, ² Yhang nhut hkum hpóng luí, yhangmoq lé mhoqshit é gi:

³ "Woi-nyí má, asho awui dut é bang gi, hkungsô wó nyi ri; hkâsu mù gâ le, mauhkûng mingdán gi, yhangmoq é mingdán nghut nyi ri.

⁴ Myit iyon huí é bang gi, hkungsô wó nyi ri; hkâsu mù gâ le, yhangmoq gi, nhik lhoq tîng é hui kó râ nghut lhê.

⁵ I-myit nú-nhâm é bang gi, hkungsô wó nyi ri; hkâsu mù gâ le, yhangmoq gi, mingkan lé wó sîng kó râ nghut lhê.

⁶ Dingmán hkyô lé mut shit nyi é bang gi, hkungsô wó nyi ri; hkâsu mù gâ le, yhangmoq gi, nhik dik shoq myàng zo kó râ nghut lhê.

⁷ Shogyo nhikmyin myit bo é bang gi, hkungsô wó nyi ri; hkâsu mù gâ le, yhangmoq gi, shogyo nhikmyin yu é hui kó râ nghut lhê.

⁸ Myit sansêng é bang gi, hkungsô wó nyi ri; hkâsu mù gâ le, yhangmoq gi, Garai Gasang lé myàng kó râ nghut lhê.

⁹ Nguingón hkyô sô xoq byí é bang gi, hkungsô wó nyi ri; hkâsu mù gâ le, yhangmoq gi, Garai Gasang é yhangzô pé gâ é hui kó râ nghut lhê.

¹⁰ Dingmán hkyo é yanmai zing-ri huí é bang gi, hkungsô wó nyi ri; hkâsu mù gâ le, mauhkûng mingdán gi, yhangmoq é nghut nyi ri.

¹¹ Ngá é yanmai, byu pê èq, nungmoq lé rhoi é, zing-rî é, a teng a mán é đông agè ashop é dang amyû myû tai tso kô é hkûn, nungmoq hkungsô wó nyi ri. ¹² Nguingón gabú nyí keq, hkâsu mù gâ le, nungmoq é matú kô é chyunghuq gi, mauhkûng mingdán má joq tô ri. Nungmoq é hí lhê é myiqhtoí pé lé le, yhangmoq gi, haú đông zing-rî lai lo wú bekô nghut ri.

*Xo Eq Maubó**Mrk 9:50; Luk 14:34-35*

¹³ Nungmoq gi, myidàm htoq mâ é xo nghut nyi lhê. Nghut kôlhang, xo gi, mán kân byuq jáng, haú lé hai èq dum wó lhoq ngam yù râ lúh? Shinggan shut dú pyám mù, byu pê èq nâng pyeq pyâm é mai lai luí, hai akyû le bò râ a nghut lo.

¹⁴ Nungmoq gi, mingkân é maubó nghut akó; bùm htoq mâ é myuq lé gi, wó nghop to râ a nghut. ¹⁵ Myibung lé tap mù, mûng èq nghop tô é ó a kut wú kó; haú su kut râ malaí, yhúmhaú má lúng tô

é bang yuq hkangmó myoq wó myâng râ matú, tsungjang má kúm tsung to râ nghut lhê. ¹⁶ Haû eq rajung za, byu pé gi, nungmoq é ge é muzó pé lé byu-myàng luí, mauhkûng htoq mâ é nungmoq é Îwa lé hkya-on kó sháng gaq, nungmoq é maubó lé yhangmoq é hí má duq nhang to keq.

Tarâ Lhoq Dik É Hkyô

¹⁷ Ngò gi, myiqhtoí pé é dang eq jep é tarâ lé lhoq hpyoq pyám râ matú, jé lé é nghut nhô hkâ-ngâm kó; haû pé lé lhoq dik râ matú sheq jé lé é ru nghut lhê. ¹⁸ Ngò, nungmoq lé teng za táí kôlé, mauhkûng eq myigùng byuq byuq le lhang, haû pé a ban lhoq dik dik gi, jep é tarâ mâ é tiq dik é dangjí eq myihkyet zo ralhum lhang byuq byuq râ a nghut. ¹⁹ Jep é tarâ shí pé mâ é tiq dik é dang rahkun lé lu lai luí, góbang lé le, haû su kut râ matú mhoq byí é sù ó yuq nghut kôle, mauhkûng mingdán má tiq dik sù gâ é hui râ nghut lhê; nghut kôlhang, jep é tarâ shí pé lé châng kut luí, mhoq byi sù kúm gi, mauhkûng mingdán má, hkik sù gâ é hui râ nghut lhê. ²⁰ Ngò, nungmoq lé táí kôlé, nungmoq dingmán é hkyô má, haû Hparishe pé eq tarâ sará pé dingmán é htoq je a gyaú le gi, mauhkûng mingdán má, nungmoq wó wâng kó râ a nghut.

Byù Hkâsat

²¹ 'Byù hkâsat, ^{*} sat é sù gi, jéyáng é hui râ nghut lhê' ga, hí hpyang lhê é bang lé táí tô é dang, nungmoq wó gyô wú bê nghut lhê. ²² Nghut kôlhang, Ngò, nungmoq lé táí kôlé, gumang rayuq yuq lé nhikjum yô é sù gi, jéyáng é hui râ nghut lhê. Hau htoq agó, gumang hpó lé, 'Byù gang' ^{*} ga táí é sù gi, Yudaq byìn tú wapdoq má jéyáng é hui râ nghut lhê; 'Byù bam ê' ga wut é sù gi, ngaraí myi eq gingdán nyi ri.

²³ Haû mù, hkungga gyap má, nàng hkungga nhông râ dâ é hkûn, náng é gumang rayuq yuq, nang lé mara hun é hkyô rajung jung joq é lé, myit bûn kat é nghut jáng, ²⁴ náng é hkungga lé, haû hkungga gyap hí má tô pyám to mù, náng é gumang hpó haû yuq eq hí nguingón hkyô ló yû luí sheq, hkungga lé nhông byi aq.

²⁵ Nang lé yui tsuq sù gi, nang lé tarâ rûng má dé e ló é hkûn, hkyô má ru nghut nyi ashí u lé, yhang eq nguingón hkyô hí hân yù aq. Haû a nghut jáng, haû yuq gi, nang lé, tarâ agyi chyáng ê ap pyám mù, haû tarâ agyi gi, nang lé htóng hkyô pyám râ matú, htóng suwún hpô é loq má ap pyám râ nghut lhê. ²⁶ Ngò, nang lé teng za táí lé, yuichyín haû a ban xap xap gi, htóng haû mai nàng wó htoq ló râ a nghut.

Su-myi Sulàng Lú É Hkyô

^{*} 5:21 Htoq Ló 20:13 ^{*} 5:22 Byù gang gâ é lé, Grik đông "Raka" gâ lhê.

Eq Séng Luí Mhoqshit É Dang

27 'Su-myi sulàng hkâlú[✧] gâ é dang lé, nungmoq wó gyo wú bê nghut lhê. 28 Nghut kôle, Ngò, nungmoq lé taí kôlé, myiwe rayuq lé shut nau é myit èq wú é sù gi, yhâng é myit hkaû má, myiwe haú yuq eq su-myi sulàng lú hkyô kut é sù nghut bê. 29 Haû mù, náng é loqyo myoq èq, nang lé mara kut shut nhang é nghut le gi, haú lé lap choq yû mù, dú pyám aq. Hkâsu mù gâ le, náng é ragùngdu gón ngaraí ming gyó râ htoq má, náng é gungsho rajung jung za htên byuq é nghut le gi, náng é matú je ge ri. 30 Haû eq rajung za, náng é loqyo loq èq, nang lé mara kut shut nhang é nghut le gi, haú lé hpyit yû mù, dú pyám aq. Hkâsu mù gâ le, náng é ragùngdu gón ngaraí ming gyó râ htoq má, náng é gungsho rajung jung za htên byuq é nghut le gi, náng é matú je ge ri.

Myi Làng Gâng É Hkyô Eq Séng Luí Mhoqshit É Hkyô

Mht 19:9; Mrk 10:11-12; Luk 16:18

31 'Yhumsing é yhangmyi lé kâng é sù gi, lhoq kang laiká byi râ dut lhê.[✧] gâ é dang joq lhê. 32 Nghut kôlhang, Ngò, nungmoq lé taí kôlé, myiwe dông mai làng shut é a nghut é za, yhumsing é yhangmyi lé kâng é sù gi, myiwe haú lé sulàng lú sù dut nhâng bê

nghut ri; hau htoq agó, yhumsing yhanglâng eq gang bê myiwe lé hâng yu é sù le, su-myi lú é sù dut bê nghut ri.

Danggidiq

33 Hau htoq agó, 'Danggidiq a zùng hkâmû; Yhumsing lé byi tô é danggidiq eq rajung za cháng aq.' ga luí, hí hpyang lhê é bang lé, taí tô é dang lé nungmoq wó gyô wú bê nghut lhê. 34 Nghut kôlhang, Ngò, nungmoq lé taí kôlé, hai èq le hkâdakâm kó: mauhkúng lé lang luí le, hkâdakâm kó; hkâsu mù gâ le, haú gi, Garai Gasâng é zùng tanghkuq nghut lhê; 35 myigùng lé lang luí le, hkâdakâm kó; hkâsu mù gâ le, haú gi, Garai é hkyí nang jang nghut lhê; Yerusalem lé lang luí le, hkâdakâm kó; hkâsu mù gâ le, haú gi, Hkohkâm mó é myuq nghut lhê. 36 Hau htoq agó, yhumsing é ulhúm èq le, hkâdakâm kó; hkâsu mù gâ le, xâm rahkat lé lhang hpyû shoq noq shoq, nàng wó kut é a nghut. 37 Náng é dang lé, 'nghut lhê' lé gi, 'nghut lhê' nghû, 'a nghut é' lé gi, 'a nghut' nghû, taí aq; haú mai lai é gi, haú agè ashop su chyáng mâ é nghut ri.

Lató Hpuq É Hkyô

Luk 6:29-30

38 'Myoqjí matú myoqjí xap, zui matú zui xap[✧] gâ é dang lé, nungmoq wó gyô wú bê nghut lhê. 39 Nghut kôlhang, Ngò, nungmoq lé taí kôlé, agè ashop kut é sù lé

✧ 5:27 Htoq Ló 20:14

✧ 5:31 Tarâ Pun 24:1

✧ 5:38 Htoq Ló 21:24

lató hkâhpuq. Náng é loqyo bowâm má pyuq byi sù lé, loqpaî hkyam le hkâm byi shi aq. ⁴⁰ Byù rayuq yuq, nang lé mara tsuq mù, náng é buzo lé yu pyám byí é nghut jáng, bumó lé le, hkyut byi shi aq. ⁴¹ Byù rayuq yuq, nang lé zik mù, radéng é nhâng jáng, yhang eq rahá í déng châng é byi aq. ⁴² Nang lé dung sù lé, byi aq; náng chyáng mai chyi naù sù lé le, nunghtáng hkâlrik pyám.

Gyè Lé Chyitdap Râ É Hkyô
Luk 6:27-28, 32-36

⁴³ Náng é chyangnâm mâ é bang lé gi, chyitdap mù, náng é gyè lé gi, a jú kut aq[☆] gâ é dang lé, nungmoq wó gyô wú bê nghut lhê. ⁴⁴ Nghut kôlhang, Ngò, nungmoq lé tái kôlé, nungmoq gi, mauhkûng htoq mâ é nungmoq é Îwâ é yhangzô pé wó dut kó sháng gaq, nungmoq é gye pé lé chyitdap mù, nungmoq lé zing-ri bâng é matú kyûdung byi keq; ⁴⁵ hkâsù mù gâ le, Yhang gi, agè ashop bâng é ahtoq má le, gè bâng é ahtoq má le, buì tsô byi nhâng mù, dingmán bâng é ahtoq má le, a dingmán bâng é ahtoq má le, mau wô byi nhâng Sù nghut ri. ⁴⁶ Nungmoq lé chyitdap é bang lé za chyitdap kô le gi, nungmoq é matú hai chyunghuq wó kó râ lú? Kang guq bang lhang, haù su kut lhê a nghut kó lú? ⁴⁷ Hau htoq agó, nungmoq é gumang wuì lé za shi-kyám

kô le gi, nungmoq kut é muzó gi, góbâng htoq má hai wá lak-lái râ lú? Tungbaù pé lhang haù su kut lhê a nghut kó lú? ⁴⁸ Haù mù, mauhkûng htoq mâ é nungmoq é Îwa gumjup é su, nungmoq le gumjup nyì keq.

6

Alu Byí É Hkyô

¹ Nungmoq dingmán é hkyô lé, byu pé myàng sháng gaq nghû, byu pé hí má a kut shit loshoq, sidiq nyì keq. Haù su kut é nghut jáng, mauhkûng htoq mâ é nungmoq é Îwâ chyáng mai, chyunghuq wó yû kó râ a nghut.

² Haù mù, haù gegùn labyoq kut bang gi, byu pé èq shigyaù é huì sháng gaq ga, tarajong pé hká, hkyô pé hká kut é su, nàng gi, alu byí é hkûn, tut htê su hkâlhoq htoq. Ngò, nungmoq lé teng za tái kôlé, haù bang gi, yhangmoq é chyunghuq lé hkúm shoq wó yû bekô nghut lhê. ³ Ra châ to bang lé nàng alu byí é hkûn, náng é loqyo loq kut é hkyô lé, loqpaî loq lé lhang hkâsé nhâng. ⁴ Haù hkûn, nàng alu byí é lé, ó a châng sé râ nghut lhê. Haù jáng sheq, ó a sé loshoq kut é hkyô lé myang é sù, náng é Îwa gi, nang lé chyunghuq shigyaù râ nghut lhê.

Kyûdung É Hkyô
Luk 11:2-4

5 Nungmoq kyûdûng le, gegùn labyoq kut bang su hkâkut kó; hkâsu mù gâ le, yhangmoq gi, byu pé byu-myàng shoq ga, tarajong pé eq hkyô kang pé má yap mù, kyûdung râ ô nau akô. Ngò, nungmoq lé teng za tái kôlé, haú bang gi, yhangmoq é chyunghuq lé wó yû bekô nghut ri. 6 Nghut kôlhang, nàng kyûdûng le, nàng é gok hkaû má wang ló mù, hkum myhî pyám luí, a byu-myang é nàng é Íwâ chyáng dung aq. Haú jáng, ó a byu-myang é lé myàng sù, nàng é Íwa gi, nang lé jeju dum tau byi râ nghut lhê. 7 Haú mù, kyûdûng le, tûngbaù pé su kut luí, dang puq hkâhtau kó; hkâsu mù gâ le, yhangmoq gi, dang hîng chín luí dung jáng sheq, gyo byi nhô ngam akô nghut ri. 8 Haú bang su hkâkut kó; hkâsu mù gâ le, nungmoq é Íwa gi, nungmoq râ é hkyô lé, nungmoq a dung shi mai sê to Sù nghut lhê.

9 Haú mù, nungmoq kyûdûng le,

'Mauhkûng htoq tsáng myhâng mâ é ngamoq é Áwa ê,

Náng é myìng gi, chyoiyúng nyí sháng gaq,

10 Náng é mingdán jé lô sháng gaq,

Nàng ô nau é hkyô, mauhkûng htoq má dik é su, myigùng htoq má le dik sháng gaq ô.

11 Ngamoq nyí wuî râ é zoshuq lé, ngamoq lé hkû-nyí byi laq.

12 Ngamoq lé shut é bâng é mara lé ngamoq hkyut pyám byí é su,

ngamoq é mara lé le hkyut pyám byi laq.

13 Ngamoq lé, agúng alaú hkyô má a wàng nhang é za,

agè ashop jang mai hkyi yù laq ô.

(Hkâsu mù gâ le, kô dik é up sîng hkyô, a-tsam eq hpungwup shingkang gi, pyat dedu ahtum abyuq Náng chyáng ru joq nyi ri ô! Amen.)*

ngû dung keq. 14 Supê èq, nungmoq lé kut shut é mara lé, nungmoq hkyut pyám byí é nghut le gi, mauhkûng htoq mâ é nungmoq é Íwa le, nungmoq lé mara hkyut pyám byi râ nghut lhê. 15 Nghut kôlhang, haú bâng é mara lé, nungmoq a hkyut pyám byí é nghut le gi, nungmoq é Íwa le, nungmoq é mara lé hkyut pyám byi râ a nghut.

Zoshuq Gám É Hkyô

16 Nungmoq gi, zoshuq gám é hkûn, gegùn labyoq kut bang su myoqdong hkâlhoq nyhui kó; hkâsu mù gâ le, haú bang gi, yhangmoq zoshuq gám é hkyô lé, tûn shit râ matú myoqdong lhoq nyhuí shit akô nghut ri. Ngò, nungmoq lé teng za tái kôlé, haú bang gi, yhangmoq é chyunghuq wó yû bekô

* 6:13 Chyúmlaiká ra-am má, shí túm a bo é nghut lhê.

nghut ri. ¹⁷ Nungmoq kúm gi, zoshuq gám é hkûn, nungmoq zoshuq gám é hkyô lé, byu pê hí má de de a dut é za, nungmoq a byu-myang é Îwa za myàng sháng gaq, myoq châ pyám luí, u xû but keq; ¹⁸ haû jáng sheq, ó a sé loshoq kut é hkyô lé myang é Sû, nungmoq é Îwa gi, nungmoq lé chyunghuq shigyaú râ nghut lhê.

Mauhkûng Htoq Mâ É Sutzè

Luk 12:33-34

¹⁹ Jàngkon, jogyik èq wó lhoq htên pyâm é eq hkaú su èq le wó wang hkaú yu pyám byí é myigùng htoq má, nungmoq é matú, sutzè lé hkâhkong to kó. ²⁰ Jàngkon, jogyik èq le a wó lhoq htên pyâm é eq, hkaú su èq le a wó wang hkaú yu pyám byí é mauhkûng htoq má sheq, nungmoq é matú sutzè hkong to keq. ²¹ Hkâsu mù gâ le, náng é sutzè joq jang má, náng é i-myit le jé nyì râ nghut lhê.

²² Myoqjí gi, gungdû é my-ibung nghut nyi ri. Náng é myoqjí ge é nghut le gi, náng é gungdu gón má maubó byíng mui to râ nghut lhê. ²³ Nghut kôlhang, náng é myoqjí a ge é nghut le gi, náng é gungdu gón gi, mauchut tuq dut nyì râ nghut lhê. Náng chyáng bo é maubó gi, mauchut byuq é nghut jáng, mauchut haû gi, hkâ-í yhang htû râ lâ!

²⁴ Ó yuq nghut kôle, yhumsîng í yuq lé wó dojaú râ a nghut. Hkâsu mù gâ le,

yhang gi, rayuq lé a jú kut mù, rayuq lé gi, chyitdap râ nghut lhê; haû a nghut jáng, rayuq lé lhumzui mù, rayuq lé gi, hpau a tap kut râ nghut lhê. Nungmoq gi, Garai Gasang lé le, ngunzè lé le, radá dâm wó dojaú kó râ a nghut.

Hkâ-myit Chiq Kó

Luk 12:22-31

²⁵ Haû mù luí, Ngò, nungmoq lé taí kôlé, nungmoq é asak matú haí zo haí shuq râ eq nungmoq é gungdû matú haí wut haí tsang râ lé, hkâ-myit chiq kó. Asak gi, zoshuq htoq má, gungdu gi, mebû htoq má, je ahkyak lhê a nghut kó lúhú? ²⁶ Maulat mâ é nghoqzô pé lé wú wú keq; yhangmoq gi, kyô hkyó kyô shu a kut é htoq agó, chyí pé má le haí a tsíng kat to kô é nghut le lháng, mauhkûng htoq mâ é nungmoq é Îwa gi, yhangmoq lé, byi tso byi huq nyi lhê. Nungmoq gi, nghoq haú pé htoq má je riyhang hpaudap nyi lhê a nghut kó lúhú? ²⁷ Nungmoq má, ó yuq wá, myit chiq é èq, yhumsing é asak lé radúng kô wó jat yù kó râ lúhú?

²⁸ Haû nghut le nhîng, haí mù, mebû matú myit chiq akô lúhú? Myigùng má yuq tô é htutbó ban pé hkâsu kut kô lo é lé, myit wú keq. Haú pé gi, mù le a zui, hkyîng le a duì kó nghut ri. ²⁹ Nghut kôlhang, Ngò, nungmoq lé taí kyo kôlé, hkohkâm Sholumon hpung kô dik u lé wut é mebu lháng, ban haû rabó lé a hkyit nghut ri. ³⁰ Lumjîng

myit tiq é bang ê, hkû-nyí joq mù, napmá myihkyóm má dú kat pyám hui râ nghut é yosô mhan pé lé za lhang, Garai Gasang haû su kut hut é nghut le gi, nungmoq lé je riyhang hut râ a nghut kó lú? ³¹ Haû mù, 'Haî zo râ lhi?' 'Haî shuq râ lhi?' 'Haî wut râ lhi?' nghû hkâ-myit chiq myhíng kó. ³² Tungbaù pé kúm gi, haû pé banshoq lé châng hkat ho nyi akô; nghut kôlhang, mauhkûng htoq mâ é nungmoq é Îwa gi, haû pé lé nungmoq râ é hkyô, sé byí nyi lhê. ³³ Nghut kôlhang, Yhâng é mingdán eq dingmán hkyô lé hí hô keq, haû jáng, haû pé banshoq, nungmoq lé puq byi râ nghut lhê. ³⁴ Haû mù, napmá lhê é matú hkâ-myit chiq kó; hkâsu mù gâ le, napmá gi, yhâng é yhang myit chiq râ nghut lhê. Hkû-nyí é wúihke hkyô gi, hkû-nyí é matú gé bê nghut ri.

7

A Jéyáng Râ Hkyô *Luk 6:37-38, 41-42*

¹ Nungmoq jéyáng é a hui kó sháng gaq, ó lé le, hkâjéyáng kó. ² Hkâsu mù gâ le, nungmoq jéyáng é su, nungmoq le, jéyáng é hui kó râ nghut é htoq agó, nungmoq lik byí é bung èq, nungmoq lé dum lik byi râ nghut lhê.

³ Yhumsing myoq hkaû má lúng tô é siktúm lé lhang a myit wú é nhîng, haî mù

luí, nunggu nungmâng é myoqwàng lé myang lhê lú? ⁴ Yhumsing é myoq má siktúm lhûng to luí nhîng, 'Náng myoq má lúng tô é myoqwàng lé, ngò choq pyám byi lé.' nghû luí, náng é gumang hpó lé hkâsu wó tai râ lú? ⁵ Gegùn labyoq kut sù ê, náng é myoq má lúng tô é siktúm lé hí choq pyám aq. Haû jáng sheq, nunggu nungmâng é myoq má wang tô é myoqwàng choq pyám byi râ matú, nàng san za myàng râ nghut lhê.

⁶ Hkuí pé lé, yunglhô é zê hkâbyi kó; waq pê hí má, nungmoq é palhé wuizo lé hkâdú byi kó. Haû su kut jáng, haû bang gi, zè haû pé lé nâng pyeq pyám mù, nungmoq lé dum taù ngat lò râ nghut lhê.

Dung Keq, Hô Keq, Hkum *Má Kok Keq*

Luk 11:9-13

⁷ Dung keq, haû jáng, nungmoq lé byi râ nghut lhê; hô keq, haû jáng, nungmoq myàng kó râ nghut lhê; hkum má kok keq, haû jáng, nungmoq lé hpóng byi râ nghut lhê. ⁸ Hkâsu mù gâ le, ó yuq nghut kôle, dung sù wó râ; hô sù myàng râ; hkum kok sù lé gi, hpóng byi râ nghut lhê.

⁹ Nungmoq má, ó yuq wá, yhumsing yhangzo muk dúng le, luqgok byi kó râ lú?

¹⁰ Ngozo dúng le, lhangmui* byi kó râ lú? ¹¹ Agè ashop é bang nungmoq lhang gi,

* **7:10** Garai Gasang gi, lhangmui a zo râ matú, Yudaq byu pé lé hkunmó hkyô tô é nghut lhê.

nungmoq é zo wuî lé, ge é chyunghuq dat byi kô le nhîng, mauhkûng htoq tsáng myhâng mâ é nungmoq é Îwa gi, Yhang lé dũng é bang lé, je riyhang ge é chyunghuq byi râ nghut lhê! ¹² Haû mù, hai hkyô má nghut kôlhang, nungmoq gi, yhumsîng ô nau é dõng supé lé kut nhâng nau é su, yhangmoq lé le kut byi keq. Haî mù gâ le, haû gi, jep é tarâ eq myiqhtoî pê é dang lo jup tô é nghut ri.

Chyap É Hkúmdong Eq Lam É Hkúmdong

Luk 13:24

¹³ Chyap é hkúmdong mai wàng keq. Hkâsu mù gâ le, lam é hkúmdong eq hkyô mó gi, htên byoq hkyô shut shuî e é nghut mù luî, haû dõng wàng bang gi, myô akô nghut ri. ¹⁴ Chyap é hkúmdong eq hkyô zo kúm gi, asak hkyô shut shuî e é nghut mù luî, haû lé myang ho é bang gi, shaû akô nghut ri.

Agàm Eq Ashi

Luk 6:43-45

¹⁵ Nungmoq chyáng jé lé lo é myiqhtoî pyoq pé lé, sidiq nyî keq; yhangmoq gi, sau-kuq wut mù, nungmoq chyáng jé lé kôlhang, myaq zo myaq shuq nau é wamhkuî pé nghut akô. ¹⁶ Yhangmoq é muzó jizó lé wú mù, nungmoq gi, yhangmoq lé wú sé kó râ nghut lhê. Zubyp mai tsibiyiq shi, zugâm mai maihpáng-shi wó yu wú akô lhú? ¹⁷ Ge é agàm gi, ge é ashî zui mù, a ge é agàm gi, a ge

é ashî za dat zui ri. ¹⁸ Ge é agàm gi, a ge é ashî a wó zui, a ge é agàm le, ge é ashî a wó zui nghut ri. ¹⁹ Ge é ashî a zui é shigâm hkangmó lé gi, htuq pyám mù, myi má dú kat pyám râ nghut lhê. ²⁰ Haû mù, yhangmoq é muzó jizó lé wú mù, nungmoq gi, yhangmoq lé wú sé kó râ nghut lhê.

²¹ Ngo lé, 'Yhumsîng ê, Yhumsîng ê,' ga, wut é bang yuq hkangmó gi, mauhkûng mingdán má myang wàng kó râ a nghut; haû mauhkûng htoq mâ é Ngá Wa ô nau é dõng kut sũ za sheq, myang wàng râ nghut lhê. ²² Haû buinyî má, byù myo myo gi, 'Yhumsîng ê, Yhumsîng ê, Náng é myìng mai, ngamoq gi, myiqhtoî le htoi bê; nat gang lé hkat htoq bê; laklaî kumlhá ajung jung lé, kut bê a nghut lhú?' ga luî, Ngo lé myi kó râ nghut lhê. ²³ Haû hkûn, Ngò gi, 'Nungmoq lé, Ngò hkâ-nhám le a sé; agè ashop hkyô kut é bang nungmoq, Ngá chyáng mai gâng lô byuq keq.' nghû, yhangmoq lé san za tũ tai kat râ nghut lhê.

Hpaqchyî Bò Sũ Eq Ngok Sũ

Luk 6:47-49

²⁴ Haû mù, Ngá é dang shî pé lé wó gyô yù luî, châng kut é sũ gi, hpaqchyî bò mù, lunghtân htoq má, yhûm saî é sũ eq wuî nyi ri. ²⁵ Mau wô, wuî je, laidun lò mù, yhûm haû lé lo htung kôlhang, yhûm haû gi, a htên byoq byuq râ nghut lhê; hkâsu mù gâ le, yhûm haû gi, lunghtân htoq

má tsuq tô é yanmai nghut ri.
²⁶ Nghut kôlhang, Ngá é dang lé, wó gyô yù mù, a cháng sù gi, semuî-jàng má, yhûm saî é byù ngok eq wuí nyì râ nghut lhê. ²⁷ Mau wô, wuî je, laidun wò yup dut lò mù, yhûm háu lé lo htung jáng, yù whuî a mù loshoq htên byoq byuq râ nghut lhê." gâ ri.

²⁸ Yesuq mungdang ban taî é hkûn, shiwa byu pé gi, Yhang mhoqshit é hkyô lé maúhong bum akô; ²⁹ hkâsu mù gâ le, Yhang gi, yhang-moq é tarâ sará pé eq a pung é za, ahkáng ayá wó sù rayuq su, mhoqshit é yanmai nghut ri.

8

Manggâm Dap É Byù Rayuq

Mrk 1:40-45; Luk 5:12-16

¹ Yesuq gi, bùm htoq mai gyó lo é hkûn, byù moq mó gi, Yhâng htâng châng bum akô nghut ri. ² Háu hkûn, manggâm dap é byù rayuq gi, Yhâng é hí má, lé mù, hkyihput htuq luî, "Yhumsîng ê, Nàng dóng é nghut le gi, ngo lé Nàng wó lhoq sân-yúng byi râ nghut lhê." ga taî ri.

³ Yesuq gi, loq lhâm kat mù, háu yuq lé ê záng luî, "Ngò dóng lhê, sân-yúng aq hkoî." ga taî kat ri. Háu hkûn jáng, háu yuq é manggâm gi, ge byuq bê nghut ri. ⁴ Háu hkûn, Yesuq gi, "Nàng, shí hkyô ó lé le hkâtaî kyo. Nghut kôlhang, náng é gungdu lé, hkyangjong hpô chyáng ló tún shit mù, yhangmoq é matú saksé dut

sháng gaq, Mosheq taî tô é eq rajung za, hkungga ló nhông byi aq." ga háu yuq lé taî kat ri.

Gyezau Hpô É Lumjîng Myit

Luk 7:1-10; Yhn 4:43-54

⁵ Yesuq, Kaperna-um wà má wang e ló le, Romaq gyezau hpó rayuq gi, Yhâng chyáng lé jé mù, ⁶ "Yhumsîng ê, ngá é dui-nhâng zoshâng gi, gùngjum shi é htoq agó, yhûm má gyai no jamjaû leq tô ri." ga garúm lé dung ri.

⁷ Háu hkûn, Yesuq gi, yhang lé, "Ngò, lé lhoq gê byi râ." ga taî kat ri.

⁸ Gyezau hpó háu, Yhang lé dum tû taî é gi, "Yhumsîng ê, Nàng, ngá é laishîn-htâng má, lé nang râ lhang ngò má a gingdán. Nàng, dang rahkun za taî kat laq; háu hkûn, ngá é dui-nhâng zoshâng ge ló râ nghut lhê. ⁹ Hkâsu mù gâ le, ngò le ahkáng ayá wó é zau rayuq é a-ô má é zau nghut lhê; ngá é a-ô má le gyezô pé nyi lhê; rayuq lé, 'Ê aq!' nghu le, yhang e ló lhê; góyuq lé, 'Lò aq!' nghu le, yhang lo lhê; ngá jûn lé le, 'Shí kut aq!' nghu le, yhang kut lhê." gâ ri.

¹⁰ Yesuq gi, dang háu lé wó gyo jáng, maú byuq luî, Yhâng htâng cháng bang lé, "Ngò, nungmoq lé teng za taî kôlé, Israelaq amyû má lhang, shí í lumjîng é sù lé, Ngò, rayuq lé le a myàng wú é nghut lhê. ¹¹ Ngò, nungmoq lé taî kôlé, buihotoq buiwàng hkyam má é byu pé myo myo gi, mauhkûng mingdán

má, Abraham, Isak, Yakup pé eq rahá, zoshuq poí mó má myang zùng kó râ nghut lhê. ¹² Nghut kôlhang, mingdán haú má wàng âng é bang kúm gi, shinggan mauchut hkaũ shut dú pyâm é hui luí, haú jowò má ngaubyi ngaũ nhap eq zuí kyik kyik shoq hpuzô nyi bùm bekô râ nghut lhê." ga taí ri.

¹³ Hau htâng, Yesuq gi, gyezau lé, "Ló aq hkoí! Nàng lumjínng é eq rajung za, dut râ nghut lhê." ga taí ri. Haú-u má yhang, haú dui-nhâng zoshâng gi, ge byuq bê nghut ri.

Byù Myo Myo Lé Lhoq Gê Byí É Hkyô

Mrk 1:29-34; Luk 4:38-41

¹⁴ Yesuq gi, Petruq é yhúm má jé wang e é hkũn, Petruq é yhâng-aumó gyai yhang no leq tô é lé, ê myang ri. ¹⁵ Yesuq gi, yhâng é loq má é záng kat é hkũn, Petruq yhâng-aumó gi, nõhpyo ge byuq mù, toq luí, Yhang lé wó gaí tso gaí huq bê nghut ri.

¹⁶ Myinhtâng mauchut lô jáng, nat gang wang júng nyi é bang myo myo lé, Yhâng chyáng shuí lé lo akô. Yhang gi, agè ashop é nat gâng pé lé dâng èq hkat htoq pyám mù, nõhpyo huí é bang banshoq lé lhoq gê byí ri. ¹⁷ Haú gi,

"Yhang gi, nga-nhùng é noli nojàng lé yu pyám byi mù, nga-nhùng é noli nojàng lé, wũn waq pyám byi bê nghut ri."*

ga, myiqhtoi Esai-aq taí tô é dang lhoq dik râ matú nghut ri.

Yesuq Htâng Cháng Râ Bang

Luk 9:57-62

¹⁸ Yesuq gi, Yhâng é lhínghkyuq má byù moq mó zup míng nyi é lé myàng jáng, Yhâng é chángzô pé lé, nõng hé hpoq shut gũ dap ê sháng gâ ri. ¹⁹ Haú hkũn, tarâ sará rayuq gi, lé lô mù, "Sará ê, nõg gi, Nàng hká e le hká cháng râ nghut lhê." ga Yhang lé lé taí ri.

²⁰ Haú jáng, Yesuq gi, "Wamhkuí pé gi, hkyũng wó akô; nghoq pé le, nghoqsut wó akô. Nghut kôlhang, haú Byu Yhangzo gi, u nghê jowò lháng a wó nghut ri." ga lhom taí kat ri.

²¹ Haú hkũn, chángzo rayuq gi, "Yhumsínng ê, nõg wa lé lô yhúm pyám râ ahkáng hí byi shilaq." ga taí kat ri.

²² Nghut kôlhang, Yesuq gi, "Shí bê bang gi, shí bê bang yhangchang yhúm lhum kó sháng gaq, nàng gi, Ngá htâng cháng aq." ga dum taú taí ri.

Laidun Lhoq Zím É Hkyô

Mrk 4:35-41; Luk 8:22-25

²³ Hau htâng, Yesuq lhaí hkaũ má wàng mù, Yhâng é chángzô pé le, Yhâng htâng châng wàng bekô nghut ri.

²⁴ Haú hkũn, nõng má byodan-htik laidun mó lò mù, wuìlhêng pé gi, lhaí má bat ùm lò bê nghut ri. Nghut kôlhang, Yesuq gi, yhup myhí tô ri. ²⁵ Chángzô pé gi, Yhâng

chyáng jé ê mù, Yhang lé nhaû pun luî, "Yhumsing ê, hkyi yù laq ô! Nga-nhúng myup ló nyi ri." ga taí akô.

²⁶ Yhang gi, "Lumjúng myit shaû é bang ê! Haí mù, haû-í gyuq bum akô lhú?" ga taí kat ri. Hau htâng, Yhang gi, toq luî, laidun eq wuìlhêng pé lé tân kat jáng, banshoq zím byuq bê nghut ri.

²⁷ Byù haú bang gi, maúhong byuq kômù, "Shí yuq gi, hkasû é byù lhà? Lai eq wuìlhêng pé lhang gi, Yhâng é dang lé gyo byi ri myhi-nhung!" ga luî, rayuq eq rayuq myi lhum bum akô nghut ri.

*Nat Wang Júng Su Nhik Lé,
Lhoq Gê Byi Ê Hkyô*

Mrk 5:1-20; Luk 8:26-39

²⁸ Yesuq gi, Gadara byu pé é mau hpoq má jé dap ló jáng, nat gang wang júng é byù í yuq gi, lupdùng mai htoq lé lo kômù, Yhang lé lé huí akô. Haú nhik gi, haú hkyô mai ó lhang a wám lai loshoq wuí é su nhik nghut akô. ²⁹ Yhangnhik gi, Yesuq lé, "Garaí Yhangzo ê, Nàng, ngamoq eq haí sêng lhê lhú? Ahkyíng a jé shimá, ngamoq lé zing-ri râ matú jé lé lo é nghut lhê lhú?" ga taí garû akô.

³⁰ Haú mai a lhum wê é jowò má, waq rajùm mó gi, myi dû but zô nyi bum akô nghut ri. ³¹ Nat gâng pé gi, Yesuq lé, "Nàng, ngamoq lé hkat htoq râ nghut jáng, hê waq pé chyáng wàng nhâng laq." ga dùng akô.

³² Yesuq gi, "Htoq ló keq!" ga taí kat ri. Haú mù, yhang-moq gi, htoq ló luî, waq pé chyáng wàng mù, waq haú jùm gi, gampyoq mai nhông hkaú shut din yán wang ló kôluí, wuì hkaú má myup shi byuq bekô nghut ri. ³³ Waq zúng bang gi, myuq hkaú shut hpang din wang ló kômù, dut lai lo é hkyô banshoq lé le, nat gang wang júng huí su nhik hkâsu dut é hkyô lé le, ló taí kyo akô nghut ri. ³⁴ Haú mù, rawa bang gi, Yesuq lé hui rá matú htoq lé lo bùm kômù, Yhang lé myàng jáng, yhang-moq é mau mai htoq ló byuq râ matú, chôm dùng tôngbán akô nghut ri.

9

*Gungjum Shî Sû Lé Lhoq
Gê Byi Ê Hkyô*

Mrk 2:1-12; Luk 5:17-26

¹ Yesuq gi, lhai má wàng mù, yhumsing é wà shut jì dap ló bê nghut ri. ² Byù ra-am gi, gungjum shî sù rayuq lé, taphkang mai Yhâng chyáng waq lé lo akô. Yesuq gi, yhangmoq é lumjúng myit lé byu-myàng jáng, haú gungjum shî sù lé, "Ngá zo ê, nhik hkâ-ngê; nàng é yubak mara lé hkyut pyám byi bê." ga taí ri.

³ Haú hkûn, tarâ sará pé ra-am gi, yhangmoq é i-myt hkaú má, "Byù shí yuq gi, Garaí Gasang lé rhoi dang taí nyi ri." ga myit nyi bum akô nghut ri.

⁴ Yesuq gi, yhangmoq myit nyi é hkyô lé sé mù, "Nungmoq é i-myit hkaû má, haû su agè ashop é đông haî mù myit nyi akô lúhú?" ⁵ 'Náng é yubak mara lé hkyut pyám byi bê.' nghû taí rá eq 'Toq luí, hkyô so aq.' nghû taí rá má, hká hkun je taí lui lê lúhú? ⁶ Nghut kôlhang, haû Byu Yhangzo gi, mingkan htoq má, mara hkyut byi rá ahkáng wó Sû nghut é lé, nungmoq lé sé nhâng nau lê." ga taí lui, haû gùngjum shî sù lé, "Toq aq, náng é taphkang yu chùng lui, yhûm taû ló aq hkoi." ga taí kat ri. ⁷ Haû mù, haû yuq gi, toq mù, yhûm shut ló byuq bê nghut ri. ⁸ Byù hpûng mó gi, haû hkyô lé myàng kôjáng, gyuq maú kômù, byu pé lé haû su é ahkáng ayá byi tô é Garai Gasang lé hkya-on kungton bum akô nghut ri.

Mahte lé shuí yu é hkyô

Mrk 2:13-17; Luk 5:27-32

⁹ Yesuq gi, haû jowò mai sô e ló é hkûn, kang guq zúm má zung tô é Mahte ga sù lé myàng mù, "Ngá htâng cháng aq." ga taí jáng, haû yuq gi, toq lui, Yhâng htâng cháng bê nghut ri.

¹⁰ Yesuq gi, Mahte é yhûm má myinzang zô nyi é hkûn, kang guq bang myo myo eq yubak dap bang myo myo lé jé kômù, Yhang eq Yhâng é chángzô pé eq rahá zo shuq bum akô. ¹¹ Haû lé, Hparishe pé myàng kôjáng, Yhâng é chángzô pé lé, "Nungmoq é sará gi, haî mù lui, kang guq

bang eq yubak dap bang eq rahá zo shuq nyi lê lúhú?" ga myi akô.

¹² Yesuq gi, haû su ga kô é lé wó gyo jáng, "Wángzán bang gi, chi sará a ra kó; nòhpyo hui bang za sheq ru rá lê. ¹³ 'Ngò ô nau é gi, hkungga nhông hkyô a nghut, shogyo nhikmyin hkyô sheq ru nghut lê.'* gâ é lichyúm lé mhoq yû keq. Hkâsu mù gâ le, Ngò gi, dîngmán bang lé wut yù rá matú jé lé é a nghut, yubak dap bang lé ji yù rá matú sheq jé lé é ru nghut lê." ga tû taí kat ri.

Zoshuq Gám É Eq Sêng É Hkyô

Mrk 2:18-22; Luk 5:33-39

¹⁴ Hau htâng, Wui-myhup Sará Yohan é chángzô pé gi, Yesuq chyáng jé lé kômù, "Ngamoq eq Hparishe pé gi, zoshuq gám gám kut lê; nghut kôle, Náng é chángzô pé gi, haî mù a gám kô é lúhú?" ga lui, lé myi akô.

¹⁵ Haû mù, Yesuq tû taí é gi, "Bíng pé gi, lusik eq rahá nghut nyi to ashî hkûn, hkâsu ge yón kó rá lúhú? Lusik lé, yhangmoq chyáng mai shuí yu pyám é hkyíng jé rá nghut lê; haû hkûn kúm gi, yhangmoq zoshuq gám kó rá nghut lê.

¹⁶ Ó yuq le, mebu xau má pán sik èq a lhaq hpo wú kó; hkâsu mù gâ le, pán sik kun byuq jáng, mebu xau le je lhoq cheq pyám rá nghut lê. ¹⁷ Tsibiyiq wing asik lé le, shokuq htûng axau má ó a

kat wú kó. Kat é nghut jáng, tsibiyiq wing asik soq htân luí, htûng buq goq byuq mù, tsi-biyiq wing le yui shun byuq, htûng le htên byuq, dut râ nghut lhê. Haú mù, tsibiyiq wing asik lé, shokuq htûng sik má kat jáng sheq, haú í jûng é a hten râ nghut lhê." gâ ri.

Shi Bê Myiwe Zo Eq No É Myiwe Myhi

Mrk 5:21-43; Luk 8:40-56

¹⁸ Yesuq haú su ga taí nyi é hkûn, suwún rayuq jé lé lô mù, Yhâng é hí má hkyihput htuq luí, "Ngá zo byizo gi, ahkuí za shi byuq bê. Nghut kôhlang, Nàng lé mù, yhâng é ahtoq má loq lé ke byi laq, haú jáng, yhang, asak dum dui lò râ nghut lhê." ga taí ri. ¹⁹ Yesuq gi, toq mù, Yhâng é chángzô pé eq rahá, haú yuq htâng châng e ló akô.

²⁰ Haú hkûn, raxe í zân yhang, suí yui nyi é myiwe myhi rayuq gi, Yhâng é nunghtáng má huí lé mù, Yhâng é bushi htâng má é záng kat ri. ²¹ Myiwe myhi haú gi, yhang gûng yhang, "Ngò, Yhâng é buhtâng má é wó záng jáng gi, ge byuq râ nghut lhê." ga, wó myit é yanmai nghut ri.

²² Yesuq gi, lhing wú kat luí, yhang lé myàng jáng, "Ngá zo é, nhik hkâ-ngê, náng é lumjíng myit gi, nang lé lhoq gê byi bê nghut ri." ga taí ri. Haú hkûn jáng yhang, myiwe myhi haú gi, ge byuq bê nghut ri.

²³ Yesuq gi, suwún hpô é yhúm má jé wang ló é hkûn,

sampyi mut bang eq garu garín dut nyi é bang lé, é myâng mù, ²⁴ yhangmoq lé, "Hui keq. Myiwe zo gi, shi byuq é a nghut, yhup myhi tô é sheq ru nghut lhê." ga taí jáng, yhangmoq gi, Yhang lé wuizui kut pyám byi akô. ²⁵ Yesuq gi, byù hpûng lé, shinggan shut htoq ló nhâng mù, Yhang wang é luí, myiwe zo haú lé loq èq zuí kat jáng, myiwe zo haú gi, dum dui toq lo ri. ²⁶ Haú hkyo é danglù gi, ramau gón yhang jam ló byuq bê nghut ri.

Myoqjit Í Yuq Eq Nhut Jit Sû Rayuq Lé, Lhoq Gê Byi É Hkyô

²⁷ Yesuq gi, haú jowò mai xoq e ló nyi le, Yhâng é htâng má, myoqjit í yuq gi, châng dìn uchyang, "Dawiq é Yhangzo é, ngá-nhik lé shogyô yù laq ô!" ga wut taí akô.

²⁸ Yesuq gi, yhúm hkaú má jé wang ló é hkûn, myoqjit su nhik châng wang lò kômù, haú nhik lé, "Ngò wó kut byi é lé, nungnhik lumjíng akô luq?" ga myi ri.

Haú hkûn, yhangnhik gi, "Lumjíng lhê ô, Yhumsîng é." ga tû taí akô.

²⁹ Hau htâng, Yhang gi, haú nhik é myoqjí má é záng htung luí, "Nungnhik lumjíng é eq rajung za dut sháng gaq." ga taí ri. ³⁰ Haú mù, yhangnhik gi, myoq wó myâng bekô nghut ri. Yesuq gi, "Shí hkyô, ó lé le hkâsé nhâng kó." ga, yhangnhik lé htân htân sidiq byi ri.

³¹ Nghut kôlhang, yhangnhik gi, haú hkyô lé, haú mau ramau gón yhang taí pyo ló bekô nghut ri.

³² Haú nhik htoq ló nyí kô é hkûn, nat gang wang júng luí, dang a wó nyô sù rayuq lé, Yesuq chyáng shuí lé lo akô. ³³ Nat gang lé hkat htoq pyâm é hkûn, nhutjit sù haú gi, dang wó nyô bê nghut ri. Byù hpûng mó gi, haú lé wú maú byuq kômù, "Shí su dut é hkyô lé, Israelaq amyû má radàm lháng a myang wú." ga taí bum akô.

³⁴ Nghut kôlhang, Hparishe pé kúm gi, "Nat gâng pé é zaú é wum-o a-tsam eq za, nat gâng pé lé hkat htoq pyâm é nghut ri." ga taí bum akô nghut ri.

Mû Zui Byù Shaú Ri

³⁵ Yesuq gi, myuq pé eq wà pé banshoq má wàng luí, haú pé mâ é tarajong pé má mhoqshit é eq, mauhkûng mingdán hkyô eq sêng é gabú danglù lé hko kyo uchyang, nòhpyo ajung jung eq noli nojàng hui bang yuq hkanmó lé, lhoq gê byí wún ri. ³⁶ Yesuq gi, byù moq mó lé myàng jáng, wú shogyô nyi ri. Hkâsu mù gâ le, yhangmoq gi, sau zúng sù a nyi é sau pé su, awui ahke dut é eq byo myín bûm kô é yanmai nghut ri. ³⁷ Haú mù, Yhang gi, Yhâng é chángzô pé lé, "Kyôshù yù rá myo shoq joq kôlhang, mù zui rá byù gi, shaú nyi ri. ³⁸ Haú mù, haú kyô Yhumsîng lé,

Yhâng é kyô yô má, kyô shu byù myo myo nhâng byi rá matú, dung keq." ga taí ri.

10

*Raxe Í Yuq Lé Nhang Htoq
Kat É Hkyô*

Mrk 3:13-19; 6:7-13; 9:41; 13:9-13; Luk 6:12-16; 9:1-6; 12:2-9, 51-53; 14:26-27; 21:12-17

¹ Yesuq gi, Yhâng é chángzo raxe í yuq lé wut yù mù, agè ashop é nat pé lé wó hkat htoq rá eq, noli nojàng eq nòhpyo ajung jung lé wó lhoq gê rá ahko ahkáng yhangmoq lé byí ri.

² Haú lagyo raxe í yuq é myìng gi, (Petruq ga sù) Simun eq yhanggu Andre; Zebedi é yhangzô nhiktang Yakuq eq yhanggu Yohan; ³ Hpilip eq Barhtolume; Htomaq eq kang guq sù Mahte; Alhpe é yhangzo Yakuq, Htade, ⁴ Zelutuq* dut é Simun eq, Yesuq lé ap pyám rá sù, Yudaq Iskarut pé nghut akô.

⁵ Yesuq gi, haú bang raxe í yuq lé dangsâng mù, nhang htoq kat ri. Yhang sang kat é dang gi, "Tûngbau pé chyáng le hkâ-ê kó; Samariq wà rawà má le hkâwâng kó. ⁶ Haú byuq byuq é sau pé su nghut nyi é Israelaq byu pé chyáng sheq ê keq. ⁷ Nungmoq gi, ê mù, 'Mauhkûng mingdán gi, chyâng lò bê nghut ri.' nghu é danglù lé hko kyo

* **10:4** Zelutuq gâ é lichyúm gi, yhumsîng zui saí é hkyô má gyai yhang myit lòm shirong é sù lé ga lhê. Haú u lé, Israelaq byu pé gi, mingdán luthkyô wó rá matú shikut nyi é hpûng bang lé, Zelutuq gâ lhê.

keq. ⁸ Nò bang lé lhoq gê byi, shî bê bang lé lhoq dui toq, manggâm dap bang lé lhoq san lhoq yúng byi, nat gâng pé lé hkat htoq pyám, kut keq. Laí laí wó é lé, laí laí byi keq. ⁹ Nungmoq é hpyihit má, hîng, ngùn eq gyi pé hkâkat chûng kó; ¹⁰ hkyowui é matú, etap, mebu htaí, hkyî-tsung eq dumbáng pé hkâyü chûng kó; hkâsu mù gâ le, mù zui sù gi, zoshuq wó gíng lhê.

¹¹ Hká wâ hká dum má jé wang ló le le, haú mâ é gingdán é byù lé hô mù, haú mai htoq ló é hkûn jé shoq, haú yuq é yhûm má za nyi nyi keq. ¹² Haú yhûm má wang é hkûn, shichyên yù keq. ¹³ Haú yhûm gi, gingdán é nghut jáng, nungmoq shimân byí é hkyô, yhangmoq chyáng joq nyi sháng gaq; a gingdán é nghut jáng, nungmoq chyáng dum taù lò sháng gaq. ¹⁴ Nungmoq lé a lhom hap yu é eq nungmoq é dang lé a lhom gyo byi kô é nghut jáng, haú yhûm haú wâ mai htoq ló é hkûn, nungmoq é hkyiwa má dap é hpuilhaù lé ko hkyô pyâm to keq. ¹⁵ Ngò, nungmoq lé teng za taí kôlé, tarâ jéyáng é buinyi má, haú wâ gi, Sodom eq Gomoraq myuq htoq má je hpuzo râ nghut lhê. ¹⁶ Wamhkuì hpúng má nhang hâng kat é sau pé lé su, Ngò, nungmoq lé nhang kat é nghut lhê. Haù mù, lhangmuì su hpaqchyí bò luí, hpûngkyui su nú-nhâm nyi keq.

¹⁷ Byu pé lé sidiq keq; hkâsu

mù gâ le, yhangmoq gi, nungmoq lé, tarâ rûng pé má é ap pyám kó râ nghut é htoq agó, yhangmoq é tarajong pé má, nungmoq lé nhuq bat kó râ nghut lhê. ¹⁸ Nungmoq gi, Ngá é yanmai, mauzau wui eq hkohkam pé é hí má shuí jé é hui luí, yhangmoq é hí má le, tûngbaù pé é hí má le, saksé myang hkám kó râ nghut lhê. ¹⁹ Nghut kôlhang, nungmoq lé ap pyám kô é hkûn, nungmoq hkâsu taí râ eq haí taí râ lé, hkâ-myit chiq kó. Haú hkûn taí râ dang, nungmoq wó kó râ nghut lhê. ²⁰ Hkâsu mù gâ le, haú gi, nungmoq é dang a nghut, nungmoq é Yhângwâ é Woi-nyí sheq, nungmoq dông taí râ ru nghut lhê.

²¹ Nhiktâng gi, nhiktâng yhangchang, îwa gi, yhangzo lé, shî shoq ap pyâm lhum kó râ nghut lhê; zo wui gi, mó wui lé gumlau toq mù, sat pyám nhâng kó râ nghut lhê. ²² Byù lhunglhang bang gi, Ngá é yanmai, nungmoq lé a ngui kut kó râ nghut lhê; nghut kôlhang, jihtúm jé shoq wó hkam jân nyi é sù gi, hkyi yu é hui râ nghut lhê. ²³ Rawò má zing-ri é hui jáng, rawò shut h pang ê keq. Ngò, nungmoq lé teng za taí kôlé, Israelaq byu pé é myuq pé má, nungmoq a ban wang ngap shimá, haú Byu Yhangzo jé râ nghut lhê.

²⁴ Jongzo gi, sará htoq, dui-nhâng zoshâng gi, yhumsing htoq, gyaú râ a nghut. ²⁵ Jongzo gi, yhâng é sará su, dui-nhâng zoshâng gi,

yhâng é yhumsîng su, wó dut jáng gé bê. Yhumsîng hpó lé lháng Bezebulaq† ga kô le gi, Yhâng é yhumbyù wuì lé gi, je riyhang nghû kó râ a nghut lú?

26 Haù mù, yhangmoq lé hkâgyuq kó. A byông htoq loshoq wó zaù nghop tô é haì le a joq râ nghut lhê; a sé loshoq wó haq tô é le, haì a joq râ nghut lhê. 27 Ngò, nungmoq lé mauchut hkaù má taì é hkyô lé, myoq myàng maubó má taì kyo keq; Ngò, nungmoq lé dangsoq soq kyo é hkyô lé, yhumhkûng htoq mai taì pyô keq. 28 Gungdu lé za wó sat pyám mù, woi-nyí lé a wó sat bang lé, hkâgyuq kó. Woi-nyí lé le, gungdu lé le, ngaraì ming má wó lhoq htên é Sû lé sheq, gyuq nyì keq. 29 Johkyáng í du lé, gyi htingchap rachap èq wó ùng pyám lhê a nghut kó lú? Nghut kôlhang, haù radu lháng, nungmoq é Îwâ é myit èq a nghut jáng, myigùng má wó byit gyó râ a nghut. 30 Nungmoq é ulhum mâ é xâm banshoq lé lháng, nghap to gù nghut lhê. 31 Haù mù, hkâgyuq kó; nungmoq gi, haù johkyáng myo myô htoq má lháng gù je bo é bang nghut lhê.

32 Byu pê hí má, Ngo lé lhom yín yu é sù ó yuq lé nghut kôle, mauhkûng htoq mâ é Ngá Wâ é hí má, Ngò lhom yín yù râ nghut lhê.

33 Byu pê é hí má, Ngo le he-ngik pyâm é sù ó yuq lé nghut kôle, mauhkûng htoq mâ é Ngá Wâ é hí má, Ngò he-ngik pyám râ nghut lhê.

34 Ngo lé, haù myidàm htoq má simsaq hkyô byi râ matú lé lo é sù su hkâ-ngâm kó. Ngò gi, simsaq hkyô byi râ matú lé lo é a nghut, shâm byi râ matú sheq lé lo é ru nghut lhê. † 35 Hkâsu mù gâ le, 'Yuqzo gi, yhângwa eq, byizo gi, yhângnu eq, dumó gi, yhângmhoi eq, byoq lhum kó râ nghut lhê.

36 Yhumsing é yhumbyù wuì gi, yhumsing é gyè taù dut râ nghut lhê. * gâ tô é matú sheq, Ngò jé lé é ru nghut lhê.

37 Ngo lé chytit é htoq yhum-sing é ìnu îwa lé je chytit é sù ó yuq nghut kôle, Ngá é chángzo kut râ gingdán sù a nghut; Ngo lé chytit é htoq yhumsing é zo wuì lé je chytit é sù ó yuq nghut kôle, Ngá é chángzo kut râ gingdán sù a nghut; 38 Yhumsing é tapzîng lé a waq é za, Ngá htâng châng é sù ó yuq nghut kôle, Ngá é chángzo kut râ gingdán sù a nghut. 39 Yhumsing é asak lé ha bûn é sù ó yuq nghut kôle, asak sum râ nghut lhê; Ngá é yanmai, yhumsing é asak sùm pyâm é sù ó yuq nghut kôle, asak wó râ nghut lhê.

40 Nungmoq lé hap yù sù gi, Ngo lé hap yu é sù nghut bê; Ngo lé hap yù sù

† 10:25 Bezebulaq gâ é gi, Tsadán é myíng rajà nghut lhê. † 10:34 Yesuq gi, simsaq hkyô byi sù nghut lhê. Nghut kôlhang, Yhang é yanmai, byu pé mabyoq htoq râ nghut é hkyô lé sé mù, haù su ga taì é nghut lhê. * 10:36 Mihka 7:6

gi, haû Ngo lé nhang kat Sû lé hap yu é sù nghut bê. ⁴¹ Myiqhtoi rayuq lé, myiqhtoi đông lhom hap yu é sù ó yuq nghut kôle, myiqhtoi rayuq é chyunghuq lé wó yû râ nghut lhê; dingmán sù rayuq lé, dingmán sù đông lhom hap yu é sù ó yuq nghut kôle, dingmán sù rayuq é chyunghuq lé wó yû râ nghut lhê. ⁴² Shî, tiq bang mâ é rayuq yuq lé, Ngá é chángzo nghut é yanmai, uchyam ragóm byi huq é sù gi, Ngò, nungmoq lé teng za taí kôlé, yhâng é chyunghuq lé hkyak myang hkam yù râ za nghut lhê." gâ ri.

11

Yesuq Eq Wui-myhup Sará Yohan

Luk 7:18-35

¹ Yesuq gi, Yhâng é chángzo raxe í yuq lé dang ban pying é htâng má, Galile mau mâ é wà pé má mhoqshit râ matú eq hko kyo râ matú, haû jowò mai htoq e ló bê nghut ri.

² Wui-myhup Sará Yohan gi, Hkrisduq kut nyi é hkyô lé, htóng hkaû má wó gyo jáng,

³ "Nâng gi, haû jé lé lô râ Sù nghut lhê lú? Haû a nghut jáng, ngamoq gi, góyuq lé lángr ra shirâ lú?" ga, yhâng é chángzô pé lé myí nhang kat ri.

⁴ Yesuq tû taí é gi, "Nungmoq wó gyo wó myang é hkyô, Yohan lé ló taí kyo keq; ⁵ myoqjit bang, myoq wó myâng bekô; hkyí hten bang le, wó so bekô; manggâm dap

bang le, lhoq gê byi é hui bekô; nojit bang le, wó gyo bekô; shî bê bang le, lhoq dui toq é hui bekô; myùng bâng é matú, gabú danglù hko kyô nyi bê nghut lhê. ⁶ Ngá é yanmai, Ngo lé lum shut é hkyô a bò sù gi, hkungsô wó nyi ri." ga taí ri.

⁷ Yohan é chángzô pé taú ló kô é u lé, Yohan eq séng luí, byù moq mó lé Yesuq taí é gi; "Nungmoq gi, haí lé hpuy wú râ matú, haû yoso shut e akô lú? Lai eq hik nhún é jamgâm lé wú râ matú nghut akô lú? ⁸ Haû a nghut jáng, haí lé wú râ matú e akô lú? Nú-nhâm é mebu wut sù lé wú râ matú e akô lú? A nghut. Nú-nhâm é mebu wut bang gi, hkohkâm-wâng pé má sheq rù nyi lhê. ⁹ Haû nghut lé gi, haí lé wú râ matú ê kô é lú? Myiqhtoi rayuq lé lú? Haû kúm nghut ri; Ngò, nungmoq lé taí kôlé, Yohan gi, myiqhtoi htoq lhang gyaú sù nghut lhê. ¹⁰ Haû yuq é hkyô lé, Chýumdang má kâ tô é gi, 'Wú aq, Náng é hkyô lajang lángr râ matú, Ngá é lagyo lé, Náng é hí má Ngò nhang kat râ nghut lhê.'^{*}

gâ ri. ¹¹ Ngò, nungmoq lé teng za taí kôlé, myiwe wui mai hku kat é bang má, Wui-myhup Sará Yohan htoq je kô é rayuq lhang a htoq wú shi; nghut kôlhang, Garaí Gasâng é mauhkông mingdán má je tiq dik sù gi, Yohan htoq je kô lhê. ¹² Wui-myhup Sará Yohan é buinyi mai ahkuí jé

shoq, mauhkûng mingdán gi, lú chyîn wang nyi é hui mù, sarhé pé gi, haú lé wó yû bekô nghut ri. ¹³ Hkâsu mù gâ le, Yohan é ahkyíng jé shoq, haú myiqhtoí pé banshoq eq tarâ gi, haú hkyô eq séng luí, myiqhtoi htoí to gù nghut lhê. ¹⁴ Nungmoq hap yù nau é nghut jáng, Yohan gi, haú jé lé lô râ ga sù Eliyaq nghut lhê.* ¹⁵ Gyô yù râ nohkyap dap sù gi, gyô yù sháng gaq.

¹⁶ Shí ipyat lhê é byu pé lé, Ngò, hai eq taí kê wú râ lhú?

¹⁷ Yhangmoq gi,

'Nungmoq é matú, ngamoq sampyí mut byi kôhlang, nungmoq gi, a gó kó;

ngamoq, ngaù hkyangsâng kôhlang, nungmoq gi, a ngaù kó.'

ga luí, gai pé má zùng mù, góbang lé wut taí lhúm nyi é zoshâng wuì eq wuì akô.

¹⁸ Hkâsu mù gâ le, Yohan gi, jé lé mù, a zo a shuq kut jáng le, yhangmoq gi, yhang lé, 'Yhang gi, nat gang dap sù nghut ri.' ga taí akô. ¹⁹ Haú Byu Yhangzo jé lé luí, zo mù shuq mù kut jáng le, 'Shí yuq gi, zo myoq shuq myoq noq sù eq, kang guq bang eq yubak dap bâng é buinùm hpó nghut ri.' ga dum taí akô. Nghut kôhlang, hpaqchyí byéng-yá gi, yhâng é muzó èq saksé tûn shit nyi ri." gâ ri.

Myit A Lhîng É Wà Mó Pé Hkyô

Luk 10:13-15

²⁰ Hau htâng, Yesuq gi, laklai kumlhá pé je myo kut shit bê nghut kôhlang, myit a lhing é myuq pé lé tân é gi, ²¹ "Kurazin wà mó ê! Nàng dingnyé wó ri! Bet-saida wà mó ê! Nàng dingnyé wó ri! Nungmoq chyáng lé kut shit é laklai kumlhá pé lé, Turuq myuq eq Sidun myuq má kut shit é ru nghut le gi, yhangmoq, noq noq mai myit lhîng mù, jimê tû wut lhê, myiwap kyaq gyûn lhê kut bekô râ nghut lhê. ²² Ngò, nungmoq lé taí kôlé, tarâ jéyáng é buinyi má, nungmoq gi, Turuq myuq eq Sidun myuq htoq má je hpuzo kó râ nghut lhê. ²³ Dum mù, Kaperna-um wà nàng ê, nàng gi, mauhkûng jé shoq waq toq é hui râ lhú? A nghut, mosumhkung má sheq gyó râ nghut lhê. Náng chyáng kut shit é laklai kumlhá lé, haú Sodom wà má kut shit é ru nghut le gi, myuq haú hkû-nyí jé shoq joq nyi râ nghut lhê. ²⁴ Ngò, nungmoq lé taí kôlé, tarâ jéyáng é buinyi má, Sodom wà hpuzô é gi, náng htoq shau râ nghut lhê." gâ ri.

Ngú Nyi Bâng É Matú Bánno Jang

Luk 10:21-22

²⁵ Haú u lé, Yesuq taí é gi, "Mauhkûng eq myigung é Yhumsîng, Áwa ê, Nàng gi, haú pé lé, hpaqchyí byéng-yá bò bang eq myit hpaqchyí sé bâng é hí má nghop to luí, zoshâng wuì lé tûn shit bê nghut é yanmai, Ngò, Nang lé

hkyá-on lhê ô. ²⁶ Nghut bê, Áwa ê, haû gi, Nàng ô nau é hkyô nghut ri.

²⁷ Ngá Wa gi, lhunglhang lé Ngá é loq má ap byi to bê. Haû Zo lé, Áwa mai lai lui ó le a sé; Áwa lé le, haû Zo eq haû Zo mai sé nhâng râ matú hkyin yu é bang mai lai lui ó a sé.

²⁸ Ngú é eq wòlai wun é lhunglhang bang ê, Ngá chyáng lé keq; Ngò, nungmoq lé bánno nhâng râ nghut lhê. ²⁹ Ngò gi, myit nú-nhâm é eq myit lhoq nyhum é sù nghut é yanmai, Ngá é kandang lé waq keq; Ngá chyáng mai mhoq yû keq; haû hkûn, nungmoq é asak woi-nyí bánno kó râ nghut lhê. ³⁰ Haû mù gà le, Ngá é kandang gi, waq lui é htoq agó, Ngá é wò le sôm lhê." gà ri.

12

Bánno Buinyi É Yhumsing
Mrk 2:23-28; 3:1-6; Luk
6:1-5, 6-11

¹ Haû yoq lhê é Bánno buinyi ra-nyí má, Yesuq gi, Yhâng é chángzô pé eq rahá yò hkaû mai sô lai ló nyi ri. Yhâng é chángzô pé gi, zòmut é yanmai, kyôshi ratsuí langshap yû mù, zô akò nghut ri. ² Hparishe pé gi, haû lé myàng kôjáng, "Wú aq! Náng é chángzô pé gi, Bánno buinyi má a ge kut jung lé kut nyi akò." ga tái kat akò.

³ Haû hkûn, Yesuq tû tái é gi, "Dawiq lhang gi, yhâng htâng châng é bang eq rahá zòmut huí é hkûn hkâsu kut

é hkyô lé, nungmoq a nghap wú kó lú? ⁴ Dawiq gi, Garai Gasâng é yhúmkaû má wang ê mù, hkyangjông pé mai lai lui, ó le a ge zô é, kyâng tô é muk lé, yhang eq yhâng htâng châng é bang yù zo kô é a nghut kó lú? ⁵ Hau htoq agó, Bánno buinyi má, hkyangjông pé gi, noqkuq yhúmkaû má Bánno buinyi é tarâ lé shut kôlhang mara a wó é lé, haû tarâ laiká má nungmoq a nghap wú kó lú? ⁶ Ngò, nungmoq lé tái kôlé, haû noqkuq yhúm htoq je ko sù gi, shí má nghut nyi lhê. ⁷ 'Ngò ô nau é gi, hkungga nhông hkyô a nghut, shogyo nhikmyin hkyô sheq ru nghut lhê'☆ gà é lichyúm lé nungmoq sé kô é ru nghut le gi, mara a bò bang lé mara hûn kó râ a nghut. ⁸ Hkâsu mù gà le, haû Byu Yhangzo gi, haû Bánno buinyi é Yhumsing nghut lhê." gà ri.

⁹ Hau htâng, Yhang gi, haû jowò mai e ló mù, yhangmoq é tarajong má wang e ló ri. ¹⁰ Loq rahkyam ajum shi byuq é byù rayuq le, haû má nyi tô ri. Yhangmoq gi, Yesuq lé, "Bánno buinyi má, nòhpyo lhoq gê byi le, tarâ wang lhê lú?" ga myi é dông, Yhang lé mara hûn râ hkyô ho akò nghut ri.

¹¹ Haû hkûn, Yesuq gi, "Nungmoq chyáng mâ é ó yuq wá, yhumsing é sau radu, Bánno buinyi má dong gyó tô le, a xe htoq yu é nyi kó râ lú? ¹² Byù gi, saû htoq má hpaudap dik é nghut lhê!

Haû mù, Bánno buinyì má ge é hkyô kut le, tarâ wang lhê." ga yhangmoq lé tâ tâ ri.

¹³ Hau htâng, Yhang gi, haû loq jum shí sú lé, "Náng é loq nyhang kat aq." ga tâ kat jáng, haú yuq gi, loq nyhang kat jáng, loq haû gi, a no é loq su ge byuq bê nghut ri.

¹⁴ Hparishe pé kúm gi, htoq ló kômù, Yesuq lé hkâsu kut wó sat pyám râ hkyô lé, chôm hpyê lhùm bum akô nghut ri.

Garai Hkyin Tô É Dui-nhâng Zoshâng

¹⁵ Yesuq gi, haú hkyô lé sé jáng, haú jowò mai htoq ló bê nghut ri. Byù myo myo le, Yhâng htâng châng bùm kômù,

Yhang gi, nõhpyo hui bang banshoq lé lhoq gê byi luí,

¹⁶ Yhang ó yuq nghut é hkyô lé, a tâ byông htoq râ matú, yhangmoq lé tâ hkùm tô ri.

¹⁷ Haû gi, myiqhtoi Esai-aq é nhut dông mai tâ tô é dang lé lhoq dik râ matú nghut ri. Dang haú pé gi,

¹⁸ "Shí yuq gi, Ngò chyit, Ngò myit nguì luí, hkyin tô é Ngá é dui-nhâng zoshâng nghut lhê;

Ngò gi, Ngá é Woi-nyí, Yhang lé kat byi râ nghut mù,

Yhang gi, tarâ dingmán é hkyô lé byù myû banshoq pé má tâ kyo râ nghut lhê.

¹⁹ Yhang gi, haí a hpuq tù é htoq agó, a garu râ nghut lhê; Yhâng é htê lé, hkyô mó pé má wó gyo râ a nghut.

²⁰ Yhang gi, tarâ dingmán é hkyô lhoq ung é hkùn jê shoq,

nâng chap pyám bê jàm gàm lé le, lhoq hkyui râ a nghut, myihkau za htoq nyí bê myi lé le, lhoq sat pyám râ a nghut.

²¹ Byù myû chângjup gi, Yhâng é myìng má myit myoqbyù kó râ nghut lhê."^{*}

gâ ri.

Yesuq Eq Bezebulaq

Mrk 3:20-30; Luk 11:14-23; 12:10; 6:43-45

²² Hau htâng, agè ashop é nat gang wang júng luí, myoqjit nhutjit é byù rayuq lé, Yesuq chyáng shuí lé lô kôjáng, Yesuq gi, haú yuq lé lhom lhoq gê byi ri; haû mù, haú yuq gi, dang le wó nyô, myoq le wó myâng dut bê nghut ri. ²³ Byù hpúng mó gi, haú lé wú maú byuq kômù, "Shí yuq, Dawiq é Yhangzo za gi, nghut lhê laq?" ga tâ bum akô.

²⁴ Nghut kôlhang, Hparishe pé gi, haú lé wó gyo kôjáng, "Shí yuq gi, nat gâng pé é zau Bezebulaq* é wum-o a-tsam èq za nat gâng pé lé wó hkat htoq é nghut ri." ga tâ bum akô nghut ri.

²⁵ Yhangmoq myit nyi é hkyô lé Yesuq sé mù, yhangmoq lé tâ é gi, "Hká mingdán nghut kôle, ahkaû má byoq gâng lhùm nyi kô é nghut jáng, htên byoq byuq râ za nghut lhê; haû eq rajung

* 12:21 Esai 42:1-4 * 12:24 Bezebulaq gâ é gi, Tsadán é myìng rajà nghut lhê.

za, myuq ralhūm nghut nghut, yhumhtu ralhūm nghut nghut, yhangchang byoq lhūm nyi kô é nghut jáng, haū gi, wó gīng nyi rā a nghut. ²⁶ Tsadán gi, Tsadán lé hkat htoq pyām é nghut jáng, yhumsing gūng yhumsing lhoq hpyoq nyi gù bê nghut ri. Haū su nghut jáng, yhāng é mingdán gi, hkāsu kut wó gīng to rā lhú? ²⁷ Haū mù luī, Ngò gi, Bezebulaq é wum-o a-tsam eq za nat gāng pé lé hkat htoq é nghut jáng, nungmoq é byu pé gi, ó yuq é wum-o a-tsam eq hkat htoq pyām kô é nghut lhê lhú? Haū su nghut jáng, haū bang gi, nungmoq lé tarā jéyāng bang dut kó rā nghut lhê. ²⁸ Nghut kôlhāng, Ngò gi, Garai Gasāng é Woi-nyí eq nat gāng pé lé hkat htoq pyām é nghut jáng, Garai Gasāng é mingdán gi, nungmoq chyāng jé bê nghut ri.

²⁹ Ó yuq nghut kôle, wum-o bò sū lé hí tuī zing pyām é a nghut le gi, yhāng é yhūm má lú wāng mù, yhāng é sutzè lé hkāsu wó lú yū rā lhú? Haū yuq lé hí tuī zing pyām jáng sheq, yhāng é sutzè lé wó lú yū rā nghut lhê.

³⁰ Ngá hkyam shut a dap sū gi, Ngo lé gyè kut sū nghut lhê; Ngò eq rahá a shūm tsing sū gi, lhoq pyo pyām é sū nghut nyi ri. ³¹ Haū mù, Ngò, nungmoq lé táí kôlé, byu pé é yubak mara hkanmó eq Garai Gasāng lé rhoi dang táí pyām é lhunghāng gi, mara hkyut byi é wó hui rā nghut

lhê. Nghut kôlhāng, haū Chyoyiúng Woi-nyí lé rhoi dang táí pyām é gi, mara hkyut byi é hui rā a nghut. ³² Haū Byu Yhangzo lé dang dông shut é sū gi, mara hkyut byi é wó hui rā nghut lhê; nghut kôlhāng, haū Chyoyiúng Woi-nyí lé dang táí shut é sū gi, shí ipyat má le, htang pyat má le, mara hkyut byi é hui rā a nghut.

³³ Ashi lé wú luī, agām lé sé rā nghut é yanmai, agām lé lhoq gē jáng, ashī le gē rā nghut lhê; agām lé a lhoq gē jáng, ashī le gē rā a nghut; ³⁴ Duq htān lhangmúi amyū ê, nungmoq gi, agē ashop é bang nghut to kôluī nhīng, dang gē hkāsu wó táí kó rā lhú? Hkāsu mù gā le, i-myt unghkaū má byīng mui tō é lé za, nhut mai táí htoq lo é nghut lhê. ³⁵ Ge é sū gi, yhumsing é i-myt unghkaū mā é sutdò mai ge é zè pé lé lhoq htoq shit lhê. Agē ashop é sū gi, yhumsing é i-myt unghkaū mā é agē ashop é sutdò mai, agē ashop é zè pé lé lhoq htoq shit lhê. ³⁶ Ngò, nungmoq lé táí kôlé, byū gi, yhumsing táí kat é akyū a bo é dang pé é matú, tarā jéyāng é buinyi má táí sān kyo ra kó rā nghut lhê. ³⁷ Hkāsu mù gā le, yhumsing mara lut rā le, ó le ó táí é dang pé mai; mara byi é hui rā le, ó le ó táí é dang pé mai, nghut rā nghut lhê." gā ri.

Limik Kumhá Lé Dung Kô É Hkyô

Mrk 8:11-12; Luk 11:29-32;

11:24-26

³⁸ Hau htâng má, Hparishe pé eq tarâ sará pé ra-am gi, "Sarâ ê, ngamoq gi, Nang, limik kumlhá kut shit râ lé myàng nau ri." ga Yhang lé dúng akô.

³⁹ Haû mù, Yhang tû taí é gi, "Agè ashop é eq lhum a zuí é ipyat shî gi, limik kumlhá dung nyi ri myhi-nhung! My-iqhstoi Yonaq é kumlhá mai lai luí, gotú haí le tûn shit râ a nghut. ⁴⁰ Hkâsu mù gâ le, Yonaq gi, ngo mó é wamdau hkaû má sum nyí sum myîn lúng é su, haû Byu Yhangzo le, myigùng káng má sum nyí sum myîn lúng râ nghut lhê.

⁴¹ Ninewe wâ byu wuì gi, Yonaq mungdang hko kyô é hkûn myit lhîng kô é nghut mù, tarâ jéyáng é buinyi má, ipyat shí mâ é bang eq rahá toq lò luí, ipyat shí mâ é bang lé mara hûn kó râ nghut lhê; haû Yonaq htoq ko sù gi, ahkuí shí má jé nyi to bê. ⁴² Maupyî mâ é hkohkâm myhí gi, maumyî ló htâng é mai lé lô mù, Sholumon é hpaqchyî dang lé, lé gyô yù bê nghut mù, haû tarâ jéyáng é buinyi má, ipyat shí mâ é bang eq rahá toq lò luí, ipyat shí mâ é bang lé mara hûn râ nghut lhê; haû Sholumon htoq ko sù gi, ahkuí shí má jé nyi to bê.

⁴³ Haû agè ashop é nat gi, byu rayuq chyáng mai htoq lò mù, kyuq huí é jowò pé má sô yông e ló luí, no râ jowò hkat ho wú le, a myang hô nghut ri. ⁴⁴ Haú hkûn, yhang gi, 'Ngò nyi lai lo é yhûm má

dum taû ló wú râ.' ga taí ri. Yhang dum taû jé ló wú le, yhûm haú lé, ó le a sing yu hpyuq é htoq agó, san za rago dut to lánq é lé ló myang ri. ⁴⁵ Haú jáng, yhang gi, dum taû é mù, yhâng htoq je wuì é nat nyhit nat lé shuî lò luí, haú má lo wang nyi to bekô. Haû mù, haú yuq é nyi yap sâmlai gi, hí lhê htoq má je wuì lò bê nghut ri; agè ashop é ipyat shî le, haû eq rajung za dut râ nghut lhê." gâ ri.

Yesuq É Yhângnu Eq Yhanggú Pé

Mrk 3:31-35; Luk 8:19-21

⁴⁶ Yesuq, shiwa byu pé lé dang rû nyo nyi ashí hkûn, yhângnu eq yhanggu pé gi, Yhang lé nyò nau kômù, shinggan má lé yap tô akô nghut ri. ⁴⁷ Haû mù, Yesuq lé, "Náng nu eq nunggu pé gi, Nang lé nyò nau mù, shinggan má lánq yap bum akô." ga taí kyô akô.

⁴⁸ Haú hkûn, Yhang gi, "Ô pé gi, Ngá nu eq Ngá gu pé nghut akô lhú?" ga tû taí kat ri. ⁴⁹ Hau htâng, Yhang gi, Yhâng é chángzô pé lé loq tun luí, "Wú keq, shí bang gi, Ngá nu eq Ngá é gumang wuì nghut bê. ⁵⁰ Hkâsu mù gâ le, mauhkûng htoq mâ é Ngá Wa ô nau é hkyô châng é sù ó yuq nghut kôle, Ngá gu Ngá mang, Ngá gu Ngá nhá, Ngá nu chyat nghut bê." ga xoq taí ri.

13

Kyôshi Sân É Dangtú

Mrk 4:1-20; Luk 8:4-15

¹ Haú nyí má yhang, Yesuq gi, yhúmhkaú mai htoq ló mù, wuì nhông yàm má ê zung tô ri. ² Byù hpúng mó gi, Yhâng é lhíngkhyuq má zup zíng lé búm kô é yanmai, Yhang gi, lhai hkaú má doq zùng tô ri. Shiwa byu pé kúm gi, gin-gau htoq má yap tô bum akô. ³ Hau htâng, Yhang gi, haú bang lé, dangtú pé dông myo myo taí é má, "Kyô hkyó sù rayuq gi, kyôshi san râ ga htoq e ló ri. ⁴ Yhang, kyôshi sân kat é hkún, ra-am gi, hkyô má gyó ang mù, ngoq pè eq lé hte zô pyám ri. ⁵ Ra-am gi, myi-tse a htu é luqgok yò pé má gyó ang mù, myi-tse a htu é yanmai, lui za yuq htoq lô kôle, ⁶ amyit a wó chin hing é nghut mù, buì htoq lô jáng, lhap kyuq pyám bê nghut ri. ⁷ Dum ra-am gi, zugyóm hkaú má gyó ang lui, zubyap haú pé kô lò mù, wup pyám ri. ⁸ Ra-am dum nghut jáng, myihpún bo é jang má gyó ang lui, ashi zuí lo é gi, sân kat é htoq rashô tú, hkyuq xê tú, sum xê tú, myô jat lo é nghut ri. ⁹ Gyô yù râ nohkyap dap sù gi, gyô yù sháng gaq." ga le taí ri.

¹⁰ Haú hkún, chángzô pé gi, Yhâng chyáng lé mù, "Nàng gi, haí mù, shí bang lé, dangtú dông taí lhé lú?" ga myí akô.

¹¹ Haú jáng, Yhang tû taí é gi, "Mauhkung mingdán eq sêng é sê gyo wuì é hkyô pé lé sê gyo râ ahko ahkáng, nungmoq lé byí to bê, nghut kôlhang, yhangmoq lé gi, a

byi shí é nghut lhé. ¹² Wó to sù lé gi, yhang agùn agó wó râ matú, jat byi shirâ nghut lhé. A wó su chyáng mai kúm gi, yhang wó tô é lé lhang yu pyám byi shirâ nghut lhé. ¹³ Yhangmoq gi, wú to kôlhang, a myàng kó; gyô nyi kôlhang, a wó gyo, a sê gyo kó nghut é yanmai, yhangmoq lé Ngò dangtú dông taí râ é nghut lhé.

¹⁴ Haú gi,

'Nungmoq gi, wó gyô tô nyi kôlhang, sê gyo kó râ a nghut;

myang tô nyi kôlhang, wú sé kó râ a nghut.

¹⁵ Hkâsu mù gâ le, byù shí bang gi, myit nhikshi jit byuq bê;

yhangmoq é nohkyap gi, a wó gyo kó,

myoqjí le chûm byuq bekô nghut ri.

Haú su a nghut le gi, yhangmoq, myoq myàng no gyo mù,

i-myt bun bóng lui, lhing lô kômù,

Ngò, yhangmoq lé yâ gè byi berâ nghut lhé.*

gâ é, Esai-aq é myiqhtoi dang lé lhoq dik é nghut ri.

¹⁶ Nghut kôlhang, nungmoq é myoq gi, wó myàng mù, nungmoq é nohkyap gi, wó gyô é yanmai, nungmoq gi, hkungsô wó nyi ri.

¹⁷ Hkâsu mù gâ le, Ngò, nungmoq lé teng za taí kôlé, nungmoq wó myàng, wó gyô é pé lé, myiqhtoi pé eq dingmán bang myo myo gi, myàng nau

gyo naû kôlhang, a wó myâng, a wó gyo kó nghut ri.

¹⁸ Ahkuî, kyôshi san sù eq sêng é dangtú é lichyúm lé rago gyô wú keq; ¹⁹ Hkyô má gyô âng é kyôshi gi, mauhkông mingdán eq sêng é danglù lé wó gyo kôlhang, a sê gyô é yanmai, haû agè ashop sù lé lô mù, yhâng é i-myt hkaû má san kat tô é kyôshi lé, lé yu pyám byî é hui sù lé gá nau é nghut lhê. ²⁰ Luqgok yò pé má gyô âng é kyôshi gi, mungdang lé wó gyo jáng, radá dâm gabú myit èq hap yù kôlhang, ²¹ amyit a wó chîn é yanmai, razup zo za yuq mù, mungdâng é yanmai, wuîhkê é eq zing-rî é hui kôjáng, hân hân htao ló byuq é sù lé gá nau é nghut lhê. ²² Zugyóm má gyô âng é kyôshi gi, haû mungdang lé wó gyô yù kôlhang, shí ipyat lhê é myit wui myit hke hkyô pé eq hkyô shuî ngoq jung ngùn hîng zèhkoq èq hup pyâm é yanmai, ashi a wó zuî é sù lé gá nau é nghut lhê. ²³ Nghut kôlhang, myîhpún bo é jang má gyô âng é kyôshi kúm gi, mungdang lé wó gyo mù, sê gyô yu é sù lé gá nau é nghut lhê. Haû yuq ashi zuî é gi, san kat é htoq rashô tú, hkyuq xê tú, sum xê tú, myô jat lo é nghut ri.

Myoqgàm Dangtú

²⁴ Yesuq, yhangmoq lé dangtú dông xoq taî kyô é gi, "Mauhkông mingdán gi, ge é kyôshi lé, yò má san kat sù rayuq eq du ri. ²⁵ Byu pé yhup myhî tô bum é u lé, yhâng

é gyè gi, lé jé mù, guq gàm gyoro má, myoqshi lé sân to hkó luî, taû ló byuq bê nghut ri. ²⁶ Guq gàm yuq lò mù, guq nhâm htoq lo é hkùn, myoqgàm le bo yuq htoq lo ri.

²⁷ Yhumsîng hpô é dui-nhâng zoshâng wui gi, yhâng chyáng lé jé mù, 'Yhumsîng ê, ge é kyôshi lé za yò má sân tô é a nghut lú? Myoqgàm pé gi, hkâmai htoq lo é lú?' ga myi kôjáng, ²⁸ haû yhumsîng hpô gi, 'Gumlau gye èq kut é nghut ri.' ga tú taî ri.

Haû jáng, dui-nhâng zoshâng wui gi, 'Ngamoq, myoq haû pé lé ê nut pyám râ lé, nàng ô nau ri lú?' ga myî akô.

²⁹ Haû hkùn, yhang gi, 'Hká nut pyám kó; hkâsu mù gá le, nungmoq, myoq haû pé lé nut é hkùn, guq gàm pé lé le bo záng nut pyám kó râ nghut lhê. ³⁰ Kyôshu yoq jé shoq rahá yuq to kó sháng gaq; haû hkùn, myoqgàm pé lé hí hkyin tsîng yù mù, nyhê hkyô pyám râ matú hkyom dîng to luî, guq lé kúm gi, shû yù mù, ngá é chyî má tsîng kat to râ matú, kyô shu bang lé ngò taî râ nghut lhê.' ga tú taî ri." gá ri.

Angshi Cham Eq Múnchi Dangtú

Mrk 4:30-34; Luk 13:18-21

³¹ Hau htâng, Yesuq gi, yhangmoq lé gotú dangtú ralhum dum xoq taî é gi; "Mauhkông mingdán gi, byù rayuq èq, yhâng hkyâm má hô tô é angshi cham eq wui ri. ³² Angshi cham haû gi, kyômyui jí banshoq htoq má

je tiq é nghut kôle, yuq kô lò jáng, hkyâm má hô é mhan-haq hpoqnoq gàm banshoq htoq má je kô é agàm dut lò mù, akoq pé má, maulat nghoq zô pé lé wó zung nô bum lhê." gâ ri.

³³ Yhang, gotû dangtú dum xoq taí é gi, "Mauhkûng mingdán gi, myiwe rayuq èq sungso mún sum bûng má yu nyhó luí, haú pé banshoq lé wó lhoq dau nhang é múnchi eq wuí ri." gâ ri.

³⁴ Yesuq gi, byù moq mó lé, haú pé banshoq dangtú dông mai chyat taí ri; yhangmoq lé, dangtú a bo é haí lháng a taí wú nghut ri. ³⁵ Haú gi,

"Ngá nhut lé hpóng mù, dangtú dông mai taí rã; mingkan lé sâng-hi hpan é mai zaú tô é hkyô pé lé taí sân kyo rã nghut lhê."*

ga, myiqhtoi dông taí tô é dang lo dik é nghut ri.

Myoqgàm Dangtú Lé Taí Sân Kyô É Hkyô

³⁶ Hau htâng má, Yesuq gi, byù moq mó mai htoq ló mù, yhúmhaú má wang ló ri. Haú hkûn, Yhâng é chángzô pé gi, Yhâng chyáng lé lô kômù, "Yò mâ é myoqgàm dangtú eq sêng é hkyô lé taí sân kyo laq." ga taí akô.

³⁷ Haú jáng, Yhang tû taí é gi, "Ge é kyôshi san sù gi, haú Byu Yhangzo nghut ri.

³⁸ Yò gi, mingkan nghut ri; ge é kyôshi gi, mauhkûng mingdán é yhangzô pé nghut akô. Myoqgàm pé kúm gi,

haú Tsadán é yhangzô pé nghut akô; ³⁹ haú lé châng hkat sân é gumlau gyè gi, nat Tsadán nghut ri. Kyôshu yoq gi, mingkan htûm é ahkyíng nghut ri; kyô shu bang gi, maumang lagyô pé nghut akô.

⁴⁰ Haú myoqgàm pé lé, nut yù mù, myí má nyhê pyâm é su, haú mingkan htûm é ahkyíng má dut rã nghut lhê. ⁴¹ Haú Byu Yhangzo gi, Yhâng é maumang lagyô pé lé nhâng rã nghut lhê;

haú mù, haú bang gi, hkyô lhoq nghoq nhang é bang banshoq eq agè ashop hkyô kut é bang lhunglháng lé, Yhâng é mingdán mai hkyin she htoq yù mù, ⁴² gyúng nyi é myibung hkyûng hkaú má dú kat pyám kó rã nghut lhê; hau má, ngaubyi ngaù nhap eq zuí kyik kyik shoq hpuzô nyi kó rã nghut lhê. ⁴³ Haú hkûn, dingmán bang gi, yhangmoq Yhângwâ é mingdán má bui su duqbó nyi kó rã nghut lhê. Nohkyap dap sù gi, gyô yù sháng gaq.

Haq Tô É Sutzè Dangtú

⁴⁴ Mauhkûng mingdán gi, yò má haq tô é sutzè eq wuí ri. Sutzè haú lé myang é sù gi, haú lé saí haq to mù, gabú myit èq taú ló luí, yhang wó é banshoq lé ûng pyám mù, yò haú lé wui yu ri.

⁴⁵ Dum, mauhkûng mingdán gi, réng é palhé lé châng ho wún é hpugá hpó eq wuí ri. ⁴⁶ Yhang gi, gyai hpaú é palhé lé myàng jáng, yhang

wó é banshoq lé ló ùng pyám mù, haú lé wui yu ri.

Gùn Lé Dangtú Yu É Hkyô

⁴⁷ Mauhkûng mingdán gi, nhông má, ngozo ajà jà lé wó dú nghop yu é gùn eq le wui ri. ⁴⁸ Gùn haú má ngozo byíng jáng, ngo kóng bang gi, wui yàm má she htoq yú mù, zung to luí, ge é pé lé gi, ngo-pyap má guq kat yú luí, a ge é pé lé gi, dú pyám akô. ⁴⁹ Haú eq rajung za, mingkan htúm é ahkýng má le, maumang lagyô pé gi, gyó lé lô mù, agè ashop é bang lé, dingmán bâng chyáng mai gam htoq yú luí, ⁵⁰ ngaubyi ngàu nhap eq zuí kyik kyik shoq hpuzô nyi râ nghut é, gyúng nyi é myi-bung hkyûng hkaú má dú kat pyám kó râ nghut lhê.

⁵¹ Shí hkyô banshoq lé nungmoq sê gyo bekô lhú?" gâ ri.

Haú hkûn, yhangmoq gi, "Sê gyo bê." ga tù taí akô nghut ri.

⁵² Hau htâng, Yesuq gi, yhangmoq lé, "Mauhkûng mingdán eq séng luí mhoq yú bê é tarâ sará ó nghut kôle, yhang mhoq é hkyô gi, yhumsing é sut-púnglhung hkaú mai zè sik zè xau lé yu htoq é yhumsing hpó rayuq eq wuí ri." ga dum taí ri.

Myiqhtoi, Myoqdong A Wó Dut É Jang

Mrk 6:1-6; Luk 4:16-30

⁵³ Yesuq gi, dangtú haú pé lé ban taí jáng, haú jowò mai htoq e ló bê nghut ri. ⁵⁴ Yhang gi, Yhâng é yhummau má jé

ló jáng, byu pé lé, yhangmoq é tarajong má mhoqshit ri; haú hkûn, yhangmoq gi, gyô maú byuq kôluí, "Byù shí yuq gi, hpaqchyí byéng-yá shí eq hpungwup a-tsam mó shí pé lé, hkâmai wó yu é nghut lhê là? ⁵⁵ Yhang gi, laksíma hpô é yhangzo a nghut lhú? Yhângnú é myíng gi, Mariq gâ lhê a nghut lhú? Yhanggú pé gi, Yakuq, Yosep, Simun eq Yudaq gâ é bang a nghut kó lhú? ⁵⁶ Yhâng nhammó pé le, nga-nhung eq rahá nghut nyi lhê a nghut kó lhú? Haú su nghut le nhîng, haú pé banshoq lé, Yhang hkâmai wó yu é nghut lhê là?" ga myí bùm kômù, ⁵⁷ Yesuq lé myit a ngón dut bùm bekô nghut ri.

Yesuq kúm gi, yhangmoq lé, "Myiqhtoi rayuq gi, yhum-sing é yhummau eq yhumsing é yhúm má za, myoqdong a lhaq wó wú é nghut lhê." ga tù taí kat ri.

⁵⁸ Yhangmoq lumjîng myit a bò kô é yanmai, Yesuq gi, haú má, laklaí kumlhá myo myo a kut shit lo nghut ri.

14

Wui-myhup Sará Yohan Shi Byuq É Hkyô

Mrk 6:14-29; Luk 9:7-9

¹ Haú hkûn, mauzau Herut gi, Yesuq eq séng é ludang lé wó gyo jáng, ² yhâng a-ô mã é bang lé, "Shí yuq gi, Wui-myhup Sará Yohan nghut ri-nhung; Yhang gi, shí é mai dum dui toq lo é nghut mù, hpungwup a-tsam haú pé lé wó kut é nghut ri." ga taí ri.

³ Herut haû su gâ é gi, yhanggu Hpilip é yhangmyi Herudiaq é yanmai, Yohan lé chyup tuí yù mù, htóng hkyô pyâm é yanmai nghut ri. ⁴ Hkâsu mù gâ le, Yohan gi, yhang lé, "Nàng, myiwe haú lé hâng yu é gi, tarâ a wang é nghut lhê." ga taí byí nyi é yanmai nghut ri. ⁵ Herut gi, Yohan lé sat pyám naû kôlhang, mingbyû wui lé gyuq é yanmai, a wám sat nghut ri; haí mù gâ le, yhangmoq gi, Yohan lé myiqhtoi tsuq nyí kô é yanmai nghut ri.

⁶ Nghut kôlhang, Herut é hkû ladu hkyúm buinyi má, Herudiaq é yhangzo byizo gi, yhangmoq é hí má gó shít é lé, Herut gi, gyai yhang wú myit nguì mù, ⁷ byizo haú lé, yhang haí dung le haí byi râ ga dakam é dang-gidiq byí ri. ⁸ Byizo haú gi, yhângnu hpaqchyí byí é lé gyô yù mù, "Shí, bó má, Wui-myhup Sará Yohan é ulhum lé, kat byi laq." ga, Herut lé dúng ri. ⁹ Mauzau hpó gi, myit a ngón dut byuq kôlhang, yhang dakam tô é danggidiq é yanmai le, bíng pê é myoqdong lé tê nau é yanmai le, yhang dúng é lé, byi râ matú, ¹⁰ htóng hkaû má lúng tô é Yohan é ulhum lé hpyit râ hkunmó hkyô kat bê nghut ri. ¹¹ Yohan é ulhum lé bó má kat luí, myiwe zo haú lé byi jáng, myiwe zo haú gi, haú lé yhângnú chyáng yu ló byí ri. ¹² Haú mù, Yohan é chángzô pé gi, yhâng é mâng lé lé yû luí, myhup pyám bekô nghut

ri. Hau htâng, yhangmoq gi, Yesuq lé ló taí kyô akô nghut ri.

Byù Ngo Hkyíng Lé Byi Tsô É Hkyô

Mrk 6:30-44; Luk 9:10-17; Yhn 6:1-14

¹³ Yesuq gi, haú hkyô lé wó gyo jáng, haú mai lhai ji mù, tsím tsâm é jowò shut Yhang baú e ló ri. Haú lé, byu pé wó gyô bùm kôjáng, wà mó pé mai htoq lé lô kômù, hkyí hkyô Yhâng htâng châng e ló akô nghut ri. ¹⁴ Yesuq gi, lhai mai gyó dap ló é hkûn, byu moq mó nyi to lánng é lé myàng jáng, yhangmoq lé wú shogyo luí, nò bang lé lhoq gê byí ri.

¹⁵ Myinhâng jé lô jáng, haú chángzô pé gi, Yhâng chyáng lé kômù, "Shí má gi, tsím tsâm é jowò nghut é htoq agó, bui le gyum ló bê nghut mù, shiwa byu pé gi, wà pé shut ló luí, yhangmoq é matú zôjung ló wó wui kó sháng gaq, yhangmoq lé nhang kat aq hkoi." ga taí akô.

¹⁶ Haú hkûn, Yesuq gi, "Yhangmoq ló a ra. Nungmoq, yhangmoq lé rajung jung byi tso keq." ga tû taí kat ri.

¹⁷ Haú su ga jáng, yhangmoq gi, "Muk ngo long eq ngozo í du za ru wó lhê." ga dum tû taí akô.

¹⁸ Haú jáng, Yesuq gi, "Yu lò keq." ga tû taí mù, ¹⁹ shiwa byu pé lé, wàhu yò má zùng nhang ri. Hau htâng, Yhang gi, haú muk ngo long eq ngozo í du lé yù mù, mauhkung shut tu wú to luí,

jeju ban hkya-on jáng, muk lé hpê gàm mù, chángzô pé lé byí ri. Haú chángzô pé gi, shiwa byu pé lé gàm byí akô nghut ri. ²⁰ Yhangmoq banshoq bang zô gyí bùm kô é htâng má, haú chángzô pé gi, zô myhit tô é pé lé, raxe í mung byíng shoq wó guq tsíng yu ashî kô nghut ri. ²¹ Haú má zô é bang gi, myiwe wuì eq zoshâng wuì lé a nghap lhôm é za, yuqgè baú ngo hkyíng kô bo ri.

Yesuq, Wuì Htoq Má Sô É Hkyô

Mrk 6:45-56; Yhn 6:15-21

²² Yesuq gi, haú shiwa byu pé lé byo ló nhang nyi é hkún jáng, chángzô pé lé lhaí má wang ji nhâng mù, tú tap shut dap ló lánng nhâng ri. ²³ Shiwa byu pé lé nhang pyâm é htâng má, Yhang gi, kyúdung râ ga, Yhang baú bùm shut doq e ló ri. Myinhtâng chutshúm zó jé shoq, Yhang baú haú má nyi nyi ri. ²⁴ Haú u lé, lhaí gi, gin-gau mai tsómra wê é jowò má jé é hkún, laì tau mut é yan-mai, wuìheng èq gyai yhang lo bat nhùn é hui zô ri.

²⁵ Htang napsùn maubó zó sum hkyíng eq hkyuq hkyíng gyoro má, Yesuq gi, nhông htoq má so mù, yhangmoq chyáng lé lo ri. ²⁶ Haú mù, chángzô pé gi, Yesuq nhông htoq má sô nyi é lé myàng kôjáng, gyuq dàn kômù, "Sobyô ô!" ga gyuq nán é èq taì garú akô nghut ri.

²⁷ Haú jáng yhang, Yesuq gi, yhangmoq lé, "Hkâgyuq kó!

Ngò ru nghut lhê; myit wum lhoq kíng keq." ga nyo kat ri.

²⁸ Haú hkún, Petruq gi, "Yhumsíng ê, Nàng yhang ru nghut le gi, ngo lé, wuì htoq mai sô lé lô nhâng laq." ga taì kat ri.

²⁹ Haú jáng, Yesuq gi, "Lé lô aq." ga tú taì kat ri.

Haú mù, Petruq gi, lhaí mai gyó mù, wuì htoq mai Yesuq chyáng sô e ló ri. ³⁰ Nghut kôlhang, yhang gi, laidun htan é lé myang kat jáng, wú gyuq luí, wuì má nop ló nyi mù, "Yhumsíng ê, ngo lé hkyi yù laq." ga wut garú kat ri.

³¹ Yesuq gi, radá dâm yhâng é loq lhâm kat luí, Petruq lé lánng zing to mù, "Lumjíng myit shau sô ê, nàng haí mù úng-âng lhê lhu?" ga taì ri.

³² Yhangnhik, lhaí má wàng kôjáng, laidun le zím byuq bê nghut ri. ³³ Hau htâng, haú lhaí má lúng tô é bang gi, Yhang lé paí gop mù, "Nàng gi, gè gè yhang, Garai Gasâng é Yhangzo nghut bê." ga taì akô nghut ri.

³⁴ Yhangmoq gi, gû dap ló kômù, Genesarat mau má jé wang ló bekô nghut ri. ³⁵ Haú mau mâ é bang gi, Yesuq lé wú sé kôjáng, awui ayàm mâ é bang banshoq lé kyô kat akô. Haú mù, byu pé gi, nòhpyo hui bang lhunglhang lé, shuí lé lô kômù, ³⁶ nòhpyo hui bang lé, Yhâng é bushi htâng má za lhang záng nhâng râ matú dúng tôngbán akô; Yhang lé záng é lhunglhang bang gi, lhoq gè byí é hui bekô nghut ri.

15

Sansêng É Hkyô Eq A

Sansêng É Hkyô

Mrk 7:1-23

¹ Hau htâng má, Hparishe pé eq tarâ sará pé ra-am gi, Yerusalem wà mó mai Yesuq chyáng jé lé lô kômù, ² "Náng é chángzô pé gi, haî mù luí, îchyí îwa pé é htungli lé a cháng kut akô lúhú? Yhangmoq gi, loq hí a chí é zang zô akô nghut ri." ga, lé taî akô.

³ Haú jáng, Yesuq tû taî é gi, "Nungmoq gi, haî mù, nungmoq é htunglí é yanmai, Garai Gasâng é hkunmó lé a cháng kô é lúhú? ⁴ Hkâsu mù gà le, Garai Gasang gi, 'Nungmoq é înu îwa lé, hkungga keq.'* ga le, 'Înu îwa lé, nhîng é sù ó yuq nghut kôle, sat pyâm é hui râ lhê.'* ga le, taî tô é nghut lhê.

⁵ Nghut kôlhang, nungmoq taî é gi, 'byù rayuq yuq, yhumsing é yhângnu yhângwa lé byi âng é zè lé, Garai Gasang lé byi râ chyunghuq nghut lhê ga taî é nghut jáng, ⁶ haú yuq gi, yhângwa lé hkungga nó a ra.' gà akô nghut ri. Haú dông mai, nungmoq gi, nungmoq é htunglí é yanmai, Garai Gasâng é mungdang lé he-ngik pyâm akô nghut ri. ⁷ Gegùn labyoq kut bang ê! Nungmoq eq séng luí, myiqh-toi Esai-aq htoî tô é dang gi, têng ri. ⁸ Myiqh-toi dang haú gi,

'Byù shí bang gi, nhut htoq mai za Ngo lé hkunggâ akô;

yhangmoq é myit nhikhum gi, Ngò eq wê gâng nyi akô.

⁹ Yhangmoq, Ngo lé noqkuq nyi kô é gi, akôm má za nghut nyi ri;

hkâsu mù gà le, yhangmoq é mhoqshit hkyô pé gi, byù dông mai mhoqshit é hkyô pé za nghut nyi ri.*

gâ é nghut lhê." gà ri.

¹⁰ Hau htâng, Yesuq gi, shiwa byu pé lé, Yhâng chyáng wut yù luí, "Gyô yù mù, sé lo keq. ¹¹ Nhut má wang lo é haî jung le, byù lé a sanséng dut nhang é a nghut, nhut mai htoq lo é pé sheq, byù lé a sanséng dut nhang é ru nghut lhê." ga taî ri.

¹² Haú hkûn, haú chángzô pé gi, Yhâng chyáng lé lô kôluí, "Hparishe pé gi, shí hkyô lé wó gyo mù, nhik-yô nyi bùm kô é lé, Nàng sê lhê lúhú?" ga myi kôjáng,

¹³ Yhang gi, "Mauhkûng htoq tsáng myhâng mâ é Ngá Wa a hô tô é agàm hkangmó gi, apûn eq roq nut pyâm é hui râ nghut lhê. ¹⁴ Yhangmoq é yanmai, myit hkâ-myô kó; yhangmoq gi, myoqjit bang nghut kôle, myoqjit é bang lé hkyô-u she é bang nghut akô. Myoqjit yhangchang hkyô-u she lhûm é nghut le gi, í yuq é yhang donghkong má byit gyó kó râ za nghut lhê." ga tû taî ri.

¹⁵ Haú hkûn, Petruq gi, "Ngamoq lé, dangtú hau é lichyúm taî sân kyo laq." ga taî

* 15:4 Htoq Lô 20:12

* 15:4 Htoq Lô 21:17

* 15:9 Esai 29:13

jáng, ¹⁶ Yesuq gi, "Nungmoq, ahkuí le haú-í yhang go nyi ashi kô luq? ¹⁷ Nhut má wang lo é hái jung le, wamdau hkaú má jé wang ló mù, gungdu mai dum htoq ló é nghut lhê. ¹⁸ Nghut kôlhang, nhut mai htoq lo é gi, myit nhiklhum mai htoq lo é nghut mù, byù lé a sanséng dut nhang ri. ¹⁹ Hkâsu mù gâ le, myit nhiklhum mai htoq lo é gi, agè ashop é dông myit é hkyô pé, byù sat é hkyô, su-myi sulàng lú hkyô, ashop é dông gungsho zùm yap é hkyô, hkaú é hkyô, a tengmán é saksé hkâm é hkyô, lumù gansang é hkyô pé nghut ri. ²⁰ Haú pé gi, byù lé a sanséng dut nhang é hkyô pé nghut ri; loq a chî e za zo shuq é gi, byù lé a sanséng a dut nhang é nghut lhê." ga taí ri.

Hkanan Myiwe Myhí Rayuq É Lumjîng Myit
Mrk 7:24-30

²¹ Hau htâng, Yesuq gi, haú mai Turuq eq Sidun mau shut htoq e ló bê nghut ri. ²² Haú hkûn, haú mau má nyi é Hkanan myiwe myhí rayuq gi, Yhâng chyáng lé jé mù, "Dawiq é Yhangzo, Yhumsîng ê, ngo lé shogyô yù laq ô! Ngá byizo gi, nat gang wang júng mù, gyai yhang nò gyîn nyi ri." ga taí garû ri.

²³ Nghut kôlhang, Yesuq gi, dang rahkun le a tú taí nghut ri. Haú mù, Yhâng é chángzô pé gi, Yhâng chyáng lé jé kômù, "Myiwe myhí haú lé ló nhang pyám aq; hái mù gâ le, yhang gi, nga-nhông é htâng

má châng garû nyi ri." ga taí akô.

²⁴ Yesuq gi, "Byuq byuq é sau pé su nghut nyi é Israelaq byu pé chyáng sheq, Ngo lé nhang kat é ru nghut lhê." ga taí ri.

²⁵ Haú hkûn, myiwe myhí haú gi, Yhâng é hí má lé mù hkyihput htuq luí, "Yhumsîng ê, ngo lé garúm yù laq ô!" ga taí ri.

²⁶ Yesuq gi, "Zô wui chyáng mâ é zoshuq lé yù mù, hkuí pé lé byi tsô é jung a nghut." ga tú taí jáng, ²⁷ myiwe myhí haú gi, "Yhumsîng ê, haú kúm nghut ri; nghut kôlhang, hkuí pé lhang, yhumsîng hpô é zoh-poq mai gyó é zang cham zang htâng lé, zô akô mhaí." ga dum taí ri.

²⁸ Haú mù, Yesuq gi, "Myiwe zo ê, náng é lumjîng myit gi, kô nyi ri! Nàng dũng é hkyô lé gyo byi bê nghut lhê." ga tú taí ri. Haú hkûn jáng, myiwe myhí hau é byizo le ge byuq bê nghut ri.

Byù Myi Hkyîng Lé Byi Tsô É Hkyô

Mrk 8:1-10

²⁹ Yesuq gi, haú mai htoq ló luí, Galile nhông yàm má ê jé mù, bùm shut doq ló luí, ló zung nyi ri. ³⁰ Haú hkûn, byù moq mó gi, hkyî hten bang, myoqjit bang, gung-yùn bang, nhut jit bang eq nò bang gotù myo myo lé shuí lé lô kômù, Yhâng é hkyî wang má lé nyhi to kô é nghut luí, Yhang gi, haú bang lé lhoq gè byí ri. ³¹ Haú shiwa byu pé gi, nhut jit bang dang wó nyò

kô é lé le, gung-yùn bang ge byuq é le le, hkyî hten bang hkyô wó sô é lé le, myoqjit bang myoq wó myang é lé le, myàng kôjáng, wú maú kômù, Israelaq é Garai Gasang lé hkya-ôn bum akô nghut ri.

³² Yesuq gi, Yhâng é chángzô pé lé wut yù mù, "Ngò, shí bang lé wú shogyô ri; yhang-moq gi, Ngò eq rahá nghut nyi é sum nyi bò bê, haí le a myàng zo kó nghut ri. Yhang-moq, hkyolat má mut yut ló yut kó abe, yhangmoq zòmut to gû lé, Ngò a nhang kat naù." ga taí ri.

³³ Haú hkûn, Yhâng é chángzô pé gi, "Isû é yoso má nhîng, byù shí myhò bang lé luq shoq byi tso râ zoshuq gi, hkarâ é wó râ lú?" ga myi akô.

³⁴ Yhang gi, "Nungmoq, muk hkâ-myhó long wó akô lú?" ga tau myi jáng, yhangmoq gi, "Muk nyhit long eq ngo-nú zo ratsui wó lhê." ga tû taí akô.

³⁵ Haú mù, Yhang gi, byù hpûng lé, myigùng htoq má zùng nhang ri. ³⁶ Hau htâng, Yhang gi, haú muk nyhit long eq ngozo lé yù mù, jeju ban hkya-on jáng, myhik hpé luí, haú chángzô pé lé byi jáng, yhangmoq gi, byù hpûng lé gàm byi akô nghut ri. ³⁷ Yhangmoq lunglhang bang zô gyi bùm kô é htâng má, haú chángzô pé gi, amyit ahtâng lé nyhit mung byíng shoq wó guq tsíng yu ashí kô nghut ri. ³⁸ Haú hkûn zô é bang má, myiwe wuì

eq zoshâng wuì lé a nghap lhôm é za, yuqgè wuì baú myi hkyíng yuq bo ri. ³⁹ Yesuq gi, byù hpûng lé ló nhang pyâm é htâng má, lhaí má wang ji mù, Magadan mau shut dap e ló bê nghut ri.

16

Kumhá Dung Kô É Hkyô

Mrk 8:11-13; Luk 12:54-56

¹ Hparishe pé eq Saduke pé gi, Yesuq chyáng lé jé kômù, Yhang lé chyam wú é dông, mauhkûng mâ é kumhá kut shit râ matú, dúng akô.

² Haú mù, Yhang gi, yhang-moq lé, "Nungmoq gi, my-inhtâng jé jáng, 'Mau hpong râ nghut lhê, hkâsu mù gâ le, mauhkûng ne ri.' ga le, ³ napkyó lé nghut jáng, 'Hkû-nyí laidun lò râ nghut lhê, hkâsu mù gâ le, mauhkûng nè mù, noq ri.' ga le, lhaq taí akô. Nungmoq gi, mauhkung é isâm lé wú mù sê gam hkoq yú kô é nghut kôlhang, shí ipyat lhê é kumhá lé gi, a sê gam hkoq yú kó nghut ri. ⁴ Agè ashop é eq lhum a zuí é ipyat shí gi, limik kumhá lé ho nyi akô; nghut kôlhang, Yonaq é kumhá mai lai luí, gotû haí le tûn shit râ a nghut." ga taí ri. Hau htâng, Yesuq gi, yhangmoq chyáng mai htoq ló bê nghut ri.

Hparishe Pé Eq Saduke Pé É Múnchi

Mrk 8:14-21

⁵ Yhangmoq, nhông hé hpoq shut gû dap ló kô é hkûn, haú chángzô pé gi, muk yu chùng râ lé tô-myhî pyâm

akô. ⁶ Haú hkûn, Yesuq gi, "Hparishe pé eq Saduke pê é múnchi lé, sidiq luí, koi pyâm nyi keq." ga, yhangmoq lé taí kat ri.

⁷ Yhangmoq gi, "Nga-nhúng, muk a yu chung é yanmai, haú su ga taí é nghut ri." ga luí, taí lhum bum akô nghut ri.

⁸ Yhangmoq haú su taí lhûm nyi kô é lé Yesuq sé jáng, yhangmoq lé, "Lumjing myit shaú é bang ê, muk a bo é hkyô lé, haí mù taí lhûm nyi akô lhú? ⁹ Ahkuí jé shoq, nungmoq gi, a sê gyo shi kó lhú? Muk ngo lông èq byù ngo hkying lé byi tsô é htàng, nungmoq hkâ-myhó mung wó dum guq tsing yù kô é lé le, ¹⁰ muk nyhit lông èq byu myi hkying lé byi tsô é htàng, nungmoq hkâ-myhó mung wó dum guq tsing yù kô é lé le, nungmoq a myit bun kó lhú? ¹¹ Ngò gi, muk eq séng luí taí é a nghut é lé, nungmoq, hkâsu mù a sê gyo kô é lhú? Hparishe pé eq Saduke pê é múnchi lé koi pyám keq nghu taí é ru nghut lhê." ga taí ri. ¹² Haú hkûn sheq, Yhang taí é gi, muk má chung é múnchi lé koi pyám râ matú taí é a nghut e za, Hparishe pé eq Saduke pê é mhoqshit hkyô lé koi pyám râ matú taí é ru nghut é lé, yhangmoq sê gyô akô nghut ri.

Yesuq Lé, Petruq Yín Yu É Hkyô

Mrk 8:27-30; Luk 9:18-21

¹³ Yesuq gi, Kesare-Hpilipi wà mó nâm mâ é mau má jé é hkûn, Yhâng é chángzô pé lé, "Haú Byu Yhangzo gi, ó yuq nghut lhê ga, byu pé taí akô lhú?" ga myí ri.

¹⁴ Haú hkûn, yhangmoq gi, "Ra-am gi, Wui-myhup Sará Yohan ga, góbang gi, Eliyaq ga, dum ra-am gi, Yeremiaq, a nghut jáng, gotú myiqhtoi rayuq yuq nghut ri ga, taí akô." ga tû taí kôjáng, ¹⁵ Yhang gi, "Haú jáng, nungmoq gi, Ngo lé ó yuq nghut lhê nghu akô lhú?" ga, yhangmoq lé xoq myí ri.

¹⁶ Haú hkûn, Simun Petruq gi, "Nàng gi, rû dui nyi é Garai Gasâng é Yhangzo, Hkrisduq nghut ri." ga tû taí ri.

¹⁷ Haú mù, Yesuq tû taí é gi, "Yonaq é yhangzo Simun ê, nàng gi, hkungsô wó nyi ri; hkâsu mù gâ le, nang lé haú hkyô tûn shit é gi, byù mai a nghut, mauhkûng htoq má nyi é Ngá é Íwa mai tûn shit é ru nghut lhê. ¹⁸ Ngò, nang lé taí lé, nàng gi, Petruq* nghut luí, luqgok shí má, Ngò, Ngá é noqkuq hpúng lé xuq to râ nghut mù, haú moming hkúmdong pé gi, hpúng haú lé wó úng râ a nghut. ¹⁹ Mauhkûng mingdán é zoqshi pé lé, Ngò, nang lé ap byi râ nghut lhê; myigùng htoq má, nàng tuí to má tuí to lé, mauhkûng htoq má le, tuí to râ nghut lhê; myigùng htoq má, nàng lhoq lhut má lhoq lhut lé, mauhkûng htoq má le,

* **16:18** Grik dông Petruq gâ é gi, luqgok lé gâ é nghut lhê.

lhoq lhut byi râ nghut lhê." gâ ri. ²⁰ Hau htâng, Yhang Hkrisduq nghut é hkyô lé, ó lé le a taí kyo râ matú, Yhâng é chángzô pé lé taí hkúm kat ri.

Yesuq Gi, Yhang Shî Râ Lé Hí Te Taí É Hkyô

Mrk 8:31 —9:1; Luk 9:22-27

²¹ Yesuq gi, Yhang Yerusalem wà mó má ló mù, suwún wuî, hkyangjong agyi pé eq tarâ sará pé é loq má, zing-rî é myo myo hui zo luî, sat pyâm é hui ra râ nghut kôle, sum nyí nghû râ buinyì má, lhoq toq yu é hui râ nghut é hkyô lé, haú hkûn mai, Yhâng é chángzô pé lé taí kyo hí ló bê nghut ri.

²² Haú mù, Petruq gi, Yhang lé rahkyam shut shuí htoq yû mù, "Yhumsing ê, haú hkyô Náng chyáng hkâ-nhám le a dut sháng gaq." ga Yhang lé tân ri.

²³ Yesuq gi, lhing wú kat mù, Petruq lé, "Tsadán nàng, Ngá chyáng mai hpâng aq! Nàng gi, Garai Gasang eq sêng é hkyô lé a myit e za, byù eq sêng é hkyô lé za myit é sủ nghut mù, Ngá é matú myit leqbat jowò nghut ri." ga taí ri.

²⁴ Hau htâng, Yhang gi, Yhâng é chángzô pé lé, "Ngá htâng cháng naú sủ ó yuq nghut kôle, yhumsing gùng yhumsing he-ngik pyám mù, yhumsing é tapzîng lé waq chûng luî, cháng ra râ nghut lhê. ²⁵ Hkâsu mù gâ le, yhumsing é asak lé hkyi yù naú sủ ó yuq nghut

kôle, asak sum râ nghut lhê; nghut kôlhang, Ngá é yanmai, yhumsing é asak sủm pyâm é sủ kúm gi, asak wó yû râ nghut lhê. ²⁶ Byù gi, mingkan gón lé wó sing to kôlhang, yhumsing é asak woi-nyí sủm byuq é nghut le gi, yhang é matú, hai akyû bò râ lhú? Byù gi, yhumsing é asak woi-nyí lé, hai èq wó htaí yù râ lhú? ²⁷ Haú Byu Yhangzo gi, Yhâng Wâ é hpungwup shingkan bo é èq, Yhâng Wâ é maumang lagyô pé eq rahá jé lé lô râ nghut lhê; haú hkûn, Yhang gi, yuq hkangmó lé, yhumsing kut lai bê eq rajung za akyû byi râ nghut lhê. ²⁸ Ngò, nungmoq lé teng za taí kôlé, ahkuî shí má yap to bang ra-am gi, haú Byu Yhangzo, Yhâng é mingdán eq jé lé lo é lé, a myang é za shí kó râ a nghut." ga taí ri.

17

Yesuq, Isâm Htaí Lo É Hkyô
Mrk 9:2-13; Luk 9:28-36

¹ Hkyuq nyí lai htâng má, Yesuq gi, Petruq lé le, Yakuq eq yhanggu Yohan nhiktâng lé le, shuí chûng mù, yhangmoq baú myhang é bùm ralhú má doq ló akô. ² Haú má, yhangmoq é myoq hí tê má, Yesuq é ihpyô isâm htaí byuq mù, Yhâng é myoqdong gi, bui su duqbó tô é eq, Yhâng é mebu gi, maubó su hpyu zan tô ri. ³ Haú hkûn jáng, Mosheq eq Eliyaq gi, yhangmoq é hí má htoq shit mù, Yesuq eq dáng nyo lhùm nyi akô.

⁴ Haû mù, Petruq gi, Yesuq lé, "Yhumsing ê, shí jowò má nga-nhung nyi le ge ri. Nang ô nau é nghut le gi, Náng é matú ralhum, Mosheq é matú ralhum, Eliyaq é matú ralhum kut, ngò zúm súm lhum saí bá." ga taí ri.

⁵ Petruq dang ru taí nyi ashí le, duqbó é mhut gi, yhangmoq lé htup zing lô mù, mhut hkaú mai htoq lo é htê gi, "Shí yuq gi, Ngò chyitdap é Ngá Zo nghut lhê; Yhang má Ngò myit dik nyi lhê. Yhâng é dang gyo keq." gâ ri.

⁶ Haû su gâ é htê lé, chángzô pé wó gyo kôjáng, yhangmoq gi, gyuq nán mù, myigùng má gop bùm bekô nghut ri.

⁷ Nghut kôlhang, Yesuq gi, yhangmoq chyáng jé lé lô mù, yhangmoq lé loq eq záng kat luí, "Toq keq, hkâgyuq kó." ga taí ri. ⁸ Yhangmoq tu wú kat kô le, Yesuq mai lai luí, ó lé le a myàng lo kó nghut ri.

⁹ Bùm mai taú gyó lô kô é hkún, Yesuq gi, "Ahkuí nungmoq myang é hkyô lé, haû Byu Yhangzo shi é mai lhoq dui toq yu é a hui hui gi, ó lé le hkâtaí kyo kó." ga, yhangmoq lé taí hkúm tô ri.

¹⁰ Haû jáng, chángzô pé gi, "Eliyaq hí lé ra râ nghut lhê ga, tarâ sará pé haí mù taí kô é lhú?" ga, Yesuq lé myí akô.

¹¹ Haú hkún, Yesuq gi, "Eliyaq hí lé luí, lhunglhang lé hen lajâng to râ gâ é gi, têng lhê. ¹² Nghut kôlhang, Ngò, nungmoq lé taí kôlé, Eliyaq gi, jé lé bê nghut lhê; nghut kôle, yhangmoq gi, yhang lé a

lhom wú sé kômù, yhangmoq ô nau é đông banshoq kut bekô nghut ri. Haû eq rajung za, haû Byu Yhangzo le, yhangmoq é loq má hpuzo rá nghut lhê." ga tú taí ri. ¹³ Haú hkún sheq, Yhang taí nyi é gi, Wui-myhup Sará Yohan eq sêng é hkyô nghut é lé, haú chángzô pé sê gyô akô nghut ri.

Nat Wang Júng Sû Lé Lhoq Gê Byí É Hkyô

Mrk 9:14-32; Luk 9:37-45

¹⁴ Yhangmoq, byù moq mó pé chyáng dum taú jé lô kô é hkún, byù rayuq gi, Yesuq chyáng lé jé mù, hkyihput htuoq luí, ¹⁵ "Yhumsing ê, ngá é yuqzo lé shogyô yù laq; yhang gi, mhúngtuq tuq luí, gyai yhang jamjaú nyi ri. Myihkyóm má le, wui má le, anum num lêng wàng wàng dut nyi ri. ¹⁶ Yhang lé, Náng é chángzô pé chyáng shuí ê kôlhang, yhangmoq a wó lhoq gê byi kó nghut ri." ga taí ri.

¹⁷ Haû mù, Yesuq gi, "Lumjáng myit a bo é eq agè ashop é amyû pé ê, Ngò gi, hkâ-myháng jé shoq nungmoq eq rahá nyi mù, wó jân nyi râ lhú? Yuqgè zo haú lé, Ngá chyáng shuí lé lô keq." ga tú taí kat ri. ¹⁸ Yesuq gi, nat gang lé tân kat jáng, nat gang haû gi, yuqgè zo haú yuq chyáng mai htoq ló byuq bê nghut mù, haú hkún jáng, yuqgè zo haû gi, ge byuq bê nghut ri.

¹⁹ Hau htâng, chángzô pé gi, ó a nyi é u má, Yesuq chyáng lé lô kômù, "Ngamoq

gi, haî mù, nat haú lé a wó hkat htoq é lhú?" ga, lé myi kôjáng, ²⁰ Yhang gi, "Nungmoq é lumjíng myit shaû é yanmai nghut ri. Ngò, nungmoq lé teng za taí kôlé, nungmoq é lumjíng myit angshi cham í za hkâlháng bò kô é nghut le gi, bùm shí lé, 'Hé shut htot ló aq.' ga taí le, htot râ nghut lhê. Nungmoq a wó kut é haî lháng joq râ a nghut. ²¹ Shí jung gi, kyûdung é eq zoshuq gám é dông za a nghut jáng, a htoq ló é nghut lhê.*" ga dum tû taí ri.

²² Yhangmoq, Galile mau má rahá zup nyi kô é hkûn, Yesuq gi, yhangmoq lé, "Haû Byu Yhangzo gi, byu pé é loq má ap pyâm é hui zo râ nghut lhê. ²³ Haú bang gi, Yhang lé sat pyám kó râ nghut lhê; nghut kôlhang, Yhang gi, shi é htâng sum nyi nghû râ nyi má lhoq dui toq é hui râ nghut lhê." ga taí ri. Haû mù, haû chángzô pé gi, gyai yhang gyô yón nyi bekô nghut ri.

Noqkuq Yhûm Hkansê Kat É Hkyô

²⁴ Yesuq eq Yhâng é chángzô pé gi, Kaperna-um wà má jé kô é hkûn, noqkuq yhûm hkansê hkyuí bang gi, Petruq chyáng lé jé kômù, "Nungmoq é sará gi, noqkuq yhûm hkansê a kat lhú?" ga myi akô.

²⁵ Petruq gi, "Kat lhê." ga tû taí ri.

Hau htâng, Petruq yhúmhaû má wang ló le, Yesuq hí lhom taí é gi, "Simun

ê, mingkan hkohkam pé gi, kang eq hkansê pé lé, ô pé chyáng mai guq yu akô lhú? Yhumsing byu pé chyáng mai lhú? Haû a nghut jáng, gôbâng chyáng mai lhú? Nàng, hkâsu wó myit lhê lhú?" gâ ri.

²⁶ Haû mù, Petruq gi, "Gôbâng chyáng mai nghut ri." ga tû taí jáng, Yesuq gi, "Haû su nghut le gi, yhumsing byu pé gi, lut akô nghut ri. ²⁷ Nghut kôlhang, yhangmoq é i-myit a ngón a dut kó sháng gaq, nhông má é mù, ngo-nhe é hkyó aq. Sâng-hi wó nhê yu é ngozô é nhut lé lêng há kat jáng, ngùn htingchap rachap lé myàng râ nghut lhê. Haú lé yù mù, Ngá é matú eq náng é matú, yhangmoq lé ló byi aq." ga taí ri.

18

Kô Dik Sû Gi, Ó Yuq Nghut Lhê Lhú?

Mrk 9:33-37, 42-48; Luk 9:46-48; 17:1-2

¹ Haú hkûn, haû chángzô pé gi, Yesuq chyáng lé jé kômù, "Mauhkûng mingdán má, kô dik sû gi, ó yuq nghut lhê lhú?" ga myi akô.

² Yesuq gi, zoshâng zo rayuq lé wut yù mù, yhangmoq é gung gûng má shap to luí, ³ taí é gi, "Ngò, nungmoq lé teng za taí kôlé, nungmoq gi, myit htaí lhik luí, zoshâng zo wuî su dut kô é za a nghut jáng, mauhkûng mingdán má hkâ-nhám le wó wâng kó râ a nghut. ⁴ Haû mù, zoshâng

* 17:21 Chyûmbun shí gi, chyúmding myo myo má a bo é nghut lhê.

zo shí yuq su, yhumsing é i-myit wó lhoq nyhum é sù ó yuq nghut kôle, mauhkông mingdán má, kô dik sù nghut ri.

⁵ Shí sù é zoshâng lé, Ngá é mying mai hap yu é sù ó yuq nghut kôle, Ngo lé hap yu é sù nghut bê. ⁶ Nghut kôlhang, Ngo lé lumjîng é zoshâng wui mâ é rayuq yuq lé, mara kut shut nhang é sù gi, yhâng é lingzing má luqluí long mó tui hut byi luí, nik é wuimau má, dú hkyô pyâm é huí é nghut le gi, yhâng é matú je gè râ nghut lhê.

⁷ Haû mingkan gi, byu pé lé mara kut shut nhâng jang joq é yanmai, dingnyé wó ri. Haû mara kut shut nhâng hkyô gi, htoq lugù bê; nghut kôlhang, haú lé lhoq htoq sù gi, dingnyé wó ri. ⁸ Náng é loq èq, a nghut jáng, náng é hkyi èq, nang lé mara kut shut nhang é nghut le gi, haú lé hpyit dú pyám aq. Ahtum abyuq é myi má, hkyi hkúm loq hkúm gû dú hkyô pyâm é hui râ htoq má, hkyi loq a hkúm é za, asak wó yu é nghut le gi, náng é matú je ge ri. ⁹ Náng é myoqjí èq, nang lé mara kut shut nhang é nghut le gi, haú lé lap choq yù mù, dú pyám aq; myoqjí í jí dap gû ngaraí myi má dú hkyô pyâm é hui râ htoq má, myoq rají eq za, asak wó yu é nghut le gi, náng é matú je ge ri.

Byuq Byuq É Sau
Luk 15:3-7

¹⁰ Shí sù é zoshâng zo wui mâ é rayuq lé lháng a wú tiq râ matú, sidiq nyi keq. Hkâsu mù gâ le, Ngò, nungmoq lé tái kôle, mauhkông mâ é yhang-moq é maumang lagyô pé gi, mauhkông htoq mâ é Ngá Wá é myoqdong lé, hkâ-nhám le myang nyi akô. ¹¹ (Hkâsu mù gâ le, haû Byu Yhangzo gi, byuq byuq bê bang lé hkyi yù râ matú, jé lé é nghut lhê.)*

¹² Byù rayuq gi, sau rashô du wó é nghú sháng, sau haú gû mâ é radu byuq byuq é nghut jáng, haû gaú xe gaú du lé, bùm pé má nyhi pyâm to luí, byuq byuq é sau lé a châng ho é nyi râ lú? Haú lé, nungmoq hkâsu wó myit ngam akô lú? ¹³ Ngò, nungmoq lé teng za tái kôle, yhang gi, haû byuq byuq é sau haú lé myang ho é hkùn, a lám byuq é sau gaú xe gaú dû é matú gabú é htoq má, haú dû matú je riyhang gabú ri. ¹⁴ Haû eq rajung za, mauhkông htoq mâ é nungmoq é Îwa gi, shí tiq bang mâ é rayuq htên byoq byuq râ lé lháng, ô nau é a nghut.

Mara Kut Shut É Gumang
Hpó Lé Hkâsu Kut Râ Hkyô

¹⁵ Náng é gumang hpó, nang lé mara kut shut é nghut jáng, yhâng chyáng ê mù, nungnhik baú za nghut é hkùn, yhâng é mara lé tân shit aq. Yhang, náng é dang lé gyô é nghut jáng, nàng gi, gumang rayuq dum wó bê nghut ri. ¹⁶ Nghut kôlhang,

* 18:11 Bun zo shí gi, chyúmding myo myo má a bo é nghut lhê.

yang, nang é dang lé a gyô é nghut jáng, 'Mara hun é hkyô hkanngmó lé, saksé í yuq sum yuq lôm jáng, wó lhoq teng sháng gaq.'[☆] gâ tô é eq rajung za, nang, gotú byù ra-í yuq lé shuí chùng aq. ¹⁷ Yang gi, haú bâng é dang lé le a lhom yu é nghut jáng, haú hkyô lé, noqkuq hpúng má shit kyo aq; hpúng é dang lé le a gyô é nghut jáng, yang lé, a lumjínng é byù rayuq dông le, kang guq sù rayuq dông le sôn pyám aq.

¹⁸ Ngò, nungmoq lé teng za taí kôlé, myigùng htoq má, nungmoq tuí to má tuí to lé, mauhkùng htoq má le, tuí to râ nghut lhê; myigùng htoq má, nungmoq lhoq lhut má lhoq lhut lé, mauhkùng htoq má le, lhoq lhut byi râ nghut lhê.

¹⁹ Ngò, nungmoq lé dum taí kôlé, myigùng htoq má, nungmoq mâ é í yuq myit hui luí, haí lé dung kôlhang, mauhkùng htoq mâ é Ngá Wa gi, haú nhik lé gyo byi râ nghut lhê. ²⁰ Hkâsu mù gâ le, Ngá myíng lé lang luí, í yuq sum yuq zup zîng é jang hkâmá nghut kôlhang, haú bâng é gyoro má Ngò nyi lhê." gâ ri.

Shogyo Nhkmyin A Sé É Jùn Hpô É Dangtú

²¹ Haú hkùn, Petruq gi, Yesuq chyáng huí ê mù, "Yhumsîng ê, ngá é gumang, ngo lé mara kut shut é nghut le, yang lé hkâ-myhó dâm

mara hkyut byi ra râ lhú? Nyhit dâm jé shoq hkyut byi ra râ lhí?" ga myí ri.

²² Haú jáng, Yesuq tû taí é gi, "Ngò, nang lé taí lé, nyhit dâm za a nghut, nyhit xe nyhit tû dâm hkyut byi râ lhê.

²³ Mauhkùng mingdán gi, yhumsîng é dui-nhâng zoshâng wui é jihpán lé jep nau é hkohkâm rayuq eq du ri. ²⁴ Yang gi, jihpán lé jep hi ló é u lé, yhâng chyáng ngùn wan myo myo chyín dap to sù lé shuí lé lo akô. ²⁵ Haú yhumsîng hpó gi, haú yuq chyín a wó xap é yanmai, chyín wó yû râ matú, yang lé le, yangmyi lé le, yangzo banshoq eq yang wó é zèhkoq banshoq lé le, ùng pyám râ hkunmó hkyô kat ri.

²⁶ Haú mù, dui-nhâng zoshâng haú yuq gi, yhâng é hí má hkyihput htuoq luí, 'Ngo lé myit hîng byi shi laq; banshoq lé, ngò xap râ.' ga dúng tôngbán ri. ²⁷ Haú dui-nhâng zôshang é yhumsîng hpó gi, haú yuq lé wú shogyo luí, chyín banshoq lhut pyám byi mù, nhang kat ri.

²⁸ Nghut kôlhang, dui-nhâng zoshâng haú gi, htoq ló mù, yang lé, denari† rashô chyín dap tô é dui-nhâng zoshâng luzúm rayuq lé myàng jáng, haú yuq é lingzing má gyaq myhik zîng to mù, 'Ngo lé dap tô é chyín hân xap aq!' ga taí ri.

☆ 18:16 Tarâ Pun 19:15 † 18:28 Denari rachap gi, ra-nyí lhê é byù rayuq é zuihpau eq wuí ri.

²⁹ Haú hkûn, yhâng é luzúm dui-nhâng zoshâng haú gi, yhâng é hí má hkyihput htuq luí, 'Ngo lé myit hîng byi shí laq; ngò xap râ.' ga dúng tôngbán ri.

³⁰ Nghut kôlhang, yhang gi, a gyo byí e za, yhâng é chyín dum wó xap é hkûn jé shoq, haú yuq lé htóng hkyô pyám nhâng ri. ³¹ Gotû dui-nhâng zoshâng wui gi, haú hkyô lé myàng kôjáng, i-myt wú nô kôluí, yhangmoq é yhumsing hpó lé, haú hkyô banshoq ló tái kyô akô.

³² Haú mù, haú yhumsing hpó gi, dui-nhâng zoshâng haú lé wut hâng yù mù, 'Agè ashop é dui-nhâng zoshâng è, nàng, ngo lé dúng tôngbán é yanmai, nàng, ngo lé dap é chyín banshoq lé, ngò lhut pyám byi bê nghut lê mhaí. ³³ Haú su é nhîng, ngò, náng lé shogyô yu é su, náng é luzúm dui-nhâng zoshâng lé, nàng ge shogyô yu lê a nghut lúhú?' ga tái luí, ³⁴ yhang gi, nhikjum yo mù, yhâng é chyín ban xap é hkûn jé shoq, jamjau hui zo râ matú, yhang lé, htóng suwún pê chyáng ap byí pyám bê nghut ri.

³⁵ Nungmoq é gumang wui lé, nungmoq é myit mai mara a wó hkyut byi kô é nghut jáng, mauhkûng htoq tsáng myhâng mâ é Ngá Wa le, nungmoq lé haú đông kut râ nghut lê." gâ ri.

19

Myi Làng Gâng É Hkyô *Mrk 10:1-12*

¹ Yesuq gi, mhoqshit é dang haú pé lé ban tái jáng, Galile mau mai htoq ló mù, Yodan làng tâ tap mâ é Yuda mau má ê jé ri. ² Byù moq mó gi, Yhâng htâng cháng kô é nghut mù, Yhang gi, haú bang mâ é nòhpyo hui bang lé, haú má lhoq gê byí ri.

³ Haú hkûn, Hparishe pé ra-am gi, Yhâng chyáng lé jé kômù, Yhang lé chyam wú é đông, "Byù rayuq gi, hai hkyô mai nghut nghut, yhumsing é yhangmyi lé lhoq kâng pyâm le, tarâ wang lê lúhú?" ga myí akô.

⁴ Haú jáng, Yhang tâ tái é gi, "A-nham sâng-hi lé, Hpân Sú, 'byu hpan é hkûn, yuqgè eq myiwe lé hpan é nghut lê.' ⁵ 'Hau é yanmai, yuqgè gi, yhumsing é ínu íwâ chyáng mai htoq luí, yhangmyi eq rahá radîng ralhûm za kut nyí mù, yhangnhik gi, gungsho ralhûm za dut byuq kó râ nghut lê.' ⁶ ga kê tô é lé, nungmoq a nghap wú kó lúhú?"

⁶ Haú mù luí, yhangnhik gi, í yuq a nghut lô e za, rayuq za dut bê nghut ri. Haú mù luí, Garai Gasang lhoq tsâm tô é lé, byù gi, a lhoq kang sháng gaq." gâ ri.

⁷ Haú hkûn, yhangmoq gi, "Haú lé nhîng, yuqgè rayuq gi, lhoq kang laiká za ká byi mù, yhangmyi lé wó nhang pyâm lê ga, haí mù, Mosheq, hkunmó hkyô tô lê lúhú?" ga, Yhang lé dum tâu myí akô.

⁸ Haû mù, Yesuq gi, "A-nham sâng-hi mai gi, haû đông a nghut. Nghut kôhang, nungmoq é myit nhiklum htân kô é yanmai, nungmoq é yhangmyi pé lé lhoq kang râ ahkáng, Mosheq byi tô é ru nghut lhê. ⁹ Ngò, nungmoq lé tai kôlé, sulàng lú é za a nghut jáng, yhumsing é yhangmyi lé kâng pyám mù, myiwe gotû dum hâng yu é sù ó yuq nghut kôle, su-myi lú é sù dut bê." ga, yhangmoq lé dum tâ tai ri.

¹⁰ Haû hkûn, haû chángzô pé gi, "Myi làng hkyô má haû đông ru nghut le gi, a yu le hláng je ge nyo ri." ga tai akô.

¹¹ Haû mù, Yesuq gi, "Yuq hkangmó gi, dang haû lé wó hap yu é a nghut, wó hkâm râ jeju wó é bang za sheq, wó hap yu é nghut lhê. ¹² Byù ra-am gi, inû unghkaû mai yhang, yuqgè a jé gû hku lé lo é bang nghut akô; ra-am gi, góbâng eq kut é yanmai, yuqgè a jé dut byuq akô; ra-am nghut jáng, mauhkûng mingdán é matú, yuqgè a jé râ đông kut yu pyâm akô nghut ri. Shí hkyô lé wó hap yù sù gi, hap yù sháng gaq." ga dum tai ri.

Zoshâng Wuì Eq Yesuq

Mrk 10:13-16; Luk 18:15-17

¹³ Hau htâng, Yesuq mai zoshâng wui htoq má loq ke mù, shimân byi sháng gaq ga, zoshâng wui lé Yhâng chyáng shuì lé lo akô. Haû chángzô pé kúm gi, haû shuì lé lô bang lé lhom tân hkûm akô nghut ri.

¹⁴ Nghut kôhang, Yesuq gi, "Haû zoshâng wui lé, Ngá chyáng lé nhâng keq; yhangmoq lé hkâhkûm zing to kô; hkâsu mù gâ le, mauhkûng mingdán gi, haû sù é bâng é mingdán ru nghut lhê." ga tai kat ri. ¹⁵ Yhang gi, zoshâng wui htoq má loq ke shimân byi mù, haû jowò mai htoq lô bê nghut ri.

Sùt Wó É Zorâm Rayuq É Hkyô

Mrk 10:17-31; Luk 18:18-30

¹⁶ Byù rayuq gi, Yesuq chyáng lé jé mù, "Sarâ é, ahtum abyuq é asak wó yù râ matú, ge é muzó haì kut ra râ lú?" ga myi ri.

¹⁷ Haû jáng, Yesuq gi, "Ge é hkyô eq séng luì, haì mù Ngo lé myi lhê lú? Ge é Sù gi, rayuq za nyi lhê. Nàng, asak dui é má wàng nau é nghut le gi, jep é tarâ pé lé cháng aq." ga tâ tai ri.

¹⁸ Haû yuq gi, "Hká gû lé lú?" ga dum myi jáng, Yesuq gi, "Byù hkâsat, su-myi hkâlú, hkâhkau, a teng a mán é saksé hkâhkám, ¹⁹ nángnu nángwa lé hkungga aq, ✧ ga le, 'náng gûng lé nàng chyitdap e su, náng é chyangnâm mâ é bang lé le chyitdap aq. ✧ ga le bo tô ri." ga tai kat ri.

²⁰ Haû hkûn, zorâm hpó haû gi, "Haû pé banshoq lé, ngò cháng bê nghut lhê; haì kut râ ashì lú?" ga dum taù myi ri.

21 Yesuq gi, "Nàng, gumjup sù dut nau le gi, ló mù, nàng wó é sutzè pé lé ùng pyám luí, myùng bang lé byí pyám aq; haù jáng, nàng, mauhkùng htoq má sutzè wó rã nghut lhê; haù mù, Ngá htàng lé cháng aq." ga tũ tai ri.

22 Zorâm hpó haù gi, sutzè gyai wó sù nghut é yanmai, dang haù lé wó gyo jáng, gyai yhang myit a ngón é èq ló byuq bê nghut ri.

23 Hau htàng, Yesuq gi, Yhàng é chángzô pé lé, "Ngò, nungmoq lé teng za tai kôlé, sutzè wó bang gi, mauhkùng mingdán wó wâng rã gyai yhang wuí ri. 24 Hau htoq agó, Ngò, nungmoq lé tai kôlé, sutzè wó sù rayuq, Garai Gasâng é mingdán má wó wâng rã htoq, gola-uq radu âpno mai wó wang lai rã gi, je lui rã nghut lhê." ga tai ri.

25 Haù chángzô pé gi, haù su gâ é lé wó gyo kôjáng, haù ru nghut le gi, ó yuq za hkyi yu é hui rã nghut lhê lú?" ga Yhang lé myí akò nghut ri.

26 Haù hkùn, Yesuq gi, yhangmoq lé wú kat mù, "Haù hkyô lé byù mai gi, wó kut rã a nghut; nghut kôlhang, Garai Gasang gi, lhunglhang lé wó kut é Sù nghut lhê." ga tai ri.

27 Haù hkùn, Petruq gi, Yhang lé, "Ngamoq gi, wó é gũ lhunglhang lé tô pyám to lui, Náng htàng cháng bê nghut lhê. Ngamoq, hai wá wó rã nghut lhê lú?" ga myí kat ri.

28 Haù mù, Yesuq tũ tai é gi, "Ngò, nungmoq lé teng za tai kôlé, lhunglhang lé asik dum saí dut nhang é má, haù Byu Yhangzo gi, Yhàng é hpungwup bo é hkohkâm-tanghkuq má zùng tô é hkùn, Ngá htàng cháng é bang nungmoq le, hkohkâm-tanghkuq raxe í lhùm htoq má zùng to kômù, Israelaq amyû raxe í hú lé jéyáng kó rã nghut lhê. 29 Ngá é yanmai, yhumsing é yhùm, nhiktàng wuì, ìnu íwa, zo dù wuì eq yò pé rajung jung lé tô pyám tô é sù ó yuq nghut kôle, rashô tú akyû myo jat shoq wó rã nghut é htoq agó, ahtum abyuq é asak le, wó yû rã nghut lhê. 30 Nghut kôlhang, hí nghut nyi é bang myo myo gi, htàng gyó byuq kó rã nghut mù, htàng gyó nyí bang yuq gi, hí bekô rã nghut lhê.

20

Tsibiyiq Hkyâm Mũ Zui Bang Lé Dangtú Yu É Hkyô

1 Hkâsu mù gâ le, mauhkùng mingdán gi, yhumsing é tsibiyiq hkyâm má mũ zui nhâng rã langchýáng ê lùng rã ga, napsùn noq le htoq e ló é hkyâm yhumsing eq du ri. 2 Yhang gi, ra-nyí é matú denari rachap byi rã dông, haù bang eq myit huí yù mù, yhangmoq lé, yhàng é tsibiyiq hkyâm má nhang hâng kat ri.

* 20:3 Chyúmdang ra-am má, sum hkyíng ga chung tô é gi, Yudaq byu pé é ahkyíng nghut lhê. Yudaq byu pé é ahkyíng gi, napkyó hkyuq hkyíng mai nghap hi lhê.

³ Napkyó gau hkyíng* kô má, yhang gi, htoq e ló le, hai mù le a kut é za, gài má yap tô é bang ra-am lé ê myang ri. ⁴ Haú mù, yhang gi, haú bang lé, 'Nungmoq le, ngá é hkyâm má mù ê zui keq; byi âng é ahpau, ngò, nungmoq lé byi râ nghut lhê.' ga taí jáng, yhangmoq gi, e ló bekô nghut ri.

⁵ Hau htâng, yhang gi, raxe í hkyíng má le, myinhtâng sum hkyíng kô má le, dum htoq ê mù, haú eq rajung za langchyâng pé ê lung kat ri. ⁶ Myinhtâng ngo hkyíng kô má, yhang dum htoq e ló wú le, góbang ra-am le yap tô bum é lé, ê myâng mù, haú bang lé, 'Nungmoq gi, haí le a kut é za, ra-nyí buí haí mù shí má yap tô bum akô lúhú?' ga myi jáng, ⁷ haú bang gi, 'Ngamoq lé, ó yuq eq le a lùng kô é yanmai nghut lhê.' ga tú taí akô.

Haú hkûn, yhang gi, 'Nungmoq le, ngá é hkyâm má mù ê zui keq.' ga taí ri.

⁸ Myinhtâng jé jáng, tsibiyiq hkyâm yhumsíng gi, yhâng é mù shuí u sù lé, 'Haú langchyâng pé lé ji yù mù, je htâng má lung yu é bang mai hí luí, sâng-hi lung yu é bang jé shoq, mù zui hpau byi aq.' ga taí ri.

⁹ Myinhtâng ngo hkyíng má mù wàng bang le, denari rachap chap wó yu bum akô. ¹⁰ Haú mù, je hí má mù wàng bang gi, yhangmoq je myo wó nhô ngam akô. Nghut kôlhang, yhangmoq le, rayuq denari rachap chap za wó

akô nghut ri. ¹¹ Yhangmoq gi, haú myhó za wó yu bum kô é yanmai, haú hkyâm yhumsíng lé, ¹² 'Shí bang gi, je htâng má mù lé wâng mù, nayí rahkum za mù zui kôlhang, nàng gi, ra-nyí buigyùm chap buí htân yò má mù zui é bang ngamoq eq rajung za byí ri.' ga mara hûn dang taí akô.

¹³ Nghut kôlhang, haú hkyâm yhumsíng gi, haú bang má é rayuq lé, 'Buinùm hpó ê, ngò, nang lé a tarâ é đông kut é a nghut. Denari rachap byi râ nghú, nàng eq ngò myit huí to bê a nghut lúhú?' ¹⁴ Nàng wó âng é lé yu chûng mù, ló aq. Je htâng má mù lé wang é sù lé le, nang lé byí é myhó, ngò byí nau ri. ¹⁵ Ngá é ngùn lé, ngò kut nau é su a ge kut lúhú? Ngò, ge é kut le, nàng manôn ri lúhú?' ga taí ri.

¹⁶ Haú mù luí, htâng gyó nyí bang gi, hí bekô râ nghut mù, hí nghut nyí bang gi, htâng gyó byuq kó râ nghut lhê." gâ ri.

Yesuq Gi, Yhang Shí Râ Hkyô Lé Dum Taí Ri

Mrk 10:32-34; Luk 18:31-34

¹⁷ Ahkuí, Yesuq gi, Yerusalem wà mó shut doq ló nyi é u lé, haú chángzo raxe í yuq lé, gotù kut wut yù mù, ¹⁸ "Nga-nhúng gi, Yerusalem wà mó shut doq ló nyi lhê; haú Byu Yhangzo gi, hkyangjong agyi pé eq tarâ sará pé é loq má ap byí pyâm é huí râ nghut lhê; haú bang gi, Yhang lé, shí râ mara

byi kó râ nghut é htoq agó,
 19 jóng pyâm é, nhuq bat é eq
 tapzîng má jén sat pyâm é hui
 râ matú, haú tûngbaù pé é loq
 má ap pyám kó râ nghut lhê.
 Nghut kôlhang, Yhang gi, sum
 nyí nghû râ buinyi má, lhoq
 dui toq é dum hui râ nghut
 lhê." ga taí ri.

*Zô Nhik Matú Ínu Êq Dung
 Byí É Hkyô*

Mrk 10:35-45

20 Hau htâng má, Zebedi é
 yhangzô nhiktang é yhângnu
 gi, yhangzô nhik eq rahá jé
 lé lô kômù, rajung dung râ
 matú, Yesuq é hí má hkyihput
 htuq nyi ri.

21 Haú mù, Yesuq gi, "Nàng,
 haí ô nau ri l hú?" ga yhang
 lé myi jáng, yhang gi, "Náng
 é mingdán má, shî ngá zô
 nhiktang lé, Náng é loqyò
 hkyam má rayuq, loqpaí
 hkyam má rayuq kut, zùng
 râ ahkáng byi laq." ga taí ri.

22 Haú hkûn, Yesuq gi,
 "Nungnhik haí dúng nyi é
 lé, nungnhik a sé kó nghut
 ri. Ngò shuq râ góm† lé,
 nungnhik wó shuq kó râ
 l hú?" ga myi jáng, yhangnhik
 tâng gi, "Wó shuq lhê." ga tû
 taí akô nghut ri.

23 Haú mù, Yesuq gi,
 yhangnhik lé, "Ngò shuq râ
 góm lé, nungnhik shuq ra
 kó râ za nghut lhê. Nghut
 kôlhang, Ngá é loqyò, loqpaí
 hkyam má zùng râ ahkáng lé
 gi, Ngò byí jung a nghut. Jowò
 haú pé gi, Ngá Wa hen to byi

bâng é matú za ru nghut lhê."
 ga taí ri.

24 Gotû chángzo raxê yuq gi,
 haú hkyô lé wó gyo kôjáng,
 haú nhiktang lé nhik-yô akô
 nghut ri. 25 Haú mù, Yesuq
 gi, yhangmoq banshoq bang
 lé wut tsîng yù luí, "Tûngbaù
 pé lé uphkan é ga bang gi,
 tûngbaù pé lé up zô nyi kô é
 hkyô lé le, haú eq rajung za,
 yhangmoq é ming up suwún
 wuí le, yhumsing é ahkáng
 ayá lé chûng mù, up zô nyi
 kô é hkyô lé le, nungmoq
 sê lhê. 26 Nungmoq chyáng
 gi, haú su a dut kó sháng
 gaq; haú Byu Yhangzo l háng
 gi, dojaú é lé hkam yù râ
 matú jé lé é a nghut é za,
 dojaú râ matú eq byù myo
 myô é matú, shíhtaí gunglik
 hkungga dông, Yhâng é asak
 lé byi pyám râ matú sheq, jé lé
 é ru nghut é su, 27 nungmoq
 má, byù mó dut naù sù ó
 yuq nghut kôle, nungmoq é
 dui-nhâng zoshâng dut ra râ
 nghut lhê. 28 Hau htoq agó,
 nungmoq má ushuq dut naù
 sù ó yuq nghut kôle, nung-
 moq é jùn dut ra râ nghut
 lhê." ga taí ri.

*Myoqjit Í Yuq Myoq Dum
 Myang É Hkyô*

*Mrk 10:46-52; Luk 18:35-
 43*

29 Yesuq eq Yhâng é chángzô
 pé gi, Yeriho myuq mai htoq
 ló nyi kô é hkûn, byù moq
 mó gi, yhangmoq é htâng má
 châng e ló bum akô. 30 Haú

† 20:22 Góm gá é gi, Yesuq, jamjau hui râ hkyô eq shî râ hkyô lé, taí nau é nghut lhê.

hkyô yàm má zung tô é myoqjít í yuq gi, Yesuq laí ló nyi é hkyô lé wó gyo kôjáng, "Dawiq é Yhangzo, Yhumsîng ê, ngá-nhik lé shogyô yù laq ô!" ga, wut garû kat akô nghut ri.

³¹ Byù moq mó gi, yhangnhik zîm byuq râ matú tân hkúm kôlhang, yhangnhik gi, "Dawiq é Yhangzo, Yhumsîng ê, ngá-nhik lé shogyô yù laq ô!" ga, je riyhang htê mó èq wut garû kat akô nghut ri.

³² Haù mù, Yesuq gi, yap kat mù, "Ngò, nungnhik lé haí kut byi râ ô nau akô lhú?" ga, yhangnhik lé wut myî kat ri.

³³ Haù hkûn, yhangnhik gi, "Yhumsîng ê, ngá-nhik myoq myàng nau ri." ga tû taí akô.

³⁴ Yesuq gi, yhangnhik lé wú shogyo luí, yhangnhik é myoqjít má ê záng byí ri. Haù hkûn jáng, yhangnhik gi, myoq wó myàng kômù, Yhâng htâng cháng bekô nghut ri.

21

Yesuq, Yerusalem Wà Mó Má Wang E Ló É Hkyô

Mrk 11:1-11; Lúk 19:28-38; Yhn 12:12-19

¹ Yesuq eq Yhâng é chángzô pé gi, Yerusalem wà mó eq chyâng lo nyi kô é hkûn, Tsanlun Bùm mâ é Bethpage wà má jé ló kôjáng, Yesuq gi, chángzo í yuq lé, ² "Nungnhik, hí mâ é wà má ê keq; wà haù má, logúng zîng radu lé, logúng zo eq rahá tuí to lánq

é lé, ê myâng kó râ nghut lhê; haù lé hpyi yù mù, Ngá chyáng she lò keq. ³ Byù rayuq yuq, nungnhik lé rajung jung gâ lò jáng, 'Shí í du lé, haù Yhumsîng chûng râ ri.' gâ nghú tû taí keq; haù jáng, yhang, radá dâm nhâng byi râ nghut lhê." ga Yesuq taí luí, nhang kat ri.

⁴ Haù gi, myiqhtoi dang lhoq dik râ matú dut lo é nghut ri. ⁵ Myiqhtoi dang haù gi,

"Zi-un byizo* lé, shí su nghú keq; 'Wú aq, náng é hkohkâm gi,

nú-nhâm é myit eq logúng htoq má jì mù, nghut bê, logúng zo htoq má jì mù, náng chyáng lé lô bê nghut ri.'"*

gâ ri.

⁶ Haù chángzô nhik gi, e ló mù, Yesuq taí kat é eq rajung za ê kut bekô nghut ri. ⁷ Yhangnhik gi, logúng me lé she lò mù, yhangnhik é buhîng pé lé, haù logúng mê é htoq má ke byi kôjáng, Yesuq gi, doq jì ri. ⁸ Byù moq mó mâ é myo myo gi, yhangmoq é buhîng lé, hkyô má hkyut hkang byí akô; ra-am gi, mhandíng pé lé zân hkyô yù mù, hkyô má hkang byí akô nghut ri. ⁹ Yhâng é hí má htâng má châng sô nyi bum é bang gi,

"Dawiq é Yhangzo gi, hosana† nghut nyí

* **21:5** Zi-un byizo gâ é lichyúm gi, Yerusalem byu pé gâ é nghut lhê. ✪ **21:5** Zhk 9:9 † **21:9** Hebre dang má, hosana gâ é gi, "ahkuí hkyi yù laq" gâ é nghut lhê. Nghut kôlhang, bun zo 9 má gi, hkya-on dang dông chung é nghut lhê.

sháng gaq ô!"

"Haù Yhumsing é myìng mai
jé lé lô Sù gi, hkungsô
wó nyí sháng gaq ô!"*

"Htoq tsáng myhâng má,
hosana nghut nyí
sháng gaq ô!"

ga luí, taí garû bum akô nghut
ri.

¹⁰ Yesuq, Yerusalem wà mó
má wang ló é hkûn, rawà gón
é bang gi, gabyông lo bùm
kômù, "Shí yuq gi, ó wá nghut
lê lhà?" ga luí, myi lhùm
bum akô.

¹¹ Haù hkûn, byù moq mó
gi, "Shí yuq gi, Galile mau,
Nazaret wà byù Yesuq gâ é
myiqhtoi nghut lê." ga taí
akô nghut ri.

*Yesuq, Noqkuq Yhùm Lé
Lhoq Sansêng Pyâm É Hkyô*

*Mrk 11:15-19; Luk 19:45-
48; Yhn 2:13-22*

¹² Yesuq gi, noqkuq yhùm
má wang ê mù, haù mâ é zè
ung zè wuì kut nyi é bang
banshoq lé, hkat htoq pyâm
luí, ngùn htaí zo bâng é si-
boí pé eq hpûngkyui ung zo
bâng é tanghkuq pé lé, tu
mhuq pyâm byí ri. ¹³ Haù
hkûn, Yhang gi, "'Ngá yhùm
gi, kyûdung yhùm ga râ nghut
lê."* ga kê to kôlhang, nung-
moq gi, jowò shí lé 'damaq
hkyûng'* kut nyi akô." ga,
yhangmoq lé taí ri.

¹⁴ Yesuq, noqkuq yhùm má
nyi tô é hkûn, myoqjit bang eq
hkyî hten bang Yhâng chyáng
lé lô kômù, Yhang gi, haù
bang lé lhom lhoq gê byí ri.

¹⁵ Nghut kôlhang, hkyangjong
agyí pé eq tarâ sará pé gi,
Yhang kut é mauhpo muzó
pé lé le, "Dawiq é Yhangzo
gi, hosana nghut sháng gaq."
ga, noqkuq yhùm má zoshâng
wuì garû nyi bùm kô é lé
le, myàng kôjáng, wú nhik-yô
bum akô nghut ri.

¹⁶ Haù mù, yhangmoq gi,
"Zoshâng shí bang haí taí nyi
kô é lé, Nàng wó gyô lê
lhubú?" ga, Yesuq lé myi kôjáng,
Yhang gi, "Wó gyô ri. Nung-
moq gi,

'Zoshâng wuì eq nyheqnú pé
é nhut mai hkya-on
kungtôn râ matú, nàng
lajâng to bê nghut ri.'*

ga kê tô é lé, Chyúmdang má a
nghap wú kó lhubú?" ga yhang-
moq lé taí ri.

¹⁷ Hau htâng má, Yhang gi,
haù bang lé nyhi to luí, wà
hkaù mai htoq ló mù, Behtani
wà má é jé luí, haù myîn, haù
má bíng yu ri.

*Maihpáng Gâm Nyhûi Kyuq
Shi Byuq É Hkyô*

Mrk 11:12-14, 20-24

¹⁸ Yhang gi, htang napkyó
noq le, Yerusalem wà mó
shut dum taù ló é hkûn, hkyô
má zòmut hui bê nghut ri.

¹⁹ Haù mù, Yhang gi, hkyô
yàm má yuq tô é maihpáng
gâm lé myang kat mù, chyâng
e wú le, ahaq mai lai luí, haí
lé le a myàng nghut ri. Haù
mù, Yhang gi, shigâm haù lé,
"Nàng má, hkâ-nhám le ashi
a zui sháng gaq." ga taí kat
ri. Haù hkûn jáng, agàm haù

gi, nyhuí kyuq shi ló byuq bê nghut ri.

²⁰ Haú chángzô pé gi, haú lé myàng kôjáng, maú byuq kômù, "Maihpáng gâm shí gi, haí mù haú-í hân nyhuí kyuq shi ló lhê lhà?" ga myí akô.

²¹ Yesuq gi, "Ngò, nungmoq lé teng za taí kôlé, nungmoq, úng-âng é myit a bo é za, lumjíng kô é nghut le gi, maihpáng gâm má Ngò kut é muzó lé, nungmoq wó kut kó râ nghut é htoq agó, bùm shí lé, 'Htot mù, wuimau má ló gyó wâng aq.' ga taí jáng, taí é eq rajung za dut râ nghut lhê.

²² Nungmoq, lumjíng myit eq dung kô é nghut jáng, haí dúng le le wó yú kó râ nghut lhê." ga tũ taí ri.

Yesuq É Ahkáng Ayá Lé Myí Chyam É Hkyô

Mrk 11:27-33; Luk 20:1-8

²³ Yesuq gi, noqkuq yhùm wàng hkaú má wang ê mù, mhoqshit nyi é hkûn, hkyangjong agyi pé eq mingbyu é suwún wuî gi, Yhâng chyáng lé jé kômù, "Hai ahko ahkâng eq, Nàng, shí pé lé kut nyi lhê lú? Ahko ahkáng shí, Nang lé ó yuq byí é lú?" ga myí akô.

²⁴ Haú hkûn, Yesuq gi, "Ngò le, nungmoq lé rajung myí wú kôlé, nungmoq wó tũ taí kô é nghut jáng, hai ahko ahkâng eq, Ngò, shí pé kut é hkyô lé taí kyo râ nghut lhê.

²⁵ Yohan byí é baptisma gi, ó yuq é ahko ahkáng mai nghut lhê lú? Mauhkûng mai lú? A nghut jáng, byu chyáng mai lú?" ga taú myí kat ri.

Haú hkûn, yhangmoq, chôm hpyê lhum kô é gi, "'Mauhkûng mai nghut lhê.' nghû, nga-nhúng taí jáng le, 'Haú nghut le nhing, haí mù, yhang lé a lumjíng kô é lú?' ga râ nghut; ²⁶ 'Byu chyáng mai nghut lhê.' nghû jáng le, yhangmoq lhunglhang bang gi, Yohan lé, myiqhtoi rayuq ga lumjíng bùm kô é nghut lhê yanmai, haú bang lé, nga-nhúng gyuq râ lhê nghut." gâ akô.

²⁷ Haú mù, yhangmoq gi, Yesuq lé, "Ngamoq a sé." ga tũ taí akô.

Haú hkûn, Yesuq gi, "Haú jáng, Ngò le, hai ahko ahkâng eq shí pé kut é hkyô lé, nungmoq lé a taí kyo." ga, yhangmoq lé taí ri.

Yuqzô Nhiktâng Lé Dangtú Yu É Hkyô

²⁸ Yesuq xoq taí é gi, "Nungmoq hkâsu wó myit akô lú? Byù rayuq gi, yuqzo í yuq wó ri. Yhang gi, ko sũ yuq chyáng ê mù, 'Ngá zo ê, nàng, hkû-nyí tsibiyiq hkyâm má mù ê zui aq.' ga taí jáng, ²⁹ yuqzo haú gi, 'Ngò a kâm ê.' ga tũ taí ri; nghut kôlhang, htâng má, yhang gi, myit dum lúng mù, ê bê nghut ri.

³⁰ Hau htâng, yhângwa gi, yhang zo tiq sũ yuq chyáng é mù, rajung za ga ê dum taí jáng, yuqzo haú gi, 'Ê râ, âwa!' ga yín yú kôlhang, a ê kut ri.

³¹ Haú nhiktâng mâ é hká yuq sheq, yhângwa ô nau é hkyô lé kut sũ nghut ri lú?" gâ ri.

Haú hkûn, yhangmoq gi, "Ko sù nghut ri." ga tû taí akô.

Haú mù, Yesuq gi, yhangmoq lé, "Ngò, nungmoq lé teng za taí kôlé, kang guq bang eq shiwa myhí pé gi, Garai Gasâng é mingdán má, nungmoq a wàng shimá, wang ló nyi bùm kó râ nghut lhê. ³² Hkâsu mù gâ le, Yohan gi, nungmoq chyáng lé jé mù, dingmán hkyô lé tûn shit kôlhang, nungmoq gi, yhang lé a jing kut akô nghut ri; nghut kôlhang, haú kang guq bang eq shiwa myhí pé gi, yhang dang lé jing akô nghut ri. Nungmoq gi, haú hkyô lé myang é nghut kôlhang, myit a lhing kô é htoq agó, yhang lé a lumjing shi kó nghut ri.

Tsibiyiq Hkyâm Saí Bang Lé Dangtú Yu É Hkyô

Mrk 12:1-12; Luk 20:9-19

³³ Gotû dangtú lé gyô wú shi keq; hkyâm yhumsing rayuq gi, tsibiyiq hkyâm ralhum saí to mù, lhinghkyuq kyâm to luí, tsibiyiq wing pyik htoq râ dongkong dû to mù, machya ralhum saí tô ri. Hau htâng, yhang gi, hkyâm haú lé, hkyâm saí zo bâng chyáng ngho byí to mù, gó ming shut e ló byuq bê nghut ri. ³⁴ Kyôshu yoq jé jáng, yhang gi, yhang eq sêng é tsibiyiq shi é yû râ matú, yhang é dui-nhâng zoshâng wui lé, haú hkyâm saí zo bâng chyáng nhang kat ri.

³⁵ Haú hkyâm saí zo bang gi, dui-nhâng zoshâng wui lé, lhom chyup yû kômù, rayuq lé gi, lhom nhuq bat, rayuq lé

gi, lhom sat pyám, rayuq lé gi, luqgok eq lhom dú sat pyám, kut akô nghut ri. ³⁶ Hau htâng má, yhang gi, hí dam lhê htoq je myo shoq gotû dui-nhâng zoshâng wui lé dum nhang kat le le, haú hkyâm saí zo bang gi, hí lhê bang lé su lhom dum kut akô nghut ri. ³⁷ Ló htáng má, yhang gi, 'Ngá zo lé gi, yhangmoq lhom hkungga kó râ nghut lhê.' ga, yhang zo lé, haú bâng chyáng nhang kat ri.

³⁸ Nghut kôlhang, haú hkyâm saí zo bang gi, yhang zo lé myàng kôjáng, 'Shí yuq gi, silí wunlí sing yû râ sù nghut lhê; lé keq, yhang lé sat pyám mù, yhang é silí wunlí lé yu pyám byi sháng.' ga, rayuq eq rayuq taí lhùm bum akô nghut ri. ³⁹ Haú mù, yhangmoq gi, yhang lé, chyup yû luí, hkyâm shinggan shut dú htoq kômù, sat pyám bekô nghut ri.

⁴⁰ Haú mù luí, tsibiyiq hkyâm yhumsing lé jé é hkûn lé, haú hkyâm saí zo bang lé hkâsu kut nhô ngam akô lhú?" ga Yesuq myí ri.

⁴¹ Haú hkûn, haú hkyangjong agyi pé eq suwún wui gi, "Haú agè ashop bang lé gi, agè ashop é dong sat pyám râ nghut lhê. Haú tsibiyiq hkyâm lé gi, kyô shu yoq má, yhang é gambùm lé byí râ bang lé, htot ngho byí pyám râ nghut lhê." ga, tû taí akô nghut ri.

⁴² Haú jáng, Yesuq dum taí é gi, "Chyúmdang má,

'Yhùm sai bâng eq hkyin htoq pyâm é luqgok gi, htungchyûn mâ é ahkyak dik é luqgok dut bê.

Shí hkyô gi, haû Yhumsîng kut é nghut luî, nganhûng é myoq hí má mauhpo dut bê nghut ri.*

ga bo tô é lé, nungmoq a ng-hap wú kó lúh?

⁴³ Haû mù, Ngò, nungmoq lé taí kôlé, Garai Gasâng é mingdán lé, nungmoq chyáng mai yù mù, hau é ashi wó zui râ byuhú lé byî pyám râ nghut lhê. ⁴⁴ Luqgok haû má gyó záng é sù gi, gyûi gyop byuq râ nghut lhê. Luqgok hau eq gyó nhê záng é sù le, nhê pyeq pyâm é hui râ nghut lhê." gâ ri.

⁴⁵ Hkyangjong agyi pé eq Hparishe pé gi, haû Yesuq taí é dangtú pé lé wó gyo kôjáng, yhangmoq lé taí nyi é hkyô lé, sê gyô akô nghut ri. ⁴⁶ Haû mù, yhangmoq gi, Yhang lé chyup yû râ hkyô ho nyi akô; nghut kôlhang, byu pé gi, Yhang lé, myiqhtoi rayuq ga myit lum to kô é yanmai, yhangmoq gi, haû bang lé gyuq akô nghut ri.

22

Myiháng Poî Dangtú Pé

Luk 14:15-24

¹ Yesuq, dangtú pé dông yhangmoq lé dum taí é gi, ² "Mauhkûng mingdán gi, yhumsîng yhangzô é matú myiháng poî hen lajâng to byî é hkohkâm rayuq eq du ri.

³ Hkohkâm hpó haû gi, yhang ji tô é bang, haû poî má lé lô râ matú, yhâng é dui-nhâng zoshâng wuî lé ê tsing taí nhang ri; nghut kôlhang, haû bang gi, a lé kut akô nghut ri.

⁴ Hau htâng má, yhang gi, gotû dui-nhâng zoshâng wuî lé, 'Ngò haî le hen to bê; ngá é no eq xu-myum é gau-nyhaú pé lé sat mù, jung hkangmó rì rì nghut to bê. Myiháng poî má lé lò keq hkoi nghú, haû ji tô é bang lé ê taí keq.' ga pyíng luî, nhang kat ri.

⁵ Nghut kôlhang, haû ji to huî é bang gi, dang haû lé haî su a gyô ngàm kômù, rayuq gi, yohtung shut, rayuq gi, hpugá dinggá hkyô shut é byuq bekô nghut ri. ⁶ Ra-am dum nghut jáng, yhâng é dui-nhâng zoshâng wuî lé lhom chyup yû kômù, nhuq bat luî, sat pyám byî akô nghut ri. ⁷ Haû mù, hkohkâm gi, nhikjum yo luî, yhâng é gyezô pé lé, haû byù sat bang lé sat pyám nhâng mù, yhangmoq é myuq lé nyhê hkyô pyám nhang ri.

⁸ Hau htâng má, yhang gi, yhâng é dui-nhâng zoshâng wuî lé, 'Myiháng poî gi, rì rì nghut to bê; nghut kôlhang, haû ji to huî é bang gi, lé râ a gingdán kó nghut ri. ⁹ Haû mù, hkyô kang pé má ê luî, myang é yuq hkangmó lé, poî má lé râ matú ê jî keq.' ga taí ri. ¹⁰ Haû jáng, dui-nhâng zoshâng haû bang gi, hkyô kang pé má htoq ê luî, myang é byù gè byù gang lhunglhang

lé ji tsing yù kô é nghut mù, myiháng poí gi, bíng pé zung byíng bùm bê nghut ri.

¹¹ Nghut kôlhang, bíng haú bang lé, hkohkâm hpó, lé wang wú é hkûn, myiháng poí wàng hking a wut tô é byù rayuq lé, yhang byu-myang ri. ¹² Haú mù, yhang gi, haú yuq lé, 'Buinùm hpó ê, nàng gi, myiháng poí wàng hking le a wut é nhíng, shí má hkâsu kut wang lo é lúhú?' ga myi jáng, haú yuq gi, haí le a dat tû táí lo nghut ri.

¹³ Haú hkûn, hkohkâm hpó gi, yhâng é dui-nhâng zoshâng wui lé, 'Yhâng é hkyî loq má tui luí, haú ngaubyi ngàu nhap eq zui kyik kyik shoq hpuzô nyi râ nghut é shing-gan mauchut hkaú má, dú htoq pyám keq.' gâ ri.

¹⁴ Hkâsu mù gâ le, byù myo myo gi, ji yu é hui kôlhang, hkyin yù huí é bang gi, shaú ri." gâ ri.

Kehtaq Lé Kang Kat Byî É Hkyô

Mrk 12:13-17; Luk 20:20-26

¹⁵ Hau htâng má, Hparishe pé gi, htoq ló kômù, Yhâng é dang pé má mara chyup râ hpaqchyî dâ akô nghut ri. ¹⁶ Yhangmoq gi, Herut é byu pé eq rahá, yhangmoq é chángzô pé lé, Yesuq chyáng nhang kat akô. Haú bang gi, Yesuq chyáng lé jé kômù, "Sarâ ê, Nàng gi, tengmán sù nghut é eq, Garai Gasâng é hkyô lé, tengmán é đông mhogshit é sù nghut é lé le, Nàng gi, ó haí ga râ lé le haí su a

ngàm sù nghut é yanmai, ó yuq é myoqdong lé le a tê byi sù nghut é hkyô lé le, ngamoq sê lhê. ¹⁷ Haú mù, hkoséng Kehtaq lé kang kat byî le gi, ge lhê lúhú? A gè lúhú? Nàng, hkâsu wó myit é hkyô táí kyô wú aq." ga táí akô nghut ri.

¹⁸ Yesuq kúm gi, yhangmoq é agè ashop hkyô lé sé byi mù, "Gegùn labyoq kut bang ê, nungmoq gi, haí mù, Ngo lé lé chyam wú akô lúhú? ¹⁹ Kang kat râ ngùn htingchap rachap, Ngo lé byî wú keq." ga táí kat ri. Haú hkûn, yhangmoq gi, denari rachap yù byî akô. ²⁰ Haú mù, Yhang gi, yhangmoq lé, "Shí má, ó yuq é alhô eq masat laiká dap tô ri lúhú?" ga myi jáng, ²¹ yhangmoq gi, "Kehtaq é nghut ri." ga tû táí akô. Haú mù, Yhang gi, yhangmoq lé, "Kehtaq é lé gi, Kehtaq lé byi keq; Garai Gasâng é lé gi, Garai Gasang lé byi keq." ga táí kat ri.

²² Haú su gâ é lé, wó gyo kôjáng, haú bang gi, maú byuq kômù, Yhâng chyáng mai htoq ló byuq bekô nghut ri.

Saduke Pé, Yesuq Lé Myî Chyam É Hkyô

Mrk 12:18-27; Luk 20:27-40

²³ Haú nyi má yhang, haú dum dui toq hkyô a joq gâ é Saduke pé gi, Yesuq chyáng lé jé kômù, dangmyi lé myi akô. ²⁴ Yhangmoq myi kô é gi, "Sarâ ê, 'Myiwe wó é byù rayuq gi, zo dù a dap é za shi byuq é nghut jáng, yhanggu

gi, yhangmâng é awut ashín xoq byi râ matú, yhâng rhat lé chui gon ra râ nghut lâ.' ga, nga-nhúng lé, Mosheq taí tô é nghut lâ. ²⁵ Hí hpyang lé, ngamoq chyáng, gumang nhiktâng wui nyhit yuq nyi akô. Lagám yuq gi, myiwe yù luí, zo dù a dap é za yhangmyi lé shi lhuí pyâm to bê nghut ri. ²⁶ Haú eq ra-jung za, Lanong, Lalaq mai Lahkâ jé shoq, chuimó haú lé gon luí, ó le zo dù a dap é za shi ló byuq bùm bekô nghut ri. ²⁷ Ló htáng má, myiwe myhí haú le châng shi ló byuq bê nghut ri. ²⁸ Haú mù luí, haú dum dui toq é buinyi má, myiwe myhí haú gi, haú nhiktâng wui nyhit yuq mâ é hká yuq é yhangmyi nghut râ lú? Hkâsu mù gâ le, yhang gi, haú nhiktâng wui banshoq bâng é yhangmyi dut wú bê sù nghut ri." gâ akô.

²⁹ Haú hkûn, Yesuq gi, yhangmoq lé, "Nungmoq gi, Chyúmdang eq Garai Gasâng é wum-o a-tsam lé a sé kô é yanmai, hkyô nghoq akô nghut ri. ³⁰ Haú dum dui toq é buinyi má gi, myi byi myi yú hkyô joq lo rá a nghut; yhangmoq gi, mauhkûng htoq mâ é maumang lagyô pé su dut byuq kó râ nghut lâ. ³¹ Shi é mai dum dui toq bang eq séng luí, ³² Garai Gasang gi, 'Ngò gi, Abraham é Garai Gasang, Isak é Garai Gasang, Yakup é Garai Gasang nghut lâ.'* ga, nungmoq lé taí tô é lé, nungmoq a nghap wú

kó lú? Yhang gi, shi to bâng é Garai Gasang a nghut; dui nyi bâng é Garai Gasang sheq ru nghut lâ." ga taí ri.

³³ Byù moq mó gi, dang haú wó gyo kôjáng, Yhang mho-qshit é hkyô lé maú byuq bum akô nghut ri.

Ahkyak Dik É Jep É Tarâ
Mrk 12:28-34; Luk 10:25-28

³⁴ Saduke pé lé, Yesuq lhoq zím pyâm é hkyô lé, Hparishe pé wó gyo kôjáng, yhangmoq gi, Yesuq chyáng zup zîng lé bum akô. ³⁵ Yhangmoq má bo é tarâ sará rayuq gi, Yesuq lé chyam wú é dông, ³⁶ "Sará ê, jep é tarâ má, hká lhum gi, je ahkyak dik lâ lú?" ga myí ri.

³⁷ Haú mù, Yesuq gi, "'Haú Yhumsîng náng é Garai Gasang lé, náng é myit nhiklhum banshoq, náng é asak woi-nyí lhum gón, nàng myit é hkyô banshoq èq, chyitdap râ lâ.'* gâ é nghut lâ. ³⁸ Tarâ haú gi, je hí lhum eq je ahkyak dik é lhum nghut lâ. ³⁹ Hau htang lhum le haú eq du é nghut mù, 'Náng gûng lé nàng chyitdap é su, náng é chyangnâm mâ é bang lé le chyitdap aq.'* gâ é nghut lâ. ⁴⁰ Tarâ haú í lhum gi, jep é tarâ banshoq eq myiqhtoí laiká banshoq é dangchyûng nghut lâ." ga, yhang lé taí kat ri.

Hkrisduq Gi, Ô Yuq É Yhangzo?

Mrk 12:35-37; Luk 20:41-44

⁴¹ Hparishe pé zup zîng to kô é hkûn, Yesuq gi, yhangmoq lé, ⁴² "Nungmoq gi, Hkrisduq eq séng luî hkâsu myit ngam akô lhú? Yhang gi, ó yuq é yhangzo nghut lhê lhú?" ga myi jáng, yhangmoq gi, "Dawiq é yhangzo nghut ri." ga tû taí akô.

⁴³ Haû mù, Yhang gi, yhangmoq lé, "Haû hkûn, Dawiq gi, Woi-nyí dông mai, Yhang lé, 'Yhumsîng' ga, haî mù wut lhê lhú? Hkâsu mù gà le, Dawiq taí é gi,

⁴⁴ 'Haû Yhumsîng Garai gi, ngá é Yhumsîng lé, "Ngò, náng é gumlau gye pé lé, náng é hkyiwa ô má tô pyâm é hkyíng jé shoq,

Ngá é loqyo hkyam shut zung nyi shi aq." ga taí ri.*

gâ ri. ⁴⁵ Haû mù, Dawiq yhang lháng, Hkrisduq lé, 'Yhumsîng' gâ é nghut le gi, yhangzo za hkâsu ge nghut râ lhú?" ga taí ri. ⁴⁶ Haû mù, ó yuq le, dang rahkun lháng a wó tû taí lo kô é nghut mù luî, haû nyí mai, ó yuq lháng Yhang lé dangmyi a wám myi lo kó nghut ri.

23

Tarâ Sará Pé Eq Hparishe Pé Lé Sidiq Râ Hkyô

Mrk 12:38-40; Luk 11:37-52; 20:45-47

¹ Hau htâng, Yesuq gi, byù moq mó eq Yhâng é chángzô pé lé taí é má, ² "Tarâ sará pé eq Hparishe pé gi, Mosheq é tanghkuq má zung akô. ³ Haû mù, yhangmoq mhoqshit é hkyô chângiup lé, nungmoq châng kut ra kó râ nghut lhê. Nghut kôlháng, yhangmoq kut é dông gi, hkâkut kó; hkâsu mù gà le, yhangmoq gi, yhangmoq taí é dông a kut kó nghut ri. ⁴ Yhangmoq gi, byu pé é goqsân má wòlai ke byi kôlháng, yhangmoq yhang gi, wò haû pé lé bo waq râ matú, loqnyhui lháng a kâm lhoq tuí kó nghut ri.

⁵ Yhangmoq kut é hkyô lhunglháng gi, byu pé myàng râ matú za kut shit é nghut akô; haû chyúmbun bo é showuî-htûng pé lé lhoq kô yù kômù, buhîng pé mâ é banbyaú pé lé lhoq hing yu akô nghut ri; ⁶ yhangmoq gi, poí pé mâ é réng é jowò pé eq tarajong pé mâ é ahkyak dik é zùng jang pé má, myang zùng râ lé ô nau nyi akô; ⁷ yhangmoq gi, gài pé má lhom shi-kyâm yù kó râ eq, byu pé mai, yhangmoq lé, 'Rabai'* ga lhom wut kó râ lé ô nau nyi bum akô.

⁸ Nungmoq kúm gi, 'Rabai' ga wut râ lé hkâ-ô nàu kó; hkâsu mù gà le, nungmoq gi, sará rayuq za wó lhê nghut é htoq agó, nungmoq ban-shoq bang gi, gumang chyat ru nghut lhê. ⁹ Haû mù, myidàm htoq má, ó yuq lé

* 22:44 Hkya-on 110:1

* 23:7 Aramaik dang dông rabai gâ é gi, sará gâ é lichyúm nghut lhê.

le, 'âwa' hkâ-nghû kó; hkâsu mù gâ le, mauhkûng htoq mâ é Îwa rayuq za, nungmoq é Îwa nghut lhê. ¹⁰ Hau htoq agó, 'sarâ' ga wut râ lé, hkâ-ô nau kó; hkâsu mù gâ le, Hkrisduq za, nungmoq é Sarâ nghut lhê. ¹¹ Nungmoq mâ é je gyaú sù gi, nungmoq é dui-nhâng zoshâng dut râ nghut lhê. ¹² Hkâsu mù gâ le, yhum-sing gùng lé waq toq sù ó yuq nghut kôle, lhoq nyhum pyâm é hui râ nghut lhê, yhumsing gùng lé lhoq nyhûm sù kúm gi, waq toq é hui râ nghut lhê.

¹³ Gegùn labyoq nghut é, tarâ sarâ pé eq Hparishe pé ê, nungmoq gi, dingnyé wó ri. Hkâsu mù gâ le, nungmoq gi, byu pé hí má, mauhkûng mingdán hkyô lé xaú tô akô; nungmoq yhang le a wàng kó, wàng nau nyi bang lé le a wàng nhâng kó nghut ri. ¹⁴ (Gegùn labyoq nghut é, tarâ sarâ pé eq Hparishe pé ê, nungmoq gi, dingnyé wó ri. Hkâsu mù gâ le, nungmoq gi, chuimó pé é yhûm-yò pé lé hpyoq zo hpyoq shuq é eq kyú hîng hîng dúng shit mhaú é bang nghut akô; haú mù, dam byí é je myo hui zo kó râ nghut lhê.)†

¹⁵ Gegùn labyoq nghut é, tarâ sarâ pé eq Hparishe pé ê, nungmoq gi, dingnyé wó ri. Hkâsu mù gâ le, nungmoq gi, byù rayuq lé nungmoq é no-kuq htûng má wó lhoq lhik yú râ matú, myi hkyô, wui hkyô, châng jón wún kômù,

wó lhoq lhik yu é sù lé gi, nungmoq su ngaraí byù í tú shuít dut akô nghut ri.

¹⁶ Hkyô-u she é myoqjit pé ê, nungmoq gi, dingnyé wó ri. Nungmoq gi, 'Noqkuq yhûm lé lang luí dakam é sù gi, haí a ra; noqkuq yhûm mâ é hîng lé lang mù dakam é sù kúm gi, châng ra bê.' ga lhaq taí akô. ¹⁷ Myoqjit é byù nâ pé ê! Haú hîng eq hîng lé lhoq yúnglhô é noqkuq yhûm gi, hká lhum je ahkyak lhê lú? ¹⁸ Hau htoq agó, nungmoq gi, 'Haú hkungga gyap lé lang luí dakam é sù gi, haí a ra, nghut kôlhâng, haú hkungga zè lé lang mù dakam é sù gi, châng ra bê.' ga le, lhaq taí akô nghut ri. ¹⁹ Myoqjit pé ê! Haú hkungga zè eq hkungga zè lé lhoq yúnglhô é hkungga gyap gi, hká lhum je ahkyak lhê lú? ²⁰ Haú mù, haú hkungga gyap lé lang luí dakam é sù gi, haú hkungga gyap eq hau é ahtóq má ke tô é zè banshoq lé lang luí dakam é sù dut bê nghut ri. ²¹ Noqkuq yhûm lé lang luí dakam é sù gi, haú noqkuq yhûm eq haú má nyi é Sù lé lang luí dakam é sù dut bê nghut ri. ²² Hau htoq agó, mauhkûng lé lang luí dakam é sù gi, Garai Gasâng é tanghkuq eq haú má zung é Sù lé lang luí dakam é sù dut bê nghut ri.

²³ Gegùn labyoq nghut é, tarâ sarâ pé eq Hparishe pé ê, nungmoq gi, dingnyé wó ri. Hkâsu mù gâ le, nungmoq gi, xunmân nghut é gau-tsáng

† 23:14 Chyúmding ra-am má gi, bun zo 14 shí a bo é nghut lhê.

shingtón, bantsái, hpakkyí pé mâ é xê gambùm ragambùm lé gi, byí nyi kômù, je ahkyak é tarâ nghut é, tarâ rap-rá hkyô, shogyo nhikmyin hkyô eq lhumzui hkyô pé lé gi, lhaí pyâm tô akô nghut ri. Hí lhum lé kut é su, htang lhum lé le kut râ lhê. ²⁴ Hkyô-_u she é myoqjit pé ê! Nungmoq, pyup lé gi, jân pyâm kômù, gola-uq lé gi, myui pyâm akô nghut ri.

²⁵ Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gâ le, nungmoq gi, zo hkoq shuq góm pé lé ahtoq shut za chí yúng mù, ahte má gi, lú zo lú shuq é eq yhumsing maiwáng zat é myit byíng zan tô ri. ²⁶ Hparishe myoqjit pé ê! Zo hkoq shuq góm é ahte lé hí chí yúng pyâm keq, haú jáng, ahtoq le sân-yúng râ nghut lhê.

²⁷ Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gâ le, nungmoq gi, but hpyu tô é lup pé eq du akô; haú pé gi, ahtoq má wú yúng kôlhang, ahkaú má gi, mâng bup showui pé eq achayut é chângiup byíng tô é nghut ri. ²⁸ Haú eq rajung za, nungmoq gi, byu pé hí má, ahtoq pyâm dingmán é su kut shit kôlhang, ahkaú má gi, gegùn labyoq kut é eq agè ashop é hkyô pé byíng zan tô ri.

²⁹ Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gâ le, nungmoq

gi, myiqhtoí pé é lup lé luptsuq tsuq kômù, dingmán bâng é lup pé lé mhón byi kôluí, ³⁰ 'Ngamoq gi, ngamoq é íchýí îwa pé é ipyat má nyi âng é ru nghut le gi, haú myiqhtoí pé é sui lhoq shun é bang má, ngamoq bo lòm râ a nghut.' ga lhaq taí akô. ³¹ Haú su mù, nungmoq gi, haú myiqhtoí pé lé sat pyâm bâng é awut ashín pé nghut é hkyô lé, nungmoq gùng nungmoq saksé hkam yu nyi akô nghut ri. ³² Haú mù, nungmoq é íchýí îwa pé hi tô é muzó lé, banshoq châng kut pán keq!

³³ Lhangmuí pé ê, duq htân lhangmuí amyû pé ê! Ngaraí mîng é dam byi hkyô mai, hkâsu wó hfang lut kó râ lhú? ³⁴ Hau é yanmai, myiqhtoí pé, hpaqchyí bò bang eq chyúm sará pé lé, Ngò, nungmoq chyáng nhang kat râ nghut lhê. Haú bang mâ é ra-am lé gi, nungmoq lhom sat pyâm mù, tapzîng má jén pyâm kó râ nghut lhê; ra-am lé gi, nungmoq é tarajong pé má, nhuq bat kômù, ra-myuq htâng ra-myuq châng hkat zing-rí wún kó râ nghut lhê. ³⁵ Hau é yanmai, haú dingmán sú Abelaq é sui mai hí luí, noqkuq yhùm eq hkungga gyap gyoro má nungmoq sat pyâm é, Berehkiq é yhangzo Zahkariq é sui jé shoq, myidàm htoq má shun pyâm é dingmán bang banshoq é sui gi, nungmoq é ahtoq má jé lô râ nghut lhê. ³⁶ Ngò, nungmoq lé teng za taí kôlé,

shí hkyô banshoq gi, ipyat shi é ahtoq má jé râ nghut lhê.

³⁷ Yerusalem ê, Yerusalem ê, myiqhtoî pé lé sat pyâm pyâm kut mù, náng chyáng nhang kat é bang lé luqgok èq dú sat sat kut é myuq nàng ê, woqzìng gi, yhangzô pé lé, yhâng é dùng hkaû má tsìng lhùng yu é su, nungzô pé lé, Ngò, hkâ-myhó dâm shuî tsìng yù nàu kôlhang, nàng a dóng nghut ri. ³⁸ Wú keq, nungmoq é yhùm gi, nungmoq é matú chamchyuiyui dut pyâm to berâ nghut lhê. ³⁹ Hkâsu mù gâ le, Ngò, nungmoq lé taí kôlé, 'Yhumsing é myìng mai jé lé lo é Sù gi, hkungsô wó nyî sháng gaq.'* ga, nungmoq a taí taí gi, Ngo lé wó myâng kó râ a nghut lo." gâ ri.

24

Ló Htâng Buinyì Má Dut Lò Râ Hkyô

Mrk 13:1-31; Luk 21:5-33

¹ Yesuq gi, noqkuq yhùm mai htoq e ló é u lé, Yhâng é chángzô pé gi, Yhâng é nàm má huî lé lô kômù, haû noqkuq yhum é loqmú pé lé tûn shit akô. ² Haú hkûn, Yesuq gi, yhangmoq lé, "Haú pé banshoq lé, nungmoq myang lhê a nghut kó lú? Ngò, nungmoq lé teng za taí kôlé, luqgok haú pé gi, rachâm htoq racham lhang a kê lhum loshoq, hpyoq hpyi pyâm é hui râ nghut lhê." ga taí ri.

³ Yesuq gi, Tsanlun Bùm má zung tô é hkûn, haû chángzô

pé gi, yhangmoq baú Yhâng chyáng lé jé kômù, "Haú hkyô pé gi, hkâ-nhám dut lò râ lú? Nàng gyó lé râ hkûn eq ló htâng buinyì má, hkasû é kumlhá htoq lô râ nghut lhê lú? Ngamoq lé taí kyô wú laq." ga, Yhang lé myí akô.

⁴ Haú hkûn, Yesuq, yhangmoq lé tû taí é gi, "Nungmoq lé, ó yuq èq le a wó shuî nghoq sháng gaq, sidiq nyi keq. ⁵ Hkâsu mù gâ le, 'Ngò gi, haû Hkrisduq nghut lhê.' ga, Ngá myìng lé lãng é byù myo myo pô htoq lô mù, byù myo myo lé hkyô shuî nghoq kó râ nghut lhê. ⁶ Nungmoq gi, majan dut nyi é hkyô eq majan eq sêng é danglám pé lé, wó gyo kó râ nghut lhê; nghut kôlhang, hkâgyuq dân kó. Haú hkyô pé gi, dut lò râ za nghut lhê; nghut kôlhang, ló htâng é buinyì gi, a nghut shi. ⁷ Byù ra-myû eq ra-myû, mingdán ralhùm eq ralhùm majan zân lhùm lò kó râ nghut lhê. Jowò myo myo má, mutmó gyó é pé eq layàng nún é pé dut lò râ nghut lhê. ⁸ Haú pé gi, wuîhke jamjau hkyo é apûn awang za ru nghut ashí.*

⁹ Haú hkûn, nungmoq gi, zing-rî é eq sat pyâm é hui zo râ matú, ap pyâm é hui kó râ nghut lhê. Byù myû lhunglhang bang gi, Ngá é yanmai, nungmoq lé a ngui kut kó râ nghut lhê. ¹⁰ Haú u lé, byù myo myo gi, lumjìng myit lé tô pyâm kômù, rayuq eq rayuq a ngui lhum dut é htoq agó, rayuq eq rayuq

ap pyâm lhum kó râ nghut lhê. ¹¹ Hau htoq agó, myiqhtoi pyoq pé myo myo pô htoq lô kômù, byù myo myo lé hkyô shuí nghoq kó râ nghut lhê. ¹² Agè ashop é hkyô myô jat lo é yanmai, byù myo myô é chyitdap myit gi, kân ló byuq râ nghut lhê; ¹³ nghut kôlhang, jhtùm jé shoq wó hkam jân nyi é sù gi, hkyi yu é hui râ nghut lhê. ¹⁴ Byù myû banshoq má saksé dut râ matú, haù mingdán eq sêng é gabú danglù lé, mingkan gón má hko kyo râ nghut lhê. Hau htâng má sheq, ló htum buinyi jé râ nghut lhê.

¹⁵ Haù mù luí, myiqhtoi Danielaq dông mai tái tô é eq rajung za, 'haù lhoq hten lhoq hpyoq é achag achyut hkyô^{*} gi, chyoiyúng jowò má shap tô é lé, nungmoq myàng kó râ nghut lhê. (Chyúmlaika nghap sù gi, sê gyo sháng gaq). ¹⁶ Haù hkùn, Yuda mau má nyi é bang gi, bùm pé shut hpang doq ló kó sháng gaq. ¹⁷ Yhumhkùng htoq má nyi tô é sù gi, yhúmhaú má é zè haí lé le, a ló gyó wang yù lo sháng gaq. ¹⁸ Yò má nyi tô é sù gi, yhâng é buhâng lé a ló taù yu nyi lo sháng gaq. ¹⁹ Haù buinyi pé má, zogùng dut é myiwe eq naú huq ashí nghut é ìnu wui gi, gyai yhang wuìhke jamjau kó râ nghut lhê. ²⁰ Haù nungmoq hpâng râ buinyi gi, gy-oqmyò,* a nghut jáng, Bánno buinyi má a ang râ matú,

kyûdùng nyi keq. ²¹ Hkâsu mù gâ le, mingkan lé joq é hkùn mai ahkuí jé shoq, hkâ-nhám le a dut wú shí é wuìhke jamjau mó gi, haù buinyi pé má dut lò râ nghut lhê; haù sù é hkyô gi, htàngnùng má hkâ-nhám le dum dut lo râ a nghut. ²² Buinyi haù pé lé lhoq shaù pyâm é za a nghut le gi, ó yuq le asak wó lut râ a nghut; nghut kôlhang, Garai Gasang èq hkyin yù hui bâng é matú gi, buinyi haù pé lé, lhoq shaù pyám byi râ nghut lhê. ²³ Haù ahkyíng má, byù rayuq yuq mai, nungmoq lé, 'Wú keq, shí má Hkrisduq nyi ri.' ga, haù a nghut jáng, 'Wú keq, Yhang hê má nyi ri.' ga tái jáng, nungmoq hkâjíng kó. ²⁴ Hkâsu mù gâ le, Hkrisduq pyoq pé eq myiqhtoi pyoq pé pô htoq lô mù, wó dut é nghut jáng, hkyin yù hui bang lé lhang, wó lhoq nghoq shoq ga, kumlhá mó pé eq laklaí kumlhá pé lé kut shit kó râ nghut lhê. ²⁵ Gyo keq, shí hkyô a dut shimá, Ngò, nungmoq lé tái kyô nyi gù nghut lhê.

²⁶ Haù mù, rayuq yuq èq, nungmoq lé, 'Yhang gi, yoso má nyi ri.' gâ jáng le, hkâ-ê kó; 'Yhang gi, shí gokhkaú má lúng tô ri.' ga jáng le, hkâjíng kó. ²⁷ Hkâsu mù gâ le, bui htoq hkyam má lhap hpyat é gi, bui wang hkyam má lhang jé shoq duqbó é su, haù Byu Yhangzo jé lé é hkùn le, dut râ nghut lhê. ²⁸ Màng leq é jang má, langdâ pé, lé zîng bùm râ

* 24:15 Dan 9:27; 11:31; 12:11 * 24:20 Israelaq mau má gi, gyoqmyò lé hkyô htoq le gyai wuìhke é ahkyíng nghut lhê.

nghut lê.

²⁹ Buinyì haú pé mâ é wuìhke jamjau lai eq yhang, 'Bui gi, noq byuq mù, lhamó gi, a tsô dut byuq râ nghut lê;

kyí pé gi, mauhkûng mai byit gyó lo bùm mù, mauhkûng mâ é wum-o a-tsam pé gi, lhoq nhún é huì bùm kó râ nghut lê.[✱]

³⁰ Haú hkûn, haú Byu Yhangzô é kumlhá gi, mauhkûng má htoq shit lô râ nghut mù, myidàm htoq mâ é byù myû lhungháng gi, yón ngau bùm kó râ nghut lê. Haú Byu Yhangzo gi, mauhkûng mai, mhut ji mù, hpungwup a-tsam mó eq le, hpungwup shingkâng eq le, gyó lé lo é lé, yhangmoq byu-myàng kó râ nghut lê.

³¹ Hau htâng má, Yhang gi, Yhâng é maumang lagyô pé lé, tut htê mó èq nhang kat lui, yhangmoq gi, maumyí chyûn myi chyûn eq mauhkûng rahkyam mai, gó hkyam htum shoq mâ é, Yhang hkyin yu tô é bang lé shuì tsíng yù kó râ nghut lê.

³² Maihpáng gâm lé wú mù, mhoq yû keq; agàm mai a-nyuq nyún lô mù, ahaq htut lô jáng, bui nyé nám chyâng lò bê lé, nungmoq sê lê. ³³ Haú eq rajung za, shí hkyô banshoq† lé, nungmoq myàng kôjáng, Yhang gi, chyáng bê nghut mù, hkúmdong má

lhang nghut nyí bê hkyô lé, nungmoq sé lo keq. ³⁴ Ngò, nungmoq lé teng za taí kôlé, shí pyat mâ é byu pé a ban shi byuq shimá, haú hkyô pé† banshoq dut byuq râ nghut lê. ³⁵ Mauhkûng eq myigùng gi, a joq lo dut byuq râ nghut lê; nghut kôhang, Ngá é dang gi, ru joq nyí râ nghut lê.

Haú Buinyì Eq Ahkyíng Lé, Ó Le A Sé

Mrk 13:32-37; Luk 17:26-30, 34-36; 12:35-48

³⁶ Buinyì eq ahkyíng haú lé gi, ó yuq le a sé; mauhkûng htoq mâ é maumang lagyô pé lhang a sé; haú Zo le a sé; haú Íwa za ru sê lê. ³⁷ Noaq é tsín pyat má dut é su, haú Byu Yhangzo lé lo é hkûn le, dut râ nghut lê. ³⁸ Hkâsu mù gâ le, dowuì a dítng shí é buinyì pé má, byu pé gi, Noaq, wuì-sanghpo mó hkaú má wang é hkûn jé shoq, zo zo shuq shuq, myi byi myi yû, kut nyi bum akô nghut ri; ³⁹ yhangmoq gi, dowuì dítng lô mù, yhangmoq banshoq lé ùm sat pyâm é hkûn jé shoq, haí dut lò râ lé, a sé kó dut bùm é su, haú Byu Yhangzo lé lo é hkûn le, dut râ nghut lê. ⁴⁰ Haú hkûn, yò má rahá nyi tô é byù í yuq mâ é rayuq gi, shuì yu é hui mù, rayuq gi, myit gyó to râ nghut lê. ⁴¹ Luqluí chôm lâng nyi é myiwe í yuq mâ é rayuq gi, shuì yu é hui mù, rayuq

✱ 24:29 Esai 13:10; 34:4 † 24:33 Shí hkyô banshoq gâ é gi, Yesuq jé lé râ hí má dut râ hkyô pé lé taí é nghut lê. † 24:34 Haú hkyô pé gâ é gi, Yerusalem noqkuq yhúm htên byoq râ lé taí é nghut lê.

gi, myit gyó pyâm to râ nghut lhê.

⁴² Haû su mù, haû nungmoq é Yhumsîng gi, hká nyí jé lé lô râ lé, nungmoq a sê kô é yanmai, sidiq machya nyi keq. ⁴³ Myín hká u má hkau sù jé lé lò râ lé, yhumsîng sê é ru nghut le gi, yhâng é yhûm má a wó hput wâng nhâng loshoq, yhang machya nyi râ nghut é lé, nungmoq sê gyô nyi keq. ⁴⁴ Haû mù, nungmoq le rì rì nghut nyi keq; hkâsu mù gâ le, haû Byu Yhangzo gi, a bûn nùng má jé lé lô râ nghut lhê.

⁴⁵ Yhumsîng hpô é dui-nhâng zoshâng wui lé, uphkâng râ eq ahkyíng jé jáng zoshuq gàm byi râ matú, yhumsîng hpô èq mù nhang tô é, lhumzui lui, hpaqchyî bo é dui-nhâng zoshâng gi, ó yuq nghut râ lú? ⁴⁶ Yhumsîng hpó dum taû lo é hkûn, haû su kut nyi láng é dui-nhâng zoshâng gi, hkungsô wó nyi ri. ⁴⁷ Ngò, nungmoq lé teng za taí kôlé, yhumsîng hpó haû gi, yhâng é sutzê banshoq, dui-nhâng zoshâng haû yuq lé ap to râ nghut lhê. ⁴⁸ Nghut kôlhang, laq má mù, dui-nhâng zoshâng haû yuq gi, agè ashop sù nghut lui, 'Ngá é yhumsîng hpó jé lô râ gyai myáng ashî.' ga, yhâng é i-myt unghkaû má myit yù mù, ⁴⁹ gotû dui-nhâng zoshâng luzúm wui lé nhuq bat é htoq agó, î shuq wut bang eq rahá zo zo shuq shuq kut nyi é nghut le gi, ⁵⁰ dui-nhâng zoshâng hau

é yhumsîng hpó gi, yhang a myitngam tô é buinyi eq yhang a sê tô é ahkyíng má jé lô mù, ⁵¹ yhang lé jap pyâm lui, gegùn labyoq kut bang hkâm zô é, ngaubyi ngaû nhap eq zui kyik kyik shoq hpuzô nyi râ jowò má hkyô pyâm râ nghut lhê.

25

Zomyi Raxê Yuq Lé Dangtú Yu É Hkyô

¹ Haû hkûn, mauhkûng mingdán gi, myibung yu chûng mù, lusik lé te yù râ ga, htoq e ló é zomyi raxê yuq eq pûng râ nghut lhê. ² Haû bang má, ngo yuq gi, nhik a gyíng kó; ngo yuq gi, nhik gyíng akô nghut ri. ³ Haû nhik a gyíng é bang gi, myibung yu chûng kôlhang, xû a yu chûng kó nghut ri. ⁴ Nghut kôlhang, haû nhik gyíng é bang kúm gi, yhangmoq é myibung lé le, xû bo é bòng lé le yu chung akô nghut ri. ⁵ Lusik jé lé lô râ myáng nyi é yanmai, yhangmoq banshoq bang gi, yhup mui lò kômù, yhup myhî byuq bekô nghut ri.

⁶ Myín gunggàm jé jáng, 'Lusik jé bê ô! Yhang lé te yù râ matú, htoq lé lô keq hkoì ô! ga, garû é htê htoq lo ri.

⁷ Haû hkûn, zomyi haû bang banshoq gi, toq lô mù, yhangmoq é myibung lé hen lajâng akô nghut ri. ⁸ Haû nhik a gyíng bang gi, 'Ngamoq lé, xû ratsuí byi kó laq; hkâsu mù gâ le, ngamoq é myibung shi lô nyi ri.' ga, haû nhik gyíng bâng chyáng dúng akô.

⁹ Haú hkûn, haú nhik gy-ing bang gi, 'Nungmoq eq ng-amoq é matú ga jáng, luq râ a nghut. Haú mù, nungmoq é matú, xú ung bâng chyáng é wui yù keq.' ga tû tai kat akô.

¹⁰ Yhangmoq, xú wui e ló kô é hkûn, lusik gi, jé lé lô mù, haú rì rì hen tô é zomyi wui gi, yhang eq rahá myiháng poí má wang ló bekô. Hkum le myhî byuq bê nghut ri.

¹¹ Hau htâng má, hau htâng gyó tô é zomyi wui gi, tau jé lô kômù, 'Yhumsîng ê! Yhumsîng ê! Ngamoq lé, hkum hpóng byi laq ô!' ga tai akô.

¹² Nghut kôlhang, haú lusik gi, 'Ngò, nungmoq lé teng za tai kôlé, nungmoq lé ngò a sé.' ga tû tai kat ri.

¹³ Haú mù luí, haú Byu Yhangzo jé lé râ buinyi eq ahkyíng lé, nungmoq a sé kô é yanmai, sidiq machya nyi keq.

Dui-nhâng Zoshâng Sum Yuq Lé, Dangtú Yu É Hkyô

Luk 19:11-27

¹⁴ Mauhkûng mingdán gi, byù rayuq byìn we htoq râ hen nyi é nghut mù, yhâng é dui-nhâng zoshâng wui lé wut yù luí, yhâng é sutzè lé ap byi to sù eq pung ashî nghut ri.

¹⁵ Yhang gi, yhangmoq é a-tsam má cháng luí, rayuq lé gi, ngùn ngo joí, rayuq lé gi, í joí, htâng rayuq lé gi, rajoí kut byi to mù, byìn we shut htoq ló byuq bê nghut ri. ¹⁶ Ngùn ngo joí wó yù sù gi, haú hkûn jáng htoq ló mù, hpugá gá luí, ngùn ngo joí wó myat yù bê

nghut ri. ¹⁷ Haú eq rajung za, ngùn í joí wó yù sù le, í joí wó myat yù bê nghut ri. ¹⁸ Nghut kôlhang, rajoí za wó yù sù gi, htoq e ló mù, myigùng má du luí, yhâng yhumsîng hpô é ngùn lé haq myhup tô ri.

¹⁹ Hau htâng tsómra myáng jáng, dui-nhâng zoshâng haú bâng é yhumsîng hpó gi, dum tau jé lô mù, yhangmoq é ngùn chyârâng lé, lo jep ri.

²⁰ Ngùn ngo joí wó yù sù gi, amyat ngo joí lé le yu lé lô mù, 'Yhumsîng ê, nàng, ngo lé, ngùn ngo joí ap tô é nghut lê. Wú aq, amyat ngo joí wó ho jat yù bê.' ga tai ri.

²¹ Haú hkûn, haú yhumsîng hpó gi, 'Arâ! Nghut bê. Nàng gi, kyet é eq lungíng é dui-nhâng zoshâng nghut ri! Tiq é mù má lhang wó lum é sù nghut é yanmai, ngò, nang lé, kô é mù lé le ap byi râ nghut lê. Náng yhumsîng hpô é gabú hkyô má bo wang lòm aq hkoil' ga tû tai ri.

²² Haú eq rajung za, í joí wó yù sù le, lé lô mù, 'Yhumsîng ê, nàng, ngo lé ngùn í joí ap tô é nghut lê. Wú aq, amyat í joí wó ho jat yù bê.' ga, lé tai ri.

²³ Haú hkûn, haú yhumsîng hpó gi, 'Arâ! Nghut bê. Nàng gi, kyet é eq lungíng é dui-nhâng zoshâng nghut ri! Tiq é mù má lhang wó lum é sù nghut é yanmai, ngò, nang lé, kô é mù lé le ap byi râ nghut lê. Náng yhumsîng hpô é gabú hkyô má bo wang lòm aq hkoil' ga tû tai ri.

²⁴ Hau htâng, rajoí wó yù sù le, lé lô mù, 'Yhumsîng ê,

nàng gi, byù wui nghut mù, yhumsîng a hô tô é jang mâ é shû yù nau é htoq agó, yhumsîng, kyôshi a sân hkyô tô é jang mâ é tsîng yù nau sù nghut é lé, ngò sê lê. ²⁵ Haû mù, ngò gi, gyuq luí, htoq ê mù, náng é ngùn lé, myigùng má ê haq myhup tô é nghut lê. Wú aq, shî gi, nàng é ngùn nghut lê.' ga taí ri.

²⁶ Haû mù, yhumsîng hpó gi, yhang lé, 'Agè ashop é eq lagôn é dui-nhâng zoshâng ê! Ngò gi, yhumsîng a hô tô é jang mâ é shû yù nau é eq, yhumsîng, kyôshi a sân hkyô tô é jang mâ é tsing yù nau sù nghut é lé, nàng sê to gù nghut le nhîng, ²⁷ ngá é ngùn lé, ngò dum taû jé lô jáng, aráng eq amyat wó yû shoq, ngùn hpún kat jang má, haí mù a kat tô é lú?

²⁸ Haû mù, haû ngùn ra-joí lé, náng chyáng mai yù luí, raxê joí wó to sù lé, byí pyám nhâng râ nghut lê. ²⁹ Hkâsu mù gâ le, wó sù ó yuq lé nghut kôle, yhang agùn agó wó râ matú, jat byi râ nghut lê. A wó su chyáng mai kúm gi, yhang wó tô é lé lhang yu pyám byi shirâ nghut lê. ³⁰ Haû mù, haû akyû a bo é dui-nhâng zoshâng lé gi, ngaubyi ngaù nhap eq zuí kyik kyik shoq hpuzô nyi râ jowò nghut é, shinggan mauchut hkaû má dú htoq pyám keq.' gâ ri.

Sau Eq Bainám

³¹ Haû Byu Yhangzo gi, Yhâng é hpungwup shinggang mai, maumang

lagyo lhunglhang bang eq rahá jé lé lo é hkûn, Yhâng é hpungwup shinggang bo é hkohkâm-tanghkuq htoq má zùng râ nghut lê. ³² Haû hkûn, byù myû chângiup gi, Yhâng é hí má zîng lé lo bùm kó râ nghut mù, Yhang gi, sau zúng sù mai, sau eq bainám lé gotû tû kut gam hkoq é su, byu pé lé gam hkoq pyám râ nghut lê. ³³ Yhang gi, sau pé lé, loqyo hkyam shut, bainám pé lé, loqpaí hkyam shut kut, nyhi to râ nghut lê.

³⁴ Hau htâng má, haû Hkohkâm gi, Yhâng é loqyo hkyam shut mâ é bang lé, 'Ngá Wâ chyáng má é shimân jeju hkam yu é hui bang ê, lé keq; mingkan lé hpan é hkûn mai, nungmoq é matú ga hen lajâng tô é muí mingdán má wang ló keq. ³⁵ Hkâsu mù gâ le, Ngò zòmut é u lé, nungmoq, Ngo lé byi tso kô é nghut lê; Ngò wuîshit é u lé, nungmoq, Ngo lé byi huq kô é nghut lê; Ngò bíng kut wún é u lé, nungmoq, Ngo lé lhom hkulum yù kô é nghut lê; ³⁶ Ngò gùngchín dut é u lé, nungmoq, Ngo lé byi hut kô é nghut lê; Ngò nõhpyo huí é u lé, nungmoq, Ngo lé wú gon kô é nghut lê; Ngò htóng lúng é u lé, nungmoq, Ngo lé lé kum kô é nghut lê.' ga taí râ nghut lê.

³⁷ Haû hkûn, haû dingmán bang gi, Yhang lé, 'Yhumsîng ê, Nàng zòmut huí é lé, ng-amoq, hkâ-nhám myàng luí, byi tsô wú é lú? Nàng wuîshit é lé, ngamoq, hkâ-

nhám myàng luí, byi huq wú é lúhú? ³⁸ Nàng bíng kut wún é lé, ngamoq, hkâ-nhám myàng luí, lhom hkulum wú é lúhú? Nàng gùngchîn dut é hkûn, ngamoq, hkâ-nhám byi hut wú é lúhú? ³⁹ Nàng nõhpyo huí é lé le, htóng lúng é lé le, ngamoq, hkâ-nhám myàng luí, lé gon lé kûm wú é lúhú?' ga myi kó râ nghut lhê.

⁴⁰ Haú hkûn, haú hkohkâm gi, 'Ngò, nungmoq lé teng za taí kôlé, shí, Ngá gumang wuî mâ é je tiq sù lé, nungmoq kut byí é hkyô haí le, Ngo lé kut byí é nghut bê.' ga tû taí râ nghut lhê.

⁴¹ Hau htâng má, Yhang gi, Yhâng é loqpaí hkyam shut mâ é bang lé, 'Dingnyé wó é bang ê, Ngá chyáng mai gâng ló mù, nat Tsadán eq yhâng é maumâng pê é matú hen tô é, ahtum abyuq é myi má wang ló keq. ⁴² Hkâsu mù gâ le, Ngò zòmut é u lé, nungmoq, Ngo lé a byi tso kó; Ngò wuîshit é u lé, nungmoq, Ngo lé a byi huq kó; ⁴³ Ngò bíng kut wún é u lé, nungmoq, Ngo lé a lhom hkulum yù kó; Ngò gùngchîn dut é u lé, nungmoq, Ngo lé, mebu a byi hut kó; Ngò nõhpyo huí é eq htóng lúng é u lé, nungmoq, Ngo lé a gon kó nghut ri.' ga taí râ nghut lhê.

⁴⁴ Haú hkûn, yhangmoq gi, 'Yhumsîng ê, nàng zòmut wuîshit é, bíng kut wún é, gùngchîn dut é, nõhpyo huí é eq htóng lúng é lé, ngamoq, hkâ-nhám myàng luí, a wú gon kut wú é lúhú?' ga taú myi kó râ nghut lhê.

⁴⁵ Haú hkûn, Yhang gi, 'Ngò, nungmoq lé teng za taí kôlé, shí bang mâ é je tiq sù lé, nungmoq, a kut byí é hkyô haí le, Ngo lé a kut byí é nghut bê.' ga, yhangmoq lé tû taí râ nghut lhê.

⁴⁶ Haú mù luí, haú bang gi, ahtum abyuq mara dam byí é má wang ló kó râ nghut lhê; haú dingmán bang kúm gi, ahtum abyuq é asak má wang ló kó râ nghut lhê." ga Yesuq taí ri.

26

Yesuq Lé, Sat Râ Da Kô É Hkyô

Mrk 14:1-2; Luk 22:1-2; Yhn 11:45-53

¹ Yesuq gi, haú hkyô pé lé ban taí é htâng má, Yhâng é chángzô pé lé, ² "Nungmoq sê tô é eq rajung za, í nyí lai é htâng má, Lhoqlhai Poí jé râ nghut mù, haú Byu Yhangzo gi, tapzîng má jén sat é huí râ matú, ap pyâm é huí râ nghut lhê." ga taí ri.

³ Haú u lé, hkyangjong agyi pé eq suwún wuî gi, Kayahpaq gâ é hkyangjong mó rayuq é yhumwàng má zup zîng to kômù, ⁴ Yesuq lé haq chyup yû râ eq sat pyám râ hkyô lé, hpyê lhûm bum akô nghut ri. ⁵ Nghut kôlhang, yhangmoq gi, "Byu pé gabyông lò kó abe, poí gyoro má gi, a kut shi sháng." ga, taí lhûm akô nghut ri.

Yesuq, Xû Hut Gyun Huí É Hkyô

Mrk 14:3-9; Yhn 12:1-8

⁶ Yesuq gi, Behtani wà má nyi é manggâm dap wú sù Simûn é yhûm má nyi tô é hkûn, ⁷ myiwe myhí rayuq gi, gyai hpaû é namngón xû bo é luq hpyû bông yu lé lô mù, Yesuq zo shuq nyi é hkûn, namngón xû haú lé, Yhâng é ulhum má hut gyun byî ri.

⁸ Haú hkyô lé, haú chángzô pé myàng kôjáng, wú nhik-yo kômù, "Haí mù luí, haú lé aha agó kut pyâm lê lúhú? ⁹ Xû haú lé, ahpaû myo myô êq ûng pyám mù, myùng bang lé byî le ge lê mhaí!" ga taí kat akô.

¹⁰ Yesuq gi, haú hkyô lé sé luí, "Haí mù, myiwe zo haú lé, i-myt lhoq myô nyi akô lúhú? Yhang gi, Ngá é ahtoq má ge é hkyô kut bê nghut ri. ¹¹ Haú myùng bang gi, nungmoq eq rahá hkâ-nhám le nyi râ nghut lê; nghut kôlhang, Ngò gi, nungmoq eq rahá ayang nyi nyi râ sù a nghut. ¹² Yhang, Ngá gûng má namngón xû hut gyûn é gi, Ngá gûng lé yhum râ matú, hen lajâng é hkyô nghut ri. ¹³ Ngò, nungmoq lé teng za taí kôlé, haú gabú danglù lé, mingkan gón hko kyô é jowò hkangmó má, yhang lé myit bûn é dông, yhang kut é hkyô shí lé, taí kyo bekô râ nghut lê." ga taí kyo ri.

Yesuq Lé, Yudaq Êq Ung Zô Pyâm É Hkyô

Mrk 14:10-11; Luk 22:3-6

¹⁴ Hau htâng, haú chángzo raxe í yuq má bo é Yudaq Iskarut ga sù gi, hkyangjong agyi pé chyáng é mù, ¹⁵ "Ngò, Yesuq lé nungmoq é loq má

ap byî é nghut jáng, nungmoq, ngo lé haí byi kô râ lúhú?" ga myî ri. Haú mù, yhangmoq gi, yhang lé ngùn denggá sum xê chap nghap byî akô. ¹⁶ Haú hkûn mai, Yudaq gi, Yesuq lé ap pyám râ hkyô ho nyi bê nghut ri.

Yhumsing É Myinzang

Mrk 14:12-26; Luk 22:7-23; Yhn 13:21-30

¹⁷ Múnchi a kat é Muk Zo Poí sâng-hi nyí má, haú chángzô pé gi, Yesuq chyáng lé lô kômù, "Nàng zo râ Lhoqlhai Poí zoshuq lé, ngamoq hkâmá món to râ lúhú?" ga myî akô.

¹⁸ Haú mù, Yhang gi, "Myuq hkaû shut wang lô mù, byù rayuq chyáng é luí, haú yuq lé, 'Ngá é ahkyíng chyáng bê; Ngá é chángzô pé eq rahá, Ngò, náng é yhûm má Lhoqlhai Poí kut râ nghut lê.' gâ Sará taí ri nghû, ê taí keq." ga pying kat ri. ¹⁹ Haú mù, haú chángzô pé gi, Yesuq pying kat é eq rajung za ê taí kômù, Lhoqlhai Poí lé món to bekô nghut ri.

²⁰ Myinhâng jé lô jáng, Yesuq gi, haú chángzo raxe í yuq eq rahá, zohpoq má zung tô ri. ²¹ Yhangmoq zô nyi bùm kô é u lé, Yesuq gi, "Ngò, nungmoq lé teng za taí kôlé, nungmoq má é rayuq sù gi, Ngo lé ap pyám râ nghut lê." ga taí ri.

²² Haú hkûn, yhangmoq gi, gyai gyô yón kômù, rayuq htâng rayuq, "Yhumsing é, ngò a nghut hkaí?" ga, Yhang lé chôm myî akô.

²³ Haú hkûn, Yesuq gi, "Ngò eq rahá, hkoq shí má loq lap bê sù gi, Ngo lé ap pyám rà sù nghut lhê. ²⁴ Haú Byu Yhangzo gi, Yhang eq séng luí kâ tô é eq rajung za, shí rà za nghut lhê. Nghut kôlhang, haú Byu Yhangzo lé ap pyám é sù gi, dingnyé wó ri; haú yuq gi, a hku lé le lhang, je ge ri." ga dum taí kat ri.

²⁵ Hau htâng, Yhang lé ap pyám rà sù, Yudaq gi, "Rabai ê, ngò a nghut hkaí?" ga myi jáng, Yesuq gi, "Nàng nghut ri." ga tú taí kat ri.

²⁶ Yhangmoq zô nyi kô é u lé, Yesuq gi, muk lé yù mù, jeju hkya-on luí, muk lé my-hik hpé mù, "Shí gi, Ngá é gungsho nghut lhê; yù mù zo keq." ga taí uchyang, Yhâng é chángzô pé lé gàm byí ri.

²⁷ Hau htâng, Yhang gi, góm lé le, yù mù, jeju hkya-on luí, yhangmoq lé byi mù, taí é gi, "Nungmoq banshoq bang, shuq keq. ²⁸ Shí gi, yubak mara hkyut pyám byi rà, byù myo myô é matú htoq pyám é, dangshikaq eq séng é Ngá sui nghut lhê. ²⁹ Ngò, nungmoq lé taí kôlé, ahkuí mai gi, Ngò, Ngá Wá é mingdán má, nungmoq eq rahá tsibiyiq wing asik lé shuq é buinyi a jé jé, tsibiyiq wing lé dum shuq rà a nghut lo." ga taí ri.

³⁰ Yhangmoq gi, hkya-on mahkôn ralhüm ban hkôn jáng, Tsanlun Büm shut htoq e ló bekò nghut ri.

Petruq He-ngik Râ Lé, Te Tai É Hkyô

Mrk 14:27-31; Luk 22:31-34; Yhn 13:36-38

³¹ Hau htâng má, Yesuq gi, yhangmoq lé, "Nungmoq lunglhang bang gi, hkú-myín yhang jáng, Ngá é yanmai, myit lingbat kó rà nghut lhê; hkâsu mù gâ le,

'Haú sau zúng sù lé, Ngò bat sat pyám mù, sau hpúng má é sau pé gi, lhoq pyo pyám é hui kó rà nghut lhê."*

ga kâ tô ri. ³² Nghut kôlhang, Ngò gi, lhoq dui toq é huí htâng má, Galile mau shut, nungmoq é hí má e ló lángrà nghut lhê." gâ ri.

³³ Haú hkûn, Petruq gi, "Nàng é yanmai, góbang banshoq myit lingbat kôlhang, ngò gi, hkâ-nhám le myit lingbat rà a nghut." ga tú taí ri.

³⁴ Yesuq gi, "Ngò, nang lé teng za taí lé, hkú-myín yhang jáng, woq a tún shimá, nang, Ngo lé sum dâm he-ngik pyám rà nghut lhê." ga tú taí ri.

³⁵ Nghut kôlhang, Petruq gi, "Ngò, Nàng eq rahá shí rà dut kôlhang, Nang lé ngò he-ngik pyám rà a nghut." ga saí taí ri. Haú chángzô pé góbang banshoq le, haú su ga châng taí bum akò nghut ri.

Get-samane Gâ É Jowò Má Kyúdûng É Hkyô

Mrk 14:32-42; Luk 22:39-46

³⁶ Hau htâng má, Yesuq gi, Yhâng é chángzô pé eq rahá

* 26:31 Zhk 13:7

Get-samane gâ é jowò má ê kômù, yhangmoq lé, "Ngò, hé má ê mù, kyûdûng nyi é u lé, nungmoq shí má zùng lánq keq." ga taí ri. ³⁷ Yesuq gi, Petruq eq Zebedi yhangzô nhik lé shuí chûng ri. Yhang gi, myit gyai a ngón é eq myit wui nhik hkyik dut lò bê nghut ri. ³⁸ Hau htâng, Yhang gi, yhangmoq lé, "Ngò gi, shí râ í yhang myit yón nyi ri; nungmoq gi, Ngò su machyâ luí, shí má lánq nyí keq." ga taí ri.

³⁹ Yesuq gi, haú mai ratsuí zo sô é mù, myigùng má ngóm gop to luí, "Áwa ê, wó dut é nghut le gi, góm* shí lé, Ngá chyáng mai lhai pyám byi laq. Nghut kôlhang, Ngò ô nau é dông a nghut, Nang ô nau é dông sheq nghut sháng gaq." ga kyûdûng ri.

⁴⁰ Hau htâng, Yhang gi, Yhâng é chángzô pê chyáng dum taú lo le, yhangmoq yhup myhî to kô é lé lo myàng ri. Haú mù, Yhang gi, Petruq lé, "Nungmoq gi, hkyíng hkum rahkum za lhang, Ngò eq rahá a wó machya nyi kó lú? ⁴¹ Gunglaú é a hui sháng gaq, machyâ luí, kyûdûng nyi keq. Haú woi-nyí gi, kâm nyi kôlhang, gungsho gi, wum nyhôm nyi ri." ga taí ri.

⁴² Yhang gi, radàm dum é mù, "Áwa ê, góm shí lé, Ngò a shuq é a wó lai râ nghut jáng gi, Nang ô nau é dông nghut sháng gaq hkoi." ga kyû dum dûng ri.

⁴³ Yhang dum taú lo le, yhangmoq gi, myoqkuq lai kô é yanmai, yhup myhî to lánq kô é lé, lo dum myàng ri. ⁴⁴ Haú mù, Yhang gi, yhangmoq lé tô pyám to mù, sum dâm nghû râ dâm dum é luí, hí lé dûng é dang lé roq é dum dûng ri.

⁴⁵ Haú mù, Yhang gi, haú chángzô pê chyáng dum taú jé lô mù, yhangmoq lé, "Nungmoq gi, ahkuí jé shoq yhup ngón nyi ashí kó lú? Wú keq! Haú ahkyíng gi, jé bê nghut luí, haú Byu Yhangzo gi, yubak dap bâng é loq má ap pyám é hui râ nghut bê. ⁴⁶ Toq keq! Ló losháng hkoi! Ngo lé ap pyám râ sù gi, jé lé bê nghut ri." ga taí ri.

Yesuq, Chyup Yú Hui É Hkyô

Mrk 14:43-50; Luk 22:47-53; Yhn 18:3-12

⁴⁷ Yesuq, dáng nyo nyi ashí u lé, haú chángzo raxe í yuq má bo é Yudaq gi, jé lé lo ri; haú hkyangjong agyi pé eq mingbyu é suwún wui chyáng mai nhang kat é bang nghut é, shâm eq dumbáng pé chung tô é byù moq mó le, yhang eq rahá nghut akô. ⁴⁸ Yesuq lé ap pyám râ sù gi, haú bang lé, "Ngò, bopuq puq é sù gi, haú yuq nghut bê; Yhang lé chyup yú keq." ga kumlhá byí tô ri. ⁴⁹ Yudaq gi, Yesuq chyáng hkyê za é mù, "Rabai ê, wángzán nyi lhê lú?" ga taí luí, Yhang lé bopuq puq byí ri.

* 26:39 Góm gâ é gi, Yesuq, jamjau hui râ hkyô eq shí râ hkyô lé, taí nau é nghut lhê.

⁵⁰ Haú hkûn, Yesuq gi, "Buinùm hpó ê, nàng kut rá muzó lé kut aq hkoi." ga tû taí kat ri.

Hau htâng, yhangmoq gi, hí shut huí ê luí, Yesuq lé chôm zuí zìng mù, chyup yû bekô nghut ri. ⁵¹ Haú mù, Yesuq eq rahá nyi bang mâ é rayuq gi, shâm she htoq yû mù, hkyangjong mó é dui-nhâng zôshang é nohkyap lé pyoq hkyô kat byi bê nghut ri.

⁵² Haú jáng, Yesuq gi, haú yuq lé, "Náng é shâm lé, xâng pyám aq; hkâsu mù gâ le, shâm shê sù gi, ó yuq nghut kôle, sham èq shí rá nghut lhê. ⁵³ Ngò gi, Ngá Wa lé dung jáng, Yhang gi, radá dâm, mau-mang lagyo dap pé raxe í dap htoq myo shoq nhang kat byi rá nghut é lé, nungmoq a sé kó lú? ⁵⁴ Nghut kôlhang, haú su nghut é nghut jáng, shí hkyô dut lò rá nghut lhê ga Chyúmdang pé má bò tô é hkyô gi, hkâsu wó dik lò rá lú?" ga taí kat ri.

⁵⁵ Hau htâng, Yhang gi, byù moq lé, "Nungmoq gi, damyaq rayuq lé chyup é su, Ngo lé chyup rá matú, shâm eq dumbáng pé chùng mù, lé lo akô lú? Ngò gi, nyí wuî, noqkuq yhùm má zùng mù, mhoqshit nyí kôlhang, nungmoq, Ngo lé a chyup yû kô é nghut lhê. ⁵⁶ Nghut kôlhang, shí su dut é hkyô pé banshoq gi, haú myiqhtoí pé kê tô é hkyô pé lo dik rá matú dut é nghut ri." ga taí ri. Haú hkûn, haú chángzô pé banshoq gi, Yesuq lé tô pyâm

to kôluí, hpang byo byuq bekô nghut ri.

Yudaq Byìn Tú Wapdoq Má Jep Huí É Hkyô

Mrk 14:53-65; Luk 22:54-55, 63-71; Yhn 18:13-14, 19-24

⁵⁷ Yesuq lé chyup yu é bang gi, haú tarâ sará pé eq suwún wuî zup zìng nyi é jang, hkyangjong mó Kayahpaq é yhùm má, Yhang lé shuí e akô. ⁵⁸ Petruq gi, hkyangjong mó é yhumwàng hkaú má châng jé wàng shoq, we we mai Yesuq htâng châng tô ri. Yhang gi, hkâsu dut lò rá lé myàng naú luí, wàng hkaú má wang ê mù, zúng bang eq rahá zung tô ri.

⁵⁹ Haú hkyangjong agyi pé eq Yudaq byìn tú wapdoq má é góbang gi, Yesuq lé sat pyám nhâng rá matú, a têng é saksé ho nyi akô. ⁶⁰ A têng é saksé myo myo htoq lô kôlhang, wó sat rá í é saksé a myàng kó nghut ri.

Ló htáng má, byù í yuq gi, lé lô kô mù, ⁶¹ "Shí yuq gi, 'Ngò gi, haú Garai Gasâng é noqkuq yhùm lé lhoq hten pyám mù, sum nyí gyoro má dum wó saí lhê,' ga taí sù nghut ri." ga taí akô.

⁶² Haú hkûn, haú hkyangjong mó gi, toq yap mù, "Nàng, haí le a tû taí luq? Shí bang, Nang lé mara hun nyi é saksé gi, hká đông nghut lhê lú?" ga, Yesuq lé myí ri. ⁶³ Nghut kôlhang, Yesuq gi, jit le a ga nyi tô ri.

Haú mù, hkyangjong mó gi, Yhang lé, "Haú rû dui nyi é Garai Gasâng é myìng lé

lang luí, ngò, Nang lé myí wú lé: Nàng gi, Garai Gasâng é Yhangzo, Hkrisduq nghut lhê luq, ngamoq lé taí kyô wú aq." ga taí jáng, ⁶⁴ Yesuq gi, "Nàng taí é eq rajung za nghut lhê. Ngò, nungmoq banshoq lé taí kôlé, nungmoq gi, ahkuí mai htâng hpyang má, haú Byu Yhangzo gi, atsam bo dik Su é loqyo hkyam má zung tô é lé le, mhuthtui ji mù, mauhkûng mai lé lo é lé le, nungmoq myàng kó râ nghut lhê." ga taí ri.

⁶⁵ Haú hkûn, hkyangjong mó gi, yhâng é bu lé lêng cheq pyám mù, "Yhang gi, Garai Gasang lé rhoi dang taí bê nghut ri! Nga-nhúng, hai saksé râ ashî lú? Yhang, Garai Gasang lé rhoi dang taí é lé, nungmoq, ahkuí wó gyo bekô nghut lhê. ⁶⁶ Nungmoq hkâsu wó myit akô lú?" ga myi jáng, yhangmoq gi, "Yhang gi, shî gíng sù nghut lhê." ga tû taí akô nghut ri.

⁶⁷ Hau htâng má, yhangmoq gi, Yesuq é myoqdong má sôkan byé gyun luí, loqt-sup èq htui byí akô nghut ri. Góbang gi, Yhang lé bo-pyuq pyuq byi luí, ⁶⁸ "Hkrisduq Nàng, Nàng lé bat sù ó yuq nghut é lé, myiqhtoi htoí wú aq." ga taí akô.

Yesuq Lé, Petruq He-ngik Pyám É Hkyô

Mrk 14:66-72; Luk 22:56-62; Yhn 18:15-18, 25-27

⁶⁹ Petruq gi, wâng hkaú má nyi tô é u lé, dui-nhâng zoshâng myhí rayuq gi, yhâng chyáng lé jé mù, "Nàng le, haú

Galile byù Yesuq eq rahá nyi sù nghut ri." ga taí ri.

⁷⁰ Nghut kôhang, Petruq gi, haú bang banshoq é hí má yhang, "Nàng haí taí nyi é lé, ngò a sé." ga he kat ri.

⁷¹ Hau htâng, yhang gi, wâng hkúmdong shut htoq e ló le, haú jowò má, dui-nhâng zoshâng myhí góyuq le, yhang lé myàng mù, "Shí yuq gi, Nazaret wà byù Yesuq eq rahá nyi sù nghut ri." ga, haú mâ é bang lé taí kat ri.

⁷² Haú hkûn, yhang gi, "Byù haú yuq lé, ngò a sé!" ga dakam é đông he pyâm ri.

⁷³ Hau htâng razup zo má, haú jowò má yap to bang gi, Petruq chyáng huí ê kômù, "Nàng le, haú bang má bò sù yhang nghut ri; náng é danghtê lé sê gyô ri." ga taí akô.

⁷⁴ Haú hkûn, yhang gi, yhânggùng yhang nhing luí, "Haú yuq lé, ngò a sé." ga dakâm dang taí ri.

Haú-u yhang, woq tân bê nghut ri. ⁷⁵ Haú mù, Petruq gi, "Woq a tân shi má, nàng, Ngo lé sum dâm he pyám râ nghut lhê." ga, Yesuq, yhang lé taí é dang lé, myit bûn kat mù, shinggan shut htoq ê luí, gyai yhang é ngau ri.

27

Yudaq Juíshi É Hkyô

Mrk 15:1; Luk 23:1-2; Yhn 18:28-32

¹Napsûn noq le, hkyangjong agyi pé banshoq bang eq mingbyu é suwún wuí gi, Yesuq lé sat pyám nhâng râ matú chôm myit hpyit yú

bekô nghut ri. ² Haû mù, yhangmoq gi, Yhang lé tuí yù luí, shuì htoq ê kômù, mauzau Pilat chyáng ê ap byî akô nghut ri.

³ Yesuq lé ap pyâm é sù Yudaq gi, Yesuq lé jéyáng doqdân é hkyô lé myang sé jáng, nungngham wó mù, haû ngùn sum xê chap lé, hkyangjong agyi pé eq suwún wui chyáng ló dum taú byî ri. ⁴ Haû mù, yhang gi, "Mara a bò Su é sui lé, ngò ap pyâm bê nghut é yanmai, ngò mara wó bê." ga taí jáng, yhangmoq gi, "Haú hkyô, ngamoq eq haí sêng lhê lú? Haû gi, nàng eq sheq ru sêng lhê." ga lhom taí kat akô nghut ri.

⁵ Haû mù, Yudaq gi, ngùn haú lé, noqkuq yhúm hkaú má dú pyâm to luí, htoq ló mù, yhang gûng yhang ê juishi byuq bê nghut ri.

⁶ Haû hkyangjong agyi pé gi, ngùn chap haú pé kui yù luí, "Shî gi, sui hpau ngùn nghut lhê yanmai, alu sidek má a ge kat." ga taí akô. ⁷ Haû mù, yhangmoq gi, tungbaù pé é lupdùng kut râ matú, au saí zo su é maumyí lé, ngùn hau èq wui hpyit yù râ dông, chôm myit hpyit to bekô nghut ri. ⁸ Hau é yanmai, ahkuí jé shoq, haú jowò lé, sui myigùng ga myhíng tô akô nghut ri. ⁹ Haû gi, "Haû Israe-laq byu pé mai, Yhang lé gù hpyit tô é ngùn sum xê chap lé, yhangmoq yù mù, haû Yhumsíng Garai, ngo lé pying tô é eq rajung za, ¹⁰ haú au saí zo su é maumyí lé, yhangmoq

wui yù bekô nghut ri." ga myiqhtoi Yeremiaq taí tô é dang lo dik é nghut ri.

Yesuq Lé, Pilat Myî Jep Wú É Hkyô

Mrk 15:2-15; Luk 23:3-5, 13-26; Yhn 18:33—19:16

¹¹ Haú u lé, Yesuq gi, mauzau hpò é hí má yap tô é nghut mù, haû mauzau hpó gi, Yhang lé, "Nàng gi, Yudaq byu pé é hkohkâm nghut lhê lú?" ga myi jáng, Yesuq gi, "Nàng taí é eq rajung za nghut lhê." ga tû taí ri.

¹² Haû hkyangjong agyi pé eq suwún wui gi, Yhang lé, mara hùn kôjáng, Yhang gi, haí le a tû taí nghut ri. ¹³ Haú hkùn, Pilat gi, Yhang lé, "Yhangmoq, Nang lé mara hùn saksé haú-í hkâm nyi kô é lé, Nàng a wó gyo lú?" ga saí myí ri. ¹⁴ Nghut kôlhang, Yesuq gi, dang rahkun lháng a tû taí é yanmai, haû mauzau hpó gi, gyai maú byuq bê nghut ri.

¹⁵ Haû Lhoqlhai Poí u lé, mingbyû wui ô nau é má cháng luí, haû mauzau hpó gi, htóng byû rayuq yuq lé nhâng byí é htung joq ri. ¹⁶ Haú u lé, a gè mying htoq é htóng byû, Barabaq ga sù rayuq nyi ri. ¹⁷ Haû mù, byù moq mó zup zing lò kô é hkùn, Pilat gi, yhangmoq lé, "Nungmoq é matú, hká yuq lé lhut byi nhâng nau akô lú? Barabaq luq? Haú a nghut jáng, Hkris-duq gâ é Yesuq lé luq?" ga myí ri. ¹⁸ Yhang haú su ga myí é gi, yhangmoq, Yesuq lé manôn kôluí, yhang chyáng

lé ap byi kô é hkyô lé sê é yanmai nghut ri.

19 Pilat gi, tarâ jéyang tingnyâng htoq má zung tô ashî hkûn, yhangmyi gi, "Haû mara a bò Sû lé, haî le hkâkut; hkâsu mù gâ le, hkû-nyí za lháng, yhupmoq má, haû yuq é yanmai, ngò tsómra hpuzô pyám bê nghut lhê." ga, yhâng chyáng dang pying kat ri.

20 Nghut kôlhang, haû hkyangjong agyi pé eq suwún wuî gi, Barabaq lé dúng htoq yû râ eq Yesuq lé sat pyám nhâng râ matú, shiwa byu pé lé wum byi bekô nghut ri.

21 Haû mauzau hpó gi, "Shî í yuq mâ é hká yuq lé, nhâng byi nhâng nau akô lhú?" ga myi jáng, yhangmoq gi, "Barabaq!" ga tû taî akô nghut ri.

22 Haû mù, Pilat gi, "Haû jáng gi, Hkrisduq gâ é Yesuq lé, ngò hkâsu kut râ lhú?" ga dum myi kat jáng, yhangmoq banshoq bang gi, "Yhang lé tapzîng má jén sat pyám aq!" ga dum tû taî akô nghut ri.

23 Nghut kôlhang, yhang gi, "Haî mù luí lhú? Yhang gi, hai mara kut shut bê lhú?" ga dum myi jáng, yhangmoq gi, htê mó eq, "Yhang lé tapzîng má jén sat pyám aq!" ga je riyhang garû lo bum akô nghut ri.

24 Pilat gi, hká dông le a dat kut lô é eq byu pé gabyông lò kó râ nghut é hkyô lé myàng luí, uchyam yû mù, shiwa byu pé hí má loq chí luí, taî é gi, "Shí yuq é sui gi, ngò eq

haî a séng; nungmoq eq za ru sêng lhê." gâ ri.

25 Haû shiwa byû lunglhang bang gi, "Yhâng é sui gi, ngamoq eq ngamoq é yhangzo yhangshû pè htoq má joq nyi sháng gaq." ga, dum tû taî kat akô nghut ri.

26 Haû hkûn, Pilat gi, Barabaq lé nhâng byi bê nghut ri. Yesuq lé kúm gi, nhuq bat nhâng mù, tapzîng má jén sat pyám râ matú ap byi kat bê nghut ri.

Yesuq Lé, Gyezô Pé Rhoi É Hkyô

Mrk 15:16-21; Yhn 19:2-3

27 Hau htâng, mauzau hpô é gyezô pé gi, Yesuq lé, mauzau hpô é yhumwàng mó hkaû má shûi wang lô kômù, Yhâng é lhîngkyuq má, gyedap gón lé ji tsîng tô akô.

28 Yhangmoq gi, Yesuq é mebu hkyut pyám byi kôluí, zam zam ne é buhîng hut byi kômù, 29 zujanmaú rallhum saî yû kôluí, Yhâng é ulhum má tsung byi akô nghut ri. Yhangmoq gi, jàm-yang rahkat lé, Yhâng é loqyo loq má kat byi kômù, Yhâng é hí má hkyihput htuoq kôluí, "Yudaq byu pè é hkohkâm hpô ê! Chyung hîng xê hing nyi sháng gaq ô!" ga, jihpoi dang taî akô.

30 Yhangmoq gi, Yhang lé sôkan byé gyun luí, Yhâng é loq mai jàm-yang lú yû mù, Yhâng é ulhum má dum bat bat kut akô nghut ri. 31 Yhangmoq gi, Yhang lé rhoi jihkyoi ban kut yû kôjáng, Yhang wut tô é buhîng lé hkyut yû kômù, Yhâng é mebu

lé dum hut byi luí, tapzîng má jén sat pyám râ matú, Yhang lé shuí htoq e ló bekô nghut ri.

Yesuq Lé Jén Pyám É Hkyô

Mrk 15:22-32; Luk 23:27-43; Yhn 19:17-27

³² Yhangmoq htoq e ló nyi le, Kuruni myuq byû nghut é Simun ga sù lé myàng kômù, yhang lé, zik luí tapzîng waq nhang akô nghut ri.

³³ Yhangmoq gi, Golgahta gâ é jowò má jé e ló bekô nghut ri. Golgahta gâ é lichyúm gi, ugyap joq é jowò lé gâ é nghut lhê. ³⁴ Haú má jé jáng, yhangmoq gi, Yesuq lé, hkô jung eq nyhô tô é tsibiyiq wing lé byi huq akô; nghut kôlhang, Yhang gi, haú lé chyam wú mù, a shuq byi kut pyâm ri.

³⁵ Yhangmoq gi, Yesuq lé tapzîng má jén tap tô é htâng, Yhâng é mebu lé lháng, hkyîn shosé shé é dông gam yu pyâm byí akô. ³⁶ Hau htâng, yhangmoq gi, haú jowò má zung to mù, Yhang lé zúng nyi akô nghut ri. ³⁷ Yhâng é u htoq má, "SHÍ YUQ GI, YUDAQ BYU PÊ É HKOHKÂM, YESUQ NGHUT LHÊ." ga, Yhang lé mara hun é laiká kâ tap tô akô. ³⁸ Haú hkûn, Yhang eq rahá, damyaq í yuq lé le, Yhâng é loqpaí hkyam shut rayuq, loqyo hkyam shut rayuq kut, tapzîng htoq má jén tap tô akô nghut ri.

³⁹ Hkyô sô lai ló é bang gi, nyhap é dông u-ngut ngut mù, tái kô é gi, ⁴⁰ "Noqkuq yhûm

lé hpyoq pyám luí, sum nyí gyoro má dum wó sai lhê ga Sù ê! Nàng, Garai Gasâng é Yhangzo nghut le gi, Nàng gûng nàng hkyi yù luí, tapzîng mai gyó lo wú aq mhai!" ga akô nghut ri.

⁴¹ Haú eq rajung za, hkyangjong agyi pé, tarâ sará pé eq suwún wú le, Yhang lé rhoí jihkyoí kut mù, tái kô é gi, ⁴² "Shí yuq gi, góbang lé hkyi yù sù nghut kôlhang, Yhânggûng yhang gi, a wó hkyi yù nghut ri myhi-nhung! Yhang gi, Israelaq byu pé é hkohkâm nghut lhê lhà! Ngamoq wó lumjîng râ matú, Yhang, tapzîng mai gyó lo wú sháng gaq. ⁴³ Yhang gi, Garai Gasang lé lumhkaú sù nghut lhê mù, Garai ô nau é sù nghut le gi, ahkuí Yhang lé hkyi yù sháng gaq; hkâsu mù gâ le, Yhang gi, 'Ngò, Garai Gasâng é Yhangzo nghut lhê.' ga tái ri." ga bum akô nghut ri. ⁴⁴ Haú eq rajung za, Yhang eq rahá tapzîng má jén to huí é damyaq í yuq le, Yhang lé rhoí dang tái akô nghut ri.

Yesuq Soqkâng Byit É Hkyô

Mrk 15:33-41; Luk 23:44-49; Yhn 19:28-30

⁴⁵ Nyí-káng raxe í hkyíng mai myinhtâng sum hkyíng jé shoq, ramau gón mauchut tuq dut byuq bê nghut ri.

⁴⁶ Myinhtâng sum hkyíng kô má, Yesuq gi, "Eloi, Eloi, lama sabakhtani?" ga, htê mó èq garû kat ri. Hau é lichyúm gi, "Ngá Garai ê, Ngá Garai ê,

Nàng, hái mù, Ngo lé tô pyâm tô lê lú?" gâ é nghut ri.✠

⁴⁷ Háu nâm má yap tô é bang ra-am gi, háu lé wó gyo kôjáng, "Yhang gi, myiqhtoi Eliyaq lé wut nyi ri." ga taí akô.

⁴⁸ Háu hkûn jáng, yhang-moq mâ é rayuq gi, đin e ló mù, wuimaù lé ê yu ri. Yhang gi, háu lé tsibiyiq wing chyín má jum yù luí, jàm-yang má tuí tap mù, Yesuq shuq râ matú yhun byi ri. ⁴⁹ Góbang gi, "Yhang lé, Eliyaq, lé hkyi yu lê laq, nga-nhúng chôm lánq wú sháng." ga taí akô nghut ri.

⁵⁰ Háu hkûn, Yesuq gi, htê mó èq dum garú kat luí, Yhâng é soqkâng byit bê nghut ri.

⁵¹ Háu u lé, háu noqkuq yhûm mâ é pán-gyang gi, ahtoq mai a-ô í hkyam byáng goq byuq bê nghut ri. Myigùng le nún lô mù, luqgok pé le goq byuq bê nghut ri.

⁵² Lup pé gi, bóng lô mù, shi byuq bê é chyoiyúng bang myo myo gi, lhoq dui é hui akô. ⁵³ Háu bang gi, Yesuq dum dui toq é htâng, lup mai htoq lô kômù, chyoiyúng myuq* má wang ê luí, byù myo myô hí má htoq shit akô nghut ri.

⁵⁴ Shô up gyezau hpó eq, yhang eq rahá Yesuq lé zúng nyi é bang gi, layàng nún é eq dut lo é hkyô banshoq lé myàng kôjáng, gyuq dàn kômù, "Yhang gi, gè gè yhang, Garai Gasâng é Yhangzo

nghut ri-nhung!" ga taí akô nghut ri.

⁵⁵ Myiwe wuì myo myo le, we we mai wú nyi bum akô. Háu bang gi, Yesuq râ é má garúm râ matú, Galile mau mai Yhang htâng châng lé é bang nghut akô. ⁵⁶ Háu bang má, Magadalaq wà mâ é Mariq, Yakuq eq Yose nhiktâng é yhângnu Mariq eq Zebedi é yhangzô nhiktang é yhângnú pé le bo akô nghut ri.

Yesuq Lé, Myhup Pyâm É Hkyô

Mrk 15:42-47; Luk 23:50-56; Yhn 19:38-42

⁵⁷ Myinhâng jé lô jáng, Yesuq é chángzo dut bê nghut é, sùt wó sù, Aramahti myuq byù Yosep ga sù lé lo ri.

⁵⁸ Yhang gi, Pilat chyáng ê mù, Yesuq é gungsôm lé ê dung jáng, Pilat gi, yhang lé byi râ matú hkunmó hkyô kat bê nghut ri. ⁵⁹ Yosep gi, gungsôm lé yù mù, pán yúng èq htup yup luí, ⁶⁰ luqgok lé kyúng tô é, yhâng é lup sik hkaù má ê kat tô ri. Hau htâng, yhang gi, luphkum má, luqlông èq lhêng chí pyâm to luí, ló byuq bê nghut ri. ⁶¹ Magadalaq wà mâ é Mariq eq goyuq Mariq gi, lup hí má zung tô akô nghut ri.

Lup Zúng É Hkyô

⁶² Háu Hên Lajang Buinyi lai é htâng nyi lé, hkyangjong agyi pé eq Hparishe pé gi, Pilat chyáng ê mù, ⁶³ "Yhumsing ê, Yhang, asak dui nyi ashí

* 27:53 Chyoiyúng myuq gâ é gi, Yerusalem wà mó lé gâ é nghut lhê.

hkûn, 'Sum nyí nghû râ buinyì má, Ngò dum dui toq lô râ.' ga, haû byù mhaú taí é dang lé, ngamoq bûn nyi lê. ⁶⁴ Haû mù, haû sum nyí nghû râ buinyì jé shoq, lup lé rago za zúng nhang to aq. Haû a nghut jáng, Yhâng é chángzô pé, mâng lé lé hkaû yu ló mù, Yhang shi é mai dum dui toq lô bê ga, byu pé lé taí kó râ nghut lê. Shí, ló htâng dàm mhaû é hkyô gi, sâng-hi dàm htoq je wui râ nghut lê." ga, lé taí akô nghut ri.

⁶⁵ Haú hkûn, Pilat gi, "Nungmoq sê é đông, lup lé haí a dut loshoq, gyezô pé lé zúng nhang to keq." ga tû taí kat ri. ⁶⁶ Haû mù, yhangmoq gi, ê luí, lup lé gau shoq ga, luqgok má dizik htung mù, lup zúng byû nyhi to bekô nghut ri.

28

Dum Dui Toq Lo É Hkyô

Mrk 16:1-8; Luk 24:1-12; Yhn 20:1-10

¹ Bánno buinyì lai jáng, rabat é sâng-hi nyí maubó zó má, Magadalaq wà mâ é Mariq eq goyuq Mariq gi, lup má é wú râ ga, e ló akô.

² Haú hkûn, layàng mó nún lo ri; hkâsu mù gâ le, Yhumsîng Garaí é maumang lagyo rayuq gi, mauhkûng mai gyó lé lô mù, lup má é luí, haû luqlong lé tu lheng mù, hau ahtoq má zung tô ri. ³ Yhâng é isâm gi, lhap su duqbó mù, Yhâng é mebu gi, gyo su hpyu zan tô ri. ⁴ Zúng nyi é bang gi, yhang lé lûm

wú gyuq kômù, pyik pyik nán luí, shí gùng su dut bùm bekô nghut ri.

⁵ Haû maumang lagyo gi, myiwe haú nhik lé, "Hkâgyuq kó! Haû tapzîng má jén sat huí é Yesuq lé, nungnhik ho nyi kô é lé, ngò sê lê. ⁶ Yhang gi, shí má a nyi lo; Yhang taí tô é eq rajung za, lhoq dui toq é hui bê nghut ri. Yhang lé lhez é jowò lé, lé wú keq. ⁷ Haû mù, hân taû ló luí, Yhâng é chángzô pé lé, 'Yhang, shí é mai lhoq dui toq é hui bê nghut ri; nungmoq é hí má, Galile mau shut ló lánng berâ. Nungmoq, Yhang lé, haú má ló myâng kó râ nghut lê.' nghû ló taí kyo keq. Nungnhik lé, ngò taí é lé matsîng chûng keq." ga taí kat ri.

⁸ Haû mù luí, myiwe myhí haú nhik gi, gyuq kôlhang, gyai gabú é myit eq lup mai hân taû ló mù, Yhâng é chángzô pé lé ló taí kyo râ matú, din ló bê nghut ri. ⁹ Haú hkûn, Yesuq gi, radá dâm yhangnhik lé lhom tê mù, "Wángzán nyí kó sháng gaq." ga taí ri. Haû mù, yhangnhik gi, huí ê luí, Yhâng é hkyí má po zing to mù, Yhang lé noqkuq akô. ¹⁰ Haú hkûn, Yesuq gi, yhangnhik lé, "Hkâgyuq kó. Ngá é gumang wui lé, Galile mau shut e ló keq nghû ló taí kyo keq; haú má, yhangmoq, Ngo lé myàng kó râ nghut lê." ga taí kat ri.

Zúng Nyi É Gyezô Pé Taí É Danglù

¹¹ Myiwe haú nhik hkyô má ru nghut nyi ashí le, lup zúng

é gyezô pé ra-am gi, myuq hkaû má wang ló mù, dut lai lo é hkyô banshoq lé, haû hkyangjong agyi pé lé ló taí kyo akô nghut ri. ¹² Haû hkyangjong agyi pé gi, suwún wuí eq huí lhum luí, hpyê lhùm é htâng má, haû gyezô pé lé, ngùn myo myo tsup byi mù, ¹³ "Myín lé, ngamoq yhup myhî tô é hkùn, Yhâng é chángzô pé lé lô mù, mâng lé, lé hkaû yu ló bekô nghut ri." nghû taí keq. ¹⁴ Shí hkyô lé, haû mauzau hpó wó gyô é nghut jáng, yhang myít ngón shoq, ngamoq taí râ nghut lhê; haû hkùn, nungmoq gi, hai manghkáng a htoq râ nghut lhê." ga taí kat ri. ¹⁵ Haû mù, gyezô pé gi, ngùn haú pé lé yù luí, yhangmoq lé taí kat é eq rajung za kut bekô nghut ri. Haú su mù, haú hkyô gi, Yudaq byu pé má taí pyo myhîn ló bê nghut mù, ahkuí jé shoq taí nyi bum akô nghut ri.

Chángzô Pé Kut Râ Sasana

Muzó

Mrk 16:14-18; Luk 24:36-49; Yhn 20:19-23; Lagyo 1:6-8

¹⁶ Hau htâng má, haû chángzo raxe rayuq gi, yhangmoq lé, Yesuq é nhang tô é Galile mau mâ é bùm shut e ló bekô nghut ri. ¹⁷ Yhangmoq gi, Yesuq lé myàng kôjáng, noqkuq akô; nghut kôlhang, ra-am gi, a dê jing kó nghut ri. ¹⁸ Hau htâng, Yesuq gi, yhangmoq chyáng lé lô mù, "Mauhkúng eq myigùng htoq mâ é ahkáng ayá banshoq, Ngo lé byi to bê nghut

lhê. ¹⁹ Haû mù, nungmoq gi, htoq ê luí, byù myû chângjup lé, Ngá é chángzô pé dut nhâng mù, haû Íwa, Yhangzo, Chyoiyúng Woi-nyí é myìng lang luí, wui-myhup hkám byi mù, ²⁰ nungmoq lé, Ngò hkunmó hkyô tô é lunglhang lé châng kut râ matú, yhangmoq lé mhoqshit keq. Ngò gi, minkan pyat htùm é hkùn jé shoq lhang, nungmoq eq rahá ru nghut nyí râ nghut lhê." ga pying tô ri.

MARKUQ

é Gabú Danglù

Laiká

(The Gospel of Mark)

Yesuq É Matú Hkyô Htong
Byî É Hkyô

Mht 3:1-12; Luk 3:1-18;
Yhn 1:19-28

¹ Haû Garai Gasâng é Yhangzo, Yesuq Hkrisduq eq sêng é gabú danglù hi é hkyô gi, ² haû myiqhtoi Esai-aq laiká má:

"Náng é hkyô lajang lángrâ matú, Ngá é lagyo lé, Náng é hí má Ngò nhang kat râ nghut lhê."[☆]

ga luí le,

³ "Haû yoso má, byù rayuq garû taí é htê gi,

'Haû Yhumsing é matú, hkyô hen to keq; Yhâng é matú hkyô lhoq nyhang to keq."[☆]

ga luí le, kâ tô é eq rajung za nghut lhê. ⁴ Haû mù, Wui-myhup Sará Yohan gi, yoso hkaû má jé lé luí, wui-myhup hkâm byî nyi é eq, yubak mara hkyut pyám byî é hui râ matú myit lhîng mù, wui-myhup hkâm yù râ hkyô lé, hko kyô nyi ri. ⁵ Haú hkûn, Yuda mau jowò hkangmó mâ é bang eq Yerusalem wà mó mâ é banshoq bang gi, yhâng chyáng htoq e bum akô. Yhangmoq gi, yhumsing é mara lé yín yû kôluí, yhâng chyáng mai Yodan làng má

wui-myhup hkâm yu bum akô nghut ri. ⁶ Yohan gi, gola-uq shomaú èq saí é mebu wut mù, yhâng é hpyidum má gi shokuq hpyihit hit ri; yhang gi, dinggám eq yosò byo-î pé lé zo sù nghut ri.

⁷ Yhang taí kyô é dang gi, "Ngá htoq má wum-o a-tsam je bo é sù rayuq, ngá htâng má jé lé râ nghut lhê; ngò gi, yhâng é hkyî-tsung tui lé hpyî râ lháng a gingdán é nghut lhê. ⁸ Ngò gi, nungmoq lé, wui èq za wui-myhup wó hkâm byi lhê; nghut kôlháng, Yhang gi, Chyoiyúng Woi-nyí má nungmoq lé wui-myhup hkâm byi râ nghut lhê." gâ ri.

Yesuq, Wui-myhup Hkâm Yu É Hkyô Eq Gunglaú Huí É Hkyô

Mht 3:13-17; 4:1-11; Luk 3:21-22; 4:1-13

⁹ Haû yoq má, Yesuq gi, Galile mau Nazaret wà mai lé jé mù, Yohan chyáng Yodan làng má wui-myhup hkâm yu ri. ¹⁰ Yesuq gi, wui mai htoq lo é u lé, mauhkûng bóng lo é lé le, Woi-nyí gi, hpûngkyui gunghkyâng sù é dông mai, Yhang ahtoq má gyó lé lo é lé le, Yhang myang kat ri. ¹¹ Haú hkûn, "Nàng gi, Ngò chyitdap é Ngá zo nghut lhê; Náng é ahtoq má Ngò gabú myit ngón nyi lhê." ga mauhkûng mai danghtê htoq lo ri.

¹² Haú hkûn jáng, Woi-nyí gi, Yhang lé yoso shut wang e ló nhang ri. ¹³ Haû mù, Yhang gi, yoso má myi xê nyí

nyì luí, Tsadán èq gunglaú é huí ri; tân jung yosô zè pé le, Yhang eq rahá nghut nyi ri; maumang lagyô pé gi, Yhang lé, lé dojaú nyi akô nghut ri.

Sâng-hi Lhê É Chángzô Pé

Mht 4:12-22; Luk 4:14-15; 5:1-11

¹⁴Yohan htóng gyó é htâng má, Yesuq gi, Galile mau má ló jé mù, ¹⁵"Ahkyíng gi, jé bê; Garai Gasâng é mingdán gi, chyâng lò bê nghut ri; myit lhíng mù, haú gabú danglù lé lumjíng keq hkoi." ga luí, Garai Gasâng é gabú danglù lé hkô kyo wún ri.

¹⁶Yesuq gi, Galile nhông yàm mai sô lai ló le, Simun eq yhanggu Andre nhiktâng, nhông má gùn dú nyi kô é lé, myang ri; haú nhik gi, ngozo kóng zo su nhik nghut akô. ¹⁷Haú mù, Yesuq gi, haú nhiktâng lé, "Ngá htâng cháng keq; Ngò, nungnhik lé, byù lé châng kóng su nhik dut nhâng rá nghut lhê." ga tai ri. ¹⁸Haú hkún, yhangnhik gi, radá dâm, gùn pé lé tô pyâm to luí, Yhang htâng cháng bekô nghut ri.

¹⁹Yesuq gi, radun zo dum sô e ló é hkún, Zebedi é yhangzo, Yakuq eq yhanggu Yohan nhiktâng, lhai hkaú má gùn hpo nyi kô é lé, myang ri. ²⁰Haú hkún, Yhang gi, radá dâm, yhangnhik tâng lé wut kat jáng, yhangnhik tâng gi, yhangnhik é yhangwa Zebedi eq langchyâng pé lé, lhai hkaú má nyhi pyâm to kôluí, Yhang htâng cháng bekô nghut ri.

Nat Lé, Yesuq Hkat Htoq Pyâm É Hkyô

Luk 4:31-37

²¹Yhangmoq gi, Kapernaum wà má e akô; Bánno buinyi nyi jé jáng, Yesuq gi, tarajong má wang é mù, mhoqshit hi ló bê nghut ri. ²²Shiwa byu pé kúm gi, Yhang mhoqshit é hkyô lé mauhong bum akô; hkâsu mù gâ le, Yhang gi, tarâ sará pé eq a pung é za, ahkáng ayá wó sù rayuq su, yhangmoq lé mhoqshit é yanmai nghut ri. ²³Haú u lé, agè ashop é nat wang júng é byù rayuq tarajong má bo lom nyi luí, wut garû kat é gi, ²⁴"Nazaret wà byù Yesuq ê, ngamoq gi, Nàng eq haí sêng lhê lúhú? Ngamoq lé lhoq hten rá matú, Nàng jé lé é nghut lhê lúhú? Nàng gi, Garai Gasâng é Chyoiyúng Sù nghut é lé, ngò sê lhê." gâ ri.

²⁵Haú hkún, Yesuq gi, "Hkâjop, yhâng chyáng mai htoq ló aq." ga yhang lé tân kat ri. ²⁶Haú hkún, agè ashop é nat haú gi, byù haú yuq lé wum kat langhtân nhâng luí, htê mó èq garu uchyang htoq ló byuq bê nghut ri.

²⁷Shiwa byù banshoq bang gi, gyai yhang máu byuq kômù, rayuq eq rayuq, "Shí yuq é dang gi, hkasú é dang wá nghut lhê lúhú? Ahko ahkáng bo é dông mhoqshit é hkyô asik nghut ri-nhung! Yhang gi, agè ashop é nat pé lé hkunmó hkyó jáng, haú bang lháng gyo byi akô nghut ri." ga luí, tai lhum bum akô

nghut ri. ²⁸ Yesuq eq sêng é ludang gi, Galile mau jàm shoq, yang é dông byo myín ló bê nghut ri.

Byù Myo Myo Lé, Yesuq Lhoq Gê Byî É Hkyô
Mht 8:14-17; Luk 4:38-41

²⁹ Yhangmoq gi, tarajong mai htoq luî, haú hkûn jáng, Yakuq eq Yohan nhik le mù, Simun eq Andre nhiktâng é yhâm má wang e ló bekô nghut ri. ³⁰ Simûn é yhâng-aumó gi, gyai yhang nò leq tô é nghut mù luî, yhangmoq gi, Yesuq lé haú yuq no é hkyô lhom taí kyô akô nghut ri. ³¹ Haú mù luî, Yesuq gi, yhâng chyáng huí ê mù, yhâng é loq má zui luî tu tsung ri; haú hkûn jáng, nò ge byuq luî, yhang gi, yhangmoq lé gaí tso gaí huq bê nghut ri.

³² Haú nyí buiwang é htâng má, byu pé gi, no é bang eq nat gang wang júng nyí é bang banshoq lé, Yesuq chyáng shuí lé lo bum akô nghut ri. ³³ Rawa bang, hkúmdong nàm má lé zup zing tô akô. ³⁴ Haú mù, Yesuq gi, awáng nòhpyo ajung jung huí é bang myo myo lé lhoq gê byî ri; nat gang myo myo lé le, hkat htoq pyâm ri; nghut kôlhang, Yhang ó nghut é lé nat gang haú bang sé kô é yanmai, nat gang haú bang lé dang a taí nhâng nghut ri.

³⁵ Yesuq gi, htang napkyó mau lháng a bó shimá, toq mù, gaú é jowò ralhú má htoq ê luî, kyû ê dúng ri. ³⁶ Simun eq yhâng é luzúm wuî kúm gi, Yhang lé châng

hò kômù, ³⁷ Yhang lé myang hò kôjáng, "Yuq hkangmó gi, Nang lé châng hkat ho nyi akô." ga luî, taí kyô akô nghut ri.

³⁸ Haú hkûn, Yesuq gi, yhangmoq lé, "Awui ayàm mâ é wà pé má le, ngò, mungdang wó hkô rá matú ê sháng, hau é matú ngò lé é ru nghut lhê." ga tú taí ri. ³⁹ Haú mù luî, Yhang gi, Galile mau ramau gón, tarajong pé má mungdang hkat hko wún é htoq agó, nat gâng pé lé le hkat htoq pyám byî wún ri.

Manggâm Dap Sû Lé, Yesuq Lhoq Gê Byî É Hkyô

Mht 8:1-4; Luk 5:12-16

⁴⁰ Manggâm dap é byù rayuq gi, Yesuq chyáng lé mù, hkyihput htuq luî, "Nàng dóng é nghut le gi, ngò lé Nàng wó lhoq sân-yúng byi rá nghut lhê." ga dung wut ri.

⁴¹ Haú hkûn, Yesuq gi, yhang lé wú shogyo luî, loq lhâm kat mù, haú yuq lé é záng luî, "Ngò dóng lhê, sân-yúng aq hkoi." ga taí ri. ⁴² Haú hkûn jáng, manggâm ana byuq byuq luî, yhang gi, gè bê nghut ri.

⁴³⁻⁴⁴ Yesuq gi, "Nàng, shí hkyô ó lé le hkâtaí kyo. Nghut kôlhang, náng é gungdu lé, hkyangjong hpô chyáng ló tún shit mù, nàng sân-yúng bê hkyô lé yhangmoq é matú saksé dut sháng gaq, Mosheq tarâ tô tô é eq rajung za, hkungga ló nhông byi aq." ga, yhang lé gyai yhang sidiq byi mù, radá dâm nhang kat bê nghut ri. ⁴⁵ Nghut

kôlhang, haú yuq gi, htoq ló mù, haú hkyô lé je taí pyo myhîn ló bê nghut ri. Hau é yanmai, Yesuq gi, wà hkaû má de de a ge wang ló lo mù, shinggan mâ é chamchyuyui dut é jowò má za nyi nyi ri. Nghut kôlhang, byu pé gi, jowò hkangmó mai Yhâng chyáng ru zîng lé nyi bum ashî kó nghut ri.

2

Gùngjum Shî Sû Lé, Yesuq Lhoq Gê Byî É Hkyô
Mht 9:1-8; Luk 5:17-26

¹ Buinyi hkâ-myháng a myáng má, Yesuq gi, Kaperna-um wà má dum wang lò jáng, Yhang yhûm dum taû jé lô bê gâ é hkyô lé, byu pé wó gyô bum akô nghut ri. ² Haú mù, byù myo myo zîng lé lô kôluí, yhúmhaû má jowò a joq lô é htoq agó, hkumtot má lhang a joq lo nghut ri; Yesuq gi, yhangmoq lé mungdang hko kyô nyi ri. ³ Haú hkûn, byù myi yuq gi, gùngjum shî sù rayuq lé chôm dang waq luí, Yhâng chyáng lé lo akô. ⁴ Yhangmoq gi, byù lûm myô chyîn chyap to mù, byù haú yuq lé Yesuq chyáng a wó shuî jé ê kô é yanmai, Yesuq é u htoq mâ é yhumhkûng lé dong htông yù luí, gùngjum shî sù lé taphkang eq roq hkyô kat akô nghut ri. ⁵ Yesuq gi, yhangmoq é lumjîng myit lé byu-myàng jáng, gùngjum shî sù lé, "Ngá zo ê, náng é yubak

mara lé hkyut pyám byi bê." ga taí ri.

⁶ Haú hkûn, tarâ sará pé ram gi, haú má zung to kôluí, yhangmoq é i-myt unghkaû má, ⁷ "Byù shí yuq gi, haí mù luí haú su gâ lê laq? Yhang gi, Garai Gasang lé rhoi dang taí nyi ri; Garai Gasang mai lai luí, ó yuq wá mara wó hkyut byi râ lú?" ga luí, myit sôn wuî nyi bum akô nghut ri.

⁸ Yesuq gi, yhangmoq é unghkaû má myit wú nyí kô é hkyô lé, radá dâm Yhang é myit mai sé mù, "Nungmoq é i-myt hkaû má, haí mù haú su nghú myit sôn wuî nyi bum akô lú?" ⁹ Haú gùngjum shî sù lé, 'Náng é yubak mara lé hkyut pyám byi bê.' nghú taí é dang eq, "Toq aq, náng é taphkang lé yù mù, hkyô so aq.' nghú taí râ má, hká hkun je taí lui lê lú?" ¹⁰ Nghut kôlhang, haú Byu Yhangzo* gi, mingkan htoq má, mara hkyut byi râ ahkáng wó Sû nghut é lé, nungmoq lé sé nhâng nau lê." ga, yhangmoq lé taí kat ri. ¹¹ Hau htâng, Yhang gi, haú gùngjum shî sù lé, "Ngò, nang lé taí bá, toq aq, náng é taphkang lé yu chûng luí, yhûm taû ló aq hkoi." ga taí ri. ¹² Haú yuq gi, toq mù, yhâng é taphkang lé yu chûng luí, yhangmoq banshoq bang wú tsuq tô é myoq hí mai sô htoq ló byuq bê nghut ri. Hau é yanmai, yuq hkangmó gi, mauhong bùm kômù, "Isû

* **2:10** Byu Yhangzo gâ é gi, Yesuq Yhânggùng yhang lé le taí é nghut lê, Mesaia lé le taí é nghut lê.

é hkyô gi, hkâ-nhám lháng a myàng wú shi." ga, Garai Gasang lé hkya-on kungton bum akô nghut ri.

Lewiq (Mahte) Lé Wut Yu É Hkyô

Mht 9:9-13; Luk 5:27-32

¹³ Yesuq gi, nhông yàm má radàm dum htoq e ri. Háu hkûn, byù moq mó gi, Yhâng chyáng jé lé lo bùm kômù, Yhang gi, háu bang lé lhom mhogshit nyi ri. ¹⁴ Yhang gi, sô yông ló nyi é hkûn, kang guq zúm má zung tô é, Alhpe yhangzo Lewiq lé myang kat luí, "Ngá htâng cháng aq." ga taí ri. Háu hkûn, Lewiq gi, toq luí, Yhang htâng cháng bê nghut ri.

¹⁵ Yesuq gi, Lewiq é yhûm má myinzang ê zô nyi é hkûn, kang guq bang myo myo eq yubak dap bang le, Yhang eq Yhâng é chángzô pé eq rahá zo shuq bum akô. Hkâsu mù gâ le, Yhang htâng châng é bang gi, ajùm ayò nghut é yanmai nghut ri. ¹⁶ Tarâ sará nghut é Hparishe pé ra-am gi, yubak dap bang eq kang guq zo bang le mù rahá, Yesuq zang zô nyi é lé myàng kôjáng, Yhâng é chángzô pé lé, "Yhang gi, haí mù luí, kang guq bang eq yubak dap bang eq rahá zo shuq nyi lhê lú?" ga myí bum akô nghut ri.

¹⁷ Háu su ga myi kô é lé Yesuq wó gyo jáng, Yhang gi, yhangmoq lé, "Wángzán bang gi, chi sará a ra kó, nõhpyo hui bang za sheq ru rá lhê. Háu eq rajung za, Ngò gi, dingmán bang lé wut yù rá matú jé lé

é a nghut, yubak dap bang lé ji yù rá matú sheq jé lé é ru nghut lhê." ga taí kat ri.

Zoshuq Gám É Eq Sêng É Hkyô

Mht 9:14-17; Luk 5:33-39

¹⁸ Yohan é chángzô pé eq Hparishe pé gi, zoshuq gám nyi akô nghut ri. Háu mù, ra-am gi, Yesuq chyáng jé lé kômù, "Wui-myhup Sará Yohan é chángzô pé eq Hparishe pé é chángzô pé gi, zoshuq gám akô; nghut kôlháng, náng é chángzô pé gi, haí mù a gám kô é lú?" ga luí, myí akô nghut ri.

¹⁹ Háu hkûn, Yesuq tû taí é gi, "Bíng pé gi, lusik eq rahá nghut nyi tô ashí hkûn, zoshuq hkâsu wó gám rá lú? Yhangmoq gi, lusik eq rahá nghut nyi é u lé, zoshuq gám kó rá a nghut. ²⁰ Nghut kôlháng, lusik lé yhangmoq chyáng mai shuí yu pyâm é hkyíng jé rá nghut lhê; háu buinyí pé má kúm gi, yhangmoq, zoshuq gám kó rá nghut lhê.

²¹ Ó yuq le, mebu xau má pán sik èq a lhaq hpo wú kó; háu su kut é nghut jáng, pán sik gi, kun byuq mù, mebu xau le je lhoq cheq pyám rá nghut lhê. ²² Háu eq rajung za, tsibiyiq wing asik lé le, shokuq htúng axau má ó a kat wú kó. Kat é nghut jáng, tsibiyiq wing asik gi, htúng lé lhoq buq goq nhâng luí, tsibiyiq wing eq shokuq htúng htên byuq rá nghut lhê. Háu mù, tsibiyiq

wing asik gi, shokuq htông sik má za ge kat é nghut lhê.

*Bánno Buinyi É Yhumsing
Mht 12:1-14; Luk 6:1-11*

²³ Bánno buinyi ra-nyí má, Yesuq gi, Yhâng é chángzô pé eq rahá yò hkaû mai sô lai lô é hkûn, Yhâng é chángzô pé gi, kyôshi ratsuí langshap yu akô nghut ri. ²⁴ Haû mù, Hparishe pé gi, Yesuq lé, "Wú aq, Bánno buinyi má a ge kut jung lé, haî mù, náng é chángzô pé kut nyi akô lú?" ga taî akô.

²⁵ Haû hkûn, Yesuq gi, yhangmoq lé, "Dawiq lhang gi, yhang htang châng é bang eq rahá zòmut hui lui, zoshuq râ tô é hkûn, hkâsu kut é hkyô lé, nungmoq hkâ-nhâm le a nghap wú kó lú?" ²⁶ Abiahta, hkyangjong mó kut nyi é u lé, Dawiq gi, Garai Gasâng é yhúmhaû má wang ê mù, hkyangjông pé mai lai lui, ó le a ge zô é, kyâng tô é muk lé yù zo mù, yhang htang châng é bang lé le ratsuí tsuí byi tso é nghut lhê." ga tû taî ri.

²⁷ Hau htang, Yhang gi, yhangmoq lé, "Bánno buinyi gi, byù é matú kut tô é nghut lhê; byù gi, Bánno buinyi é matú a nghut. ²⁸ Haû mù, haû Byu Yhangzo gi, haû Bánno buinyi é Yhumsing lhang nghut lhê." ga xoq taî ri.

3

¹ Yesuq gi, tarajong má radàm dum wang e le, loq raloq ajum shi byuq é byù rayuq nyi to láng ri. ² Haû

hkûn, haû má nyi tô é bang ra-am gi, Bánno buinyi má, Yesuq mai haû yuq lé lhoq gê byi râ lú ga, mara hùn râ matú gyám wú nyi akô nghut ri. ³ Yesuq gi, haû loq jum shi sù lé, "Banshoq bâng é hí má, toq yap shit aq." ga taî kat ri.

⁴ Hau htang, Yhang gi, haû má nyi tô é bang lé, "Bánno buinyi má, ge é muzó kut râ, a ge é muzó kut râ, byù asak hkyi râ eq byù sat râ hkyô pé má, hká lhum kut le sheq tarâ wang lhê lú?" ga myi kat jáng, yhangmoq kúm gi, jit le a ga kó nghut ri.

⁵ Haû mù, Yhang gi, nhik-yô nau é myit eq haû bang lé lhing wú mù, yhangmoq myit htan é hkyô lé, wú yón lui, haû loq jum shi sù lé, "Náng é loq nyhang kat aq." ga taî kat jáng, haû yuq gi, loq nyhang kat lui, yhang é loq gi, shoq za ge byuq bê nghut ri. ⁶ Hau htang má, Hparishe pé gi, htoq ló kômù, Yesuq lé hkâsu kut wó sat pyám râ hkyô lé, Herut é byu pé eq chôm hpyê lhum bum akô nghut ri.

*Byù Ajùm Ayò, Yesuq Htàng
Chang Kô É Hkyô*

⁷ Yesuq gi, Yhâng é chángzô pé eq rahá, nhông shut dum e ló le, Galile mau mâ é byù ajùm ayò gi, Yhang htang châng e ló bum akô nghut ri.

⁸ Hau htoq agó, Yuda mau mâ é bang, Yerusalem wà mó mâ é bang, Idumia mau mâ é bang, Yodan làng hé hpoq mâ é bang, Turuq myuq eq Sidun myuq awui ayàm jé shoq mâ

é bang, ajùm ayò gi, Yhang kut nyi é hkyô banshoq lé wó gyo kôjáng, Yhâng chyáng jé lé bum akô nghut ri. ⁹⁻¹⁰ Yesuq gi, byù myo myo lé lhoq gè byî é yanmai, nõhpyo hui to bang gi, Yhang lé wó záng shoq ga, chyîn chyap wang ló bum akô. Byù lùm myo luî, Yesuq gi, Yhang lé a nhê pyet pyám sháng gaq ga, Yhâng é chángzô pé lé lhai ralhum hen to nhang ri. ¹¹ Agè ashop é nat pé gi, Yhang lé myàng hkangmó, Yhâng é hí má lêng ngop to luî, "Nàng gi, Garaî Gasâng é Yhangzo nghut ri." ga luî, taî garû akô. ¹² Nghut kôlhang, Yesuq gi, Yhang ó yuq nghut é hkyô lé a taî byông htoq râ matú, tân hkúm kat ri.

Lagyo Kut Râ Byù Raxe Í Yuq Hkyin Yu É Hkyô

Mht 10:1-4; Luk 6:12-16

¹³ Yesuq gi, bùm shut doq ló mù, Yhang ô nau é bang lé ji kat luî, haú bang gi, Yhâng chyáng jé lé lo bum akô nghut ri. ¹⁴ Haú hkûn, Yesuq gi, byù raxe í yuq lé hkyin yù luî, lagyo ayá byî ri; haú bang gi, Yhang eq rahá nyi râ matú le, mungdang hkô râ matú Yhang nhang htoq kat râ eq, ¹⁵ nat gâng pé lé hkat htoq râ ahko ahkáng wó râ matú le, nghut akô nghut ri. ¹⁶ Haú raxe í yuq gi, Simun (Yesuq mai Petruq ga myìng myhíng byi sù); ¹⁷ Zebedi é yhangzô nhiktâng Yakuq eq yhanggu

Yohan (Yháng nhiktâng lé Yesuq mai Buanerga ga myìng myhíng byî ri; hau é lichyùm gi, maugum zô nhik gâ é nghut lhê.); ¹⁸ Andre, Hpilip, Barhtolume, Mahte, Htomaq, Alhpe é yhangzo Yakuq, Htade, Zelutuq* dut é Simun eq, ¹⁹ Yhang lé ap pyám râ sù, Yudaq Iskarut pé nghut akô.

Yesuq Eq Bezebulaq

Mht 12:22-32; Luk 11:14-23; 12:10

²⁰ Hau htâng, Yesuq gi, yhùm má wang ló le, byù ajùm ayò dum zìng lé lô kômù, Yhang eq Yhang é chángzô pé gi, zang zo hkyíng lhang a wó kó nghut ri. ²¹ Yhâng é yhumbyù wuì gi, haú hkyô lé wó gyo kôjáng, "Yhang, myit a gyìng lo nghut ri." ga luî, Yhang lé hung shuì yù râ matú, e akô nghut ri.

²² Yerusalem wà mó mai gyó lé lo é tarâ sará pé gi, "Shí yuq gi, Bezebulaq gâ é nat gâng pê é zau lúng sù nghut ri-nhung! Yhang gi, nat zaù é wum-o a-tsam èq za, nat gâng pé lé hkat htoq pyám é nghut ri." ga taî bum akô nghut ri.

²³ Haú mù luî, Yesuq, yhangmoq lé wut yù mù, dangtú dong taî é gi, "Tsadán gi, Tsadán lé hkâsu kut wó hkat htoq râ lú? ²⁴ Mingdán ralhum gi, ahkaù má byoq gâng lhùm nyi kô é nghut jáng, mingdán haú wó gíng nyi râ a nghut. ²⁵ Yhumhtu ralhum

* **3:18** Zelutuq gâ é lichyùm gi, yhumsìng zui saí é hkyô má gyai yhang myit lòm shirong é sù lé gâ lhê. Haú u lé, Israelaq byu pé gi, mingdán luthkyô wó râ matú shikut nyi é hpúng bang lé, Zelutuq gâ lhê.

má le, ikun byù yhangchang byoq gângh lhum nyi é nghut le gi, yhumhtu haù wó gângh nyi râ a nghut. ²⁶ Haù eq rajung za, Tsadán le, yhanggùng yhang lhoq hpyoq luí, gam hkoq nyi é nghut le gi, yhang wó nyi nyi râ a nghut, htùm byuq râ za nghut lhê. ²⁷ Ó yuq nghut kôle, wum-o bò sù lé hí tui zing pyâm é a nghut le gi, yhang é yhùm má lú wâng mù, yhang é sutzè lé wó lú yù râ a nghut: Haù yuq lé hí tuí zing pyám jáng sheq, yhang é sutzè lé wó lú yù râ nghut lhê. ²⁸ Ngò, nungmoq lé teng za taí kôlé, byu pé kut shut é mara banshoq eq rhoí dang taí pyâm é pé lé gi, mara wó hkyut pyám byí lhê. ²⁹ Nghut kôlhang, haù Chyoiyúng Woinyí lé rhoí dang taí pyâm é sù gi, hkâ-nhám le, mara hkyut byí é wó hui râ a nghut; haù yuq gi, ahtum abyuq yubak wó sù nghut nyi ri." gâ ri.

³⁰ Yhang haù su ga taí é gi, yhangmoq mai, "Yhang gi, agè ashop é nat wó sù nghut ri." ga kô é yanmai nghut ri.

Yesuq É Yhângnu Eq Yhanggu Pé

Mht 12:46-50; Luk 8:19-21

³¹ Hau htâng, Yesuq é yhangnu eq yhanggu pé gi, jé lé mù, yhùm hkun má yap to kôluí, Yesuq htoq lô râ matú, byù rayuq lé wang taí nhang akô nghut ri. ³² Byù ajùm ayò gi, Yhâng é lhinghkyuq má zung tô akô; haù bang gi, Yhang lé, "Wú aq, náng nu eq nunggu pé gi, nang lé hui nau

luí, shinggan má lángh bum akô." ga taí kyô akô nghut ri.

³³ Haù hkùn, Yhang gi, "Ó pé gi, Ngá nu eq Ngá gu pé nghut akô lú?" ga myi kat ri.

³⁴ Hau htâng, Yhang gi, Yhâng é lhinghkyuq má zung hkyuq tô é bang lé wú mù, taí é gi, "Shí bang gi, Ngá nu eq Ngá é gumang wui nghut bê! ³⁵ Garai Gasang ô nau é hkyô châng é sù ó yuq nghut kôle, Ngá gu, Ngá mang, Ngá nhá, Ngá nu chyat nghut bê." gâ ri.

4

Kyôshi Sân É Dangtú
Mht 13:1-23; Luk 8:4-15

¹ Yesuq gi, nhông yàm má radàm dum mhoqshit hi ló bê nghut ri. Haù hkùn, Yhâng é lhinghkyuq má byù moq mó lùm yán zing lé lo bùm kô é yanmai, Yhang gi, nhông hkaù má é lhaí má wang zung tô ri; haù u lé, byù moq mó gi, nhông yàm gin-gau htoq má nyi ming bum akô nghut ri.

² Yhang gi, haù bang lé, dangtú pé đông myo myo mhoqshit byí nyi ri; Yhang mhoqshit é má, ³ "Gyo wú keq! Kyô hkyó sù rayuq gi, kyôshi san râ gâ htoq e ló ri. ⁴ Yhang, kyôshi sân kat é hkùn, ra-am gi, hkyô má gyó ang mù, nghoq pê èq lé hte zô pyám ri. ⁵ Ra-am gi, myi-tse a htu é luqgok yò pé má gyó ang mù, myi-tse a htu é yanmai, lui za yuq htoq lô kôle, ⁶ amyit a wó chin hing é nghut mù, bui htoq lô jáng, lhap kyuq pyám bê nghut ri. ⁷ Dum ra-am gi, zuyóm hkaù má gyó ang luí,

zubyap haú pé kô lò mù, wup pyâm é yanmai, ashi a wó zui nghut ri. ⁸ Nghut kôlhang, ram gi, myìhpún bo é jang má gyó âng é yanmai, yuq kô lò mù, ashi sum xê tú, hkyuq xê tú, rashô tú lhang, zui myô lo é nghut ri." gâ ri.

⁹ Hau htâng, Yesuq dum taí é gi, "Gyo yù râ nohkyap dap sù gi, gyô yù sháng gaq." gâ ri.

¹⁰ Yhang baú za nghut nyi é hkûn, haú lagyo raxe í yuq eq Yhang nàm má nyi tô é bang gi, dangtú haú eq sêng é hkyô lé, lé myi akô. ¹¹ Haú hkûn, Yhang, yhangmoq lé taí kyô é gi, "Garai Gasâng é mingdán eq sêng é sê gyo wuí é hkyô lé sé gyo râ ahko ahkáng, nungmoq lé byi to lugù nghut bê. Nghut kôlhang, góbâng é matú gi, jung hkanmó lé dangtú dông chyat taí é nghut lhê.

¹² Haú mù luí,

'Yhangmoq gi, myang nyi kôlhang, a wú sé kó, gyô nyi kôlhang, a sê gyo kó; sé wú sê gyo kô é ru nghut le gi, lhang taú lò mù, mara hkyut pyám byi é hui kó râ nghut lhê!'[☆] gâ ri." ga tô ri.

¹³ Hau htâng, Yhang, yhangmoq lé dum xoq taí é gi, "Nungmoq, dangtú shí lé a sê gyo kô é nghut le gi, gotú dangtú pé lé hkâsu kut ung sê gyo kó râ lú? ¹⁴ Yò mù zui sù san kat é kyôshi gi, mungdang nghut lhê. ¹⁵ Byù ra-am gi, hkyô má gyó âng é kyôshi eq wuí akô; yhangmoq gi, mungdang lé wó gyô yu

é hkûn yhang, Tsadán gi, lé mù, yhangmoq chyáng mâ é mungdang lé lé yù pyám byi ri. ¹⁶ Ra-am gi, luqgok yò pé má gyó âng é kyôshi eq wuí akô; yhangmoq gi, mungdang lé wó gyo jáng, radá dâm gabú myit eq hap yù akô. ¹⁷ Nghut kôlhang, yhangmoq gi, amyit a wó chin é yanmai, razup zo za yuq kômù, mungdang é yanmai, wuìhke é eq zing-rî é pé hui kôjáng, hân hân htak ló byuq kó râ nghut lhê. ¹⁸ Dum ra-am nghut jáng, zugyóm hkaú má gyó âng é kyôshi eq wuí akô; yhangmoq gi, mungdang lé wó gyô yù kôlhang, ¹⁹ shí ipyat lhê é myit wui myit hke hkyô, hkyô shuí ngoq jung ngùn hîng zèhkoq eq gotú zè pé lé ô nau é hkyô pé, yhangmoq chyáng wang lò jáng, haú mungdang lé hup pyâm é yanmai, ashi a wó zui dut kó râ nghut lhê. ²⁰ Ra-am kúm gi, myìhpún bo é jang má gyó âng é kyôshi eq wuí akô; yhangmoq gi, haú mungdang lé gyô yù mù, lhom yù luí, sân kat é htoq sum xê tú, hkyuq xê tú, rashô tú lhang myo shoq ashi zui lò kó râ nghut lhê." gâ ri.

Myibung Htûn É Hkyô

Luk 8:16-18

²¹ Yesuq, yhangmoq lé xoq taí é gi, "Nungmoq gi, myibung lé yù mù, tsungjang má a tsung e za, mûng eq nghop tô é, a nghut jáng, yhupchong ô má tsung tô é, ó yuq wá kut wú akô lú? ²² Hkâsu mù gâ

le, haq tô é zè hái jung le htoq ze lò râ eq, zaú tô é pé hái jung le byông htoq lô râ nghut lhê. ²³ Gyô yù râ nohkyap dap sù ó yuq nghut kôle, gyô yù sháng gaq." gâ ri.

²⁴ Hau htoq agó, Yhang dum taí é gi, "Nungmoq gi, wó gyô yu é hkyô lé rago myit wú keq; nungmoq lik byí é bung èq, nungmoq lé dum lik byí râ nghut lhê; hau htoq lhang myo shoq wó kó râ nghut lhê. ²⁵ Hkâsu mù gâ le, wó to sù lé gi, jat byi shirâ, a wó su chyáng mai kúm gi, yhang wó tô é lé lhang yu pyám byi shirâ nghut lhê." gâ ri.

Kyôshi Yuq Kô Lo É Dangtú

²⁶ Hau htâng, Yhang dum xoq taí é gi, "Garai Gasâng é mingdán gi, byù rayuq mai, myigùng má sân kat é kyôshi eq wuí ri. ²⁷ Byù haú yuq gi, myín lé yhup tô é nghut nghut, nyí lé toq lo é nghut nghut, kyôshi gi, zúi htoq lô mù, yuq kô lo nyi ri; nghut kôlhang, yhang gi, hkâsu kut yuq lo nyi é hkyô lé a sé nghut ri. ²⁸ Myigùng gi, yhang baú yhang, kyôshi lé, sâng-hi má abum bum nhâng, hau htâng má a-nhâm htoq nhâng mù luí, ashi zui shoq kut é nghut lhê. ²⁹ Kyôshi myhíng jáng, kyô shu yoqjé bê nghut é yan-mai, yhang gi, zaiyik èq yâm yù râ nghut lhê." gâ ri.

Angshi Cham Lé Dangtú Yu É Hkyô

Mht 13:31-32; Luk 13:18-19

³⁰ Yesuq dum xoq taí é gi, "Garai Gasâng é mingdán lé, hai èq lhoq whuí wú râ lhu? Hái jung dangtú yù mù, shit wú râ lhu? ³¹ Garai Gasâng é mingdán gi, angshi cham eq wuí ri. Angshi cham haú gi, myigùng má hô é kyômyui jí pé má je tiq é nghut lhê. ³² Nghut kôlhang, ho mù, yuq kô lô jáng, xun hkyâm má hô é mhan-haq hpoqnoq gàm ban-shoq htoq má je kô é agàm dut lò mù, akoq kô lò luí, hau é buishûm hkaú má, maulat nghoq zô pé lé wó zung nô nyi é nghut lhê." gâ ri.

³³ Haú sù é dangtú myo myo dông mai, Yesuq gi, yhangmoq wó sê gyô é myhó, mungdang hko kyô nyi ri. ³⁴ Yhang gi, yhangmoq lé, dangtú a bo é hái lhang a taí wú nghut ri; nghut kôlhang, Yhang eq chángzô pé baú nghut nyi é hkûn kúm gi, jung hkangmó é lichyúm lé taí sân kyô ri.

Laidun Mó Lé, Yesuq Lhoq Zím Pyâm É Hkyô

Mht 8:23-27; Luk 8:22-25

³⁵ Haú nyí, myinhâng lé, Yesuq gi, Yhâng é chángzô pé lé, "Nga-nhúng nhông hé hpoq shut dap e lô sháng." ga taí ri. ³⁶ Haú hkûn, chángzô pé gi, byù moq mó lé nyhi pyâm to luí, Yhang zung tô é lhai mai yhang, Yhang lé shuí gû dap ló bekô; gotû lhai pé le, yhangmoq eq rahá bo gû dap ló akô nghut ri. ³⁷ Haú u lé, laidun mó jé lô mù, wuilhêng hta toq lô luí, lhai má lo bat hâng é yanmai, wui byíng lô

bê nghut ri. ³⁸ Haú hkûn, Yesuq gi, lhai htâng má uhkuq hkuq mù yhup myhî tô ri; haú chángzô pé gi, Yhang lé nhaú pun luí "Sarâ ê, nganhung myup shi lô râ dut é lé, nàng a chiq byi lhu?" ga taí akô nghut ri.

³⁹ Yesuq gi, toq mù, laidun lé tan luí, wuìlhêng lé, "Zim aq." ga taí kat jáng, haú laidun num lô byuq luí, banshoq zîm byuq bê nghut ri.

⁴⁰ Hau htâng, Yhang gi, Yhâng é chángzô pé lé, "Hái mù, haú-í gyuq bum akô lhu? Nungmoq gi, lumjîng myit a bò shi kó lhu?" ga taí ri.

⁴¹ Yhangmoq gi, gyai yhang gyuq dan bùm kômù, "Shí yuq gi, hkasû é byù nghut lhê lhà? Lai eq wuìlhêng pé lhang gi, Yhâng é dang lé gyo byî ri-nhung!" ga luí, rayuq eq rayuq myí lhum bum akô nghut ri.

5

Nat Gang Hkat Htoq Pyâm É Hkyô

Mht 8:28-34; Luk 8:26-39

¹ Yhangmoq gi, nhông hé hpoq mã é Gerase byu pé é mau má jé dap e lô akô.

² Yesuq lhai mai htoq lô é hkûn, agè ashop é nat wang júng é byù rayuq gi, lupdùng mai htoq lé lô mù, Yhang lé lhom huí ri. ³ Haú yuq gi, lupdùng má za nyi é sù nghut ri; yhang lé, ó yuq eq le, shamtoq-tuí eq lhang a wó tuí zing wú kó nghut ri. ⁴ Hkâsu mù gâ le, adàm dàm, yhâng é loq eq hkyí

má shamtoq-tuí eq tuí tô wú kôlhâng, yhang gi, loq mã é shamtoq-tui pé lé lhang hpyit pyám pyám kut mù, hkyí mã é shamtoq kyum lé lhoq hkyop pyám pyám kut ri. Yhang lé, ó yuq eq le a wó hkuq yù kó nghut ri. ⁵ Yhang gi, nyí myín aga lupdùng eq bùm pé má puk garu uchyang, yhumsing gùng lé luqgok eq dún cheq wún ri.

⁶ Yhang gi, Yesuq lé, we mai myang kat jáng, din e lô mù, Yhâng é hí má hkyihput htuoq ngop luí, ⁷ htê mó eq, "Myhang htâng é Garaí Yhangzo Yesuq ê! Nàng gi, ngò eq hái sêng lhê lhu? Nàng gi, ngo lé a zing-ri râ matú, Garaí Gasâng hí má danggidiq byi laq." ga taí garû ri. ⁸ Hái mù gâ le, Yesuq gi, yhang lé, "Agè ashop é nat nàng ê, byù shí yuq chyáng mai htoq lô aq." ga taí kat é yanmai nghut ri.

⁹ Hau htâng, Yesuq gi, "Náng myîng hái gâ lhê?" ga, yhang lé myí jáng, yhang gi, "Ngamoq gi, myo myo nghut é yanmai, Legio gâ lhê." ga tú taí ri. ¹⁰ Hau htâng, yhang gi, haú jowò mai yhangmoq lé a kôn pyám râ matú, Yesuq lé dum dung dung kut nyi ri.

¹¹ Haú u lé, waq rajùm mó gi, bùm yàm má dû but zô nyi bum akô nghut ri. ¹² Haú mù luí, nat gâng pé gi, "Ngamoq lé, waq pé chyáng nhang kat luí, yhangmoq chyáng wàng nhâng laq." ga luí, Yesuq lé dung akô. ¹³ Haú hkûn, Yesuq gi, yhangmoq lé ahkáng byí kat jáng, haú agè ashop é nat

pé gi, haú yuq chyáng mai htoq ló kôluí, waq pê chyáng wang ló byuq bekô nghut ri. Haú mù, haú í hkyîng kô bo é waq hpúng gi, gampyoq mai nhông hkaú shut rut din yán wang ló kôluí, myup shi byuq bekô nghut ri.

¹⁴ Waq zúng bang gi, h pang din wang ló kômù, myuq hkaú mâ é bang eq awui ayàm mâ é bang lé, haú hkyô ló shit kyo kô é yanmai, byù haú bang gi, dut lai lò bê hkyô lé, é htoq wú akô nghut ri. ¹⁵ Yhangmoq gi, Yesuq chyáng jé lé kô é hkûn, nat gang myo myo wang júng wú é sù, mebu wut luí, byù gè rayuq su zung to lánng é lé myàng kômù, gyuq dan bùm bekô nghut ri. ¹⁶ Haú hkyô lé myang é bang gi, nat gâng pé wang júng sù eq waq pê chyáng hkâsu dut é hkyô, góbang lé tai kyo akô nghut ri. ¹⁷ Hau htâng, byu pé gi, Yesuq lé yhangmoq é mau mai htoq ló byuq râ matú, chôm dúng tôngbán akô nghut ri.

¹⁸ Yesuq lhai hkaú má wang ló é u lé, haú nat gâng pé wang júng lai lò bê sù gi, Yesuq htâng cháng râ matú, Yesuq lé dung tôngbán ri. ¹⁹ Nghut kôlhang, Yesuq gi, yhang lé ahkáng a byi e za, "Nàng, yhùm shut sheq ló mù, haú Yhumsîng, nang lé hkâ-í kut byi bê hkyô eq hkâsu kut shogyo nhikmyin yu é hkyô lé, nánng é yhumbyù buinùm ji-myi wui lé ló tai kyo aq." ga tai kat ri. ²⁰ Haú mù, byù

haú yuq gi, ló luí, yhang lé Yesuq hkâ-í kut byi bê hkyô lé, Dekapoli* mau bang lé ló tai kyo ri. Haú hkûn, wó gyô é bang banshoq gi, mauhong bum akô nghut ri.

Shi Byuq Bê Myiwe Zo Eq No É Myiwe Myhi Rayuq É Hkyô

Mht 9:18-26; Luk 8:40-56

²¹ Yesuq gi, lhai ji mù, nhông he hpoq shut dum dap jé ló mù, Yhang, nhông yàm má nyi tô é u lé, byù ajùm ayò gi, Yhâng é lhinghkyuq má lé zîng bum akô nghut ri; ²² haú hkûn, Ya-iruoq gâ é, tarajong má up bang mâ é rayuq gi, haú má lé luí, Yesuq lé myang kat jáng, Yhâng é hkyi wang má paí gop to mù, ²³ "Ngá zo byizo gi, kâng byit ló nyi ri; yhang ge lò mù asak dum dui shi sháng gaq, nánng lé mù, yhâng é ahtoq má loq lé ke byi laq." ga, wum kat dúng tôngbán nyi ri. ²⁴ Haú mù, Yesuq gi, haú yuq htâng châng e ló ri; byù ajùm ayò le, Yhâng é awui ayàm má châng chyîn chyap wún bum akô.

²⁵ Haú hkûn, raxe í zân suí yui nyi é myiwe myhi rayuq le haú hpúng má bo tô ri. ²⁶ Yhang gi, chi sará myo myô pê chyáng yhang wó é ngunzè banshoq lhoq pán mù, nò hkâm luí yâ wú kôlhang, ge é hkyô a joq é htoq agó, je lánng wuîhke lò ri. ²⁷ Yhang gi, Yesuq é hkyô lé wó gyo jáng, byù hpúng mai Yesuq é nunghtáng má huí lé mù,

* 5:20 Dekapoli gâ é gi, Grik đông myuq raxê lé gâ lhê.

Yhâng é bu má ê záng kat ri. ²⁸ Haî mù luî gâ le, yhang gi, "Ngò, Yhang é bu má za lháng ê wó záng é nghut le gi, ge byuq râ nghut lê." ga wó myit é yanmai, haû su kut é nghut ri. ²⁹ Haú hkûn jáng, yhâng chyáng suí yui é kân byuq luî, yhang gi, hpuzô nyi é mai wó lut bê hkyô lé, yhânggùng má sê gyô kat bê nghut ri.

³⁰ Yesuq gi, Yhâng é gùng mai hpungwup a-tsam htoq ló é lé, radá dâm châng sê kat luî, byù moq mó shut lhing wú mù, "Ngá é bu má ó yuq záng bê lúhú?" ga myi kat ri.

³¹ Haú hkûn, Yhâng é chángzô pé gi, "Náng é lhingkyuq má byù ajùm ayò chyîn chyap nyi é lé, myang to luî nhîng, 'Ngo lé, ó yuq záng bê lúhú?' nghû myi lê lúhú?" ga tû taî kat akô.

³² Nghut kôlhang, Yesuq gi, Yhang lé lé záng sù lé myàng râ matú, ho lhing wú nyi ashî nghut ri. ³³ Haú hkûn, myiwe myhí haû gi, yhâng chyáng hkâsu dut lai lò bê hkyô lé sê é yanmai, Yesuq é hí má lé mù, gyuq nán é eq Yhang é hkyî wang má ngóm gop to luî, yhâng chyáng dut lai lò bê hkyô banshoq lé taî kyô ri. ³⁴ Haû mù, Yesuq gi, myiwe myhí haû lé, "Byizo ê, náng é lumjîng myit gi, nàng lé lhoq gê byi bê nghut ri; náng é nôhpyo ge byuq bê nghut ri; ngón za ló aq hkoi!" ga taî ri.

³⁵ Yesuq gi, dang ru taî nyi ashî hkûn, tarajong má up sù

Ya-irug é yhûm mai byù ram jé lé mù, "Nang é byizo gi, shi byuq bê; haî mù luî, haû sará lé lhoq hkyik nyi lê lúhú?" ga luî, lé taî kat akô.

³⁶ Yesuq gi, haú bang taî é dang lé gyô lhai pyám mù, "Hkâgyuq, za lumjîng aq." ga, haû tarajong má up sù lé taî kat ri.

³⁷ Hau htâng, Yhang gi, Petruq, Yakuq eq Yakuq é yhanggu Yohan pé mai lai luî, ó yuq lé le, Yhang htâng a cháng nhâng nghut ri. ³⁸ Yhangmoq, haû tarajong má up sù é yhûm má jé lé kô é hkûn, Yesuq gi, byu pé garu garín ga yón ngau gabyông nyi bum é lé, myàng ri. ³⁹ Yhang gi, yhúmhkaû shut wang ló mù, haú bang lé, "Haî mù, yón ngau gabyông nyi bum akô lúhú? Haû zoshâng gi, shi byuq é a nghut, yhup myhî tô é sheq ru nghut lê." ga taî ri. ⁴⁰ Nghut kôlhang, yhangmoq gi, Yhang lé wuizui kut pyám byi akô.

Yhang kúm gi, haú bang banshoq lé hkat htoq pyám mù, zoshâng é yhângnu yhângwa nhik eq Yhâng é chángzô pé lé za shui luî, zoshâng lé lheq tô é gok má wang e akô nghut ri. ⁴¹ Yesuq gi, myiwe zo hau é loq má zuî to mù, "Talihta ku-mi" (haû é lichyúm gi, "Myiwe zo ê, ngò, nang lé taî bá, toq aq." gâ é nghut lê.) ga taî ri. ⁴² Myiwe zo haû gi, haú hkûn jáng, toq luî, sô wún ri (yhang gi, asak raxe í zân bò bê sù nghut ri.). Yhangmoq gi, haú

sû dut é hkyô lé gyai yhang maú byuq bùm bekô nghut ri. ⁴³ Yhang gi, haú hkyô ó lé le a sé nhâng rá matú, yhangmoq lé taí hkúm kat luí, myiwe zo haú lé, zô jung byi tso rá matú le, yhangmoq lé taí ri.

6

Yhumsing Wà Má Myoq-dong A Wó É Hkyô

Mht 13:53-58; Luk 4:16-30

¹ Yesuq gi, haú jowò mai htoq e ló mù, Yhâng é yhum mau shut taú ló ri; Yhâng é chángzô pé le, Yhang eq rahá bo châng ló akô nghut ri.

² Bánno buinyì jé jáng, Yhang gi, tarajong má mhoqshit hi ló ri; wó gyô é bang myo myo gi, gyô maú byuq kôluí, "Byù shí yuq gi, haú pé lé hkâmá mhoq yu é là? Yhang wó yu é hpaqchyí byéng-yá gi, hkasú é wá nghut mù luí, laklaí kumlhá lé lháng kut lhê laq? ³ Shí yuq gi, Mariq é yhangzo, laksíma hpó nghut lhê, a nghut lhú? Yhang gi, Yakuq, Yose, Yudaq, Simun pé é yhangmang nghut lhê, a nghut lhú? Yhâng nhammó pé le, nga-nhúng eq rahá nghut nyi lhê, a nghut kó lhú?" ga luí, Yhang lé myit a ngón dut bùm bekô nghut ri.

⁴ Yesuq, yhangmoq lé taí é gi, "Myiqhtoi rayuq gi, yhum-sing é yhum mau, yhâng é buinùm ji-myi wuì eq yhumsing é yhúm má za, myoqdong a lhaq wó wú é nghut lhê." gâ ri. ⁵ Yhang gi, nò byù ram lé loq ke byi mù, lhoq gè byi é mai lai luí, gotú laklaí

kumlhá haí le, haú má a wó kut shit nghut ri. ⁶ Haú mù, Yesuq gi, yhangmoq lumjíng myit a bò kô é hkyô lé, maú nyi ri. Hau htâng, Yhang gi, Nazaret wà mai htoq ló mù, rawà htâng rawà má châng mhoqshit wún ri.

Lagyo Raxe Í Yuq Lé Nhang Htoq Kat É Hkyô

Mht 10:5-15; Luk 9:1-6

⁷ Yesuq gi, haú lagyo raxe í yuq lé wut yù mù, agè ashop é nat pé lé ùng rá a-tsam byi luí, í yuq yuq kut nhang htoq kat ri.

⁸ Yhang, yhangmoq lé châng pyíng kat é dang gi, "Hkyowui é matú má, dumbáng mai lai luí, zoshuq le, etap le, ngùn le, gotú haí le, hkâyü chùng kó; ⁹ hkyi-tsung kúm gi, tsùng chùng keq; nghut kôlhang, bu í dung hkâwut chùng kó. ¹⁰ Hká má nghut kôlhang, rayhúm yhúm má nungmoq wang bíng kô é nghut le gi, haú wá mai dum htoq ló é buinyì jé shoq, haú yhúm má za nyi nyi keq. ¹¹ Jowò rawò wò mâ é bang, nungmoq lé a lhom hap yù, a lhom gyo byi kô é nghut jáng, nungmoq lé yhangmoq a lhom hap yu é saksé dut sháng gaq, nungmoq é hkyiwa má dap é hpuilhau lé ko hkyô pyâm to mù, haú jowò mai htoq ló keq." gâ ri.

¹² Haú mù, yhangmoq gi, htoq e ló luí, myit lhíng rá é hkyô, byu pé lé hkô kyô akô. ¹³ Hau htoq agó, yhangmoq gi, nat gâng pé myo myo lé

hkat htoq pyám byi mù, no é bang myo myo lé le xú but byi luí, lhoq ge byí akô nghut ri.

Yohan, Ulhum Hpyit Huí é Hkyô

Mht 4:1-12; Luk 9:7-9

¹⁴ Yesuq é myìng hû lo é yanmai, Herut hkohkâm gi, Yesuq é hkyô lé wó gyo bê nghut ri. Byù ra-am gi, "Shí yuq gi, haù shi byuq bê Wui-myhup Sará Yohan dum dui toq lo é nghut lhê abe, hau é yanmai, yhang gi, hpungwup a-tsam haù pé lé wó kut é nghut ri." ga luí, taí bum akô nghut ri.

¹⁵ Ra-am gi, "Yhang gi, Eliyaq nghut ri." ga taí akô nghut ri.

Dum, ra-am taí kô é gi, "Yhang gi, hí hpyang lhê é myiqhtoí pé su, myiqhtoí rayuq nghut ri." gâ ri.

¹⁶ Herut kúm gi, haù lé wó gyo jáng, "Ngò, ulhum hpyit pyám byí é Yohan gi, shi é mai dum dui toq bu-nhung!" ga taí ri.

¹⁷ Herut gi, yhanggu Hpilip é yhangmyi Herudiaq lé hâng yu pyâm é hkyô é yanmai, Yohan lé chyup tuí yù nhâng mù, htóng hkyô pyám nhang wú é sù nghut lhê. ¹⁸ Hkâsu mù gâ le, Yohan gi, Herut lé, "Nàng, nunggu é yhangmyi lé hâng yu é gi, tarâ a wang é nghut lhê." ga luí, taí byí nyi é yanmai nghut ri. ¹⁹ Haù mù, Herudiaq gi, Yohan lé gyai a jú dut byuq luí, sat pyám naù kôhang, a wó sat dut nyi ri. ²⁰ Haí mù gâ le, Herut gi, Yohan, dingmán chyoiyúng é

sù nghut é lé sé mù luí, yhang lé gyuq hkungga mù, yhang lé búng nyi é yanmai nghut ri. Yhang gi, Yohan é dang pé lé wó gyo jáng, gyô nhúng nhâng byuq kôhang, yhang taí é dang pé lé ru gyô nau nyi ashí nghut ri.

²¹ Nghut kôhang, Herut gi, yhâng é hkû ladu hkyúm buinyi má, byù mó pé, gyezau pé, Galile mau suwún wui pé lé, ji yù mù zoshuq poí mó kut é yanmai, haù nyí gi, Herudiaq é matú, buinyi gè dut bê nghut ri. ²² Herudiaq é yhangzo byizo gi, wang lé lô mù, gó shit é hkûn, Herut eq yhâng é bíng pé gi, myit ngón bum akô nghut ri.

Haù mù, hkohkâm gi, myiwe zo haù lé, "Nàng ô nau é haí nghut kôle, dung aq, ngò nàng lé byi râ nghut lhê." ga, dakam é danggidiq byí ri. ²³ Hau htoq agó, yhang gi, myiwe zo haù lé, "Nàng dung é haí nghut kôle, ngò byi râ; ngá é mingdán rawuí gû lháng, byi râ nghut lhê." ga, dakam é danggidiq byí ri.

²⁴ Haù hkûn, myiwe zo haù gi, htoq ló mù, yhâng nu lé, "Haí dúng le gè râ laq?" ga myi jáng, yhângnu gi, "Wui-myhup Sará Yohan é ulhum dung aq." ga tû taí kat ri.

²⁵ Myiwe zo haù gi, radá dâm hân hân wang ló mù, hkohkâm lé, "Ahkuí yhang, Wui-myhup Sará Yohan é ulhum lé, bó má kat mù byi laq." ga, dúng tôngbán ri.

²⁶ Haù su ga jáng, hkohkâm gi, myit gyai yhang a ngón dut

byuq kôlhang, yhang dakam tô é danggidiq é yanmai le, bíng pê é myoqdong lé tê nau é yanmai le, myiwe zo haû taí é dang lé a kâm he pyám lo nghut ri. ²⁷ Haû mù, hkohkâm gi, zúng é gyezo rayuq lé, Yohan é ulhum é hpyit lô râ matú, radá dâm hkunmó hkyó mù nhang kat ri. Haû mù, haú yuq gi, htóng hkaû má ê luí, Yohan é ulhum lé, é hpyit mù, ²⁸ bó má kat luí, myiwe zo haú lé lo byí ri; myiwe zo haû gi, ulhum haû lé, yhângnú chyáng yu ló byí ri. ²⁹ Yohan é chángzô pé gi, haú hkyô lé wó gyo kôjáng, yhâng é mâng lé lé yû luí, lup má ló myhup pyám bekô nghut ri.

Byù Ngo Hkyîng Lé Byi Tsô É Hkyô

Mht 14:13-21; Luk 9:10-17; Yhn 6:1-14

³⁰ Lagyo pé gi, Yesuq chyáng dum jé zîng lò kômù, yhangmoq kut laí lo é hkyô pé eq mhoqshit bê hkyô pé banshoq, Yhang lé taí kyô akô nghut ri. ³¹ Hau htâng, byù myo myo gi, yhangmoq chyáng htoq htoq wàng wàng kut nyí kô é yanmai, yhangmoq gi, zang zo ahkyîng lháng a wó kô nghut ri. Haû mù, Yesuq gi, chángzô pé lé, "Nga-nhúng, tsím tsâm é jowò ralhum má ê mù, é nô yù sháng." ga taí ri.

³² Haû mù, yhangmoq gi, yhangmoq baú lhaí racham má ji mù, tsím tsâm é jowò

shut e ló akô nghut ri. ³³ Nghut kôlhang, yhangmoq e ló é lé châng myang é bang myo myo gi, yhangmoq lé wú sé kôluí, wà hkanmó mai hkyí hkyô châng din ê kômù, yhangmoq é hí má jé to lánng akô nghut ri. ³⁴ Yesuq gi, lhaí mai gyó dap ló é hkûn, byù moq mó nyi to lánng lé myàng jáng, yhangmoq gi, zúng sù a nyi é sau pé su dut kô é yanmai, yhangmoq lé wú shogyo luí, myo myo mhoqshit byí hi ló bê nghut ri.

³⁵ Bui gyum ló yâm jé jáng, Yhang é chángzô pé gi, lé lô kômù, Yhang lé, "Shí má gi, tsím tsâm é jowò nghut é htoq agó, bui le gyum ló bê; ³⁶ yhangmoq gi, awui ayám mâ é yhùm pé eq wà pé má, zoshuq ló ho wui zo kó sháng gaq, yhangmoq lé ló nhâng aq hkoí." ga taí akô nghut ri.

³⁷ Haú hkûn, Yhang gi, "Nungmoq, yhangmoq lé rajung jung byi tso keq." ga tú taí jáng, yhangmoq gi, "Shí myhó é bang zo râ matú, ngamoq gi, ê luí, denari* í sho èq muk é wui byi ra râ luq?" ga dum taú myí akô nghut ri.

³⁸ Nghut kôlhang, Yhang gi, "Nungmoq chyáng muk hkâ-myhó wó akô? Ê wú wú keq." ga myí ri. Haû mù, yhangmoq gi, myang hô jáng, "Muk ngo long eq ngozo í du wó lhê." ga, dum tú taí akô nghut ri.

³⁹ Hau htâng, Yesuq gi, banshoq bang lé ahpúng

* 6:37 Denari rachap gi, byù rayuq é ra-nyí lhê é zuihpau eq wui ri.

hpúng kut wàhu yò má zùng nhâng râ matú, Yhâng é chángzô pé lé tâi kat ri. ⁴⁰ Haù mù, shiwa byu pé gi, rashô shô kut le, ngo xê xê kut le, ahpúng hpúng zung tô bùm bekô nghut ri. ⁴¹ Yesuq gi, haù muk ngo long eq ngozo í du lé yù mù, mauhkúng shut tu wú to luí, jeju ban hkya-on jáng, muk lé hpê gam ri. Hau htâng, Yhang gi, byu pé hí má châng hkat to byi râ matú, Yhâng é chángzô pé lé byi ri. Ngozo í du lé le, Yhang yù mù, banshoq bang lé gàm byi ri. ⁴² Yhangmoq banshoq bang gi, zô gyi bùm bekô nghut ri. ⁴³ Hau htâng, haù chángzô pé gi, zô myhit tô é muk eq ngozo lé, raxe í mung byíng shoq wó guq tsíng yu ashí kó nghut ri. ⁴⁴ Haù hkùn, zô é bang gi, yuqgè wui baú lhang, byu du ngo hkyíng nghut ri.

Yesuq, Wui Htoq Má Sô É Hkyô

Mht 14:22-33; Yhn 6:15-21

⁴⁵ Yesuq gi, haù shiwa byu pé lé byo ló nhang nyi é hkùn jáng, Yhâng é chángzô pé lé lhai má wang ji nhâng mù, tù tap mâ é Bet-saida wà mó shut dap ló lánng nhang ri. ⁴⁶ Yhangmoq lé shi-kyâm kat é htâng, Yhang gi, kyúdung râ ga, Yhang baú bùm shut doq e ló bê nghut ri.

⁴⁷ Buigyum htâng, lhai gi, nhông gùng má jé tô é u lé, Yesuq gi, Yhang baú za myi htoq má nyi tô ashí nghut ri. ⁴⁸ Lài tau mut é yanmai, haù chángzô pé gi, lhai lhu wuìhkê nyi kô é lé, Yesuq

myang ri. Napsûn maubó zó sum hkyíng eq hkyuq hkyíng gyoro má, Yesuq gi, nhông htoq má so mù, yhangmoq shut e ló luí, yhangmoq é nàm mai lai ló rá dâ ri. ⁴⁹ Nghut kôlhang, yhangmoq gi, Yhang, nhông htoq má sô nyi é lé myang kôjáng, sobyô su ngàm kômù, kyek garú bum akô nghut ri. ⁵⁰ Hkâsu mù gâ le, yhangmoq banshoq bang gi, Yhang lé myàng kôluí, gyuq dàn kô é yanmai nghut ri.

Nghut kôlhang, Yhang, radá dâm yhangmoq lé dâng nyo kat é gi, "Hkâgyuq kó. Ngò ru nghut lhê; zim za nyi keq." gâ ri. ⁵¹ Hau htâng, Yhang gi, lhai htoq má yhangmoq eq rahá é doq ji jáng, lai gi, zim byuq bê nghut ri; haù mù, yhangmoq gi, gyai yhang mauhong byuq bùm bekô nghut ri. ⁵² Hkâsu mù gâ lé, yhangmoq gi, muk gam é laklai kumlhá eq séng luí a sê gyo kô é htoq agó, myitbun a bóng kô é yanmai nghut ri.

⁵³ Yhangmoq gi, gû dap ló kômù, Genesarat mau má jé wang lò jáng, lhai lé haù má ló shap tô akô nghut ri. ⁵⁴ Yhangmoq lhai mai gyó é hkùn jáng, byu pé gi, Yesuq lé lhom wú sê akô nghut ri. ⁵⁵ Haù mù, yhangmoq gi, haù mau ramau gón má din jón mù, nò bang lé taphkang mai waqluí, Yesuq nyi rí gâ é jowò hkanmó má, shuí lé lo bum akô nghut ri. ⁵⁶ Yesuq jé é wà hkanmó, myuq hkanmó, awui ayàm má é wà hkanmó pé má, yhangmoq gi, nò byu

lé gài pé má lé lھےq to kôluí, Yhâng é bushi htâng má za lháng, haú bang lé byi záng nhâng rã matú, Yhang lé dũng tũngbãn akô. Yhang lé záng é lhunglhâng bang gi, lhoq gẽ byi é huí akô nghut ri.

7

A Sanséng Dut Nhang É Hkyô Pé

Mht 15:1-20

¹ Haú Hparishe pé eq tarã sará pé ra-am gi, Yerusalem và mó mai jé lé lô kômù, Yesuq é nãm má lé zup zĩng bum akô. ² Haú hkũn, Yhâng é chángzô pé ra-am gi, htũngli dũng a chí pyãm é, a sanséng é loq èq zo shuq nyi kô é lé, yhangmoq myang akô nghut ri. ³ (Hparishe pé eq Yudaq byù banshoq bang gi, yhangmoq é íchyí íwã pé é htũngli lé chãng é bang nghut lhẽ mù luí, loq hí a chí é gi, haí le a zô wú kó nghut ri. ⁴ Yhangmoq gi, gài pé mai taú lò jáng le, gũng hí a chí pyãm é, zojung a zo kó nghut é htoq agó, góm pé, hkoq pé, gyi chõkon pé lé chí é htũngli gotú pé lé le, chãng akô nghut ri.)

⁵ Haú mù, Hparishe pé eq tarã sará pé gi, Yesuq lé, "Náng é chángzô pé gi, haí mù luí, íchyí íwã pé é htũngli lé a chãng e za, a sanséng é loq èq zo shuq nyi akô lھú?" ga myí akô.

⁶ Haú hkũn, Yesuq gi, yhangmoq lé, "Gegũn labyoq kut bang é, nungmoq eq séng

luí myiqhtoi Esai-aq htoí tô é dang mã,

'Byù shí bang gi, nhut htoq mai za Ngo lé hkunggã akô; yhangmoq é myit nhiklhũm gi, Ngò eq wẽ gãng nyi akô.

⁷ Yhangmoq gi, akôm má za, Ngo lé noqkuq nyi akô; hkãsu mù gã le, yhangmoq é mhoqshit hkyô pé gi, byù dũng mai mhoqshit é hkyô pé za nghut nyi ri.[✱]

ga kã tô é gi, tẽng ri. ⁸ Nungmoq gi, Garai Gasang tô tô é hkunmó lé tô pyãm luí, byu é htũngli lé za, myhik zing tô akô nghut ri." ga luí tũ taí ri.

⁹ Hau htâng, Yhang xoq taí é gi, "Nungmoq gi, yhumsing é htũngli lé za chãng rã matú, Garai Gasãng é hkunmó lé he-ngik pyãm é má, hpaqchyí gyaí bo akô nghut ri. ¹⁰ Hkãsu mù gã le, Mosheq gi, 'Nungmoq é ìnu íwã lé, hkungga keq.[✱] ga le, 'Ínu íwã lé, nhĩng é sũ ó yuq nghut kôle, sat pyãm é huí rã lhẽ.[✱] ga le, kã tô é nghut lhẽ. ¹¹ Nghut kõlhang, nungmoq taí é gi, byù rayuq yuq, yhumsing é yhãngnu yhãngwa lé byi ãng é zè lé, Korban za (Garai Gasang lé byi rã chyunghuq) nghut lhẽ gã nhang akô. ¹² Haú mù, haú yuq lé, yhãngnu yhãngwã é matú, haí a kut byi nhãng lô é dũng dut bê nghut ri. ¹³ Haú dũng mai, nungmoq gi, nungmoq chung gyó lo é htũngli é yanmai, Garai

Gasâng é mungdang lé he-
ngik pyâm akô; haû sù é hkyô
myo myo lé le, nungmoq kut
akô nghut ri." gâ ri.

¹⁴ Yesuq gi, shiwa byu pé
lé Yhâng chyáng dum wut yù
mù, taî é gi, "Nungmoq ban-
shoq bang, ngò taî é lé gyô yù
mù, sé lo keq; ¹⁵ Shinggan mai
wang lo é haí jung le, byù lé a
sanséng dut nhang é a nghut,
nghut kôlhang, byu é unghkaû
mai htoq lô é zè kúm gi, byù lé
a sanséng dut nhang lhê." gâ
ri. ¹⁶ (Gyo râ nohkyap dap é
sù gi, gyô yù sháng gaq.)" ga
taî ri.*

¹⁷ Yhang gi, byù moq mó
mai htoq lô mù, yhúmhkaû
má jé wang lô é hkûn, Yhâng
é chángzô pé gi, dangtú haû
eq séng luî, Yhang lé lhom
myî akô nghut ri. ¹⁸ Haû
mù, Yhang gi, yhangmoq lé,
"Nungmoq gi, haû-í yhang go
akô luq? Shinggan mai wang
lo é haí jung le, byù lé a
sanséng nhâng wó dut râ a
nghut é hkyô lé, a sé kó lú?
¹⁹ Hkâsu mù gâ lé, haû gi,
byu é myit nhikhum hkaû
má wang lô é a nghut e za,
wamdau hkaû má sheq wang
lô é nghut mù, shinggan shut
dum lhoq htoq pyâm é nghut
lhê." ga taî ri. (Yhang isu ga
taî é gi, zoshuq lhunglhang
sansêng lhê gá nau é dông
nghut ri.)

²⁰ Hau htoq agó, Yhang xoq
taî é gi, "Byù mai htoq lô é
haí jung le, byù lé a sanséng

nhâng wó dut é nghut lhê.
²¹ Hkâsu mù gâ lé, ahkaû mai
htoq lo é gi, byu pé é myit
mai htoq lô é nghut mù, agè
ashop é dông myit é hkyô pé,
ashop é dông gungsho zùm
yap é hkyô, hkaû é hkyô,
byù sat é hkyô, su-myi sulàng
lú hkyô, ²² myoqnoq é hkyô,
agè ashop é hkyô, mhaú zô é
hkyô, achag achyut zùm yap
lhúm é hkyô, manon é hkyô,
lumù gansang é hkyô, gum-
rong é hkyô eq ngha é hkyô
pé htoq lò é nghut lhê; ²³ Agè
ashop é hkyô shí pé banshoq
gi, byu é unghkaû mai htoq lo
é nghut mù, byù lé a sanséng
dut nhang ri." gâ ri.

*Tûngbaù Myiwe Myhí
Rayuq É Lumjîng Myit
Mht 15:21-28*

²⁴ Yesuq gi, haû jowò mai
htoq lô mù, Turuq eq Sidun
maukyo shut e lô luî, yhúm
ralhum má wang ê ri; Yhang
nyi é hkyô lé, ó yuq lé lé a sé
nhâng nau kôlhang, a wó zaú
to nghut ri. ²⁵ Haû mù, agè
ashop é nat wang júng tô é
myiwe zo rayuq é yhângnu gi,
Yhang nyi tô é hkyô lé wó gyô
é hkûn jáng, Yhâng chyáng jé
lé mù, Yhâng é hkyî wang má
lé paî gop to luî, ²⁶ yhang zô
chyáng mai nat gang lé hkat
htoq pyám byi râ matú, Yhang
lé dúng tôngbán ri. Myiwe
haû gi, Suru-Hpiniki mau má
é Grik byuhú nghut ri.

²⁷ Yesuq gi, "Zo wuî† hí zô
gyi kó sháng gaq; haî mù gâ

* **7:16** Bun zo shí gi, Chyúmlaiká ra-am má bo lhê, ra-am má a bò. † **7:27** Zo
wuî gâ é gi, Yudaq byu pé lé gâ é nghut lhê. ‡ **7:27** Hkuî pé gâ é gi, tûngbaù pé lé
gâ é nghut lhê.

le, zô wui chyáng mâ é zoshuq lé yù mù, hkuí pé[‡] lé byi tsô é jung a nghut." ga yhang lé taí ri.

²⁸ Haú hkûn, yhang gi, "Yhumsîng ê! Haú kúm nghut ri; nghut kôlhang, siboî ô mâ é hkuí lhang, zô wui é zô myhit shuq htâng lé, ge zo lhê a nghut l hú?" ga dum tû taí ri.

²⁹ Haú mù, Yesuq gi, yhang lé, "Nàng tû taí é dang hau é yanmai, ló lo aq hkoi; haú nat gang gi, nung zô chyáng mai htoq ló byuq bê nghut ri." ga taí kat ri.

³⁰ Myiwe myhí haú gi, yhûm má dum taú jé lo é hkûn, yhang zo chong htoq má leq to lánq é lé le, nat gang htoq byuq bê nghut é lé le, lo myang ri.

Nojit É Eq Dang A Hkyang É Sû Lé Lhoq Gê Byî É Hkyô

³¹ Yesuq gi, Turuq mau mai dum htoq ló mù, Sidun mai sô lai ló luí, Dekapoli mau hkaú dông lai byit mù, Galile nhông shut gyó jé ló ri. ³² Haú hkûn, byù ra-am gi, nojit é eq dang a hkyang é byù rayuq lé, Yhâng chyáng shuí lé lô kômù, haú yuq é ahtoq má loq ke byi râ matú, Yhang lé dúng tôngbán akô nghut ri.

³³ Yesuq gi, haú yuq lé baú za byù hpúng mai shuí htoq yù mù, yhâng é nohkyûng má loqnyhui htaú háng byi luí, sôkan byé tik yù mù, haú yuq é shô má htau byî ri. ³⁴ Hau htâng, Yhang gi, mauhkûng shut tu wú mù, soq mó shê luí, "Ephahta!" (Lichyúm gi,

"Bóng aq hkoi!") ga luí, haú yuq lé taí kat ri. ³⁵ Haú hkûn, haú yuq é nohkyap le bóng byuq luí, shô le nyhôm byuq mù, balang hkyâng hkyâng dang wó nyô bê nghut ri.

³⁶ Yesuq gi, haú hkyô ó lé le a taí kyo râ matú, yhangmoq lé hkúm kôlhang, yhangmoq gi, je hkúm le, je taí pyo akô nghut ri. ³⁷ Byu pé gi, gyai yhang mauhong byuq bùm kôluí, "Yhang gi, haí lé le, ge é dông chyat kut ri; nojit sù lé, wó gyo shoq, dang a hkyâng sù lé, wó nyô shoq, kut byi bê nghut ri." ga luí, taí bum akô nghut ri.

8

Byù Myi Hkyîng Lé Byi Tsô É Hkyô

Mht 15:32-39

¹ Haú yoq má, gotû byù moq mó gi, lé zîng bum akô; haú bang zoshuq langhpyut to kô é yanmai, Yesuq gi, Yhâng é chángzô pé lé wut yù mù, ² "Ngò, shí bang lé wú shogyo ri; yhangmoq gi, Ngò eq rahá nghut nyi é sum nyí bò bê, haí le a myàng zo kó nghut ri. ³ Yhangmoq chyáng mâ é ra-am gi, mau we mai lé é bang nghut é yanmai, yhangmoq lé, zòmut gû yhûm shut nhang kat é nghut le gi, hkyolat má mutyut yut é ló hui kó râ nghut lhê." ga taí ri.

⁴ Haú hkûn, Yhâng é chángzô pé gi, Yhang lé, "Ísu é yoso má nhîng, shí myhò bang lé luq shoq byi tso râ zoshuq gi, hkâmá é yù râ l hú?" ga taí akô.

⁵ Yesuq gi, "Nungmoq, muk hkâ-myhó long wó akô lúhú?" ga taû myi jáng, yhangmoq gi, "Nyhit long." ga, dum tû taí akô nghut ri.

⁶ Haû mù, Yhang gi, byù hpûng lé myigùng htoq má zùng nhang to luí, muk haû nyhit long lé yù mù, jeju ban hkya-on jáng, myhik hpé luí, haû bang lé gàm byi rá matú, Yhâng é chángzô pé lé byi kat ri; haû mù, yhangmoq gi, haû bang lé gàm byi akô nghut ri. ⁷ Yhangmoq gi, ngo-nú zo ratsuí le wó akô nghut ri; haû mù, Yhang gi, ngozo haû pê é matú jeju hkya-on luí, chángzô pé lé dum gàm byi nhang ri. ⁸ Yuq hkangmó zô gyi bùm kô é htâng má, haû chángzô pé gi, amyit ahtâng lé nyhit mung byíng shoq wó guq tsíng yu ashî kó nghut ri. ⁹ Zô é bang gi, byù myi hkyíng kô nghut ri; Yesuq gi, haû bang lé, nhang kat luí, ¹⁰ Yhâng é chángzô pé eq rahá, lhaí má wang ji mù, Dalamanuhta mau má ê jé akô nghut ri.

¹¹ Hparishe pé gi, lé mù, Yesuq eq dang htíng htíng lhùm akô; hau htoq agó, yhangmoq gi, mauhkûng mâ é kumlhá lé dúng é dông, Yhang lé chyam wú akô nghut ri. ¹² Yesuq gi, myit nò-kying kying luí, yhangmoq lé taí é gi, "Haí mù luí, shí ipyat lhê é byu pé gi, limik kumlhá dúng akô lúhú? Ngò teng za taí kôlé, shí ipyat mâ é bang

lé, hai kumlhá le tûn shit rá a nghut." gâ ri. ¹³ Hau htâng, Yhang gi, yhangmoq lé pyâm to mù, lhaí má dum taû wang ló luí, tû tap shut gû dap e ló bê nghut ri.

Hparishe Pé Eq Herut É Múnchi
Mht 16:5-12

¹⁴ Haû chángzô pé gi, muk yu chûng rá lé tô-myhî pyám kôluí, lhaí hkaû má muk ralong za ru wó akô nghut ri. ¹⁵ Yesuq gi, yhangmoq lé, "Nungmoq gi, Hparishe pé eq Herut é múnchi* lé, sidiq luí, koi pyâm nyi keq." ga taí ri.

¹⁶ Haû hkûn, yhangmoq gi, "Nga-nhûng chyáng muk a bo é yanmai, haû su ga taí é nghut ri." ga luí, rayuq eq rayuq taí lhùm bum akô nghut ri.

¹⁷ Haû su ga taí lhùm nyi kô é lé Yesuq sé jáng, yhangmoq lé, "Nungmoq gi, muk a bo é hkyô lé, haí mù taí lhùm nyi akô lúhú? Ahkuí jé shoq, nungmoq gi, a byu-myàng, a sê gyo shí kó lúhú? Nungmoq é myit nhikhum gi, ru htan nyi ashî kó lúhú? ¹⁸ Myoq dap to kôluí nhîng, a myàng kó lúhú? Nohkyap dap to kôluí nhîng, a wó gyo kó lúhú? ¹⁹ Ngò, muk ngo long lé myhik hpé mù, byù ngo hkyíng lé byi tsô é hkûn, zô myhit shuq htâng lé, nungmoq hkâ-myhó mung wó guq tsíng yu é lé, bun ashî kó lúhú?" ga myi jáng, yhangmoq gi, "Raxe í mung." ga tû taí akô.

* **8:15** Shí má taí é múnchi gi, Hparishe pé eq Herut é mhoqshit hkyô lé, lhoq pyo é lé gâ lhê.

20 Dum, Yesuq gi, "Ngò, muk nyhit long lé myhik hpé mù, byù myi hkyîng lé byi tsò é hkûn, zô myhit tô é ajap azo lé, nungmoq hkâ-myhó mung wó guq tsîng yù kô é lhú?" ga myi jáng, yhangmoq gi, "Nyhit mung." ga dum tû taî akô.

21 Haú hkûn, Yesuq gi, "Haú nghut le nhîng, ahkuí le, a sê gyo shi kó lhú?" ga, yhangmoq lé myî ri.

Myoqjit Sû Rayuq Lé Lhoq Gê Byí É Hkyô

22 Yhangmoq gi, Bet-saida và mó má jé lò kô é hkûn, byù ra-am gi, myoqjit é byù rayuq lé, Yesuq chyáng shuí lé lô mù, haú yuq lé záng byi râ matú, dúng tôngbán akô. 23 Yesuq gi, myoqjit sù haú yuq é loq lé zui mù, và shinggan shut shuí htoq ló luí, yhâng é myoq má sôkan byé tik byi mù, loq ke byi luí, "Nàng, rajung jung lé myang ri lhú?" ga myî kat ri.

24 Haú jáng, yhang gi, tu wú kat luí, "Byu pé gi, sîkgâm su dut luí, hkyô sô wún é lé, ngò myang ri." ga taî ri.

25 Hau htâng, Yesuq gi, haú yuq é myoq má Yhâng é loq dum ke byí ri; haú hkûn, haú yuq é myoq gi, bóng lô mù, ge byuq luí, haí lé le san za myàng bê nghut ri. 26 Yesuq gi, haú yuq lé, "Wà hkaú má hkâwang ló lo." ga taí luí, yhâng é yhûm shut ló nhang kat bê nghut ri.

Hkrisduq Ga, Petruq Yín Yu É Hkyô

Mht 16:13-20; Luk 9:18-21

27 Yesuq eq Yhâng é chángzô pé gi, Kesare-Hpilipi và mó awui ayàm mâ é và pé shut e ló é hkûn, hkyô má, Yesuq gi, chángzô pé lé, "Byu pé gi, ngo lé ó yuq nghut lhê ga, taí akô lhú?" ga myî ri.

28 Haú hkûn, yhangmoq gi, "Ra-am gi, Wui-myhup Sará Yohan ga, góbang gi, Eliyaq ga, dum ra-am gi, myiqhtoî rayuq yuq nghut ri ga taí akô." ga, Yhang lé tû taí akô.

29 Yesuq gi, "Nungmoq gi, ngo lé ó yuq nghut lhê nghu akô lhú?" ga, yhangmoq lé xoq myi jáng, Petruq gi, "Nàng gi, Hkrisduq† nghut ri." ga tû taí ri.

30 Yesuq gi, haú hkyô ó lé le a taí kyo râ matú, yhangmoq lé taí hkúm ri.

Byu Yhangzo Gi, Sat Pyâm É Hui Luí, Dum Dui Toq Râ Hkyô

Mht 16:21-28; Luk 9:22-27

31 Hau htâng, Yhang gi, yhangmoq lé mhoqshit é má, "Haú Byu Yhangzo gi, zing-rí é myo myo hui zo luí, suwún wuî, hkyangjong agyi pé, tarâ sará pé èq he-ngik pyâm é hui mù, sat pyâm é hui ra râ nghut lhê; nghut kôlhang, sum nyí nghû râ buinyi má, dum dui toq râ nghut lhê." gâ ri.

32 Yesuq gi, haú hkyô lé san za dut shoq taí nyi é yanmai, Petruq gi, Yhang lé rahkyam

† 8:29 Grik dong Hkrisduq gâ é gi, xù but hui Sù gâ é lichyúm nghut mù, Hebre dong "Mesaia" gâ é eq rajung za nghut lhê.

shut shuí htoq yû mù, Yhang lé tân ri.

³³ Nghut kôlhang, Yesuq gi, Yhâng é chángzô pé lé lhing wú kat mù, Petruq lé, "Tsadán nàng, Ngá chyáng mai hpâng aq! Nàng gi, Garai Gasang eq sêng é hkyô lé a myit e za, byù eq sêng é hkyô lé za myit é sù nghut ri." ga tân kat ri.

³⁴ Hau htâng, Yhang gi, byù moq mó eq Yhâng é chángzô pé lé wut yù mù, taí é gi, "Ngá htâng cháng naù sù ó yuq nghut kôle, yhumsing gùng yhumsing he-ngik pyám mù, yhumsing é tapzîng lé waq chûng luí, cháng ra râ nghut lhê. ³⁵ Hkâsu mù gâ le, yhumsing é asak lé hkyi yù naù sù ó yuq nghut kôle, asak sum râ nghut lhê; nghut kôlhang, Ngá é yanmai le, haù gabú danglù é yanmai le, yhumsing é asak sùm pyâm é sù kúm gi, asak hkyi yu é hui râ nghut lhê. ³⁶ Byù gi, mingkan gón lé wó sing to kôlhang, yhumsing é asak woi-nyí sùm byuq é nghut le gi, yhâng é matú, hai akyû bò râ l hú? ³⁷ Byù gi, yhumsing é asak woi-nyí lé, hai èq wó htaí yù râ l hú? ³⁸ Yubak mara myô é eq sumyi sulàng shut é ipyat shí má, Ngò eq Ngá é dang lé hoq pyâm é sù ó yuq lé le, haù Byu Yhangzo gi, Yhâng Wâ é hpungwup shingkang bo é èq, haù chyoyúng maumang lagyô pé eq rahá jé lé é hkûn, hoq pyám râ nghut lhê."* gâ ri.

9

¹ Hau htâng, Yesuq gi, yhangmoq lé, "Ngò, nungmoq lé teng za taí kôlé, shí má yap tô é bang ra-am gi, Garai Gasâng é mingdán, hpungwup a-tsâm èq jé lé lo é lé, a myang é za shí kó râ a nghut." ga taí ri.

Yesuq É Ihpyô Isâm Htaí Lo É Hkyô

Mht 17:1-13; Luk 9:28-36

² Hkyuq nyí laí htâng má, Yesuq gi, Petruq lé le, Yakuq eq Yohan lé le, shuí chûng mù, yhangmoq baú myhang é bùm ralhum má doq ló akò; haù hkûn, yhangmoq é myoq hí tê má, Yesuq é ihpyô isâm htaí lo ri. ³ Hau htoq agó, Yhâng é mebu gi, wik wik duq hpyu zan lo ri; myidàm htoq má, ó yuq le haù-í hpyú shoq a wó xaù hpyu wú é nghut lhê. ⁴ Eliyaq eq Mosheq gi, yhangmoq é hí má htoq shit mù, Yesuq eq dáng nyo lhum nyi akò.

⁵ Haù mù, Petruq gi, Yesuq lé, "Rabai è, shí jowò má nganhúng nyi le ge ri; haù mù, Náng é matú ralhum, Mosheq é matú ralhum, Eliyaq é matú ralhum kut, ngamoq lé, zúm sùm lhum saí nhâng laq." ga taí ri. ⁶ Hkâsu mù gâ le, yhangmoq gi, gyai yhang gyuq dan bùm kô é yanmai, Petruq gi, haí taí râ le a sé mù, haù su gâ é nghut ri.

⁷ Hau htâng, mhut htoq lô luí, yhangmoq lé htup zing lô mù, mhut hkaù mai htoq lo é

* 8:38 Yer 3:8; Ezk 23:37; Hos 2:2-10

htê gi, "Shí yuq gi, Ngò chyt-dap é Ngá Zo nghut lê; Yhâng é dang gyo keq." gâ ri.

⁸ Háu hkûn jáng, chángzô pé gi, lhinghkyuq má wú kat le, Yesuq za yhangmoq eq rahá nghut nyi é mai lai luí, ó lé le, a myàng lo kó nghut ri.

⁹ Yhangmoq, bùm mai taù gyó lô kô é hkûn, Yesuq gi, háu Byu Yhangzo shi é mai a dum dui toq toq gi, yhangmoq myang é hkyô lé, ó lé le a taí kyo rá matú taí hkûm tô ri. ¹⁰ Chángzô pé gi, dang háu lé myit má kat to kôluí, "Shi é mai dum dui toq rá." gâ é lichyúm lé, rayuq eq rayuq myí lhùm bum akô nghut ri.

¹¹ Hau htâng, yhangmoq gi, "Eliyaq hí lé ra rá nghut lê ga, tarâ sará pé haí mù taí kô é lúhú?" ga, Yesuq lé myí akô.

¹² Háu hkûn, Yesuq gi, "Eliyaq hí jé lé é gi, teng bê nghut luí, lhunglhang lé dum lajâng tô é nghut ri. Nghut kôlhang, háu Byu Yhangzo gi, myo myo hpuzo luí, hengik pyâm é huí ra nghut lê ga le, Chyúmdang má kâ to ashí, a nghut kó lúhú? ¹³ Ngò, nungmoq lé taí kôlé, Eliyaq gi, jé lé bê nghut mù, yhang eq séng luí Chyúmdang má kâ tô é eq rajung za, yhangmoq gi, ô nau é dông banshoq kut bekô nghut ri." ga tû taí ri.

Nat Dap É Yuqgè Zo Rayuq Lé Lhoq Gê Byí É Hkyô

Mht 17:14-20, 22-23; Luk 9:37-45

¹⁴ Yhangmoq gi, chángzô pé chyáng dum taù jé lô kô é hkûn, háu bâng é lhinghkyuq

má byù moq mó zîng lé é lé le, tarâ sará pé, háu bang eq dang htíng htíng lhùm nyi kô é lé le, myang akô. ¹⁵ Háu má nyi tô é lhunglhang bang gi, Yesuq lé myang kat é eq, maù byuq kôluí, din ê mù, ê shi-kyâm akô nghut ri.

¹⁶ Háu hkûn, Yesuq gi, yhangmoq lé, "Nungmoq gi, yhangmoq eq haí lé dang htíng htíng lhùm nyi akô lúhú?" ga myí ri.

¹⁷ Byù hpúng hkaù má é rayuq tû taí kat é gi, "Sará ê! Nhut jit nhang é nat wang júng tô é ngâ é yuqzo lé, Náng chyáng shuí lé lo lhê.

¹⁸ Nat háu gi, yhâng chyáng wàng hkangmó, yhang lé myí htoq má lhoq leqbat nhang ri; háu mù, yhang gi, nhut mai guttsû htoq lhê, zuí kyik kyik lhê, langhtan lo lhê, dut ri; hau é yanmai, nat háu lé hkat htoq pyám byi rá matú, Náng é chángzô pé lé dúng wú kôlhang, yhangmoq a wó dut kó nghut ri." gâ ri.

¹⁹ Háu hkûn, Yesuq gi, "Lumjîng myit a bo é amyû pé ê, Ngò gi, hkâ-myháng jé shoq nungmoq eq rahá nyi mù, wó jân nyi rá lúhú? Yuqgè zo háu lé, Ngá chyáng shuí lé lô keq." ga taí kat ri.

²⁰ Háu mù, yhangmoq gi, yuqgè zo háu lé shuí lé lo akô; nat háu gi, Yesuq lé myang kat é eq yhang, yuqgè zo háu lé langhtân nhang ri; yuqgè zo háu gi, myigùng má lêng leq luí goleng leng mù, nhut mai tsû-myup htoq nyi ri.

21 Haú hkûn, Yesuq gi, yhangwa lé, "Yhang, isu dut é hkâ-myháng myáng bê lú?" ga myi jáng, yhang wa gi, "Zoshâng hkûn mai nghut bê. 22 Nat haú gi, yhang lé lhoq sat pyám naú mù, myi má le, wui má le, anum num lêng wàng nhang wú bê nghut lhê; nghut kôlhang, Nang, rajung jung wó kut byi é nghut le gi, ngá hpe lé shogyo yù laq, garúm yù laq." ga tũ tai ri.

23 Yesuq gi, "'Nang, wó kut byi é nghut le gi,' nghũ, haí mù tai lhê lú? Lumjín myit bò su é matú gi, haí le wó dut lhê." ga, yhang lé tai ri.

24 Haú zôshang é yhangwa gi, radá dâm, "Ngò lumjín lhê; nghut kôlhang, ngá é lumjín myit gi, shaú ashî nghut é yanmai garúm yù laq." ga tai garú ri.

25 Yesuq gi, byù hpúng din zîng lé lô kô é lé, myàng jáng, haú agè ashop é nat lé, "Nojit, nhutjit nhang é nat é! Ngò, nang lé hkunmó hkyô lhê, yhang chyáng mai htoq ló aq; hkâ-nhám le, yhang chyáng hkâdum wàng lo." ga tân kat ri.

26 Haú hkûn, nat haú gi, garu mù, zoshâng haú lé wum kat langhtân nhang luí, htoq ló byuq bê. Zoshâng haú gi, shî mâng gùng su dut byuq é yanmai, byù myo myo gi, "Yhang shî bê nghut ri." ga tai akô. 27 Nghut kôlhang, Yesuq gi, zôshang é loq má zui luí, tu toq kat ri; haú mù, zoshâng gi, yap to bê nghut ri.

28 Yesuq, yhúmhaú má wang ló é htâng, Yhâng é

chángzô pé gi, "Ngamoq gi, haí mù, nat haú lé a wó hkat htoq é lú?" ga, tsik za Yhang lé myi akô.

29 Yesuq gi, "Haú jung nat lé gi, kyúdung é đông za a nghut jáng, wó hkat htoq rá a nghut." ga, yhangmoq lé tũ tai ri.

30 Yhangmoq gi, haú jowò mai htoq ló mù, Galile mau mai lai ló akô; nghut kôlhang, Yesuq gi, ó lé le a sé nhang naú nghut ri. 31 Haí mù gâ le, Yhang gi, "Haú Byu Yhangzo gi, byu pé é loq má ap pyâm é hui rá nghut lhê; haú bang gi, Yhang lé sat pyám kó rá nghut lhê; nghut kôlhang, Yhang gi, shi é htâng sum nyi nghũ rá nyi má, dum dui toq rá nghut lhê." ga, Yhâng é chángzô pé lé mhoqshit byi nyi é yanmai nghut ri. 32 Yhâng é chángzô pé gi, dang haú lé a sê gyo kôlhang, Yhâng chyáng a wám myi kó nghut ri.

Kô Dik Sû Gi, Ó Yuq Nghut Lhê Lú?

Mht 18:1-5; Luk 9:46-48

33 Yhangmoq gi, Kaperna-um wà má jé e akô nghut ri. Yesuq gi, yhúmhaú má nyi tô é hkûn, chángzô pé lé, "Hkyô má, nungmoq, hai hkyô lé dang chyin chyin lhum kô é lú?" ga myi ri. 34 Nghut kôlhang, yhangmoq gi, zim za nyi tô akô; hkâsu mù gâ le, ko dik sû gi, ó yuq nghut lhê nghũ é hkyô lé, hkyolat má, yhangmoq dang chyin chyin lhum kô é yanmai nghut ri.

35 Yesuq gi, zùng mù, haú chángzo raxe í yuq lé, wut

yù luí, "Kô dik naû sù ó yuq nghut kôle, tiq dik sù eq banshoq bâng é dui-nhâng zoshâng dut ra râ nghut lhê." ga taí ri.

³⁶ Hau htâng, Yhang gi, zoshâng rayuq lé shuí yù mù, yhangmoq é gung gûng má shap to luí, dum bún yù mù, yhangmoq lé taí é gi, ³⁷ "Shí sù é zoshâng lé, Ngá é myìng mai hap yu é sù ó yuq nghut kôle, Ngo lé hap yu é sù nghut bê; Ngo lé hap yu é sù ó yuq nghut kôle, Ngo lé za hap yu é a nghut, Ngo lé nhang kat é Sù lé hap yu é le nghut lhê." gâ ri.

Nga-nhúng Lé Gyè A Kut É Sù Gi, Nga-nhúng É Hkyam Shut Nghut Lhê Gâ É Hkyô

Luk 9:49-50

³⁸ Haú hkún, Yohan gi, "Sarâ ê! Náng é myìng lang luí, nat gâng pé lé hkat pyám byí wún é byù rayuq lé, ngamoq myang ri. Yhang gi, nga-nhúng chyáng a lòm sù nghut é yanmai, yhang lé ngamoq hkâm pyám é nghut lhê." ga taí ri.

³⁹ Yesuq kúm gi, "Yhang lé hkâhkúm kó; Ngá myìng lé lang luí, laklaí kumlhá kut é sù gi, razup za má, Ngò eq séng luí, a ge é hkyô pé lé taí râ a nghut; ⁴⁰ Hkâsu mù gâ le, nga-nhúng lé gyè a kut é sù gi, nga-nhúng é hkyam shut nghut lhê. ⁴¹ Ngò, nungmoq lé teng za taí kôlé, nungmoq gi, Hkrisduq eq séng é bang nghut lhê gâ é yanmai, ngá é

myìng lé lang luí, nungmoq lé, uchyam ragóm byi huq é sù ó yuq nghut kôle, zuihpau lé hkyak myang hkam yù râ za nghut lhê.

Mara Shut Nhang É Hkyô Mht 18:6-9; Luk 17:1-2

⁴² Ngo lé lumjìng é zoshâng wui mà é rayuq lé, mara kut shut nhang é sù gi, yhâng é lingzing má luqluí long mó tuí hut byi luí, wuimau má é dú hkyô pyám é huí é nghut lé gi, yhang é matú je gè râ nghut lhê. ⁴³ Náng é loq èq, nang lé mara kut shut nhang é nghut le gi, haú lé hpyit dú pyám aq; loq í loq dap luí, hkâ-nhám le, myiduq a dat shum é ngaraí ming wàng râ htoq má, loq raloq eq za ahtum abyuq é asak wó râ shut wàng le gi, náng é matú je ge ri. ⁴⁴ (Haú ngaraí ming gi, 'yhangmoq lé hkê nyi é luq le a shí, myiduq le a shúm' é jowò nghut lhê.)* ⁴⁵ Náng é hkyi èq, nang lé mara kut shut nhang é nghut le gi, haú lé hpyit dú pyám aq; hkyi í hkyi dap luí, hkâ-nhám le, myiduq a dat shum é ngaraí ming má dú hkyô pyám é huí râ htoq má, hkyi rahkyi za dap luí, ahtum abyuq é asak wó râ shut wang le gi, náng é matú je ge ri. ⁴⁶ (Haú ngaraí ming gi, 'yhangmoq lé hkê nyi é luq le a shí, myiduq le a shúm' é jowò nghut lhê.) ⁴⁷ Náng é myoqqí èq, nang lé mara kut shut nhang é nghut le gi, haú lé lap choq pyám

* **9:44** Bun zo 44, 46, gi, Chyúmlaikaí myo myo má a bo é nghut lhê.

aq; myoqjí í jí dap gû, ngaraî ming má dú hkyó pyâm é hui râ htoq má, myoq rají eq za, Garai Gasâng é mingdán má wang le gi, náng é matú je ge ri.

48 (Haû ngaraî ming gi, 'yhangmoq lé hkê nyi é luq le a shî, myiduq lé a shûm' é jowò nghut lhê.)*

49 Hkâsu mù gâ le, hkungga sho lé xo kat luí lhoq sansêng é su, myi gi, yuq hkanmó lé lhoq sansêng râ nghut lhê.*

50 Xo gi, ge lhê. Nghut kôhang, xomân kân byuq jáng gi, hkâsu kut dum wó lhoq ngam yù râ lhú? Nungmoq gi, xo su ngam nyi mù, rayuq eq rayuq nguingón nyi keq." ga taí ri.

10

*Myi, Làng Gâng É Hkyô
Mht 19:1-12; Luk 16:18*

1 Hau htâng má, Yesuq gi, Kaperna-um mai htoq ló mù, Yuda mau mâ é maukyo má é jé luí, Yodan làng tú tap má dap ló bê nghut ri; byù myo myo gi, Yhâng chyáng dum zîng lé lô kôluí, Yesuq gi, Yhang lhaq kut nyi é eq rajung za, haú bang lé mhoqshit byi ri.

2 Hparishe pé ra-am gi, lé jé kômù, "Byù rayuq, yhumsing é yhangmyi lé lhoq kâng pyâm le, tarâ wang lhê lhú?" ga myi é dong, Yhang lé chyam wú akô.

3 Yesuq gi, "Mosheq gi, nungmoq lé, hkâsu ga

hkunmó hkyó tô é lhú?" ga taù myi ri.

4 Haú hkûn, yhangmoq gi, "Yuggè rayuq gi, lhoq kang laiká ká mù, yhangmyi lé wó nhang pyâm lhê ga, Mosheq, ahkáng byi tô ri." ga tú taí akô.

5 Yesuq dum tú taí é gi, "Nungmoq é myit nhikhum htân kô é yanmai, Mosheq gi, tarâ haú lé kê tô é nghut lhê.

6 Nghut kôhang, mau htoq xâng hkun lé, Garai Gasang gi, 'yuggè eq myiwe lé hpan é nghut lhê.'* 7 'Hau é yanmai, yuggè gi, yhumsing înu îwâ chyáng mai htoq luí, yhangmyi eq rahá rading ralhum za kut nyi mù,

8 yhangnhik gi, gungsho ralhum za dut byuq kó râ nghut lhê.* Haú mù luí, yhangnhik gi, í yuq a nghut lo é za, rayuq za dut bê nghut ri. 9 Haú mù luí, Garai Gasang lhoq tsûm tô é lé, byù gi, a lhoq kang sháng gaq." gâ ri.

10 Yhumhkaú má, yhangmoq nyi tô é hkûn lé, chángzô pé gi, haú hkyô eq séng luí, Yhang lé dum saí myi akô. 11 Haú hkûn, Yhang gi, "Yhumsing é yhangmyi lé kâng pyám mù, myiwe gotú dum hâng yu é sù ó yuq nghut kôle, su-myi lú é sù dut bê nghut mù, yhangmyi lé shut é sù nghut bê. 12 Myiwe rayuq le, yhumsing é yhanglâng lé kâng pyám mù, yuggè góyuq eq dum hâng é nghut le gi, sulàng lú é hkyô lé kut bê nghut ri." ga tú taí ri.

* 9:48 Esai 66:24 * 9:49 Nhong 2:13

* 10:6 Apûn 1:27 * 10:8 Apûn 2:24

Zoshâng Wuì Eq Yesuq É Hkyô

Mht 19:13-15; Luk 18:15-17

¹³ Byu pé gi, zoshâng wuì lé Yesuq záng byi sháng gaq ga, Yesuq chyáng shuí lé lo akô; nghut kôlhang, chángzô pé gi, yhangmoq lé lhom tân hkûm akô nghut ri. ¹⁴ Haù lé Yesuq myàng jáng, Yhang gi, wú nhik-yo naù luí, "Haù zoshâng wuì lé, Ngá chyáng lé nhâng keq; yhangmoq lé hkâhkûm zing to kó; hkâsu mù gâ le, Garai Gasâng é mingdán gi, haù su é bâng é mingdán ru nghut lhê. ¹⁵ Ngò, nungmoq lé teng za taí kôlé, ó yuq nghut kôle, Garai Gasâng é mingdán lé, zoshâng su kut a lhom hap yu é nghut le gi, mingdán haù má wó wâng râ a nghut." ga yhangmoq lé taí ri. ¹⁶ Hau htâng, Yesuq gi, zoshâng wuì lé bún yû mù, yhangmoq ah-toq má loq ke luí, shimân byí ri.

Sùt Wó É Zorâm Rayuq É Hkyô

Mht 19:16-30; Luk 18:18-30

¹⁷ Yesuq gi, hkyô dum so xoq e ló é hkûn, byù rayuq gi, din lé lô mù, Yhâng é hí má hkyihput htug luí, "Ge é Sará ê, ahtum abyuq é asak wó yû râ matú, ngò haì kut ra râ lú?" ga myí ri.

¹⁸ Haù mù, Yesuq gi, "Haì mù, Ngo lé ge é Sará nghu lhê lú? Garai Gasang mai lai luí, ge é ó yuq le a nyì. ¹⁹ Jep

e tarâ má, 'Byù hkâsat, su-myi sulàng hkâlú, hkâhkau, a teng a mán é saksé hkâhkám, hkâmô zo, nángnu nángwa lé hkungga aq!*" ga bo tô é lé, nàng sê lhê." ga tù taí ri.

²⁰ Haù hkûn, haù yuq gi, "Sará ê, haù pé banshoq lé, ngò, zoshâng hkûn mai cháng bê nghut lhê." ga taí ri.

²¹ Yesuq gi, haù yuq lé wú tsuq to mù, yhang lé chyt-dap luí, taí é gi, "Nàng kut râ rajung râ tô ashî; ló mù, nàng wó miwó lé ûng pyám luí, myùng bang lé byí pyám aq; haù jáng, nàng, mauhkûng htoq má sutzè wó râ nghut lhê; haù mù, Ngá htâng lé cháng aq." gâ ri.

²² Haù yuq gi, dang haù lé wó gyo jáng, sutzè gyai wó sù nghut é yanmai, myoqdong shum byuq mù, gyai yhang myit a ngón é èq ló byuq bê nghut ri.

²³ Yesuq gi, lhinghkyuq byu wú mù, Yhâng é chángzô pé lé, "Sutzè wó bang gi, Garai Gasâng é mingdán má wàng râ matú, haù-í yhang wuì ri-nhung!" ga taí ri.

²⁴ Chángzô pé gi, Yhang taí é dâng é yanmai, mauhong bum akô nghut ri. Nghut kôlhang, Yesuq dum xoq taí é gi, "Zo wuì ê, Garai Gasâng é mingdán má wàng râ matú, haù-í yhang wuì ri-nhung!"

²⁵ Sutzè wó sù rayuq, Garai Gasâng é mingdán má wó wâng râ htoq, gola-uq radu âpno mai wó wang lai râ gi, je lui râ nghut lhê." gâ taí ri.

* **10:19** Htoq Ló 20:12-16

²⁶ Haú hkûn, chángzô pé gi, je riyhang maú byuq kômù, rayuq eq rayuq, "Haú su ru nghut le gi, ó yuq za hkyi yu é hui râ nghut lhê lúhú?" ga, taí lhum bum akô nghut ri.

²⁷ Haú hkûn, Yesuq gi, yhangmoq lé wú kat mù, "Haú hkyô lé, byù mai gi, wó kut râ a nghut; nghut kôlhang, Garai Gasang gi, wó dut lhê; hkâsu mù gâ le, Garai Gasang gi, lhunglhang lé wó kut é Sù nghut lhê." ga taí ri.

²⁸ Haú hkûn, Petruq gi, Yhang lé, "Ngamoq gi, wó é gû lhunglhang lé tô pyâm to luí, Náng htâng cháng bê nghut lhê." ga taí ri.

²⁹ Haú mù, Yesuq tû taí é gi, "Ngò, nungmoq lé teng za taí kôlé, Ngá é yanmai le, gabú danglu é yanmai le, yhumsing é yhûm, gumang gu-nhá, înu îwa, zo dù wuì eq yò pé lé tô pyâm tô é sù ó yuq nghut kôle, ³⁰ shí pyat lhê é yhûm pé, gumang gu-nhá wuì, înu pé, zo dù wuì eq yò pé lé, rashô tú wó hkam yù luí, zing-rî é hkyô pé lé le hui kó râ nghut é htoq agó, htang pyat má le, ahtum abyuq é asak wó yù râ nghut lhê. ³¹ Nghut kôlhang, hí nghut nyi é bang myo myo gi, htâng gyó byuq kó râ nghut mù, htâng gyó nyi bang yuq gi, hí bekô râ nghut lhê." gâ ri.

Yesuq, Yhang Shî Râ Hkyô Lé Dum Taí É Hkyô

Mht 20:17-19; Luk 18:31-34

³² Yhangmoq gi, Yerusalem wà mó shut doq ló nyí kô é u lé, Yesuq gi, yhangmoq é hí

má sô tô ri; haú hkûn, htâng má sô é bang gi, gyuq nyi bùm kô é u lé, haú chángzô pé gi, maú byuq bum akô nghut ri; Yesuq gi, haú chángzo raxe í yuq lé gotû kut dum wut yù mù, Yhâng chyáng dut lò râ hkyô, yhangmoq lé taí kyô é gi, ³³ "Wú keq, nga-nhúng gi, Yerusalem wà mó shut doq ló nyi lhê; haú Byu Yhangzo gi, hkyangjong agyi pé eq tarâ sará pê é loq má ap byí pyâm é hui râ nghut lhê; haú bang gi, Yhang lé, shî rá mara byi luí, tûngbaù pê é loq má ap byí pyám kó râ nghut lhê. ³⁴ Haú bang gi, Yhang lé, wuizui kut pyâm é, sôkan byé gyûn é, nhuq bat é kut yù mù, sat pyám kó râ nghut lhê. Hau htâng sum nyi má, Yhang dum dui toq lô râ nghut lhê." gâ ri.

Yakuq eq Yohan nhik dung é hkyô

Mht 20:20-28

³⁵ Hau htâng má, Zebedi é yhangzo Yakuq eq Yohan nhik gi, Yesuq chyáng lé kômù, "Sarâ ê, ngá-nhik dúng é gû banshoq, Nàng kut byi râ lé, ngá-nhik ô nau ri." ga taí akô.

³⁶ Haú hkûn, Yhang gi, "Ngò, nungnhik lé haí kut byi râ ô nau akô lúhú?" ga myí ri.

³⁷ Yhangnhik gi, "Náng é hpungwup shingkang hkaú má, ngá-nhik tâng lé, Náng é loqyò hkyam má rayuq, loqpaí hkyam má rayuq kut, zùng nhâng laq." ga tû taí akô.

³⁸ Nghut kôlhang, Yesuq gi, "Nungnhik haí dúng nyi é hí

lé, nungnhik a sé kó nghut ri. Ngò shuq râ góm* lé, nungnhik wó shuq kó râ lúhú? Ngò hkam yù râ baptisma lé, nungnhik wó hkam yù kó râ lúhú?" ga yhangnhik lé tâ ri.

³⁹ Haú hkûn, yhangnhik gi, "Nga-nhik wó dut lhê." ga tâ taí kôjáng, Yesuq gi, "Ngò shuq râ góm lé, nungnhik shuq kó râ nghut lhê; ngò hkam yù râ baptisma lé le, nungnhik hkam yù kó râ nghut lhê. ⁴⁰ Nghut kôlhang, Ngá é loqyò, loqpaí hkyam má zùng râ ahkáng lé gi, Ngò byîjung a nghut. Jowò haú pé gi, hen to byî é hui bâng matú za nghut lhê." ga yhangnhik lé tâ ri.

⁴¹ Haú su gâ é hkyô lé, haú gotû chángzo raxê yuq wó gyo kôjáng, yhangmoq gi, Yakuq eq Yohan nhik lé nhikyô akô nghut ri. ⁴² Yesuq gi, yhangmoq banshoq bang lé wut tsîng yù luí, "Tûngbaù pé lé uphkan é ga bang gi, tûngbaù pé lé up zô nyî kô é hkyô lé le, haú eq rajung za, yhangmoq é ming up suwún wuî le, yhumsing é ahkáng ayá lé chûng mù, up zô nyî kô é hkyô lé le, nungmoq sê lhê. ⁴³ Nghut kôlhang, nungmoq chyáng gi, haú su a dut kó sháng gaq, nungmoq má, byù mó dut naù sù ó yuq nghut kôle, nungmoq é dui-nhâng zoshâng dut ra râ nghut lhê. ⁴⁴ Hau htoq agó, nungmoq má ushuq dut naù sù ó yuq nghut kôle, banshoq

bâng é jùn dut ra râ nghut lhê. ⁴⁵ Hkâsu mù gâ le, haú Byu Yhangzo lháng gi, dojaú é lé hkam yù râ matú jé lé é a nghut e za, dojaú râ matú eq byù myo myô é matú, shîhtaí gunglik hkungga dông, Yhâng é asak lé byi pyám râ matú sheq, jé lé é ru nghut lhê." ga, yhangmoq lé tâ ri.

Myoqjit Sû Barateme, Myoq Dum Myang É Hkyô

Mht 20:29-34; Luk 18:35-43

⁴⁶ Hau htâng, yhangmoq gi, Yerihko wà má jé ló akô nghut ri. Yesuq eq Yhâng é chángzô pé gi, byù moq mó eq rahá, wà mai htoq ló nyî kô é hkûn, Barateme (Teme é yhangzo) gâ é myoqjit sû rayuq gi, hkyô yàm má dung zô zung tô ri. ⁴⁷ Yhang gi, Nazaret wà byù Yesuq laí ló é lé wó gyo jáng, "Dawiq é Yhangzo Yesuq ê, ngo lé shogyo yù laq ô!" ga garû kat ri.

⁴⁸ Haú mù, byù myo myo gi, zim za nyî râ matú yhang lé tân hkûm akô; nghut kôlhang, yhang gi, "Dawiq é Yhangzo ê, ngo lé shogyo yù laq ô!" ga, je riyhang garû kat ri.

⁴⁹ Haú mù luí, Yesuq gi, yap nô kat mù, "Yhang lé ji kat keq." ga taí jáng, yhangmoq gi, "Myit ngón aq hkoi; Yhang, nàng lé ji nyî ri; toq aq." ga myoqjit sû haú lé tâ akô. ⁵⁰ Haú hkûn, haú yuq gi, yhâng é buhîng lé hkyut pyám mù, byam chyù luí, Yesuq chyáng lé jé ri.

* **10:38** Góm eq baptisma gâ é gi, jamjau hui râ eq shî râ lé, taí nau é nghut lhê.

⁵¹ Yesuq gi, yhang lé, "Ngò, nang lé haì kut byi râ ô nau ri lú?" ga myi jáng, yhang gi, "Sarâ ê, ngò myoq myàng nau ri." ga tû taì ri.

⁵² Yesuq gi, "Ló aq hkoi, náng é lumjìng myit gi, nàng lé lhoq gè byi bê nghut ri." ga taì kat é hkûn jáng, yhang gi, myoq wó myàng mù, Yesuq e ló é hkyô shut cháng e ló bê nghut ri.

11

Yesuq, Yerusalem Wà Mó Má Wang Ló É Hkyô

Mht 21:1-11; Luk 19:28-40; Yhn 12:12-19

¹ Yesuq eq Yhâng é chángzô pé gi, Yerusalem wà mó eq chyáng lo nyi kô é hkûn, Tsan-lun Bùm mâ é Bethpage wà eq Behtani wà má jé ló kôjáng, Yesuq gi, Yhâng é chángzo í yuq lé, ² "Nungnhik, hí mâ é wà má ê keq; wà haú má wang é hkûn jáng, ó le a jî wú shî é logúng zo tuí to lánng é lé, ê myàng kó râ nghut lhê; haú lé hpyi yù mù, Ngá chyáng she lò keq. ³ Byù rayuq yuq mai, 'Haì mù, haú su kut nyi akô lú?' ga nungnhik lé lhom myi jáng, 'Shí du lé, haú Yhumsíng râ ri ga, razup má dum taú dé byi râ nghut lhê.' nghû tû taì keq." ga pyîng luí, nhang kat ri.

⁴ Haú nhik gi, e ló mù, hkyô mó yâm mâ é hkumdong nàm má tuí tô é logúng zo radu lé, ê myàng kôluí, haú lé tuí

hpyi nyi akô. ⁵ Haú hkûn, haú má yap tô é bang ra-am gi, "Haì mù, logúng tuí hpyi nyi akô lú?" ga myi akô. ⁶ Haú jáng, yhangnhik gi, Yesuq py-íng kat é eq rajung za taì kyo kôjáng, yhangmoq gi, she ló râ ahkáng byi kat akô nghut ri. ⁷ Yhangnhik, logúng zo haú lé Yesuq chyáng she jé lo é hkûn, logúng hau é gùng htoq má, yhangmoq é buhíng pé buí jáng, hau é ahtoq má, Yesuq doq jî ri. ⁸ Byù myo myo gi, yhangmoq é buhíng pé lé, hkyô má hkyut hkang byi akô; ra-am gi, yò pé má zân yu é mhandíng lé hkang byi akô nghut ri. ⁹ Hí má so bang eq htàng má châng é bang gi,

"Hosana!*

Haú Yhumsíng é myìng mai jé lé lô Sú gi, hkungsô wó nyi sháng gaq ô!

¹⁰ Jé lé lô râ nghut é, nganhûng é îwa Dawiq é mingdán gi, hkungsô wó nyi sháng gaq ô!

Htoq tsáng myhâng má hosana nghut sháng gaq ô!"*

ga luí, taì garû bum akô nghut ri.

¹¹ Yesuq gi, Yerusalem wà mó má jé mù, noqkuq yhùm má wang é luí, lhíngkhyuq mâ é jung hkangmó lé wú ri; nghut kôlhang, buí gyum ló bê nghut é yanmai, Yhâng é chángzo raxe í yuq eq rahá, Behtani wà shut htoq e ló bekô nghut ri.

* **11:9** Hebre dang má, hosana gâ é gi, "ahkuí hkyi yù laq" gâ é nghut lhê. Nghut kôlhang, bun zo 9, 10 má gi, hkya-on dang dòng chung é nghut lhê. ☆ **11:10** Hkya-on 118:25-26

*Maihpáng Gâm Ashi A Zui
Râ Matú Tai É Hkyô
Mht 21:18-19*

¹² Hau htang nyí, yhangmoq, Behtani wà mai htoq ló kô é hkûn, Yesuq gi, zo mut bê nghut ri. ¹³ Yhang gi, ahaq wúm é maihpáng gâm ragàm lé, we we mai byu-myang kat jáng, agàm haú má ashí zúì lhê laq ga ê jé wú le, ahaq mai lai luí, haí le a myàng nghut ri. Haí mù gâ le, maihpáng-shi zui yâm a nghut é yanmai nghut ri. ¹⁴ Haú mù, Yesuq gi, shigâm haú lé, "Ahkuí mai gi, náng chyáng mâ é ashí, ó yuq le a myàng zo lo kó sháng gaq." ga tai ri. Yhâng é chángzô pé gi, haú su ga tai é dang lé wó gyô yu akô nghut ri.

*Yesuq, Noqkuq Yhûm Lé
Lhoq Sansêng Pyâm É Hkyô
Mht 21:12-17; Luk 19:45-48; Yhn 2:13-22*

¹⁵ Yhangmoq, Yerusalem wà mó má jé é hkûn, Yesuq gi, noqkuq yhûm má wang ê mù, haú mâ é zè ung zè wuì kut nyi é bang lé, hkat htoq pyâm luí, ngùn htaí zo bâng é siboí pé eq hpûngkyui ung zo bâng é tanghkuq pé lé tu mhuy pyâm byí ri. ¹⁶ Hau htoq agó, Yhang gi, ó yuq lé nghut kôle, ung zê lé noqkuq yhûm mai a waq lai nhâng kut pyâm ri. ¹⁷ Yesuq, yhangmoq lé mhoqshit é gi, "'Ngá yhûm gi, byù myû lunglhang bâng é matú, kyûdung yhûm ga râ nghut lhê.'"

ga kê tô é a nghut kó lúh? Nghut kôhang, nungmoq gi, 'danyaq hkyûng' kut pyâm bekô nghut ri." gâ ri.*

¹⁸ Hkyangjong agyi pé eq tarâ sará pé gi, haú lé wó gyo kômù, Yhang lé hkâsu kut wó sat pyâm râ hkyô ho nyi akô; nghut kôhang, shiwa byu pé gi, Yhang mhoqshit é hkyô má, myit zìng zuq bùm kô é yanmai, yhangmoq gi, Yhang lé gyuq bum akô nghut ri.

¹⁹ Myinhâng jé jáng, Yesuq eq Yhâng é chángzô pé gi, wà hkaú mai htoq ló bekô nghut ri.

*Maihpáng Gâm Nyhuí Shi
Byuq É Hkyô*

Mht 21:20-22

²⁰ Htang napkyó, yhangmoq sô lai ló le, maihpáng gâm gi, amyit mai yhang nyhuí kyuq shi byuq é lé myang akô. ²¹ Petruq gi, myit bûn kat luí, "Rabai ê, wú aq! Nàng nhing pyâm é maihpáng gâm gi, nyhuí shi byuq bê nghut ri." ga luí, Yesuq lé tai ri.

²² Haú hkûn, Yesuq gi, "Garai Gasang lé lumjìng keq.

²³ Ngò, nungmoq lé teng za tai kôlé, ó yuq nghut kôle, i-myit má úng-âng é hkyô a bo é za, yhumsing tai é hkyô gi, dut lò râ nghut lhê ga lumjìng kô é nghut le gi, bùm shí lé, 'Htot mù, wuimau má ló gyó wâng aq.' ga tai le lhang, haú hkyô dut byi râ nghut lhê.

²⁴ Haú mù luí, Ngò, nungmoq lé tai kôlé, nungmoq haí dúng le le wó yû râ nghut lhê ngû lumjìng kô é nghut

le gi, wó yû kó râ za nghut lhê. ²⁵ Mauhkûng htoq mâ é nungmoq é Îwa gi, nungmoq é mara lé hkyut pyám byi sháng gaq, nungmoq gi, kyûdûng yap tô é hkûn lé, rayuq yuq, nungmoq lé shut é mara bo é nghut jáng, mara hkyut pyám byi keq; ²⁶ (Nghut kôlhang, nungmoq mai mara a hkyut pyám byi é nghut le gi, mauhkûng htoq mâ é nungmoq é Îwa le, nungmoq é mara lé hkyut pyám byi râ a nghut.)" ga tû taí ri.†

Yesuq É Ahko Ahkáng Lé Myî Chyam É Hkyô

Mht 21:23-27; Luk 20:1-8

²⁷ Yhangmoq, Yerusalem wà mó má dum jé mù, Yesuq gi, noqkuq yhûm wàng hkaû má sô yông wún é u lé, hkyangjong agyi pé, tarâ sará pé eq suwún wú gi, Yhâng chyáng lé jé kômù, ²⁸ "Hai ahko ahkâng èq, Nàng, shí pé lé kut nyi lhê lú? Haû su kut râ ahko ahkáng, Nang lé ó yuq byi é lú?" ga myî akô.

²⁹ Haû jáng, Yesuq gi, "Ngò le, nungmoq lé rajung myî wú kôlé, tû taí wú keq; haû hkûn, hai ahko ahkâng èq, Ngò, shí pé kut é hkyô lé taí kyo râ nghut lhê. ³⁰ Yohan byi é baptisma gi, mauhkûng mai lú? A nghut jáng, byu chyáng mai lú? Taí wú keq!" ga taû myî kat ri.

³¹ Haû hkûn, yhangmoq chô m hpyê lhum kô é gi, "Mauhkûng mai nghut lhê' nghû nga-nhúng taí jáng le,

'Haû nghut le nhîng, haî mù, yhang lé a lumjîng kô é lú?' ga râ nghut; ³² 'Byu chyáng mai nghut lhê.' nghû jáng le..." gâ ri. (Yohan gi, myiqhtoi rayuq gè gè nghut lhê ga, lhunglhang bang lumjîng bûm kô é yanmai, yhangmoq gi, haû byu pé lé gyuq bum akô nghut ri.)

³³ Haû mù, yhangmoq gi, Yesuq lé, "Ngamoq a sé." ga tû taí akô.

Haû hkûn, Yesuq gi, "Haû jáng, Ngò le, hai ahko ahkâng èq shí pé kut é hkyô lé, nungmoq lé a taí kyo." ga, yhangmoq lé taí ri.

12

Tsibiyiq Hkyâm Saí Bang Lé Dangtú Yu É Hkyô

Mht 21:33-46; Luk 20:9-19

¹ Hau htâng, Yesuq, dangtú dông yhangmoq lé taí é gi, "Byù rayuq gi, tsibiyiq hkyâm rahkyam saí to mù, lînghkyuq kyâm to luí, tsibiyiq wîng pyik htoq râ dongkong dû to mù, machya ralhûm saí tô ri. Hau htâng, yhang gi, hkyâm haû lé, hkyâm saí zo bâng chyáng ngho byi to mù, gó ming shut e ló byuq bê nghut ri. ² Kyôshu yoq jé jáng, yhang gi, yhang yù âng é tsibiyiq shi ê yû râ matú, dui-nhâng zoshâng rayuq lé, hkyâm saí zo bâng chyáng nhang kat ri. ³ Nghut kôlhang, haû bang gi, haû yuq lé lhom chyup bat luí, loq kôm taû nhang kat akô. ⁴ Haû mù, yhang gi, gotú dui-nhâng

† 11:26 Bun zo shî gi, Chyúmlaika ra-am má za bo lhê.

zoshâng rayuq lé, yhangmoq chyáng dum nhang kat ri; yhangmoq gi, haú yuq lé le, ulhum má lhom bat cheq byi kôluí, hoq lhoq hpû kat akô nghut ri. ⁵ Hau htâng, rayuq lé dum nhang kat jáng, haú yuq lé gi, lhom sat pyâm akô; Yhang gi, góbang myo myo lé le, yhangmoq chyáng nhang kat ashî nghut ri; yhangmoq kúm gi, ra-am lé lhom bat, ra-am lé lhom sat pyám, kut akô nghut ri.

⁶ Ló htáng má, yhang gi, yhang chyitdap é zo lé nhang kat râ za ru nghut alô; haú mù, yhang gi, 'Ngá zo lé gi, yhangmoq lhom hkungga kó râ nghut lhê.' ga, yhangzo lé nhang kat ri.

⁷ Nghut kôlhang, haú bang gi, 'Shí yuq gi, silí wunlí sing yù râ sù nghut lhê; lé keq, yhang lé sat pyám sháng, haú jáng sheq, silí wunlí pé lé nganhúng wó yù râ nghut lhê.' ga rayuq eq rayuq taí lhúm bum akô. ⁸ Haú mù, yhang lé chyup yù luí, sat pyám mù, hkyâm shinggan shut dú htoq pyâm akô nghut ri.

⁹ Haú jáng, tsibiyiq hkyâm yhumsîng gi, yhangmoq lé hkâsu kut râ lú? Yhang gi, é mù, haú hkyâm saí zo bang lé sat pyám luí, hkyâm haú lé, góbang lé htot ngho byi pyám râ nghut lhê. ¹⁰ Chyúmdang má,

'Yhúm saí bâng èq hkyin htoq pyâm é luqgok gi, htungchyûn mâ é

ahkyak dik é luqgok dut bê.

¹¹ Shí hkyô gi, haú Yhumsîng kut é nghut luí, nganhúng é myoq hí má mauhpo dut bê nghut ri.' ga bò tô é lé, nungmoq a nghap wú kó lú?"[☆]

gâ ri.

¹² Hau htâng, yhangmoq gi, dangtú haú, yhangmoq lé lhoq ang luí taí é hkyô lé, sé kô é yanmai, Yhang lé chyup yù râ matú hkyô ho nyi akô. Nghut kôlhang, yhangmoq gi, byù moq mó lé gyuq kô é yanmai, Yhang lé nyhi pyâm to luí, htoq ló byuq bekô nghut ri.

Kehtaq Lé Kang Kat Byi É Hkyô*

Mht 22:15-22; Luk 20:20-26

¹³ Hau htâng má, yhangmoq gi, Yesuq é dang má mara hô luí Yhang lé chyup yù râ matú, Hparishe pé ra-am eq Herut é byu pé ra-am lé, Yesuq chyáng nhang kat akô. ¹⁴ Haú bang gi, Yhâng chyáng lé jé kômù, "Sarâ ê, Nàng gi, tengmán sù nghut é lé, ngamoq sê lhê. Nàng gi, ó haí ga râ lé le haí su a ngàm sù nghut é yanmai, ó yuq é myoqdong lé le a tê byi é za, Garai Gasâng é hkyô lé, tengmán é đông mhoqshit é sù nghut ri. Haú mù, Kehtaq lé kang kat byi le gi, ge lhê lú? ¹⁵ Ngamoq kat ra râ lú? A kat ra râ lú?" ga Yhang lé taí akô.

☆ 12:11 Hkya-on 118:22-23

* 12:12 Kehtaq gâ é gi, "hkoséng" gâ é nghut lhê.

Yesuq kúm gi, yhangmoq, gegùn labyoq kut nyî kô é lé sé mù, "Nungmoq gi, haî mù, Ngo lé lé chyam wú akô lhú? Denari ngùn rachap yu lé keq, ngò wú wú bá." ga taî kat ri. ¹⁶ Haú hkûn, yhangmoq yu jé lô jáng, Yhang gi, "Shí má, ó yuq é alhô eq masat laiká dap tô ri lhú?" ga myî ri.

Yhangmoq gi, "Kehta q é nghut ri." ga tú taî akô.

¹⁷ Haú mù, Yesuq gi, yhangmoq lé, "Kehta q é lé gi, Kehta q lé byi keq; Garai Gasâng é lé gi, Garai Gasang lé byi keq." ga taî jáng, yhangmoq gi, maú byuq bùm bekô nghut ri.

Saduke Pé, Yesuq Lé Myî Chyam É Hkyô

Mht 22:23-33; Luk 20:27-40

¹⁸ Haú dum dui toq hkyô a joq gâ é Saduke pé gi, Yesuq chyáng lé jé kômù, dangmyi lé myî akô. ¹⁹ Yhangmoq myi kô é gi, "Sarâ ê, myiwe wó é byù rayuq gi, zo dù a dap é za shi byuq é nghut jáng, yhanggu gi, yhangmang é awut ashín xoq byi râ matú, yhâng rhat lé chui gon ra râ nghut lhê ga, nga-nhúng lé, Mosheq kê to byî ri. ²⁰ Hí hpyang lé, gumang nhiktâng wuî nyhit yuq nyi akô. Lagám yuq gi, myiwe yù luí, zo dù a dap é za shi lô byuq bê nghut ri. ²¹ Lanong yuq gi, yhangmang mó é chui lé gon mù, zo dù a dap é za shi lô byuq bê. Lalaq yuq le, haú eq rajung za

dut byuq bê nghut ri. ²² Haú nhiktâng wuî nyhit yuq gi, zo dù a dap é chyat shi lô byuq bùm bekô nghut ri. Htâng má, myiwe myhí haú le châng shi lô byuq bê nghut ri. ²³ Haú mù luí, haú dum dui toq é buinyî má, myiwe myhí haú gi, hká yuq é yhangmyi nghut râ lhú? Hkâsu mù gâ le, yhang gi, haú nyhit yuq é yhangmyi dut wú bê sù nghut ri." gâ akô.

²⁴ Yesuq gi, yhangmoq lé, "Nungmoq hkyô nghoq é gi, Chyúmdang eq Garai Gasâng é wum-o a-tsam lé, a sé kô é yanmai nghut lhê, a nghut kó lhú? ²⁵ Haú shi byuq bê bang dum dui toq é hkûn gi, myi byi myi yû hkyô joq lo râ a nghut; yhangmoq gi, mauhkûng htoq mâ é mau-mang lagyô pé su dut byuq kó râ nghut lhê. ²⁶ Shi é mai dum lhoq dui toq é hkyô eq séng luí, Mosheq kê tô é laiká má lháng, haú nyé duq nyi é mhanpúng mai, Garai Gasang gi, yhang lé, 'Ngò gi, Abraham é Garai Gasang, Ísak é Garai Gasang, Yakup é Garai Gasang nghut lhê.'* ga kê tô é lé, nungmoq a nghap wú kó lhú? ²⁷ Garai Gasang gi, shi bê bâng é Garai Gasang a nghut, dui nyi bâng é Garai Gasang sheq ru nghut lhê. Nungmoq gi, shut dik bekô nghut ri." ga taî ri.

Ahkyak Dik É Jep É Tarâ

Mht 22:34-40; Luk 10:25-28

²⁸ Tarâ sarâ rayuq gi, lé lô mù, yhangmoq taî hting lhum

nyì kô é lé, lé wó gyô ri. Yhang gi, haú bang lé, Yesuq rago tû taí nyi é lé myàng jáng, Yesuq lé, "Jep é tarâ banshoq má, hká lhum gi, ahkyak dik lhê lhú?" ga myí ri.

²⁹ Haú jáng, Yesuq gi, "Ahkyak dik é jep é tarâ gi, 'Israelaq byu pé ê, gyo wú keq! Nga-nhông é Yhumsîng Garai Gasang za, Garai Gasang nghut lhê.

³⁰ Haú Yhumsîng náng é Garai Gasang lé, náng é myit nhiklhum banshoq, náng é asak woi-nyí lhum gón, náng myit é hkyô banshoq, náng é wum-o banshoq èq, chyitdap râ lhê.^{*} gâ é nghut lhê.

³¹ Hau htang lhum gi, 'Náng gûng lé náng chyitdap é su, náng é chyangnâm mâ é bang lé le chyitdap aq.^{*} gâ é nghut lhê. Shí í lhum htoq kô é tarâ gotû a joq lo." ga yhangmoq lé tû taí ri.

³² Haú hkûn, tarâ sará haú yuq gi, "Gyo naú bê, Sará ê! Garai Gasang rayuq za nghut lhê, gotû a nyi lo ga náng taí é gi, têng ri. ³³ Garai Gasang lé, náng é myit nhiklhum banshoq èq le, náng é sê gyo é nyan banshoq èq le, náng é wum-o banshoq èq le, chyitdap râ lhê gâ é eq, náng gùng lé náng chyitdap é su, náng é chyangnâm mâ é bang lé le chyitdap râ lhê gâ é gi, myi nyhé hkungga eq gotû hkungga pé banshoq htoq má, je ahkyak lhê." ga taí ri.

³⁴ Yesuq gi, yhang hpaqchyí

bo é dông tû taí nyi é lé myàng jáng, "Náng gi, Garai Gasang é mingdán eq a we lo nghut ri." ga yhang lé taí kat ri. Haú hkûn mai gi, ó yuq le, Yhang lé dangmyi a wám myi lo kó nghut ri.

Hkrisduq Gi, Ó Yuq É Yhangzo?

Mht 22:41-46; Luk 20:41-44

³⁵ Yesuq, noqkuq yhûm má mhoqshit nyi é hkûn lé taí é dang gi, "Haí mù, haú tarâ sará pé gi, Hkrisduq lé, Dawiq é yhangzo za nghut lhê gâ akô lhú? ³⁶ Dawiq gi, Chyoiyúng Woi-nyí èq taí nhang é má,

'Haú Yhumsîng Garai gi, ngá é Yhumsîng lé, "Ngò, náng é gumlau gye pé lé,

náng é hkyiwa ô má tô pyâm é hkyíng jé shoq, Ngá é loqyo hkyam shut zung nyi shi aq." ga taí ri.^{*}

³⁷ Haú mù, Dawiq yhang lháng, Hkrisduq lé, Yhumsîng gâ é nghut le gi, yhangzo za hkâsu ge nghut râ lhú?" gâ ri.

Byù hpông mó gi, Yhâng é dang lé, gabú myit èq gyô nyi bum akô nghut ri.

³⁸ Yesuq gi, mhoqshit uchyang taí é má, "Tarâ sará pé lé sidiq nyi keq. Yhangmoq gi, réng é buhîng wut chûng mù, sô yông wún luí, gài pé má lhom shi-kyâm yù râ lé le, ³⁹ tarajong pé mâ é ahkyak dik é zùng jang pé

eq poi pé mâ é réng é zùng jowò pé má myang zùng râ lé le, ô nau nyi bum akô. ⁴⁰ Yhangmoq gi, chuimó pé é yhûm-yò pé lé hpyoq zo hpyoq shuq kôluí, kyû hîng hîng dúng shit mhaú é bang nghut akô. Haú su é bang gi, dam byí é je riyhang hui zo kó râ nghut lhê." gâ ri.

Chuimó Myhí Kat É Alu Ngùn

Luk 21:1-4

⁴¹ Yesuq gi, alu sidek nàm má zung to mù, noqkuq yhûm mâ é alu sidek haú má, byù moq mó ngùn kat nyi é lé wú nyi ri. Sùt wó bang myo myo gi, ngùn ga-myhó myhó kat bum akô. ⁴² Haú hkûn, myung é chuimó myhí rayuq gi, lé mù, gyi htingchap ngùn zo í chap lé kat ri.

⁴³ Yesuq gi, Yhâng é chángzô pé lé wut yù mù, "Ngò, nungmoq lé teng za tái kôlé, shí myung é chuimó myhí gi, góbang banshoq htoq má je myo kat bê nghut ri. ⁴⁴ Haú góbang banshoq gi, yhumsîng agùn agó wó é mâ é lé, lé kat akô; yhang kúm gi, myùng sù nghut kôle, yhâng é asak lé baú râ ngùn banshoq lé, kat bê nghut ri." ga tái ri.

13

Ló Htâng Buinyi Má Dut Lò Râ Hkyô

Mht 24:1-21, 29-35; Luk 21:5-33

¹ Yesuq, noqkuq yhûm mai htoq lô é hkûn, Yhâng é chángzo rayuq gi, "Sarâ ê, wú

aq; hkâ-í ko é luqgok pé! Hkâ-í hkik é yhûm pé!" ga Yhang lé tái kat ri.

² Haú hkûn, Yesuq gi, "Nàng, yhûm mó shí pé lé myàng lhê a nghut lhú? Luqgok shí pé gi, rachâm htoq racham lhang a kê lhum loshoq, hpyoq hpyi pyâm é hui râ nghut lhê." gâ tái ri.

³ Yesuq gi, Tsanlun Bùm má, noqkuq yhûm shut hù mù zung tô é hkûn, Petruq, Yakuq, Yohan eq Andre pé gi, Yhâng chyáng lé jé kômù, ⁴ "Haú hkyô pé gi, hkâ-nhám dut lò râ lhú? Haú dut lò râ hkûn, hkasû é kumlhá htoq lô râ nghut lhê lhú? Ngamoq lé tái kyô wú laq." ga Yhang lé baú myí akô nghut ri.

⁵ Haú mù, Yesuq gi, yhangmoq lé, "Nungmoq lé, ó yuq èq lé a wó shuí nghoq sháng gaq, sidiq nyi keq. ⁶ Hkâsu mù gâ le, 'Ngò gi, haú yuq* nghut lhê.' ga, Ngá myîng lé lhang é byù myo myo pô htoq lô mù, byù myo myo lé shuí nghoq kó râ nghut lhê. ⁷ Nungmoq gi, majan dut nyi é hkyô eq majan eq sêng é danglám pé lé, wó gyo kôjáng, hkâgyuq dàn kó. Haú hkyô pé gi, dut lò râ za nghut lhê; nghut kôlhang, ló htâng é buinyi gi, a nghut shi. ⁸ Byù ra-myû eq ra-myû, mingdán ralhum eq ralhum majan zân lhûm lò kó râ nghut lhê. Jowò myo myo má, layàng nún é, mutmó gyó é pé dut lò râ nghut lhê. Haú pé gi, wuîhke jamjau hkyo é apûn awang za ru nghut ashî.

* 13:6 Haú yuq gâ é gi, Hkrisduq lé gâ é nghut lhê.

⁹ Nungmoq gùng nungmoq sidiq nyi keq. Hkâsu mù gâ le, yhangmoq gi, nungmoq lé, tarâ rûng pé má ê ap pyám kó râ nghut é htoq agó, tara-jong pé má nungmoq lé nhuq bat kó râ nghut lhê. Hau htoq agó, nungmoq gi, Ngá mying é yanmai, mauzau wui eq hkohkam pé é hí má, saksé dông yap ra kó râ nghut lhê. ¹⁰ Haú gabú danglù gi, amyû banshoq lé hí hko kyo ra râ nghut lhê. ¹¹ Nungmoq gi, chyup yu é hui luí, jep hui é hkûn, haí taí râ lé, hkâ-mytit chiq kó. Ahkyíng jé jáng, nang lé myit htoq lô nhang é dong za taí aq; hkâsu mù gâ le, dang haú pé gi, nungmoq taí é a nghut, haú Chyoiyúng Woi-nyí èq taí nhang é ru nghut lhê.

¹² Nhiktâng gi, nhiktâng yhangchang, íwa gi, yhangzo lé, shí shoq ap pyâm lhum kó râ nghut lhê; zo wui gi, mó wui lé gumlau toq mù, sat pyám nhâng kó râ nghut lhê. ¹³ Byù lhunglhang bang gi, Ngá é yanmai, nungmoq lé a nguì kut kó râ nghut lhê; nghut kôlhang, jiktûm jé shoq wó hkam jân nyi é sù gi, hkyi yu é hui rá nghut lhê.

¹⁴ 'Haú lhoq hten lhoq hpyoq é achao achyut hkyô'☆ gi, yhang a nyi âng é jowò má yap tô é lé, nungmoq myàng kôjáng (laiká nghap é sù gi, sê gyo sháng gaq), Yuda mau má nyi é bang gi, bùm pé shut hpang doq ló kó sháng gaq. ¹⁵ Yhumhkûng htoq má nyi

tô é sù gi, yhúmhaú má é zè haí lé le, a ló gyó wang yù lo sháng gaq. ¹⁶ Yò má nyi tô é sù gi, yhang é buhíng lé a ló taú yu nyi lo sháng gaq. ¹⁷ Haú buinyi pé má, zogùng dut é myiwe wui eq naú huq ashí nghut é ínu wui gi, hkâ-í yhang wuihke bekó nghut ri myhi-nhung. ¹⁸ Haú hkyô gi, gyoqmyò má a dut sháng gaq, kyûdûng nyi keq. ¹⁹ Hkâsu mù gâ le, Garai Gasang, mingkan lé hpan tô é hkûn mai ahkuí jé shoq, hkâ-nhám le a dut wú shí é wuihke jamjau mó gi, haú buinyi pé má dut lò râ nghut lhê; haú su é hkyô gi, htàngnùng má hkâ-nhám le dum dut lò râ a nghut. ²⁰ Buinyi haú pé lé, haú Yhumsíng Garai mai a lhoq shaú é nghut le gi, ó yuq le asak wó lut râ a nghut. Nghut kôlhang, Yhang hkyin yù bê nghut é, hkyin yù hui bâng é matú gi, buinyi haú pé lé, Yhang lhoq shaú pyám byi bê nghut ri. ²¹ Haú ahkyíng má, byù rayuq yuq mai, nungmoq lé, 'Wú keq, shí má Hkrisduq nyi ri.' ga le, 'Wú keq, Yhang hê má nyi ri.' ga le, taí jáng, nungmoq hkâjáng kó. ²² Hkâsu mù gâ le, Hkrisduq apyoq pé eq myiqhtoi pyoq pé pô htoq lô mù, wó dut é nghut jáng, hkyin yù hui bang lé lhang, wó lhoq nghoq shoq ga, kumlhá pé eq laklai kumlhá pé lé kut shit kó râ nghut lhê. ²³ Haú mù, nungmoq sidiq nyi keq; ahkyíng a jé shi

☆ 13:14 Dan 9:27; 11:31; 12:11

mai, ngò, nungmoq lé, jung hkanqmó taí kyô nyì gù nghut lhê.

²⁴ Buinyì haú pé má, wuìhke jamjau haú pé laí é htâng,

'Bùi gi, noq byuq mù, lhamó gi, a tsô dut byuq râ nghut lhê;

²⁵ kyí pé gi, mauhkûng mai byit gyó lo bùm mù, mauhkûng mâ é wum-o a-tsam pé gi, lhoq nhûn é huì bùm kó râ nghut lhê.[✧]

²⁶ Haú hkûn, haú Byu Yhangzo gi, mhut ji mù, hpungwup a-tsam mó eq le, hpungwup shingkanq eq le, gyó lé lo é lé, byu pé byu-myàng kó râ nghut lhê.

²⁷ Hau htâng má, Yhang gi, Yhâng é maumang lagyô pé lé nhang kat mù, maumyí chyûn hkanqmó eq myigùng htum shoq, mauhkûng htáng shoq mai, Yhang hkyin yu tô é bang lé shuí tsing yù nhâng râ nghut lhê.

²⁸ Maihpáng gâm lé wú mù, mhoq yû keq; agàm mai anyuq nyún lô mù, ahaq htut lô jáng, bùi nyé nám chyâng lò bê lé, nungmoq sê lhê. ²⁹ Haú eq rajung za, shí hkyô pé dut nyì é lé, nungmoq myàng kôjáng, Yhang gi, chyáng bê nghut mù, hkúmdong má lhang nghut nyì bê hkyô lé, nungmoq sé lo keq. ³⁰ Ngò, nungmoq lé teng za taí kôlé, shí pyat mâ é byu pé a ban shi byuq shimá, haú hkyô pé banshoq dut byuq râ nghut

lhê. ³¹ Mauhkûng eq myigùng gi, a joq lo dut byuq râ nghut lhê; nghut kôhang, Ngá é dang gi, ru joq nyì râ nghut lhê.

*Haú Buinyì Eq Ahkyíng Lé,
Ó Le A Sé
Mht 24:36-44*

³² Buinyì eq ahkyíng haú lé gi, ó yuq le a sé; mauhkûng htoq mâ é maumang lagyô pé lhang a sé; haú Zo le a sé; haú Íwa za ru sê lhê. ³³ Haú mù, nungmoq gi, ahkyíng haú hkâ-nhám jé râ lé, a sé kô é yanmai, sidiq nyì keq! Machya nyì keq! ³⁴ Haú gi, byù rayuq, yhâng é dui-nhâng zoshâng wui lé, ó le ó eq sêng é mù lé gàm byì to mù, hkum zúng sù lé le, machya nyì râ matú pying to luì, yhâng yhûm lé, haú dui-nhâng zoshâng wui chyáng ap pyám to mù, byìn we shut htoq lô byuq é sù eq pung ri.

³⁵ Haú mù, haú Yhumsing hpó gi, myinhtâng laq, myín gunggàm laq, woqtûn hkun laq, maubó zó laq, hkâ-nhám jé lô râ lé nungmoq a sê kô é yanmai, sidiq machya nyì keq. ³⁶ Haú a nghut jáng, Yhang, dàn loq tung tau jé lo é hkûn, nungmoq yhup myhî tô é lé, lo myang pyám râ nghut lhê. ³⁷ Ngò, nungmoq lé, 'sidiq machya nyì keq,' nghû taí é eq rajung za, yuq hkanqmó lé le, taí é nghut lhê." ga taí ri.

14

Yesuq, Xû But Byi Huî É Hkyô

Mht 26:1-16; Luk 22:1-6; Yhn 11:45-53; 12:1-8

¹ Ahkuî, haû Lhoqlhai Poî eq múnchi a kat é Muk Zo Poî jé râ í nyí za ru ra alô hkûn, hkyangjong agyi pé eq tarâ sará pé gi, Yesuq lé hkâsu kut wó haq chyup yú mù, sat pyám râ matú, hkyô ho nyi akô nghut ri. ² Nghut kôlhang, yhangmoq gi, "Byu pé gabyông lô kó abe, poî gyoro má gi, a kut shi sháng." ga tai akô.

³ Yesuq gi, Behtani wà má nyi é manggâm dap wú sù Simûn é yhûm, siboî má nghe zung tô é hkûn, myiwe myhí rayuq gi, nardu amyit mai za sai yu é, gyai hpaú é namngón xû bo é alabasta (luq hpyû) bông yu lé lô mù, bông haú lé lêng hkyui luî, namngón xû haú lé Yesuq é ulhum má hut gyun byi ri.

⁴ Haú má nyi tô é bang ram gi, wú nhik-yô é myit èq, rayuq eq rayuq tai lhum kô é gi, "Haî mù, namngón xû lé aha agó kut pyâm lhê laq?"

⁵ Haû namngón xû lé, denari* sùm sho èq ung luî, myùng bang lé byi le ge lhê mhai!" gâ akô. Yhangmoq gi, myiwe myhí hau lé le, gyai chôm tân akô.

⁶ Nghut kôlhang, Yesuq gi, yhangmoq lé, "Myiwe zo haú lé, hkâtân nyi kó; haî mù, yhang lé i-myt lhoq myo nhang nyi akô lhú? Yhang

gi, Ngá é ahtoq má ge é hkyô kut bê nghut ri. ⁷ Haû myùng bang gi, nungmoq eq rahá hkâ-nhám le nyi râ nghut lhê mù, nungmoq garúm nau é hkûn, yhangmoq lé wó garúm lhê. Nghut kôlhang, ngò gi, shí má nungmoq eq rahá ayang nyi nyi râ sù a nghut. ⁸ Yhang gi, yhang wó dut é í kut bê nghut ri. Yhang, Ngá gûng má, namngón xû hut gyûn é gi, Ngá gûng lé yhum râ matú, hí hen lajâng tô é ru nghut lhê. ⁹ Ngò, nungmoq lé teng za tai kôlé, haú gabú danglù lé mingkan gón hko kyô é jowò hkangmó má, yhang lé myit bûn é dông, yhang kut é hkyô shí lé, tai kyo bekô râ nghut lhê." ga tai kyo ri.

¹⁰ Hau htâng, haû chángzo raxe í yuq má bo é Yudaq Iskarut gi, Yesuq lé ap pyám râ ga, hkyangjong agyi pé chyáng e ri. ¹¹ Haú bang gi, haú hkyô lé lhom wó gyo kôjáng, gyô gabú luî, yhang lé ngùn byi râ ga, danggidiq byi akô. Haû mù, yhang gi, Yesuq lé ap pyám râ hkyô ho nyi bê nghut ri.

Yhumsing É Myinzang

Mht 26:17-30; Luk 22:7-23; Yhn 13:21-30

¹² Haû htungli joq é eq rajung za, Lhoqlhai Poî hkungga sauzo jaú byi é, múnchi a kat é Muk Zo Poî sâng-hi nyi má, Yesuq é chángzô pé gi, Yesuq lé, "Nàng zo râ Lhoqlhai Poî lé, ngamoq

* 14:5 Denari rachap gi, byù rayuq é ra-nyí lhê é zuihpau eq wui ri.

hkâmá ê món to râ lú?" ga myí akô.

¹³ Haú mù, Yhang gi, chángzo í yuq lé, "Nungnhik, myuq hkaú shut wang ló keq, wui yambú waq é byù rayuq lhom hui râ nghut lhê; haú hkûn, nungnhik gi, yhâng htâng cháng keq. ¹⁴ Haú yuq, wang ló é yhûm mâ é yhumsîng lé, 'Ngò, Ngá é chángzô pé eq rahá, Lhoqlhai Poí lé zo râ bíng wap hkâmá nghut lhê lú ga, Sará myí nhang kat ri.' nghû taí keq. ¹⁵ Haú hkûn, hen to gû nghut é, ahtoq mâ é wap mó lé lhom tân shit râ nghut lhê. Wap haú má, nga-nhûng é matú ê hen to keq." ga taí luí, nhang kat ri.

¹⁶ Chángzo haú nhik gi, htoq e ló mù, myuq hkaú má wang e ló le, Yesuq taí kat é eq roq za ê myâng kômù luí, Lhoqlhai Poí lé, món to bekô nghut ri.

¹⁷ Myinhtâng jé lô jáng, Yesuq gi, haú chángzo raxe í yuq eq rahá, haú má lé jé bekô nghut ri. ¹⁸ Yhangmoq gi, siboí má nghê mù, zô nyí bùm kô é u lé, Yesuq gi, "Ngò, nungmoq lé teng za taí kôlé, Ngò eq rahá zô nyi é bang nungmoq mâ é rayuq sù gi, Ngo lé ap pyám râ nghut lhê." ga taí ri.

¹⁹ Haú hkûn, yhangmoq gi, gyô yón kômù, rayuq htâng rayuq, "Ngò, a nghut hkaí?" ga Yhang lé myí akô.

²⁰ Haú hkûn, Yhang gi, "Haú yuq gi, haú raxe í yuq mâ é rayuq nghut lhê. Ngò eq rahá, hkoq shí má muk jùmzo

sù nghut lhê. ²¹ Haú Byu Yhangzo gi, Yhang eq séng luí kâ tô é eq rajung za, shí râ za nghut lhê. Nghut kôlhang, haú Byu Yhangzo lé ap pyâm é sù gi, dingnyé wó ri; haú yuq gi, a hku lé le lhang, je ge ri.

²² Yhangmoq zo nyi kô é u lé, Yesuq gi, muk lé yù mù, jeju hkya-on luí, muk lé myhik hpé mù, "Shí gi, Ngá é gungsho nghut lhê; yù mù zo keq." ga taí uchyang, Yhâng é chángzô pé lé gàm byí ri.

²³ Hau htâng, Yhang gi, góm lé le, yù mù, jeju hkya-on luí, yhangmoq lé byí ri; yhangmoq banshoq bang gi, haú lé yù shuq akô nghut ri.

²⁴ Yesuq gi, yhangmoq lé, "Shí gi, byù myo myô é matú htoq pyâm é, dangshikaq eq sêng é Ngá sui nghut lhê.

²⁵ Ngò, nungmoq lé teng za taí kôlé, Ngò, Garai Gasâng é mingdán má, tsibiyiq wing asik lé shuq é buinyi a jé jé, tsibiyiq wing lé dum shuq rá a nghut lo." ga taí ri.

²⁶ Yhangmoq gi, hkya-on mahkôn ralhum ban hkôn jáng, Tsanlun Bùm shut htoq e ló bekô nghut ri.

Petruq He-ngik Râ Hkyô Lé, Te Taí É Hkyô

Mht 26:31-35; Luk 22:31-34; Yhn 13:36-38

²⁷ Yesuq gi, yhangmoq lé, "Nungmoq lhunglhang bang gi, myit lingbat kó râ nghut lhê; hkâsu mù gâ le,

'Haú sau zúng sù lé, Ngò bat sat pyám mù, sau pé gi,

lhoq pyo pyâm é hui kó
râ nghut lhê.^{1☆}

ga kê tô ri. ²⁸ Nghut kôlhang, Ngò gi, lhoq dui toq é huí htâng má, Galile mau shut, nungmoq é hí má e ló lánq râ nghut lhê." ga tâi ri.

²⁹ Haú hkûn, Petruq gi, "Góbang banshoq myit lingbat kôlhang, ngò gi, myit lingbat râ a nghut." ga tâi kat ri.

³⁰ Haú mù, Yesuq gi, "Ngò, nàng lé teng za taí lé, hkû-nyí, hkû-myîn yhang jáng, woq í dâm a tân shimá, nàng, Ngo lé sum dâm he-ngik pyám râ nghut lhê." ga tũ tâi ri.

³¹ Nghut kôlhang, Petruq gi, "Ngò, Nàng eq rahá shî râ dut kôlhang, Nang lé ngò he-ngik pyám râ a nghut." ga zuq zuq taí ri. Góbang banshoq le, haú su ga châng taí bum akò nghut ri.

*Get-samane Gâ é Jowò Má
Kyûdûng É Hkyô*

Mht 26:36-46; Luk 22:39-46

³² Yhangmoq gi, Get-samane gâ é jowò má jé ló kômù, Yesuq gi, Yhâng é chángzô pé lé, "Ngò, kyû ê dũng nyi é u lé, shî má zùng lánq keq." ga tâi ri. ³³ Yesuq gi, Yhang eq rahá Petruq, Yakuq, Yohan pé lé, shuí chũng ri. Haú hkûn, Yhang gi, myit gyai a ngón é eq myit wuĩhke é hui mù, ³⁴ yhangmoq lé, "Ngò gi, shî râ í yhang myit yón nyi ri;

nungmoq gi, machyâ luí, shí má lánq nyí keq." ga tâi ri.

³⁵ Yesuq gi, haú mai ratsuí zo sô ê mù, myigùng má gop byên to luí, ahkýing haú lé ge lhoq lhai pyám byí le gi, Yhâng chyáng mai lhoq lhai pyám byi râ matú, ³⁶ "Aba,† Áwa ê, Nàng gi, haí le wó dut é Sũ nghut lhê. Góm‡ shí lé, Ngá chyáng mai yu pyám byi laq. Nghut kôlhang, Ngò ô nau é dông a nghut, Nàng ô nau é dông sheq nghut sháng gaq." ga kyûdũng ri.

³⁷ Hau htâng, Yhang gi, Yhâng é chángzô pê chyáng dum taú lo le, yhangmoq yhup myhí to kô é lé lo myang ri. Haú mù, Yhang gi, Petruq lé, "Simun, nàng yhup ngón nyi lhê lhú? Razup za lháng a wó machya nyi lhú? ³⁸ Gunglaú é a hui sháng gaq, machyâ luí, kyûdũng nyi keq. Haú woi-nyí gi, kâm nyi kôlhang, gungsho gi, wum nyhôm nyi ri." ga tâi ri.

³⁹ Yesuq gi, radàm dum é mù, hí lé dũng é dang lé za, é dung ri. ⁴⁰ Yhang dum taú lo le, yhangmoq gi, myoqkuq lai kô é yanmai, yhup myhí to lánq kô é lé, lo dum myang ri. Yhangmoq gi, Yhang lé haí taí râ a sé dut byuq akò nghut ri.

⁴¹ Yesuq gi, sum dâm nghũ râ lhĩng má, yhangmoq chyáng dum taú jé lô mù, yhangmoq lé, "Nungmoq gi, ahkuí jé shoq yhup ngón nyi ashí kó lhú? Gé bê! Haú

☆ 14:27 Zhk 13:7 † 14:36 Aba gâ é gi, Aramaik dang dông "Áwa" gâ é lichyúm nghut lhê. ‡ 14:36 Góm gâ é gi, Yesuq, jamjau hui râ hkyô eq shî râ hkyô lé, taí nau é nghut lhê.

ahkyíng gi, jé bê nghut luí, haú Byu Yhangzo gi, yubak dap bâng é loq má ap pyâm é huí râ nghut bê. ⁴² Toq keq! Ló losháng hkoi! Ngo lé ap pyám râ sù gi, jé lé lô bê nghut ri." ga taí ri.

Yesuq, Chyup Yú Huí É Hkyô

Mht 26:47-56; Luk 22:47-53; Yhn 18:3-12

⁴³ Yesuq, dáng nyo nyi ashî u lé, haú chángzo raxe í yuq má bo é Yudaq gi, haú hkyangjong agyi pé, tarâ sará pé eq suwún wui chyáng mai nhang kat é bang nghut é, shâm eq dumbáng pé chung tô é byù moq mó eq rahá jé lé lo ri.

⁴⁴ Yesuq lé ap pyâm râ sù gi, yhangmoq lé, "Ngò bopuq puq é sù gi, haú yuq nghut bê; Yhang lé chyup yú mù, zúng shuí ló keq." ga kumlhá byí to bê nghut ri. ⁴⁵ Yudaq gi, Yesuq chyáng hkyê za é mù, "Rabai é." ga taí luí, Yhang lé bopuq puq byí ri. ⁴⁶ Haú hkûn, yhangmoq gi, Yesuq lé chôm zuí zing mù, chyup yú bekô nghut ri. ⁴⁷ Haú mù, nàm má yap tô é byù rayuq gi, yhâng é shâm lé she htoq yú mù, hkyangjong mó é dui-nhâng zôshang é nohkyap lé pyoq hkyô kat byi bê nghut ri.

⁴⁸ Yesuq gi, yhangmoq lé, "Nungmoq gi, damyaq rayuq lé chyup é su, Ngo lé chyup râ matú, shâm eq dumbáng pé chûng mù, lé lo akô lúhú? ⁴⁹ Ngò gi, nyí wuí, nungmoq eq rahá nyi luí, noqkuq yhúm má mhoqshit byí nyi kôlháng,

nungmoq, Ngo lé a chyup yú kô é nghut lhê. Nghut kôlháng, Chyúmdang pé gi, dik ra râ nghut lhê." ga taí ri. ⁵⁰ Haú hkûn, haú chángzô pé gi, Yesuq lé tô pyâm to kôluí, hpang byo byuq bekô nghut ri.

⁵¹ Buhîng za wut é zorâm rayuq gi, Yesuq htâng cháng wún ri. Yhangmoq gi, haú yuq lé, wó kyaq zui kô é hkûn, ⁵² yhang gi, buhîng lé hkyut hkyô pyâm to mù, gùngchîn hpang ló byuq bê nghut ri.

Yudaq Byìn Tú Wapdoq Má Jéyáng Huí É Hkyô

Mht 26:57-68; Luk 22:54-55, 63-71; Yhn 18:13-14, 19-24

⁵³ Yhangmoq gi, Yesuq lé, hkyangjong mó chyáng shuí e akô; haú hkyangjong agyi pé lhunglhâng bang, suwún wuí eq tarâ sará pé le, lé zup zîng bum akô. ⁵⁴ Petruq gi, hkyangjong mó é yhumwàng hkaú má châng jé wâng shoq, we we mai Yesuq htâng châng tô ri. Yhang gi, haú má, zúng bang eq rahá, myihkyóm yâm má gyoq gang zung tô ri.

⁵⁵ Haú hkyangjong agyi pé eq Yudaq byìn tú wapdoq gón gi, Yesuq lé sat râ saksé hô kôlháng, haí le a myàng kó nghut ri. ⁵⁶ Byù myo myo gi, a têng é saksé hkám kôlháng, yhangmoq é dang gi, a tsûng lhum kó nghut ri.

⁵⁷ Hau htâng, ra-am gi, toq yap mù, a têng é saksé hkám kô é gi, ⁵⁸ "Yhang gi, 'Byu loq èq saí é noqkuq yhúm shí lé, Ngò hpyoq hpyi pyám mù, sum nyí gyoro má, byu loq

èq a saî é, gotû ralhùm dum saî râ nghut lhê.' ga taî é lé, ngangmoq wó gyô ri." ga akô. ⁵⁹ Nghut kôlhang, yhangmoq é saksé gi, a tsûng lhum kó nghut ri.

⁶⁰ Hau htâng má, hkyangjong mó gi, yhangmoq é hí má toq yap mù, "Nàng, haî le a tû taî luq? Shí bang, Nang lé mara hun nyi é saksé gi, hká dông nghut lhê lú?" ga luî, Yesuq lé myî ri. ⁶¹ Nghut kôlhang, Yesuq gi, jit le a ga nyi tô ri.

Haû mù, hkyangjong mó gi, Yesuq lé, "Nàng gi, hkungsô wó Su é yhangzo, Hkrisduq nghut lhê lú?" ga dum myî ri.

⁶² Haû hkûn, Yesuq gi, "Nghut lhê; haû ngò Byu Yhangzo gi, a-tsam bo dik Su é loqyo hkyam^s má zung tô é lé le, mhuthtui ji mù, mauhkûng mai lé lo é* lé le, nungmoq myàng kó râ nghut lhê." ga taî ri.

⁶³ Haû hkûn, hkyangjong mó gi, yhâng é bu lé lêng cheq pyám mù, "Nga-nhúng, haî saksé râ ashî lú?" ⁶⁴ Yhang, Garai Gasang lé rhoî dang taî é lé nungmoq wó gyo bê nghut lhê. Nungmoq hkâsu wó myit akô lú?" ga myî ri; yhangmoq banshoq bang gi, shî gíng sù nghut ri ga, chôm myit huî akô. ⁶⁵ Haû mù, ra-am gi, Yhang lé sôkan byé gyun é eq, myoq má nghop pyám byi luî, loqtsup èq htui byî lhê kut mù, "Nang lé ó yuq

htuî é, myiqhtoi htoî wú aq." ga taî akô. Haû zúng bang gi, Yhang lé shuî yù mù, nhuq bat akô nghut ri.

Yesuq Lé, Petruq He-ngik Pyâm É Hkyô

Mht 26:69-75; Luk 22:56-62; Yhn 18:1-18, 25-27

⁶⁶ Petruq gi, wàng hkaû má nyi tô é u lé, haû hkyangjong mó é dui-nhâng zoshâng myhí rayuq jé lé lo ri. ⁶⁷ Haû yuq gi, Petruq gyoq gang nyi é lé myàng jáng, yhang lé rago wú mù, "Nàng le, Nazaret wà byù Yesuq eq rahá nyi sù nghut ri." ga taî ri.

⁶⁸ Nghut kôlhang, yhang gi, "Nàng taî é hkyô lé, ngò, sé le a sé, gyo le a sê gyo." ga he pyám luî, wâng hkúmdong shut htoq e ló bê nghut ri.†

⁶⁹ Dui-nhâng zoshâng myhí haû gi, Petruq lé, haû má dum myàng jáng, awui ayàm má yap tô é bang lé, "Shí yuq le, haû hpúng má lom é sù rayuq nghut ri." ga dum taî ri. ⁷⁰ Petruq gi, radàm dum he pyám ri; hau htâng razup zo má, haû nàm má yap tô é bang gi, Petruq lé, "Nàng gi, Galile byù rayuq nghut é yanmai, haû hpúng mâ é byù rayuq hkyak nghut lhê." ga taî akô.

⁷¹ Haû hkûn, yhang gi, yhânggùng yhang nhing luî, "Haû nungmoq taî é byù lé, ngò a sé." ga dakam ri.

^s 14:62 Loqyò hkyam gâ é gi, ahko ahkáng wó é jowò lé gâ é nghut lhê. * 14:62

Mhuthtui ji mù, mauhkûng mai lé lo é gâ é gi, Danielaq 7:14 má bò lhê. † 14:68 Chyúmding ra-am má Haû hkûn jáng, woq tûn bê nghut ri gâ é le bo ri.

⁷² Haú u yhang, woq radàm dum tun kat bê nghut ri. Haú mù, Petruq gi, "Woq í dâm a tûn shimá, nàng, Ngo lé sum dâm he-ngik pyám râ nghut lhê." ga, Yesuq, yhang lé taí é dang lé, myit bûn kat mù, wum kat ngau ri.

15

Pilat Hí Má Yesuq Jé Nyi É Hkyô

Mht 27:1-2, 11-26; Luk 23:1-5, 13-25; Yhn 18:28-19:16

¹ Haú napkyó noq za má, hkyangjong agyi pé gi, suwún wuî, tarâ sará pé, Yudaq byùn tú wapdoq gón bang eq rahá kut, chòm bóng yú kômù, Yesuq lé tuí yú luí, shuí htoq é kômù, mauzau Pilat chyáng é ap byî akô nghut ri.

² Pilat gi, Yesuq lé, "Nàng gi, Yudaq byu pê é hkohkâm nghut lhê lú?" ga myi jáng, Yesuq gi, "Nàng taí é eq rajung za nghut lhê." ga, tû taí ri.

³ Haú hkyangjong agyi pé gi, Yhang lé mara gyai myo shoq chòm hun akô. ⁴ Haú mù, Pilat gi, Yesuq lé, "Wú aq, yhangmoq, nàng lé mara haú myhó hun nyi le, nàng, haí le a tû taí lú?" ga myî ri.

⁵ Nghut kôlhang, Yesuq gi, haí le a tû taí kut jáng, Pilat gi, maú byuq bê nghut ri.

⁶ Haú Lhoqlhai Poî u lé, mingbyû wuî dúng é htóng byû rayuq yuq lé, mauzau mai lhaq lhoq htoq byi byi kut é htông joq ri. ⁷ Haú hkûn, Barabaq gâ é byû rayuq gi, gumlau gabyông é hkûn, byû sat é gumlau bang eq rahá,

htóng gyó tô ri. ⁸ Byû hpûng mó gi, doq lé lô mù, mauzau Pilat lé, yhang lhaq kut é eq rajung za, yhangmoq lé kut byi râ matú, dúng akô.

⁹ Haú mù, yhang gi, "Yudaq byu pê é hkohkâm lé nhang htoq kat byi râ lé, nungmoq ô nau akô lú?" ga myî ri. ¹⁰ Pilat, haú su ga myî é gi, haú hkyangjong agyi pé, Yesuq lé manôn kôluí, yhâng chyáng lé ap byi kô é hkyô lé sê é yanmai nghut ri. ¹¹ Nghut kôlhang, haú hkyangjong agyi pé gi, Barabaq lé sheq nhâng byi râ matú, Pilat chyáng dung kó sháng gaq ga, haú byû moq mó lé i-myit lhoq toq byî akô.

¹² Pilat gi, "Haú jáng, nungmoq mai Yudaq byu pê é hkohkâm ga sù yuq lé, ngò hkâsú kut râ lú?" ga yhangmoq lé myî ri.

¹³ Haú hkûn, yhangmoq gi, "Yhang lé tapzîng má jén sat pyám aq." ga chòm garu akô.

¹⁴ Haú jáng, Pilat gi, "Haí mù luí lú? Yhang haí kut shut bê lú?" ga dum myi jáng, yhangmoq gi, htê mó èq, "Yhang lé tapzîng má jén sat pyám aq." ga je riyhang garú lo bum akô nghut ri.

¹⁵ Pilat gi, haú byû moq mó lé nhik dik nhâng nau é yanmai, Barabaq lé gi, nhang kat byi mù, Yesuq lé gi, nhuq bat nhâng mù, tapzîng má jén sat pyám râ matú, ap byî kat bê nghut ri.

Gyezô Pé Gi, Yesuq Lé Rhoi É Hkyô

Mht 27:27-30; Yhn 19:2-3

¹⁶ Gyezô pé gi, Yesuq lé, Pre-tori yhumwàng (mauzau hpô é yhumwàng) mó hkaû má shuî wang lô kômù, gyedap gón lé ji tsing yu akô. ¹⁷ Hau htâng, yhangmoq gi, Yesuq lé buhîng nè radung hut byi mù, zujanmaú saî yù kôluî, Yhâng é ulhum má tsung byi akô. ¹⁸ Hau htâng, yhangmoq gi, "Yudaq byu pê é hkohkâm hpó ê! Chyung hîng xê hing nyî sháng gaq ô!" ga wut garû akô. ¹⁹ Hau htoq agó, yhangmoq gi, Yhâng é ulhum má dumbáng eq adàm dàm bat kômù, sôkan byé gyun luî, Yhâng hí má hkyihput htuq mù, paî mhaû akô nghut ri. ²⁰ Yhangmoq gi, Yhang lé rhoî jihkyoî ban kut yû kôjáng, Yhang wut tô é buhîng nè lé hkyut yû kômù, Yhâng é mebu lé dum hut byi luî, tapzîng má jén sat pyám râ matú, Yhang lé shuî htoq e lô bekô nghut ri.

Yesuq Lé Jén Pyâm É Hkyô
Mht 27:31-44; Luk 23:27-43; Yhn 19:17-27

²¹ Alesander eq Ruhpu nhiktang é yhângwa, Kuruni myuq byû nghut é Simun ga sù gi, yosô wà mai lò mù, haû jowò mai laî lô ri. Haû hkûn, gyezô pé gi, yhang lé, tapzîng waq nhang akô nghut ri. ²² Yhangmoq gi, Yesuq lé, Golgahta gâ é jowò má shuî e akô (Golgahta gâ é gi, ugyap joq é jowò lé gâ é nghut ri). ²³ Hau htâng, yhangmoq gi, Yhang lé, mura* eq nyhô

tô é tsibiyiq wing huq akô; nghut kôlhang, Yhang gi, a lhom shuq byi nghut ri. ²⁴ Hau htâng má, yhangmoq gi, Yhang lé tapzîng má jén tap to kôluî, Yhâng é mebu pé lé, hkyîn shosé shê mù, âng é dông gam yu pyám byi akô nghut ri.

²⁵ Yhangmoq, Yesuq lé tapzîng má jén tap pyâm é hkûn gi, napkyó gau hkyíng nghut bê nghut ri. ²⁶ Hau htoq agó, Yhang lé mara hun é dông kê tap to kô é gi, "YU-DAQ BYU PÊ É HKOHKÂM" gâ ri. ²⁷ Yhangmoq gi, damyaq í yuq lé le, Yhâng é loqyo hkyam shut rayuq, loqpaî hkyam shut rayuq kut, tapzîng htoq má jén tap tô akô nghut ri. ²⁸ (Haû gi, "Yhang gi, yubak dap bâng chyáng nghap lhôm é hui bê nghut ri."* gâ é Chyúmdang lé lhoq dik é nghut ri.)† ²⁹ Hkyô sô laî lô é bang gi, nyhap é dông u-ngut ngut mù, tai kô é gi, "Noqkuq yhûm lé hpyoq pyám luî, sum nyí gyoro má dum wó saî lhê ga Sù ê! ³⁰ Náng gùng nàng hkyi yù luî, tapzîng mai gyó lò wú aq mhaî!" ga akô nghut ri.

³¹ Haû eq rajung za, hkyangjong agyi pé eq tarâ sará pé le, yhangmoq hkaû má, "Shí yuq gi, góbang lé hkyi yù sù nghut kôlhang, Yhânggùng yhang gi, a wó hkyi yù nghut ri myhi-nhung! ³² Nga-nhúng wó myâng mù,

* 15:23 Mura gi, chi wó kut jung xû nghut lhê. ☆ 15:28 Esai 53:12 † 15:28 Bun zo shî gi, chyúmding axau ra-am pé má za bo é nghut lhê.

lumjîng râ matú, shî, Israelaq byu pê é hkohkâm, Hkrisduq gi, tapzîng mai gyó lo wú sháng gaq." ga, Yhang lé rhoî dang taî akô. Yhang eq rahá tapzîng má jén tap to huí é su nhik le, Yhang lé rhoî dang taî akô nghut ri.

Yesuq, Shi É Hkyô

Mht 27:45-56; Luk 23:44-49; Yhn 19:28-30

³³ Nyí-káng raxe í hkyíng mai myinhtâng sum hkyíng jé shoq, ramau gón mauchut tuq dut byuq bê nghut ri. ³⁴ Myinhtâng sum hkyíng jé é hkûn, Yesuq gi, "Eloi, Eloi, lama sabakhtani."* ga, htê mó èq garû kat ri. Haú é lichyúm gi, "Ngá Garai ê, Ngá Garai ê, Nàng, haí mù, Ngo lé tô pyâm tô lhê lú?" gâ é nghut ri.

³⁵ Haú nâm má yap tô é bang ra-am gi, haú lé wó gyo kôjáng, "Gyô wú keq. Yhang gi, myiqhtoi Eliyaq lé wut nyi ri." ga, taî akô.

³⁶ Haú hkûn, byù rayuq gi, din e ló mù, wuìmaù lé tsi-byiq wing chyîn má jum yù luí, jàm-yang má tuí tap mù, Yesuq shuq sháng ga yhun byi luí, "Eliyaq gi, lé lô mù, Yhang lé lé lhoq hkyô yù abe, nganhúng chôm láng wú sháng." ga taî ri.

³⁷ Yesuq gi, htê mó èq garû kat luí, káng byit byuq bê nghut ri.

³⁸ Noqkuq yhûm má é pán-gyang gi, ahtoq mai a-ô í hkyam byáng dut byuq bê nghut ri. ³⁹ Yesuq é hí má

yap tô é shô up gyezau hpó gi, Yesuq é garu htê lé wó gyo mù, Yhang hkâsu kut shi é lé myàng jáng, "Shí yuq gi, gè gè yhang, Garai Gasâng é Yhangzo nghut ri-nhung!" ga taî ri.

⁴⁰ Myiwe wuì ra-am gi, we we mai wú nyi bum akô. Haú bang má, Magadalaq wà má é Mariq, Yakuq tiq sù yuq eq Yose nhiktang é yhângnu Mariq eq Salome pé le bo akô nghut ri. ⁴¹ Haú bang sum yuq gi, Galile mau má, Yesuq htâng cháng mù, Yhâng râ é hkyô pé lé châng kut byi é bang nghut akô. Yesuq eq rahá, Yerusalem wà mó má doq lé lo é myiwe wuì, góbang myo myo le haú má nyi tô bum akô nghut ri.

Yesuq Lé, Myhup Pyâm É Hkyô

Mht 27:57-61; Luk 23:50-56; Yhn 19:38-42

⁴² Haú nyí gi, Hên Lajang Buinyi (Bánno buinyi é hí nyi) nghut ri. Haú mù, myinhtâng jé lô jáng, ⁴³ Yudaq uphkâng hpúng má bo é, aróng wó é, Garai Gasâng é mingdán lé láng nyi é sù, Aramahti wà byù Yosep gi, myit wum lhoq kîng yù mù, Pilat chyáng wàng luí, Yesuq é gungsôm lé ê dúng ri. ⁴⁴ Pilat gi, Yesuq shî bê gâ é hkyô lé wó gyo jáng, maú byuq ri; haú mù, yhang gi, shô up gyezau lé wut yù mù, Yesuq shî teng bê lú ga myi ri. ⁴⁵ Shî teng bê hkyô lé, shô up gyezau chyáng mai wó sê yù jáng,

Pilat gi, Yesuq é gungsôm lé yù râ ahkáng, Yosep lé byi kat ri. ⁴⁶ Haû mù, Yosep gi, pán yúng lé wui yù luí, gungsôm lé yu hkyó mù, htup yup luí, luqgok lé kyûng tô é lup hkaû má ê kat tô ri. Hau htâng, yhang gi, luphkum má, luqlông eq lhêng chí pyâm tô ri. ⁴⁷ Magadalaq wà mâ é Mariq eq Yose é yhângnu Mariq gi, Yesuq lé, hkâmá lheq tô é lé, ê myang akô nghut ri.

16

Dum Dui Toq Lo É Hkyô

Mht 28:1-8; Luk 24:1-12; Yhn 20:1-10

¹ Bánno buinyì lai jáng, Magadalaq wà mâ é Mariq, Yakuq é yhângnu Mariq eq Salome pé gi, Yesuq é gùng má, ê but byi râ matú namngón jung ê wui akô. ² Bánno buinyì htang napkyó bui htoq lo é hkûn yhang, yhangmoq gi, lup shut e ló akô. ³ Yhangmoq gi, "Luphkum mâ é luqgok lé, ó yuq chyûn lhêng pyâm byi râ lú?" ga, rayuq eq rayuq taí lhum akô.

⁴ Nghut kôlhang, yhangmoq tu wú kat kô é hkûn, luqlong haû gi, lhoq lhêng to láng é lé, myàng akô nghut ri; luqlong haû gi, gyai kô é nghut lhê. ⁵ Yhangmoq gi, lup hkaû má wang ê kô é hkûn, hpyu é buhîng wut é zorâm rayuq, loqyo hkyam má zung tô é lé, myàng kôjáng, gyuq dan bum akô.

⁶ Haú hkûn, haú yuq gi, "Hkâgyuq dân kó! Nungmoq

gi, haû tapzîng má jén sat huí é, Nazaret wà byù Yesuq lé ho akô, a nghut lú? Yhang dui toq ló bê! Yhang gi, shí má a nyì lo. Yhang lé, lheq tô é jowò lé wú wú keq. ⁷ Ahkuí, nungmoq gi, ló mù, 'Yesuq gi, nungmoq hí má, Galile mau shut so láng râ nghut lhê. Nungmoq lé, Yhang taí tô é eq rajung za, nungmoq gi, Yhang lé haú má ló myâng kó râ nghut lhê.' nghû, Yhâng é chángzô pé eq Petruq lé ló taí kyo keq." ga lhom taí kat ri.

⁸ Haû mù, myiwe myhí haú bang gi, byòdàn gyuq nán é eq, lup mai hpang htoq ló akô; yhangmoq gi, lûm gyuq byuq kô é yanmai, ó yuq lé lé, haí le a taí kó nghut ri.

(Bun zo 9 mai 20 jé shoq gi, chyúmding axau ra-am pé má a bo é nghut lhê.)

Yesuq Htoq Shit É Hkyô

Mht 28:9-10, 16-20; Luk 24:13-53; Yhn 20:11-23; Lagyo 1:6-11

⁹ Yesuq gi, Bánno buinyì htang napsûn lé, Yhang dui toq é htâng, Yhang mai nat gang nyhit du hkat htoq pyâm byi bê sù, Magadalaq wà mâ é Mariq lé hí htoq shit ri. ¹⁰ Mariq haû gi, ló mù, haû Yesuq eq nyi lai lò bê bang, yón ngau nyì kô é hkûn, haú hkyô lé ló taí kyô ri. ¹¹ Yhangmoq gi, Yesuq dum dui bê gâ é hkyô lé le, Yhang lé, Mariq myang é gâ é hkyô lé le, wó gyo kôlhang, a jîng kó nghut ri.

¹² Hau htâng má, Yesuq gi, yosô wà shut htoq e ló

nyi é chángzo í yuq lé, gotû gunghkyâng dong htoq shit ri. ¹³ Haú nhik gi, taû lò mù, gotû chángzô pé lé haú hkyô lò shit kyo akô; nghut kôlhang, yhangmoq gi, haú lé le a jing byi kó nghut ri.

¹⁴ Hau htâng má, Yesuq gi, haú chángzo raxe rayuq baú za zang zô nyi kô é hkûn, yhangmoq chyáng lé htoq shit ri. Yhangmoq chyáng lumjing myit a bò kô é yanmai le, Yhang dui toq é htâng má, Yhang lé myang é bang taí kyo kô é dang lé, a jing é za myit htan to kô é yanmai le, Yhang gi, yhangmoq lé tân ri.

¹⁵ Hau htoq agó, Yesuq gi, yhangmoq lé, "Mingkan jam shoq htoq ê mù, waxâng zo wui lhunglhang lé, haú gabú danglù hko kyo keq.

¹⁶ Lumjing mù, wui-myhup hkâm yu é sù ó yuq nghut kôle, hkyi yu é hui râ nghut lhê. Nghut kôlhang, a lumjing é sù ó yuq nghut kôle, mara byi é hui râ nghut lhê.

¹⁷ Lumjing é bang wó kut shit râ kumlhá pé gi, Ngá é mying lé lang luí, nat gâng pé lé wó hkat htoq kó râ eq laklaí é mying pé lé dat nyò kó râ nghut lhê; ¹⁸ yhangmoq gi, lhangmuí pé lé le, wó kuí zui kó râ nghut lhê; muí shi jung duq lé, shuq kôlhang, haí dut kó râ a nghut. Nò bâng é htoq má, yhangmoq é loq ke byi jáng, nò bang ge byuq kó râ nghut lhê." ga taí ri.

¹⁹ Haú Yhumsing Yesuq gi, yhangmoq lé dang ban taí é htâng má, mauhkung shut

shuî toq yu é hui luí, Garai Gasâng é loqyo hkyam má zung to bê nghut ri. ²⁰ Hau htâng, haú chángzô pé gi, htoq ê mù, jowò hkgámó má mungdang ê hko kyô akô nghut ri; haú Yhumsing gi, yhangmoq eq rahá nghut nyi mù luí, Yhâng é mungdang têng é hkyô lé tân shit râ matú, yhangmoq lé, kumlhá pé wó kut é a-tsam byi é nghut ri. Amen.

LUKAQ é Gabú Danglù Laiká (The Gospel of Luke)

¹ Aróng wó dik é sù Htoh-piluq ê, ngamoq chyáng dut laí lò bê hkyô pé lé, sâng-hi mai yhumsing myoq eq yhang, myang é bang eq, mungdang wùn waq é bang mai shap kyô gyó lô mù luí, ² byù myo myo gi, shikut luí kâ to bekô nghut ri. ³⁻⁴ Ngò le haú pé banshoq lé awang mai ahpyo hpyot jihkúm nuqguq ho myí yù luí, nàng wó sê yu to bê hkyô pé gi, je lhoq gíng é dut sháng gaq nghù, náng é matú banshoq tok za kâ kat byi râ lé, ngò wó myit ri.

Wui-myhup Sará Yohan Hku Lé Lô Râ Gà É Hkyô

⁵ Yuda mau má Herut hkohkâm up é u lé, Abiyaq hkyangjong hpúng má Zahkariq ga sù hkyangjong rayuq nyi ri. Yhang myi gi, Arun amyû mâ é, Elizabet ga sù nghut ri. ⁶ Haú nhik gi, Yhumsing Garaí é jep é tarâ eq htúngtarâ banshoq lé, rago za cháng mù, Garaí Gasâng é hí má dingmán é su nhik nghut akô. ⁷ Nghut kôlhang, Elizabet gi, baùdung dung sù nghut é yanmai, yhâng nhâm gi, zo dù a dap kó. Yhangnhik gi, asak ipyat le ko bekô nghut ri.

⁸ Ahkuí, Zahkariq gi, dum lhing hkyuq lo é hkyangjong mù lé, yhâng é hpúng eq

rahá, Garaí Gasâng é hí má lé zui le, ⁹ haú Yhumsing é no-qquq yhùm ahkaú má namngón hkungga é wang nyhé râ matú, hká yuq nghut râ lé hkyangjong pé é htúngli eq rajung za byù hkyín shosé she wú é hkún, yhâng chyáng âng ri. ¹⁰ Haú mù yhang namngón hkungga lé nyhé é u lé, shiwa byù banshoq gi, yhumpán má, kyûdung nyi akô.

¹¹ Haú hkún, Yhumsing Garaí é maumang lagyo gi, namngón jung nyhé é hkungga gyap é loqyo hkyam má, Zahkariq lé, lé yap shit ri. ¹² Zahkariq gi, maumang lagyo haú lé myàng jáng, dan gyuq nyi ri. ¹³ Nghut kôlhang, maumang lagyo gi, "Zahkariq ê, hkâgyuq, náng é kyûdung dang lé Garaí Gasang gyo byi bê. Haú mù luí, náng é yhumsing myhí Elizabet gi, náng é matú yuqzo rayuq bau byi berâ nghut lhê; náng gi, yhang lé Yohan nghù myhing byi ra râ nghut lhê. ¹⁴ Yhang gi, náng é matú gabú hpo eq nguingón é hkyô dut berâ nghut lhê. Yhang lé baú lo é yanmai, byù myo myo le gabú lo bùm berâ nghut lhê. ¹⁵ Hkâsu mù gâ le, yhang gi, haú Yhumsing Garaí é hí má ahko ahkáng wó mù luí, byù mó dut râ sù nghut lhê. Yhang gi, tsibiyiq wing eq îhpe lé ge shuq râ sù a nghut; yhâng nú é unghkaú mai yhang, Chyoiyúng Woinyí eq byíng nyí râ sù nghut lhê. ¹⁶ Yhang gi, Israelaq

yangzo yangshû pé myo myo lé, Yhumsing yangmoq é Garai Gasang chyáng lhing lò nhâng râ sù nghut lhê. ¹⁷ Îwâ pé é myit nhiklum lé gi, zô wui shut, nyo é a gyo bang lé gi, dingmán bâng é hpaqchyî hkyô shut lhing lò nhâng luî, haû Yhumsing jé lé râ matú hen tô é byù myû dut nhâng râ matú, Yohan gi, Eliyaq é woi-nyí wum-o wó é eq, Yhumsing é hí má e ló râ nghut lhê." ga luî, yang lé taí ri.

¹⁸ Haú hkûn, Zahkariq gi, "Haú hkyô lé ngò hkâsu kut wó sé râ lúh? Ngò le mang byuq bê, ngâ é yhumsing myhí le asak ipyat ko bê." ga luî, maumang lagyo lé tû taí ri.

¹⁹ Maumang lagyo haû gi, "Ngò gi, Garai Gasang eq rahá nyi é sù Gabrielaq nghut lhê. Nang lé gabú danglù shí taí kyo aq ga luî, Yang, ngo lé nhang kat é nghut lhê. ²⁰ Ahkying jé jáng, ngá dang gi, gè gè dut lò râ nghut lhê. Dang shí pé lé nàng a lumjing é yanmai, mû haû dut lo é buinyi jé shoq, nàng gi, nhut jit byuq râ nghut lhê." ga luî, yang lé tû taí ri.

²¹ Haû u, shiwa byu pé gi, Zahkariq noqkuq yhûm ahkaû má haû-í myáng shoq lúng byuq é hkyô lé lánng maú nyi akô. ²² Zahkariq dum htoq lo le, dang a wó nyo byuq mù shiwa byu pé lé loq lik za lik shit nyi ri. Haû mù luî, yangmoq gi, noqkuq yhûm ahkaû má yang my-

oqwup shing-rán rajung jung myàng ang bê lé, wú sê yu akô nghut ri.

²³ Ahkuî, Zahkariq gi, hkyangjong jong âng é buinyi ngap jáng, yhûm shut dum taû ló byuq bê. ²⁴ Hau htàng má, yhâng é yhumsing myhí Elizabet gi, zogûng dut lò mù luî, hká le a htoq e za lhamó ngo hkyap yhûmhkaû má lúng byuq ri. ²⁵ Haú hkûn, yang gi, "Byu pé hí má ngò hui zô é hoq hpu hkyô lé, Garai Gasang gi, myàng byi luî, shí su dut nhang é dông mai huí sêng pyám byi é buinyi má, Yang ge é hkyô lé, ngo lé tûn shit bê nghut ri." ga taí ri.

Yesuq Hku Lé Lô Berâ Gâ É Hkyô

²⁶ Ahkuî, Elizabet zogûng dut é lhamó hkyuq hkyap jé jáng, Garai Gasang gi, maumang lagyo Gabrielaq lé Galile mau, Nazaret wà má nyi é, zomyi gyíng rayuq chyáng nhang kat ri. ²⁷ Zomyi hau é mying gi, Mariq gâ ri; yang gi, Dawiq amyû mâ é Yosep gá su èq dúng tô é zomyi nghut ri. ²⁸ Maumang haû gi, Mariq chyáng jé jáng, "Mariq ê, ngingón nyí sháng gaq; Nàng, hkungsô wó nyi ri; Haû Yhumsing Garai gi, nàng eq rahá nyi nyi ri ò!" ga taí ri.

²⁹ Mariq gi, dang haû lé gyo sing nán mù, shí su gâ é dang gi, haí jung gá naû é nghut lhê lúh ga luî, myit maú nyi ri. ³⁰ Haú hkûn, haû maumang lagyo gi, "Mariq ê, hkâgyuq, nàng gi, Garai Gasang é hí má myoqdong wó bê nghut

ri. ³¹ Wú aq, nàng zogûng dut lò mù luî, yuqzo rayuq bau râ nghut lhê. Yhâng é myîng lé gi, 'Yesuq' nghû luî, nàng myhîng byi ra râ nghut lhê. ³² Yhang gi, hpung bô sù dut râ nghut mù, Myhang htáng htúm Su é Yhangzo gâ é huî râ nghut lhê. Yhumsîng Garai Gasang gi, yhang lé, yhâng é îchyí îwa Dawiq é hkohkâm tanghkuq lé, byi râ nghut mù luî, ³³ Yhang gi, Yakup yhûm* lé hkâ-nhám le ru-up nyî râ nghut lhê. Yhâng é mingdán le htum nghu é joq râ a nghut." ga luî, yhang lé taî ri.

³⁴ Haú hkûn, Mariq gi, "Ngò gi, zomyi gyîng ru nghut ashî, haú gi, hkâsu wó dut râ lú?" ga luî, maumang lagyo lé tû taî ri.

³⁵ Haú maumang lagyo gi, "Choyiyúng Woi-nyí náng é ahtoq má jé lé mù, Myhang htáng htúm Su é wum-o a-tsam gi, nàng lé shum gum to byi luî, haú baú lò râ Choyiyúng sù le gi, Garai Gasâng é Yhangzo ga kó râ nghut lhê. ³⁶ Hau htoq agó, wú aq, náng é amyû suisho baùdung myhí Elizabet lháng, mang bê le yuqgè zo wun to bê. Ahkuí, zogûng dut é lhamó hkyuq hkyap wàng bê nghut ri. ³⁷ Hkâsu mù gâ le, Garai Gasang a wó kut é haî le a joq." ga luî, yhang lé tû taî ri.

³⁸ Haú hkûn, Mariq gi, "Yhumsîng é jùnmyhí ngò nghut nyî lhê; náng é dang eq rajung za ngá chyáng dut

lò sháng gaq." ga tû taî ri. Hau htâng, maumang lagyo gi, yhâng chyáng mai ló byuq bê.

Elizabet Lé Mariq Ê Huî É Hkyô

³⁹ Hau htâng hkâ-í a myáng má, Mariq gi, Yuda mau bum mau mâ é wà rawà shut hân hân e ló luî, ⁴⁰ Zahkariq é yhûm má wàng mù, Elizabet eq huî nyo lhûm ri. ⁴¹ Mariq é dangtê lé Elizabet wó gyo jáng, yhâng é unghkaû mâ é zoshâng gi, byam chyû lo ri. ⁴² Elizabet le, Choyiyúng Woi-nyí byíng to mù luî, Mariq lé htê mó èq taî é gi, "Myiwe banshoq má, nàng gi, hkungsô wó dik sù nghut ri. Náng é unghkaû mâ é zoshâng le hkungsô wó nyi ri ô! ⁴³ Ngá Yhumsîng é yhângnu ngá chyáng jé lé é jeju gi, hai é yanmai nghut bê lú? ⁴⁴ Wú aq, náng dangtê lé wó gyo kat jáng, ngá unghkaû mâ é zoshâng gi, gabú luî byam chyû nyi ri. ⁴⁵ Haú Yhumsîng taî é dang gi, gè gè dik lò râ nghut lhê ga luî, lumjîng é myiwe gi, hkungsô wó nyi ri." gâ ri.

Mariq É Hkya-on Dang

⁴⁶ Haú hkûn, Mariq gi,

"Ngá é i-myit mai haú Yhumsîng lé hkya-on nyi lhê,

⁴⁷ ngá é woi-nyí le, Garai Gasang ngá é hkyi yù Sù má gabú nyi lhê.

* 1:33 Yakup yhûm nghu e gi, Israelaq amyû lé gâ lhê.

48 Ngò Yhâng é jùnmyhí myit nyhum nyi é lé, Yhang myàng byi bê nghut ri.

Wú aq, ahkuí mai ipyat dedu má, ngo lé gi, hkungsô wó nyi sù, gâ nyi bekô râ nghut lhê.

49 hkâsu mù gâ le, Wum-o Bo Dik é Garai Gasang gi, ngo lé mauhpo mù mó kut byi bê nghut ri,

Yhâng é myìng gi, chy-oiyúng nyi ri ô.

50 Yhang lé gyuq hoq nyi bâng é ahtoq má, Yhang shogyo nhikmyîn é hkyô gi,

pyat bán hkangmó jé shoq hkâ-nhám le joq nyi râ nghut lhê.

51 Yhâng é wum-o bo é loq èq mauhpo mù mó pé lé tân shit bê.

Yhumsîng myit é hkyô má nghutbûn nyi é bang lé, Yhang lhoq pyo pyám bê.

52 Zaugun suwún wuî lé gi, zau zûng tanghkuq mai lhoq hkyô pyám mù,

i-myit nyhûm bang lé gi, lhoq myhâng bê nghut ri.

53 Zòmut hui bang lé gi, ge é zoshuq gyi shoq byi tso mù,

sutzè wó bang lé gi, akôm nhang kat bê nghut ri.

54-55 Nga-nhûng é îchyí îwâ pé lé taí tô é dang eq rajung za, Abraham eq yhangzo yhangshu pé lé,

hkâ-nhám le shogyo nhikmyîn nyi râ gâ e lé myit bûn nyi é yanmai,

Yhâng é dui-nhâng zoshâng Israelaq byu pé lé hku baú nyi ri."

ga luí, taí ri.

56 Mariq gi, Elizabet chyáng lhamó sum hkyap kô nyi mù luí, yhûm shut dum taú lò byuq bê.

Wui-myhup Sará Yohan Baú É Hkyô

57 Hau htâng, Elizabet gi, zoshâng bau râ buinyi jé mù, yuqgè zo bau bê. 58 Yhang lé haû-í kô é jeju Yhumsîng tân shit é hkyô lé, yhâng é yhumkyo buinùm wuî eq mung moq gumang wuî wó gyo kojáng, yhang eq rahá gabú nyi akô.

59 Ahkuí shit nyi jé jáng, yhangmoq gi, zoshâng haû lé ahpyo-kuq hpyit byi râ matú lé kôluí, yhâng wâ é myìng eq rajung za, Zahkariq ga myhíng byi râ dâ akô.

60 Nghut kôlhâng, yhâng nu gi, "A nghut, Yohan nghû sheq myhíng râ nghut lhê." ga tú taí ri.

61 Yhangmoq gi, "Náng é amyû suisho má le, haû su gâ é myìng rayuq le a bo wú shi." ga luí, yhang lé taí akô.

62 Haú hkûn, zoshâng haû lé hkâsu nghû myhíng nau lhê laq ga, yhâng wa lé loq lik lik shit mù myi akô. 63 Zahkariq gi, kê jung longpá dúng yù mù, "Yhâng é myìng gi, Yohan nghut lhê." ga kê shit ri. Haû mù, lhunglhâng bang gi, maú byuq bum akô. 64 Haú hkûn

jáng, Zahkariq gi, nhut hkum bóng lô mù, dang wó nyô lui, Garai Gasang lé hkyá-ôn nyi ri. ⁶⁵ Haû su dut é hkyô lé, wó gyô é awui ayàm lhinghkyuq mâ é lhunglhâng bang gi, gyuq maú byuq bùm kômù, Yuda mau bum mau ramau gón taí pyo ló bum akô. ⁶⁶ Wó gyô é lhunglhâng bang gi, haû hkyô lé yhumsing é i-myt unghkaû má kat to mù, "Zoshâng shî gi, hkâsu dut lò râ sù nghut lê lú?" ga myit wú nyi akô. Haî mù gà le, haû Yhumsing é loq gi, yhang eq rahá nghut nyi é yanmai nghut ri.

Zahkariq É Myiqhtoi Dang

⁶⁷ Haú hkûn, zôshang é yhângwa Zahkariq gi, Chyoiyúng Woi-nyí byíng lô mù, myiqhtoi dang dong taí é gi,

⁶⁸ "Haû Yhumsing, Israelaq é Garai Gasang lé hkyá-ôn sháng ô!

Haî mù gà le, Yhang gi, Yhâng é amyû lé, lé kûm wú mù lui, lé hkyi yù bê nghut ri.

⁶⁹ Garai Gasang gi, Yhâng é dui-nhâng zoshâng, Dawiq é amyû mai nga-nhông é matú

wum-o bo é hkyi yu é hkyuî† lé, yuq htoq lô nhâng bê.

⁷⁰ Shí hkyô gi, a-nham pyat mai yhâng é chyoiyúng myiqhtoîpê é nhut mai taí tô é eq rajung za nghut ri.

⁷¹ Haû hkyuî gi, nga-nhông lé nga-nhông é gye pê chyáng mai le, a nguì a naù bang banshoq é loq mai le, hkyi yù râ nghut lê.

⁷² Îwa Garai gi, nga-nhông é îchyí îwa pé lé shogyo nhikmyin hkyô lé tân shit râ matú, Yhang byí tô é chyoiyúng dangshikaq lé a tô-myhí nghut ri.

⁷³ Haû gi, nga-nhông é chyiké Abraham lé byi tô é danggidiq nghut lê.

⁷⁴⁻⁷⁵ Nga-nhông lé gye pê loq mai hkyi yù râ eq, nga-nhông asak dui tô é buinyi banshoq má,

Yhâng é hí má a gyuq a kyum é za, chyoiyúng é eq dingmán é hkyô mai,

Yhang lé wó dojaú nyi nhâng râ matú, Yhang jé lé é nghut lê.

⁷⁶ Ngá zo ê, nàng gi, Yhumsing é hí má, e ló mù lui, Yhâng é hkyô lé hen lajang byi râ sù nghut é yanmai,

nang lé Myhang htáng htúm Su é myiqhtoi ga kó râ nghut lê.

⁷⁷ Nàng gi, Garai Gasâng é byu pé lé, yhangmoq é yubak mara hkyut pyám byí é dong,

hkyi yu é hui râ hkyô lé taí kyo râ sù nghut lê.

⁷⁸ Haî mù gà le, Garai Gasâng é shogyo nhikmyin é

† 1:69 Hkyi yu é hkyuî gi, Yhumsing Yesuq lé taí é nghut ri. ‡ 1:78 Napsûn bui gà é gi, Yesuq lé taí é nghut lê.

yanmai, napsûn bui†
gi, mauhkûng mai nga-
nhûng chyáng htoq lé
lô râ nghut lhê.

79 Yhang gi, mauchut hkaû\$
eq shî wup hkaû má
lúng to bang lé builoq
su duqbó byi râ eq,
nga-nhúng lé nguínón sim-
saq é hkyô shut shuí e
lô râ sù nghut lhê." ga
ri.

80 Zoshâng haú gi, kô lò mù,
woi-nyí wum-o bo lò luí, Is-
raelaq byu pê chyáng htoq
shit lo é buinyi jé shoq, yoso
pé má nyi nyi ri.

2

Betlehem Wà Mó Má Yesuq
Hku Lo É Hkyô
Mht 1:18-25

1 Buinyi haú pé má, Romaq
hkoséng ming banshoq mâ
é byù lhunglhâng bang gi,
myìng jihpán kat râ matú,
hkoséng Kehtaq Augustuq
chyáng mai mungdang htoq
ri. 2 Jihpán haú lé sâng-hi
dàm guq hi é gi, Kuireni ga
sù Suriq mau má mauzau kut
nyi é hkûn nghut ri. 3 Haú
hkûn, byù du jup gi, myìng
jihpán kat râ matú, ó le ô é wà
shut lô bum akô.

4 Haú mù, Yosep le Dawiq
é awut ashín nghut é yanmai,
Galile mau Nazaret wà mai,
Yuda mau mâ é Betlehem gâ
é Dawiq é wà shut, 5 yhang
dûng tô é myiwe Mariq eq
rahá myìng kat lhóm râ matú

jé doq lô akô; Mariq kúm gi,
gungloq lai to bê nghut ri.
6 Haú Betlehem má nyi tô ashí
le, Mariq gi, zo hkû râ buinyi
jé mù, zomún yuqzo lé bau
bê. 7 Yhang gi, zoshâng haú
lé panchoq eq htup mù no
tso langhkang má lheq tô ri;
haí mù gâ le, bíng yhûm má
yhangmoq nyi râ jowò a joq
lo é yanmai nghut ri.

Sau Zúng Bang Yesuq
Chyáng Jé Lé É Hkyô

8 Ahkuí, haú ginwáng mâ
é sau zúng zo bang gi, sau
zúng jang má yhangmoq
é sau hpúng lé, myín lé
zúng nyi akô. 9 Haú hkûn,
Yhumsíng é maumang lagyo
gi, yhangmoq é hí má lé htoq
yap shit to mù, Yhumsing
é hpungwup shingkang gi,
awui ayàm má duqbang lò
luí, yhangmoq gyai gyuq
bum akô. 10 Maumang
lagyo gi, "Hkâgyuq kó, byù
lhunglhâng bâng é matú, gyai
yhang gabú é danglù, ngò
nungmoq chyáng wun lé lo
lhê. 11 Hkû-nyí lhê buinyi má,
Hkrisduq* nghu é Yhumsíng
nghut é hkyi yù Sù gi, Dawiq é
wà má nungmoq é matú hku
to bê. 12 Nungmoq é matú
kumlhá gi, zoshâng nyheqnú
rayuq panchoq eq htup mù,
no tso langhkang má lheq
to lánq ra nghut lhê." ga luí,
yhangmoq lé tai ri.

13 Haú hkûn jáng yhang,
mauhkûng bang rajùm rayò

\$ 1:79 Mauchut hkaû gâ é gi, Garai lé a sé mù woi-nyí má shi tô é bang lé gâ lhê.

* 2:11 Grik dong Hkrisduq gâ é gi, xú but hui Sù gâ é lichyúm nghut mù, Hebre dong "Mesaia" gâ é eq rajung za nghut lhê.

htoq lô mù, maumang lagyo haù eq rahá Garai Gasang lé hkyá-ôn é dang gi,

14 "Htoq tsáng myhâng má, Garai Gasang gi, hpungwup shing kang bo nyí sháng gaq ô!

Myigùng htoq má le, Yhang ô nau é byu pé má, ngu- ingón é gi, hkâ-nhám le joq nyí sháng gaq ô!"
gâ akô.

15 Maumang lagyo pé, yhangmoq chyáng mai, mauhkûng shut dum ló byuq jáng, sau zúng bang gi, "Sà! Betlehem wà mó má jé shoq yhang, nga-nhúng ê mù, ahkuí za Yhumsing nga-nhúng lé lé shit kyô lai ló bê hkyô lé ê gôn wú sháng." ga luí, rayuq eq rayuq tái lhum akô.

16 Hau htâng, yhangmoq gi, hân hân ê luí, Mariq eq Yosep lé le, no tso langhkang má lheq tô é zoshâng ny-heqnú lé le, ê myàng akô.

17 Zoshâng haù lé, yhangmoq myàng kôjáng, zoshâng haù eq séng luí yhangmoq lé, lé tái kyô é dang lé, tái pyô kat bekô. 18 Wó gyô é bang ban-shoq gi, haù sau zúng bang tái kyô é dang lé, maú byuq bum akô. 19 Mariq kúm gi, dut lo é hkyô pé eq wó gyô é dang ban-shoq lé unghkaù má matsing yù mù luí, nik nik myit wú nyi ri. 20 Sau zúng bang gi, yhangmoq lé maumang lagyo tái kyô kat é dang eq rajung za, wó gyô yù,

wó myang yu é hkyô pé ban-shoq é yanmai, Garai Gasang lé hkyá-on kungtôn uchyang dum taù ló bekô nghut ri.

Yesuq Lé, Noqkuq Yhùm Má Shuí E É Hkyô

21 Zoshâng haù, shit nyí jé mù ahpyo-kuq hpyit byi rá buinyí má, yhang unghkaù má a lúng shi mai maumang lagyo myhâng tô é myìng eq rajung za, yhang lé, "Yesuq" ga luí, myhâng byi akô.

22 Mosheq é tarâ eq rajung za, yhangmoq é lhoq san lhoq sêng é buinyi byìng jáng, Yhumsing é tarâ má, "Zomún yuqzo hkanmó gi, haù Yhumsing é hí má chyoiyúng sù wó nghù rá matú, Yhumsing chyáng ê ap byi rá lhê."* gâ é eq,

23 "Hpûngkyui razúm, haù a nghut jáng, nghoqmyhù zo í du,"* hkungga byi rá lhê ga kâ tô é eq rajung za, 24 Mariq eq Yosep gi, zoshâng haù lé shui mù Yerusalem wà mó shut ê akô.

25 Haù hkûn, Simeon gâ é mangzo rayuq, Yerusalem wà mó má nyi ri. Haù yuq gi, dingmán é eq tarâ cháng sù nghut mù, Israelaq lé nhik lhoq títng rá ahkyíng lé lánng nyí sù nghut ri; haù Chyoiyúng Woi-nyí le, yhâng é ah-toq má nyi nyi ri. 26 Yhang gi, haù Yhumsing Hkrisduq lé a myang é za, shí rá a nghut, ga Chyoiyúng Woi-nyí eq tûn shit tô é hui sù nghut lhê. 27 Yhang gi, Chyoiyúng Woi-nyí eq shui mù, noqkuq

* 2:22 Htoq Ló 13:2,12 * 2:23 Nhong 12:8

yhúmhaû má ê jé nyi tô é hkûn lé, Mariq eq Yosep gi, zoshâng Yesuq lé htûng tarâ eq rajung za kut byi râ matú, noqkuq yhúmhaû má shuí wang ló kôjáng, ²⁸ Simeon gi, zoshâng lé loq eq lhom bún yû mù, Garai Gasang lé hkya-ôn é dang gi,

²⁹ "Yhumsîng ê, náng é dang-gidiq gi, dik bê nghut ri; hkû-nyí náng é jùn ngò gi, ngingón é èq wó shi ló berâ nghut lhê.

³⁰ Haî mù gâ le, byù lhunglhang bâng é matú, náng lajang tô é hkyi yù hkyô lé, ngá myoq èq yhang wó myâng bê.

³¹ Haû gi, byù myû chângjup wó myâng râ matú, náng lajang to byi é nghut mù,

³² tûngbaù pé lé, tengmán hkyô má bui su duqbó mù hpông shit râ matú le, náng é amyû Israelaq é hpungwup shingkâng matú le nghut nyi ri."

gâ ri.

³³ Yhângnu eq yhângwâ nhik gi, zoshâng Yesuq é hkyô lé Simeon taí é yanmai, maú byuq akô. ³⁴ Simeon gi, yhangmoq lé shimân byi mù, Yhâng nu Mariq lé, "Wú aq, zoshâng shi gi, Israelaq ming mâ é byù myo myô é matú lingbat jowò eq myo myô é matú kô lò myhang lò râ hkyô le, byù myo myo taí he pyám râ kumlhá matú le, hkyin tô

é hui sù nghut ri. ³⁵ Haû mù, byù myo myô é unghkaû má, myit mi-myt lé lhoq htoq shit râ nghut lhê. Náng é myit nhiklum má, shâm chûn èq htaû kyâng kat é su gâ é lé, náng hui zo râ nghut lhê." ga taí ri.

³⁶ Ashe amyû mâ é Hpanuelaq é yhangzo, Annaq gâ é myiqhtoi myhí rayuq nyi ri; yhang gi, ipyat gyai ko bê. Yhang gi, zomyi pyat mai, yhanglâng eq nyhit zân za nyi luî, shit xe myi zân jé shoq chuimó mó nyi to sù nghut ri. ³⁷ Myiwe haû gi, noqkuq yhûm mai a htoq é za, nyí myín a ga noqkuq dojaú nyí mù, zoshuq gám luî kyûdûng nyi ri. ³⁸ Simeon dang ban taí jáng, Annaq gi, hui lé lô mù, Garai Gasâng jeju lé hkya-on luî, Yerusalem wà mó lé Garai Gasang hkyi yù râ gâ é lé, myit lum to bang lhunglhang lé, zoshâng hau é hkyô taí kyô ri.

³⁹ Yosep eq Mariq gi, kut râ pé lé haû Yhumsing é tarâ joq é dông ban kut jáng, Galile mau mâ é yhangmoq wà Nazaret shut dum taú ló bekô. ⁴⁰ Zoshâng haû gi, kô lò mù, wum-o bò lo é eq, hpaqchyî byéng-yá le byíng nyi ri. Garai Gasâng jeju le, Yhâng é ahtoq má joq nyi ri.

Noqkuq Yhúmhaû Má Zoshâng Yesuq Jé Nyi É Hkyô

⁴¹ Yhângnu yhângwâ nhik gi, Lhoqlhai Poí jé hkangmó, zàn wui Yerusalem wà mó má ê é kut akô. ⁴² Yesuq raxe í zân jé jáng, poí haû, é bo

lòm ra htungli joq é eq rajung za, yhangme wuî yhanghpe wuî doq ló akô. ⁴³ Haû poî buinyî lai luî, dum taû lo é hkûn, zoshâng Yesuq gi, Yerusalem wà mó má nyî gyó tô ri; nghut kôlhâng, yhângnu yhângwâ nhik gi, a sé kó. ⁴⁴ Yesuq lé rahá lo é luzúm wui chyáng bò râ su ngàm kômù luî, Yosep eq Mariq gi, ra-nyî buigyùm chap sô ló bê htâng má, mung moq wuî eq, sê lhûm é buinùm ji-myi wui chyáng Yhang lé châng ho akô. ⁴⁵ Yhangnhik gi, Yesuq lé a myàng kôjáng, Yhang lé châng hô uchyang, Yerusalem wà mó má dum taû jé e ló bekô. ⁴⁶ Ahkuî, sum nyî nghû râ nyî sheq, no-qkuq yhúmhmaû má, tarâ sará pê é gung gûng má zùng to mù, yhangmoq é dang lé gyo yù luî, dum taû myi myi kut nyi é lé, yhangnhik ê myàng akô. ⁴⁷ Yhâng é dang wó gyô é bang banshoq gi, Yhâng é unuq nyau é hkyô lé le, Yhang tâ taî é dang lé le, maú nyi akô. ⁴⁸ Yhang lé myàng jáng, yhangnhik maú byuq kômù luî, yhângnu gi, "Ngá zo ê, haî mù luî ngá-nhik lé isu kut lhê lhú? Wú aq, náng wa eq ngá-nhik gi, myit myo myit chiq é èq, náng lé jaq châng ho pyám bê." ga luî, Yhang lé taî ri.

⁴⁹ Yhang gi, "Haî mù luî, ngo lé châng ho akô lhú? mauhkûng mâ é ngá Wâ é yhûm má ngò nyi râ lhê le gi, nungnhik a sé kó lhú?" ga luî, yhangnhik lé tâ ri.

⁵⁰ Nghut kôlhâng, yhangnhik gi, Yesuq taî é dang lichyúm lé, a sê gyo kó.

⁵¹ Yesuq kúm gi, yhangnhik eq rahá Nazaret wà shut taû jé gyó ló luî, yhangnhik nyo é dang lé gyo mù nyi tô ri. Yhângnu Mariq gi, dut lai lò bê hkyô pé banshoq lé, yhâng é myit nhiklhum má matsîng tô ri. ⁵² Yesuq gi, hpaqchyî byéng-yá kûng zet lo é eq, gunghkyâng kô myhang lò mù, Garai Gasâng é hí má le, byu hí má le, myoq-dong wó lo nyi ri.

3

Wui-myhup Sará Yohan Mhoqshit É Hkyô

Mht 3:1-12; Mrk 1:1-8; Yhn 1:19-28

¹ Romaq hkoséng Kehtaq Tiberuq gi, hkó zung é raxe ngo zân nghut é hkûn, Yuda mau má Pontu Pilat gi, mauzau ayá má; Galile mau má, Herut gi, mauzau ayá má; Ituri eq Trakuni mau má, Herut yhanggu Hpilip gi, mauzau ayá má; Abili mau má, Lusanu gi, mauzau ayá má; ² Anna eq Kayahpaq gi, hkyangjong mó mù má, kut nyi akô. Haú hkûn, Garai Gasâng é mungdang gi, yoso má nyi tô é, Zahkariq é yhangzo Yohan chyáng jé lé ri. ³ Haû mù, yhang gi, Yodan làng yàm jowò hkanmó má, sô jón wún luî, yubak mara hkyut pyám byí é hui râ matú myit lhîng mù, wui-myhup hkâm* yù râ hkyô lé, hko kyô

* **3:3** Wui-myhup hkâm gâ é gi, baptisma lé gâ é nghut lhê.

nyì ri. ⁴Haû gi, myiqhtoi Esai-aq laiká má,

"Haû yoso má, byù rayuq garû taí é htê gi,

'Haû Yhumsing é matú, hkyô hen to keq, Yhâng é matú hkyô lhoq nyhang to keq;

⁵ wuìhkung langhkop hkanmó lé lhoq pyíng ra râ nghut lhê;

bùm eq wingkáng hkanmó lé hpyit pyám ra râ nghut lhê;

agoí aguq é hkyô hkat hkanmó lé lhoq nyhâng ra râ nghut lhê; ahkung ahkop dut é hkyô hkat hkanmó lé lhoq rhá ra râ nghut lhê.

⁶ Haú hkûn, byù banshoq gi, Garai Gasâng é hkyi yù hkyô lé myàng râ nghut lhê."[✧]

ga luí, kê tô é eq rajung za nghut ri.

⁷ Shiwa byù rajùm rayò gi, Yohan é loq má wui-myhup hkâm yù râ ga luí htoq lé lô kôjáng, Yohan taí é gi, "Duq htan é lhangmuì amyû pé† ê, jé lô râ yubak dam mai wó hpanq lut kó sháng gaq ga, nungmoq lé ó yuq taí pùn é lhú? ⁸ Myit lhíng hkyô eq gíngdán é ashi zui keq. 'Nga-nhúng gi, Abraham é yhangzo yhangshû pé nghut lhê.† nghû luí, yhumsing é i-myit unghkaú má hkâtaí kó.

Hkâsu mù gâ le, ngò, nungmoq lé taí kyo kôlé, Garai Gasang gi, luqgok shí pé mai, Abraham é matú yhangzô pé wó hpan htoq kat lhê. ⁹Ahkuí lháng, Garai Gasang gi, Yhâng é wazung lé haû siggâm wang pé má tô to bê nghut ri; haû mù, ge é ashi a zui é agàm hkanmó lé gi, htuoq lhêng pyám mù, myi má dú kat pyám râ nghut lhê." gâ ri. §

¹⁰ Haú hkûn, shiwa byu pé gi, "Haú nghut le gi, ngamoq hkâsu kut le gè râ lhú?" ga luí, yhang lé myí akô.

¹¹ Yhang gi, "Bu í dung wó sù gi, bu a wó sù lé, gàm byi sháng gaq; zo shuq wó sù le, a wó sù lé, gàm byi sháng gaq." ga luí, yhangmoq lé tû taí kat ri.

¹² Kang guq bang le, wui-myhup hkâm yù râ ga lé lô mù, "Sarâ ê, ngamoq gi, hkâsu kut le ge râ lhú?" ga luí, yhang lé myí akô.

¹³ Yhang gi, "Nungmoq hkyui yù râ masat tô é htoq lai shoq hkâyû kó." ga luí, yhangmoq lé taí ri.

¹⁴ Gyezô pé ra-am le, "Ngamoq gi, hkâsu kut le gè râ lhú?" ga luí, yhang lé lé myí akô.

Yohan gi, "Ó lé le hkâkyuq zo ko; a tara é dông mara le hkâhûn kó; nungmoq wó e ahpaù eq gé bûn nyì keq." ga luí, yhangmoq lé taí ri.

✧ 3:6 Esai 40:3-5 † 3:7 Lhangmuì amyû pé gâ é gi, Lukaq 3:7-10 má bo é Hparishe eq Saduke pé lé taí é nghut ri. ‡ 3:8 Nga-nhúng gi, Abraham é yhangzo yhangshû pé nghut lhê gâ é gi, Abraham é yhangzo yhangshu nghut é yanmai, Garai Gasang jéyáng é lé a hui râ ga, myit yu é hkyô nghut ri. § 3:9 Bun zo shí lhùm é lichyúm gi, myit a lhíng bang lé, Garai Gasang jéyáng é buinyi jé râ nghut lhê ga nau é nghut ri.

15 Shiwa byu pé kúm gi, Hkrisduq lé myit láng nyi tô é bang nghut é yanmai, Yohan lé haú yuq nghut lhê laq ga yhumsing é i-myt unghkaû má myit wú nyi bum akô. 16 Haú hkûn, banshoq bang lé Yohan taí é gi, "Ngò gi, nungmoq lé, wui èq za wui-myhup hkâm byi lhê; nghut kôlhang, ngá htoq má wum-o a-tsam je bo é sù rayuq jé lé lô râ nghut lhê. Ngò gi, yhâng é hkyî-tsung tui lé hpyî râ lháng a gingdán; Yhang gi, Chyoiyúng Woi-nyí má le, myi má le, nungmoq lé wui-myhup hkâm byi râ nghut lhê. 17 Yhang gi, loq má byò chung to mù, guq chyârâng mâ é guq bùm lé hik sân pyám luí, já é guq cham lé gi, guqchyí má tsing kat to mù, guqsôm lé kúm gi, hkâ-nhám le shi byuq a sê é myí èq nyhê hkyô pyám râ nghut lhê." gâ ri.* 18 Haú mù, Yohan gi, byù haú bang lé gotû dang myo myo èq lhoq pun lhoq kying mù, gabú danglù lé hko kyô nyi ri.

19 Nghut kôlhang, hkâ-myháng a myáng má mauzau Herut gi, yhanggû é yhangmyi Herudiaq lé lú yu é hkyô eq, yhang kut shut é gotû a ge é mù banshoq é yanmai, Yohan gi, yhang lé tân mhoqshit bê nghut ri. 20 Mara haú pê htoq agó, Herut dum kut jat yu é mara gi, Yohan lé htóng má lhûng kat é nghut ri.

Yesuq, Wui-myhup Hkâm

* 3:17 Haú eq rajung za, Hkrisduq gi, a ge é byu pé eq ge é byu pé lé gam hkoq pyám râ nghut lhê.

Yu É Hkyô

Mht 3:13-17; Mrk 1:9-11

21 Yohan lé htóng má a lhûng kat shimá, byù myo myo gi, wui-myhup hkâm yu nyi kô é hkûn, Yesuq le Yohan chyáng wui-myhup hkâm yù mù, kyûdûng nyi le, mauhkûng bóng lô mù, 22 haú Chyoiyúng Woi-nyí gi, hpûngkyui gunghkyâng sù é dông mai Yhâng ahtoq má lé gyó nô ri. Haú hkûn, "Nàng gi, Ngò chyitdap é Ngá zo nghut lhê; Náng é ahtoq má Ngò gabú myit ngón nyi lhê." ga mauhkûng mai danghtê htoq lo ri.

Yesuq É Byù Xik Shap Kyô É Hkyô

Mht 1:1-17

23 Yesuq gi, Yhang mù zuí hi é hkûn, asak sum xê zàn kô nghut bê; Yhang lé byù hkyam dông gôn wú jáng, Yhang gi, Yosep é yhangzo nghut ri; Yosep gi, Heli é yhangzo, Heli gi, Mahtat é yhangzo, 24 Mahtat gi, Lewiq é yhangzo, Lewiq gi, Melahki é yhangzo, Melahki gi, Yannai é yhangzo, Yannai gi, Yosep é yhangzo, 25 Yosep gi, Matahtiaq é yhangzo, Matahtiaq gi, Amo é yhangzo, Amo gi, Nahum é yhangzo, Nahum gi, Esali é yhangzo, Esali gi, Nagai é yhangzo, 26 Nagai gi, Maat é yhangzo, Maat gi, Matahtiaq é yhangzo, Matahtiaq gi, Semai é yhangzo, Semai gi, Yosek é yhangzo, Yosek gi,

Yodaq é yhangzo, ²⁷ Yodaq gi, Yohan é yhangzo, Yoanan gi, Resa é yhangzo, Resa gi, Zerubabelaq é yhangzo, Zerubabelaq gi, Shalahtila é yhangzo, Shalahtila gi, Neri é yhangzo, ²⁸ Neri gi, Melahki é yhangzo, Melahki gi, Adi é yhangzo, Adi gi, Kusam é yhangzo, Kusam gi, Elamadam é yhangzo, Elamadam gi, Era é yhangzo, ²⁹ Era gi, Yoshuq é yhangzo, Yoshuq gi, Elieze é yhangzo, Elieze gi, Yorim é yhangzo, Yorim gi, Mahtat é yhangzo, Mahtat gi, Lewiq é yhangzo, ³⁰ Lewiq gi, Simeon é yhangzo, Simeon gi, Yudaq é yhangzo, Yudaq gi, Yosep é yhangzo, Yosep gi, Yonam é yhangzo, Yonam gi, Eliakim é yhangzo, ³¹ Eliakim gi, Mela é yhangzo, Mela gi, Menaq é yhangzo, Menaq gi, Matahta é yhangzo, Matahta gi, Nahtan é yhangzo, Nahtan gi, Dawiq é yhangzo, ³² Dawiq gi, Yese é yhangzo, Yese gi, Obet é yhangzo, Obet gi, Bua é yhangzo, Bua gi, Salamun é yhangzo, Salamun gi, Nashon é yhangzo, ³³ Nashon gi, Aminada é yhangzo, Aminada gi, Arni é yhangzo, Arni gi, Hesrun é yhangzo, Hesrun gi, Hparet é yhangzo, Hparet gi, Yudaq é yhangzo, ³⁴ Yudaq gi, Yakup é yhangzo, Yakup gi, Isak é yhangzo, Isak gi, Abraham é yhangzo, Abraham gi, Htara é yhangzo, Htara gi, Nahura é yhangzo, ³⁵ Nahura

gi, Seruk é yhangzo, Seruk gi, Re-u é yhangzo, Re-u gi, Hpelek é yhangzo, Hpelek gi, Ebera é yhangzo, Ebera gi, Shela é yhangzo, ³⁶ Shela gi, Kainan é yhangzo, Kainan gi, Arhpaza é yhangzo, Arhpaza gi, Shem é yhangzo, Shem gi, Noaq é yhangzo, Noaq gi, Lamek é yhangzo, ³⁷ Lamek gi, Mehtusela é yhangzo, Mehtusela gi, Enuq é yhangzo, Enuq gi, Yaret é yhangzo, Yaret gi, Mahelela é yhangzo, Mahelela gi, Kainan é yhangzo, ³⁸ Kainan gi, Enu é yhangzo, Enu gi, Shet é yhangzo, Shet gi, Adam é yhangzo, Adam gi, Garai Gasâng é yhangzo nghut ri.

4

Yesuq Lé Tsadán Gunglaú É Hkyô

Mht 4:1-11; Mrk 1:12-13

¹ Yesuq gi, Chyoiyúng Woinyí èq byíng mù, Yodan làng mai dum taù lo é hkùn, Chyoiyúng Woi-nyí gi, Yhang lé yoso shut shuí e ri. ² Haú má, Yesuq gi, buinyi myi xê nyí jé shoq, nat Tsadán èq gunglaú é huí ri. Buinyi haú gyoro má, Yesuq gi, haí le a zô é yanmai, zòmut hui bê nghut ri.

³ Haú mù luí, nat Tsadán gi, "Nàng, Garai Gasâng é Yhangzo nghut le gi, luqgok shí lé muk dut nhâng aq." ga luí, Yhang lé taí ri.

⁴ Haú hkùn, Yesuq gi, "'Byù gi, muk èq za asak duì râ a nghut.' ga luí, Chyúmdang má kâ tô ri."* ga yhang lé tú taí ri.

⁵ Hau htâng, nat Tsadán gi, Yesuq lé, gyai yang myhang é bùm htoq má shuí doq ló mù, mingkan má joq é mingdán pé banshoq lé razup má za tún shit luí, ⁶ "Shí ahkáng ayá banshoq eq haú mingdán é hkikhkâm hkyô banshoq, ngò nang lé wó byí lhê; hkâsu mù gâ le, haú pé banshoq gi, ngo lé ap byí to bê nghut mù, ngò byí nau é sù ó yuq lé nghut kôlhang, byí râ nghut lhê. ⁷ Haú mù, Nàng, ngo lé noq é nghut jáng, shí pé banshoq Náng é dut râ nghut lhê." ga, Yesuq lé taí ri.

⁸ Haú hkûn, Yesuq gi, "Haú Yhumsîng náng é Garai Gasang lé za, nâng noqkuq dojaú ra râ nghut lhê.* ga luí, Chyúmdang má kê tô ri." ga luí, yang lé tú taí ri.

⁹ Nat Tsadán gi, Yesuq lé Yerusalem wà mó má shuí ê mù, noqkuq yhum je myhang é shũhtâng htoq má yap nhang to luí, "Nàng, Garai Gasâng é Yhangzo nghut le gi, shí mai byam gyó kat wú aq. ¹⁰ Hkâsu mù gâ le,

'Nang lé upzúng byí nyi râ matú, Garai Gasang gi, Yhâng é maumang lagyô pé lé taí to râ nghut mù,

¹¹ luqgok má nâng é hkyî a ló htung shoq, yangmoq é loq èq Nang lé lhom bún yû kó râ nghut lhê.*

ga luí, Chyúmdang má kê tô ri." ga taí ri. ¹² Nghut kôlhang, Yesuq gi, "'Haú Yhumsîng, nungmoq é Garai Gasang lé, wó chyam wú râ a nghut.* ga luí, Chyúmdang má bo tô ri." ga, yang lé tú taí ri.

¹³ Nat Tsadán gi, gunglau é hkyô pé banshoq ban kut jáng, ahko ahkáng láng wú uchyang yhâng chyáng mai byam gâng nyi byuq ri.

Yesuq Lé Nazaret Wà Bang He-ngik Pyâm É Hkyô

Mht 4:12-17; 13:53-58; Mrk 1:14-15; 6:1-6

¹⁴ Yesuq kúm gi, Chyoiyúng Woi-nyí wum-o byíng é èq Galile mau shut dum taú lo ri. Haú mau jowò hkangmó má, Yhâng é hkyô lé taí pyo ló bùm bekô. ¹⁵ Yhangmoq é tarajong pé má, Yesuq mhoqshit byi mù, lhunglhâng bang gi, Yhang lé taí hkya-ôn nyi bum akô.

¹⁶ Hau htâng má, Yhang nyi kô lo é Nazaret wà má dum taú jé ló bê; Yhang gi, hkânhám le kut nyi é eq rajung za, Bánno buinyi* lé tarajong má wang ê mù, laiká nghap râ ga toq yap é hkûn, ¹⁷ Yhang lé myiqhtoi Esai-aq chyúmding byi kôjáng, Yhang chyúmding haú lé hpông kat le,

¹⁸ "Yhumsîng é Woi-nyí gi, ngá é ahtoq má nyi nyi ri;

hkâsu mù gâ le, asho awuí é bang lé gabú danglù hkô kyo râ matú,

* 4:8 Tarâ Pun 6:13 * 4:11 Hkya-on 91:11-12 * 4:12 Tarâ Pun 6:16 * 4:16 Bánno buinyi gâ é gi, Yudaq byu pé nòmu é buinyi lé gâ lhê. Ahkui lhê é dông ga jáng, Bánno buinyi gi, bat htoq hkyuq nyi lé âng ri.

Yhang ngo lé hkyin yù bê.

Htóng lúng bang lé lhoq htoq râ hkyô eq, myoqjit bang lé myoq dum myàng nhâng râ hkyô hkô kyo râ matú le,

zik zo huí é bang lé nhang kat nhâng râ eq,

¹⁹ Yhumsing, Yhâng é byu pé lé hkyi yù râ ahkying zanwut lé hkô kyo râ matú le, Yhang, ngo lé nhang kat bê nghut ri."*

ga luí, kê tô é jowò lé myang záng mù nghap ri.

²⁰ Hau htâng, Yesuq gi, chyúmding haú lé ding mù, shuí-u sù lé tau byí pyám luí, dum zung tô ri; tarajong mâ é byù lhunghâng bang gi, Yesuq lé chôm wú tô é hkûn, ²¹ Yesuq gi, "Nungmoq é nohkyap má, ahkuí wó gyô é Chyúmdang shí gi, hkûnyí yhang lo dik bê." ga luí, yhangmoq lé tai hi kat ri.

²² Lhunghâng bang gi, Yhang ge é hkyô lé saksé hkám byi kômù, Yhâng é nhut mai htoq é jeju bo é dang lé le, maú kôluí, "Shí yuq gi, Yosep é yhangzo a nghut lú?" ga tai bum akô.

²³ Haú mù luí, Yesuq gi, "Nungmoq gè gè yhang, 'Chí sará ê, yhumsing gùng lé lhoq ge yù aq.'† gâ é sanghkyang eq le, 'Nàng, Kaperna-um và má kut shit wú é hkyô ngamoq wó gyo bê, haú eq rajung za, nàng, náng é yhum

mau má le, kut shit wú aq.' ga luí le, ngo lé tai kó râ nghut lhê." ga tai ri.

²⁴ Yhang dum xoq tai é gi, "Ngò, nungmoq lé teng za tai kôlé, myiqhtoi ó yuq le yhumsing é yhum mau má myoqdong wó wú é a nghut. ²⁵ Ngò, nungmoq lé teng za tai kôlé, Eliyaq é pyat lé, Israelaq ming má chuimó myo myo nyi bum akô. ²⁶ Nghut kôlhâng, haú ming má sùm zan eq lhamó hkyuq hkyap yhang, mau a wò dut byuq mù, mutmó gyó tô é hkûn, Garai Gasang gi, yhangmoq mâ é rayuq chyáng le, Eliyaq lé a nhang kat é za, Sidun mau Zarephta và mâ é, chuimó myhí rayuq chyáng sheq nhang kat byí é nghut lhê. ²⁷ Myiqhtoi Elisha é pyat má le, Israelaq ming má, manggâm dap é byù myo myo nyi kôlhâng, yhangmoq chyáng mâ é rayuq le wó sân-yúng yù kô é a nghut; Suriq byù Naman ga sù túngbaù hpó za sheq wó sân-yúng é nghut lhê." ga tai ri.

²⁸ Tarajong hkaú mâ é lhunghâng bang gi, haú hkyô lé wó gyo kôjáng, gyai yhang nhik-yo nau bùm kômù, ²⁹ toq yap luí, Yhang lé và mai hkat htoq mù, yhangmoq é và xuq tô é bùm gùng htoq mâ é gampyoq má, ê chyùn hpyit hkyô pyám râ ga shuí e ló akô. ³⁰ Nghut kôlhâng, Yesuq kúm gi, byù hpûng haú mai so

* 4:19 Esai 61:1-2 † 4:23 Chí sará ê, yhumsing gùng lé lhoq ge yù aq gâ é sanghkyang gi, "Mesaia nghut le gi, mauhpo mù wó tûn shit râ nghut lhê." gâ é nghut lhê.

hkoq htoq ló byuq bê nghut ri.

*Agè Ashop É Nat Lé Yesuq
Hkat Htoq É Hkyô*

Mrk 1:21-28

³¹ Hau htàng, Yesuq gi, Galile mau mâ é Kaperna-um và má jé ê mù, Bánno buinyì má byu pé lé mhoqshit hi ló bê nghut ri. ³² Yhangmoq gi, Yhang mhoqshit é hkyô lé mauhong nyi akô; hkâsu mù gâ le, Yhang gi, ahko ahkáng bo é dang đông taí nyi é yanmai nghut ri.

³³ Yesuq, tarajong hkaû má mhoqshit byí nyi é hkûn, nat gang wang júng é byù rayuq htê mó o mó èq taí é gi, ³⁴ "Ê, Nazaret và byù Yesuq ê, ng-amoq gi, Nàng eq haí sêng lê lú? Ngamoq lé lhoq hten râ matú, Nàng jé lé é nghut lê lú? Nàng gi, Garai Gasâng é Chyoiyúng Sû nghut é lé, ngò sê lê." gâ ri.

³⁵ Haú hkûn, Yesuq gi, "Hkâjop, yhâng chyáng mai htoq ló aq." ga yhang lé tân kat jáng, nat gi, haú yuq le yhangmoq é gung gûng má lhoq lheq to mù, a nò nhang é za, yhâng chyáng mai htoq ló byuq ri.

³⁶ Haú mù luí, shiwa byù banshoq bang gi, gyai yhang máu byuq kômù, rayuq eq rayuq, "Shí yuq é dang gi, hkasû é dang wá nghut lê lú? Yhang gi, ahkáng ayá èq le, wum-o bo é èq le, agè ashop é nat pé lé hkunmó hkyó jáng, haú bang htoq ló byuq akô." ga taí lhum bum akô. ³⁷ Haú hkûn, haú

mau mâ é awui ayàm jowò hkangmó má jàm shoq, Yhâng é hkyô lé taí pyo hù ló bùm bekô nghut ri.

*Yesuq Nòhpyo Lhoq Gê Byí É
Hkyô*

Mht 8:14-17; Mrk 1:29-34

³⁸ Yesuq gi, haú tarajong mai toq ló mù, Simun é yhùm má wang ló ri. Simun é yhâng-aumó gi, alì gyai nyé no nyi é nghut mù luí, lhoq gê byí râ matú, Yesuq lé garúm dung byí akô. ³⁹ Yesuq gi, Simun é yhâng-aumó nàm má yap to mù, nòhpyo haú lé tân kat jáng, Simun é yhâng-aumó gi, ge ló byuq bê; haú hkûn jáng, yhang gi, toq mù, yhangmoq lé gaí tso gaí huq bê nghut ri.

⁴⁰ Bui wang ló jáng, nòhpyo hui bang eq awáng nòhpyo ajung jung dap é bang lhunglhang lé, Yesuq chyáng shuí lé lô kômù, yhangmoq rayuq htàng rayuq é ahtoq má Yesuq gi, loq ke byi luí, lhoq gê byí ri. ⁴¹ Nat gâng pé gi, Yesuq lé, "Nàng gi, Garai Gasâng é Yhangzo nghut ri." ga luí, wut taí mù byù myo myô chyáng mai htoq ló byuq akô; Yesuq gi, Hkrisduq nghut é hkyô lé, yhangmoq sé kô é yanmai, yhangmoq lé dang a wó taí loshoq, Yesuq tân pyâm ri.

⁴² Maubó lô jáng, Yesuq gi, htoq ló mù, gaú é jowò yoso hkaû má ê nyi tô ri; shiwa byu pé kúm gi, Yhang lé hkat hô kômù, myang hô kôjáng, yhangmoq chyáng mai a ló byuq râ matú châng hkúm wú akô. ⁴³ Nghut kôlhang, Yesuq

gi, "Garai Gasâng é mingdán é gabú danglù lé, gó wâ pé má le ngò hko kyo râ râ ashî, haù é matú, Garai Gasang gi, ngo lé nhang kat bê nghut lhê." ga luí, yhangmoq lé taí ri. ⁴⁴ Haù mù, Yesuq gi, Yuda mau má é tarajong pé má, hko kyô wún nyi ri.

5

Sâng-hi Ji Yù Huí É Chángzô Pé

Mht 4:18-22; Mrk 1:16-20

¹ Radàm má lé, Yesuq gi, Genesarat nhông yàm má yap tô le, Garai Gasâng é mung-dang gyo râ ga, shiwa byu pé, Yhâng chyáng chyín chyap wang lé lô kô é hkún, ² nhông gin-gau yàm má lhai razúm joq tô é lé, Yhang myang kat ri. Ngogûn dú bang kúm gi, lhai mai htoq mù, yhangmoq é gùn pé lé chí nyi akô. ³ Yesuq gi, Simûn é lhai má wàng mù gin-gau mai rachyit lhoq kang nhâng luí, haù lhai htoq má zung to mù, shiwa byu pé lé mhoqshit taí kyô nyi ri.

⁴ Dang ban taí jáng, Yesuq gi, Simun lé, "Wuì nik é shut hui luí, ngozo wó kông yù râ matú, nungmoq é gùn pé lé dú hkyô kat keq." ga taí ri.

⁵ Simun gi, "Yhumsîng ê, ngamoq amàn ra-myin mau shikut wú kôlhang, haí le a wó; nghut kôlhang, náng dang é yanmai, ngò gùn dú hkyô kat râ nghut lhê." ga tû taí ri.

⁶ Gùn pé lé hkyô kat kôjáng, yhangmoq gi, ngozo gyai myo shoq lé wó kông yù kômù, gùn lhang jeq lô râ su

dut é yanmai, ⁷ lhai gó lhum mâ é luzúm wuì lé, lé garúm yù râ matú loq lik lik kat kôjáng, haù bang lé lô mù, haù lhai í lhum aluq myup lô shoq ngozo lé kat pyíng bekô.

⁸ Simun Petruq gi, haù lé myàng jáng, Yesuq é hkyí wang má hkyihput htuq mù, "Yhumsîng ê, ngá chyáng mai ló byuq aq, haí mù gâ le, ngò gi, yubak dap é byù nghut nyi lhê." ga taí ri. ⁹ Haí mù luí gâ le, Simun le, yhang eq nyi tô é lhunglhang bang le, haù su ngozo wó yu é yanmai, maú nyi bùm kômù nghut ri. ¹⁰ Simûn é luzúm nhik, Zebedi é yhangzo Yakuq eq Yohan le, haù su chôm maú byuq akô.

Hau htâng, Yesuq gi, "Hkâgyuq, ahkuí mai nàng gi, byù lé châng kóng sù dut râ nghut lhê." ga luí, Simun lé taí ri. ¹¹ Yhangmoq gi, wuiyàm má jé jáng, lhai pé eq yhangmoq é zè banshoq lé tô pyâm to luí, Yesuq htâng cháng bekô nghut ri.

Manggâm Dap Bang Lé Yesuq Lhoq Gê Byí É Hkyô

Mht 8:1-4; Mrk 1:40-45

¹² Radàm lé, Yesuq gi, wà rawà má nyi tô lé, ragùngdû é manggâm dap é byù rayuq lé lo ri; haù yuq gi, Yesuq lé myàng jáng, hkyihput htuq luí, "Yhumsîng ê, Nàng dóng é nghut le gi, ngo lé Nàng wó lhoq sân-yúng byi râ nghut lhê." ga dúng wut ri.

¹³ Yesuq gi, loq lhâm kat mù, haù yuq lé é záng luí, "Ngò dóng lhê, sân-yúng aq hkoí." ga taí ri; haù hkún jáng,

haú yuq é manggâm gi, ge byuq bê nghut ri.

¹⁴ Yesuq gi, "Nàng, shí hkyô ó lé le hkâtaí kyo. Nghut kôlhang, náng é gungdu lé, hkyangjong hpô chyáng ló tân shit mù, nàng sân-yúng bê hkyô lé yhangmoq é matú saksé dut sháng gaq, Mosheq tarâ tô tô é eq rajung za, hkungga ló nhông byi aq." ga, yhang lé taí hkûm kat ri.

¹⁵ Nghut kôlhang, Yesuq é hkyô gi, je riyhang taí pyo hû jam ló mù luí, shiwa byù rajum rayò gi, Yhâng é dang gyo râ matú le, yhangmoq é nòhpyo lhoq gê byí nhâng râ matú le, lé zup míng tô akô. ¹⁶ Yesuq kúm gi, Yhang baú tsik za yoso shut htoq é mù, kyú ê dung dung kut ri.

Gùngjum Shí Sû Lé, Yesuq Lhoq Gê Byí É Hkyô

Mht 9:1-8; Mrk 2:1-12

¹⁷ Ra-nyí lé, Yesuq mhoqshit nyi é hkûn, Hparishe pé eq tarâ sará pé le, Yesuq nâm má zung tô akô; haú bang gi, Galile mau wà hkyap hkangmó mâ é bang eq Yuda mau, Yerusalem wà mó mâ é bang nghut akô. Yhumsîng Garaí é wum-o a-tsam le nòhpyo lhoq gê râ matú Yesuq eq rahá nghut nyi ri. ¹⁸ Haú hkûn, byù ra-am gi, gùngjum shí sù rayuq lé taphkang mai waq lé lô kômù, haú yuq lé, yhúmhkaú má nyi tô é Yesuq é hí má, wó lheq byi shoq ga hkyô ho nyi akô. ¹⁹ Byù lúm myô chyín chyap to mú, haú

nò sù lé hká dông le a wó shuí wàng kôluí, haú yhumhkung htoq shut waq doq ló mù, haú yuq lé taphkang eq roq, shiwa hpong gung gûng, Yesuq é hí ang ang má hkyô hang kat akô.

²⁰ Yesuq gi, yhangmoq é lumjîng myit lé byu myàng jáng, "Byù nàng ê! Nàng é yubak mara lé hkyut pyám byi bê." ga taí ri.

²¹ Haú hkûn, Hparishe pé eq tarâ sará pé gi, "Shí su ga luí, Garaí Gasang lé rhoi dang taí é sù gi, ó yuq wá nghut lhê lú? Garaí Gasang za a nghut jáng, yubak mara wó hkyut pyám byi sù gi, ó yuq wá nghut lhê lú?" ga luí, myit són wuí nyi bum akô.

²² Yesuq gi, yhangmoq myit són wuí nyi é hkyô lé sé mù, "Nungmoq é i-myt hkaú má, haí mù shí pé lé myit són wuí nyi akô lú? ²³ 'Náng é yubak mara lé hkyut pyám byi bê.' nghu taí râ eq, 'Toq luí, hkyô so aq.' nghu taí râ má, hká hkun je taí lui lhê lú? ²⁴ Nghut kôlhang, haú Byu Yhangzo* gi, mingkan htoq má, mara hkyut byi râ ahkáng wó Sù nghut é lé, nungmoq lé sé nhâng nau lhê." ga mù, haú gùngjum shí sù lé, "Ngò, nàng lé taí bá, toq aq, náng é taphkang yu chûng luí, yhùm taú ló aq hkoí." ga taí ri. ²⁵ Haú hkûn jáng, yhang gi, yhangmoq é hí má toq yap mù, yhâng é taphkang waq chûng luí, yhâng é yhùm

* 5:24 Byu Yhangzo gâ é gi, Yesuq Yhânggùng yhang lé le taí e nghut lhê, Mesaia lé le taí é nghut lhê.

shut Garai Gasang lé hkyá-on kungtôn uchyang ló byuq bê.
²⁶ Byù banshoq bang gi, gyai maú byuq kômù luí, Garai Gasang lé hkyá-on kungton akô nghut ri. Yhangmoq gyai gyuq maú dik é èq le, "Hkû-nyí, nga-nhúng, mauhpo amù pé lé myàng bê." ga tai nyi akô.

Yesuq Gi, Lewiq É Yhùm Má Yubak Dap Bang Eq Rahá Zo Shuq É Hkyô

Mht 9:9-13; Mrk 2:13-17

²⁷ Hau htâng má, Yesuq sô e ló le, Lewiq gâ é kang guq sù rayuq yhâng é kang guq zúm má zung tô é lé é myàng mù, haú yuq lé, "Ngá htâng cháng aq." ga tai ri. ²⁸ Lewiq gi, haú mâ é zè banshoq lé tô pyâm to mù, toq luí, Yhâng htâng cháng bê nghut ri.

²⁹ Hau htâng, Lewiq gi, yhâng é yhùm má Yesuq é matú zoshuq poi mó kut byi ri; poi haú má kang guq bang myo myo eq byù góbang le, yhangmoq eq rahá za zô zung nyi bum akô. ³⁰ Haú mù luí, Hparishe pé eq yhangmoq hpúng mâ é tarâ sará pé kúm gi, "Nungmoq gi, haí mù luí kang guq bang eq yubak dap bang eq rahá zo shuq nyi akô lhú?" ga, Yhâng é chángzô pé lé mara hùn dang tai akô.

³¹ Yesuq gi, yhangmoq lé, "Wángzán bang chi sará a ra kó, nôhpyo hui bang za sheq ru rá lhê. ³² Ngò gi, dingmán bang lé wut yù rá matú jé lé é a nghut, yubak dap bang myit

lhing rá matú sheq jé lé é ru nghut lhê." ga tai ri.

Zoshuq Gám Hkyô Eq Séng Luí, Yesuq Tai É Hkyô

Mht 9:14-17; Mrk 2:18-22

³³ Dum, yhangmoq gi, "Yohan é chángzô pé gi, zoshuq gám mù kyûdung dung kut akô; Hparishe pé é chángzô pé le, haú su kut akô; nghut kôhang, náng é chángzô pé gi, haí mù zô nyi shuq nyi akô lhú?" ga Yesuq lé tai akô.

³⁴ Yesuq, yhangmoq lé tú tai é gi, "Bing pé gi, lusik eq rahá nghut nyi to ashí hkûn, yhangmoq lé zo shuq wó gám nhâng rá lhú? ³⁵ Nghut kôhang, lusik† lé yhangmoq chyáng mai shuí yu pyâm é hkyíng jé rá nghut lhê; haú buinyi pé má kúm gi, yhangmoq, zoshuq gám kó rá nghut lhê." gâ ri.

³⁶ Dangtú dông mai le, Yesuq, yhangmoq lé tai é gi, "Mebu sik mâ é llang cheq yù mù, mebu xau má hpo é gi, ó a kut wú kó; haú su kut é nghut jáng, mebu sik lé le llang cheq pyâm é dut mù, pán jap sik le mebu xau eq du lhum rá a nghut. ³⁷ Tsibiyiq wing asik lé le, shokuq htung axau má ó a kat wú kó. Kat é nghut jáng, tsibiyiq wing asik gi, htung lé lhoq buq goq nhâng mù, tsibiyiq wing le yui shun byuq, htung le htên byuq, dut rá nghut lhê. ³⁸ Haú su a dut shoq gi, tsibiyiq wing asik lé, shokuq htung asik má kat ra rá nghut lhê. ³⁹ Tsibiyiq wing

† 5:35 Lusik gâ é gi, Yesuq lé tai nau é nghut lhê.

axau shuq nyî bê sù gi, asik lé a shuq naû nghut râ; hkâsu mù gâ le, 'Axau sheq je nghâm ri.' ga taí râ." gâ ri.

6

Bánno Buinyî Má, Yesuq É Chángzô Pé Kyôshi Shap Zô É Hkyô

Mht 12:1-8; Mrk 2:23-28

¹ Bánno buinyî ra-nyí má, Yesuq gi, Yhâng é chángzô pé eq yò hkaû mai sô lai ló é hkûn, Yhâng é chángzô pé gi, kyôshi ratsuí langshap yû mù, loq èq nè hpuq zô akô. ² Haû mù luí, Hparishe pé ra-am gi, "Bánno buinyî má a ge kut jung lé, nungmoq gi, haí mù luí haû su kut akô lhú?" ga taí akô.

³ Yesuq gi, yhangmoq lé, "Dawiq lháng gi, yhâng htâng châng é bang eq rahá zòmut huí é hkûn, hkâsu kut é hkyô lé, nungmoq a nghap wú kó lhú? ⁴ Dawiq gi, Garai Gasâng é yhûm* hkaû má wang ê mù, hkyangjông pé mai lai luí, ó le a ge zô é, kyâng tô é muk lé yù zo mù, yhâng htâng châng é bang lé le, byi tsô é a nghut kó lhú?" ga tû taí ri. ⁵ Hau htâng, Yhang gi, "Haû Byu Yhangzo gi, haû Bánno buinyî é Yhumsîng nghut lhê." ga yhangmoq lé taí ri.

Loq Jum Shî Sù Lé Yesuq Lhoq Gê Byî É Hkyô

Mht 12:9-14; Mrk 3:1-6

⁶ Gotú Bánno buinyî má le, Yesuq gi, tarajong má wàng mù mhoqshit nyi é hkûn,

loqyo loq ajum shi byuq é byù rayuq haû má nyi tô ri. ⁷ Haû hkûn, tarâ sará pé eq Hparishe pé gi, Bánno buinyî má nõhpyo lhoq gê byi râ lhú ga luí, Yhang lé mara wó hûn shoq ga gyám wú nyi akô. ⁸ Yesuq kúm gi, yhangmoq é i-myit lé sé sù nghut luí, loq jum shî sù lé, "Toq mù, banshoq bâng é hí má, yap shit aq." ga taí kat ri. Haû yuq le, toq mù yap tô ri.

⁹ Haû hkûn, Yesuq gi, "Ngò nungmoq lé myî wú kôlé, Bánno buinyî má, ge é muzó kut râ, a ge é muzó kut râ, byù asak hkyî râ eq lhoq hten râ pé má hká lhum kut le sheq tarâ wang lhê lhú?" ga luí, yhangmoq lé taí ri.

¹⁰ Hau htâng má, yhangmoq banshoq lé lhing wú mù, haû loq jum shî sù lé "Náng é loq nyhang kat aq." ga taí kat é hkûn lé, yhang le loq nyhang kat luí, yhâng é loq gi, shoq za ge byuq bê nghut ri. ¹¹ Nghut kôlhang, yhangmoq gi, myoq chum nhô chik yhang nhik-yo naû kômù luí, "Yesuq lé hkâsu wá kut pyám râ lhú?" ga luí, rayuq eq rayuq taí lhûm nyi akô.

Raxe Í Yuq Lé Lagyo Ga Myhîng Yu É Hkyô

Mht 10:1-4; Mrk 3:13-19

¹² Haû yoq ra-nyí má, Yesuq gi, kyûdung râ ga bùm shut htoq e ló luí, ra-myin mau Garai Gasang lé kyûdung nyi ri. ¹³ Maubó jáng Yhâng é

* **6:4** Garai Gasâng é yhûm nghu é gi, Yerusalem wá mó má joq é saksé zúm lé gâ é nghut lhê.

chángzô pé lé wut yù mù, yhangmoq chyáng mâ é raxe í yuq lé hkyin yù luî, lagyô pé ga myhîng to byî ri. ¹⁴ Haú bang gi, Yesuq èq Petruq ga myîng myhîng byî é Simun eq, yhanggu Andre, Yakuq eq Yohan, Hpilip eq Barhtol-ume, ¹⁵ Mahte eq Htomaq, Alhpe é yhangzo Yakuq eq Zelutuq† dut é Simun, ¹⁶ Yakuq é yhangzo Yudaq eq, Yesuq lé ap pyám râ sù Yudaq Iskarut pé nghut akô.

*Hkungsô Wó É Hkyô Eq
Dingnyé Wó É Hkyô
Mht 4:23-25; 5:1-12*

¹⁷ Yesuq gi, yhangmoq eq rahá gyó ló mù, janggyú má yap tô é hkûn; Yhâng é chángzo moq mó le mù, Yuda mau banshoq mâ é bang, Yerusalem wà mó mâ é bang, wuîshuq lung-aû ayàm mâ é Turuq myuq eq Sidun myuq mâ é bang, rajùm rayò gi, ¹⁸ Yhâng é dang gyô yù râ eq yhangmoq é nôhpyo lhoq gê nhâng râ matú, rahá za zup míng tô akô. Agè ashop é nat èq zing-ri huî é bang le ge byuq akô. ¹⁹ Yhâng é gùng mai htoq é wum-ô èq byù banshoq lé lhoq gê byî nyi é yanmai shiwa byu pé le Yhang lé wó záng shoq ga, ho nyi akô.

† **6:15** Zelutuq gà é lichyúm gi, yhumsîng zui saí é hkyô má gyai yhang myit lòm shirong é sù lé ga lhê. Haú u lé, Israellaq byu pé gi, mingdán luthkyô wó râ matú shikut nyi é hpúng bang lé, Zelutuq gà lhê. † **6:20** Garai Gasâng é mingdán gà é gi, Garai Gasang up é lé gà lhê. § **6:23** Myiqhtoí pé le zing-ri huî é yanmai, yhangmoq chyunghuq wó nyi akô. Haú eq rajung za, jamjau huî é bang nga-nhúng le chyunghuq wó râ nghut lhê.

²⁰ Haú hkûn, Yesuq gi, Yhâng é chángzô pé lé wú kat luî taí é gi,

"Myùng bang nungmoq gi, hkungsô wó nyi ri, hkâsu mù gà le, Garai Gasâng é mingdán† gi, nungmoq é mingdán nghut nyi ri.

²¹ Ahkuî, zòmut wuîshit huî nyi é bang nungmoq gi, hkungsô wó nyi ri, hkâsu mù gà le, nungmoq nhik dik shoq myàng zo kó râ nghut lhê.

Ahkuî, ngau nyi bang nungmoq gi, hkungsô wó nyi ri, hkâsu mù gà le, nungmoq myang wuî kó râ nghut lhê.

²² Haú Byu Yhangzô é yanmai nungmoq lé su èq a nguî é, lhoq hpyoq lhoq kâng é, hoq hpu nhang é, agè ashop nghut é dong jihpoi gamhkuî huî é hkûn, nungmoq gi, hkungsô wó nyi ri.

²³ Haú hkûn lé, gabú byam chyû nyi keq, hkâsu mù gà le, wú keq, nungmoq é matú kó é chyunghuq gi, mauhkûng mingdán má joq tô ri. Ngò, nungmoq lé taí lhê, hkâsu mù gà le, yhangmoq é îchyí îwa pé le myiqhtoí pé§ lé haú su kut wú bekô."

24 Nghut kôlhang, sùt wó bang nungmoq gi, dingnyé wó râ, hkâsu mù gâ le, nungmoq gi, yhum-sing gùng má nhik shî nhik dik é hkyô lé huí yù bekô.

25 Ahkuî, gyi gyi dau dau myàng zo myàng shuq nyi é bang nungmoq gi, dingnyé wó râ, hkâsu mù gâ le, nungmoq zòmut wuìshit é hui kó râ nghut lhê.

Ahkuî, wui nyi é bang nungmoq gi, dingnyé wó râ, hkâsu mù gâ le, iyon yôn é eq ngaubyi ngau-nhap htoq é hui kó râ nghut lhê.

26 Byù banshoq bang, nungmoq lé ge é byù ga kôjáng, nungmoq gi, dingnyé wó râ, hkâsu mù gâ le, yhangmoq é îchyi îwâ pé le, myiqhtoi pyoq pé* lé, haû su ga taí wú bekô.

Gye Pé Lé Chyitdap Râ Hkyô

Mht 5:38-48; 7:12

27 Hau htoq agó, ngá dang gyô nyi bang nungmoq lé ngò taí kôlé, nungmoq é gye pé lé chyitdap nyi keq; nungmoq lé a nau a wôm é bang lé ge é hkyô kut keq; 28 nungmoq lé nhîng é bang lé, shimân byi keq; nungmoq lé rhou é bang lé kyûdung byi keq. 29 Nang lé bo-pyuq rahkyam shut pyuq byi sù lé, rahkyam dum hkâm byi shi aq; náng bumó hkyut

yu é sù lé, buzo le dum hkyut byi shi aq; 30 nang lé rajung jung dúng é sù lé le, byî pyám aq; náng zè yu pyám byî é su chyáng mai le, hkâdúng yù lo. 31 Nungmoq ô nau é dông supé lé kut nhâng nau é su, yhangmoq lé le kut byi keq.

32 Nungmoq lé chyitdap é bang lé za chyitdap kô le gi, nungmoq é matú hai akyú bò kó râ lúhú? Yubak dap bang le, yhumsîng lé chyitdap é bang lé gi, chyitdap nyi akô. 33 Nungmoq lé ge é dông kut nyi é bang lé za, ge é dông kut nyî kô le gi, nungmoq é matú hai akyú bò kó râ lúhú? Yubak dap bang le haû su kut nyi akô. 34 Supé lé zè chyi byî le, dum wó tau byi râ su dut é bang lé za, chyi byî le gi, nungmoq é matú hai akyú bò kó râ lúhú? Yubak dap bang lháng chyi byî é myhó dum wó yû shoq, yubak dap é bang lé chyi byî akô. 35 Nghut kôlhang, nungmoq gi, nungmoq é gye pé lé chyitdap mù, ge é dông kut byî nyi keq. Dum wó taú yù râ lé myoq a byu é za, chyi ngho byi keq; haû su kut jáng, nungmoq wó é chyunghuq ko râ eq, Myhang htáng htúm Su é yhangzô pé dut râ nghut lhê; hkâsu mù gâ le, Yhang gi, jeju a dat bun bang eq agè ashop é bang lé ge é kut nyi ri. 36 Nungmoq é Îwa Garai Gasang shogyo nhikmyin sê é su, nungmoq le shogyo nhikmyin nyi keq.

* 6:26 Myiqhtoi pyoq pé gi, Garai Gasang jéyáng é hui râ.

*A Jéyáng Râ Hkyô**Mht 7:1-5*

³⁷ A jéyáng é za nyi keq; haû jáng, nungmoq le jéyáng é a hui kó râ nghut lhê. A doqđân é za nyi keq; haû jáng, nungmoq le doqđân é a hui kó râ nghut lhê. Mara hkyut byi keq; haû jáng, nungmoq le mara hkyut byi é hui kó râ nghut lhê. ³⁸ Byi keq, haû jáng, nungmoq le dum byi é hui kó râ nghut lhê. Mán é búng mai byíng mui shún shoq nhún chyíng, dùn chyíng kat mù, nungmoq é tangkoi hkaû má lik kat byi é hui kó râ. Hkâsu mù gâ le, nungmoq lik byi é bung èq, nungmoq le dum lik byi râ nghut lhê." gâ ri.

³⁹ Hau htoq agó, Yhang dangtú ralhum đông yhangmoq lé dum tai é gi, "Myoqjit sù gi, myoqjit sù lé hkyô wó tân shit lhê lú? Yhangnhik í yuq é dongkong má byit gyó kó râ nghut lhê, a nghut kó lú? ⁴⁰ Jongzo gi, sará htoq gyaú râ a nghut; nghut kôlhang, gúm shoq mhoq yû bê sù ó nghut kôlhang, yhumsing é sará su dut râ nghut lhê.

⁴¹ Yhumsing myoq hkaû má lúng tô é siktúm† lé lhang a myit wú é nhing, haî mù luî, nunggu nungmâng é myoqwàng‡ lé myang lhê lú? ⁴² Yhumsing é myoq má lúng tô é siktúm lé lhang a myàng sù nhing, 'Gumang hpó ê, náng myoq má lúng

tô é myoqwàng lé, ngò choq pyám byi lé.' nghu luî, náng é gumang hpó lé hkâsu wó tai râ lú? Gegùn labyoq kut sù ê, náng é myoq má lúng tô é siktúm lé hí choq pyám aq. Haû jáng sheq, nunggu nungmang é myoq má wang tô é myoqwàng lé choq pyám byi râ matú, náng san za myàng râ nghut lhê.

*Agàm Eq Ashi**Mht 7:17-20; 12:34-35*

⁴³ A ge é ashî zui é, ge é shigâm hkâmá le a joq. Ge é ashî zui é, a ge é shigâm le a joq. ⁴⁴ Haû mù luî, shigâm hkangmó lé, zui é ashî lé wú mù wó sê hkyin yu lhê. Dangké, zubyap mai maihpáng-shi ó le a myang hpoyoq yù wú, zugyóm mai le tsibyiq shi a wó hpoyoq yu wú. ⁴⁵ Ge é sù gi, yhumsing é i-myt unghkaû mâ é sutdò mai ge é zè pé lé lhoq htoq shit lhê. Agè ashop é sù gi, yhumsing é i-myt unghkaû mâ é agè ashop é sutdò mai, agè ashop é zè pé lé lhoq htoq shit lhê. Haî mù gâ le, yhâng é i-myt unghkaû má byíng mui tô é lé za, yhâng é nhut mai tai htoq lo é nghut lhê.

Luqtân Htoq Má Yhûm Sai Sù Eq Myi Chín Dum Má Yhûm Sai Su É Hkyô

Mht 7:24-27

⁴⁶ Ngò tai é eq rajung za lhang a wó châng kut kô é nhing, haî mù luî, nungmoq Ngo lé 'Yhumsing ê, Yhumsing ê.' nghu nyi akô lú? ⁴⁷ Ngá

† 6:41 Siktúm nghu e gi, yubak mara kô é lé tai lhê. ‡ 6:41 Myoqwàng nghu e gi, yubak mara atiq azo lé tai é nghut lhê.

chyáng lé mù, ngá dang gyô yù luí, châng kut é sù ó nghut kôle, hkasû é sù eq wuí é lé ngò nungmoq lé shit kyo kôle. ⁴⁸ Haú yuq gi, wahpang yhûm saí le, nik nik du luí a dui é lunghtân htoq má apûn awang hi é sù eq wuí lhê. Wuí jê lò luí wuibaù pê èq yhûm haú lé lo gùn kôlhang, ging ging tít tít saí to bê nghut luí, haú lé a wó gun nhún. ⁴⁹ Ngá dang gyô yù mù, a cháng sù gi, apûn awang a saí é za myí chin dum má wahpang yhûm saí sù eq wuí nyi ri. Wuibaù pê èq yhûm haú lé lo gun kat é eq, haú hkûn jáng, lêng gyop byuq ri. Yhûm haú byoq hten byuq é gi, yù whuí a bò loshoq dut byuq râ nghut lhê." gâ ri.

7

Romaq Gyezau Rayuq É Lumjít Myit

Mht 8:5-13; Yhn 4:43-54

¹ Yesuq gi, shiwa byu pé lé ban mhoqshit é htâng má, Kaperna-um wà shut wang ló ri. ² Haú hkûn, Romaq gyezau rayuq é chyitdap dui-nhâng zoshâng gi, shî-nò no nyi ri. ³ Haú u lé, gyezau hpó gi, Yesuq é hkyô lé wó gyo jáng, yhâng é dui-nhâng zoshâng lé lhoq gê byi râ matú, Yesuq lé ê ji lò keq ga, Yudaq suwún wuí lé nhang kat ri. ⁴ Haú bang gi, Yesuq chyáng jé ê kô é hkûn, "Yhang gi, náng shí hkyô kut byi râ matú gingdán é sù, yhang nghut nyi ri; ⁵ hkâsu mù gâ le, yhang gi, nga-nhûng

amyû lé chyitdap é eq, ngamoq matú tarajong le kut byi sù nghut ri." ga luí, Yhang lé zuq zuq dúng wut nyi akò. ⁶ Haú mù luí, Yesuq gi, yhangmoq eq rahá za e ló ri.

Haú yhûm eq hká hé a wê é má jé jáng, Romaq gyezau hpó, yhâng é luzúm wuí lé taí nhang kat é gi, "Yhumsîng Yesuq ê, náng gûng lé hkâlhoq hkyik lo. Náng, ngá é laishîntâng má, lé nang râ lhang ngò má a gingdán. ⁷ Haú mù, ngò, náng chyáng jé lé râ matú gingdán é sù a nghut; Náng, dang rahkun za taí kat laq, haú hkûn, ngá é dui-nhâng zoshâng ge ló râ nghut lhê. ⁸ Hkâsu mù gâ le, ngò le ahkáng ayá wó é zau rayuq é a-ô mã é zau nghut lhê; ngá é a-ô má le gyezô pé nyi lhê, rayuq lé 'Ê aq!' nghu le, yhang e ló lhê; góyuq lé, 'Lò aq!' nghu le, yhang lò lhê; ngá jùn lé le, 'Shí kut aq!' nghu le, yhang kut lhê." gâ ri.

⁹ Yesuq gi, dang haú lé wó gyo jáng, haú yuq é hkyô lé maú byuq luí, Yhang htâng châng é shiwa byu pé lé lhing wú mù, "Ngò, nungmoq lé taí kôlé, Israelaq amyû má lhang, shî í lumjít é sù lé, Ngò a myang wú." ga taí ri. ¹⁰ Nhang kat é bang yhûm má dum taú jé jáng, no nyi é dui-nhâng zoshâng gi, ge to lánq é lé ló myang akò.

Shî Sù Lé Dum Lhoq Tui É Hkyô

¹¹ Hau htâng hkâ-myháng a myáng má, Yesuq gi, Yhâng

é chángzô pé eq, shiwa byù moq mó le mù rahá za Na-in gâ é wà shut e ló akô. ¹² Haù wà wàng hkum má jé lo é hkùn lé, chuimó myhí é yuqzo te gi, shí mù, yhâng é mâng lé waq htoq lé lo akô. Wà byù myo myo le, chuimó myhí haù eq rahá châng lé lo akô. ¹³ Yhumsîng gi, haù chuimó myhí lé myàng jáng, yhang lé wú shogyo luí, "Hkângaù." ga taí ri.

¹⁴ Yesuq gi, gung shut huí ê mù, loq èq ê záng kat ri. Haù hkùn, waq tô é bang le jâng yap to byí akô. Yhang gi, "Zorâm ê, ngò, nang lé taí lhê, toq aq." ga taí ri. ¹⁵ Haù hkùn, shí bê sù gi, toq zûng mù dang taí lo ri. Yesuq gi, zorâm haù lé yhângnú chyáng dum ap byí ri.

¹⁶ Byù lhunglhang bang gyuq maú bùm kôluí, Garaí Gasang lé hkya-ôn é dang gi, "Myiqhtoi mó, nga-nhung chyáng lé pô htoq bê nghut ri. Garaí Gasang gi, Yhâng é amyû lé garúm râ ga lé kùm wú nyi ri." ga taí nyi akô. ¹⁷ Haù Yesuq é hkyô eq sêng é ludang lé, Yuda mau eq haù mau awui ayàm jowò hkangmó má taí pyo myhîn ló bum akô.

*Yesuq Eq Wui-myhup Sará
Yohan É Hkyô
Mht 11:1-19*

¹⁸ Haù hkùn, wui-myhup sará Yohan é chángzô pé gi, haù hkyô banshoq yhang lé lo taí kyô akô. ¹⁹ Haù mù luí, Yohan gi, yhâng é chángzo í

yuq lé ji yù mù, haù Yhum-sing chyáng nhang kat luí, "Nàng gi, haù jé lé lô râ Sù nghut lhê lhú? Haù a nghut jáng, ngamoq, góyuq lé láng ra shirâ lhú?" ga, myí nhang kat ri.

²⁰ Haù nhik gi, Yesuq chyáng jé jáng, "Nàng gi, haù jé lé lô râ sù nghut lhê lhú? Haù a nghut jáng, ngamoq góyuq lé myoqbyu láng nyí ra shirâ lhú?" ga luí, Wui-myhup Sará Yohan gi, ngá-nhik lé náng chyáng myí nhang kat ri." ga taí akô.

²¹ Haù u yhang, Yesuq gi, nò zo hpýo zo, noli nojàng huí é bang eq agè ashop é nat dap jun dap é byù myo myo lé, lhoq gê byí ri. Myoqjit bang myo myo lé le, myoq dum myàng nhang ri. ²² Haù hkùn, Yesuq gi, yhangnhik lé, "Myàng mi-myàng, wó gyo má wó gyo, Yohan lé ló taí kyo keq; myoqjit bang, myoq wó myàng bekô; hkyí hten bang le, wó so bekô; manggâm dap bang le, lhoq gê byí é hui bekô; nojit bang le, wó gyo bekô; shí bê bang le, lhoq dui toq é hui bekô; myùng bâng é matú, gabú danglù hko kyô nyí bê nghut lhê. ²³ Ngá é yan-mai, Ngo lé lum shut é hkyô a bò sù gi, hkungsô wó nyi ri." ga taí ri.

²⁴ Yohan é chángzô nhik ló byuq é htâng má, Yesuq gi, Yohan eq séng luí, byù moq mó lé taí é gi, "Nungmoq gi, haí lé hpuy wú râ matú, haù yoso shut e akô lhú? Lai èq hik nhùn é jamgàm lé wú râ

matú nghut akô lúhú? ²⁵ Haû a nghut jáng, haî lé wú râ matú e akô lúhú? Nú-nhâm é mebu wut sù lé wú râ matú e akô lúhú? A nghut! Wú keq, gyaî hpaû é mebu wut luî agùn agó wó bang gi, hkohkâm-wâng pé má sheq ru nyi lhê. ²⁶ Haû nghut le gi, haî lé wú râ matú ê kô é lúhú? Myiqhtoi rayuq lé lúhú? Haû kúm nghut ri. Ngò, nungmoq lé taî kôlé, Yohan gi, myiqhtoî htoq lháng gyaú sù nghut lhê. ²⁷ Haû yuq é hkyô lé, Chyúmdang má kâ tô é gi,

'Wú aq, Náng é hkyô lajang lángrâ matú, Ngá é lagyo lé, Náng é hí má Ngò nhang kat râ nghut lhê.'*

gâ ri. ²⁸ Ngò, nungmoq lé taî kôlé, myiwe wuî mai hku kat é bang má, Yohan htoq je kô é rayuq lháng a nyî, nghut kôlháng, Garai Gasâng é mingdán má je tiq dik sù gi, Yohan htoq je kô lhê." gâ ri.

²⁹ Mingbyû lhunglhâng bang eq kang guq bang gi, dang haú pé lé wó gyo kôjáng, Yohan byî é bapisma lé hkâm yù kô é nghut mù luî, Garai Gasâng é dingmán é hkyô lé sê gyô yu akô. ³⁰ Hparishe pé eq tarâ sará pé kúm gi, Yohan byî é bapisma a hkam yù kômù luî, Garai Gasang hen lajang é hkyô lé yhumsing gung é matú he-ngik pyâm akô.

³¹ Yesuq dum taî é gi, "Haû mù luî, byû myû shî lé, Ngò, hai éq taî kê wú râ lúhú?

Yhangmoq hai eq wuî akô lúhú? ³² Yhangmoq gi,

'Nungmoq é matú, ngamoq sampyí mut byi kôlháng, nungmoq gi, a gó kó,

ngamoq ngaù hkyangsâng kôlháng, nungmoq gi, a ngaù kó.'

ga luî, gai pé má zùng uchyang rayuq eq rayuq wut taî lhúm nyi é zoshâng wuî eq wuî akô. ³³ Hkâsu mù gâ le, Wui-myhup Sará Yohan jé lé luî, muk a zo, tsibiyiq a shuq é nyi le le, 'Yhang gi, nat gang dap sù nghut ri.' ga luî, nungmoq taî akô. ³⁴ Haû Byu Yhangzo jé lé luî, zo mù shuq mù kut jáng le, 'Shí yuq gi, zo myoq shuq myoq noq sù eq, kang guq bang eq yubak dap bâng é buinùm hpó nghut ri.' ga dum taî akô. ³⁵ Nghut kôlháng, hpaqchyî byéng-yá é yhangzô pé gi, hpaqchyî byéng-yá tengmán é hkyô lé saksé hkâm byî nyi akô."* gâ ri.

Yubak Dap É Myiwe Rayuq, Yesuq Lé Xû But Byî É Hkyô

³⁶ Hparishe rayuq gi, Yesuq lé yhâng chyáng zang zo râ matú ji kat ri. Haû mù, Yesuq gi, haû Hparishe é yhúm má wàng luî zo râ matú zung tô ri. ³⁷ Haû hkûn, wú keq, haú wâ mâ é yubak dap é myiwe rayuq gi, Yesuq haû Hparishe é yhúm má zô zung tô é lé sé

* 7:27 Mal 3:1 * 7:35 Nghut kôlháng, Garai Gasâng é hpaqchyî byéng-yá lé lhóm hap yu é banshoq bang gi, Garai Gasâng é hpaqchyî byéng-yá haû, tengmán ri ga saksé hkâm nyi akô.

jáng, gyai hpau dap é namngón xû bo é luq hpyû bòng yu lé luí, ³⁸ Yesuq é nunghtáng hkyî wàng má ngau yap to mù, Yhâng é hkyî má ngaubyî èq záng lhoq teq byi jáng, ûxam èq but sut pyám byi ri. Dum nghut jáng, nhut èq puq luí mura lé but byi ri.

³⁹ Yesuq lé ji é Hparishe wá gi, haú lé myàng jáng, "Shí yuq myiqhtoi nghut le gi, Yhang lé záng htûng é sù, ó yuq nghut é eq hkâsû é yubak dap é myiwe nghut é lé, Yhang sé râ nghut lhê." ga luí, yhâng é unghkaú má myit nyi ri.

⁴⁰ Yesuq gi, "Simun ê, Ngò, nang lé taí râ rajung joq ri." ga taí ri.

Simun le, "Sarâ ê, taí aq." ga taí kat ri.

⁴¹ Haú hkûn, Yesuq gi, "Ngùn chyí zo sù rayuq chyáng, chyín dap é byù í yuq nyi ri. Rayuq gi, denari† ngo shô chap, rayuq gi, ngo xê chap dap ri. ⁴² Haú nhik gi, chyín xap râ ngùn a wó kôluí, chyín yhumsîng gi, yhangnhik lé xap a ra lò gâ pyâm ri. Haú mù luí, haú nhik mâ é hká yuq gi, yhang lé je chyitdap râ lhú?" ga myí ri.

⁴³ Simun gi, "Je myo lhoq lhut hui sù, nghut râ su ngam ri." ga tû taí ri.

Yesuq gi, "Nàng myit e dông jô ri." ga taí ri.

⁴⁴ Haú hkûn, Yesuq, myiwe zo haú lé lhing wú luí, Simun lé, "Nàng myiwe zo shí lé myang lhê lhú? Ngò, nàng é yhúm má wang le, hkyî chi

râ uchyam, nàng a byi, yhang kúm gi, ngaubyî èq ngá hkyî lé tik byi luí, yhâng é xam èq sut pyám byi bê. ⁴⁵ Nàng gi, ngo lé nhut èq a puq nghut ri; yhang kúm gi, ngò yhúmkaú má wang é mai ngá hkyî má a no loshoq puq nyi râ. ⁴⁶ Nàng gi, ngá ulhum má xû a but byi wú, yhang kúm gi, ngá é hkyî má nàm ngón é mura but byi bê nghut ri. ⁴⁷ Haú su mù, ngò, nàng lé taí lé, haú myiwe gi, je chyitdap luí, yhang wó é yubak myo myo lé hkyut pyám byi é hui bê. Shau za mara hkyut pyám byi é hui sù gi, shau za chyitdap sù nghut ri." ga taí ri.

⁴⁸ Yesuq gi, myiwe haú lé le, "Ngò, nàng é yubak mara hkyut pyám byi bê." ga taí ri.

⁴⁹ Rahá zung tô é bang gi, "Yubak mara lháng wó hkyut pyám byi sù, shí yuq gi, ó wá nghut lhê lhú?" ga luí, myit nyi bum akô.

⁵⁰ Yesuq gi, "Nàng é lumjîng myit èq nang lé hkyi yù bê, ngón za ló aq hkoí." ga luí, myiwe haú lé taí kat ri.

8

Yesuq Htâng Châng É Myiwe Wuí

¹ Hau htâng hkâ-myháng a myáng má, Yesuq gi, Garai Gasâng é mingdán hkyô eq sêng é gabú danglù lé taí kyo uchyang, Yhâng é lagyo raxe í yuq eq rahá za, rawa htâng rawà jé e ló ri. ² Hau htoq agó, nat gang dap é mai le,

† 7:41 Denari rachap gi, ra-nyí lhê é byù rayuq é zuihpau eq wuí ri.

nòhpyo mai le Yesuq eq lhoq ge yu é myiwe wuì, nat nyhit nat lhoq htoq pyám byi huì é, Magadalaq wà mà é Mariq le, ³ Herut é ikun zum sù Kuza é yhumsîng myhí Yoanaq le, Susannaq le, gotû myiwe wuì myo myo le, Yesuq eq rahá nghut akô. Haú bang gi, yhumsîng wó du é í Yesuq eq lagyô pé lé byi zo byi huq nyi akô.

Kyôshi Sân É Hkyô

Mht 13:1-23; Mrk 4:1-20

⁴ Wà hkanq wà mó mà é bang gi, Yesuq chyáng zup zîng lé lo bùm kômù shiwa byù moq mó zup míng tô é hkûn, Yesuq dangtú dông taí kyô é gi, ⁵ "Kyô hkyô sù rayuq gi, kyôshi san râ ga htoq e ló ri. Yhang, kyôshi sân kat é hkûn, ra-am gi, hkyô má gyó ang mù, byu eq záng nâng pyeq pyâm lhê, maulat nghoq pé eq hte zo pyâm lhê dut ri. ⁶ Ra-am gi, luqgok yò má gyó ang mù, yuq htoq lo é hkûn, myigùng a teq é yanmai nyhuì shi byuq akô. ⁷ Ra-am gi, zugyóm hkaû má gyó ang luí, zubyap eq rahá yuq htoq lô mù, wup pyâm é hui bê nghut ri. ⁸ Nghut kôlhang, ra-am gi, myihpún bo é jang má gyó ang mù, yuq kô lò jáng, rashô tú myô jat lo ri." ga taí ri.

Yhang haú su ga taí nyi é hkûn, "Gyô yù râ nohkyap dap sù gi, gyô yù sháng gaq!" ga le, htê mó eq taí kat ri.

⁹ Haú hkûn, Yhâng é chángzô pé gi, dangtú shí hai lichyúm nghut lhê lhú ga,

Yhang lé myí akô. ¹⁰ Yhang gi, "Garai Gasâng é mingdán eq sêng é sê gyo wuì é hkyô pé lé sê gyo râ ahko ahkáng, nungmoq lé byi to bê. Nghut kôlhang, góbâng matú gi,

'Wú to kôlhang, a myàng kó sháng,

gyô nyi kôlhang, a sê gyo kó sháng.[✱]

ngû, ngò dangtú dông taí lhê.

¹¹ Ahkui lhê é dangtú shi é lichyúm gi, îsu nghut ri: kyôshi gi, Garai Gasâng é mungdang nghut nyi lhê.

¹² Hkyô má gyó âng é kyôshi gi, haí eq wuì lhê lhú gâ le, haú mungdang lé byu pé wó gyô é htâng má, lumjîng é má le, hkyi yu é má le, a jé kó sháng gaq ga luí, yhangmoq é i-myit hkaû mai nat Tsadán eq mungdang haú lé, lé yu pyâm é hui bang eq wuì lhê.

¹³ Luqgok yò pé má gyó âng é kyôshi gi, haí eq wuì lhê lhú gâ le, haú mungdang lé wó gyo jáng, gabú myit eq hap yù kôlhang, amyit a wó chín mù, rayoq rabun za lumjîng luí, gunglaú huì é nyí má, dum htak ló byuq é bang eq wuì lhê. ¹⁴ Zugyóm má gyó âng é kyôshi gi, haí eq wuì lhê lhú gâ le, haú mungdang lé gyô yù luí, yhumsîng é asak dui e ló é hkyô má, shí ipyat lhê é myit wui myit hke hkyô, ngùn zè sutgan eq mingkan ngón hkyô má myup byuq luí, mo é ashí a zuí é bang eq wuì lhê. ¹⁵ Hpún bo é myigùng má gyó é kyôshi kúm gi, haí eq wuì

lhê lhu gê le, haû mungdang lé lhumzui luí ge é i-myt èq ban gyô yù mù, ging títng shoq zuí zítng luí, wó jân é i-myt èq ashi zuí é bang eq wuí lhê.

Myibung Htûn É Hkyô

Mrk 4:21-25

¹⁶ Myibung lé tap mù, aû èq nghop tô é le, yhupchong ô má tô tô é le, ó a kut wú kó. Nghut kôlhang, wang lé lô bang myoq wó myâng râ matú kúm gi, tsungjang má tsung to to chyat kut akô. ¹⁷ Hkâsu mù gê le, a htoqzê loshoq haq tô é zè haí le a joq, a sé a byông htoq loshoq wó zaú tô é zè le haí a joq nghut ri. ¹⁸ Haû mù luí, nungmoq hkâsu wó gyô yu é hkyô lé sidiq nyi keq, haí mù gê le, wó to sú lé gi, jat byi shirâ, a wó su chyáng mai kúm gi, yang wó to bûn é mâ é lé lhang, yu pyám byi shirâ nghut lhê." ga tâi ri.

Yesuq É Yhângnu Eq Yhanggu Pé

Mht 12:46-50; Mrk 3:31-35

¹⁹ Haû hkûn, Yesuq é yhângnu eq yhanggu pé gi, Yhâng chyáng lé lô kô le, shiwa byu pé lûm chyûn chyap to kômù, Yhâng chyáng a wó wang ê kó nghut ri. ²⁰ Haû hkûn, Yhang lé, "Náng nu eq nunggu pé gi, nang lé hui naû luí, shinggan má lánq yap bum akô." ga tâi kyo akô.

²¹ Yesuq gi, yangmoq lé, "Garai Gasâng é mungdang lé gyô yù luí, châng é bang gi, Ngá nu eq Ngá gû pé nghut akô." ga luí, yangmoq lé tù tâi kat ri.

Laidun Mó Lé Yesuq Lhoq Zim É Hkyô

Mht 8:23-27; Mrk 4:35-41

²² Ra-nyí lé, Yesuq gi, Yhâng é chángzô pé lé, "Nga-nhung nhông he hpoq shut dap e ló sháng." ga tâi luí, lhai má wàng mù gû dap e ló akô. ²³ Yhangmoq gû dap e ló é hkûn lé, Yesuq gi, yhup myhî tô ri. Haû u lé, nhông haû má laidun mó lò luí, lhai má wui byíng lô mù, yangmoq myup shí râ su dut lò nyi bekô nghut ri.

²⁴ Haû mù, yangmoq gi, Yesuq chyáng hui ê luí, Yhang lé nhaû pun mù, "Yhumsíng ê, Yhumsíng ê, nga-nhung myup ló nyi ri." ga tâi akô.

Haû hkûn, Yhang toq luí, laidun eq wuìlhêng pé lé tân kat jáng, haû pé gi, zim za dut ló byuq bê. ²⁵ Haû mù, Yesuq gi, "Nungmoq é lumjítng myít gi, hkâmá nghut akô lhu?" ga luí, yangmoq lé myí ri.

Yhangmoq kúm gi, gyuq maú byuq bûm kôluí, "Shí yuq gi, hkasú é byù nghut lhê là? Yhang hkunmó hkyó jáng, lài eq wuìlhêng pé lhang gyo byi ri-nhung!" ga luí, rayuq eq rayuq myí lhum bum akô nghut ri.

Nat Lé Hkat Htoq Byi É Hkyô

Mht 8:28-34; Mrk 5:1-20

²⁶ Hau htâng, yangmoq gi, Galile mau tù tap mâ é Gerase byu pé é mau má jé dap e ló bekô. ²⁷ Yesuq kong shut doq ló le, haû wâ mâ é nat gang dap é sú rayuq gi, Yhang lé hui ri. Haû yuq gi, yhum má

le a nyi é za, mebu a dap é, lupdùng má myáng myáng nyi nyi sù nghut ri. ²⁸ Haú yuq gi, Yesuq lé myàng jáng, wut garu luí, yhang é hkyí wang má paí gop to mù, "Myhang htang é Garaí Yhangzo Yesuq é, Nang gi, ngò eq haí séng lhê lúh? Ngo lé a zing-ri rá matú, ngò nang lé dúng nyi lhê." ga luí, htê mó èq taí garú nyi ri. ²⁹ Hkâsu mù gâ le, Yesuq gi, agè ashop é nat lé haú yuq gùng mai htoq ló rá matú, tân pyâm é yanmai nghut ri. Byù haú yuq lé nat gâng èq adàm dàm wang júng hkangmó, loq eq hkyí má tojâng tuí èq tuí shung, kyum xâng tô é eq, zúng tô é nghut kôlhang, lêng hpyit pyám pyám kut é htoq ago, nat gâng èq yhang lé yoso hkaú shut lêngmhap yù yù kut nyi ri.

³⁰ Yesuq gi, yhang lé, "Náng myíng haí gâ lhê?" ga myí kat é hkûn, yhang gi, "Legio* gâ lhê." ga tû taí ri. Haí mù gâ le, yhang chyáng nat gang myo myo wang lúng tô é yanmai nghut ri. ³¹ Nat jùm gi, yhang-moq lé nik dik htùm é Lasang-dong shut a kôn kat rá matú, Yesuq lé chôm dúng nyi bum akô.

³² Haú u lé, waq rajùm mó gi, bùm yàm má dù but zô nyi bum akô nghut ri. Haú mù, yhangmoq gi, waq pê chyáng wàng nhâng laq ga, Yesuq lé ahkáng dum dung dung kut kojáng, Yesuq gi, yhangmoq lé ahkáng byi kat

ri. ³³ Haú mù luí, nat gang jùm gi, byù haú yuq chyáng mai htoq ló kôluí, waq pê chyáng wàng byuq bekô nghut ri. Haú hkûn, waq haú jùm gi, gampyoq mai nhông hkaú shut rut din yán wang ló kôluí, myup shi byuq bekô nghut ri.

³⁴ Waq zúng bang gi, haú su dut é lé myàng jáng, hpang din ló kômù, myuq hkaú mâ é bang eq awui ayàm mâ é bang lé ló taí kyô akô nghut ri. ³⁵ Haú mù, wó gyô é bang gi, haú hkyô lé wú rá matú htoq lé lo akô. Yhangmoq gi, Yesuq chyáng jé lé kô é hkûn, nat gang htoq byuq hui sù, Yesuq é hkyí wang má mebu wut to luí, byù gè rayuq su zúng to lánng é lé myàng kômù, gyuq dan bùm bekô nghut ri.

³⁶ Nat dap sù lé hkâsu kut luí lhoq ge yu é hkyô lé myang é bang gi, góbang lé taí kyô akô nghut ri. ³⁷ Haú hkûn, Gerase byu pê é mau mâ é lhunglhang bang gi, gyuq dan dik kôluí, Yesuq lé yhangmoq é mau mai htoq ló byuq rá matú, chôm dúng tôngbán akô. Haú mù luí, Yesuq gi, taú ló byuq rá matú lhaí má wàng bê nghut ri.

³⁸ Nat htoq byuq huí é sù gi, Yesuq htang cháng rá matú, Yesuq lé dúng tôngbán ri. ³⁹ Nghut kôlhang, Yesuq gi, "Nang, yhùm shut sheq ló mù, Garaí Gasang, nang lé hkâ-í kut byi bê hkyô lé, ló taí kyo aq." ga luí, yhang lé ló nhâng bê nghut ri. Haú hkûn, yhang

* **8:30** Legio gâ é lichyúm gi, gyezo 4000 eq 6000 gyoro bo é gyedap lé taí ri.

htoq ló mù, Yesuq yhang lé hkâ-í kut byi bê hkyô lé, haú wà rawà bang lé ló taí kyô ri.

Ya-iruaq É Yhangzo Byizô É Hkyô Eq, Yesuq É Bu Lé Lé Záng É Myiwe Rayuq É Hkyô Mht 9:18-26; Mrk 5:21-43

⁴⁰ Ahkuí, Galile byu pé gi, Yesuq dum taú lò rá lé láng nyí kô é nghut mù, Yhang dum taú gú dap lo é hkûn gabú myit eq lhom te yu akô.

⁴¹ Haú hkûn, Ya-iruaq gâ é tarajong má up sù rayuq gi, jé lé lô mù, Yesuq é hkyî wang má hkyihput htuq luí, yhang yhûm má lé rá matú ji nyi ri.

⁴² Hkâsu mù gâ le, raxe í zân bò bê é, yhangzo byizo te gi, shi ló nyi é yanmai nghut ri.

Haú mù, Yesuq cháng e ló le, shiwa byu pé gi, Yhang lé záng htung lo bum akô.

⁴³ Haú u lé, raxe í zân sui yuî luí ngunzè lhungháng ban pyám shoq chi sará pê chyáng yâ wú kôlhang, hká yuq le a wó yâ gè byi é† myiwe myhí rayuq le haú hkaú má bo tô ri. ⁴⁴ Myiwe haú gi, Yesuq é nunghtáng má huí lé mù, Yhang é bushi htang má é záng kat eq, suí yui é ana gi, ge byuq bê nghut ri.

⁴⁵ Haú hkûn, Yesuq gi, "Ngo lé, ó yuq záng bê lhú?" ga luí myi jáng, lhunghâng bang gi, a sé ga he nyi bùm kô é hkûn lé, Petruq gi, "Yhumsîng ê, shiwa byu pé gi, náng é lhînghkyuq maí náng chyáng chyîn chyap wang lo bùm kô é

yanmai, nang lé záng bekô râ nghut lhê?" ga taí ri.

⁴⁶ Yesuq gi, "Byù rayuq ngo lé lé záng mù, ngá chyáng mâ é hpungwup a-tsam htoq ló é lé, ngò châng sé kat ri." ga taí ri.

⁴⁷ Haú jáng, myiwe myhí haú gi, yhang a wó haq zaú to lô é hkyô lé sé jáng, req req nán lé lô mù, Yesuq é hkyî wang má ngóm gop kat luí, haí mù Yhang lé záng é hkyô eq, hká dông ge ló byuq é hkyô pé lé, shiwa byù ban-shoq bâng é hí má Yesuq lé taí kyô nyi ri. ⁴⁸ Yesuq gi, "Ngá zo ê, náng é lumjîng myit gi, nang lé lhoq gè byi bê nghut ri, ngón za ló aq hkoi!" ga luí, myiwe haú lé taí kat ri.

⁴⁹ Yesuq gi, dang ru taí nyi ashî hkûn, tarajong má up sù Ya-iruaq é yhûm maí byù rayuq jé lé lô luí, "Nung zo gi, shi byuq bê, haú sará lé hkâlhoq hkyik nyí lo." ga luí, Ya-iruaq lé taí kyô ri.

⁵⁰ Yesuq gi, dang haú lé wó gyo jáng, "Hkâgyuq, za lumjîng aq, haú jáng, yhang ge byuq râ nghut lhê." ga luí, Ya-iruaq lé taí ri.

⁵¹ Yesuq gi, Ya-iruaq é yhûm má jé é hkûn lé, Petruq, Yohan, Yakuq, eq haú myiwe zô é yhangnu eq yhangwa mai lai luí, yhûm haú má, ó lé le a wàng nhâng kut ri. ⁵² Haú u lé, lhunghâng bang zoshâng hau é yanmai, ngaubyi ngau-nhap èq yón nyi akô. Yesuq kúm gi, "Hkâ-ngaú kó, yhang

† 8:43 Ngunzè lhungháng ban pyám shoq chi sará pê chyáng yâ wú kôlhang, hká yuq le a wó yâ gè byi gâ é, Chyúmdang ra-am má gi, bo lhê; ra-am má gi, a bò.

shi byuq é a nghut, yhup myhî tô é sheq ru nghut lhê." ga luî, yhangmoq lé taî ri.

⁵³ Zoshâng gi, shi byuq bê lé yhangmoq sé kôluî, yhangmoq gi, Yesuq lé wuizui kut pyám byî akô. ⁵⁴ Yhang kúm gi, myiwe zo hau é loq má zuî to mù, "Zoshâng ê, toq aq." ga taî kat ri. ⁵⁵ Haû mù luî, yhâng woi-nyî dum taû wàng mù, haû hkûn jáng toq yap ri. Haû jáng, Yesuq gi, zoshâng haû lé zôjung byi keq, ga yhangmoq lé taî kat ri. ⁵⁶ Haû myiwe zô é yhângnu eq yhângwa nhik gi, gyai maú byuq akô. Nghut kôlhang, Yesuq gi, haû dut é hkyô ó lé le a taî kyo râ matú, yhangnhik lé taî hkûm tô ri.

9

Lagyo Raxe Í Yuq Lé Nhang Htoq Kat É Hkyô

Mht 10:5-15; Mrk 6:7-13

¹ Yesuq gi, haû lagyo raxe í yuq lé wut yù mù, nat gang banshoq lé wó hkat htoq pyám râ matú eq, nolì nojàng wó lhoq gê râ matú, yhangmoq lé wum-o a-tsam eq ahko ahkáng byî ri. ² Hau htâng má, Garai Gasâng é mingdán hkyô hko kyo râ eq, nòhpyo lhoq gê byi râ matú nhang htoq kat ri. ³ Yesuq gi, yhangmoq lé, "Hkyowui é matú, dumbáng, etap, zoshuq, ngùn eq, bu htaî lhang hkâwûn hkâchûng kó. ⁴ Nungmoq hká yhûm má wàng kôlhang, haû wâ mai dum htoq lô é buinyî jé shoq, haû yhûm má za nyi nyi keq. ⁵ Nungmoq lé a lhom hap yu

é bang lé gi, yhangmoq é wà mai htoq lô é hkûn, nungmoq lé a lhom hap yu é saksé dut sháng gaq, nungmoq é hkyiwa má dap é hpuilhaû lé yhangmoq é myoq hí má ko hkyô pyám to keq." ga taî kat ri. ⁶ Haû mù, yhangmoq gi, htoq e lô luî, wà hking wà mó má haû gabú danglù hko kyo uchyang, hká jé hkâmá nòhpyo lhoq gê byî wún akô.

Herut Maú Úng-âng É Hkyô Mht 14:1-12; Mrk 6:14-29

⁷ Haû su dut é hkyô banshoq lé, mauzau Herut wó gyô yù luî myit wuî nyi ri. Hkâsu mù gà le, ra-am gi, Yohan shi é mai dum dui toq lô bê ga, ⁸ ra-am gi, Eliyaq dum pô htoq lo ri ga, haû mai, ra-am gi, hí hpyang lhê é myiqhtoi rayuq yuq dum dui toq lô bê ga luî, taî bùm kô é yanmai nghut ri. ⁹ Herut gi, "Yohan é ulhum lé, ngò hpyit pyám nhâng bê, nghut kôlhang, shî í wá taî byông bùm kô é gi, ó wá nghut lhê lú?" ga luî, Yesuq lé myàng shoq ga ho nyi ri.

Byù Ngo Hkyîng Lé Yesuq Zoshuq Byi Tsô É Hkyô

Mht 14:13-21; Mrk 6:30-44; Yhn 6:1-14

¹⁰ Lagyo pé dum taû lo é hkûn, yhangmoq kut laî lo é hkyô pé, Yesuq lé taî kyô akô. Haû hkûn, Yesuq gi, yhangmoq lé shuí chûng mù, Bet-saida gà é wà mó shut tsik za e lô byuq ri. ¹¹ Shiwa byu pé gi, haû hkyô lé châng sé kômù, Yhâng htâng châng e lô akô.

Yesuq le yhangmoq lé lhom hap yù mù, Garai Gasâng é mîngdán hkyô lé taí kyo luí, nõhpyo gè naù bang lé, lhoq gè byí ri.

¹² Buigyùm zó má, lagyo raxe í yuq gi, Yhâng chyáng huí ê mù, "Haù shiwa byu pé lé, awui ayàm mâ é yhùm pé eq wà pé má ló mù, zoshuq hô zo luí ló yhup kó sháng gaq, ló nhâng aq. Hkâsu mù gâ le, ahkuí nga-nhúng gi, yoso má nghut nyi ri." ga luí, Yhang lé taí akô.

¹³ Haù hkûn, Yesuq gi, "Nungmoq, yhangmoq lé rajung jung byi tso keq." ga tú taí ri.

Yhangmoq gi, "Shí myhò bang lé tso râ zoshuq a ê wui le gi, ngamoq chyáng muk-yo muk ngo long eq ngozo í du mai lai luí, haí le a wó nghut ri." ga taí akô. (Hkâsu mù gâ le, yuqgè wui baù lhang ngo hkyîng kô nghut ri.)

¹⁴ Nghut kôlhâng, Yesuq gi, "Shí bang lé rahpúng má ngo xê xê kô kut luí, zùng nhang to keq." ga luí, Yhâng e chángzô pé lé taí ri. ¹⁵ Yhangmoq lé Yesuq taí é eq rajung za, ban-shoq bang lé zùng nhang to bekô. ¹⁶ Haù hkûn, Yesuq gi, haù muk ngo long eq ngozo í du lé yù mù, mauhkûng shut tu wú to luí, jeju ban hkya-on jáng, haù lé ajap jap hpé luí, shiwa byu pé lé, châng to byi râ matú, Yhâng é chángzô pé lé byi kat ri. ¹⁷ Haù hkûn, yhangmoq ban-shoq bang zô gyí bùm kô é htâng má, haù chángzô pé gi, zô myhit tô é pé

lé, raxe í mung byíng shoq wó guq tsíng yu ashí kô nghut ri.

Yesuq Gi, Hkrisduq Nghut Lê Ga Petruq Taí É Hkyô

Mht 16:13-28; Mrk 8:27—9:1

¹⁸ Radàm lé, Yesuq gi, Yhang baù kyûdùng nyi é hkûn, chángzô pé le, Yhang eq rahá nghut akô. Hau htâng, Yhang gi, yhangmoq lé, "Shiwa byu pé gi, ngo lé ó yuq nghut lê ga, taí akô lú?" ga myí ri.

¹⁹ "Ra-am gi, Wui-myhup Sará Yohan ga; góbang gi, Eliyaq ga; dum ra-am gi, hí hpyang lê é myiqhtoi rayuq yuq dum dui toq lo é nghut ri ga, taí akô." ga luí, yhangmoq tú taí akô.

²⁰ Dum, Yhang gi, yhangmoq lé, "Nghut kôlhâng, nungmoq gi, ngo lé ó yuq nghut lê nghu akô lú?" ga myí ri.

Haù hkûn, Petruq gi, "Nàng gi, Garai Gasang nhâng byí é Hkrisduq nghut ri." ga tú taí ri.

²¹ Shí hkyô ó lé le a taí kyo sháng gaq ga, Yesuq, yhangmoq lé taí hkûm pyâm ri.

²² Haù mù, Yhang gi, "Haù Byu Yhangzo gi, zing-rí é myo myo hui zo luí, suwún wui, hkyangjong agyi pé, tarâ sará pé eq he-ngik pyâm é hui mù, sat pyâm é hui ra râ nghut lê, hau htâng sum nyí nghú râ buinyì má, lhoq toq yu é hui râ nghut lê." ga taí ri.

²³ Hau htâng, ban-shoq bang lé Yhang dum xoq taí é gi, "Ngá htâng cháng naù sù ó yuq nghut kôle,

yhumsing gùng yhumsîng he-ngik pyám mù, nyí wuî yhumsing é tapzîng lé waq chûng* luî, cháng ra râ nghut lhê. ²⁴ Hkâsu mù gâ le, yhumsing é asak lé hkyi yù naù sù ó yuq nghut kôle, asak sum râ nghut lhê; nghut kôlhang, Ngá é yanmai, yhumsing é asak sum pyâm é sù kúm gi, asak hkyi yu é hui râ nghut lhê. ²⁵ Byù gi, mingkan gón lé wó sing to kôlhang, yhumsing é asak woi-nyí sùm byuq é nghut le gi, yhang é matú, haî akyû bò râ lúh? ²⁶ Ngò eq Ngá é dang lé, lhom hap yù râ lé hoq é sù ó yuq lé le, haù Byu Yhangzo gi, yhumsing é hpungwup shing kang eq, Yhâng Wâ é hpungwup shing kang, haù chyoiyúng maumang lagyô pê é hpungwup shing kang eq jé lé é hkûn, hoq pyám râ nghut lhê. ²⁷ Ngò, nungmoq lé teng za taí kôlé, shi má yap tô é bang ra-am gi, Garai Gasâng é mingdán lé a myang é za shi kó râ a nghut." gâ ri.

Mosheq Eq Eliyaq Yesuq Lé Hui Nyo É Hkyô

Mht 17:1-8; Mrk 9:2-8

²⁸ Dang haù taí é htâng, shit nyí kô nghut jáng, Yhang gi, kyûdung râ ga Petruq, Yohan, Yakuq pé lé shui chûng mù, bùm shut doq ló ri. ²⁹ Kyû dúng nyi le, Yesuq é myoqdong gi, ihpyô isâm htaí lò mù, Yhâng é mebu gi, lhap su duq bang lo ri. ³⁰ Haù hkûn, wú keq, Mosheq

eq Eliyaq gi, hpungwup shing kang eq htoq lé lô luî, Yesuq eq dang nyo lhùm nyi akô. ³¹ Yhangmoq gi, Garai Gasang myit tô é hkyô Yerusalem wà mó má Yesuq shi hkâm é dông mai dik lò râ nghut é hkyô lé taí lhùm nyi akô. ³² Petruq eq yhâng luzúm nhik gi, yhup mui nyi akô; nghut kôlhang, yhangmoq bûn lo é hkûn lé, Yesuq é hpungwup shing kang lé le, Yhang eq rahá yap to su nhik lé le, myang kat akô. ³³ Haù nhik Yesuq chyáng mai gâng ló nyi é hkûn, Petruq gi, Yesuq lé, "Yhumsing ê, shi jowò má nga-nhúng nyi le ge ri, haù mù, Nang é matú ralhum, Mosheq é matú ralhum, Eliyaq é matú ralhum kut, ngamoq lé, zúm sùm lhùm saí nhâng laq." ga taí kat kôlhang, yhang haî taí nyi é lé, yhang a sé.

³⁴ Petruq dang taí nyi ashí hkûn lé, mhut jé mù, yhangmoq lé htup zing lo nyi ri. Mhut haù htup lo nyi é yanmai, yhangmoq gi, gyuq byuq akô. ³⁵ Haù mhut hkaù mai htoq lo é htê gi, "Shi yuq gi, Ngá zo nghut lhê; Ngò hkyin yu é Sù le nghut lhê; Yhâng é dang gyo keq." gâ ri. ³⁶ Dang htê haù zim jáng, Yesuq yhang baú nyi tô é lé, yhangmoq myang akô. Yhangmoq myang é hkyô lé, buinyi haù bun haù yoq má, ó lé le a taí kyô é zim za nyi byuq akô.

* **9:23** Tapzîng lé waq chûng nghu é gi, Yesuq é yanmai jamjau hui é lé taí é nghut lhê.

Nat Gang Dap É Yuqgè Zo Rayuq Lé Lhoq Gê Byî É Hkyô Mht 17:14-18; Mrk 9:14-27

³⁷ Hau htâng nyí, yhangmoq bùm haû mai gyó ló kô le, byù moq mó gi, Yesuq lé lhom te yu akô. ³⁸ Haú hkûn, byù hpúng haú mâ é byù rayuq wut garû htoq ló é gi, ³⁹ "Sarâ ê, wú aq, ngá é zo te yuqzo gi, nat wang júng mù dân so dân loq garû lo lhê, guttsû gi, agut gut dut shoq langhtân nhang lo lhê kut mù, nat gi, yhang lé gyai myáng shoq zing-rî yù yù kut nyi ri. ⁴⁰ Nat haú lé hkat pyám byi kó laq nghû luí, Náng é chángzô pé lé ngò dúng wú kôlhang, yhangmoq a wó hkat pyám byi kó. Haú mù, ngá zo lé lhoq gê byi râ matú, ngò gi, nang lé gyai myit lum é eq dúng kat lhê." gâ ri.

⁴¹ Haú mù luí, Yesuq gi, "Lumjîng myit a bo é eq agè ashop é amyû pé ê, Ngò gi, hkâ-myháng jé shoq nungmoq eq rahá nyi mù, wó jân nyi râ lhú? Nung zo lé, shí shut shuí lé lô aq." ga tû taí ri.

⁴² Zoshâng haú, lé lo nyi le lhang, nat gang gi, yhang lé lhoq lhêng to mù langhtân nhang ashî. Yesuq kúm gi, haú agè ashop é nat lé tân kat luí, zoshâng haú lé lhoq gê byi mù, yhâng wa lé dum ap byi ri. ⁴³ Nyi mi-nyì gi, Garai Gasâng é kô dik é hpungwup a-tsam lé maú hong nyi bum akô.

Lhunglhâng bang gi, Yesuq kut é muzó haú lé maú nyi bùm kô le, Yesuq gi, ⁴⁴ "Haú

Byu Yhangzo gi, byu pê é loq má ap pyâm é hui zo râ nghut lhê. Dang shí hkun lé nungmoq é no má rago gyô wun to keq." ga luí, chángzô pé lé taí ri. ⁴⁵ Yhangmoq kúm gi, dang haú lé a sê gyo kó, hkâsu mù ga le, haú gi, yhangmoq é matú a sê gyo sháng gaq ga luí, nghop tô ashî yanmai nghut ri. Dang hau é lichyúm lé, Yesuq chyáng yhangmoq a wám myi kó nghut ri.

Ó Yuq Gi, Kô Dik Sû Nghut Râ Lhú?

Mht 18:1-5; Mrk 9:33-40

⁴⁶ Hau htâng, lagyô pé gi, hká yuq sheq, kô dik sû nghut lhê lhú ga, rayuq eq rayuq taí myíng myô lhúm nyi akô. ⁴⁷ Yesuq kúm gi, yhangmoq é unghkaú má myit nyi é hkyô lé sé byi luí, zoshâng rayuq lé shuí yù mù, Yhâng nàm má shap to luí, ⁴⁸ "Shí zoshâng lé Ngá é myîng mai hap sû ó yuq nghut kôle, Ngo lé hap yu é sû nghut bê; Ngo lé hap yù sû ó yuq nghut kôle, haú Ngo lé nhang kat é Sû lé hap yu é le nghut lhê. Haú mù luí, nungmoq banshoq má, je tiq sû gi, je ko sû nghut lhê." ga luí, yhangmoq lé taí ri.

⁴⁹ Haú hkûn, Yohan gi, "Yhumsîng ê, Náng é myîng lánng luí, nat gâng pé lé hkat pyám byi wún é byù rayuq lé, ngamoq myang ri. Yhang gi, ngamoq chyáng a lòm sû nghut é yanmai, yhang lé ngamoq hkûm pyâm é nghut lhê." ga taí ri.

⁵⁰ Yesuq kúm gi, "Yhang lé hkâhkúm kó, nungmoq é gye

hkyam shut a nyi sù gi, nung-moq é hkyam shut nyi sù nghut lhê." ga luí, yhang lé tai ri.

Samariq Wà Bang Yesuq Lé A Lhom Hap Yu É Hkyô

⁵¹ Ahkuí, Yesuq gi, Yhang lé mauhkûng shut shuí toq yû râ buinyi chyâng lò bê nghut mù, Yerusalem wà mó shut ê râ lé myit hpyit to luí, Yhâng é hí má lagyo nhang kat ri. ⁵² Lagyo haú bang gi, Yhâng matú râ é hkyô lajang láng râ ga, Samariq wà rawà má wang ló akô. ⁵³ Nghut kôlhang, Yesuq gi, Yerusalem wà mó shut lai e ló é sù nghut é yanmai, haú wâ bang gi, Yhang lé a lhom hap yù kó. ⁵⁴ Haú hkûn, lagyo Yakuq eq Yohan nhik gi, haú lé myàng jáng, "Yhumsîng ê, yhangmoq lé lhoq htên pyám râ matú, ngá-nhik mauhkûng mai myi wut hkyó le, a gè lhu?" ga luí, Yesuq lé myi akô. ⁵⁵ Yhang kúm gi, lhing wú luí yhanghik lé, tân pyâm ri, ⁵⁶ haú mù luí, yhangmoq gi, gó wâ shut e ló byuq akô.

Yesuq É Htâng, Hkâsu Kut Cháng Râ Hkyô Mht 8:19-22

⁵⁷ Yhangmoq haú hkyô má e ló kô le, byù rayuq gi, "Nàng hká e le hká ngò cháng râ." ga luí, Yesuq lé tai ri.

⁵⁸ Yesuq gi, haú yuq lé, "Wamhkuí pé gi, hkyûng wó akô, nghoq pé le, nghoqsut

wó akô. Nghut kôlhang, haú Byu Yhangzo gi, ulhum to jang lhang a wó é nghut ri." ga tai pyám ri.

⁵⁹ Dum rayuq lé, "Ngá htâng cháng aq." ga tai jáng, haú yuq gi, "Yhumsîng ê, ngá wa lé, ló yhûm pyám râ ahkáng hí byi shi laq." ga tai ri.

⁶⁰ Yesuq gi, yhang lé, "Shi bê bang† gi, shi bê bang yhangchang yhûm lhum kó sháng gaq; nghut kôlhang, nàng gi, Garai Gasâng é mingdán hkyô lé, ê hko kyo aq." ga tai ri.

⁶¹ Byù rayuq dum, Yhang lé, "Yhumsîng ê, ngò le náng htâng cháng râ, nghut kôlhang, ngá yhumbyù lé hí hkyang ló shit to râ ahkáng byi shi laq." ga tai ri.

⁶² Yesuq gi, "Yò hpuq li zui mù htâng shut lhing wú sù ó yuq nghut kôlhang, Garai Gasâng é mingdán eq a gingdán." ga luí, yhang lé tai ri.

10

Yesuq, Chángzô Pé Nyhit Xê Yuq Lé, Nhang Htoq Kat É Hkyô

¹ Hau htâng má, Yhumsîng gi, gotú chángzô pé nyhit xê yuq* lé hkyin yù mù, Yhang e ló râ wà eq jowò hkanmó shut í yuq razúm zúm kut luí, Yhâng é hí má ê nhang kat ri. ² Yesuq gi, yhangmoq lé, "Kyô† shù yù râ myo shoq

† 9:60 Shi bê bang gâ é gi, woi-nyí má shi to bang lé gâ lhê. * 10:1 Chyúmdang ra-am má gi, chángzo nyhit xê í yuq ga le kâ tô ri. † 10:2 Kyô nghú é gi, Yesuq lé lumjing naù kôlhang tai kyo râ bang a nyi luí láng tô é bang nghut ri.

joq kôlhang, mû zui râ byù gi, shaû nyi ri. Haû mù, haû kyô Yhumsîng lé, Yhâng é kyô yò má, kyô shu byù† myo myo nhâng byi râ matú, dung keq. ³ Nungmoq e ló keq! Wamhkui hpúng má nhang hâng kat é sau zô pé lé su, Ngò, nungmoq lé nhang kat é nghut lê. ⁴ Ngùn htung eq, etap, hkyî-tsung pé hkâyú chúng kó, hkyô má ó lé le hkâshichyên kún nyi kó.

⁵ Nungmoq gi, hká yhûm má wàng e ló kô le, 'Shi yhûm nguingón nyi sháng gaq.' nghû luí, hí taí keq. ⁶ Haû yhûm má nguingón hkyô eq gingdán sù nyi é nghut le gi, nguingón hkyô haû gi, haû yuq é ahtoq má joq to râ nghut lê. Haû a nghut jáng, nguingón hkyô haû gi, nungmoq chyáng dum taû lo byuq râ nghut lê. ⁷ Haû yhûm má nyi to mù, yhangmoq haí byí le haí zo haí shuq keq; hkâsu mù gâ le, mû zui sù gi, zuihpau wó yû gíng lê; haû mù, nungmoq rayhum htâng rayhûm hkâhtot nyi wún kó.

⁸ Nungmoq hká wà má wang ló kôlhang, yhangmoq lhom hap yù kô é nghut le gi, nungmoq é hí má yhangmoq htung to byí é zoshuq lé, zo keq, shuq keq. ⁹ Haû má é nò bang lé lhoq gê byi mù, 'Garai Gasâng é mingdán gi, nungmoq eq

chyâng lò bê nghut ri.' nghû luí, yhangmoq lé taí kyo keq. ¹⁰ Nghut kôlhang, nungmoq hká wà má wang ló kô le, yhangmoq a lhom hap yu é nghut le gi, haû wâ má é hkyô mó má htoq ê mù, ¹¹ 'Ngamoq é hkyî má dap tô é nungmoq wà má é hpuilhaû lhang, nungmoq lé hkyang pû tsô nyi râ matú ngamoq ko hkyô pyâm to byi bê. Nghut kôlhang, Garai Gasâng é mingdán gi, chyâng lò bê hkyô lé, sé to keq.' nghû luí taí keq. ¹² Ngò, nungmoq lé taí kôlé, haû buinyi§ lé, haû wâ gi, Sodom wà htoq má je hpuzo râ nghut lê.

¹³ Kurazin wà mó ê! Nàng dingnyé wó ri! Bet-saida wà mó ê! Nàng dingnyé wó ri! Nungmoq chyáng lé kut shit é laklaí kumhá pé lé, Turuq myuq eq Sidun myuq má kut shit é ru nghut le gi, yhangmoq, noq noq mai myit lîng mù, jimê tû wut lê, myiwap kyaq gyûn lê kut zung ngûng to bekô râ nghut lê. ¹⁴ Haû mù, tarâ jéyáng é nyí jé jáng, nungnhik gi, Turuq myuq eq Sidun myuq htoq má je hpuzo* kó râ nghut lê. ¹⁵ Dum mù, Kaperna-um wà nàng ê, nàng gi, mauhkûng jé shoq waq toq é hui râ lú? A nghut, mosumhkung má sheq gyó râ nghut lê." ga taí ri.

¹⁶ Hau htâng má, chángzô

† 10:2 Kyô shu byù nghu é gi, Yesuq é hkyô gabú danglù lé taí kyo bang nghut ri.

§ 10:12 Haû buinyi gâ é gi, Garai Gasâng tarâ jéyáng é buinyi lé gâ lê. * 10:14 Nungnhik je hpuzô é hkyô gi, mauhpo kumhá myo myo myang é nghut kôlhang, myit a lîng kô é yanmai nghut ri.

pé lé dum xoq taí é gi, "Nungmoq é dang gyo sù gi, ngá é dang gyo sù le nghut bê; nungmoq lé he-ngik é sù gi, ngo lé le he-ngik é sù nghut bê; ngo lé he-ngik é sù gi, ngo lé nhang kat sù lé le, he-ngik é sù nghut bê." gâ ri.

Nyhit Xê Yuq Dum Taú Jé Lo É Hkyô

¹⁷ Hau htâng, haú chángzo nyhit xê yuq gi, gabú myit èq dum taú lò mù, "Yhumsîng ê, náng é myîng lé lang jáng, nat gâng pé lhang ngamoq é dang lé gyô bum akô." ga taí akô.

¹⁸ Haú su ga taí kôjáng, Yesuq tû taí é gi, "Tsadán gi, mauhkûng htoq mai lhap hpyat é su byit gyó lo é lé ngò myang kat bê. ¹⁹ Wú keq! Ngò gi, nungmoq lé, lhangmùi eq gogok pé lé wó nang râ eq gumlau gyè pé é wum-o a-tsam banshoq lé wó ûng râ ahko ahkáng lé byi bê nghut mù luí, hai èq le nungmoq lé wó lhoq hten râ a nghut lo. ²⁰ Nghut kôhang, nat pé nungmoq é dang gyô é lé za hkâgabú nyî kó, mauhkûng htoq mâ é asak jihpán laiká buk má nungmoq é myîng bo to bê lé sheq gabú nyî keq." ga taí ri.

²¹ Haú u lé, Yesuq gi, Chyoiyúng Woi-nyí má gabú é myit byíng lô mù, "Mauhkûng eq myigung é Yhumsîng, Áwa ê, Nang gi, haú pé lé, hpaqchyí byéng-yá bò bang eq myit hpaqchyí sé bâng é hí mai haq nghop to luí, zoshâng wuì lé tûn shit bê nghut é yanmai,

Ngò, Nang lé hkyá-ôn lhê ô. Nghut bê, Áwa ê, haú gi, Nang ô nau é hkyô nghut ri.

²² Ngá Wa gi, lhunglhang lé Ngá é loq má ap byi to bê. Garai Gasang Yhangzo ó nghut é gi, Áwa Garai Gasang mai lai luí ó le a sé; Áwa ó nghut é lé le, haú Zo eq haú Zo mai sé nhâng râ matú hkyin yu é bang mai lai luí, ó a sé." ga taí ri.

²³ Hau htâng má, Yhâng é chángzô pé shut lhing wú luí, yhangmoq lé baú za haq taí kat é gi, "Nungmoq byu-myàng é hkyô pé lé, myang é myoq pé gi, hkungsô wó nyi ri. ²⁴ Hkâsu mù gâ le, Ngò, nungmoq lé taí kôlé, nungmoq wó myâng, wó gyô é pé lé, myiqhtoí pé eq hkohkam pé myo myo gi, myàng nau gyo nau kôhang, a wó myâng, a wó gyo kó nghut ri." ga taí ri.

Gè É Samariq Byú

²⁵ Haú hkûn, wú keq, tarâ sará rayuq gi, toq luí, Yesuq lé, "Sará ê, ahtum abyuq é asak lé wó yû shoq, ngò hkâsu kut râ râ lhê lhú?" ga luí, Yhang lé myí chyam wú ri.

²⁶ Yesuq gi, "Mosheq é tarâ má hkâsu ga kê tô ri lhú? Nang haú lé hkâsu nghap yu nyi lhê lhú?" ga luí, yhang lé myí ri.

²⁷ Haú yuq gi, "Haú Yhumsîng náng é Garai Gasang lé, náng é myit nhiklum banshoq, náng é asak woi-nyí lhum gón, náng é wum-o banshoq, náng

myit é hkyô banshoq êq, chyitdap râ lê; ¹☆ 'náng gûng lé nàng chyitdap é su, náng é chyangnâm mâ é bang lé le chyitdap aq. ²☆ ga tû taí ri.

²⁸ Yesuq gi, "Nàng tû taí é dang jô ri; haû su yhang kut aq, haû jáng nàng gi, asak duì râ nghut lê." ga yhang lé taí ri.

²⁹ Nghut kôlhang, haû yuq gi, yhâng gungdu dîngmán é lé, tûn shit naû luí, "Ngá é chyangnâm mâ é sù gi, ó yuq nghut lê lúh?" ga luí, Yesuq lé myí ri.

³⁰ Yesuq tû taí é gi, "Byù rayuq gi, Yerusalem wà mó mai Yeriho wà shut gyó ló le, damyaq eq htûng huí ri. Damyaq haû bang gi, yhâng é mebu pé lé hkyut shang pyâm byi kôluí, rayúm gyut shoq bat nha mù, aluq shoí shí jáng sheq tô pyâm to kôluí ló byuq bekô. ³¹ Haû u lé, hkyangjong rayuq gi, haû hkyô mai laí âng ló le, haû damyaq hui sù lé myàng jáng, koi laí ló byuq ri. ³² Haû eq rajung za, Lewiq rayuq le, haû mai laí ló é hkûn, haû yuq lé myàng jáng, koi laí ló byuq ri. ³³ Nghut kôlhang, Samariq byù rayuq le, haû mai laí ló é hkûn, haû yuq leq tô é lé myàng jáng, wú shogyo luí yhâng chyáng huí ê mù, ³⁴ yhâng é dâm má, xû eq tsibiyiq wing shoq gyun luí, rago za htup byi mù, yhâng é logúng má, haû yuq lé bún ke luí, bing-yhûm ralhûm má jé shoq shuí ló mù, gôn lajang byí ri. ³⁵ Htang nyí lé, yhang

gi, haû bing-yhûm yhumsîng lé ngùn Denari í chap shê byi mù, taí é gi, 'Shí yuq lé wú lajang byi laq, yhâng gùng má nàng myo chung zàng é banshoq lé ngò dum taù lò jáng, lo xap râ.' gâ ri." gâ ri.

³⁶ Hau htâng, tarâ sará lé, "Nàng gi, byù haû bang sum yuq má damyaq hui sù é chyangnâm mâ é dông nghut sù gi, hká yuq nghut râ su ngam ri lúh?" ga luí, Yesuq myí ri.

³⁷ Haû tarâ sará gi, "Haû yuq lé shogyo sù nghut ri." ga taí ri.

Yesuq gi, "Nàng le haû dông ló kut aq." ga luí, yhang lé taí kat ri.

Mariq Eq Mahtaq Nhik Chyáng Yesuq Ê Jé É Hkyô

³⁸ Ahkuí, Yesuq eq Yhâng é chángzô pé hkyô xoq sô e ló kô le, wà rawà má jé wang ló é hkûn, Mahtaq gâ é myiwe rayuq gi, Yesuq lé yhâng yhûm má lhom te yu ri. ³⁹ Mahtaq gi, Mariq gâ é yhanggu myiwe zo rayuq wó ri. Mariq haû gi, Yhumsîng Yesuq é hkyí wang má zung to mù, Yhang mhoqshit é dang lé gyô nyi ri. ⁴⁰ Mahtaq kúm gi, saí tso saí huq é amû myo luí, gyin bún nyi ri. Haû mù luí, yhang huí ê mù, "Yhumsîng ê, ngá gu gi, saí tso saí huq é amû má, ngo lé baú za rap kut tô é lé, nàng a bo myàng byi lúh? Ngo lé, lé garúm sháng gaq, yhang lé taí byi laq." ga luí, Yesuq lé taí ri.

⁴¹ Haú hkûn, Yhumsîng gi, "Mahtaq, Mahtaq, nàng gi, muzó lé za ma nyi mù, myit myo myit chiq é huî nyi ri. ⁴² Nghut kôlhang, je ahkyak é hkyô gi, rahkat za nghut lhê. Mariq kúm gi, haú je ge é hkyô lé hkyin yù bê nghut ri. Haú lé yhâng chyáng mai wó yu pyám byi râ a nghut." ga luî, yhang lé tû tai ri.

11

Yesuq Mhoqshit É Kyûdung Dang

Mht 6:9-13; 7:7-11

¹ Ra-nyí lé, Yesuq gi, jowò rawò má kyûdûng nyi ri. Yhang kyû ban dung jáng, Yhâng é chángzo rayuq gi, "Yhumsîng ê, Yohan gi, yhâng é chángzô pé lé kyûdung râ hkyô mhoq byi é su, ngamoq lé le mhoq byi laq." ga Yhang lé tai ri.

² Haú hkûn, Yhang gi, "Nungmoq kyûdûng le, 'Mauhkûng htoq tsáng myhâng mâ é ngamoq é Áwa ê, Náng é myìng gi, chyoiyúng nyi sháng gaq. Náng é mingdán jé lô sháng gaq.

³ Ngamoq nyí wuî râ é zoshuq lé, ngamoq lé nyí wuî byi laq.

⁴ Ngamoq lé shut é byù banshoq bâng é mara lé, ngamoq hkyut pyám byi é yanmai, ngamoq é mara lé le hkyut pyám byi laq.

Ngamoq lé, agúng alaú hkyô má hkâwâng nhâng.'

ngû keq." ga luî, yhangmoq lé mhoqshit ri.

⁵ Yesuq yhangmoq lé dum tai é gi, "Dangké, nungmoq chyáng mâ é rayuq sù gi, buinùm wó é ngû sháng, yhang gi, gunggàm yoq má haú yuq chyáng ê luî, 'Buinùm hpó ê, ngo lé muk sùm long byam chyi byi kat laq, ⁶ hai mù gâ le, ngá buinùm rayuq byin we mai ngá chyáng jé nyi tô ri. Ngò gi, yhang lé byi tso râ hai le a joq byam dut tô ri.' ga tai é hkûn, ⁷ yhúmkaû shut mâ é sù gi, 'Ngo lé, hkâlê lhoq hkyik lo, hkum le myhî pyám bê, ngá zoshâng wuî le ngò eq rahá yhupjang má yhup to bekô. Ngò, nang lé hai le a wó toq yû byi lo.' ga tu kat ri. ⁸ Ngò, nungmoq lé tai kôlé, buinùm nghut é yanmai za gi, muk a kâm toq byi lo kôlhang, zuq zuq dúng nyi é yanmai, haú yuq lé, yhang ra châ é banshoq toq yû byi râ nghut lhê.

⁹ Haú mù, ngò, nungmoq lé dum tai kôlé, dung keq, haú jáng, nungmoq lé byi râ nghut lhê; hô keq, haú jáng, nungmoq myàng kó râ nghut lhê; hkum má kok keq, haú jáng, nungmoq lé hpóng byi râ nghut lhê. ¹⁰ Hkâsu mù gâ le, ó yuq nghut kôle, dung sù wó râ; hô sù myàng râ; hkum kok sù lé gi, hpóng byi râ nghut lhê.

¹¹ Nungmoq îwâ pé má, ó yuq wá, yhumsing yhangzo muk dúng le, luqgok byi kó râ lú? Ngozo dúng le, lhang-muî byi kó râ lú? ¹² Woq-ú

dùng le, gogok byi kó rã lúh? ¹³ Agè ashop é bang nungmoq lháng gi, nungmoq é zo wuî lé, ge é chyunghuq dat byi kô le nhîng, mauhkûng htoq tsáng myhâng mã é nungmoq é Îwa gi, Yhang lé dùng é bang lé, je riyhang haû Chyoiyúng Woi-nyí byi rã nghut lhê." ga taî ri.

*Mara Hûn É Dang Lé Yesuq
Tû Tai É Hkyô*

Mht 12:22-30, 43-45; Mrk 3:20-27

¹⁴ Radàm lé, Yesuq gi, byù rayuq lé dang a wó nyô shoq kut tô é nat gang lé, haû yuq chyáng mai hkat htoq pyâm ri. Nat haû htoq ló byuq é htâng má, dang a wó nyô sù gi, dang wó nyo nyi é yanmai, byù moq mó gi, chôm maú byuq bum akô. ¹⁵ Nghut kôlhâng, yhangmoq chyáng mã é ra-am gi, "Yhang gi, nat gâng pê é zau Bezebulaq é wum-o a-tsâm èq za, nat gâng pé lé wó hkat pyâm é nghut ri." ga taî bum akô nghut ri. ¹⁶ Ra-am le, Yhang lé, mauhkûng mã é kumlhá tûn shít wú laq ga dùng chyam wú akô.*

¹⁷ Yesuq kúm yhangmoq myit nyi é hkyô lé sé mù taî é gi, "Ikun byoq é mingdán hká lhum nghut kôle, hten byuq rã za nghut lhê; haû eq rajung za, ikun byù yhangchang rayuq eq rayuq byoq lhum é yhûm htu gi, byoq gâng lhum

rã za nghut lhê. ¹⁸ Nat pé le yhangmoq yhangchang byoq gâng lhum nyi kô é nghut le gi, Tsadán é mingdán gi, hkâsu kut wó gîng to rã lúh? Ngò isu nghu taî é gi, nungmoq ngo lé Bezebulaq é wum-o a-tsâm èq za, nat gâng pé lé hkat pyâm ri ga kô é yanmai nghut lhê. ¹⁹ Ngò gi, Bezebulaq é wum-ô èq za, nat gâng pé lé hkat htoq é nghut jáng, nungmoq é chángzô pé gi, ó yuq é wum-o a-tsâm èq za, nat gâng pé lé hkat pyâm kô é nghut lhê lúh? Haû mù luî, yhangmoq gi, nungmoq lé jéyáng é bang dut bekô rã nghut lhê. ²⁰ Nghut kôlhâng, Ngò gi, Garai Gasâng é wum-ô èq nat gâng pé lé hkat htoq pyâm é nghut jáng, Garai Gasâng é mingdán† gi, nungmoq chyáng jé bê nghut ri.

²¹ Wum-o bo é sù rayuq gi, yhâng é yhûm lé, shâm, lhâm chûng luî zúng tô é nghut jáng, yhâng é sutzè pé gi, rago za wó joq to rã nghut lhê. ²² Nghut kôlhâng, yhâng htoq wum je bo é sù lé luî, haû yuq lé, lé zân ung pyâm é nghut le gi, yhang lum tô é shâm, lhâm lé, hkyom yu pyâm byi luî, yhâng é sutzè pé lé, gam yu pyâm byi rã nghut lhê.‡

²³ Ngá hkyam shut a dap sù gi, Ngo lé gyè kut sù nghut lhê. Ngò eq rahá a shuí tsing sù gi, lhoq pyo pyâm é sù

* **11:16** Byu pé gi, Yesuq lé Garai Gasâng nhang kat é hkyô lé saksé myàng naù luî, mauhpo kumlhá dùng nyi akô. † **11:20** Garai Gasâng é mingdán gâ é gi, byù htoq má le, nat htoq má le, Garai Gasâng yhang uphâng é lé gâ é nghut lhê. ‡ **11:22** Haû eq rajung za, Yesuq gi, Tsadán lé zân ùng bê nghut é yanmai, agè ashop é nat pé lé byu pê chyáng mai, wó hkat pyâm bê nghut ri.

nghut nyi ri.

²⁴ Haù agè ashop é nat gi, byù rayuq chyáng mai htoq ló mù, kyuq huí é jowò pé má sô yông e ló luí, no rá jowò hkat ho wú le, a myang hô nghut ri. Haù hkùn, yhang gi, 'Ngò nyi lai lo é yhùm má dum taù ló wú rá.' ga taí ri. ²⁵ Yhang dum taù jé ló wú le, yhùm haù gi, shum pyám mù san za rago dut to lánq é lé ló myang ri. ²⁶ Haù jáng, yhang gi, dum taù é mù, yhâng htoq je wuí é nat nyhit nat lé shuí lò luí, haù má lo wàng nyi to bekô. Haù mù, haù yuq é nyi yap sâmlai gi, hí lhê htoq má je wuí lò bê nghut ri." ga taí ri.

²⁷ Haù su ga, Yesuq taí nyi é hkùn, haù shiwa hpong má é, myiwe zo rayuq htê mó o mó èq Yhang lé taí é gi, "Nang lé wun é ùng wam eq nàng shuq é nauwang gi, hkungsô wó nyi ri ô!" gâ ri.

²⁸ Yesuq gi, "Garai Gasâng é mungdang gyô yù luí châng kut é bang gi, je riyhang hkungsô wó kó rá nghut lhê." ga taí ri.

Mauhpo Kumhá Lé Dung Kô É Hkyô

Mht 12:38-42; Mrk 8:12

²⁹ Shiwa byu pé jat myô zup zîng lo é hkùn lé, Yesuq taí é gi, "Shí ipyat lhê é byu pé gi, agè ashop é bang nghut akô. Yhangmoq gi, limik kumlhá dúng nyi bùm kôlhang, Yonaq é kumlhá mai lai luí, gotú

haí le tún shit rá a nghut. ³⁰ Yonaq gi, Ninewe wà byù pé hí má kumlhá§ dut é su, haù Byu Yhangzo gi, shí pyat lhê é byu pé hí má, kumlhá dut rá nghut lhê. ³¹ Maupyí má é hkohkâm myhí gi, maumyí ló htâng é mai lé lô mù, Sholumon é hpaqchyí dang lé, lé gyô yù bê nghut mù, haù tarâ jéyáng é buinyi má, shí ipyat má é byu pé eq rahá toq lò luí, yhangmoq lé mara hùn rá nghut lhê. Wú keq, Sholumon htoq ko sù gi, ahkuí shí má jé nyi to bê. ³² Ninewe wà byu pé gi, Yonaq, mungdang hko kyô é hkùn myit lhîng kô é nghut mù, tarâ jéyáng é buinyi má, shí ipyat eq rahá toq lò luí, yhangmoq lé mara hùn kó rá nghut lhê. Wú keq, Yonaq htoq ko sù gi, ahkuí shí má jé nyi to bê.

Myibung Su Duqbó Râ Hkyô

Mht 5:15; 6:22-23

³³ Myibung lé tuq mù go pyâm é jowò má tô tô é le, mûng eq nghop tô é le, ó a kut wú kó. Nghut kôlhang, wang lé lô bang myoq wó myâng rá matú kúm gi, tsung-jang má tsung to to chyat kut akô. ³⁴ Náng é myoq gi, náng gungdû é myibung* nghut nyi ri. Náng é myoqjí ge é nghut le gi, náng é gungdu gón má maubó byíng mui to rá nghut lhê. Nghut kôlhang,

§ 11:30 Kumhá gi, Yonaq, ngozô wamdau má sum nyí lúng é su, Yesuq le, shí bê mai sum nyí ngù rá nyí má, dum dui toq lò rá hkyô lé taí nau é nghut ri. * 11:34 Myibung gâ é gi, tengmán é mungdang lé wó sê yu é a-tsam lé, taí é nghut ri.

náng myoq a ge é nghut le gi, náng é gungdu gón gi, mauchut tuq dut nyi râ nghut lhê. ³⁵ Haû mù, náng chyáng bo é maubó gi, mauchut byuq é, a chut byuq é lé wú nyi aq. Náng lumjǐng é hkyô eq náng myit é hkyô gi, mauchut tuq a dut sháng gaq, sidiq nyi aq. ³⁶ Náng é ragùngdu gón má duqbó é nghut le gi, rawò má le mauchut é jowò a joq é za, myibung nang lé duqbó byi nyi é su, náng gungdu gón má duqbó nyi râ nghut lhê." ga taí ri.

Hparishe Pé Eq Tarâ Sará Pé Lé, Yesuq Mara Hun É Hkyô Mht 23:1-36; Mrk 12:38-40; Luk 20:45-47

³⁷ Yesuq haû su ga ban taí é htàng má, Hparishe rayuq gi, yhang eq zang rahá zo râ matú, Yesuq lé ji ri. Haû mù, Yesuq gi, haû yhùm má wang ê mù zang zo râ ga siboî nàm má zung tô ri. ³⁸ Nghut kôlhang, Hparishe wá gi, zang zo râ hí má Yesuq loq a chí é lé, myàng luí maú nyi ri. †

³⁹ Haû mù luí, Yhumsîng Yesuq yhang lé taí é gi, "Nungmoq Hparishe pé gi, góm eq zanghkoq lé ahtoq shut za chí yúng nyi kômù, nungmoq é unghkaû má gi, lú zo lú shuq é eq agè ashop é hkyô pé byíng zan tô ri. ⁴⁰ Byù bâm pé ê, ahte † lé le, ahtoq § lé le, saí sù gi, Garai Gasang rayuq za nghut é lé, a sé kó lhú? ⁴¹ Nghut kôlhang, ahte má bo

é zè pé lé, ra châ é bang lé byi pyám keq; haû hkûn, nungmoq é matú banshoq gi, sân-yúng lô râ nghut lhê.

⁴² Hparishe pé ê, nungmoq gi, dingnyé wó ri, hkâsu mù gâ le, nungmoq gi, gau-tsáng, shingtón pé eq zangxun mhan-haq ajù jù mâ é, xê gambùm ragambùm lé gi, Garai Gasang lé byi nyi kômù, tarâ dingmán é hkyô eq Garai Gasang chyitdap é hkyô lé gi, lhai pyám tô akô. Xê gambùm ragambùm byi é lé le cháng luí, tarâ dingmán é hkyô eq Garai Gasang lé chyitdap é hkyô lé le, kut nyi râ lhê.

⁴³ Hparishe pé ê, nungmoq gi, dingnyé wó ri, hkâsu mù gâ le, tarajong pé mâ é ahkyak dik é zùng jang pé lé le, gai pé má hkunggâ é eq shichyên é dang lé le, nungmoq ô nau nyi bum akô.

⁴⁴ Nungmoq gi, dingnyé wó ri, hkâsu mù gâ le, nungmoq gi, ahkô a dong lo mù, byu pé a sé luí, ahtoq mai sô lai é lupdùng eq du akô." ga taí ri.

⁴⁵ Haû hkûn, tarâ sará rayuq gi, "Sará ê, náng haû su gâ é gi, ngamoq lé le rhoi lhôm nyi é nghut bê." ga Yhang lé tú taí ri.

⁴⁶ Haû su ga jáng, Yesuq gi, "Nungmoq tarâ sará pé le, dingnyé wó ri. Hkâsu mù gâ le, nungmoq gi, byu pé lé, wùn waq râ wuí é noqkuq htúng tarâ wòlai lé wùn nhâng luí, yhumsîng yhang gi, wò

† 11:38 Yudaq htúng tarâ má gi, zang a zo shi má loq chí râ lhê. † 11:40 Ahte gâ é gi, i-myt unghkaû lé taí ri. § 11:40 Ahtoq gâ é gi, gungdu lé taí ri.

haú lé loqnyhuí èq lhang, a bo záng wú kó nghut ri.

⁴⁷ Nungmoq gi, dingnyé wó ri, hkâsu mù gà le, nungmoq gi, nungmoq é ichyí iwâ pé sat pyâm é myiqhtoí pé é lup lé luptsuq tsuq akô. ⁴⁸ Haú mù luí, nungmoq gi, nungmoq é ichyí iwâ pé é muzó lé, myit bo huí é bang nghut nyi akô. Hkâsu mù gà le, yhangmoq gi, myiqhtoí pé lé sat pyâm mù, nungmoq gi, lup haú pé lé luptsuq tsuq akô. ⁴⁹ Haú mù luí, Garai Gasang, Yhâng é hpaqchyí byéng-yá mai tai é gi, 'Myiqhtoí pé eq lagyô pé lé, ngò yhangmoq chyáng nhang kat râ nghut lhê; haú bang mâ é ra-am lé gi, yhangmoq lhom sat pyâm mù, ra-am lé gi, zing-ri kó râ nghut lhê.' gà ri. ⁵⁰ Haú su mù luí, mau htoq xâng hkûn lhê é, Abelaq é sui mai, hkungga gyap eq noqkuq yhûm gyoro má sat pyâm huí é Zahkariq é sui jé shoq, shun pyâm é myiqhtoí pé é sui banshoq bâng é manglat gi, shí pyat mâ é byu pé lé hûn râ nghut lhê. ⁵¹ Ngò, nungmoq lé tai kôlé, manglat haú pé lé gi, shí pyat mâ é byu pé lé, gè gè yhang hûn râ nghut lhê.

⁵² Tarâ sará pé ê, nungmoq gi, dingnyé wó ri, hkâsu mù gà le, nungmoq gi, byu pé Garai Gasang lé sé ra zo-qshi lé yu pyâm byi kômù, yhumsîng yhang le a sé, sé naú bang lé le, hkûm zing tô akô nghut ri." ga tai ri.

⁵³⁻⁵⁴ Yesuq haú mai htoq ló é hkûn, tarâ sará pé eq

Hparishe pé gi, Yhang lé gyè kut mù, Yhâng é dang má mara wó myâng shoq ga, wuí é dangmyi myo myo myi luí, gyám wú nyi akô nghut ri.

12

Gegùn Labyoq Kut É Bang Lé Sidiq Râ Hkyô

Mht 10:28-33; 12:32; 10:19-20

¹ Haú u, byù hkyîng mun zup zîng lò mù, rayuq eq rayuq lhang záng nâng lhum shoq dut nyi é hkûn, Yesuq, Yhâng é chángzô pé lé tai hi é gi, "Gegùn labyoq kut é Hparishe pé é múnchi lé koi sidiq pyám keq. ² A byông htoq loshoq wó zaú nghop tô é, haí le a joq râ nghut lhê; a sé loshoq wó haq tô é le, haí a joq râ nghut lhê. ³ Haú mù luí, nungmoq, mauchut hkaú má haq tai é dang banshoq lé, myoq myàng maubó má wó gyô bùm kó râ nghut lhê. Gok hkaú má, dangsoq soq é lé le, yhumhkûng htoq mai tai pyo bùm bekô râ nghut lhê.

⁴ Ngá buinùm wuí ê, Ngò, nungmoq lé tai kôlé, gungdu lé za wó sat pyâm mù, woi-nyí lé haí le a wó kut é bang lé, hkâgyuq kó. ⁵ Nghut kôlhang, nungmoq ó lé za gyuq râ é lé gi, Ngò, nungmoq lé tai kyo kôlé, gungdu lé sat pyâm é htâng má, woi-nyí lé ngaraí ming shut wó hkyô kat pyâm é a-tsam wó sù lé kúm gi, gyuq keq. Nghut bê, Ngò, nungmoq lé tai kôlé, haú yuq lé za, gyuq nyi keq. ⁶ Johkýang ngo du lé, gyi htingchap í chap

èq wó ùng pyâm lhê a nghut kó lú? Haú johkyáng radu lé lhang, Garai Gasang gi, tô-myhî pyâm é a nghut. ⁷ Garai Gasang gi, nungmoq é ulhum mâ é xâm banshoq lé lhang, nghap to gù nghut lhê. Haú mù, hkâgyuq kó; nungmoq gi, haú johkyáng myo myô htoq má lhang gù je bo é bang nghut lhê.

⁸ Ngò, nungmoq lé taí kôlé, byu pè hí má Ngo lé lhom yín yu é sù ó yuq nghut kôlé, Garai Gasang é maumang lagyô pè é hí má, haú Byu Yhangzo gi, haú yuq lé lhom yín yû râ nghut lhê. ⁹ Nghut kôlhang, byu pè é hí má Ngo lé he-ngik pyâm é sù lé chyaú gi, Garai Gasang é maumang lagyô pè é hí má, he-ngik pyám râ nghut lhê. ¹⁰ Haú Byu Yhangzo lé dang đông shut é sù gi, mara hkyut byî é wó hui ra nghut lhê; nghut kôlhang, haú Chyoiyúng Woi-nyí lé rhoi dang taí pyâm é sù gi, mara hkyut byî é hui râ a nghut.

¹¹ Byu pé nungmoq lé jéyáng râ matú tarajong pé má le, agyì suwún wuî eq ahkáng ayá wó bâng é hí má le, shuí e ló kô é hkûn, hkâsu kut râ lé le, hkâsu nghû tû taí râ lé le, hkâ-myit chiq kó. ¹² Hkâsu mù gâ le, haú u lé yhang, Chyoiyúng Woi-nyí gi, nungmoq hkâsu taí râ hkyô lé mhoqshit byi râ nghut lhê." ga taí ri.

Hpaqchyî A Bo É Sahtê Hpó Lé Dangtú Yu É Hkyô

¹³ Haú hkûn, shiwa hpúng hkaú mai, byù rayuq gi, "Sarâ ê, ngá-nhik tâng wó é muizè pé lé chôm gam lhum râ matú, ngá mang lé bo taí byi laq." ga luí, Yesuq lé taí ri.

¹⁴ Yesuq gi, "Byù nàng ê, nungnhik tang ahtoq má tarâ agyì kut luí, ikun zè gàm byi râ gi, ngo lé ó hkyin tô é lú?" ga luí, yhang lé tû taí ri. ¹⁵ Yesuq yhangmoq lé taí é gi, "Myoqnoq é hkyô banshoq mai, nungmoq é i-myit lé hkûm zing luí, koi sidiq nyi keq. Hkâsu mù gâ le, byu é asak gi, agùn agó é sutzè má bo é a nghut." gâ ri.

¹⁶ Dangtú ralhúm đông mai le, yhangmoq lé Yesuq taí é gi, "Sahtê rayuq gi, yhâng é yò pé má guqzo muilhum gyaí já ri. ¹⁷ Haú mù luí, yhâng é unghkaú má myit é gi, 'Ngò hkâsu kut wú râ lhi? Ngá é guqzo muilhum pé lé kat to râ jowò a wó lo dut to bê.' gâ ri.

¹⁸ Dum nghut jáng, yhang gi, 'Ngò ísu kut wú râ abe, ngá é chyî xau pé lé hpyoq pyám luí, je kô é chyî pé lé saí râ nghut lhê. Chyî haú pé má ngá é guqzo muilhum pé eq sutzè banshoq lé, tsing kat to luí, ¹⁹ ngá é i-myit lé ísu nghû taí râ, "I-myit ê, zanwut myáng myáng é matú, zè gè myo myo ngò tsing to bê. I-myit nàng zim za kut nyi aq hkoi. Zo mù, shuq mù, ngón ngón nyi aq." ga' gâ ri.

²⁰ Nghut kôlhang, Garai Gasang gi, 'Byù gò ê, náng é asak lé, hkû-myîn yhang, wup yu pyám byî é nghut jáng,

nàng tsing hkong tô é zè pé gi, ó yuq é matú dut râ lúhú? ga luí, yhang lé taí ri.

²¹ Haú eq rajung za, yhum-sing é matú sutzè hkong to mù luí, Garai Gasang é hí má myung nyi sù gi, haú yuq su nghut râ nghut lhê." gâ ri.

Myit A Chiq É Za Garai Lé Lumjúng Râ Hkyô

Mht 6:25-34, 19-21

²² Yesuq, Yhâng é chángzô pé lé dum taí é gi, "Haú mù luí, Ngò, nungmoq lé taí kôlé, nungmoq é asak matú haí zo haí shuq râ eq nungmoq é gungdú matú haí wut haí tsang râ lé, hkâ-myit chiq kó.

²³ Asak gi, zoshuq htoq má, gungdu gi, mebû htoq má, je ahkyak lhê. ²⁴ Nghonoq pê é hkyô lé myit wú keq; yhangmoq gi, kyô hkyó kyô shu a kut kó; guqchyí eq sutdek lé a wó kó, nghut kôlhang, Garai Gasang gi, yhangmoq lé, byi tso byi huq nyi lhê. Nungmoq gi, nghoq haú pê htoq má je riyhang hpaudap nyi lhê a nghut kó lúhú? ²⁵ Nungmoq má, ó yuq wá, myit chiq é èq, yhumsing é asak lé radúng kô wó jat yù kó râ lúhú? ²⁶ Haú su mù luí, tiq dik é hkyô lé lhang, nungmoq a wó kut kô é nhing, haí mù luí gotú hkyô pé lé, myit myô nyi akô lúhú?

²⁷ Htutbó ban* pé hkâsu kut kô lo é lé, myit wú keq. Haú pé gi, mú le a zui, hkyíng le a duì kó nghut ri. Nghut kôlhang, Ngò, nungmoq lé taí kyo kôlé,

Hkôhkâm Sholumon hpúng kô dik u lé wut é mebu lhang, ban haú rabó lé a hkyit nghut ri. ²⁸ Lumjúng myit tiq é bang ê, hkû-nyí joq mù, napmá myihkyóm má dú kat pyám hui râ nghut é yosô mhan pé lé za lhang, Garai Gasang haú su kut hut é nghut le gi, nungmoq lé, je riyhang hut râ a nghut kó lúhú? ²⁹ Nungmoq gi, haí zo haí shuq râ lé hkâho nyi kó; haú eq séng luí lé hkâmyit chiq nyi kó. ³⁰ Hkâsu mù gâ le, Garai Gasang lé a sé bang gi, haú hkyô banshoq lé châng hkat ho nyi akô; nghut kôlhang, nungmoq é Íwa Garai Gasang gi, haú pé lé nungmoq râ é hkyô, sé byi nyi lhê. ³¹ Nungmoq kúm gi, Yhâng é mingdán lé ho nyi keq, haú jáng, haú pé, nungmoq lé puq byi râ nghut lhê.

³² Sau hpúng zô pé ê, hkâgyuq ko, hkâsu mù gâ le, nungmoq é Íwa Garai Gasang gi, Yhâng é mingdán nungmoq lé byi nau nyi ri. ³³ Nungmoq wó é zè pé lé ùng pyám luí, myùng bang lé byi keq, yhumsing é matú a dat xau a dat wôm é ngunhtung saí luí, hkau sù lé a jé, manot èq le a wó zô é sutzè lé mauhkung htoq má hkong to keq. ³⁴ Hkâsu mù gâ le, náng é sutzè joq jang má, náng é i-myit le jé nyí râ nghut lhê.

Yesuq Dum Jé Lé Lô Râ Hkyíng Lé Machya Nyi Râ

* 12:27 Htutbó ban gi, yúng dik é yosô ban nghut lhê.

Hkyô

Mht 24:45-51

³⁵ Nungmoq gi, hpyihit hit luî, (mû zui râ matú rì rì kut to keq); nungmoq é myibung lé tuq to mù, ³⁶ myiháng poi mai dum taû lò luî, hkúm lo kok é, yhumsing hpó lé radá dâm hkum lhom wó hpông hâng yù shoq, lánng tô é dui-nhâng zoshâng wuì su kut nyî keq. ³⁷ Haû yhumsing jé lo le, machya nyî lánng é dui-nhâng zoshâng wuì gi, hkungsô wó nyi râ. Hkâsu mù gâ le, ngò, nungmoq lé teng za taí kôlé, haû yhumsing hpó gi, yhangmoq lé yuq zung to nhâng luî, yhang gi, dui-nhâng zoshâng su hpyihit hit mù, saí tso saí huq râ nghut lhê. ³⁸ Gunggâm yoq lé nghut kôlhang, woq tân hkún lé nghut kôlhang, haû su kut machya nyi é lé, yhumsing hpó lo myang é nghut le gi, dui-nhâng zoshâng haû bang hkungsô wó nyi ri. ³⁹ Yhumsing hpó rayuq, hká u má hkau sù lé lô râ lé, sê tô é ru nghut le gi, yhang machya nyi luî, yhâng yhûm lé a wó hput htong nhâng râ nghut é lé, bûn sê nyi keq. ⁴⁰ Haû mù, nungmoq le rì rì nghut nyi keq; hkâsu mù gâ le, haû Byu Yhangzo gi, a bûn nùng má jé lé lô râ nghut lhê." gâ ri.

⁴¹ Haû hkún, Petruq gi, "Yhumsing ê, dangtú shî gi, ngamoq lé za, taí é nghut lhê lhú? Haû a nghut jáng, lunglhang bang lé taí é dông nghut lhê lhú?" ga myî ri.

⁴² Haû jáng, Yesuq gi,

"Lumging é eq hpaqchyî bo é sùt zum sù gi, hká yuq nghut lhê lhú? Haû yuq gi, yhâng yhumsing é dui-nhâng zoshâng wuì lé ahkying jé jáng zoshuq gâm byi râ matú, yhumsing hpô eq hkyin to sù dut râ nghut lhê. ⁴³ Yhumsing hpó dum taû lo é hkún, haû su kut nyi lánng é dui-nhâng zoshâng gi, hkungsô wó nyi ri. ⁴⁴ Ngò, nungmoq lé teng za taí kôlé, yhumsing hpó haû gi, yhâng é sutzè banshoq, dui-nhâng zoshâng haû lé ap to râ nghut lhê. ⁴⁵ Nghut kôlhang, dui-nhâng zoshâng haû gi, yhâng é i-myt unghkaû má, 'Ngá é yhumsing hpó jé lô râ gyai myáng ashî.' ga myit pyám mù, dui-nhâng zoshâng luzúm wuì myiwe, yuqgè lé nhuq bat é eq, zo yê shuq yê î shuq wut nyi é nghut jáng, ⁴⁶ dui-nhâng zoshâng hau é yhumsing hpó gi, yhang a myitbyu tô é buinyi eq yhang a sé tô é ahkying má jé lô mù, yhang lé jap pyám luî a lumjing bang eq rahá nyhi pyám râ nghut lhê.

⁴⁷ Yhumsing hpô é i-myt lé sê to kôlhang, yhang ô nau é dông a cháng, rì rì le a hen tô é dui-nhâng zoshâng gi, yhâng yhumsing eq nhuq bat é lé, myo myo hui zo râ nghut lhê.

⁴⁸ Nghut kôlhang, a sé mù kut shut sù kúm gi, shau za bat é hui râ nghut lhê. Haû eq rajung za, Garai Gasang gi, myo shoq wó yû su chyáng mai, myo shoq dúng yù râ nghut lhê. Myo myo ap byi tô é hui su chyáng mai, je myo shoq

dum dúng yù râ nghut lê.

*Nguingón Nhâng Râ A
Nghut, Lhoq Kang Nhâng Râ
Ru Nghut Lê*

Mht 10:34-36

⁴⁹ Ngò jé lé é gi, myigùng htoq má, myi nyé nhâng râ matú nghut lê. Myi haù dap to láng é nghut le gi, ngò ô nau é hkyô jup byíng bê. ⁵⁰ Nghut kôlhang, ngò hkam yù râ é baptisma† rajung joq ashî, haù a hkam yù yù gi, ngò gyai yhang hkâm zo wuí nyi ri. ⁵¹ Ngò jé lé é gi, myidàm htoq má simsaq hkyô byi râ matú nghut nhô ngam akô lúhú? Haù dông a nghut, Ngò, nungmoq lé táí kôlé, byu pé lé lhoq pyô lhoq kang râ matú sheq ru nghut lê. ⁵² Haù su mù, ahkuî mai rayhùm za mâ é byù ngo yuq gi, rayuq eq rayuq yhangmoq yhangchang byoq gâng lhum mù, sum yuq rahú, í yuq rahú, í yuq rahú, sum yuq rahú dut lo bùm bekô râ nghut lê. ⁵³ Yhângwa gi, yhâng é yuqzo eq, yuqzo gi, yhângwa eq, yhângnu gi, yhâng é byizo eq, byizo gi, yhângnu eq, yhangmhoí gi, yhâng dumó eq, yhâng dumó gi, yhangmhoí eq kut, ngá é yanmai, rayuq eq rayuq byoq gâng lhum bùm bekô râ nghut lê." ga táí ri.

*Dut Lò Râ Hkyo É Kumlá
Lé Sê Gam Hkoq Râ Lê*
Mht 16:2-3; 5:25-26

⁵⁴ Hau htâng shiwa byu pé lé, Yhang táí é gi, "Nungmoq gi, buiwàng hkyam shut mhut htup é lé myàng jáng, 'Maú wo lò berâ.' ga radá dâm lhaq táí táí mu akô, haù eq rajung za le, dut lò lò mu ri. ⁵⁵ Dum nghut jáng, maupyí shut mâ é lài lo le, 'Bùi htân berâ.' ga lhaq táí táí mu akô, haù eq rajung za le dut lò lò mu ri. ⁵⁶ Gegùn labyoq kut bang ê, nungmoq gi, myigùng eq mauhkung é kumlá lé, sê gam hkoq yu nyi akô. Haù su nghut kô le nhíng, haí mù luí, shí ipyat mâ é kumlá lé gi, a sê gam hkoq dut tô akô lúhú?

⁵⁷ Haù eq rajung za, haí mù haù dingmán é hkyô lé yhumsíng yhang yhang a wó doqdân yù kô é lúhú? ⁵⁸ Dangké, nang lé yui tsuq sú eq rahá, tarâ agyì wá chyáng e ló le, hkyô má yhang eq ngón shoq byìn hpyé huí yù aq. Haù a nghut jáng, yui yhumsíng gi, nang lé tarâ agyì chyáng ê dé pyám luí, tarâ agyì gi, htóng hkyó su chyáng, nang lé ap pyám luí, yhang gi, nang lé htóng má lhung pyám râ nghut lê. ⁵⁹ Ngò, nang lé táí lé, yuichyín haù a ban xap xap gi, htóng haù mai nàng wó htoq ló râ a nghut." ga táí ri.

13

*Myt A Lhâng Jáng Shi Hten
Byuq Râ*

¹ Haù hkûn, haù má nyi é byù ra-am gi, mauzau Pilat

† 12:50 Shí mâ é baptisma gi, Yesuq, ajung jung hpuzo mù shí hkâm é hkyô lé táí é nghut lê.

èq Galile byù ra-am lé sat mù yhangmoq é sui eq yhangmoq nóng jaú é hkungga lé nyhò pyâm é hkyô, Yesuq lé lé taí kyô akô. ² Yesuq gi, "Galile byù haú bang haú su kut hui zo kô é yanmai, yhangmoq gi, gotû Galile byu pé banshoq htoq má, yubak je myô akô nghû, nungmoq myit ngam akô lú? ³ Haú su a nghut! Ngò, nungmoq lé taí kôlé, nungmoq le, myit a lêng kô é nghut le gi, banshoq bang haú eq rajung za shi hten byuq kó râ nghut lhê. ⁴ Haú htoq agó, Siloam wà mâ é machya gyop gyó luí, nhê sat huí é byù raxe shit yuq gi, Yerusalem wà mó mâ é byù banshoq bang htoq má mara je kô akô nghû, nungmoq myit ngam nyi akô lú? ⁵ Haú su a nghut! Ngò, nungmoq lé taí kôlé, nungmoq le, myit a lêng kô é nghut le gi, banshoq bang haú eq rajung za shi hten byuq kó râ nghut lhê." ga taí ri.

⁶ Yesuq dangtú dông dum taí é gi, "Byù rayuq gi, yhâng é tsibiyiq hkyâm má, maihpáng gâm ragàm hô tô ri. Yhang agàm haú má, ashi ê ho wú le, zui tô é a myàng nghut ri. ⁷ Haú hkûn, yhang gi, "Wú aq, ngò sum zân tup maihpáng gâm haú má ashi ê ho wú le, a myàng nghut ri; haú lé htuoq pyám aq. Haí mù, maumyí aha agó kut yuq nhang tô lhê lú?" ga luí, tsibiyiq hkyâm zúng sù lé taí ri.

⁸ Hkyâm zúng sù gi, 'Yhumsing ê, hkûzân za gi,

yuq tô wú shi sháng gaq, shigâm hau é lêngghkyuq má ngò du lêng to mù, mylhpún kat luí bóm byi wú shirâ. ⁹ Htang zàn má ashi zui é nghut le gi, yuq to sháng gaq, ashi a zui é nghut le kúm gi, htuoq pyám râ nghut lhê.' ga luí, hkyâm yhumsing lé tú taí ri." gâ ri.

Bánno Buinyi Má Gùng Loq Hten Sù Lé, Lhoq Gê Byi É Hkyô

¹⁰ Bánno buinyi lé, Yesuq gi, tarajong ralhum má, mhoqshit nyi ri. ¹¹ Haú hkûn, haú má raxe shit zân tup nat dap luí, gùng loq lhoq hten huí é myiwe rayuq le nyi tô ri. Yhang gi, dângngóm luí, gungdu ratsuí lhang a wó lhoq nyhâng lô é sù nghut ri. ¹² Yesuq gi, myiwe haú lé myàng jáng, yhâng chyáng wut yù mù, "Myiwe myhí ê, nàng, nõhpyo mai gè berâ." ga luí, ¹³ yhâng é ahtoq má loq ke byi ri. Haú hkûn jáng, myiwe haú gi, nyàng za dum wó yap luí, Garai Gasang lé hkya-ôn nyi ri.

¹⁴ Haú mù, Bánno buinyi lé, Yesuq nõhpyo lhoq gê byi é yanmai, tarajong má up sù gi, wú nhik-yo luí, "Mù wó zui é buinyi hkyuq nyi joq tô le, buinyi haú pé má, lé wó lhoq ge yù lhê. Haú mù, Bánno buinyi má gi, hkâkut kó." ga luí, shiwa byu pé lé taí kat ri.

¹⁵ Haú hkûn, Yhumsing Yesuq gi, "Gegùn labyoq kut bang ê, nungmoq yuq hkanmó gi, Bánno buinyi lé, yhumsing é no, logúng pé lé,

hkup mai hpông htoq yû mù uchyam byi huq huq kut akô a nghut lú? ¹⁶ Haû nghut le gi, raxe shit zân gón Tsadán eq tuí to huí é, Abraham é yhangzo yhangshu myiwe zo shí lé, Bánno buinyi má Tsadán loq mai, hkyut byi a gíng râ lú?" ga tû taí ri.

¹⁷ Haû su ga taí jáng, Yhang eq i-myt shai lhum é bang banshoq gi, hoq hpû byuq bum akô. Shiwa byù ban-shoq bang kúm gi, Yhang kut é mauho amû banshoq é yanmai, gabú nyi bum bekô nghut ri.

Angshi Cham Eq Munchi Dangké

Mht 13:31-33; Mrk 4:30-32

¹⁸ Haû hkûn, Yesuq taí é gi, "Garai Gasâng é mingdán gi, haí eq wuí lhê lú? Ngò hai eq taí kê wú râ lú? ¹⁹ Haû gi, byù rayuq mai, yhâng é hkyâm má hô tô é angshi cham eq wuí ri. Angshi cham haû gi, yuq kô lò mù agàm mó dut lò jáng, hau é akoq pé má, maulat nghoq zô pé wó zung nô yu akô." gâ ri.

²⁰ Yhang dum xoq taí é gi, "Garai Gasâng é mingdán lé, ngò hai eq taí kê wú râ lú?"

²¹ Haû gi, myiwe zo rayuq eq sungso mún sum bûng má yu nyhó luí, haú pé banshoq lé wó lhoq daú nhang é múnchi eq wuí ri." gâ ri.

Chyap É Hkúmdong

Mht 7:13-14, 21-23

²² Hau htâng, Yesuq gi, Yerusalem wà mó shut laí e

ló uchyang, rawà bàn rawà má wàng mù, mhoqshit byí ri. ²³ Haû hkûn, byù rayuq gi, "Yhumsîng ê, hkyi yu é huí râ bang gi, shau za nghut râ lú?" ga luí, Yesuq lé myí ri.

²⁴ Yesuq gi, "Chyap é hkúmdong mai, Garai Gasâng é mingdán má wó wâng shoq shikut keq. Hkâsu mù gâ le, ngò, nungmoq lé taí kôlé, byù myo myo gi, wó wâng shoq ga shikut wú kó râ. Nghut kôhang, a wó wâng kó râ nghut lhê. ²⁵ Yhumsîng hpó,* hkum toq myhî pyâm é htâng má sheq, nungmoq gi, hkúmdong hí má yap to mù, hkum lé kok uchyang, 'Yhumsîng ê, ngamoq lé hkum hpóng byi laq ô!' ga luí, wut dung jáng, haú yuq gi, 'Nungmoq ó nghut é lé le, hkarâ é bang nghut é lé le, ngò a sé.' ga tû taí râ nghut lhê.

²⁶ Haû jáng, nungmoq gi, 'Ngamoq gi, nàng eq rahá zo wú shuq wú bê bang nghut lhê; ngamoq é wà hkyô pé má le, nàng mhoqshit byí wú bê nghut lhê.' ga taí bekô râ.

²⁷ Nghut kôhang, yhumsîng hpó kúm gi, 'Nungmoq ó nghut é lé le, hkarâ é bang nghut é lé le, ngò a sé. Age ashop dông kut é bang banshoq ê, ngá chyáng mai gâng ló byuq keq.' ga tû taí kat râ nghut lhê.

²⁸ Garai Gasâng é mingdán má, Abraham, Isak, Yakup pé eq myiqhtoí pé banshoq bang

* **13:25** Yhumsîng hpó gi, Garai nghut lhê. Yhùm gi, Garai é mingdán lé taí é nghut lhê.

nyi to kô é lé, nungmoq wó myâng kôlhang, nungmoq gi, shinggan shut hkat pyâm é hui luí, haú jowò má ngaubyi ngaù nhap eq zui kyik kyik shoq hpuzô nyi bùm bekô râ nghut lhê. ²⁹ Hau hkûn, buihtoq, buiwàng, maupyí, mautsúng má é mingdán myo myo mai byu pé lé luí, Garai Gasâng é mingdán zoshuq poi má myang zùng kó râ nghut lhê. ³⁰ Haú hkûn, ahkuí htâng gyó nyí bang gi, hí bekô râ; ahkuí hí to bang gi, htâng gyó bekô râ." ga luí, yhangmoq lé taí ri.

Yerusalem Wà Mó Eq Séng Luí, Yesuq Taí É Hkyô

³¹ Haú u lé, Hparishe pé ram gi, Yesuq chyáng lé luí, "Shí jowò mai htoq ló byuq aq. Hkâsu mù gà le, Herut gi, nang lé sat râ hen nyi ri." ga luí, Yhang lé taí akô.

³² Haú jáng, Yesuq gi, "Hkû-nyí, napmá,† ngò nat gang hkat pyâm luí, nò zo hpyo zo lhoq gê byi râ nghut lhê; sum nyí nghû râ buinyi‡ má sheq, ngá mù bàn râ nghut lhê." nghû luí, agè ashop é wamhkuí haú lé ló taí kyo keq. ³³ Haí wá dut kôlhang, hkû-nyí, napmá, sânghe nyí, ngò gi, e ló râ dut ashí. Hkâsu mù gà le, myiqhtoí pé gi, Yerusalem wà mó mai lai luí gotù jowò má a shi wú kó nghut ri.

³⁴ Yerusalem ê, Yerusalem ê, myiqhtoí pé lé sat pyám pyám kut mù, náng chyáng nhang kat é bang lé, luqgok eq dú sat sat kut é myuq nàng ê, woqzìng gi, yhangzô pé lé, yhâng é dùng hkaú má tsíng lhùng yu é su, nungzô pé lé, Ngò hkâ-myhó dâm shuí tsíng yù naù kôlhang, nàng a dóng nghut ri. ³⁵ Wú keq, nungmoq é yhùm gi, nungmoq é matú chamchyuiyui dut pyâm to berâ nghut lhê; Ngò, nungmoq lé taí kôlê; "Yhumsíng é myíng mai jé lé lo é Sù gi, hkungsô wó nyi sháng gaq.* nghû, nungmoq a taí taí gi, Ngo lé wó myâng kó râ a nghut lo." ga luí, yhangmoq lé taí ri.

14

Hparishe Rayuq É Yhùm Má Yesuq Jé Nyi É Hkyô

¹ Bánno buinyi ra-nyí má, Yesuq gi, zang zo râ ga Hparishe suwún rayuq é yhùm má, é wang nyi tô le, haú má é bang gi, Yhang lé gyui gyui chòm wú nyi bum akô. ² Haú u lé, wui wam ana dut sù rayuq gi, Yesuq é hí má jé nyi tô ri. ³ Haú mù, Yesuq gi, "Bánno buinyi má nòhpyo lé lhoq gê byí é gi, tarâ wang lhê lú, a wang é lú?" ga luí, tarâ sará pé eq Hparishe pé lé myí kat ri. ⁴ Nghut kôlhang, yhangmoq gi, zim za dut byuq akô. Haú hkûn, Yesuq gi, nòhpyo hui sù

† 13:32 Hkû-nyí, napmá gà é gi, Yesuq mingkan htoq má mù zui râ ahkyíng lé taí é nghut lhê. ‡ 13:32 Sum nyí nghû râ buinyi gà é gi, Yesuq mingkan htoq má mù ban zui é buinyi lé taí é nghut lhê. * 13:35 Hkya-on 118:26

lé, zuí to mù, lhoq gê byi luí, nhang kat ri.

⁵ Hau htâng, Yesuq gi, yhangmoq lé, "Nungmoq chyáng mâ é rayuq yuq gi, yhumsing é yhangzo rayuq yuq, haú a nghut jáng, no myang radu du, Bánno buinyì má, wuìhtung má byit gyó le, haú hkûn jáng, a xe htoq yu é za, wó nyí kó râ nghut lhê lhú?" ga myí kat ri.

⁶Yhangmoq kúm gi, dang haú hkun lé, haí le a wó tû tai kó nghut ri.

⁷ Haú hkûn, Yesuq gi, ji tô é bang jé réng é zùng jowò pé hkyin yu nyí kô é lé myàng jáng, yhangmoq lé dangtú dông tai é gi, ⁸"Byù rayuq yuq nang lé, myiháng poi má ji é nghut jáng, je réng é jowò má hkâ-ê zùng. Hkâsu mù gê le, náng htoq je aróng wó sù lé le, ji to shirâ abe. ⁹ Ji tô é nghut jáng gi, nungnhik lé ji tô é yhumsing hpó lé lô mù, 'Shí yuq lé jowò hui byi aq.' ga luí, náng lé lé tai jáng, nàng hoq hpu luí, hkyí htâng shut huí zùng ra râ nghut lhê. ¹⁰ Haú mù luí, supé nang lé ji le, hkyí htâng má ê zùng aq; haú hkûn, nang lé ji sù lé mù luí, 'Buinùm hpó ê, shí je réng é jowò má huí doq zùng aq.' ga luí, nang lé tai jáng, nàng eq rahá zung tô é bíng lunglhâng bâng é hí má, nàng gi, myoqdong wó râ nghut lhê. ¹¹ Hkâsu mù gê le, yhumsing gùng lé waq toq é sù ó yuq nghut kôle, lhoq nyhum pyâm é hui râ nghut lhê; yhumsing gùng lé, lhoq

nyhum é sù kúm gi, waq toq é hui râ nghut lhê." ga tai ri.

¹² Hau htâng, Yesuq yhang lé ji é yhumsing hpó lé tai é gi, "Napzang, a nghut jáng, myinxûn lé nàng byi tso nau le gi, náng é buinùm wuì, âgu âmâng pé, mungmoq wuì, sùt wó é yhumkyo chang pé lé hkâjî tso. Haú bang lé ji tô é nghut jáng gi, yhangmoq nang lé dum ji tô é èq, jeju dum tau kó râ nghut lhê.

¹³ Nghut kôlhang, nàng poi kut mù, byi tso byi huq nau é nghut le gi, myùng bang, hkyí gyui loq hten bang eq myoqjit é bang lé, ji tso aq. ¹⁴ Haú su kut jáng, nàng hkungsô wó nyí râ nghut lhê. Yhangmoq nang lé jeju a wó tau kôlhang, dingmán bang dum dui toq lo é buinyì má, hau é akyú lé, nàng wó hkam yù râ nghut lhê." gê ri.

Zoshuq Poi Mó Lé Dangtú Yu É Hkyô

Mht 22:1-10

¹⁵ Yesuq eq rahá zô zung tô é byù rayuq gi, dang haú wó gyo jáng, "Garai Gasâng é mingdán mâ é zoshuq poi má wó zo râ sù gi, hkungsô wó nyí sù nghut râ." ga luí, Yesuq lé tai ri.

¹⁶ Yesuq haú yuq lé tû tai é gi, "Byù rayuq gi, myinzang byi tso râ ga, zoshuq poi mó rallhum hen to mù, byù myo myo lé ji tô ri. ¹⁷ Zang byi tso râ yàm jé jáng, yhâng é dui-nhâng zoshâng lé, ji tô é bâng chyáng 'Lé keq hkoi, zoshuq jin to bê.' ga ê châng wut nhang ri.

18 Nghut kôlhang, haú bang banshoq gi, zoshuq poî má a ê râ đông chyat he pyâm akô. Rayuq sù gi, 'Ngò yohtung rahkyang wui tô lê; haú lé é wú râ dut ri. Haú mù, ngo lé ahkáng byi shi laq.' ga yhang lé tái ri.

19 Dum rayuq le, 'Ngò, nohtó ngo zúm wui tô lê; haú pé lé ùi nhang chyam wú râ dut ri; ngo lé ahkáng byi shi laq.' ga tái wô ho ri.

20 Dum rayuq le, 'Ngò myiwe hâng tô é a myáng shi mù, a wó lé.' ga tái wô ho ri.

21 Haú jáng, dui-nhâng zoshâng taú lò mù, yhâng é yhumsing lé haú hkyô banshoq lò tái kyô ri. Haú hkún, yhumsing hpó gi, nhikmó gyô yo mù, 'Wà má é hkyô mó hkyô zo hkat hkangmó má hân hân ê mù luí, myùng bang, hkyí gyui loq hten bang eq myoqjit bang lé, ê ji lò aq.' ga luí, yhâng é dui-nhâng zoshâng lé nhang kat ri.

22 Hau htâng má, dui-nhâng zoshâng gi, 'Yhumsing ê, nàng nhang é eq rajung za ban kut bê; nghut kôlhang, zùng râ jowò gi, mân tô ashí.' ga tái ri.

23 Haú su ga jáng, yhumsing hpó gi, 'Ngá yhùm bying râ matú, wà yàm hkyô pé eq hkyâm yàm hkyô pé má htoq ê mù, myang é bang lé a wó le wó shoq ê tsing shuí lò aq.

24 Nang lé ngò tái lé, hí lé ji to huí é bang rayuq lhang, ngá é zoshuq poî lé wó chyim wú râ a nghut.' ga luí, yhâng é dui-nhâng zoshâng lé tái ri." gâ ri.

Yesuq É Chángzo Wó Dut Râ Matú

Mht 10:37-38; 5:13; Mrk 9:50

25 Byù hpùng mó Yesuq eq rahá e ló kô é hkún, Yesuq gi, haú bang lé lhing wú luí, 26 "Ngá chyáng lé sù ó yuq nghut kôle, yhumsing é ìnu, îwa, yhangmyi, yhangzo eq, yhanggu, yhangmang, yhâng nhammó pé lé le, haú htoq agó, yhumsing é asak lé le, ngo lé chyitdap é htoq má je chyitdap sù gi, ngá é chángzo a wó dut. 27 Yhumsing é tapzing lé a waq é za, Ngá htâng châng é sù ó yuq nghut kôle, Ngá é chángzo a wó dut.

28 Dangké, nungmoq chyáng má é byù rayuq yuq, tsehtung yhùm ralhum saí nau le, yhang gi, yhùm haú ban saí râ matú, ngùn hkâ-myhó bàn râ eq yhang wó tô é ngùn luq a luq é lé, zùng mù luí, hí a sôn wú é byù nyi kó râ lhu? 29 Laq má mù, apùn awang gi, saí hi to mù luí, a wó lhoq pân é nghut jáng, 30 myàng é bang banshoq eq, 'Shí yuq gi, apùn awang gi, saí hi to mù luí, banshoq a wó saí pán lo nghut ri.' ga luí, yhang lé jóng pyám bekô râ nghut lê.

31 Dangké, hkohkâm rayuq gi, gyè zan râ hen le, gyezo í mun eq lé sù hkohkâm lé, gyezo ramùn eq za lhom wó zân ùng râ, a wó zân ùng râ lé, zùng mù luí, hí a myit wú é nyi râ lhu? 32 A ùng râ dut le gi, gyè pé we we má nyi tô ashí hkún lé, lagyo suwún pé lé nhang kat luí, simsaq

râ matú htingrám pyám ra râ nghut lhê. ³³ Haù eq rajung za, nungmoq chyáng mâ é ó yuq nghut kôhang, yhumsing wó é zè banshoq lé, a pyâm to sù gi, ngá é chángzo wó dut râ a nghut.

³⁴ Xo gi, gè lhê. Nghut kôhang, xomân kân byuq jáng gi, haù lé hai èq dum wó lhoq ngam yù râ l hú? ³⁵ Haù gi, myigung matú le, myihpún kut râ matú le, akyû a bò lo. Haù mù luí, shinggan shut kúm gi, dú pyám sê akô.

Gyo râ nohkyap dap sù gi, gyô yù sháng gaq." ga taí ri.

15

Byuq Byuq É Sau

Mht 18:12-14

¹ Ra-nyí lé, Yesuq é dang gyo kó râ ga, kang guq bang eq yubak dap bang gi, Yhâng chyáng lé zîng bum akô. ² Haù hkûn, Hparishe pé eq tarâ sará pé gi, "Shí yuq gi, yubak dap bang lé lhom hap yù mù, yhangmoq eq rahá za, zo shuq nyi ri." ga taí put nyi bum akô.

³ Haù mù, Yesuq yhangmoq lé dangtú dông taí é gi, ⁴ "Nungmoq má, sau rashô du wó luí radu byuq byuq é nghut le, gaú xe gaú du lé yoso mhan yô má nyhi pyâm to mù, byuq byuq é sau haù lé, myàng shoq a châng ho yu é, ó yuq wá nyi kó râ l hú? ⁵ Byuq byuq é sau haù lé myang hô jáng, gyaí gau é i-myt èq goqsân htoq má bún kê chûng mù, ⁶ yhúm má jé jáng, yhâng é buinùm ji-myi

wuì eq, yhumkyo chang pé lé ji yù mù, 'Ngá é byuq byuq é sau lé, ngò dum myang ho yù bê, ngò eq rahá chôm gabú sháng.' ga taí râ nghut lhê. ⁷ Haù eq rajung za, Ngò, nungmoq lé taí kôlé, myit lhîng a râ é dingmán bang gaú xe gau yuq lé gabú é htoq, myit lhîng é yubak dap sù rayuq é yanmai, mauhkûng htoq má, je riyhang gabú jowò dut râ nghut lhê.

Byuq Byuq É Ngùn Chap

⁸ Dum nghut jáng, dangtú rallhum gi, myiwe rayuq, ngùn raxê chap wó é má, rachap byuq byuq é nghut le, yhang gi, myibung tap mù rayhum é shum luí, myang yù shoq rago za, ho wú râ a nghut l hú? ⁹ Haù lé ho myàng jáng le, yhâng é buinùm ji-myi wuì eq yhumkyo chang pé lé ji yù mù, 'Byuq byuq é ngá ngùn chap lé dum myang ho yù bê, ngò eq rahá chôm gabú sháng.' ga taí râ nghut lhê. ¹⁰ Haù eq rajung za, Ngò, nungmoq lé taí kôlé, myit lhîng é yubak dap sù rayuq é yanmai, Garaí Gasâng é maumang lagyô pé hí má, gabú jowò dut râ nghut lhê." gâ ri.

Byuq Byuq É Yuqzo

¹¹ Yesuq xoq taí é gi, "Byù rayuq gi, yuqzo í yuq wó ri. ¹² Haù nhik mâ é tiq sù yuq gi, yhâng wa lé, 'Áwa ê, ngò wó gíng é sutzè, ngo lé gàm byi laq.' ga dung jáng, yhâng wa le yhangnhik tâng lé sutzè gàm byí kat ri.

13 Hau htâng hkâ-myháng a myáng má, yhangzo tiq sũ yuq gi, sutzè banshoq hkyom yu chùng mù, mau we shut ê luí, haú jowò má, mingkan ngón hkyô châng é má yhang wó é ngunzè banshoq lé langsa pyám bê. 14 Haú su kut ngunzè wó mi-wó lé ban langsa pyám é htâng má, haú mau má mutmó gyo é yanmai, yhang gi, asho awui dut lo nyi bê nghut ri. 15 Haú mù, haú mau mâ é byù rayuq chyáng, langchyáng ê kut le, haú yuq gi, yhang lé waq rém jang shut nhang kat mù, waq lé lhom zúng nhang ri. 16 Haú hkûn, yhang gi, waq jùm zô é shigyang cham pé lé lháng, zo naú shoq dut kôlháng, ó yuq le a byi zo kó nghut ri.

17 Haú mù, yhang myit bûn lo é gi, 'Ngá wâ chyáng nyi é langchyáng pé gi, agùn agó myàng zô nyi kó rá nghut lhê. Nghut kôlháng, ngò gi, shí jowò má, zo mut wuishit é eq shi ló rá dut bê. 18 Ahkuí, ngò toq mù, ngá wâ chyáng taú ló luí, "Áwa ê, ngò gi, Garai Gasang lé le, nang lé le, shut bê. 19 Ahkuí mai ngò gi, nung zo nghû rá a gíng lo, hau é yanmai, náng é langchyáng rayuq dông za ngo lé nyi nhâng laq." nghû luí, ló tái rá.' gâ ri. 20 Hau htâng, yhang toq luí, yhang wâ chyáng ló le, yhang we we má ru nghut ashí hkûn mai, yhang wa gi, yhang lé lhom myàng jáng, wú shogyo luí, din é mù, yhangzô é lingzing má é po pyik dap to luí, bopuq

puq byí ri.

21 Haú hkûn, yhangzo gi, 'Áwa ê, ngò gi, Garai Gasang lé le, nang lé le, shut bê. Ahkuí mai, ngò gi, nung zo nghû rá a gíng lo.' ga luí, yhang wa lé dúng tôngbán ri.

22 Yhângwa kúm gi, yhang é langchyáng pé lé, 'Réng dik é mebu hân hân yu lé mù, yhang lé hut byi keq; yhang é loq má, loqchyop chyop byi keq; hkyí má le hkyí-tsung tsung byi keq. 23 Tsô myum tô é nojùng zo le yu sat keq. Haú mù, nga-nhung gi, zoshuq poí kut mù chôm ngón sháng. 24 Haí mù gâ le, ngá zo shí yuq gi, shi byuq é mai, ahkuí dum dui bê; byuq byuq é mai le, ahkuí dum myàng bê.' ga taí ri. Haú mù, yhang-moq gi, ngón ngón zo shuq ló bekò.

25 Haú u lé, yhangzo ko sũ yuq kúm gi, yò má nyi tô ri. Yhang gi, yò mai yhûm shut jé lo nyi é hkûn, zìng út bat luí gó nyi é htê lé lò wó gyô ri. 26 Haú mù, langchyáng rayuq lé wut yù luí, haú hkyô lé yhang myí wú le, 27 langchyáng haú gi, 'Nung gu dum taú jé lô bê. Haú mù, náng wa gi, nung gu wáng wáng zán zán dum taú jé lo é lé lhom myàng luí, tsô myum tô é nojùng zo lé sat bê nghut ri.' ga taí kyô ri.

28 Dang haú lé wó gyo jáng, yhang gi, gyô nhik-yo luí, yhúmhaú shut a wàng lo kut ri. Haú mù, yhang wa htoq ê luí, yhang lé é chyuq ri. 29 Yhangzo kúm gi, 'Wú aq,

ngò, shî-myháng shîlo náng é jùn dông kut luî, hkâ-nhám le náng dang lé a lu lai wú. Nghut kôlhang, ngò ngá é luzúm wuí eq ngón kún râ matú, bainám zo radu lhang radàm le nàng a byi wú shi. ³⁰ Shiwa myhî pé eq zum yap wún luî, náng é sutzè lé lhoq pân pyâm é sù nung zo haû dum taû jé lô jáng kúm gi, tsô myum tô é nojûng zo lé, yhâng é matú nàng sat byi bu-nhung!' ga luî, yhâng wa lé tû taî ri.

³¹ Yhângwa gi, 'Ngá zo ê, nàng gi, hkâ-nhám le ngò eq rahá yhang nyi nyi lhê mù, ngá é sutzè joq mijoq ban-shoq gi, náng é chyat nghut lhê. ³² Nghut kôlhang, shî nung gu gi, shi byuq é mai ahkuî dum duì bê; byuq byuq é mai le, dum myàng bê. Haû mù, gabú hpo nghut bê.' ga luî, yhang lé taî ri." gâ ri.

16

Hpaqchyî Ge Dâ É Sùt Zum Sù

¹ Yesuq, Yhâng é chángzô pé lé taî é gi, "Sahtê rayuq chyáng sùt zum sù rayuq nyi ri. Haû yuq gi, yhâng yhum-sing é sutzè pé lé jai hpyuq pyâm ri ga, yhâng yhumsing é hí má, yhang lé mara lé hun akô. ² Haû hkûn, sahtê hpó gi, yhang lé wut yù mù, 'Nàng é hkyô lé ngò wó gyo bê. Haû gi, hkâsu lhú? Nàng sùt zûm é eq séng luî kut tô é jihpán laiká lé lò shit wú aq. Hkâsu

mù gâ le, ahkuî mai nàng gi, sùt zum sù wó kut lo râ a nghut lo.' ga taî ri.

³ Haû jáng, sùt zum sù gi, 'Ahkuî, ngò hkâsu kut lo râ lhú? Ngá é yhumsing gi, ngo lé sùt zum ayá mai lhoq hkyô pyâm bê. Myì du myì hkop zo râ le ngò wum a bò; dung zo dung shuq râ le ngò hoq ri. ⁴ Ngo lé sùt zûm é ayá mai hkyô pyâm htâng má, supé ngo lé yhangmoq é yhûm má lhom hap yù râ matú, hkâsu kut râ hkyô lé ngò sé bê.' ga wó myit rot jáng, ⁵ yhang gi, yhâng yhumsing hpó lé chyîn dap tô é bang rayuq htâng rayuq lé wut yù mù, sâng-hî yuq lé, 'Ngá yhumsing hpó chyáng nàng chyîn hkâ-myhó dap tô lhê lhú?' ga myi jáng, ⁶ haû yuq gi, 'Xû rashô pûng dap lhê.' ga tû taî ri.

Haû jáng, sùt zum sù gi, 'Náng é jihpán yù luî, hân zùng mù, ngo xê pûng kut kê to aq.' ga yhang lé taî ri.

⁷ Dum rayuq lé, 'Nàng hkâ-myhó dap tô lhê lhú?' ga myi jáng, haû yuq gi, 'Sungsô rashô bûng dap lhê.' ga tû taî ri. Sutzum sù gi, haû yuq lé, 'Náng é jihpán má shit xê bûng kut kê to aq.' ga taî ri.

⁸ Haû a dingmán é sùt zum sù lé, yhumsing hpó gi, hpaqchyî ge da sù nghut ri ga hkya-ôn ri. Ngò shî lé taî é gi, mingkan zo wuí gi, yhangmoq é mingkan eq séng é hkyô pé má, maubó gung é yhangzo pê* htoq hpaqchyî

* **16:8** Maubó gung é yhangzô pé nghu é gi, Garai Gasâng é yhangzô pé lé taî é nghut lhê.

je bò kô é yanmai nghut lhê.
 9 Haû mù luî, Ngò nungmoq lé taî kyo kôle, a tara é sutzè pê eq buinùm ho nyi keq, haû mù, sutzè haû htùm byuq jáng, nungmoq lé, ahtum abyuq joq tô é yhùm má, lhom hap yu é hui kó râ nghut lhê.

10 Tiq é mù má wó lum é sù ó yuq nghut kôlhang, mù mó má le wó lùm râ nghut lhê. Tiq é mù má lhum a zuî é sù ó yuq nghut kôlhang, mù mó má le lhumzui râ a nghut.
 11 Haû mù, mingkan sutzè má lhang nungmoq lé a wó lùm kô é nghut le gi, haû tengmán é sutzè lé, nungmoq chyáng ó yuq wá kâm ap byi râ lú?
 12 Supé é sutzè má, nungmoq lé a wó lùm kô é nghut le gi, nungmoq sîng âng é sutzè lé, nungmoq chyáng ó yuq wá kâm ap byi râ lú?

13 Dui-nhâng zoshâng ó yuq nghut kôlhang, yhumsîng í yuq lé wó dojaú râ a nghut. Hkâsu mù gâ le, yhang gi, rayuq lé a jú kut mù, rayuq lé, chyitdap râ nghut lhê; haû a nghut jáng, rayuq lé gi, lhumzui mù, rayuq lé gi, hpau a tap kut râ nghut lhê. Nungmoq gi, Garai Gasang lé le, ngunzè lé le, radá dâm wó dojaú kó râ a nghut." ga taî ri.

14 Ngùn myoqnoq é Hparishe pé gi, dang haû banshoq lé wó gyo kôjáng, Yesuq lé wuizui kut pyám byi akô. 15 Haû mù luî, Yesuq gi, yhangmoq lé, "Nungmoq gi, byu pê hí má yhumsing gùng

lé yhumsîng dingmán bang su kut shit mhaû é bang nghut akô; nghut kôlhang, Garai Gasang gi, nungmoq é i-myt unghkaú lé sé sù nghut lhê. Byù é hí má hpauap é pé gi, Garai Gasang é hí má achag achyut é nghut nyi ri.

16 Jep é tarâ† eq myiqhtoî pê é dang, ahko ahkáng wó tô é ahkyíng gi, wui-myhup sará Johan jé lé é buinyi jé shoq nghut bê. Haû hkyíng mai gi, Garai Gasang é mingdán hkyô gabú danglù lé, hko kyô nyi mù, yuq du jup gi, haû hkyô má htung chyíng wang ló bum akô. 17 Jep é tarâ má é tiq dik é dangjí eq myihkyet zo ralhum lé wó lhoq hten râ htoq, mauhkûng eq myigùng hten râ gi, je lui râ nghut lhê.

18 Dangké, yhumsing é yhangmyi lé kâng pyám mù, myiwe gotù dum hâng yu é sù ó yuq nghut kôle, su-myi lú é sù nghut bê; yhumsing é yhanglâng eq gang bê myiwe lé hâng yu é sù le, su-myi lú é sù dut bê nghut ri." ga taî ri.

Sahtê Hpó Eq Lazaruq

19 Yesuq dum xoq taî é gi, "Radàm lé, sahtê rayuq gi, nè é eq nú-nhâm é mebu wut mù luî, nyi nyi bui bui zo ngón shuq ngón nyi ri. 20 Yhâng é hkúmdong má gi, ragùngdû é jeq byi tô é Lazaruq gâ é dung zo sù rayuq lé, lé nyhi tô akô. 21 Haû yuq gi, sahtê wá é siboî mai gyó é agyó ahtâng lé, wú zô nau nyi ri. Hkui pé

† 16:16 Jep é tarâ gâ é gi, Garai Gasang, Mosheq mai nga-nhung lé byi tô é tarâ lé gâ lhê.

le yhâng é dàm pé má, lé yoq byî nyi akô.

²² Htâng má, haû dung zo sù shi byuq jáng, maumang lagyô pé gi, mauhkûng má nyi é Abraham é tanghkoí má yhang lé shuî ló byî akô. Sahtê wá le shi byuq luî, yhûm pyám bekô nghut ri.

²³ Sahtê wá gi, ngaraî ming má dik shoq hpuzô nyi mù luî, tu wú kat le, we we má Abraham lé le, yhâng é tanghkoí mâ é Lazaruq lé le, myàng kat ri. ²⁴ Haû mù, yhang gi, 'Áwa Abraham ê, ngo lé shogyo yù laq ô. Ngò gi, shî myî htum má achyí aku nyé é hui zô nyi ri. Haû mù, Lazaruq gi, yhâng é lo-qnyhui û èq wuî má tik yû mù, ngá é shô má wuî rapoq zo hkâlháng lé tik cham byi sháng gaq, yhang lé ngá chyáng nhang kat byi laq ô!' ga luî, dúng wut nyi ri.

²⁵ Haû hkûn, Abraham gi, 'Ngá zo ê, asak dui tô é u lé, nàng nyi ngón yuqyo tô é hkûn, Lazaruq gi, asho awuî dut é lé, bûn nyi aq. Ahkuî, yhang kúm gi, shî má lo nyi byán to bê; nàng chyaú gi, jamjau hui zô nyi bê. ²⁶ Haû mai gotû gi, shî mai nungmoq chyáng dap lé naû bang a wó dap shoq le, haû mai ngamoq chyáng ó a wó dap lé rà matú le, ngamoq eq nungmoq é gyoro má, ník dik é langhkung mó èq kyo pyám to bê nghut ri.' ga tú taî ri.

²⁷ Sahtê wá gi, 'Áwa ê, haû nghut le gi, ngò, nang lé dúng nau ri. Ngá gû pé ngo yuq nyi

ashî; yhangmoq le Ìsu hpuzô é jowò má a jé sháng gaq, ²⁸ yhangmoq myit lêng shoq ló taî pun rà matú, Lazaruq lé ngá wâ yhûm shut nhang kat byi laq ô!' ga luî, dúng wut ngau nyi ri.

²⁹ Abraham gi, 'Yhangmoq chyáng, Mosheq eq myiqhtoî pé nyi lhê; haû bang dang lé gyô yù kó sháng gaq.' ga taî ri.

³⁰ Sahtê wá gi, 'Áwa Abraham ê, haû su a nghut. Shi byuq é bang mâ é rayuq yuq yhangmoq chyáng dum taû lo é nghut le kúm gi, yhangmoq myit lêng kó rà nghut lhê.' ga taî ri.

³¹ Abraham gi, 'Mosheq eq myiqhtoî pê é dang lé yhangmoq a gyo kô é nghut le gi, shi byuq é bang mâ é rayuq yuq dum dui toq ló mù, ló taî kyo kôlháng, kâm gyo kó rà a nghut.' ga luî, yhang lé tú taî ri." gâ ri.

17

Mara Hkyut É Hkyô Eq Lumjîng Myit

Mht 18:6-7, 21-22; Mrk 9:42

¹ Yesuq, Yhâng chángzô pé lé taî é gi, "Byu pé lé mara kut shut nhang é hkyô gi, joq htoq lô rà za nghut lhê. Nghut kôlháng, mara kut shut nhang é hkyô lé lhoq htoq é sù gi, dingnyé wó rà. ² Zoshâng shí bang mâ é rayuq lé, mara kut shut nhang é sù gi, yhâng é lingzing má luqluí long mó tuî hut byi luî, wuimau má é dú hkyô pyám é huî é nghut le gi, yhang é matú je gè

râ nghut lâ. ³ Nungmoq gi, yhumsing gung yhumsing sidiq keq.

Nunggu nungmang nang lé mara kut shut é nghut le gi, yhang lé tan lui, mhoqshit aq; yhang myit hing é nghut le gi, yhang lé mara hkyut pyám byi aq. ⁴ Ra-nyí má za, yhang nang lé nyhit dâm shut mù, 'Ngò myit hing bê.' ga lui, nang lé nyhit dâm dum tôngbán le, tôngbán hkangmó, nang, yhang é mara lé hkyut pyám byi aq." ga ri.

⁵ Haú hkûn, lagyo pé gi, "Ngamoq é lumjing myit lé lhoq ko byi laq." ga Yhumsing lé dung akô.

⁶ Haú jáng, Yhumsing gi, "Nungmoq é lumjing myit angshi cham í za hkâlháng bò kô é nghut le gi, shi hangwâ gam lé, 'Sikgam ê, amyit eq roq bún lui, wuishuq lung-aú má, ê yuq to aq ô.' ga le, nungmoq é dang lé sikgam haú gyo byi râ nghut lâ.

⁷ Dangké, nungmoq mâ é rayuq yuq chyáng, yò hpuq é, a nghut jáng, sau zung é dui-nhang zoshang rayuq nyi é nghut le, dui-nhang zoshang haú yohtung pá mai jé lo é hkûn, yhang lé, 'Hân zung mù zang zo aq.' ga lui, ó yuq wá tai kó râ lú? ⁸ Haú dui-nhang zoshang lé sheq, 'Ngò zo râ myinzang lajang aq. Ngò bàn zo shoq hpyidum má hpyi-hit hit mù, xun zang wú nyi aq. Ngò bàn zo jáng sheq nang wó zo râ nghut lâ.' ga lui, tai râ a nghut kó lú?

⁹ Tai mitai banshoq lé, dui-nhang zoshang ban zui sai byi é nghut kôhang, yhang lé jeju bún é dang ó yuq wá tai wú akô lú? ¹⁰ Haú eq rajung za, nungmoq gi, tai mitai ban kut jáng sheq, 'Nga-nhung gi, jeju bun a ging é dui-nhang zoshang pé nghut nyi lâ; kut râ é mù lé za lhoq pân é bang nghut lâ.' nghu tai keq." ga tai ri.

Manggâm Dap Bang Raxê Yuq Lé, Yesuq Lhoq Gê Byi É Hkyô

¹¹ Ahkuí, Yesuq gi, Yerusalem wá mó shut e ló nyi le, Samariq mau eq Galile mau gyoro mai lai e ló ri. ¹² Yhang, wá rawá shut wang ló é hkûn, manggâm dap é byù raxê yuq eq huí ri. Haú bang gi, we mai yap to mù, Yesuq lé, ¹³ "Yesuq, Zau ê, ngamoq lé shogyô yù laq ô." ga lui, wut garú bum akô.

¹⁴ Yesuq gi, yhangmoq lé myàng jáng, "Nungmoq é gungdu lé, hkyangjong pé chyáng ló tân shit keq." ga yhangmoq lé tai ri. Yhangmoq gi, hkyô má ru sô nyi ashí le lhang, sân-yung ló byuq bekô.

¹⁵ Yhangmoq chyáng mâ é rayuq gi, yhumsing gungdu ge byuq é lé myàng jáng, Yesuq chyáng dum tau ê mù, htê mó eq Garai Gasang lé hkya-ôn é eq, ¹⁶ Yesuq é hkyi wang má pai gop to lui, Yhang lé jeju hkya-ôn nyi ri. Haú yuq gi, Samariq byù nghut ri.

¹⁷ Haú mù, Yesuq gi, "Sân-yung byuq é gi, raxê yuq a

nghut lú? Gau yuq gi, hká ló byuq bekô? ¹⁸ Shí tûngbaù rayuq mai lai luí, dum taù lé mù Garai Gasang lé hkya-ôn é byù, rayuq le a nyì lo kó lú?" ga taí ri. ¹⁹ Hau htâng, Yesuq gi, haù yuq lé, "Toq mù ló aq, náng é lumjìng myit gi, nang lé lhoq sân-yúng byi bê nghut ri." ga taí ri.

Garai Gasâng É Mingdán Jé Lô Râ Hkyô

Mht 24:23-28, 37-41

²⁰ Radàm lé, Hparishe pé gi, Garai Gasâng é mingdán hkâ-nhám jé râ hkyô, Yesuq lé myí akô. Haù jáng, Yesuq gi, "Garai Gasâng é mingdán jé lé râ gi, myoq eq wú luí myàng râ a nghut. ²¹ Garai Gasâng é mingdán gi, nungmoq yuq jup é ahkaù má nghut nyi é yanmai, 'Wú keq, shí má joq ri, mhó má joq ri.' ga luí le, byu pé gi, wó taí kó râ a nghut." ga luí, yhangmoq lé tú taí ri.

²² Chángzô pé lé le Yesuq taí é gi, "Haù Byu Yhangzô é buinyì ra-nyí lé, nungmoq myàng nau dik é ahkyìng jé râ. Nghut kôlháng, nungmoq gi, Byu Yhangzo lé wó myàng kó râ a nghut. ²³ Haù buinyì má, byu pé gi, nungmoq lé, 'Yhang shí má nyi ri.' haù a nghut jáng, 'Yhang hê má nyi ri.' ga taí kó râ nghut lhê. Nghut kôlháng, hkâ-ê; hkâcháng kó. ²⁴ Hkâsu mù gâ le, maumyí rahkyam má hpyat é maulhap gi, maumyí

gó hkyam jé shoq duqbó é su, haù Byu Yhangzo dum jé lé é buinyì má le dut râ nghut lhê. ²⁵ Nghut kôlháng, haù su a dut htoq shimá, Yhang gi, zing-rí é myo myo lé le, ipyat shi mâ é byu pé eq he-ngik pyâm é lé le, hui shirâ nghut lhê.

²⁶ Noaq é tsîn pyat má dut é su, haù Byu Yhangzo jé lé é buinyì má le dut râ nghut lhê. ²⁷ Byu pé gi, Noaq, wui-sanghpo mó hkaù má wang é hkûn jé shoq, zo zo shuq shuq, myi byi myi yù, myiháng kut luí, nyi nyi bum akô. Haù hkûn, dowuì dǐng lô mù, yhangmoq banshoq lé lo lhoq htên pyám bê nghut ri.

²⁸ Haù eq rajung za, Lot é pyat má le, byu pé gi, zo mù, shuq mù, ung zo wui zo, ho zo ho shuq, yhùm kut luí nyi nyi akô. ²⁹ Nghut kôlháng, Sodom wà mai Lot htoq ló é buinyì má, mauhkûng mai, myi eq hang gi, mau su wò gyó lô luí, lungláng lé lhoq htên pyám bê nghut ri.

³⁰ Haù Byu Yhangzo, lé htoq shit é buinyì má le, haù eq rajung za dut râ nghut lhê. ³¹ Haù buinyì má, yhumhkûng* htoq má nyi tô é sù gi, yhùmkaù mâ é zè lé, a ló gyó wang yù lo sháng gaq. Yò má nyi tô é sù gi, haù eq rajung za, yhùm shut a taù ló lo sháng gaq.

³² Lot é yhangmyi† lé bûn nyi keq. ³³ Yhumsing é asak duì hkyô hô sù ó yuq nghut kôle,

* 17:31 Yudaq byu pé é yhumhkûng gi, rá é nghut lhê mù, nyi kún jang kut akô.

† 17:32 Lot é yhangmyi gi, Sodom wà shut dum taù lhing wú é yanmai, Garai Gasang lhoq hten pyâm é hui sù nghut lhê.

asak sum râ nghut lhê; asak sum pyâm é sù kúm gi, asak wó duí râ nghut lhê. ³⁴ Ngò, nungmoq lé taí kyo kôlé, haú myín lé, yhupjang ralhum má byù í yuq nyí to kô le, rayuq gi, shuí yu é hui mù, rayuq gi, myit gyó to râ nghut lhê. ³⁵ Myiwe í yuq luí má rahá za chôm luí nyí tô le; rayuq gi, shuí yu é hui mù, rayuq gi, myit gyó pyâm to râ nghut lhê. ³⁶ Yohtung má byù í yuq nyí to le, rayuq gi, shuí yu é hui luí, rayuq gi, myit gyó pyâm to berâ nghut lhê." gâ ri.

³⁷ Haú hkûn, chángzô pé gi, "Yhumsîng Yesuq ê, haú gi, hká gyo má dut râ lhú?" ga luí, Yesuq lé myi kôjáng, Yhang gi, "Màng leq é jang má, langdâ pé, lé zîng bùm râ nghut lhê." ga luí, yhangmoq lé tû taí ri.

18

Chuimó Myhí Eq Tarâ Agyi É Hkyô Lé Dangtú Yù É Hkyô

¹ Yesuq, Yhâng é chángzô pé lé, myit wum a gyuí é za, hkâ-nhâm le kyûdung nyí râ hkyô lé, dangtú dông mhoqshit é gi, ² "Wà rawà má, Garai Gasang lé le a gyuq hoq, byù lé le haí su a ngàm é tarâ agyí rayuq nyí ri. ³ Haú wâ má chuimó myhí rayuq le nyí ri. Yhang gi, haú tarâ agyí wá chyáng ê luí, 'Ngò eq amú htoq sù lé, yhâng é mara eq rajung za, jéyáng byi laq.' ga luí, ê dum taí taí kut nyí ri.

⁴ Nghut kôlhang, tarâ agyí wá gi, ahkyíng rayoq zo jé shoq tarâ a jéyáng byí é tô

tô ri. Hau htâng má, yhang gi, 'Ngò, Garai Gasang lé le a gyuq a hoq, byù lé le haí su a ngàm, ⁵ nghut kôlhang, chuimó myhí shí yuq é amú lé, ngò a jéyáng a doqdan byí é nghut le gi, yhang dum lé lé kut mù, ngo lé myit hpêbù nhâng râ dut ri. Haú mù, ngò yhâng é amú lé jéyáng byi râ.' ga, yhâng é unghkaú má myit yu ri." gâ ri.

⁶ Haú mù luí, Yhumsîng Yesuq gi, "A ding a mán é tarâ agyí wá taí é dang mai mhoq yú keq. ⁷ Garai Gasang gi, Yhang lé nyí myín wut dúng nyí é, Yhang hkyin yu to bê bang lé, tarâ é dông a kut byí é gi, myáng myáng nyí to râ lhú? ⁸ Ngò, nungmoq lé taí kôlé, Garai Gasang gi, yhangmoq lé hân yhang tengmán é dông jéyáng byi berâ nghut lhê. Nghut kôlhang, haú Byu Yhangzo jé lé é buinyí má, lumjîng hkyô lé gi, mingkan htoq má myang wú shirá lhú?" ga taí ri.

Hparishe Eq Kang Guq Sù Kyûdung É Hkyô

⁹ Yhumsîng gùng lé dingmán bun luí, byù góbang lé wú tiq é bang ra-am lé, Yesuq dangtú dông taí é gi, ¹⁰ "Byù í yuq kyûdung kó râ ga, noqkuq yhûm má doq e akô. Rayuq gi, Hparishe, rayuq gi, kang guq sù nghut ri. ¹¹ Hparishe hpó gi, yap to luí, 'Garai Gasang ê, ngò gi, byù góbang su lú zo lú shuq é hkyô le a kut, agè ashop é hkyô le a cháng, su-myi le a lú é htoq agó, shí kang guq sù

su le, a nghut é yanmai, ngò nàng lé jeju bûn lê ô! ¹²Ngò gi, rabat má zoshuq í dân gám nyi lê; ngò wó yu é gû mâ é xê gambum ragambum le kat nyi lê.' ga luí, yhang baú yhang gotû kut dúng nyi ri.

¹³Kang guq sù kúm gi, we we má yap to mù, mauhkung shut lháng a wám tu wú é za, wànggàng bat luí, 'Garai Gasang ê, shî yubak dap sù ngo lé, shogyô yù laq ò!' ga dúng ri.

¹⁴Ngò, nungmoq lé taí kôlé, kang guq sù kúm gi, Garai Gasang é hí má mara hkyut san byi é lé wó yù luí, yhûm shut dum taú lô bê; nghut kôlháng, Hparishe wá gi, a wó nghut ri. Hkâsu mù gâ le, yhumsing gùng lé waq toq sù ó yuq nghut kôle, lhoq nyhum pyâm é hui râ nghut lê; yhumsing gùng lé lhoq nyhum é sù kúm gi, waq toq é hui râ nghut lê." ga taí ri.

Zoshâng Wuí Lé Yesuq Shimân Byi É Hkyô

Mht 19:13-15; Mrk 10:13-16

¹⁵Byu pé gi, zonú wuí lé Yesuq záng htung byi sháng gaq ga, Yhâng chyáng shuí lé lo bum akô. Chángzô pé gi, haú lé myàng jáng, lhom tân hkûm akô nghut ri. ¹⁶Nghut kôlháng, Yesuq gi, zoshâng wuí lé, wut yù luí, "Haú zoshâng wuí lé, Ngá chyáng lé nhâng keq; yhangmoq lé hkâhkûm zing to kô; hkâsu mù gâ le, Garai Gasang é

mingdán gi, haú sù é bâng é mingdán ru nghut lê. ¹⁷Ngò, nungmoq lé teng za taí kôlé, Garai Gasang é mingdán lé, zoshâng su kut a lhom hap yu é nghut le gi, mingdán haú má gè gè yhang wó wâng rã a nghut." ga taí ri.

Ayá Wó É Sahtê Hpó

Mht 19:16-30; Mrk 10:17-31

¹⁸Ayá wó é byù rayuq le, Yesuq lé, "Ge é Sará ê, ahtum abyuq é asak wó yù rã matú, ngò haí kut ra rã lú?" ga myí ri.

¹⁹Yesuq gi, "Haí mù, Ngo lé ge é Sará nghu lê lú? Garai Gasang mai lai luí, ge é ó yuq le a nyi. ²⁰Jep é tarâ má, 'Su-myi sulàng hkâlú, byù hkâsat, hkâhkau, a teng a mán é saksé hkâhkám, nángnu nánwa lé hkungga aq.'* gâ é dang pé lé, nàng sé gû bê." ga luí, yhang lé tû taí ri.

²¹Haú yuq gi, "Haú pé ban-shoq lé, ngò, zoshâng hkûn mai cháng bê nghut lê." ga taí ri.

²²Yesuq gi, dang haú lé wó gyo jáng, "Nàng kut rã rajung rã tô ashî; nàng wó miwó lé ûng pyám luí, myùng bang lé byi pyám aq; haú jáng, nàng, mauhkung htoq má sutzè wó rã nghut lê; haú mù, Ngá htâng lé cháng aq." ga luí, yhang lé taí ri.

²³Haú yuq gi, dang haú lé wó gyo jáng, sutzè gyai wó sù nghut é yanmai, gyai yhang myit a ngón dut byuq ri. ²⁴Yesuq gi, haú yuq lé wú

* 18:20 Htoq Ló 20:12-16

luí, "Sutzè wó bang gi, Garai Gasâng é mingdán má wàng râ matú, haû-í yhang wuî rinhung! ²⁵ Sutzè wó sù rayuq, Garai Gasâng é mingdán má wó wâng râ htoq, gola-uq radu âpno mai wó wang lai râ gi, je lui râ nghut lhê." ga tai ri.

²⁶ Dang haú lé wó gyô é bang gi, "Haú su ru nghut le gi, ó yuq za hkyi yu é hui râ nghut lhê lú?" ga myí bum akô nghut ri.

²⁷ Haú hkûn, Yesuq gi, "Byù a wó kut é hkyô lé, Garai Gasang gi, wó kut lhê." ga tai kyô ri.

²⁸ Haú hkûn, Petruq gi, Yesuq lé, "Wú aq, ngamoq gi, wó miwó tô pyâm to lui, Náng htâng cháng bê nghut lhê." ga tai jáng,

²⁹ Yesuq gi, "Ngò, nungmoq lé teng za tai kôlé, Garai Gasâng é mingdán é yanmai, yhumsing é yhûm, yhumsing é yhangmyi, yhumsing é âgu âmang, yhumsing é înu îwa, yhumsing é yhangzô pé lé, pyâm to sù ó yuq nghut kôlé, ³⁰ shí pyat má, akyû myo myo wó hkam yù râ htoq agó, htang pyat má le, ahtum abyuq é asak a wó yu é gi, a nyi râ nghut lhê." ga lui, yhangmoq lé tai ri.

Yesuq, Yhang Shî Hkám Râ Lé Dum Tai É Hkyô

Mht 20:29-34; Mrk 10:46-52

³¹ Yesuq gi, Yhâng é lagyo pé raxe í yuq lé gotû kut wut yù mù, "Gyô wú keq, nga-nhúng gi, Yerusalem wà

mó shut doq ló nyi é nghut lhê. Haú má jé jáng, haú Byu Yhangzo eq séng lui, myiqhtôí pé kê tô é banshoq gi, dik lò berâ nghut lhê. ³² Hkâsu mù gâ le, Byu Yhangzo gi, tungbaù pé é loq má ap pyâm é hui lui, haú bâng eq Yhang lé, wuizui kut pyâm é, rhoi rip e, sôkan byé gyûn é, nhuq bat é kut yù mù, sat pyám kó râ nghut lhê. ³³ Hau htâng sum nyi nghû râ buinyi má, Yhang gi, dum dui toq lô râ nghut lhê." ga lui, yhangmoq lé tai ri.

³⁴ Lagyo pé gi, dang haú pé rahkun lé lhang a sê gyo kó; dang hau é lichyûm gi, yhangmoq é hí má zaù nghop tô é nghut é yanmai, Yhang haí tai nyi é hkyô pé lé yhangmoq a sé kó nghut ri.

Dung Zo É Myoqjit Sû Lé, Yesuq, Myoq Dum Myàng Nhang É Hkyô

³⁵ Ahkuí, Yesuq Yerihko wà nàm má jé lo nyi le, myoqjit é byù rayuq gi, hkyô yàm má zùng mù, dung zô nyi ri.

³⁶ Yhang gi, byù rajùm rayò sô lai ló é htê lé wó gyo jáng, haú haí dut nyi é hkyô lé, myi kat ri. ³⁷ Haú hkûn, yhangmoq gi, "Nazaret wà byù Yesuq lai ló ri." ga lui, yhang lé tai kyo akô.

³⁸ Haú su gâ é lé wó gyo jáng, yhang gi, "Dawiq é Yhangzo Yesuq ê, ngo lé shogyo yù laq ô!" ga wut dúng kat ri.

³⁹ Hí má lai ló é bang gi, zim za nyi râ matú yhang lé tân hkûm akô; nghut kôlhang, yhang gi, "Dawiq é Yhangzo

ê, ngo lé shogyo yù laq ô!" ga, je riyhang htê mó o mó èq wut dúng kat ri.

⁴⁰ Haù mù, Yesuq gi, yap kat mù, byù haù yuq lé Yhâng chyáng shuí lé lô nhang kat ri. Myoqjit sù Yhâng nam má jé lé jáng, Yesuq gi, ⁴¹ "Ngò, nàng lé haì kut byi râ ô nau ri lhú?" ga, yhang lé myi kat ri.

Haù yuq gi, "Yhumsîng ê, ngò myoq myàng nau ri." ga tũ taì ri.

⁴² Hau hkûn, Yesuq gi, "Náng myoq myàng sháng gaq! Náng é lumjîng myit gi, nang lé lhoq gê byi bê nghut ri." ga, yhang lé taì ri. ⁴³ Haù yuq gi, haù hkûn jáng, yhang myoq wó myâng mù, Garai Gasang lé hkya-on uchyang Yesuq htâng cháng bê. Lhunglhâng bang haù lé myàng kôjáng, Garai Gasang lé hkya-ôn nyi bum akô.

19

Yesuq Eq Zake

¹ Yesuq gi, Yerihko wà má wàng mù, sô laì ló nyi ri. ² Haù hkûn, haù wà má, Zake gâ é kang guq agyì rayuq nyi ri; haù yuq gi, sutzè wó sù nghut ri. ³ Yhang gi, Yesuq hká yuq nghut é lé myàng nau kôlhang, nyhûm sù nghut é htoq agó, byù rajùm rayò chyîn chyap tô é yanmai, a wó myâng nghut ri. ⁴ Haù mù, yhang gi, Yesuq lé wó myâng shoq ga, Yesuq laì ló râ hkyô hí shut òn é mù, hkohúm gâm htoq má ê doq zung tô ri.

⁵ Yesuq gi, haù jowò má jé jáng, tu wú kat luì, "Zake ê, hân gyó lô aq; hkû-nyí ngò náng yhûm má bíng râ nghut lhê." ga taì ri. ⁶ Haù jáng, Zake gi, hân hân gyó ló mù, gabú dik é èq Yesuq lé lhom hkulum yu ri.

⁷ Haù má nyi bang banshoq gi, haù lé myàng jáng, "Yhang gi, yubak dap sù rayuq chyáng bíng kut râ ga wang e ló bê." ga luì, mara hûn dang taì nyi bum akô.

⁸ Zake kúm gi, toq yap mù, "Yhumsîng Yesuq ê, ngò wó é sutzè rawuí gû myùng bang lé gàm byi pyám râ; ngò záng mop zô pyâm é byù rayuq yuq nyi le gi, myi tú dum tau byi râ." ga Yhumsîng Yesuq lé taì ri.

⁹ Haù hkûn, Yesuq gi, "Shí yuq le, Abraham é yhangzo* rayuq nghut é yanmai, hkû-nyí shí yhûm má hkyi yù hkyô jé bê, ¹⁰ hkâsu mù gâ le, haù Byu Yhangzo gi, byuq byuq bê bang lé, hkat hô mù hkyi yù râ matú, jé lé sù nghut lhê." ga luì, Zake lé taì ri.

*Hkohkam É Dui-nhâng
Zoshâng Raxê Yuq*

Mht 25:14-30

¹¹ Haù hkyô lé, yhangmoq gyô nyi bùm kô é hkûn, Yesuq gi, Yerusalem wà mó má jé râ chyâng lò bê nghut é yanmai le, Garai Gasâng é mingdán gi, radá dâm htoq shit lô berâ ga, byu pé myit ngam tô bùm kô é yanmai le, dangtú ralhum dông dum taì jat é gi, ¹² "Aróng

* **19:9** Abraham é yhangzo nghú é lichyúm gi, Abraham sù Garai Gasang lé lumjîng é sù lé gâ lhê.

wó sù byù rayuq gi, hkohkâm ayá ê hkam yù luí, dum taú lò râ ga, wê é ming shut ê râ matú hen nyi ri. ¹³ Haú mù, yhang gi, Yhâng é dui-nhâng zoshâng raxê yuq lé wut yù mù, rayuq lé ngùn rajoí joí ap byi luí, 'Ngò dum taú jé lô shoq, shi èq hpugá gá nyí láng keq.' ga luí, yhangmoq lé pying tô ri.

¹⁴ Yhâng é mingbyú wui kúm gi, yhang lé a ngui bum é nghut mù luí, yhang e ló é htâng má, 'Shí yuq ngamoq ahtoq má up nyi râ lé, ngamoq a ô naú.' ga luí, ê taí râ matú lagyo châng nhang kat akô.

¹⁵ Nghut kôlhang, yhang kúm gi, hkohkâm ayá wó hkam yù luí, dum taú jé lô jáng, yhang ngùn ap byí tô é dui-nhâng zoshâng wui lé, hpugá gá luí, amyat hkâm-myhó wó ho jat bê hkyô lé sé naú luí, yhangmoq lé wut nhang kat ri.

¹⁶ Haú hkûn, sâng-hi yuq gi, lé mù luí, 'Yhumsîng ê, ngò, náng é ngùn rajoí mai, amyat raxê joí wó ho jat yù bê.' ga taí ri.

¹⁷ Haú hkûn, yhumsîng hpó gi, 'Arâ! Nghut bê, kyet é dui-nhâng zoshâng ê, náng gi, je tiq é mù má lhang wó lum é sù nghut é yanmai, wà raxê lé upzo lo aq hkoi.' ga luí, yhang lé taí ri.

¹⁸ Htang yuq le, lé mù luí, 'Yhumsîng ê, ngò, náng é ngùn rajoí mai, amyat ngo joí wó ho jat yù bê.' gâ ri.

¹⁹ Yhumsîng gi, haú yuq lé, 'Nàng gi, wà ngo wâ lé up lo aq hkoi.' ga taí ri.

²⁰ Dum rayuq le, lé mù luí, 'Yhumsîng ê, náng é ngùn rajoí lé a byuq shoq, ngò panchoq èq htup tô lâ; wú aq, shí nghut lâ. ²¹ Nàng gi, yhumsîng yhang a tô tô é zè pé lé yù nau é eq, yhumsîng yhang a hô tô é yò mai yâm yù nau é sù, byù wui nghut é yanmai, nang lé ngò gyuq ri.' ga taí ri.

²² Haú hkûn, yhumsîng gi, 'Agè ashop é dui-nhâng zoshâng ê, náng nhut mâ é dang eq rajung za, ngò, nang lé jéyáng râ nghut lâ. Ngò gi, yhumsîng yhang a tô tô é zè pé lé yù nau é eq, yhumsîng yhang a hô tô é yò mai yâm yù nau é sù, byù wui nghut é hkyô lé, náng sê to gù nghut le nhîng, ²³ ngá ngûn lé, ngò dum taú jé lô jáng, aráng eq amyat wó yú shoq, ngùn hpún kat jang má, haí mù a kat tô é l hú?' ga yhang lé taí ri.

²⁴ Hau htâng, yhumsîng hpó gi, ayàm má yap tô é bang lé, 'Haú ngùn rajoí lé yhâng chyáng mai taú yù luí, raxê joí wó sù lé jat byi keq.' ga taí ri.

²⁵ Haú bang gi, 'Yhumsîng ê, yhang gi, raxê joí wó to bê lé nhîng.' ga akô.

²⁶ Haú jáng, yhang gi, 'Ngò, nungmoq lé taí kôlé, wó sù† ó yuq le, jat byí é hui shirâ nghut lâ; a wó su chyáng mai kúm gi, yhang wó tô é

† 19:26 Wó sù nghu é gi, yhumsîng a-tsam lé rago dat chûng sù lé taí é nghut lâ.

lé lhang, yu pyám byi shirâ nghut lhê. ²⁷ Ahkuî, yhangmoq ahtoq má ngò hkohkâm kut râ lé a ô nau é, ngá é gyè pé lé, shí má shuí lé mù, ngá hí má sat pyám keq.' ga hkûnmó hkyô kat ri." gâ ri.

Yesuq Logúng Ji Mù, Yerusalem Wà Mó Shut Wang E Ló É Hkyô

Mht 21:1-11; Mrk 11:1-11; Yhn 12:12-19

²⁸ Yesuq gi, shí hkyô pé lé ban taí jáng, hí má so luí, Yerusalem wà mó shut doq ló nyi ri. ²⁹ Yesuq gi, Yhâng é chángzô pé eq Tsanlun Bùm mâ é Bethpage wà eq Bhtani wà má jé ló kojáng, Yhâng é chángzo í yuq lé, ³⁰ "Nungnhik, hí mâ é wà má ê keq; wà haú má wang é hkûn jáng, ó le a jì wú shí é logúng zo tuí tô lánng é lé, è myâng kó râ nghut lhê; haú lé hpyi yù mù, Ngá chyáng she lò keq. ³¹ Byù rayuq yuq mai, 'Haú haí mù hpyi nyi akô?' ga nungnhik lé myi kôjáng, 'Shí du lé, haú Yhumsîng râ ri gâ.' nghú tû taí keq." ga pyîng luí, nhang kat ri.

³² Nhang kat é sù nhik ê jé lé, Yesuq taí kat é dông yhang, dut to lánng é lé ê myang akô. ³³ Yhangnhik logúng zo haú lé hpyi nyi kô é hkûn, yhumsîng wuì gi, "Haú logúng zo lé, haí mù hpyi nyi akô lhú?" ga luí, yhangnhik lé myi akô.

³⁴ Haú jáng, yhangnhik gi, "Shí du lé haú Yhumsîng râ ri gâ." ga taí akô.

³⁵ Yhangnhik gi, haú logúng zo lé Yesuq chyáng she lò mù, yhangmoq é buhîng pé lé logúng ahtoq má buí luí, Yesuq lé doq jì nhang akô. ³⁶ Haú su kut, Yhang jì e ló nyi le, byu pé gi, yhangmoq é buhîng pé lé hkyô má hkang byi akô.

³⁷ Ahkuî, Tsanlun Bùm hkêgyó gyó ló é jowò eq chyáng lo é mai gi, chángzô pé banshoq bang, yhangmoq myang é laklaí kumlhá pê é yanmai, gabú myit mai htê mó o mó eq Garai Gasang lé hkya-on kô é dang gi,

³⁸ "Haú Yhumsing é myîng mai jé lé lo é hkohkâm gi, hkungsô wó nyí sháng gaq ô!✱ Mauhkûng htoq má, nguîngón nyí sháng gaq ô!

Htoq tsáng myhâng má, Garai Gasang gi, hpungwup shingkang bo nyí sháng gaq ô!"

gâ akô.

³⁹ Haú mù luí, haú byù hpûng hkaú má bo é Hparishe pé ra-am gi, "Sarâ ê, náng é chángzô pé lé tân pyám aq." ga luí, Yesuq lé taí akô.

⁴⁰ Haú hkûn, Yesuq gi, "Ngò, nungmoq lé taí kôlé, shí bang zim za nyi kó é nghut le gi, luqgok pé garû lô râ nghut lhê." ga tû taí ri.

⁴¹ Ahkuî, Yesuq, Yerusalem wà mó eq chyâng lò luí, wà mó haú lé myàng jáng, haú wà mó é matú ngau mù, taí é gi, ⁴² "Wà nàng ê! Hkû-nyí

lhê é buinyì má, ngingón é hkyô lé nàng bûn sé tô é nghut le gi, gè râ wá! Ahkuí kúm gi, haú hkyô lé nghop to bê nghut mù luí, nàng a sé lo nghut ri. ⁴³ Hkâsu mù gà le, nàng chyáng Garai Gasang lé kúm jé é hkûn, nàng a bun a sé wú kat é yanmai, nàng é gyè pé gi, awui ayàm má gyewap xuq mù, nàng é lhîng hkyuq mai nang lé lom tô é buinyì jé lô râ nghut lhê. ⁴⁴ Haú hkûn, nang lé lhoq htên pyám luí, nung zo pé lé le, haú ahkaú má yhang dùn nhê pyet sat pyám bekô râ; nàng gi, luq-gok racham htoq má racham lháng a kê lhum loshoq, dut byuq râ nghut lhê." gà ri.

Yesuq, Noqkuq Yhûm Lé Sêng Pyâm É Hkyô

Mht 21:12-17; Mrk 11:15-19; Yhn 2:13-22

⁴⁵ Ahkuí, Yesuq gi, Yerusalem noqkuq yhûm má wàng mù, ung zo ung shuq é bang lé, "Ngá yhûm gi, kyûdung yhûm dut râ nghut lhê."* ga kê to kôlhang, ⁴⁶ nungmoq gi, jowò shí lé 'damaq hkyûng'* kut akô." ga taí uchyang, hkat htoq pyâm ri.

⁴⁷ Yhang gi, nyí wuî noqkuq yhûm má mhoqshit nyi ri. Hkyangjong agyi pé, tarâ sará pé eq, byu pé é suwún wuî kúm gi, Yhang lé wó sat pyám râ hkyô ho nyi akô. ⁴⁸ Nghut kôlhang, byù banshoq bang gi, Yhâng mhoqshit é dang lé gyo nau nyi kô é yanmai, wó sat

râ hkyô lé, a myang hô kó nghut ri.

20

Yesuq É Ahko Ahkáng Lé Myí Chyam Wú É Hkyô

Mht 21:23-27; Mrk 11:27-33

¹ Ra-nyí lé, Yesuq gi, noqkuq yhûm wàng hkaú má, byu pé lé mhoqshit nyi é eq, gabú danglù hko kyô nyi é hkûn, hkyangjong agyi pé gi, tarâ sará pé, suwún wuî eq rahá kut, Yhâng chyáng lé jé kômù, ² "Hai ahko ahkáng eq Nàng shí pé lé kut nyi lhê lú? Ahko ahkáng shí, Nang lé ó yuq byí é lú? Ngamoq lé taí kyô wú aq." ga Yhang lé myí akô.

³ Haú hkûn, Yhang gi, "Ngò le, nungmoq lé rajung myí wú kôlé; ⁴ Yohan byí é bap-tisma gi, mauhkûng mai lú? A nghut jáng, byu chyáng mai lú? Ngo lé taí kyô wú keq?" ga yhangmoq lé myí ri.

⁵ Haú hkûn, yhangmoq chôm hpyè lhum kô é gi, "Mauhkûng mai nghut lhê.", nghû nga-nhúng taí jáng le, 'Haí mù, yhang lé a lumjîng kô é lú?' ga râ nghut; ⁶ 'Byu chyáng mai nghut lhê.' nghû jáng le, shiwa byù banshoq gi, Yohan lé, myiqhtoi rayuq ga lumjîng to kô é yanmai, yhangmoq, nga-nhúng lé luqgok eq dú sat kó râ nghut." ga akô.

⁷ Haú mù, yhangmoq gi, "Hkâmai nghut é lé, ngamoq a sé." ga tû taí akô.

⁸ Yesuq gi, "Haû jáng, Ngò le, hai ahko ahkâng èq shí pé kut é hkyô lé, nungmoq lé a taî kyo." ga, yhangmoq lé taî ri.

*Tsibiyiq Hkyâm Yhumsîng
Eq Hkyâm Saî Zo Bang
Mht 21:3-46; Mrk 12:1-12*

⁹ Byu pé lé, Yesuq dangtú dông xoq taî kyô é gi, "Byù rayuq gi, tsibiyiq hkyâm ralhum saî to mù, hkyâm saî zo bâng chyáng ngho byî to luî, gó ming shut myáng myáng é nyi byuq ri. ¹⁰ Kyôshu yoq jé jáng, yhang gi, hkyâm saî zo bâng èq, hkyâm mâ é tsibiyiq shí pé lé lhom byî kat sháng gaq ga, dui-nhâng zoshâng rayuq lé yhangmoq chyáng nhang kat ri. Nghut kôlhang, hkyâm saî zo bang gi, haú yuq lé lhom bat mù, loq kôm taû nhang kat akô. ¹¹ Gotû dui-nhâng zoshâng rayuq lé, yhangmoq chyáng dum nhang kat ri. Nghut kôlhang, yhangmoq gi, haú yuq lé le, lhom bat mù, hoq lhoq hpu luî, loq kôm dum taû nhang kat akô. ¹² Sum yuq nghû râ dui-nhâng zoshâng lé dum nhang kat ri. Yhangmoq gi, haú yuq lé le bat cheq luî, hkyâm mai hkat htoq kat akô.

¹³ Haú hkûn, tsibiyiq hkyâm yhumsîng gi, 'Ngò hkâsu kut wú râ lú? Ngò chyitdap é ngá zo lé, nhang kat wú râ nghut ri. Yhang lé kúm gi, yhangmoq lhom hkungga kó abe.' ga taî ri.

¹⁴ Hkyâm saî zo bang gi, yhumsîng hpô é yhangzo lé myàng kôjáng, 'Shí yuq gi, silí wunlí sing yù râ sù nghut lhê; nga-nhúng, silí wunlí haú pé wó yû shoq, yhang lé sat pyám sháng.' ga rayuq eq rayuq taî lhúm bum akô. ¹⁵ Haú mù, yhang lé hkyâm shinggan shut dú htoq kômù, sat pyâm akô.

Haú su kut kôjáng, tsibiyiq hkyâm yhumsîng gi, yhangmoq lé hkâsu kut râ lú? ¹⁶ Yhang gi, è mù, haú hkyâm saî zo bang lé sat pyám luî, hkyâm haú lé góbang lé htot ngho byî pyám râ nghut lhê." gâ ri.

Dang haú lé wó gyo bang gi, "Haú su gi, hkâ-nhám le a dut sháng gaq ô!" gâ akô.

¹⁷ Hau htâng, Yesuq gi, yhangmoq lé byu wú luî, "Haú jáng gi, 'Yhúm saî bâng èq hkyin htoq pyâm é luqgok gi, htungchyûn mâ é ahkyak dik é luqgok dut bê.'*

ga Chyúmdang má kê tô é gi, haî gá nau é nghut lhê lú? ¹⁸ Luqgok* haú má gyó záng é sù ó yuq nghut kôle, gyû gyop byuq râ nghut lhê. Luqgok hau èq gyó nhê záng é sù le, nhê pyeq pyâm é hui râ nghut lhê." ga taî ri.

¹⁹ Tarâ sará pé eq hkyangjong agyi pé gi, dangtú shí gi, yhangmoq lé lhoq ang luî taî é hkyô lé, sé kô é yanmai, haú hkûn jáng lhang Yhang lé chyup yú râ

* 20:17 Hkya-on 118:22

* 20:18 Luqgok nghu é gi, Yesuq lé taî ri.

matú hkyô ho nyi akô. Nghut kôlhang, byu pé lé gyuq mù a chyup shi kó nghut ri.

Kang Kat É Hkyô Eq Séng Luí Myi É Dang

Mht 22:15-22; Mrk 12:13-17

²⁰ Haú mù, yhangmoq gi, Yesuq é dang má mara wó chyup yû shoq ga, gegùn labyoq kut bang lé jowú nhang nyi akô. Haú gi, ahkáng ayá wó é mauzaû chyáng Yhang lé wó ap pyám râ matú nghut ri. ²¹ Haú jowú bang gi, "Sarâ ê, nàng gi, dǐng dǐng mán mán taí mhoqshit é eq, byu é myoqdong lé a tê byî é za, Garai Gasâng é hkyô lé, tengmán é dōng mhoqshit é sū nghut é lé, ngamoq sê lhê. ²² Hkoséng Kehta q lé, ngamoq kang kat râ gi, tarâ wang lhê lúhú? A wang é lúhú?" ga luí, Yhang lé myi wú akô.

²³ Nghut kôlhang, Yesuq gi, haú bâng é myit goí é hkyô lé sé mù luí, yhangmoq lé, ²⁴ "Ngo lé, ngùn rachap tūn shit wú keq. Ó yuq é alhō eq masat laiká dap tô ri lúhú?" ga myi jáng, ²⁵ yhangmoq gi, "Kehta q é nghut ri." ga akô.

Haú hkûn, Yesuq gi, "Haú nghut jang, Kehta q é lé gi, Kehta q lé byi keq; Garai Gasâng é lé gi, Garai Gasang lé byi keq." ga yhangmoq lé taí ri.

²⁶ Yhangmoq gi, byu pé hí má, Yhâng é dang má mara a wó ho myang é eq, Yhang tū taí é dāng é yanmai, maú hong byuq kôluí, zim byuq akô.

Dum Dui Toq Lô Râ Hkyô Eq Séng Luí Myi É Dang

Mht 22:23-33; Mrk 12:18-27

²⁷ Haú hkûn, haú dum dui toq hkyô a joq gâ é Saduke pé ra-am gi, Yesuq chyáng lé jé kômù, ²⁸ "Sarâ ê, myiwe wó é byù rayuq gi, zo dù a dap é za shi byuq é nghut jáng, yhanggu gi, yhangmâng é awut ashín xoq byi râ matú, yhâng rhat lé chui gon ra râ nghut lhê ga, nga-nhúng lé, Mosheq kâ to byî ri. ²⁹ Hí hpyang lé, gumang nhiktāng wuì nyhit yuq nyi akô. Lagám yuq gi, myiwe yù luí, zo dù a dap é za shi ló byuq bê nghut ri. ³⁰ Lanong yuq le, yhangmang mó é chui lé gon mù, zo dù a dap é za shi ló byuq bê. ³¹ Hau htāng, Lalaq yuq mai Lahkâ yuq jé shoq, chuimó haú lé rayuq htāng rayuq dum gon gon kut kôlhang, zo dù a dap é chyat shi ló byuq bùm bekô nghut ri. ³² Ló htāng má, myiwe myhí haú le chāng shi ló byuq bê nghut ri. ³³ Haú mù luí, haú dum dui toq é buinyi má, myiwe myhí haú gi, haú nhiktāng wuì mâ é hká yuq é yhangmyi nghut râ lúhú? Hkâsu mù gâ le, yhang gi, haú nyhit yuq é yhangmyi dut wú bê sū nghut ri." ga luí, Yhang lé myi wú akô.

³⁴ Haú hkûn, Yesuq gi, "Shí mingkan htoq mâ é byu pé gi, ikun kut é eq myi byi myi yú kut nyi bum akô. ³⁵ Shi é mai dum dui toq râ eq, haú pyat má nyi râ gíng bāng é matú gi,

ikun kut é eq myi byi myi yû hkyô joq lo râ a nghut. ³⁶ Haú bang gi, maumang lagyô pé su dut byuq luí, a dat shí lo kô râ nghut lhê. Yhangmoq gi, dum dui toq lô su é yhangzô pé† nghut é yanmai, Garai Gasâng é yhangzô pé nghut bekô. ³⁷ Haú nyé duq nyi é mhanpúng eq séng luí, Mosheq èq kâ tô é má lháng, Yhumsîng gi, 'Ngò gi, Abraham é Garai Gasang, Isak é Garai Gasang, Yakup é Garai Gasang nghut lhê.* ga bo tô é yanmai, shi é bang dum dui toq lô râ hkyô lé tân shit to bê nghut ri. ³⁸ Garai Gasang gi, shi bê bâng é Garai Gasang a nghut, dui nyi bâng é Garai Gasang ru nghut nyi lhê; hkâsu mù gà le, lhunglhâng bang gi, Garai Gasâng é hí má dui nyi é bang chyat nghut akô." ga yhangmoq lé tù taí ri.

³⁹ Haú hkûn, tarâ sará pé ra-am gi, "Sarâ ê, nàng taí é jô ri." ga akô. ⁴⁰ Haú mù, yhangmoq gi, Yhang lé haí le a wám myí jat lo kó nghut ri.

Hkrisduq Gi, Ó Yuq É Yhangzo?

Mht 22:41-46; Mrk 12:35-37

⁴¹ Hau htâng, Yesuq gi, yhangmoq lé, "Byu pé gi, Hkrisduq lé, Dawiq é yhangzo nghut lhê, ga hkâsu mù taí akô lhú? ⁴²⁻⁴³ Dawiq

yhang yhang lháng gi, Hkya-on Kungtôn Laiká má,

'Haú Yhumsîng Garai gi, ngá é Yhumsîng lé, "Ngò, náng é gyè pé lé,

náng é hkyí nang tanghkuq kut pyám byí é hkyíng jé shoq, Ngá é loqyo hkyam† shut zung nyi shi aq." gà ri.*

ga kâ tô ri. ⁴⁴ Haú mù, Dawiq yhang lháng, Hkrisduq lé, Yhumsîng gà é nghut le gi, Hkrisduq gi, yhangzo za hkâsu ge nghut râ lhú?" ga taí ri.

Tarâ Sará Pé Lé Sidiq Râ Hkyô

Mht 23:1-36; Mrk 12:38-40; Luk 11:37-54

⁴⁵ Byù banshoq gyô nyi é u lé, Yesuq, Yhâng é chángzô pé lé taí é gi, ⁴⁶ "Tarâ sará pé lé sidiq nyi keq. Yhangmoq gi, réng é buhîng wut chûng mù, sô yông wún luí, gai pé má hkunggâ é èq shichyen râ lé le, tarajong pé má é ahkyak dik é zùng jang pé eq poí pé má é je réng é zùng jowò pé má myang zùng râ lé le, ô nau nyi bum akô. ⁴⁷ Yhangmoq gi, chuimó pê é yhûm-yò pé lé hpyoq zo hpyoq shuq kôluí, kyû hîng hîng dûng shit mhaú é bang nghut akô. Haú sù é bang gi, je riyhang htan é dông dam byí é hui zo kó râ nghut lhê." gà ri.

† 20:36 Dum dui toq lô su é yhangzô pé gà é gi, Yesuq lé lumjîng luí, shi é htâng má dum dui toq lo é bang lé gà lhê. * 20:37 Htoq Ló 3:6 † 20:42-43 Loqyo hkyam nghu é gi, ahko ahkáng wó é jowò nghut lhê. * 20:42-43 Hkya-on 110:1

21

Chuimó Myhí Kat É Alu
Mrk 12:41-44

¹ Yesuq tu wú kat é hkûn lé, noqkuq yhûm mâ é alu sidek má, wó bang alu kat nyi bùm kô é lé myang ri. ² Dum nghut jáng, gyi ht-ingchap ngùn zo í chap za kat é, myung é chuimó myhí rayuq lé le myang ri. ³ Haû mù, Yhang gi, "Ngò, nungmoq lé teng za tai kôlé, shî myung é chuimó myhí gi, góbang banshoq htoq má je myo kat bê nghut ri. ⁴ Hkâsu mù gâ le, haû góbang banshoq gi, yhumsing agùn agó wó é mâ é lé, lé kat akô; yhang kúm gi, myùng sù nghut kôle, yhang asak lé baú ra ngùn lhunglhang lé kat bê nghut ri." ga tai ri.

Ló Htûm Buinyi Má Dut Lò
Râ Hkyô

Mht 24:1-21, 29-35; Mrk 13:1-19, 24-31

⁵ Noqkuq yhûm lé, yúng é luqgok pé èq le, alu chyunghuq pé èq le, mhôn tô ri ga, chángzô pé ra-am hkyâ-ôn bùm kôjáng, Yesuq gi, ⁶ "Nungmoq myang nyi é shí pé gi, luqgok rachâm htoq racham lhang a kê lhum loshoq, hpyoq hpyi pyâm é buinyi jé râ nghut lhê." ga tai ri.

⁷ Haû su ga jáng, yhangmoq gi, "Sarâ é, haû nghut le gi, haû hkyô pé gi, hkâ-nhâm dut lò râ lhu? Haû dut râ chyâng lò jáng, hkâsû é kumlhá htoq lò râ nghut lhê lhu?" ga, Yhang lé myi akô.

⁸ Haû hkûn, Yhang gi, "Nungmoq gi, hkyô shuí nghoq é a hui kó sháng gaq, sidiq nyi keq. Hkâsu mù gâ le, 'Ngò gi, Mesaia nghut lhê.' ga le, 'Ahkyíng chyâng lò bê.' ga le, Ngá myíng lé llang é byù myo myo pô htoq lò kó râ nghut lhê. Nghut kôlhang, nungmoq gi, yhangmoq htâng hkâcháng kó. ⁹ Majan htoq é eq, gumlau toq é hkyô lé, wó gyo kôjáng, hkâgyuq hkâ-kyûm kó, haû hkyô pé hí dut lò râ nghut lhê. Nghut kôlhang, ló htâng é buinyi gi, haû hkûn jáng dut râ a nghut shi." ga tai ri.

¹⁰ Hau htâng, Yhang, yhangmoq lé dum tai é gi, "Ra-myû eq ra-myû, mingdán ralhum eq ralhum majan zân lhum lò kó râ nghut lhê. ¹¹ Jowò myo myo má, layàng mó nún lo é, noli nojàng myô lo é eq mutmó gyó lo é pé, dut lò râ nghut lhê; gyuq chiq jung pé eq kumlhá mó le, mauhkung htoq mai htoq shit lò râ nghut lhê.

¹² Nghut kôlhang, haû hkyô banshoq a dut shimá, Ngá mying é yanmai, byu pé gi, nungmoq lé chyup yû luí, zing-rí yù mù, tarajong pé eq htóng pé má ap pyám kó râ nghut lhê, hau htoq agó, nungmoq gi, hkohkam pé eq zau pé chyáng ê ap byí é le, hui kó râ nghut lhê. ¹³ Haû su é pé mai, nungmoq gi, ngò eq séng luí, saksé wó hkâm râ hkyô htoq lò berâ nghut lhê. ¹⁴ Nghut kôlhang, hkâsu nghû lhom tû tai râ hkyô lé,

hí mai a myit wuî nyî râ lé, nungmoq myit hpyit to keq. ¹⁵ Hkâsu mù gâ le, nungmoq é gye pé lhunghâng bang, haî le a wó lhom tû taí loshoq, ngò, nungmoq lé dang eq hpaqchyî byi râ nghut lhê. ¹⁶ Nghut kôlhâng, nungmoq gi, înu îwâ pé, âgu âmâng pé, mungmoq eq buinùm ji-myi wui eq lhâng, ap pyâm é hui kó râ nghut lhê. Yhangmoq gi, nungmoq chyáng mâ é ra-am lé lhâng, sat pyám kó râ nghut lhê. ¹⁷ Byù lhunghâng bang gi, Ngá é yanmai, nungmoq lé a nguì kut kó râ nghut lhê. ¹⁸ Nghut kôlhâng, nungmoq é xâm rahkat lhâng wó htên byuq râ a nghut.* ¹⁹ Nungmoq gi, wó jân é hkyô mai, asak lé wó yû kô râ nghut lhê.

²⁰ Yerusalem wà mó lé gye hpúng mó eq lóm tô é lé, nungmoq myàng jáng, wà mó haû htên byuq râ ahkyíng chyâng lò bê lé, bûn sê nyî keq. ²¹ Haû hkûn lé, Yuda mau má nyi é bang gi, bùm pé shut hpang doq ló kó sháng gaq; haû wà hkaû má nyi é bang le, hpang htoq kó sháng gaq; wà tiq wà zo pé má nyi é bang le, wà hkaû shut a wàng kó sháng gaq. ²² Hkâsu mù gâ le, Chyúmdang má kê to má kê to banshoq dik lò râ matú, buinyî haû pé gi, mara dam byî é buinyî pé dut râ nghut lhê. ²³ Haû buinyî pé má, zogûng dut é myiwe wui eq naû huq ashî nghut é înu wuî

gi, gyai yhang wuîhke kô râ nghut lhê; hkâsu mù gâ le, shí ming ahtoq má wuîhke mó eq, shí amyû ahtoq má Garai Gasang nhikmó-yô é jé lô râ nghut lhê. ²⁴ Yhangmoq gi, sâm lhâm eq sat pyám hui lhê eq, ming hkang ming mó má chyup shuî lô é le hui kó râ nghut lhê. Tûngbaù pé lé byî tô é buinyî ahkyíng htáng shoq, Yerusalem wà mó gi, tûngbaù pê eq nâng zik tô é hui râ nghut lhê.

²⁵ Haû hkûn, bui, kyî, lhamó pé má, kumlhá htoq shit râ nghut lhê. Wuishuq lung-aû mâ é wuîlhêng pê é mying é htê mó é yanmai, myigûng htoq má, byù myû chângjup gi, hkâsu kut râ a sé loshoq maú é eq myit wui myit hkê é hui bekô râ nghut lhê. ²⁶ Byu pé gi, mینگkan htoq má dut lò râ é hkyô pé lé, a jé shi mai myit gyuq kô é yanmai, moq byuq ló bùm kó râ nghut lhê; hkâsu mù gâ le, mauhkûng mâ é wum-o a-tsam pé gi, lhoq nhûn é huî bùm kô râ nghut lhê. ²⁷ Haû hkûn, haû Byu Yhangzo gi, mhut ji mù, hpungwup a-tsam mó eq le, hpungwup shingkan mó eq le, gyó lé lo é lé, yhangmoq byu-myàng kó râ nghut lhê. ²⁸ Haû hkyô pé dut hi lò jáng, ulhum tû mù wú kat keq, hkâsu mù gâ le, nungmoq lé hkyi yù râ buinyî gi, chyâng lò bê nghut ri." gâ ri.

²⁹ Yhang, yhangmoq lé dangtú dông xoq taí é gi,

* 21:18 Shí má gi, asak woi-nyî a shî râ hkyô lé taí é nghut lhê.

"Maihpáng gâm eq sikhâm banshoq lé wú wú keq.
³⁰ Sikbu nyún lo é lé myàng jáng, bui nyé nám chyâng lò bê ga luí, nungmoq yhang dat wú sê akô. ³¹ Haú eq rajung za, haú hkyô pé dut nyi é lé, nungmoq myàng kôjáng, Garai Gasâng é mingdán gi, chyáng bê nghut é hkyô lé, nungmoq sé lo keq.

³² Ngò, nungmoq lé teng za taí kôlé, shí pyat mâ é byu pé a ban shi byuq shimá, haú hkyô pé banshoq dut byuq râ nghut lhê. ³³ Mauhkûng eq myigùng gi, a joq lo dut byuq râ nghut lhê; nghut kôlhang, Ngá é dang gi, ru joq nyí râ nghut lhê.

³⁴ "Nghut kôlhang, zo myo shuq myô é, í shuq wut é, mingkan htoq mâ é myit wui myit hkê é pê èq, nungmoq é i-myt wò laí nyi luí, haú ngò jé lé é buinyi gi, lhai bik lo é su, nungmoq ahtoq má byodàn tung a jé lò sháng gaq, sidiq nyi keq. ³⁵ Hkâsu mù gà le, buinyi haú gi, mingkan htoq má nyi é byù banshoq bâng é ahtoq má, haú su jé lò râ nghut lhê. ³⁶ Haú mù luí, haú dut lò râ hkyô banshoq mai, nungmoq wó lut lai mù, haú Byu Yhangzô é hí má, wó yap gîng é bang dut sháng gaq, hkâ-nhám le kyûdung luí, ahkyíng hkangmó má machya nyi keq." gà ri.

³⁷ Yesuq gi, nyí wui noqkuq yhûm má mhoqshit nyí luí, myín wui Tsanlun Bùm gà é bùm shut htoq é mù, ê nyi to to kut ri. ³⁸ Byù banshoq

bang gi, Yhang mhoqshit é dang gyo râ ga, napsûn noq noq mai noqkuq yhûm má jé lé bum akô nghut ri.

22

Yesuq Lé, Yudaq Èq Ung Zô É Hkyô

Mht 26:1-5,14,16; Mrk 14:1-2, 10-11; Yhn 11:45-53

¹ Ahkuí, Lhoqlhai Poí gà é Azuma (múnchi a kat é Muk Zo Poí) jé râ chyâng lò bê. ² Haú mù, hkyangjong agyi pé eq tarâ sará pé gi, Yesuq lé hkâsu kut wó sat pyám râ hkyô, ho nyi akô; hkâsu mù gà le, yhangmoq gi, mingbyû wui lé gyuq bùm kô é yanmai nghut ri. ³ Haú hkûn, lagyo raxe í yuq má bo é Iskarut gà é Yudaq chyáng Tsadán wàng mù luí, ⁴ yhang gi, htoq é mù Yesuq lé hkâsu kut ap pyám râ hkyô lé hkyangjong agyi pé, noqkuq yhûm zúng é gyezau pé eq, ê hpyê ri. ⁵ Haú mù, yhangmoq gi, gyô nguì luí, Yudaq lé ngùn byi râ hkyô myit hui bekô. ⁶ Yudaq le hap yù luí, byù hpúng má a nghut é hkûn, Yesuq lé ap pyám râ hkyô ho nyi bê nghut ri.

Lhoqlhai Poí Lé Món É Hkyô

Mht 26:17-30; Mrk 14:12-26; Yhn 13:21-30

⁷ Ahkuí, haú Lhoqlhai Poí mâ é sauzo shigu hkungga sat nhông byi râ é Azuma buinyi jé bê. ⁸ Haú hkûn, Yesuq gi, Petruq eq Yohan lé, "Nganhúng zo râ matú Lhoqlhai Poí é món láng keq." ga luí, nhang kat ri.

⁹ Haú nhik gi, "Hkâmá ê món to nhâng nau ri lúhú?" ga luí, Yhang lé myí akô.

¹⁰ Haú hkûn, Yesuq gi, "Nungnhik, myuq hkaú shut wang e ló le wui yambú waq é byù rayuq lhom hui rá nghut lhê; haú yuq chyáng châng ló luí, yhang wang ló é yhûm má châng wàng mù, ¹¹ yhumsing lé, 'Ngò Ngá é chángzô pé eq rahá, Lhoqlhai Poí zo rá bing wap hkâmá nghut lhê lúhú ga, Sará myí nhang kat ri.' nghú taí keq. ¹² Haú hkûn, hen tô é ahtoq mâ é wap mó lé, nungnhik lé lhom tân shit rá nghut lhê; wap haú má ê món to keq." ga taí kat ri.

¹³ Haú chángzo nhik htoq e ló le, Yesuq taí kat é eq roq za ê myâng kômù, Lhoqlhai Poí lé món to bekô nghut ri.

Yhumsing É Myinzang

¹⁴ Ahkuí, ahkyíng jé jáng, Yesuq eq Yhâng é chángzô pé rahá za zohpoq má zung tô akô. ¹⁵ Haú hkûn, Yesuq gi, "Ngò wuîhke jamjau hpuzô é a hui shi má, Lhoqlhai Poí shí lé nungmoq eq rahá zo rá lé, Ngò gyai ô nau nyi lhê. ¹⁶ Hkâsu mù gâ le, ngò, nungmoq lé taí kôlé, Garai Gasâng é mingdán má poí shí a ló dik dik gi, ngò haú lé dum zo rá a nghut ló." ga luí, yhangmoq lé taí ri.

¹⁷ Hau htâng, Yesuq gi, góm lé yù mù jeju ban hkya-on jáng, "Góm shí lé yù luí, nungmoq yhangchang gàm shuq lhum keq. ¹⁸ Ngò, nungmoq lé taí kôlé, ahkuí mai gi, Ngò, Garai Gasâng é mingdán a jé

jé tsibiyiq wing lé dum shuq rá a nghut lo." ga taí ri.

¹⁹ Hau htâng, Yhang gi, muk lé yù mù, jeju hkya-on luí, muk lé myhik hpé mù, yhangmoq lé byi uchyang, "Shí gi, nungmoq é matú byí pyâm é, Ngá é gungdu nghut lhê; Ngo lé bûn nyi rá matú, shí su kut nyí keq." ga taí ri.

²⁰ Haú eq rajung za, myinzang ban zo jáng, góm lé le yù mù, "Góm shí gi, nungmoq é matú htoq pyâm é, Ngá é sui má xuq tô é dangshikaq asik nghut lhê. ²¹ Nghut kôlhang, wú keq, Ngo lé ap pyám rá sù gi, zang bó shí má ngò eq rahá nyi tô ri. ²² Haú Byu Yhangzo gi, hkyin to huí é eq rajung za shí rá nghut lhê; nghut kôlhang, Yhang lé ap pyâm é sù gi, dingnyé wó ri." ga taí ri. ²³ Haú su ga jáng, lagyô pé gi, yhangmoq má shí hkyô kut rá sù gi, hká yuq nghut rá lúhú ga, rayuq eq rayuq myí lhum bum akô.

²⁴ Haú htoq agó, yhangmoq mâ é hká yuq sheq je kô lhê lúhú ga le, rayuq eq rayuq taí htîng lhûm bum akô. ²⁵ Haú mù luí, Yesuq gi, "Tûngbaù pé é hkohkam pé gi, yhangmoq byù myû pé é ahtoq má up zô nyi kô é nghut luí, byu pé gi, ahkáng ayá wó é bang lé jeju yhumsing pé ga luí, taí hkungga nyi bum akô. ²⁶ Nungmoq kúm gi, haú su hkâkut kó. Nungmoq má je kô sù gi, asak je tiq é sù su, up é sù le, dui-nhâng zoshâng su nghut nyi sháng gaq. ²⁷ Hká yuq sheq je kô lhê lúhú? Zô

zung nyi sù lúh? Haù a nghut jáng, saí tsô é sù lúh? Zô zung nyi é sù sheq nghut ri. Nghut kôlhang, ngò gi, nungmoq mâ é saí tso sù su za nghut nyi lùh. ²⁸ Nungmoq kúm gi, Ngò jamjau huí nyi le, Ngò eq rahá nyi nyi é bang nghut nyi akô. ²⁹ Haù su mù, Ngá wa gi, Ngo lé, mingdán ap byí é su, Ngò le, nungmoq lé mingdán ap byi râ nghut lùh. ³⁰ Haù mù, Ngá é mingdán mâ é, Ngá é zangbó má, nungmoq wó zo kó râ nghut lùh; nungmoq le hkohkâm-tanghkuq má zung to mù, Israelaq amyû raxe í hú lé jéyáng kó râ nghut lùh.

*Yesuq Lé, Petruq (Simun)
He-ngik Pyám Râ Hkyô*

Mht 26:31-35; Mrk 14:27-31; Yhn 13:36-38

³¹ Simun, Simun ê, wú aq, sungsô cham lé shaí é su, nungmoq lé wó shaí shoq ga, Tsadán wá gi, ahkáng dung bê. ³² Nghut kôlhang, náng é lumjínng myit a hten sháng gaq nghú, Ngò, náng é matú kyúdung byi bê; náng dum lhing bún lò jáng, nung gu nung mâng pé lé wum-o lhoq ging byi aq." ga taí ri.

³³ Haù hkún, Simun gi, "Yhumsîng ê, htóng wâng kôlhang, shí kôlhang, ngò gi, náng eq rahá cháng râ matú myit hpyit to bê." ga tû taí ri.

³⁴ Yesuq gi, "Petruq ê, nang lé Ngò taí lé, hkû-nyí* lhang woq a tûn shi má, náng, Ngo

lé a sé ga luí sum dâm he-ngik pyám râ nghut lùh." ga taí ri.

³⁵ Hau htâng, Yesuq, yhangmoq lé taí é gi, "Ngò, nungmoq lé ngunhtung, jhtung, hkyí-tsung a wùn a chùng nhang é za, nhang kat é nghut hkún, nungmoq chyáng haí ra akô lúh?" ga myi jáng, yhangmoq gi, "Haí le a ra lo." ga taí akô.

³⁶ Haù hkún, Yhang gi, "Ahkuí kúm gi, ngunhtung wó sù gi, yù wun sháng gaq, jhtung wó sù le, yù wùn sháng gaq, shâm a wó sù gi, bumó ung luí wui sháng gaq. ³⁷ Hkâsu mù gâ le, Ngò, nungmoq lé taí kôlé, Ngò eq séng luí Chyúmdang má kê tô é gi, dut lò berâ nghut lùh; 'Haù yuq gi, yubak mara wó bang má nghap lhôm to bê.'* ga kê tô é dang gi, Ngá chyáng dik lò râ nghut lùh." ga luí, yhangmoq lé taí ri.

³⁸ Haù mù, lagyô pé gi, "Yhumsîng ê, wú aq, shí má shâm í hkyam joq tô ri." ga taí kôjáng, Yesuq gi, "Gé bê." ga luí, yhangmoq lé taí ri.

*Tsanlun Bùm Má Yesuq
Kyúdung É Hkyô*

Mht 26:36-46; Mrk 14:32-42

³⁹ Ahkuí, Yesuq gi, htoq luí, gó hkun é eq rajung za, Tsanlun Bùm shut htoq e ló bê nghut ri; Yhâng é chángzô pé le Yhang htâng châng e ló akô.

⁴⁰ Haù jowò má jé jáng, Yhang gi, "Nungmoq, gunglaú é a

* **22:34** Yudaq byu pé é ra-nyí gi, myinhâng bui wang é mai, htang nyí bui wang é jé shoq nghut lùh. Shí mâ é hkû-nyí gi, nga-nhùng é matú myín âng ri. * **22:37** Esai 53:12

hui sháng gaq, kyûdûng nyi keq." ga luî, yhangmoq lé tai to mù, ⁴¹ chángzô pé nyi é mai luqgok radú we kô gâng e ló luî, hkyihput htuq mù, ⁴² "Áwa ê, Náng ô nau é nghut le gi, góm† shî lé Ngá chyáng mai lhai pyám byi laq. Nghut kôlhang, Ngò ô nau é đông a nghut, Nàng ô é đông sheq nghut sháng gaq." ga kyûdûng ri. ⁴³ Haú hkûn, mauhkûng mai maumang lagyo rayuq htoq lé luî, Yhang lé i-myit nhik lé tai tîng ri. ⁴⁴ I-myit hkaû má dik shoq hkâm zo wuî é yanmai, Yhang je riyhang kyûdung wum kat nyi ri; Yhâng é buibù le, sui hkyí sui pat su myigùng má yui gyó ri.

⁴⁵ Haú mù, kyû ban dung jáng, Yhang toq luî, chángzô pé chyáng ló wú le, yhangmoq gi, myit yón mù luî, yhup myhî to kô é lé ló myâng mù, ⁴⁶ "Haí mù yhup nyi akô lúhú? Toq keq! Gunglaú é a hui sháng gaq, kyûdûng nyi keq." ga luî, yhangmoq lé tai ri.

Yesuq Lé Chyup É Hkyô

Mht 26:47-56; Mrk 14:43-50; Yhn 18:3-11

⁴⁷ Haú su ga, ru tai nyi ashî le, wú keq, haú chángzo raxe í yuq má bo é Yudaq gi, hkyô hí mù byù rajùm rayò lé shuî lé lô luî, yhang gi, Yesuq lé bopuq puq râ ga huî lé lo ri. ⁴⁸ Haú mù luî, Yesuq gi, "Yudaq ê, nàng gi, haú Byu Yhangzo lé bopuq puq é èq gye pé chyáng ap pyâm lhê

lúhú?" ga luî, yhang lé lhom myî ri.

⁴⁹ Haú hkûn, Yesuq htâng cháng bang gi, haí dut lò râ lé bûn sé kô é yanmai, "Yhumsîng ê, ngamoq gi, sham èq zân le, gè râ lúhú?" ga myî akô. ⁵⁰ Yhangmoq chyáng mâ é rayuq gi, hkyangjong mó é dui-nhâng zoshâng lé zân kat luî, yhâng é loqyo nohkyap byit byuq bê nghut ri.

⁵¹ Yesuq kúm gi, "Gé bê. Yhangmoq ô nau é su nghut kó sháng gaq." ga tû tai mù, haú yuq é nohkyap lé ê záng luî lhoq gè byî ri.

⁵² Yesuq gi, Yhang lé chyup râ ga jé lé é hkyangjong agyi pé, noqkuq yhùm zúng é zau pé eq agyi suwún wuî lé, "Nungmoq gi, damyaq rayuq lé chyup é su, shâm, dumbáng eq kut luî, lé lo akô lúhú?

⁵³ Ngò gi, nyí wuî, noqkuq yhùm má nungmoq eq rahá nyi kôlhang, nungmoq Ngo lé chyup yû râ ga a hen wú kó; ahkuî gi, mauchut èq up† nyi bê yanmai, nungmoq é ahkyíng nghut nyi ri." ga tai ri.

Yesuq Lé, Petruq Èq Hengik Pyâm É Hkyô

Mht 26:57-58, 67-75; Mrk 14:53-54, 66-72; Yhn 18:12-18, 25-27

⁵⁴ Haú hkûn, yhangmoq gi, Yhang lé chyup yû mù she ló luî, hkyangjong mó é yhùm shut shuî wang ló akô. Petruq le we we mai châng tô ri.

† 22:42 góm gâ é gi, Yesuq jamjau hui râ hkyô eq shî râ hkyô lé, tai nau é nghut lhê. † 22:53 Mauchut èq up gâ é gi, Tsadán èq up é lé gâ ri.

⁵⁵ Ahkuî, yhangmoq gi, wàng hkaû má myi mut yû luî zung tô bum é hkûn, Petruq le yhangmoq é ahkaû má bo tô ri. ⁵⁶ Langchyáng myhí rayuq gi, myihkyom yâm má Petruq zung tô é lé, myang kat mù, yhang lé rago wú tsuq to luî, "Shí yuq le Yesuq eq rahá nyi sù nghut ri." ga taí ri.

⁵⁷ Haú hkûn, Petruq gi, "Myiwe myhí ê, nàng taí é sù lé, ngò a sé." ga he pyâm ri.

⁵⁸ Hau htàng hkâ-myháng a myáng má, byù rayuq gi, yhang lé dum myàng luî, "Nàng le yhangmoq chyáng bo nyi sù nghut ri." ga taí kat jáng, Petruq gi, "Byù hpó ê, ngò a nghut." ga tû taí ri.

⁵⁹ Hkyíng hkum rahkum kô myáng jáng, rayuq le, "Gè gè yhang, shí yuq gi, Yhang eq rahá nyi wún sù nghut ri; haí mù gâ le, yhang gi, Galile byù le nghut ri." ga zuq zuq taí ri.

⁶⁰ Petruq gi, "Byù hpó ê, nàng taí nyi é hkyô lé, ngò a sé." ga tû taí ri. Haú su ga ru taí nyi ashí le, woq tân bê nghut ri. ⁶¹ Haú hkûn, Yesuq gi, lhîng luî, Petruq lé wú kat ri. Haú mù, Petruq gi, "Hkû-nyí lháng, woq a tân shi má, nàng Ngo lé sum dâm he pyám râ nghut lhê." ga luî, Yhumsîng yhang lé taí é dang lé bûn kat ri. ⁶² Haú mù, yhang gi, shinggan shut htoq é luî, gyai yhang é ngau nyi ri.

Gyezô Pé Yesuq Lé Rhoi É Hkyô

⁶³ Yesuq lé zúng nyi é bang gi, Yhang lé rhoi luî nghap myíng nghap htê mu nyi

akô. ⁶⁴ Yhangmoq gi, Yhâng é myoqdong nghop pyám byi luî, "Nang lé bat sù gi, ó yuq nghut ri lhú? Myiqhtoi htoî wú aq." ga myí akô. ⁶⁵ Yhangmoq gi, Yhang lé nyhap é dang ajung jung đông taí rhoi nyi akô.

Suwún Wui É Hí Má Yesuq Jé Nyi É Hkyô

Mht 26:59-66; Mrk 14:55-64; Yhn 18:19-24

⁶⁶ Napkyó myoqmyàng jáng, mingbyû wui é suwún hpúng bang eq rahá, hkyangjong agyi pé, tarâ sará pé, zup hpong kut nyi é má, Yesuq lé shuí ê mù, ⁶⁷ "Nàng Hkrisduq nghut é têng le gi, ngamoq lé taí kyo laq." gâ akô.

Yesuq gi, "Ngò gi, Hkrisduq nghut lhê nghû taí kôlhang, nungmoq jing kó râ a nghut. ⁶⁸ Ngò, nungmoq lé myi kôlhang, nungmoq gi, tû taí kó râ a nghut. ⁶⁹ Nghut kôlhang, ahkuî mai haú Byu Yhangzo gi, a-tsam bo dik é Garai Gasâng é loqyò hkyam má wó zung nyi berâ nghut lhê." ga luî, yhangmoq lé taí ri.

⁷⁰ Haú hkûn, yhangmoq banshoq bang gi, "Haú nghut le gi, Nàng, Garai Gasâng é Yhangzo nghut lhê lhú?" ga myí akô.

Yesuq gi, "Nungmoq taí é eq rajung za Ngò nghut lhê." ga luî, yhangmoq lé tû taí ri.

⁷¹ Haú hkûn, yhangmoq gi, "Nga-nhúng haí jung saksé wá râ nyi ashí lhú? Yhâng é nhut mai yhang, taí htoq kat

é dang lé, nga-nhung wó gyo bê nghut lhê." ga akô.

23

Yesuq Lé Mara Hun É Hkyô Mht 27:1-2, 11-14; Mrk 15:1-5; Yhn 18:28-38

¹ Haú hkûn, zup zîng tô é bang banshoq gi, htoq mù, Yesuq lé mauzau Pilat chyáng shuí wang ê luí, ² "Shí yuq gi, mingbyû wui lé hkyô shuí nghoq é eq, hkoséng Kehtaq chyáng kang kat râ hkyô lé le hkûm to luí, Yhânggùng yhang gi, haú Hkrisduq nghû é hkohkâm nghut lhê ga luí, taí nyi é lé ngamoq myang ri." ga luí, Yhang lé mara hun akô.

³ Haú hkûn, Pilat gi, Yesuq lé, "Nàng gi, Yudaq byu pé é hkohkâm nghut lhê lhú?" ga myi jáng, Yesuq gi, "Nàng taí é eq rajung za nghut lhê." ga tù taí ri.

⁴ Pilat gi, "Shí yuq lé hùn râ mara ngò a myàng." ga luí, hkyangjong agyi pé eq shiwa byu pé lé taí ri.

⁵ Nghut kôlhang, haú bang gi, "Shí yuq gi, Yuda mau gón má yhang mhoqshit é dông mai, mingbyû wui é i-myit lé shuí gabyông ri. Haú gi, Galile mau mai ahkuí shi má jé shoq nghut bê nghut ri." ga zuq zuq taí bum akô.

⁶ Pilat gi, haú su ga kô é lé wó gyo jáng, Yesuq Galile byû nghut é, a nghut é hkyô lé myí wú ri. ⁷ Yesuq gi, Herut up é mau mâ é byû nghut é lé Pilat sé jáng, haú u lé Yerusalem wà mó má nyi tô é

Herut chyáng, ê dé kat nhang ri.

⁸ Herut gi, Yesuq lé myàng jáng, gyai yhang gabú pyâm ri. Hkâsu mù gâ le, Yhâng é hkyô lé wó gyô wú mù, Yhang laklai kumlhá ralhum lhum kut shit râ lé, wó myàng shoq ga, myit myoqbyu nyi é nghut luí, Yhang lé myàng nau é gyai yhang myáng bê nghut ri. ⁹ Haú mù, yhang gi, Yesuq lé dangmyi myo myô èq myí wú kôlhang, Yesuq gi, dang rahkun lhang a tù taí byi nghut ri. ¹⁰ Hkyangjong agyi pé eq tarâ sará pé gi, yap to mù, Yhang lé mara gyai yhang chôm hun akô. ¹¹ Herut eq yhâng é gyezô pé gi, Yesuq lé rhoí jihkyoí kut mù, atam é dông taí hpoí kô luí, réng é mebu hut byi mù, Pilat chyáng dum taú dé nhang kat akô. ¹² Haú nyi jáng, hí hpyang gyè dut lhùm é Herut eq Pilat gi, buinùm dut byuq bekô nghut ri.

Yesuq Lé Sat Râ Matú Do-qdân É Hkyô

Mht 27:15-26; Mrk 15:6-15; Yhn 18:39—19:16

¹³ Haú hkûn, Pilat gi, hkyangjong agyi pé eq zau suwún wui, mingbyû wui lé wut tsîng to mù, ¹⁴ "Shí yuq gi, mingbyû wui lé hkyô shuí nghoq ri ga, Yhang lé nungmoq ngá chyáng shuí lé lô bekô. Ahkuí, wú keq, nungmoq é hí má, Yhang lé ngò myí wú le, Yhang má nungmoq hun é mara lé ngò a myàng nghut ri. ¹⁵ Hau htoq agó, Herut le, hai mara le a

myàng mù, shí yuq lé nga-nhông chyáng dum dé kat byi bê nghut ri; haû mù luî, wú keq, shí yuq gi, shî gíng é mara haî le a kut shut nghut ri. ¹⁶ Haû mù, ngò, Yhang lé dam byi luî, nhang pyám rà." ga luî, yhangmoq lé taî ri.

¹⁷ Nghut kôlhang, Lhoqlhai Poî hkgangmó má, Pilat gi, mingbyû wuî lé htongbyû rayuq yuq nhang kat byi byi kut é yanmai, ¹⁸ yhangmoq banshoq bang gi, "Shí yuq lé gi, yu pyám aq; Barabaq lé kúm gi, nhang kat byi laq." ga luî, chôm wut garu bum akô. ¹⁹ Barabaq gi, wà htum má gumlau kut é eq byù sat é yanmai, htóng gyó nyí sù nghut ri.

²⁰ Pilat gi, Yesuq lé nhang pyám nau é nghut mù luî, yhangmoq lé dum puq taî ri. ²¹ Nghut kôlhang, yhangmoq gi, "Yhang lé tapzîng má jén tap pyám aq, jén tap pyám aq!" ga luî, wut taî garû nyi bum akô.

²² Haû mù luî, sum dâm nghû rà hkûn, Pilat dum taî é gi, "Haî mù luî l hú? Yhang gi, hai mara kut shut bê l hú? Yhang má shî gíng é mara lé ngò a myàng, haû mù, ngò, Yhang lé bat, nhuq, mhoqshit luî, nhang pyám rà." ga luî, yhangmoq lé taî ri.

²³ Yhangmoq gi, Yesuq lé tapzîng má wó jén sat pyám shoq ga, zuq zuq htê mó o mó èq dúng wut nyi akô nghut é yanmai, wó taî ung yù bekô nghut ri. ²⁴ Haû mù luî, Pilat

gi, yhangmoq dúng é eq rajung za myit hpyit doqdan byi ri. ²⁵ Haû su mù, yhang gi, yhangmoq dúng é eq rajung za, wà htum má gumlau kut é eq byù sat é mai, htóng gyó nyí sù lé nhang kat byi luî; Yesuq lé gi, yhangmoq ô nau é dông ap byi kat bê nghut ri.

Yesuq Lé Tapzîng Htoq Má Jén Tap É Hkyô

Mht 27:31-44; Mrk 15:21-32; Yhn 19:17-27

²⁶ Yhangmoq gi, Yesuq lé shuî htoq ló kô é hkûn, yosô wà mai lo é, Kuruni myuq byû nghut é Simun ga sù lé, chyup yû mù, tapzîng waq nhâng luî, Yesuq htâng má châng nhang akô. ²⁷ Byù rajum rayò gi, Yhang htâng má châng e ló bum akô. Yhang é yanmai ngaubyi ngàu nhap eq iyon yôn é myiwe zo wuî le haú má bo tô ri. ²⁸ Yesuq gi, yhangmoq shut lhîng wú luî, "Yerusalem byizo wuî ê, Ngá é yanmai hkâ-ngau nyi kó, nungmoq gi, yhumsing gùng eq yhumsing é zo dù wuî é matú sheq ngau nyi keq. ²⁹ Hkâsu mù gâ le, 'Zogûng a dut wú é eq nau a huq wú é baùdung myhí pé gi, hkungsô wó nyi ri.' ga luî, taî é buinyi gi, jé lô rà nghut lhê. ³⁰ Haú buinyi má, byu pé gi, bùm pé lé,

'Ngamoq ahtoq má byoq nhé aq!'

ga luî le, kong pé lé,

'Ngamoq ahtoq má nghop aq!'

ga luí le, wut taí bùm bekô râ nghut lê. ³¹ Byu pé gi, sikhâm jûm tô ashî le isu kut kô é nghut le gi, màn jáng gi, hkâsu wá dut lô râ lúhú?" ga taí ri.

³² Haú hkûn, damyaq í yuq lé le, sat pyám râ ga, Yesuq eq rahá shuí htoq ló akô. ³³ Ahkuí, Ugyap nghu é kong má jé jáng, Yesuq lé tapzîng htoq má jén tap tô é hkûn, damyaq í yuq lé le, loqpai loqyò shut kut luí tapzîng má jén tap tô akô. ³⁴ Haú hkûn, Yesuq gi, "Áwa ê, yhangmoq lé mara hkyut pyám byi laq; hkâsu mù gâ le, yhangmoq kut é hkyô lé yhangmoq a sé kó nghut ri." ga taí ri. Gyezô pé gi, Yhâng é mebu pé lé lháng, hkyîn shosé she é đông gam yu pyám byí akô.

³⁵ Mingbyû wuì gi, yap to mù tu wú nyi akô. Zau suwún wuì Yhang lé nyhap é gi, "Yhang gi, byù góbang lé hkyi yu é sù nghut ri. Yhang gi, Garai Gasang hkyin yu é sù Hkrisduq nghut le gi; Yhânggùng yhang le hkyi yu wú sháng gaq." ga akô.

³⁶ Gyezô pé le, huí ê mù, rhoi nyaú nyaú akô. Yhangmoq gi, chyîn wing lé yhun byi kôluí, ³⁷ "Nàng gi, Yudaq byu pé é hkohkâm nghut é nghut le gi, Nàng gùng yhang nang, hkyi yu wú aq." ga Yhang lé taí akô.

³⁸ Yhâng é ulhum ahtoq má le, (Grik đông le, Latin

đông le, Hebre đông le) "SHÍ YUQ GI, YUDAQ BYU PÊ É HKOHKÂM." gâ é laiká kâ tap tô akô.

³⁹ Tapzîng htoq má bat tap lhâng to huí é damyaq rayuq gi, "Nàng gi, Hkrisduq nghut lê, a nghut lúhú? Haú Nàng gùng nàng le, ngá-nhik lé le, hkyi yu aq." ga luí, Yhang lé rhoi ri.

⁴⁰ Damyaq góyuq sù kúm gi, "Nàng le shí yuq eq rajung za jén tô é hui luí nhîng, Garai Gasang lé a gyuq lúhú? ⁴¹ Nganhik gi, yhumsîng kut shut é mara eq rajung za, jéyáng hui zo gíng é sù nhik nghut lê; shí yuq kúm gi, hai mara lé kut shut wú sù a nghut." ga luí, haú yuq lé tân kat ri.

⁴² Hau htâng, yhang Yesuq lé taí é gi, "Yesuq ê, Nàng, Nàng é mingdán má jé ló jáng, ngo lé myit bun laq ô." gâ ri.

⁴³ Haú hkûn, Yesuq gi, "Ngò, nang lé teng za taí lé, hkûnyí yhang nang Ngò eq rahá hparadisú* má nyi râ nghut lê." ga luí, yhang lé tû taí kat ri.

Yesuq Soqkang Byit É Hkyô Mht 27:45-56; Mrk 15:33-41; Yhn 19:28-30

⁴⁴ Haú ahkyíng gi, nyí káng raxe í hkyíng nghut luí, myinhâng sum hkyíng jé shoq ramau gón mauchut tuq dut byuq bê nghut ri;† ⁴⁵ hkâsu mù gâ le, builoq shum byuq é yanmai nghut ri. Noqkuq

* **23:43** Hparadisú nghu é gi, mauhkúng mingdán lé taí ri. † **23:44** Nga-nhùng é nyí káng raxe í hkyíng gi, Yudaq byù pé é napkyó hkyuq hkyíng nghut lê; yhangmoq é gau hkyíng gi, nga-nhùng é myinhâng sum hkyíng nghut bê.

yhûm mâ é pán-gyang le, í hkyam byáng dut byuq bê nghut ri. ⁴⁶ Haú hkûn, Yesuq gi, "Áwa ê, Ngò, Ngá é woi-nyí náng é loq má ap byí lhê." ga htê mó eq garú kat ri. Haú su ga ban tá eq, Yhang kâng byit bê nghut ri.

⁴⁷ Shô up gyezau hpó gi, haú su dut é lé myàng jáng, "Shí yuq gi, gè gè yhang, dingmán sù nghut ri." ga luí, Garai Gasang lé hkyaton kungton ri. ⁴⁸ Haú hkyô lé wú râ ga, lé zîng tô é byù lhunglhâng bang le, haú su dut é hkyô pé lé myàng kôjáng, myit yón kôluí, wànggàng bat mù, dum taú ló byuq bekô. ⁴⁹ Nghut kôlhâng, Yhang lé sê é bang eq Galile mau mai Yhang htâng châng é myiwe wuì gi, we we má yap to mù, haú hkyô pé lé byu wú nyi akô.

Yesuq É Màng Lé Lup Hkaú Má Kat É Hkyô

Mht 27:57-61; Mrk 15:42-47; Yhn 19:38-42

⁵⁰ Haú hkûn, Yuda mau Aramahti gâ é myuq má, Yosep gâ é sù rayuq nyi ri. Haú yuq gi, nhik bo é sù eq dingmán é sù nghut é htoq agó, Garai Gasâng é mingdán jé râ hkyô lé myit myoqbyu to sù le, nghut mù luí, ⁵¹ yhang gi, Yudaq uphkâng hpúng mâ é rayuq nghut kôlhâng, hpyé lhûm é hkyô má le, zui saí é hkyô má le, myit a bo huí lom é sù nghut ri. ⁵² Yhang gi, Pilat chyáng wàng luí, Yesuq é gungsôm lé dúng yu ri. ⁵³ Haú

mù, gungsôm haú lé tapzîng mai hkyut hkyô yù luí, pán yúng eq htup yup mù, ó lé lhang a kat wú shî é, luqgok lé kyúng tô é luqgok lup hkaú má kat tô ri. ⁵⁴ Haú nyi gi, Hên Lajang Buinyi nghut luí, Bánno buinyi jé râ za nghut bê.

⁵⁵ Galile mau mai Yesuq eq rahá htoq lé lo é myiwe zo wuì le, Yosep htâng má châng ê luí, lup haú lé le, Yesuq é gungsôm lé le, hkâsu kut tô tô é lé, ê myang akô. ⁵⁶ Hau htâng, yhangmoq gi, yhûm shut taú lò mù, Yesuq é gùng sôm lé but byi râ matú, namngón é jung eq mura xû lé hen tô akô. Bánno buinyi má kúm gi, tarâ joq é eq rajung za, yhangmoq yuban bân nyi bum akô nghut ri.

24

Yesuq, Dum Dui Toq É Hkyô

Mht 28:1-10; Mrk 16:1-8; Yhn 20:1-10

¹ Bánno buinyi htang napsûn noq le, myiwe wuì gi, yhangmoq hen tô é namngón jung pé lé yu chûng mù, lup shut e ló akô. ² Yhangmoq gi, lup mâ é luqhkum lêng bóng to lánng é lé, ê myâng kômù, ³ wang e wú kô le, haú Yhumsîng Yesuq é gungsôm lé, a myàng lo kó nghut ri. ⁴ Yhangmoq maú úng-âng nyi bùm kô é hkûn, radá dâm maulhap su duqbó é mebu wut é byù í yuq, yhangmoq é nâm má yap tô akô. ⁵ Haú mù, myiwe haú bang gi,

gyuq dan bum kôluî, myigùng shut myoqdong ngóm gop tô bum é u lé, haú nhik gi, "Nungmoq gi, duì sù lé, shi to bâng chyáng haí mù ho nyi akô lúhú? ⁶ Yesuq gi, shí má a nyi lo; Yhang duì toq lo bê! Yhang gi, nungmoq eq rahá Galile mau má nyi tô ashî hkûn lé, ⁷ 'Haú Byu Yhangzo gi, yubak dap bâng é loq má ap pyâm é hui lui, tapzîng má jén sat to hui é htâng, sum nyí nghû é buinyi má lhoq duì toq yu é hui râ nghut lhê.' ga nungmoq lé taí tô é dang lé myit bun keq." ga lui, yhangmoq lé taí ri. ⁸ Haú hkûn, yhangmoq gi, Yesuq é dang lé bûn kat bekô nghut ri.

⁹ Yhangmoq gi, lup mai dum taú lò mù, lagyo raxe rayuq eq gotû lhunglhang bang lé, haú hkyô banshoq lo taí kyô akô. ¹⁰ Lagyo pé lé lo taí kyo bang gi, Magadalaq wà mâ é Mariq, Yoanaq, Yakuq é yhangnu Mariq eq, yhangmoq eq rahá nyi é myiwe góbang le nghut akô. ¹¹ Lagyô pé kúm gi, yhangmoq é dang lé dangsôm su ngam pyám kôluî, a jîng byi kó nghut ri. ¹² Nghut kôlhang, Petruq gi, toq lui lup má din jé é mù ngóm wú kat le, mâng htup é pán leq tô é lé za myàng mù lui, haú su dut é hkyô lé maú é èq, yhûm shut dum taú lò byuq bê nghut ri.

Chángzo Í Yuq Lé Yesuq Htoq Shit É Hkyô

Mrk 16:12-13

¹³ Haú ra-nyí má za, Yesuq é chángzô pé mâ é í yuq gi,

Yerusalem wà mó mai nyhit déng kô wê é Ema-u gâ é wà shut e ló akô. ¹⁴ Yhangnhik gi, dut lai ló é hkyô pé banshoq lé, rayuq eq rayuq taí lhûm nyi akô. ¹⁵ Yhangnhik gi, haú hkyô pé lé rayuq eq rayuq taí hpyê lhûm e ló kô le, Yesuq gi, yhangnhik chyáng jé lé lô mù, yhangnhik eq rahá sô nyi ri. ¹⁶ Nghut kôlhang, yhangnhik gi, myoq hpuq hpuq pyám byi é hui kômù, Yhang lé a sê wú byuq kó nghut ri.

¹⁷ Hau hkûn, Yesuq gi, yhangnhik lé, "Nungnhik hkyô so uchyang taí lhûm lé lo é gi, haí jung wá nghut akô lúhú?" ga myi kat jáng, yhangnhik gi, myoqdong shûm kut lui, hkyîng yap tô akô. ¹⁸ Yhangnhik mâ é Hklupa gâ é sù gi, "Nàng gi, Yerusalem wà mó má lé bíng nyi lui nhîng, shí gyoro lé haú wà má dut lo é hkyô pé lé, a sê é bíng gi, Nàng baú za wá nghut lhê lúhú?" ga myi kat ri.

¹⁹ Yhang gi, "Haí jung lúhú?" ga dum myí é hkûn lé, yhangnhik gi, "Nazaret wà byù Yesuq é hkyô nghut lhê; haú yuq gi, Garai Gasâng é hí má le, byù lhunglhang bâng é hí má le, nhut shô hpaqchyî a-tsam eq hkyî loq a-tsam má wum-o bo é sù myiqhtoi nghut ri. ²⁰ Nghut kôlhang, hkyangjong agyi pé eq ngamoq é zau suwún wui èq haú yuq lé sat pyám râ matú ap byí pyám kômù, yhangmoq gi, Yhang lé tapzîng má jén sat pyám bekô nghut ri. ²¹ Ngamoq kúm

gi, haú yuq lé, Israelaq byù myù lé hkyi yù râ sù nghut lhê nghu luí, myit myoqbyu nyi bum lhê. Nghut kôlhang, haú su dut lai ló é gi, hkú-nyí sum nyí lhang bò bê. ²² Hau htoq agó, hkú-nap noq le, lup má é wú é, ngamoq hpúng má é myiwe wui ra-am gi, ngamoq lé, lo lhoq maú akô. ²³ Yhangmoq gi, Yesuq é gungsôm lé a myàng jáng dum taú lò mù, 'Haú Yhumsing dui nyi ri.' ga luí, taí kyô é maumang lagyo htoq shit é shing-rán lé, myang é hkyô lé lo taí kyô akô. ²⁴ Haú mù, ngamoq é luzúm wui ra-am gi, lup má é wú kô le, myiwe wui taí é eq rajung za, dut to lánq é lé ê myàng akô. Nghut kôlhang, haú yuq lé gi, yhangmoq a myàng kó gâ." ga luí, Yhang lé taí kyô akô.

²⁵ Haú hkûn, Yhang gi, "My-ichtôí pé taí é dang banshoq lé lumjínq râ matú, hpaqchyí a bo é eq ngha é sù nhik ê, ²⁶ Hkrisduq gi, haú su é wuihke jamjau hkâm zô yu é htang má sheq, Yhang é hpungwup shingkang má wó wang nyi to râ, a nghut kó lú?" ga luí, yhangnhik lé myí ri. ²⁷ Yhang gi, yhangnhik lé, Mosheq kâ tô é eq myiqh-toí pé banshoq bang kâ tô é Chyúmdang pé mai, Yhang má âng é dang banshoq é lichyúm lé, taí hpông kyô ri.

²⁸ Ahkuí, yhangmoq, haú nhik e ló é wà má chyâng lò kôjáng, Yesuq gi, lai ló râ su kut ri. ²⁹ Haú hkûn, yhangnhik gi, "Nga-nhik eq

rahá wang bíng sháng; hkâsu mù gâ le, buigyùm bê mù, mau le chut lô bê nghut ri." ga luí, Yhang lé wum kat chôm lung nyi akô. Haú mù luí, Yesuq gi, yhangnhik eq rahá wang bíng bê nghut ri.

³⁰ Yesuq gi, zang zo râ ga, yhangnhik eq rahá zung tô é hkûn, muk lé yù luí, jeju hkya-on mù, myhik hpé luí, yhangnhik lé gàm byí ri. ³¹ Haú hkûn, yhangnhik é myoq bóng lô luí, Yesuq nghut é lé bún sé kat bekô. Yesuq kúm gi, yhangnhik chyáng mai byuq byuq bê nghut ri. ³² Haú mù, yhangnhik gi, "Yhang gi, hkyô má ngá-nhik eq dang nyo lhùm é eq Chyúmdang é lichyúm taí hpóng shit é hkûn, ngá-nhik gi, i-myit unghkaú má, achyí aku dut bê a nghut lú?" ga luí, yhangnhik yhangchang taí lhùm akô.

³³ Yhangnhik gi, toq mù, radá dâm Yerusalem wà mó shut dum taú lò kô le, lagyo raxe rayuq eq, yhangmoq eq rahá nyi é bang zup míng to kô é lé ló myang akô. ³⁴ Haú bang gi, "Haú Yhumsing gi, teng za yhang dum dui toq lò bê; Simun lé lhang htoq shit bê nghut ri." ga taí lhùm nyi bum akô. ³⁵ Haú hkûn, yhangnhik gi, hkyô má dut lai ló é hkyô pé eq, muk hpê é hkûn má Yesuq lé bún sé kat é hkyô lé, taí kyô akô nghut ri.

Chángzô Pé Lé Yesuq Htoq Shit É Hkyô

Mht 28:16-20; Mrk 16:14-18; Yhn 20:19-23; Lagyo 1:6-8

³⁶ Yhangmoq haú hkyô lé chôm taí nyi tô bum ashî le, Yesuq gi, Yhang gûng yhang, yhangmoq é agùng má yap to luí, "Nungmoq nguingón yuqyo nyi sháng gaq." ga luí, yhangmoq lé taí ri.

³⁷ Yhangmoq kúm gi, gyuq dan byuq bùm kômù, sobyô lé myàng bê ga myit yu pyâm bum akô. ³⁸ Haú mù luí, Yhang gi, "Nungmoq gi, haí mù dan nyi bum akô lú? Haí mù nungmoq é i-myit unghkaú má úng-âng nyi bum akô lú? ³⁹ Ngá é loq eq Ngá é hkyî lé wú wú keq. Ngò yhang nghut nyi lhê. Ngo lé sop wú keq. Sobyô nghû é gi, ngo lé nungmoq myang é su, sho eq showui showang bo é a nghut." ga luí, yhangmoq lé taí kyô ri.

⁴⁰ Yhang gi, haú su ga taí mù, Yhâng é hkyî loq lé tûn shit ri. ⁴¹ Yhangmoq gi, gabú é eq maú nyi bùm kômù, a wó jing shi dut tô é hkûn lé, Yesuq gi, "Nungmoq shí má zôhpo rajung jung wó akô lú?" ga luí, yhangmoq lé myi kat ri. ⁴² Haú hkûn, yhangmoq gi, nyhîn nyhoq tô é ngozo rah-tung lé, byí akô. ⁴³ Yhang gi, haú lé yù mù, yhangmoq é hí má zô shit ri.

⁴⁴ Hau htâng, Yhang, yhangmoq lé taí é gi, "Mosheq é tarâ eq, myiqhtoi laiká pé má le, Hkya-on Kungtôn Laiká pé má le, Ngò èq séng luí kê to má kê to banshoq gi, dik râ chyat nghut lhê nghû luí, nungmoq

eq rahá nyi to ashî hkûn lé, Ngò, nungmoq lé taí kyô tô é pé gi, shî nghut bê." ga taí ri.

⁴⁵ Hau htâng, Yhang gi, Chyúmdang pé lé sê gyo shoq ga, yhangmoq é i-myit hkum hpóng byí ri. ⁴⁶ Haú mù, Yhang gi, "Hkrisduq gi, wuîhke jamjau hui zo mù, sum nyi nghû râ buinyi má, shi é mai dum dui toq lô râ hkyô lé le, ⁴⁷ Yerusalem wà mó mai hí luí, byù myû chângjup lé, Yhâng é mying lé lang luí yubak mara hkyut pyám byi râ hkyô eq myit lhing râ hkyô lé le, hko kyo râ hkyô lé, kê to bê nghut ri. ⁴⁸ Nungmoq gi, shí pê é saksé pé nghut nyi akô. ⁴⁹ Ngá Wa byi tô é danggidiq* lé, Ngò, nungmoq é ahtoq má nhang kat râ nghut lhê; nungmoq kúm gi, htoq tsáng myhâng mâ é wum-o a-tsam wó yu é buinyi jé shoq, Yerusalem wà mó má láng nyi keq." ga luí, yhangmoq lé taí ri.

Yesuq Mauhkûng Shut Shuí Toq Yu Hui É Hkyô

Mrk 16:19-20; Lagyo 1:9-11

⁵⁰ Hau htâng, Yhang gi, yhangmoq lé Behtani wà yàm shut shuí htoq ê mù, Yhâng é loq tu toq luí, shimân byí ri.

⁵¹ Haú su kut shimân byi nyi ashî le, Yhang gi, yhangmoq chyáng mai gâng ló byuq luí, mauhkûng shut shuí toq yu é hui bê nghut ri. ⁵² Yhangmoq kúm gi, Yhang lé noqkuq kômù luí, gyai gabú é myit

* 24:49 Ngá Wá byi tô é danggidiq nghu é gi, Chyoiyúng é Woi-nyí lé taí ri.

èq Yerusalem wà mó shut
dum taû ló akô. ⁵³Yhangmoq
gi, noqkuq yhûm má nyi to
mù, Garai Gasang lé hkya-on
kungton nyi bum akô nghut
ri.

YOHAN é Gabú Danglù Laiká (The Gospel of John)

*Haù Mungdang, Xângzo
Byù Gùng Lé Dut É Hkyô*

¹ A-nham sâng-hi má, Mungdang joq ri; Mungdang haù gi, Garai Gasang eq rahá nghut luí, haù Mungdang yhang Garai Gasang nghut ri. ² Yhang gi, a-nham sâng-hi má, Garai Gasang eq rahá nghut nyi ri.

³ Nyì mi-nyì, joq mijoj gi, Yhang dông mai hpan tô é chyat nghut lhê; Yhang dông mai a hpan é gi, haì lhang a joq nghut ri. ⁴ Asak chyungxe gi, Yhang má nghut lhê mù, asak haù gi, byu pê é matú maubó nghut ri. ⁵ Haù maubó gi, mauchut má duqbó byì nyì kôlhang, mauchut gi, haù lé a hap yù nghut ri. ⁶ Garai Gasang mai nhang kat é, Yohan gâ é byù rayuq jé lé ri.

⁷ Yhang gi, maubó haù eq sêng é hkyô lé, saksé hkám byi luí, yhang é yanmai byù lhunglhang bang wó lumjing kó sháng gaq ga, saksé rayuq dông jé lé é sù nghut ri. ⁸ Yhang gi, haù maubó a nghut; maubó haù lé saksé hkám byi râ matú za sheq jé lé é ru nghut lhê. ⁹ Byù yuq jup lé duqbó byi é, maubó akying haù gi, mingkan htoq má jé nyi to bê.

¹⁰ Yhang gi, mingkan htoq má nyi to bê nghut ri; mingkan lé gi, Yhang dông mai hpan tô é nghut kôlhang, mingkan haù gi, Yhang lé a wú sé nghut ri. ¹¹ Yhang gi, yhumsing mau má jé lé kôlhang, Yhang é amyù pé gi, Yhang lé a lhom hap yù kó nghut ri. ¹² Nghut kôlhang, Yhang gi, Yhang lé lhom hap yù luí, Yhang é mying lé lumjing é bang lhunglhang lé, Garai Gasang é yhangzô pé dut râ ahkáng byi bê nghut ri. ¹³ Haù bang gi, sui sho dông hku kat é le a nghut, byù ô nau é dông hku kat é le a nghut, gungsho ô nau é dông hku kat é le a nghut e za, Garai Gasang chyáng mai hku kat é bang ru nghut lhê.

¹⁴ Haù Mungdang gi, xângzo byù gùng lé dut luí, ngamoq chyáng nyi wú bê nghut lhê. Ngamoq gi, haù jeju eq tengmán hkyô bying tô é, Yhang é hpungwup shingkang lé myang wú bê nghut lhê; haù gi, haù Íwâ é zote rayuq dông, Yhang wó yu é hpungwup shingkang nghut ri.

¹⁵ Wui-myhup Sará Yohan gi, Yhang eq sêng é hkyô lé saksé hkám é hkùn, garú taí é gi, "Ngá é htâng má jé lé é Sù gi, ngá é hí mai nyi to bê sù nghut é yanmai, ngá htoq je gyaú sù nghut ri." nghù, ngò taí é sù gi, shí yuq nghut bê." gâ ri. ¹⁶ Yhang é gumjup é jeju ahkaù mai, nga-nhung ban-shoq bang gi, shimân jeju lé ralhùm htoq ralhùm myang

yu nyi bê nghut lhê. ¹⁷ Hkâsu mù gê lé, haû jep é tarâ gi, Mosheq é loq dông mai byî é nghut lhê; jeju eq tengmán hkyô kúm gi, Yesuq Hkrisduq é yanmai lé joq é nghut lhê. ¹⁸ Garai Gasang lé, ó yuq èq le a myang wú wú é nghut lhê; nghut kôlhang, haû Íwá é tanghkoí má lúng tô é, Yhang Zo zote gi, Garai Gasâng é gùng lé lhoq htoq shit bê nghut ri.

*Wui-myhup Sará Yohan
Hko Kyô É Hkyô*

Mht 3:1-12; Mrk 1:1-8; Luk 3:15-17

¹⁹ Yerusalem wà mó mâ é Yudaq byu pé gi, hkyangjông pé eq Lewiq byu pé lé, Yohan ó yuq nghut é hkyô myí nhang kat kô é hkûn, Yohan saksé hkâm é gi, a-ô mâ é hkyô pé nghut ri. ²⁰ Yhang gi, a hê a zaú tô e za, "Ngò gi, Hkrisduq* a nghut." ga lhom taí kyô ri.

²¹ Haû hkûn, yhangmoq gi, "Haû nghut jáng, nàng gi, ó yuq nghut lhê lhú? Nàng gi, Eliyaq lhú?" ga myí kôjáng, yhang gi, "A nghut." ga taí ri; "Nàng gi, haû Myiqhtoi nghut lhê lhú?" ga dum myí kôjáng, yhang gi, "A nghut." ga tû taí ri.

²² Haû mù, yhangmoq gi, "Ngamoq lé nhang kat bâng chyáng ló wó taí kyo râ matú, nàng gi, ó yuq nghut lhê lhú? Náng gùng lé nàng hkâsu nghû lhê lhú? Taí kyô wú laq." ga dum myí akô.

²³ Haû hkûn, Yohan gi, myiqhtoi Esai-aq é dang eq rajung za, "Ngò gi, haû yoso má, 'Yhumsing é matú hkyô lhoq nyhang to keq.' gê é htê lé, garú taí é sù nghut lhê."* ga tû taí ri.

²⁴ Hparishe pé mai nhang kat é bang ra-am gi, yhang lé, ²⁵ "Nàng gi, haû Hkrisduq le a nghut, Eliyaq le a nghut, Myiqhtoi le a nghut é nhîng, haí mù luí, wui-myhup hkám byi nyi lhê lhú?" ga dangmyi myí akô.

²⁶ Haû hkûn, Yohan tû taí é gi, "Ngò gi, wui èq za wui-myhup hkám byi lhê; nghut kôlhang, nungmoq a sê é sù rayuq nungmoq chyáng yap tô ri. ²⁷ Yhang gi, ngá htâng má lé é sù yuq nghut bê; ngò gi, Yhâng é hkyî-tsung tui lé hpyî râ lhang a gingdán é nghut ri." gâ ri.

²⁸ Shí pé banshoq gi, Yohan wui-myhup hkám byi nyi é, Yodan làng hé hpoq mâ é Behtani wà má dut é hkyô pé chyat nghut ri.

*Yesuq Gi, Garai Gasâng É
Sauzo Nghut É Hkyô*

²⁹ Hau htang nyí, Yohan gi, yhâng chyáng Yesuq lé lo nyi é lé myàng luí, taí é gi, "Míngkan byu pê é yubak mara lé yu pyám byi é Garai Gasâng é Sauzo lé, wú keq! ³⁰ Shí yuq gi, 'Ngá é htâng má jé lé é Sù gi, ngá é hí má nyi bê sù nghut é yanmai, ngá htoq je gyaú Sù nghut ri.' nghû,

* **1:20** Grik dong Hkrisduq gê é gi, xû but hui Sù gê é lichyúm nghut mù, Hebre dong "Mesaia" gê é eq rajung za nghut lhê. ✧ **1:23** Esai 40:3

ngò tái é sũ yhang nghut bê.
³¹ Ngò gi, Yhang ó yuq nghut é lé a sê é nghut lhê, nghut kôlhang, Yhang lé, Israelaq byu pé wó sé kó sháng gaq nghũ, ngò lé jé mù, wui èq wui-myhup hkám byi nyi é nghut lhê." gâ ri.

³² Hau htâng, Yohan saksé hkám é gi, "Hau Woi-nyí gi, mauhkúng mai hpúngkyui gunghkyâng sũ é đông mai gyó lé mù, Yhâng chyáng lé nô tô é lé, ngò myàng ri. ³³ Ngò gi, Yhang ó yuq nghut é lé a sê é nghut kôlhang, wui èq wui-myhup hkám byi râ matú, ngo lé nhang kat é Sũ, ngo lé tái kyô é gi, 'Hau Woi-nyí gyó lé lô mù, ó yuq chyáng lé nô tô é lé, nàng myàng jáng, hau yuq gi, hau Chyoiyúng Woi-nyí má wui-myhup hkám byi râ sũ nghut lhê.' gâ ri. ³⁴ Hau eq rajung za ngò myàng bê nghut lui, shí yuq gi, Garai Gasâng é Yhangzo nghut lhê nghũ, ngò saksé hkám lhê." gâ ri.

Sâng-hi Lhê É Chángzô Pé

³⁵ Hau htang nyí, Yohan gi, yhâng é chángzo í yuq eq rahá, hau má dum nyi tô akô. ³⁶ Hau hkûn, yhang gi, Yesuq lai ló nyi é lé myang kat jáng, "Hê, Garai Gasâng é sauzo lé, wú keq!" ga tái kat ri.

³⁷ Chángzo hau í yuq gi, yhang hau su gâ é lé wó gyo kôjáng, Yesuq é htâng cháng bekô nghut ri. ³⁸ Yesuq

gi, lhing wú kat le, yhangn-hik châng tô é lé myàng lui, "Nungnhik hai o akô lú?" ga myi jáng, yhangnhik gi, "Rabai é, Nàng hkámá nyi lhê lú?" ga tái myi kat akô nghut ri. (Rabai gâ é gi, Sará gâ é lichyúm nghut lhê.)

³⁹ Hau hkûn, Yhang gi, "Lé keq, hau jáng, nungnhik myàng kó râ nghut lhê." ga tái ri.

(Hau-u gi, raxê hkyíng† kô nghut ri.) Hau mù lui, yhangnhik gi, châng ê mù, Yhang hkámá nyi é lé, ê myàng kôlui, hau nyí buigyùm shoq, Yhang eq rahá é nyi nyi akô nghut ri.

⁴⁰ Yohan tái é dang lé wó gyo lui, Yesuq htâng châng é su nhik mâ é rayuq gi, Simun Petruq é yhanggu Andre nghut ri. ⁴¹ Andre gi, yhangmang Simun lé hí myàng lui, "Nga-nhik gi, Mesaia lé myàng bê." ga yhang tái kyô ri. (Mesaia gâ é lichyúm gi, Hkrisduq gâ é nghut lhê.) ⁴² Hau htâng, yhang gi, yhangmang lé Yesuq chyáng shuí e ri.

Yesuq gi, Simun lé lhom myàng jáng, "Nàng gi, Yohan é yhangzo Simun nghut ri; Kehpa‡ gâ é myìng lé, nàng wó yû râ nghut lhê." ga tái ri. (Kehpa gâ é lichyúm gi, Petruq gâ é nghut lhê.)

Hpilip Eq Nahtanelaq Lé Hkyin Yu É Hkyô

† 1:39 Raxê hkyíng gi, myinhâng myi hkyíng záng ri. ‡ 1:42 Aramaik dang đông Kehpa gâ é eq Grik dang đông "Petruq" gâ é lichyúm gi, luqgok gâ é nghut lhê.

43 Hau htang nyí, Yesuq gi, Galile mau shut ê râ matú, myit hpyit yû bê nghut ri. Yhang gi, Hpilip lé myàng jáng, "Ngá htâng cháng aq." ga taí ri.

44 Hpilip gi, Andre eq Petruq nhik nyi é Bet-saida và mó mâ é byù nghut ri. 45 Yhang gi, Nahtanelaq lé myàng jáng, "Mosheq mai tarâ laiká má kâ tô é eq myiqhtoí pé mai le lhoq ang luí kâ tô é sù, Yosep é yhangzo, Nazaret và byù Yesuq lé, ngamoq myàng bê." ga yhang lé taí kyô ri.

46 Haú hkûn, Nahtanelaq gi, "Nazaret và ô! Haú mai, ge é jung haí wa wó htoq lê lú?" ga myi jáng, Hpilip gi, "Ru lé wú aq." ga yhang lé taí ri.

47 Yesuq gi, Yhâng chyáng Nahtanelaq lé lo nyi é lé myàng jáng, yhang lé lhoq ang luí, "Wú keq, shí yuq gi, mhaú é myit a bo é sù, Israelaq byù akying rayuq nghut ri." ga taí ri.

48 Haú hkûn, Nahtanelaq gi, "Nàng, ngo lé hkâsu kut sê é lú?" ga myi jáng, Yesuq gi, "Nang lé, Hpilip eq a wut yù shimá, nàng, maihpáng gâm ô má ru nyi tô ashî hkûn, Ngò, nang lé myàng bê nghut lê." ga tú taí ri.

49 Haú mù, Nahtanelaq gi, "Rabai ê, Nàng gi, Garai Gasâng é Yhangzo nghut ri; Nàng gi, Israelaq byu pê é Hkohkâm le nghut ri." ga taí ri.

50 Haú hkûn, Yesuq gi, "Ngò, nang lé, maihpáng gâm ô má myang é nghû taí kyô é yan-mai, nàng lumjíng lê a nghut lú? Hau htoq je kô é muzó pé lé, nàng myàng râ nghut lê." ga taí ri. 51 Hau htâng, Yesuq xoq taí é gi, "Ngò, nungmoq lé teng za taí kôlé, mauhkûng bóng lô luí, haú Byu Yhangzô ahtoq má, Garai Gasâng é maumanglagyô pé doq ló gyó lô kut nyi kô é lé, nungmoq myàng kó râ nghut lê." gâ ri.

2

Wuì Lé Tsibiyiq Wing Dut Nhang É Hkyô

1 Hau htâng, í nyi nghû râ nyi má, Galile mau mâ é Hkanaq và mó má, myiháng poí ralhú joq ri. Haú má Yesuq é yhângnu le, bo lom ri. 2 Yesuq eq Yhâng é chángzô pé lé le, myiháng poí haú má ji akô nghut ri. 3 Tsibiyiq wing jaú tùm to kô é hkûn, Yesuq é yhângnu gi, "Yhangmoq, tsi-biyiq wing a wó lo kó nghut ri." ga, Yesuq lé taí ri.

4 Haú hkûn, Yesuq gi, "Ánu ê,* haú, nàng gi, Ngò eq haí sêng lê lú? Ngá é ahkyíng a jé shi é nghut lê." ga tú taí ri.

5 Nghut kôlhang, Yhâng nu gi, haú dui-nhâng zoshâng wuì lé, "Yhang haí taí le, haí kut keq." ga taí ri.

6 Haú nàm má, í sum xê galan kô wang é luqgok wúng hkyuq cham joq tô ri; haú gi, Yudaq byu pé mai, lhoq

* 2:4 Ánu ê gâ é lé, Grik đông gi, "Myiwe myhí ê" ga bo tô é nghut lê.

san lhoq yúng hkíng é matú, chung é jung wúng nghut ri.

⁷ Yesuq gi, haú dui-nhâng zoshâng wuì lé, "Wúng haú pé má wuì lhoq pyíng keq." ga taí ri; haú mù, yhangmoq gi, wúng haú pé má byíng shoq shoq lhoq pyíng bekô nghut ri.

⁸ Hau htâng, Yhang gi, yhangmoq lé, "Ahkuì, ratsuí hkú yù mù, poi-up lé yu ló byi keq." ga taí jáng, yhangmoq gi, yu ló byi akô nghut ri.

⁹ Poi-up hpó gi, wuì mai dut é tsibiyiq wing haú lé, shuq chyam wú ri; wuì hkam é dui-nhâng zoshâng wuì gi, tsibiyiq wing haú hkâmai lo é hkyô lé sê to kôlhâng, yhang gi, a sé nghut ri. Haú mù, yhang gi, lusik lé, ji yù luí, ¹⁰ "Yuq hkangmó gi, tsibiyiq wing mún lé hí jaú mù, bíng pé shuq gyí bùm jáng sheq, tsibiyiq wing apyâng lé ru yu htoq lhê; nghut kôlhâng, nàng gi, nghâm é tsibiyiq wing lé, ahkuì jé shoq wó hkong tô rihung!" ga taí ri.

¹¹ Galile mau mâ é Hkanaq và mó má, Yesuq tân shit é limik kumlhá gi, Yhang kut é limik kumlhá pé mâ é sâng-hî dàm nghut ri. Yhang gi, Yhâng é hpungwup shing kang lé, haú dông lhoq htoq shit é nghut mù luí, Yhâng é chángzô pé gi, Yhang lé lumjíng bum akô nghut ri.

Noqkuq Yhùm Lé Lhoq Sansêng Pyâm É Hkyô

Mht 21:12-13; Mrk 11:15-17; Luk 19:45-46

¹² Hau htâng má, Yesuq gi, Yhâng nu, Yhâng gu yuqzo pé eq Yhâng é chángzô pé le mù, Kaperna-um và má gyó ló ri; yhangmoq gi, haú má buinyi myi ngò nyi nyi akô nghut ri.

¹³ Yudaq byu pé é Lhoqlhai Poi jé rá nghut é hkùn, Yesuq gi, Yerusalem và mó má doq ló ri. ¹⁴ Haú hkùn, noqkuq yhùm wàng má, nojúng, sau, hpûngkyui pé lé ûng nyi é bang lé le, siboí má ngùn htaí zô zung nyi é bang lé le, Yhang ló myàng ri. ¹⁵ Haú mù, Yhang gi, tui lé, nhuq rá wase sai yù mù, banshoq bang lé le, sau eq nojúng lé le, haú noqkuq yhùm wàng mai hkat htoq luí, ngùn htaí zo bâng é ngùn htingchap lé gi, tú hut pyám byi mù, yhangmoq é siboí lé gi, tu mhuc pyám byi ri; ¹⁶ haú hpûngkyui ung zô é bang lé le, "Zè shi pé lé yu htoq ló keq! Ngá Wâ é yhùm lé, hpugá jowò hkâkut kó!" ga luí nhik-yô ri.

¹⁷ Haú mù, Yhâng é chángzô pé gi, "Ngò, Náng é yhùm lé chyitdap kâng tuí é hkyô gi, Ngo lé myi su nyhê jôm pyám rá nghut lhê."* ga kâ tô é lé, myit bûn kat akô nghut ri.

¹⁸ Yudaq byu pé gi, Yhang lé, "Nàng, shí pé kut rá ahko ahkáng wó é hkyô lé saksé tân shit rá matú, ngamoq lé, haí jung limik kumlhá wó tân shit rá lú?" ga chôm myi akô nghut ri.

¹⁹ Haú hkùn, Yesuq gi, "Noqkuq yhùm shí lé nungmoq

hpyoq pyám keq, sum nyí gyoro má, Ngò, haù lé dum tu shap râ nghut lhê." ga, yhangmoq lé tâ taí ri.

²⁰ Haù Yudaq byu pé gi, "Noqkuq yhùm shí lé, myi xe hkyuq zân tup saí é ru nghut lhê; sum nyí gyoro má za, Nàng wó tu shap râ lhu?" ga tu myí akô nghut ri. ²¹ Nghut kôlhang, Yesuq taí é noqkuq yhùm gi, Yhâng é gùng lé lhoq ang luí taí é nghut ri. ²² Haù mù, Yhang, shí é mai lhoq dui toq huí é hkûn sheq, Yhâng é chángzô pé gi, Yhang haù su ga taí é dang lé myit bun kômù, Chyúmdang lé le, Yesuq taí é dang pé lé le, lumjíng akô nghut ri.

²³ Haù Lhoqlhai Poí nghut é u lé, Yerusalem wà mó má Yesuq nyi nyi é hkûn, byù myo myo gi, Yhang kut shit é limik kumhá pé lé myàng kômù, Yhang lé lumjíng bum akô nghut ri. ²⁴ Nghut kôlhang, Yesuq gi, byù lhunglhang bâng é myit lé sê é yanmai, yhangmoq chyáng, Yhânggùng lé a ap to nghut ri. ²⁵ Yhang gi, byu é i-myit unghkaù má haì lúng tô é lé sê é yanmai, byù yhangchang saksé hkám byí é a ra nghut ri.

3

Nikodimu Lé, Yesuq Mhoqshit É Hkyô

¹ Nikodimu gâ é Hparishe rayuq nyi ri; yhang gi, Yudaq byu pé é byìn tú wapdoq má bo é sù nghut ri. ² Yhang gi, myín lé, Yesuq chyáng lé

mù, "Rabai ê, Nàng gi, Garai Gasâng chyáng mai lé é sará rayuq nghut é lé, ngamoq sê lhê. Hkâsu mù gâ le, Nàng kut shit é limik kumhá pé gi, Garai Gasâng a lom é nghut jáng, ó yuq le wó kut râ a nghut." ga taí ri.

³ Haù hkûn, Yesuq gi, yhang lé, "Ngò, nàng lé teng za taí kyo lé, ó yuq nghut kôle, dum hku é hui sù za a nghut le gi, Garai Gasâng é mingdán lé wó myâng râ a nghut." ga tâ taí ri.

⁴ Haù jáng, Nikodimu gi, "Ipyat kó bê é byù gi, dum hkû é hkâsu kut wó hui râ lhu? Ínû é unghkaù má dum wàng mù, dum hku é hui râ gi, gè gè yhang wó dut râ a nghut!" ga taí ri.

⁵ Haù hkûn, Yesuq gi, "Ngò, nàng lé teng za taí kyo lé, ó yuq nghut kôle, wuì eq Woi-nyí mai hku kat é hui sù za a nghut le gi, Garai Gasâng é mingdán má wó wàng râ a nghut. ⁶ Gungsho mai hku kat é gi, gungsho nghut ri; Woi-nyí mai hku kat é kúm gi, woi-nyí nghut ri. ⁷ 'Nungmoq gi, dum hku é hui râ lhê' nghû Ngò taí é dang lé, nàng hkâmaù nyí. ⁸ Haù, laì gi, yhang nau é shut ló lhê. Laì lò htê lé nàng wó gyo kôlhang, laì hkâmai lo é eq, hká shut ló é lé, nàng sé râ a nghut; haù Woi-nyí mai hku kat huí é sù, ó yuq nghut kôle, haù eq rajung za nghut lhê." ga tâ taí ri.

⁹ Haù hkûn, Nikodimu gi, "Haù gi, hkâsu wó dut râ lhu?" ga myí ri.

10 Yesuq tũ taĩ é gi, "Nàng gi, Israelaq byu pê é sará rayuq nghut to luĩ nhĩng, haũ hkyô pé lé a sê gyo lhu? 11 Ngò, nang lé teng za taĩ kyo lé, ngamoq gi, ngamoq sê é hkyô lé taĩ mù, ngamoq myang wú bê lé saksé hkâm lhê; nghut kôlhang, nungmoq gi, ngamoq é saksé lé a hap yù kó nghut ri. 12 Ngò gi, nungmoq lé, mingkan eq sêng é hkyô lé taĩ kyô le lhang, a lumjĩng kô é nghut le gi, mauhkũng mingdán eq sêng é hkyô lé taĩ kyô é nghut le gi, hkâsu kut wó lumjĩng kó rã lhu? 13 Mauhkũng mingdán mai gyó lo é sũ, haũ Byu Yhangzo mai lai luĩ, mauhkũng mingdán má ó yuq lhang wó doq ló wú é a nghut. 14 Mosheq gi, yoso má lhangmuĩ lé tu shap tô é su, haũ Byu Yhangzo le tu shap tô é hui ra rã nghut lhê. 15 Haũ mù, haũ Byu Yhangzo lé lumjĩng é yuq hkangmó gi, ahtum abyuq é asak wó yũ rã nghut lhê.

16 Hkâsu mù gã le, Garai Gasang gi, mingkan lé gyai yhang chyitdap é yanmai, Yhang Zo lé lumjĩng é sũ ó yuq nghut kôle, htên byoq é a huĩ e za, ahtum abyuq é asak wó yũ sháng gaq ga, rayuq za é Yhâng é Zote lé byĩ pyám bê nghut ri. 17 Hkâsu mù gã le, Garai Gasang gi, mingkan lé mara byi rã matú, Yhang Zo lé mingkan htoq má nhang kat é a nghut é za, Yhang é yanmai mingkan hkyi yu é hui rã matú sheq nhang kat

é ru nghut lhê. 18 Yhang lé lumjĩng é sũ gi, mara byĩ é hui rã a nghut; nghut kôlhang, Yhang lé a lumjĩng é sũ kúm gi, Garai Gasang é Yhangzo zote lé a lumjĩng é sũ nghut é yanmai, mara byĩ é huĩ to gũ bê nghut ri. 19 Maubó gi, mingkan htoq má lé jé to bê; nghut kôlhang, byu pé kut é hkyô gi, agè ashop hkyô nghut é yanmai, yhangmoq gi, maubó lé chyit rã malaĩ, mauchut lé chyit akô nghut ri; haũ gi, mara byĩ é hui rã hkyô yhang nghut ri. 20 Agè ashop hkyô kut é sũ ó yuq nghut kôle, maubó lé a ngui nghut ri; haũ yuq gi, yhang kut é hkyô lhoq byông htoq kat rã lé gyuq é yanmai, haũ maubó shut lé lô rã a nghut. 21 Nghut kôlhang, haũ tengmán hkyô đông asak dui é sũ ó yuq le, yhumsĩng kut é hkyô gi, Garai Gasang lom é hkyô lé, san za byu-myàng sháng gaq ga, haũ maubó shut lé lo ri." gã ri.

Yesuq Eq Séng Luĩ, Wui-myhup Sará Yohan Saksé Hkâm É Hkyô

22 Hau htàng má, Yesuq gi, Yhâng é chángzô pé eq rahá, Yuda mau shut wang ló mù, haũ má rayoq zo nyi luĩ, wui-myhup hkâm byĩ ri. 23 Haũ u lé, Yohan gi, Salim nàm mã é E-nun gã é jowò má, wui gyai myo joq é yanmai, wui-myhup hkám byĩ nyi ri; byu pé gi, abyit alan lé lò kômù, wui-myhup lé hkâm yu nyi bum akô nghut ri. 24 (Haũ gi, Yohan lé htóng a lhoq

hkyô shî é hkun lhê é hkyô nghut ri.) ²⁵ Haú hkûn, Yohan é chángzô pé ra-am eq Yudaq byù rayuq gi, lhoq san lhoq yúng hking eq séng luí, dang htíng htíng lhúm bum akô nghut ri. ²⁶ Hau htâng, yhangmoq gi, Yohan chyáng lé luí, "Rabai ê, Yodan làng hé hpoq shut nàng eq rahá nyi luí, nàng eq saksé hkám byí é Sû gi, ahkuí, wui-myhup hkám byí nyi é nghut mù, yuq hkangmó gi, Yhâng chyáng e bum akô nghut ri mhai." ga, yhang lé tai akô.

²⁷ Haú eq séng luí, Yohan tû tai é gi, "Byù rayuq gi, mauhkûng mai byí é za a nghut jáng, hai le wó hap yù râ a nghut. ²⁸ 'Ngò gi, Hkrisduq a nghut, Yhang é hí má nhang kat huí é sù za nghut lhê.' nghû, ngò tai é lé, nungmoq yhang saksé nghut bum akô. ²⁹ Myisik wó é sù gi, lusik nghut ri. Lusik lé, láng yap tô é luzúm hpó gi, lusik é htê lé wó gyô é yanmai, gyai yhang gabú nyi ri. Haú sù é gabú hkyô gi, ngá é gabú hkyô nghut mù, ngò má byíng jup nyi bê nghut ri. ³⁰ Yhang gi, kô jat lò ra râ nghut lhê; ngò gi, yom ló ra râ nghut lhê.

³¹ Ahtoq mai lé é Sû gi, lhunglhâng é ahtoq má nghut ri; myigùng htoq mâ é sù kúm gi, myigùng htoq eq sêng é nghut luí, myigùng htoq eq sêng é dông za tai ri; mauhkûng mai lé é Sû gi, lhunglhang é ahtoq má nghut ri. ³² Yhang gi, wó myâng wó gyô é hkyô lé, saksé hkám

kôlhâng, Yhang hkâm é saksé lé, ó yuq le a hap yù kó nghut ri. ³³ Yhâng é saksé lé hap yu é sù kúm gi, haú Garai Gasang gi, tengmán sù nghut ri ga, saksé shit é sù nghut bê. ³⁴ Garai Gasâng eq nhang kat é hui Sû gi, Garai Gasâng é mungdang lé tai ri; hkâsu mù gâ le, Garai Gasang gi, haú Woi-nyí lé, laké a kat e za byí é yanmai nghut ri. ³⁵ Haú Íwa gi, Zo lé chyitdap luí, jung hkangmó lé Yhâng é loq má ap byi bê nghut ri. ³⁶ Haú Zo lé lumjíng é sù ó yuq nghut kôle, ahtum abyuq é asak wó lhê; nghut kôlhâng, haú Zo lé he-ngik pyâm é sù ó yuq nghut kôle, asak haú lé myàng râ a nghut; hkâsu mù gâ le, Garai Gasâng é nhikmo-yo hkyô gi, yhâng chyáng ru joq nyi ri." gâ ri.

4

Yesuq Eq Samariq Myhi Huí É Hkyô

¹ Yesuq gi, Yohan htoq má, chángzo je lhoq myô é eq wui-myhup hkám byí nyi ri gâ é hkyô lé, haú Hparishe pé wó gyô akô nghut ri. ² (Nghut kôlhâng, gè gè ga jáng, Yesuq gi, Yhang wui-myhup hkám byí é a nghut, Yhâng é chángzô pé sheq ru nghut akô.) ³ Haú hkyô lé, Yesuq sé jáng, Yhang gi, Yuda mau mai htoq mù, Galile mau shut dum taú ló bê nghut ri.

⁴ Ahkuí, Yesuq gi, Samariq mau mai sô lai lò râ dut bê nghut ri. ⁵ Haú mù, Yhang gi, Yakup mai yhang zo Yosep lé

byí é maumyí rajapeq chyâng lhùm é, Suhka ga myhîng é, Samariq mau mâ é wà mó ralhùm má lo jé ri. ⁶ Haú má, Yakup é wuìhtung le joq to luí, Yesuq gi, hkyô sô ngú é yanmai, wuìhtung hau é nàm má zung gyó tô ri. Haú u gi, nyí-káng raxe í hkyíng* nghut bê nghut ri.

⁷ Haú hkûn, Samariq myiwe myhí rayuq wuì lé hkam ri; Yesuq gi, yhang lé, "Ngo lé wuì byi shuq laq." ga taí ri. ⁸ (Haú u gi, Yhâng é chángzô pé, zoshuq wuì rà matú wà hkaú shut e byuq kô é ahkyíng nghut ri.)

⁹ Haú Samariq myiwe myhí gi, Yhang lé, "Nàng gi, Yudaq byù rayuq nghut to luí nhîng, ngò Samariq myiwe myhí chyáng, haí mù shuq wuì dúng lhê lhú?" ga taí ri. (Hkâsu mù gâ le, Yudaq byu pé gi, Samariq byu pé eq a zùm yap kó nghut ri.)

¹⁰ Haú hkûn, Yesuq gi, yhang lé, "Nàng gi, haú Garai Gasâng é chyunghuq lé le, nang lé wuì dung sú ó yuq nghut é lé le, sê é nghut le gi, noq mai Yhang lé dúng tôngbán luí, Yhang gi, nang lé asak-wuì byi berâ nghut lhê." ga tû taí ri.

¹¹ Myiwe myhí haú gi, "Yhumsîng ê, Nàng gi, wuì hkâm râ zè haí le a wó, wuìhtung le nik ri; haú asak-wuì lé, Nàng hkâmâ é wó yû râ lhú? ¹² Ngamoq é îwa Yakup gi, ngamoq lé wuìhtung shí

byí to bê nghut lhê; yhang yhang le, yhang zo pé le, yhang rém é dusak pé le, wuìhtung shí mâ é wuì shuq bekô nghut ri; Nàng gi, Yakup htoq je kô lhê lhú?" ga Yhang lé taí ri.

¹³ Yesuq gi, "Wuì shí lé shuq é sú ó yuq le, wuìshit é dum hui râ nghut lhê. ¹⁴ Nghut kôlhâng, Ngò byí é wuì lé shuq é sú ó yuq nghut kôle, wuìshit é hkâ-nhâm a hui lo râ nghut lhê. Ngò byí é wuì haú gi, haú yuq má, ahtum abyuq é asak matú wuìbúm dut râ nghut lhê." ga yhang lé tû taí ri.

¹⁵ Myiwe myhí haú gi, Yhang lé, "Yhumsîng ê, ngò gi, wuì le a shit lo, shí má wuì hkâm le a lé ra lo sháng gaq, wuì haú ngo lé byi laq." ga taí ri.

¹⁶ Haú hkûn, Yesuq gi, "Ló mù, nung làng lé ló wut lò aq." ga, yhang lé taí ri.

¹⁷ Yhang gi, "Ngò, làng a wó." ga taí jáng, Yesuq gi, yhang lé, "Nàng, làng a wó gâ é gi, têng ri. ¹⁸ Hkâsu mù gâ le, nàng gi, yuqgè ngo yuq wó wú bê sú nghut ri; nàng, ahkuí wó tô é yuqgè le nung làng a nghut. Nàng gi, têng é dang taí bê nghut ri." ga taí ri.

¹⁹ Haú hkûn, myiwe myhí haú gi, "Yhumsîng ê, Nàng gi, myiqhtoi rayuq nghut é hkyô lé, ngò wú sé bê. ²⁰ Ngamoq é îchyí îwâ pé gi, bùm shí má noqkuq kô é nghut lhê; nghut kôlhâng, nungmoq Yudaq byu pé gi, Yerusalem wà mó za

* 4:6 Nyí-káng raxe í hkyíng gi, Yudaq byu pé é hkyuq hkyíng nghut ri.

noqkuq jowò nghut lhê ga taí akô nghut ri." ga taí ri.

²¹ Haú hkûn, Yesuq taí é gi, "Myiwe myhí ê, Ngo lé jing aq; bùm shí má le a nghut, Yerusalem wà mó má le a nghut e za, haú Íwa lé noqkuq râ ahkyíng, jé lò nyi bê nghut ri. ²² Nungmoq Samariq byu pé gi, yhumsíng lháng a sê é lé, noqkuq akô; ngamoq kúm gi, ngamoq sê é lé noqkuq lhê; hkâsu mù gâ le, hkyi yù hkyô gi, Yudaq amyû mai lo é nghut lhê.† ²³ Nghut kôhang, haú têng é dông noqkuq é bang gi, woi-nyí mai le, tengmán hkyô mai le, haú Íwa lé noqkuq râ ahkyíng gi, jé lo nyi bê nghut luí, ahkuí lháng jé to bê nghut ri; hkâsu mù gâ le, haú Íwa gi, haú su kut noqkuq é bang lé ô nau ri. ²⁴ Garai Gasang gi, woi-nyí nghut lhê; haú mù, Yhang lé noqkuq é bang gi, woi-nyí mai le, tengmán hkyô mai le, noqkuq ra râ nghut lhê." ga taí ri.

²⁵ Myiwe myhí haú gi, "Hkrisduq gâ é Mesaia jé lé râ nghut é lé gi, ngò sê lhê. Yhang jé lé jáng, nga-nhúng lé banshoq taí sân kyo râ nghut lhê." ga taí ri.

²⁶ Hau htâng, Yesuq gi, "Nàng eq dang nyo nyi é sù ngò gi, haú yuq nghut lhê." ga taí ri.

Haú Chángzô Pé Dum Taú Jé Lo É Hkûn Lhê Hkyô

²⁷ Haú u lé, Yhâng é chángzô pé gi, dum taú jé lo bum akô; yhangmoq gi, Yesuq, myiwe rayuq eq dang nyo nyi é lé lo myàng luí, maú byuq bum akô. Nghut kôhang, "Nàng, haí ô ri lhú?" ga le, "Haí mù Yhang eq dang nyo nyi lhê lhú?" ga le, Yhang lé ó yuq a myi kó nghut ri.

²⁸ Hau htâng, myiwe myhí haú gi, yhâng é wuì yambú lé tô pyâm to luí, wà shut taú wang ló mù, wà byù wuì lé ló taí kyô é gi, ²⁹ "Ngò kut laí lò bê hkyô pé lunglhang lé, taí kyô é byù rayuq lé, lé wú keq! Yhang gi, Hkrisduq nghut lhê abe?" gâ ri. ³⁰ Haú mù, yhangmoq gi, wà mai htoq lé luí, Yesuq chyáng lé lo bum akô nghut ri.

³¹ Haú u lé, Yhâng é chángzô pé gi, Yhang lé, "Rabai ê, zoshuq zo aq." ga chôm taí akô.

³² Haú hkûn, Yhang gi, yhangmoq lé, "Nungmoq a sê é jung zoshuq zo râ Ngò wó lhê." ga tû taí ri.

³³ Haú mù, Yhâng é chángzô pé gi, "Yhang lé, rayuq yuq eq zoshuq lé dé byí é abe?" ga, rayuq eq rayuq taí lhùm bum akô.

³⁴ Haú hkûn, Yesuq taí é gi, "Ngo lé nhang kat Sû ô nau é hkyô lé kut râ eq Yhâng é muzó jizó lé lhoq pán râ hkyô gi, Ngá é zoshuq nghut bê. ³⁵ 'Kyôshu yoq jé râ gi, lhamó myi hkyap râ ashí.' ga, nungmoq lhaq taí lhê a

† 4:22 Bun zo shí má, Yesuq taí nau é gi, hkyi yù hkyô lé, Garai Gasang gi, Yudaq byu pé dông danggidiq byi to é nghut é lé taí nau é nghut ri.

nghut kó lúh? Ngò, nungmoq lé tai kôlé, nungmoq é myoq hpóng luí, haú yò pé má wú kat wú keq! Kyôshi gi, myhíng luí, kyô shu yoq gi, jé to bê nghut ri. ³⁶ Haú kyô hkyó sù eq kyô shu sù gi, rahá wó gabú kó sháng gaq ga, ahkuí lhang, haú kyô shu sù gi, yhang é zuihpau lé myang yù luí, ahtum abyuq é asak é matú, kyôshi shù tsíng to bê nghut ri. ³⁷ Haú su mù, 'Rayuq gi, sân hkyó, góyuq gi, shù yù.' gâ é sanghkyang gi, têng ri. ³⁸ Nungmoq a zui saí tô é jang mâ é shù yù râ matú, nungmoq lé Ngò nhang kat bê nghut lhê. Góbang gi, haú má wum kat zui saí to bê nghut mù, nungmoq gi, haú bang zui saí é akyù lé shu yù bekô nghut ri." gâ ri.

Samariq Byù Myo Myo Lumjíng Kô É Hkyô

³⁹ "Yhang gi, ngò kut lai lò bê hkyô lhunglhang lé, tai kyô ri." ga luí, myiwe myhí haú saksé hkâm é yanmai, haú wâ mâ é Samariq byù myo myo gi, Yesuq lé lumjíng bùm bekô nghut ri. ⁴⁰ Haú mù, Samariq byu pé gi, Yesuq chyáng lé jé kômù, yhangmoq eq nyi râ matú, Yhang lé lung kô é yanmai, Yhang gi, í nyi bo nyi bê nghut ri. ⁴¹ Yhang é dang pé é yanmai, byù myo myo gi, lumjíng bang dut jat lò bekô nghut ri.

⁴² Yhangmoq gi, myiwe myhí haú lé, "Ahkuí, ngamoq lumjíng é gi, nang tai é dang yanmai za a nghut lo; ngamoq yhang wó gyo bê

nghut é htoq agó, shí yuq gi, gè gè yhang, mingkan é hkyi yù Sù nghut é lé, ngamoq sé bê nghut é yanmai nghut lhê." ga chôm tai akô nghut ri.

Mingsuwún Hpó É Yhangzo Lé Lhoq Gê Byi É Hkyô

Mht 8:5-13; Luk 7:1-10

⁴³ Í nyi lai jáng, Yesuq gi, haú mai Galile mau shut htoq e ló bê nghut ri. ⁴⁴ "Myiqhtoi gi, yhumsing é mau má myoqdong a wó wú é nghut lhê." ga, Yesuq yhang saksé hkâm é nghut lhê. ⁴⁵ Yesuq gi, Galile mau má jé é hkûn, Galile byu pé gi, Yhang lé lhom hku-lum yu akô; yhangmoq gi, Yerusalem và mó má, Lhoqlhai Poí ê lòm kô é nghut é yanmai, poí u lé, Yesuq kut é hkyô lhunglhang lé, myàng kô é bang nghut ri.

⁴⁶ Yesuq gi, Yhang mai haú wui lé tsibiyiq wing dut nhang é, Galile mau mâ é Hkanaq và mó má, ê dum kûm ri. Haú ming suwún rayuq é yhangzo yuqzo gi, Kaperna-um và má no nyi ri. ⁴⁷ Yesuq gi, Yuda mau mai Galile mau má jé lé bê gâ é hkyô lé, ming suwún haú wó gyo jáng, yhang gi, Yesuq chyáng ê mù, shî-nò no nyi é yhangzo lé, lé lhoq gê byi râ matú, Yhang lé dúng tôngbán ri.

⁴⁸ Haú hkûn, Yesuq gi, yhang lé, "Byù nungmoq gi, limik kumlhá pé eq mauhpo muzó pé lé za a myàng kô é nghut le gi, hkâ-nhám lé lumjíng kó râ a nghut." ga tai ri.

49 Mingsuwún haû gi, "Yhumsing ê, ngá zo a shî shimá gyó lé laq." ga taî ri.

50 Haú hkûn, Yesuq gi, "Nàng wó lô bê; nung zo byùn râ nghut lê." ga tû taî ri.

Suwún haû gi, Yesuq taî é dang haû lé gyô jing lui, tau lô bê nghut ri. 51 Yhang gi, hkyô má ru nghut nyi ashî hkûn, yhâng é dui-nhâng zoshâng wui gi, yhang lé lé hui lui, zoshâng haû gè byuq é hkyô, lé taî kyô akô nghut ri. 52 Yhang gi, yhang zo hkâ-nhám gè byuq é ahkying lé myi wú é hkûn, yhangmoq gi, "A-nyí nap nyí hkyuí rahkying má, gùng nyé é chám lô byuq bê nghut ri." ga taî kyô akô.

53 Haú hkûn, ahkying haû gi, "Nung zo byùn râ nghut lê." ga, yhang lé, Yesuq taî é ahkying nghut é lé, haû yhângwa bûn sé bê nghut ri. Haû mù, yhang eq yhâng yhumbyù banshoq bang gi, lumjing bekô nghut ri.

54 Haû gi, Yesuq, Yuda mau mai Galile mau má lé jé é htâng, í dâm nghû râ dá kut shit é limik kumlhá nghut ri.

5

Wuhtum Yàm Má, Nòhpyo Lhoq Gê Byí É Hkyô

1 Hau htâng a myáng má, Yudaq byu pé é poi ralhúm joq é yanmai, Yesuq gi, Yerusalem wà mó má doq lô ri. 2 Ahkuí, haû Yerusalem wà mó é Sau Hkúmdong nàm má, Hebre mying đông

gi, Betzahta ga myhîng é wuhtum ralhúm joq ri; hau é lînhgkyuq má, jìrop ngo lhum joq tô ri. 3 Jìrop haú pé má, myoqjit bang, hkyî hten bang, gùngjum shî bang ajùm ayò leq tô bum akô. (Haú bang gi, wui dui nún râ lé láng tô é bang nghut akô. 4 Hkâsu mù gâ le, haû Yhumsing é maumang lagyo gyó lé lé kut mù, wui lé, lé lhu nhún jáng, wuhtum haú má hí wó wang é sù gi, haí jung ana wa dap to kôlhâng, ge byuq é hui é yanmai nghut ri.)* 5 Súm xe shit zân tup no nyi é byù rayuq le, haú má bo tô ri. 6 Yesuq gi, haú yuq no leq tô é lé myáng mù, haú su no nyi é gyai myáng bê nghut é hkyô lé sé jáng, yhang lé, "Nàng, gè nau ri lú?" ga myí ri.

7 Nò sù haú yuq gi, "Yhumsing ê, wui dui nún lo é hkûn, wuhtum má wàng râ matú, ngo lé garúm râ byù ó a nyi; ngò wàng râ nghû jáng, góyuq hí, ngá hí má wàng wàng dut ri." ga tû taî ri.

8 Hau htâng, Yesuq gi, yhang lé, "Toq aq! Náng é taphkang yu chùng lui, sô lô aq." ga taî ri. 9 Haú yuq gi, radá dâm nò ge byuq bê nghut lui, yhâng é taphkang yù mù, sô lô bê nghut ri.

Haú nyí gi, Bánno buinyì nghut ri. 10 Haú mù, Yudaq byu pé gi, haû nò ge byuq é hui sù lé, "Hkû-nyí gi, Bánno buinyì nyí nghut é yanmai,

* 5:4 Bun zo 3 lhum má é ahtang túm eq bun zo 4 lhum gi, chyúmding myo myo má a bo é nghut lê.

nàng, taphkang waq é gi, tarâ lu lai bê nghut ri." ga tâi akô.

¹¹ Nghut kôlhang, yhang tâi é gi, "Haû ngo lé lhoq gê byi sù gi, ngo lé, 'Náng é taphkang yu chûng mù, sô lô aq.' ga tâi é nghut lhê." gâ ri.

¹² Haû mù, yhangmoq gi, "'Náng é taphkang yu chûng mù sô lô aq.' ga, nang lé tâi é sù gi, ó yuq wá nghut ri lhu?" ga myí akô.

¹³ Nghut kôlhang, haû ó yuq nghut é lé, nõ ge byuq é hui sù gi, a châng sê kat nghut ri; hkâsu mù gâ le, Yesuq gi, haû mâ é byù moq mó má wang nyó lô byuq é yanmai nghut ri.

¹⁴ Htâng má, Yesuq gi, haû yuq lé noqkuq yhûm má myàng jáng, "Wú aq, nàng wángzán bê nghut ri; hí lhê htoq má je wuîhke é hkyô a hui zo sháng gaq, mara hkâkut shut lo." ga luí, yhang lé tâi ri. ¹⁵ Haû yuq gi, htoq lô mù, yhang lé lhoq gê byi é sù gi, Yesuq nghut ri ga, Yudaq byu pé lé tâi kyô ri.

Asak Wó Yû Râ Hkyô

¹⁶ Haû mù, Yudaq byu pé gi, Bánno buinyi nyí má, Yesuq, haû hkyô kut é yanmai, Yhang lé gunjang lo akô nghut ri. ¹⁷ Haû hkûn, Yesuq gi, yhangmoq lé, "Ngá Wa gi, hkû-nyí jé shoq, hkâ-nhám le mù zuí nyi é nghut mù, Ngò le mù zuí nyi lhê." ga tâi ri.

¹⁸ Haû mù luí, Yesuq gi, Bánno buinyi lé lhoq htên é htoq agó, Garai Gasang lé lhang, Yhâng Wa ga wut é đông, yhumsing gùng lé, Garai Gasang eq lhoq

whuí é yanmai, Yudaq byu pé gi, Yhang lé sat pyám râ matú, je riyhang shikut lo akô nghut ri.

¹⁹ Yesuq, yhangmoq lé tâi é gi, "Ngò, nungmoq lé teng za tái kôlé, haû Zo gi, yhumsing é myit đông haî le a wó kut; Yhâng Wa kut é hkyô lé myang é gù za wó kut é nghut lhê; hkâsu mù gâ le, haû Íwa kut é hkyô lé za, haû Zo châng kut é yanmai nghut lhê. ²⁰ Hkâsu mù gâ le, haû Íwa gi, Zo lé chyitdap é nghut luí, Yhang kut é hkyô lhunglhang, haû Zo lé tân shit ri; nungmoq maú hông shoq, shí pé htoq je ko é hkyô pé lé lhang, haû Zo lé tân shit shirâ nghut lhê. ²¹ Haû Íwa gi, shi bê bang lé lhoq dui toq mù, yhangmoq lé asak byi é eq rajung za, haû Zo le, Yhang byi nau é bang lé, asak byi râ nghut lhê. ²² Hau htoq agó, haû Íwa lé hkunggâ é eq rajung za, haû Zo lé le, lhunglhang bang hkungga kó sháng gaq ga, haû Íwa gi, ó yuq lé le a jéyáng e za, jéyáng é hkyô lhunglhang, haû Zo lé lum to bê nghut ri. ²³ Haû Zo lé a hkunggâ é sù gi, haû Yhang lé nhang kat é sù Íwa lé le, a hkunggâ é sù nghut ri.

²⁴ Ngò, nungmoq lé teng za tái kôlé, Ngá dang lé gyo luí, Ngo lé nhang kat é Sù lé lumjíng é sù, ó yuq nghut kôle, mara byi é a hui e za, ah-tum abyuq é asak wó é nghut lhê; haû yuq gi, shi é mai lut luí, asak dui bê sù nghut ri.

²⁵ Ngò, nungmoq lé teng za taí kôlé, haú Garai Gasâng é Yhangzò é htê lé, shi byuq bê bang wó gyo râ ahkyíng gi, jé lo nyi bê nghut ri; ahkuí lháng jé to bê nghut ri. Htê haú lé gyô é bang gi, asak duì kó râ nghut lhê. ²⁶ Hkâsu mù gâ le, Garai Gasang gi, Yhânggùng má yhang, asak bo é eq rajung za, Yhang Zo lé le, Yhânggùng má yhang, asak bò nhang é yanmai nghut ri. ²⁷ Hau htoq agó, Yhang gi, haú Byu Yhangzo nghut é yanmai, Garai Gasang gi, tarâ jéyáng râ ahko ahkáng, Yhang lé byi bê nghut ri.

²⁸ Shí hkyô lé hkâ-maú hong nyi kó: lup pé má lúng tô é bang banshoq gi, Yhâng é htê lé wó gyo kôluí, htoq lô râ ahkyíng jé lò râ nghut lhê. ²⁹ Ge é hkyô kut é bang gi, asak duì râ matú, duì toq kó râ nghut lhê; agè ashop hkyô kut é bang gi, mara byí é hui zo râ matú, duì toq kó râ nghut lhê. ³⁰ Ngò gi, Ngá myit dông mai haí le a wó kut é nghut lhê; Ngò wó gyô yu é eq rajung za sheq, jéyáng é nghut luí, Ngò jéyáng é hkyô gi, tengmán lhê; hkâsu mù gâ le, Ngò gi, Ngò ô nau é dông châng é a nghut e za, Ngo lé nhang kat é Sû ô nau é dông châng é sheq ru nghut lhê.

Yesuq Eq Séng Luí, Saksé Hkâm É Hkyô

³¹ Ngá gùng lé ngò saksé hkâm é nghut jáng, ngò za saksé hkâm é hkyô gi, teng

râ a nghut. ³² Ngá é hkyô lé saksé hkâm byí é Sû (Ngá Wa) góyuq nyi lhê; Ngò eq séng luí, haú yuq hkâm é saksé gi, teng é hkyô lé, Ngò sê lhê.

³³ Nungmoq gi, Yohan† chyáng byù nhang kat wú bekô nghut ri; yhang gi, haú tengmán hkyô lé saksé hkâm byi bê nghut lhê. ³⁴ Ngò gi, xângzo byu pé mai saksé hkâm byi râ lé, ra luí a nghut, nghut kôlháng, nungmoq hkyi yu é wó hui râ matú sheq, haú su nghu taí é ru nghut lhê. ³⁵ Yohan gi, duq nyi é myibung su duqbó byí é nghut mù luí, nungmoq gi, haú duqbó é hkaú má, rayoq zo ngón nau nyi akô nghut ri.

³⁶ Nghut kôlháng, Ngò wó é saksé gi, Yohan byí é saksé htoq je kô lhê; hkâsu mù gâ le, ahkuí Ngò zui saí nyi é muzó gi, Ngò lhoq pán râ matú, haú Íwa, Ngo lé ap byí tô é nghut luí, haú Íwa, Ngo lé nhang kat é hkyô lé, saksé hkâm byí nyi ri. ³⁷ Hau htoq agó, haú Ngo lé nhang kat é sù Íwa le, Ngò eq séng luí saksé hkâm byí ri; nungmoq gi, Yhâng é htê lé le, a wó gyô wú kó; Yhâng é gungghyâng lé le, a myang wú kó; ³⁸ haú Yhâng é mungdang le, nungmoq chyáng a bò kó nghut ri; hkâsu mù gâ le, nungmoq gi, Yhang nhang kat é Sû lé a lumjíng kô é yanmai nghut ri. ³⁹ Nungmoq gi, haú Chyúmdang mai ah-tum abyuq é asak wó yû râ nghut lhê ga myit yù kô é

† 5:33 Yohan shí yuq gi, Wui-myhup Sará Yohan nghut lhê.

yanmai, haù Chyúmdang má ho wú akô nghut ri; nghut kôlhang, Chyúmdang haù gi, Ngò eq séng luí saksé hkám byí ri; ⁴⁰ nghut kôlhang, asak wó yú râ matú, nungmoq gi, Ngá chyáng a kâm lé kó nghut ri.

⁴¹ Ngò gi, byu eq hkya-ôn é lé a lhom yu é nghut lhê. ⁴² Nghut kôlhang, nungmoq lé gi, Ngò sê lhê; nungmoq é i-myt hkaù má, Garai Gasang lé chyitdap é myit a bò kó nghut ri. ⁴³ Ngò gi, Ngá Wâ é myìng mai jé lé é sù nghut kôlhang, nungmoq gi, Ngo lé a lhom hap yù kó; yhâng myìng yhang lang é byù, gotú rayuq jé lé é ru nghut le gi, haù yuq lé, nungmoq lhom hap yù kó râ nghut lhê. ⁴⁴ Nungmoq gi, rayuq eq rayuq hkya-ôn lhùm é lé za hap yù luí, rayuq za nghut é Garai Gasâng chyáng mai lo é hkya-ôn hkyô lé gi, a hô kô é bang nhîng, hkâsu kut wó lumjîng kó râ lúhú?

⁴⁵ Nghut kôlhang, haù Íwâ é hí má, Ngò, nungmoq lé mara hùn nhô hkâ-ngâm kó; nungmoq lé mara hun é sù gi, haù nungmoq mai myit myoqbyu tô é Mosheq ru nghut lhê. ⁴⁶ Mosheq lé nungmoq gè gè yhang lumjîng kô é ru nghut le gi, Ngo lé le lumjîng kó râ nghut lhê; hkâsu mù gâ le, Mosheq gi, Ngá é hkyô lé kê tô é sù nghut ri. ⁴⁷ Nghut kôlhang, nungmoq gi, yhang kê tô é pé lé lhang a lumjîng kô é nhîng, Ngá dang lé, hkâsu

kut wó lumjîng kó râ lúhú?" gâ ri.

6

*Byù Ngo Hkyîng Lé Zoshuq
Byi Tsô É Hkyô
Mht 14:13-21; Mrk 6:30-44; Luk 9:10-17*

¹ Hau htâng a myáng má, Yesuq gi, Tiberi nhông le gâ é, Galile nhông he hpoq shut gû dap ló bê nghut ri. ² Haù hkûn, byù ajùm ayò gi, haù nò bâng htoq má, Yhang kut shit é limik kumlhá pé lé myàng kô é yanmai, Yhang htâng châng e ló bum akô nghut ri. ³ Yesuq gi, bùm shut doq ló mù, Yhâng é chángzô pé eq rahá zung tô ri. ⁴ Yudaq byu pé é Lhoqlhai Poí gi, chyâng lo nyì bê nghut ri.

⁵ Yesuq gi, tu wú kat le, byù ajùm ayò Yhâng shut lé lo bùm kô é lé byu-myang kat luí, Hpilip lé, "Shí bang zo râ muk, nga-nhúng, hkâmá ê wó wuí râ lúhú?" ga tâi ri. ⁶ Yesuq, haù su ga tâi é gi, yhang lé chyam wú râ matú za nghut ri; hkâsu mù gâ le, hkâsu kut râ hkyô gi, Yhâng é myit má bo to gù bê nghut ri.

⁷ Hpilip gi, Yhang lé, "Denari* í sho eq muk wui le lhang, rayuq ratsuí tsuí ngap râ a nghut." ga tù tâi ri.

⁸ Haù hkûn, Yhâng é chángzo nghut é, Simun Petruq é yhanggu Andre gi, Yhang lé, ⁹ "Muk-yo muk ngo long eq ngozo í du wó é yuqgè zo rayuq, shî má nyì ri; nghut

* 6:7 Denari rachap gi, byù rayuq é ra-nyí é zuihpau eq wuí é nghut lhê.

kôlhang, byù shî myhông bang lé luq shoq, hkâsu kut wó gâm byi râ lú?" ga taí htoq kat ri.

¹⁰ Yesuq gi, "Haú shiwa byu pé lé, zùng nhâng keq." ga taí ri. Jowò haú gi, mhán htu é jang nghut mù, yuqgè wui baú lhang, ngo hkying kô zung tô bùm bekô nghut ri; ¹¹ hau htang, Yesuq gi, muk long pé lé yù mù, jeju hkya-on lú, zung tô é bang lé, yhangmoq o é myhông tsing gâm byi ri. Haú eq rajung za, ngozo lé le haú su kut ri.

¹² Yhangmoq banshoq bang zô gyi bùm kô é htang má Yhang gi, Yhâng é chángzô pé lé, "Myit gyó tô é ajap azo pé lé châng guq tsing yù keq. Haí le a langsá pyám shang gaq." ga taí ri. ¹³ Haú mù, yhangmoq gi, zô myhit tô é muk-yo muk ngo long mâ é ajap azo pé lé châng guq tsing le, raxe í mung bying shoq wó guq tsing yu akô nghut ri.

¹⁴ Haú shiwa byu pé gi, Yesuq kut é limik kumlhá lé myàng kô é hkún, "Shí yuq gi, mingkan htoq má jé lé lô râ gâ é, Myiqhtoi yang nghut ri-nhung!" ga taí bum akô. ¹⁵ Yesuq gi, yhangmoq lé mù, Yhang lé hkohkâm zik kut nhâng kô râ dâ é hkyô lé, sê é yanmai, Yhang baú tsik za bùm shut dum haq doq lô bê nghut ri.

Yesuq, Wui Htoq Má Sô É Hkyô

Mht 14:22-27; Mrk 6:45-52

¹⁶ Buigyum htang, Yhâng é chángzô pé gi, haú nhông shut gyó lô mù, ¹⁷ lhai má

wang ji lú, nhông hé hpoq má é Kaperna-um wà shut gú e ló akô; haú hkún, mauchut bê nghut kôlhang, Yesuq gi, yhangmoq chyáng a jé gyó lo shi nghut ri. ¹⁸ Haú u lé, laidun htan lo é yanmai, wuilhêng toq lô bê nghut ri. ¹⁹ Yhangmoq gi, sum myi déng kô lhai kôn e ló kô é hkún, Yesuq gi, nhông htoq má so lú, haú lhai shut chyáng lé lo nyi é lé myàng kômù, gyuq dan bùm bekô nghut ri. ²⁰ Nghut kôlhang, Yesuq gi, "Hkâgyuq kó, Ngò ru nghut lhai." ga yhangmoq lé taí ri. ²¹ Haú mù, yhangmoq gi, Yesuq lé gabú myit eq lhai hkaú má shui hâng yù nau akô. Haú hkún, lhai haú gi, radá dâm yhangmoq jé nau é jang wuiyàm má jé bê nghut ri.

²² Nhông hé hpoq má nyi tô é byù moq mó gi, haú má lhai racham za joq lai lo é hkyô eq, lhai haú má Yesuq a bo doq jì e za, chángzô pé baú ji htoq lô kô é hkyô lé, hau htang nyi, bôn sê kat akô nghut ri. ²³ Haú hkún, haú Yhumsing, jeju hkya-on é htang, byu pé muk zô é jowò nàm má, Tiberi myuq má é lhai pé jé lé bum ri. ²⁴ Haú byù moq mó gi, Yesuq eq Yhâng é chángzô pé, haú má a nyi lo kô é hkyô lé sé kô é yanmai, Yesuq lé châng hô râ matú lhai haú pé má wang ji mù, Kaperna-um wà shut e ló akô nghut ri.

Yesuq, Asak Muk Nghut É Hkyô

25 Yhangmoq gi, không hé hpoq má Yesuq lé myàng kôjáng, "Rabai ê, Nàng gi, shí má hkâ-nhám jé lé é lú?" ga, Yhang lé myí akô.

26 Haú hkûn, Yesuq gi, "Ngò, nungmoq lé teng za tái kôlé, nungmoq gi, limik kumlhá pé lé myàng kô é yanmai, Ngo lé hô kô é a nghut, muk gyi shoq myàng zo kô é yanmai sheq, hô kô é ru nghut lhê. 27 Htên byuq sê é zoshuq é matú, hkâshikut kó; haú Byu Yhangzo byi rã nghut é ahtum abyuq é asak é matú, ru gîng nyi é zoshuq wó yû rã lé sheq shikut nyi keq. Yhâng chyáng gi, haú Íwa Garai Gasang mai Yhâng é saksé dizik tap to bê nghut lhê." ga tũ tái ri.

28 Haú mù, yhangmoq gi, "Garai Gasang ô nau é muzó pé zui saí rã matú, ngamoq haí kut ra rã lú?" ga Yhang lé myí akô.

29 Haú hkûn, Yesuq gi, "Garai Gasang nhang kat é Sũ lé, lumjîng é gi, Garai Gasang ô nau é muzó nghut bê." ga tũ tái ri.

30 Haú mù lú, yhangmoq gi, Yhang lé, "Ngamoq myoq eq wó myâng lú, Nàng lé lumjîng rã matú, Nàng, haí jung limik kumlhá kut shit rã lú? Nàng, haí jung kut shit rã lú? 31 Haú Chyúmdang má, Yhang gi, yhangmoq zo rã matú, mauhkûng mai muk byí ri. ✧ ga kã tô é eq rajung za, ngamoq é íchí íwa pé gi, haú yoso hkaú má mannaq

muk zo bekô nghut lhê." ga tái akô.

32 Haú hkûn, Yesuq gi, yhangmoq lé, "Ngò, nungmoq lé teng za tái kôlé, nungmoq lé mauhkûng mai muk byí é Sũ gi, Mosheq a nghut, haú Ngá Wa sheq, nungmoq lé mauhkûng mai tengmán é muk byí é Sũ ru nghut lhê. 33 Hkâsu mù gã le, Garai Gasang byí é muk gi, mauhkûng mai gyó lé lú, haú mingkan lé asak byí é Sũ nghut lhê." ga tái ri.

34 Yhangmoq gi, "Yhumsîng ê, ahkuí mai, ngamoq lé muk haú hkâ-nhám le byí nyi laq." ga chôm tái bum akô.

35 Haú mù, Yesuq tái kyô é gi, "Ngò gi, asak muk nghut lhê. Ngá chyáng lé é sũ gi, hkâ-nhám le zòmut é hui rã a nghut; Ngo lé lumjîng é sũ le, hkâ-nhám le wuìshit é hui rã a nghut. 36 Nghut kôlhang, Ngò, nungmoq lé tái wú bê eq rajung za, nungmoq gi, Ngo lé myang wú é nghut kôlhang, a lumjîng shi kó nghut ri. 37 Haú Íwa mai Ngo lé ap byí tô é byù lhunglhang bang gi, Ngá chyáng lé kó rã nghut lú, Ngá chyáng lé é sũ ó yuq lé le, Ngò gi, hkâ-nhám lé hkat htoq pyám rã a nghut. 38 Hkâsu mù gã le, Ngò, mauhkûng mai gyó lé é gi, Ngò ô nau é hkyô lé kut rã matú a nghut e za, Ngo lé nhang kat Sũ ô nau é hkyô lé kut rã matú ru nghut lhê. 39 Haú Ngo lé nhang kat Sũ ô nau é hkyô gi, Yhang mai Ngo lé ap byí tô é bang mã é rayuq

lé lhang, Ngò, a lhoq hpyuq pyâm e za, jìhtùm buinyì má yhangmoq lé dum lhoq dui toq yû râ matú ru nghut lhê. ⁴⁰ Hkâsu mù gâ le, Ngá Wa ô nau é hkyô gi, haû Zo lé wú mù, Yhang lé lumjìng é sù yuq hkangmó, ahtum abyuq é asak lé wó yû râ matú nghut lhê; Ngò le, jìhtùm buinyì má haú bang lé lhoq dui toq râ nghut lhê." gâ ri.

⁴¹ Haû mù, "Ngò gi, mauhkûng mai gyó lé é muk nghut lhê." ga, Yesuq taí é yanmai, Yhang eq séng luí, Yudaq byu pé taí put kô é gi, ⁴² "Shí yuq gi, Yosep é yhangzo Yesuq a nghut lhi? Yhâng nu Yhâng wa lé, nganhúng sê lhê a nghut kó lú? Haû sù é nhîng, ahkuí, 'Ngò gi, mauhkûng mai gyó lé é nghut lhê.' ga, Yhang hkâsu kut wó taí lhê lú?" gâ bum akô.

⁴³ Haú hkûn, Yesuq gi, "Nungmoq ahkaû má hkâtaí put nyì kó. ⁴⁴ Haû Ngo lé nhang kat é sù Íwa mai shuí jé é sù za a nghut jáng, ó yuq le Ngá chyáng wó jé lé râ a nghut; jé lé é sù lé gi, jìhtùm buinyì má, Ngò lhoq dui toq râ nghut lhê. ⁴⁵ Myiqhtoi laiká pé má, 'Yhangmoq lhunglhang bang gi, Garai Gasâng eq mhoq byí é hui kó râ nghut lhê.'^{*} ga kâ tô é eq rajung za, haû Íwâ chyáng mai gyo yù, mhoq yu é bang yuq hkangmó gi, Ngá chyáng lé kó râ nghut lhê. ⁴⁶ Haû gi, rayuq yuq mai, haû Íwâ lé myang wú bê nghú

nau é a nghut; Garai Gasâng chyáng má é Sù za sheq, haû Íwâ lé myang wú é Sù nghut lhê. ⁴⁷ Ngò, nungmoq lé teng za taí kôlé, lumjìng é sù gi, ahtum abyuq é asak wó lhê. ⁴⁸ Ngò gi, asak muk nghut lhê. ⁴⁹ Nungmoq é íchyí íwâ pé gi, haû yoso hkaû má mannaq muk zo bekô nghut lhê; nghut kôle, shi byuq bekô nghut ri. ⁵⁰ Nghut kôlhang, shí gi, mauhkûng mai gyó lé lo é muk nghut lhê; haû lé zô é sù gi, a shí lo râ nghut lhê. ⁵¹ Ngò gi, mauhkûng mai gyó lé lo é, haû asak dui é muk nghut lhê; rayuq yuq, muk shí lé zô é nghut le gi, ahtum abyuq dui nyì râ nghut lhê; muk shí gi, mingkan zô wui é asak matú, Ngò byi râ nghut é Ngá gungsho nghut lhê." ga tû taí ri.

⁵² Haû mù, haû Yudaq byu pé gi, "Byù shí yuq gi, nganhúng lé, Yhâng é gungsho hkâsu kut wó byi tso râ lú?" ga, yhangmoq yhangchang dang htíng htíng lhúm bum akô.

⁵³ Haú hkûn, Yesuq gi, yhangmoq lé, "Ngò, nungmoq lé teng za taí kôlé, haû Byu Yhangzô é gungsho lé zô é eq Yhâng é sui lé shuq e za a nghut le gi, nungmoq asak wó kó râ a nghut. ⁵⁴ Ngá é gungsho lé zô é eq Ngá é sui lé shuq é sù, ó yuq nghut kôle, ahtum abyuq é asak wó é nghut lhê; Ngò gi, jìhtùm buinyì má, haû yuq lé lhoq dui toq yû râ

nghut lê. ⁵⁵ Hkâsu mù gâ le, Ngá é gungsho gi, zojung yhang nghut lê; Ngá é sui gi, shuqjung yhang nghut lê. ⁵⁶ Ngá é gungsho lé zô é eq Ngá é sui shuq é sù, ó yuq nghut kôle, Ngò má nghut nyî luî, Ngò le haú yuq má nghut nyî bê nghut lê. ⁵⁷ Haú rû dui nyi é Íwa gi, Ngo lé nhang kat luî, Ngò gi, haú Íwâ é yanmai, dui nyi é eq rajung za, Ngá é gungsho lé zô é sù gi, Ngá é yanmai, dui nyi râ nghut lê. ⁵⁸ Shî gi, mauhkûng mai gyó lé lo é muk nghut lê. Nungmoq é îchyí íwâ pé gi, mannaq muk zo kôle, shi byuq bekô nghut ri; nghut kôlhang, muk shî lé zô é sù gi, ahtum abyuq dui nyi râ nghut lê." ga taí ri. ⁵⁹ Dang haú pé gi, Yesuq, Kaperna-um wà mâ é tarajong má mhoqshit nyi é u lé, taí é dang nghut ri.

Chángzô Pé Myo Myo, Yesuq Lé Kâng Pyâm To Kô É Hkyô

⁶⁰ Yhâng é chángzô pé myo myo gi, haú lé wó gyo kôjáng, "Dang shî gi, gyai wuî ri. Ó yuq wá wó cháng râ lú?" ga taí bum akô.

⁶¹ Yesuq gi, haú eq séng luî, Yhâng é chángzô pé taí put nyi bùm kô é lé Yhâng é myit má sé luî, yhangmoq lé, "Dang shi é yanmai, nungmoq myit htên bum akô lú?" ⁶² Haú Byu Yhangzo gi, Yhang nyi laí lò bê jowò shut taú doq lò é lé, nungmoq myàng kô é nghut le gi, hkâsu nghû kó

râ lú? ⁶³ Haú Woi-nyí gi, asak byí lê; gungsho kúm gi, haí le a wó dut nghut ri. Nungmoq lé, Ngò taí é dang pé gi, Woi-nyí le nghut lê, asak le nghut lê. ⁶⁴ Nghut kôle, nungmoq chyáng má é ra-am gi, a lumjúng kó nghut ri." ga taí ri. Hkâsu mù gâ le, ô pé gi, a lumjúng kó râ eq, ó yuq gi, Yhang lé ap pyám râ nghut é hkyô lé, Yesuq gi, sâng-hi mai sê to gù bê nghut ri. ⁶⁵ Yhang xoq taí é gi, "Haú su mù, haú Íwâ èq ahkáng byí é sù za a nghut le gi, ó yuq le Ngá chyáng wó lé râ a nghut nghû, Ngò, nungmoq lé taí kyo wú bê nghut lê." gâ ri.

⁶⁶ Haú dàm mai, Yhâng é chángzô pé myo myo gi, Yhâng htâng a cháng lo kô e za, taú lò byuq bùm bekô nghut ri.

⁶⁷ Haú su mù, Yesuq gi, haú chángzo raxe í yuq lé, "Nungmoq le, lò byuq nau akô, a nghut lú?" ga myí ri.

⁶⁸ Haú hkûn, Simun Petruq gi, "Yhumsîng ê, Nàng gi, ahtum abyuq é asak mungdang wó Sù nghut to bê lé nhîng, ngamoq gi, ó yuq chyáng ê shirâ lú?" ⁶⁹ Nàng gi, Garai Gasâng é Chyoiyúng Sù nghut é lé, ngamoq, lumjúng lê, sê nyi lê." ga, Yhang lé tû taí ri.

⁷⁰ Haú hkûn, Yesuq gi, "Nungmoq raxe í yuq lé, Ngò hkyin yù bê a nghut kó lú? Nghut kôle, nungmoq má é rayuq gi, nat nghut ri." ga tû taí ri. ⁷¹ (Yhang gi, haú Simun Iskarut é yhangzo, Yudaq lé taí nau é nghut ri; haú yuq gi,

chángzo raxe í yuq má bò sù
nghut kôle, htâng má, Yhang
lé ap pyám rà sù nghut ri.)

7

*Yesuq Eq Yhâng É Gumang
Wuì*

¹ Hau htâng má, Yesuq gi,
Yhang lé sat rà matú, Yu-
daq byu pé ho nyi bùm kô
é yanmai, Yuda mau má a
kâm sô wún mù, Galile mau
má sô lhing wún ri. ² Nghut
kôlhang, haù Yudaq byu pé é
Saksé Zúm Poì chyâng lo nyi
é hkùn, ³ Yesuq é yhanggu
yuqzô pé gi, Yhang lé, "Náng
é chángzô pé gi, Nàng kut é
laklaí kumlhá pé lé myàng kó
sháng gaq, Nàng, shí mai htoq
ló luí, Yuda mau shut e ló aq.
⁴ Myìng hu nau é sù gi, hkaù
zaù luí haì le a kut wú é nghut
lhê. Nàng gi, haù pé lé kut nyí
bê nghut é yanmai, mingkan
lé, Náng gung tân shit aq." ga
taí akô. ⁵ Hkâsu mù gâ le,
yhanggu sîng yuqzô pé lhang,
Yhang lé a lumjîng kó nghut
ri.

⁶ Haù mù luí, Yesuq gi,
yhangmoq lé, "Ngá é ahkyíng
gi, a jé shí nghut ri; nungmoq
é ahkyíng kúm gi, hká hkùn
le joq nyi ri. ⁷ Haù mingkan
gi, nungmoq lé a jú a wó kut
kó nghut ri; nghut kôlhang,
Ngo lé gi, a jú kó; haì mù
gâ le, yhang kut é hkyô gi,
agè ashop é nghut é lé, Ngo,
saksé tân shit é yanmai nghut
ri. ⁸ Nungmoq gi, poì haù
shut doq ló keq. Ngò kúm gi,
Ngá é ahkyíng a jé shí nghut
é yanmai, poì haù shut a doq

ló shirâ nghut lhê." ga taí ri.
⁹ Haù su ga taí luí, Yhang gi,
Galile mau má nyi gyó to bê
nghut ri.

¹⁰ Nghut kôlhang, Yhang gu
pé, haù poì shut doq ló byuq
é htâng má, Yhang gi, de de
a nghut é dông, tsik za châng
doq ló bê nghut ri. ¹¹ Yudaq
byu pé gi, haù poì má, Yhang
lé châng hô kômù, "Haù yuq
gi, hkâmá nghut lhê lúhú?" ga,
myi wún akô nghut ri.

¹² Haù byù hpûng hkaù
má, Yhang eq séng luí taí
lhùm bùm kô é má, ra-am gi,
"Yhang gi, byù gè nghut ri." ga
taí kôjáng, ra-am gi, "A nghut,
Yhang gi, byu pé lé hkyô shuí
nghoq sù nghut ri." ga tû taí
akô. ¹³ Nghut kôlhang, haù
Yudaq suwún wuì lé gyuq kô
é yanmai, ó yuq le, Yhang eq
sêng é hkyô lé de de a wám taí
kó nghut ri.

*Haù Poì Má, Yesuq Mho-
qshit É Hkyô*

¹⁴ Haù poì rawuí nghut ló é
hkùn, Yesuq gi, noqkuq yhùm
má doq é luí, mhoqshit hi ló
bê nghut ri. ¹⁵ Haù hkùn, Yu-
daq byu pé gi, gyô maù byuq
kômù, "Shí yuq gi, mhoq yu é
hkyô le a joq wú é wá, haù-í
hkâsu mù sê lhê laq?" ga myi
bum akô.

¹⁶ Haù mù, Yesuq tû taí é gi,
"Ngò mhoqshit é dang gi, Ngá
é dang a nghut; Ngo lé nhang
kat Su é dang ru nghut lhê.
¹⁷ Rayuq yuq, Garai Gasang ô
nau é hkyô lé châng kut nau
é nghut jáng, Ngò mhoqshit é
dang gi, Garai Gasâng chyáng
mâ é nghut a nghut é eq, Ngá

é myit đông taí é dang nghut a nghut é lé, yhang sê gãm hkoq yû râ nghut lê. ¹⁸ Yhumsing é myit đông taí é sủ gi, yhumsing é matú aróng hô sủ nghut ri; nghut kôlhang, yhumsing lé nhang kat su é matú, aróng ho é sủ gi, tengmán é byû nghut ri; yhang má, a tengmán é hkyô haí le a bò nghut ri. ¹⁹ Mosheq gi, nungmoq lé jep é tarâ byí to bê, a nghut kó lú? Nghut kôlhang, nungmoq ó yuq le, jep é tarâ haú lé a cháng kó nghut ri. Haí mù luí, Ngo lé sat nau nyi akô lú?" gâ ri.

²⁰ Haú hkûn, haú byù hpûng gi, "Nàng gi, nat gang wang to sủ nghut ri-nhung! Nang lé, ó yuq wá sat nau nyi ri lú?" ga tû taí akô.

²¹ Yesuq gi, yhangmoq lé, "Ngò, laklaí kumlhá ralhum kut jáng, nungmoq banshoq bang gi, maú byuq bum akô.

²² Nghut kôlhang, nungmoq gi, ahpyo-kuq hpyit byí é hkyô lé, Mosheq byí é nghut lê ga luí, Bánno buinyì má, zoshâng lé ahpyo-kuq hpyit byí akô (gè gè ga jáng, ahpyo-kuq hpyit é hkyô gi, Mosheq chyáng mai lo é a nghut e za, íchyí íwá pê chyáng mai lo é ru nghut lê.). ²³ Haú, Mosheq é jep é tarâ lé a lhoq htên pyám sháng gaq nghû, Bánno buinyì má, zoshâng lé ahpyo-kuq hpyit byí é nghut le gi, haí mù luí, Bánno buinyì má, byù rayuq é gùng gón lé, Ngò lhoq gè byí é yanmai, Ngo lé nhikjum yô akô lú? ²⁴ Byù du lé wú luí hkájéyáng kó;

tengmán é đông sheq jéyáng keq." ga taí ri.

Yesuq Gi, Hkrisduq Nghut Lê Lú?

²⁵ Haú mù luí, Yerusalem và mó mã é byu pé ra-am gi, "Haú yhangmoq sat pyám nau nyi é sủ gi, shí yuq a nghut lhi? ²⁶ Yhang gi, shí má de de dáng nyo nyi le, yhangmoq gi, Yhang lé, haí le a ga kó myhi-nhung! Yhang gi, Hkrisduq nghut lê ga, haú ahkáng ayá wó bang gi, gè gè yhang, sê akô abe? ²⁷ Haú Hkrisduq jé lé é hkûn gi, Yhang hkâmai lé lo é lé, ó yuq lhang sé râ a nghut." ga taí bum akô. Nghut kôlhang, shí yuq gi, hkâmá é sủ nghut é lé, nga-nhung sê lê;

²⁸ Haú mù, Yesuq gi, no-qquq yhûm wàng má mhooqshit uchyang, htê mó èq taí kat é gi, "Nungmoq gi, Ngo lé sê é htoq agó, Ngò, hkâmai lé é sủ nghut é lé le, sê akô nghut ri. Ngò gi, Ngá myit đông shí má lé nyi tô é sủ a nghut kôlhang, Ngo lé nhang kat é Sủ gi, tengmán lê; nungmoq gi, Yhang lé a sé kôlhang, ²⁹ Ngò gi, Yhang lé sê lê; hkâsu mù gâ le, Ngò gi, Yhâng chyáng mai lé é sủ eq Yhang mai nhang kat é sủ nghut lê." gâ ri.

³⁰ Haú mù, yhangmoq gi, Yhang lé chyup râ dâ akô; nghut kôlhang, Yhâng é ahkýng a jé shi é yanmai, Yhang lé chyup râ matú, ó yuq le loq a jé kó nghut ri. ³¹ Nghut kôlhang, byù hpûng hkaú mã é bang myo myo gi,

Yhang lé lumjǐng bǔm kôluí, "Haú Hkrisduq jé lé é hkún, Yhang gi, shí yuq htoq má, limik kumlhá pé je wó kut shit râ lúhú?" ga taí bum akô nghut ri.

³² Haú Hparishe pé gi, haú byu hpǔng hkaú má, Yesuq eq sǐng é hkyô lé, haú su ga dangsoq soq lhǔm nyí kô é hkyô lé wó gyô yu akô. Haú mù, haú hkyangjong agyi pé eq Hparishe pé gi, Yhang lé é chyup râ matú, noqkuq yhǔm zǔng é bang lé nhang kat akô.

³³ Haú hkún, Yesuq gi, "Ngò gi, nungmoq eq rahá rayoq zo za nyí râ nghut lhê; hau htàng, Ngo lé nhang kat Su chyáng taú ló râ nghut lhê.

³⁴ Haú hkún, nungmoq gi, Ngo lé hô kôlhang, myang hô kó râ a nghut; Ngò nyí é jang má, nungmoq wó jé kó râ a nghut." ga taí ri.

³⁵ Hau é yanmai, Yudaq byu pé, rayuq eq rayuq taí lhum kô é gi, "Shí yuq gi, Yhang lé nga-nhǔng a myang hô loshoq, hká shut e byuq râ dâ lhê lúhú? Yhang gi, Grik byu pé má nyí byo myín tô é nga-nhǔng é byu pé nyí é jowò má é mù, Grik byu pé lé, é mhoqshit râ dâ lhê lúhú?

³⁶ 'Nungmoq gi, Ngo lé hô kôlhang, myang hô kó râ a nghut.' gâ é eq, 'Ngò nyí é jang má, nungmoq wó jé kó râ a nghut.' gâ é, Yhang taí é dang gi, haí jung wá gá naú é nghut lhê lúhú?" gâ akô.

³⁷ Haú lô htàng é eq je ahkyak é Poí buinyí má, Yesuq toq yap luí, htê mó eq

taí é gi, "Wuì shit sǔ gi, Ngá chyáng lé mù, shuq sháng gaq. ³⁸ Ngo lé lumjǐng é sǔ ó yuq nghut kôle, haú Chyúmdang má taí tô é eq rajung za, 'Yhàng chyáng mai asak uchýâm é wuìlàng yui htoq lô rá nghut lhê.'" gâ ri. ³⁹ Yhang haú su gâ é gi, Yhang lé lumjǐng é bang myang hap yù râ nghut é, haú Woi-nyí lé taí é nghut ri. Haú hkún jé shoq, haú Woi-nyí lé a byi kat shí nghut ri. Hkâsu mù gâ le, Yesuq gi, hpungwup shing kang dan hǔ é a hui nhâng shí é yanmai nghut ri.

⁴⁰ Yhàng é dang pé lé wó gyo kôjáng, ra-am gi, "Shí yuq gi, gè gè yhang, Myiqhtoi haú nghut ri." ga taí akô.

⁴¹ Ra-am gi, "Shí yuq gi, Hkrisduq nghut ri." ga taí akô. Góbang nghut jáng, "Hkrisduq wá Galile mau mai htoq lé râ nghut lhê lúhú? ⁴² Haú Chyúmdang má, Hkrisduq gi, Dawiq é awut ashín mã é nghut luí, Dawiq nyí laí lo é Betlehem wà mai htoq ló râ nghut lhê gâ é, a nghut lúhú?" ga myí bum akô nghut ri. ⁴³ Haú mù luí, Yesuq é yanmai, shiwa byu pé gi, gàm hkoq lò byuq bekô nghut ri. ⁴⁴ Ra-am gi, Yhang lé chyup yù nau bǔm kôlhang, Yhang lé loq a záng kó nghut ri.

Yudaq Byu Pé Lé Shuí U É Bang A Lumjǐng Kô É Hkyô

⁴⁵ Hau htàng má, haú noqkuq yhǔm zǔng bang gi, haú hkyangjong agyi pé eq Hparishe pé chyáng taú

lô kô é hkûn, haú bang gi, yhangmoq lé, "Nungmoq, haí mù luí, Yhang lé a shuí lo kô é lhú?" ga lhom myí akô.

⁴⁶ Haú hkûn, haú noqkuq yhûm zúng bang gi, "Shí yuq su ga taí é byù gi, ó le a nyí wú é nghut lhê." ga taí kyô akô.

⁴⁷ Haú mù, haú Hparishe pé gi, "Nungmoq lé le, Yhang èq mhoq hpyoq yù bekô lhú?"

⁴⁸ Haú zaú wui chyáng le, Hparishe pé chyáng le, Yhang lé lumjìng é byù bò akô lhú?

⁴⁹ A bò! Nghut kôlhang, haú jep é tarâ lé a sê é byù moq mó shí gi, nhîng pyâm é hui bekô nghut ri." ga nhik-yô é dông tû taí kat akô nghut ri.

⁵⁰ Nghut kôlhang, yhangmoq hpúng má bo é, hí hkûn Yesuq chyáng e wú bê sù nghut é, Nikodimu gi, ⁵¹ "Nga-nhúng é tarâ gi, byù rayuq lé, yhang é dang hí a gyô wú é eq, yhang haí kut é lé a sê e za, mara byi lhê lhú?" ga, yhangmoq lé myí ri.

⁵² Haú hkûn, yhangmoq gi, "Nàng le, Galile mau byù nghut lhê lhú? Galile mau mai myiqhtoi rayuq lhang a htoq é hkyô lé, nàng gon wú aq, haú jáng sé râ nghut lhê." ga tû taí akô.

⁵³ Hau htâng, yuq hkgangmó gi, ó le ô yhûm shut taú lô byuq bùm bekô nghut ri.*

8

Yesuq Lé, Lé Myí Chyam Wú Kô É Hkyô

¹ Yesuq kúm gi, Tsanlun Bùm shut e lô bê nghut ri.

² Htang napkyó napsùn noq le, Yesuq gi, noqkuq yhûm wàng hkaú má dum é luí, byu pé lhunglhang gi, Yhang é lhinghkyuq má lé zìng bum akô; haú mù, Yhang gi, zung to luí, yhangmoq lé mhoqshit ri. ³ Haú hkûn, haú tarâ sará pé eq Hparishe pé gi, sulàng shut nyí é má myang chyup yu é su-myi rayuq lé shuí lé lô kômù, gung gung má shap to kôluí, ⁴ Yesuq lé, "Sarâ é, myiwe myhí shí lé, sulàng shut nyí é má myang chyup yu é nghut lhê. ⁵ Haú Mosheq é tarâ má gi, shí su é myiwe lé, luqgok èq dú sat pyám keq ga, nga-nhúng lé hkunmó hkyô tô ri. Ahkuí, Nàng gi, hkâsu nghû râ lhú?" ga myí akô. ⁶ Yhangmoq haú su ga myí é hkyô gi, Yhang lé mara wó hùn shoq ga, chyam wú râ matú nghut ri.

Nghut kôlhang, Yesuq gi, ngóm mù, myigùng má loqny-huí èq htaú kê nyí ri. ⁷ Yhang lé, yhangmoq ru jang myí nyí kô é hkûn, Yhang gi, yap nyhang kat mù, yhangmoq lé, "Nungmoq mâ é mara a wó é sù hí, myiwe myhí shí yuq lé luqgok èq dú sháng gaq." ga taí ri. ⁸ Hau htâng, Yhang gi, dum ngóm luí, myigùng má kê nyí ri.

⁹ Yhangmoq gi, haú su gâ é lé wó gyo kôjáng, je mang bang mai hí luí, rayuq htâng rayuq lô byuq bekô nghut

* 7:53 Yohan Laiká 7:53 mai 8:11 jé shoq gi, chyúmding axau myo myo má a bo é nghut lhê.

luí, Yesuq baú za myit gyó tô é eq, myiwe myhí haú jâng yap nân tô ri. ¹⁰ Yesuq gi, yap nyhang kat luí, yhang lé, "Myiwe myhí ê, yhangmoq hká ló bekô lhú? Ó yuq èq le, nàng lé mara a byi kó lhú?" ga myí ri.

¹¹ Yhang gi, "Yhumsîng ê, ó yuq le mara a byi kó nghut ri." ga tú taí ri.

Haú hkûn, Yesuq gi, "Ngò le, nàng lé mara a byi, ló aq hkoi, ahkuí mai mara hkâdum kut shut lo." ga taí kat ri.

Yesuq, Mîngkân É Maubó

¹² Yesuq gi, shiwa byu pé lé dum nyo é hkûn, "Ngò gi, mîngkân é maubó nghut lhê; Ngá htâng châng é sù ó yuq nghut kôle, mauchut hkaú má hkâ-nhám le so râ a nghut, asak maubó lé wó râ nghut lhê." ga taí ri.

¹³ Haú mù, haú Hparishe pé gi, "Wú aq, Náng gûng Nàng saksé hkâm yu é nghut ri; Náng é saksé gi, teng râ a nghut." ga taí akô.

¹⁴ Haú hkûn, Yesuq gi, "Ngá gûng Ngò saksé hkâm kôlhang, Ngá é saksé gi, têng lhê; hkâsu mù gâ le, Ngò gi, Ngò hkâmai lé lo é eq Ngò hká shut e ló é lé, sê lhê. Nghut kôlhang, nungmoq gi, Ngò hkâmai lé lo é lé le, Ngò hká shut e ló é lé le, a sé kó nghut ri. ¹⁵ Nungmoq gi, byù hkyam dông za jéyáng akô; Ngò gi, ó yuq lé le a jéyáng é nghut lhê. ¹⁶ Nghut kôlhang, Ngò jéyáng é nghut jáng, Ngò jéyáng é hkyô gi, jô lhê; hkâsu mù gâ le, Ngò gi, Ngò baú a nghut, haú Ngo lé

nyhang kat é sù Íwa eq rahá nghut nyi lhê. ¹⁷ Haú nungmoq é tarâ má yhang le, í yuq mai hkâm é saksé gi, têng lhê ga kê tô ri. ¹⁸ Ngò gi, Ngá é matú saksé hkâm yù sù nghut lhê; hau htoq agó, haú Ngo lé nyhang kat é sù Íwa le, Ngá é matú saksé hkâm byí é nghut lhê." ga tú taí ri.

¹⁹ Haú mù, yhangmoq gi, Yhang lé, "Náng Wa gi, hkâmá lhú?" ga myi kôjáng, Yhang gi, "Nungmoq gi, Ngo lé le, Ngá Wa lé le, a sé kó nghut ri; nungmoq, Ngo lé sé kô é nghut le gi, Ngá Wa lé le, sé kó râ nghut lhê." ga tú taí ri. ²⁰ Dang haú pé gi, haú noqkuq yhûm wàng hkaú mâ é alu kat jang nàm má, Yhang mhoqshit nyi é u lé taí é dang nghut ri. Nghut kôlhang, Yhang lé, ó yuq le a chyup kó; hkâsu mù gâ le, Yhâng é ahkyíng a jé shi é yanmai nghut ri.

²¹ Haú mù luí, Yesuq gi, yhangmoq lé, "Ngò gi, ló byuq râ nghut lhê, haú hkûn, nungmoq Ngo lé hô kó râ, yhum-sîng é mara má le shí kó râ nghut lhê. Ngò ló é jang má, nungmoq wó jé kó râ a nghut." ga, radàm dum puq taí ri.

²² Hau é yanmai, haú Yudaq byu pé gi, "'Ngò ló é jang má, nungmoq wó jé kó râ a nghut.' gâ é gi, Yhânggùng yhang sat shí râ gâ é nghut lhê lhú?" ga myi bum akô.

²³ Nghut kôlhang, Yesuq xoq taí é gi, "Nungmoq gi, a-ô mai lo é bang nghut akô; Ngò gi,

ahtoq mai lé é sũ nghut lhê. Nungmoq gi, mingkan shî eq sêng é bang nghut akô; Ngò kúm gi, mingkan shî eq sêng é sũ a nghut. ²⁴ Haũ mù, nungmoq gi, yhumsing é mara má shî kó rà nghut lhê nghũ, Ngò taĩ é nghut lhê. Ngò gi, haũ Yuq nghut lhê nghũ taĩ é lé, nungmoq a lumjĩng kô é nghut jáng, nungmoq gi, gè gè yhang, yhumsing é mara má shî kó rà nghut lhê." gâ ri.

²⁵ Haũ hkũn, yhangmoq gi, "Nàng, ó yuq nghut lhê?" ga myi kôjáng, Yesuq gi, "Ngò ó yuq nghut é lé, Ngò, hkâ-nhám le taĩ nyi bê nghut lhê. ²⁶ Ngò gi, nungmoq eq séng luĩ, taĩ rà hkyô eq jéyáng rà hkyô, myo myo joq lhê. Nghut kôlhang, Ngo lé nhang kat é Sũ gi, tengmán é Sũ nghut lhê mù, Yhâng chyáng mai wó gyô yu é gũ lé, Ngò, mingkan lé taĩ kyô lhê." ga tú taĩ ri.

²⁷ Yesuq gi, yhangmoq lé, Yhâng Wa eq sêng é hkyô taĩ kyô nyi é lé, yhangmoq gi, a sê gyo kó nghut ri. ²⁸ Haũ mù luĩ, Yesuq gi, "Haũ Byu Yhangzo lé nungmoq tu shap* kat é hkũn sheq, Ngò gi, haũ Yuq nghut é hkyô lé le, yhumsing myit đông haĩ le a kut e za, haũ Íwa mhoq byĩ é đông za taĩ é hkyô lé le, nungmoq sé kó rà nghut lhê. ²⁹ Haũ Ngo lé nhang kat é Sũ gi, Ngò eq rahá nghut nyi lhê; Ngò gi, hkâ-nhám le, Yhang lé myit ngón nhang é hkyô

chyat kut é yanmai, Yhang gi, Ngo lé baũ za a tô pyâm to nghut ri." ga taĩ ri. ³⁰ Yhang, haũ su taĩ nyi é u lé lhang, byũ myo myo gi, Yhang lé lumjĩng bũm bekô nghut ri.

Abraham É Awut Ashĩn Pê Hkyô

³¹ Haũ mù, Yesuq gi, Yhang lé lumjĩng é Yudaq byu pé lé, "Ngò mhoqshit é hkyô lé châng kut nyi bekô nghut jáng, nungmoq gi, gè gè yhang, Ngá é chángzô pé nghut bekô. ³² Nungmoq gi, haũ tengmán hkyô lé sé kó rà nghut luĩ, haũ tengmán hkyô gi, nungmoq lé lhoq lhut kat rà nghut lhê." ga taĩ ri.

³³ Haũ hkũn, yhangmoq gi, "Ngamoq gi, Abraham é awut ashĩn pé nghut luĩ, ó yuq é jùn le hkâ-nhám a dut wú é nghut lhê. Haũ mù, 'nungmoq lé lhoq lhut kat rà' nghũ Nàng hkâsu kut wó taĩ lhê lú?" ga tú taĩ akô.

³⁴ Yesuq dum tú taĩ é gi, "Ngò, nungmoq lé teng za taĩ kôlé, mara kut shut é sũ gi, marâ é jùn nghut lhê. ³⁵ Jùn gi, yhũm ikun eq hkâ-nhám le séng nyi rà a nghut; zo kúm gi, ikun eq ahtum abyuq séng lhê. ³⁶ Haũ mù luĩ, haũ Zo gi, nungmoq lé lhoq lhut kat é nghut jáng, nungmoq gi, gè gè yhang, lut berâ nghut lhê. ³⁷ Nungmoq gi, Abraham é awut ashĩn pé nghut é lé, Ngò sê lhê. Nghut kôlhang, nungmoq gi, Ngá é dang lé a lhom yũ kô é yanmai, Ngo lé sat

* 8:28 Tu shap gâ é lichyũm gi, tapzĩng htoq má jén sat pyám rà gâ é nghut lhê.

râ dâ akô nghut ri. ³⁸ Ngò gi, Ngá Wâ chyáng mai myang yu é eq rajung za, nungmoq lé taí kyô nyi lê; nungmoq le, nungmoq é îwa chyáng mai wó gyô yu é eq rajung za kut nyi akô nghut ri." gâ ri.

³⁹ Haú hkûn, yhangmoq gi, "Ngamoq é îwa gi, Abraham nghut lê." ga tû taí kôjáng, Yesuq gi, "Nungmoq, Abraham é yhangzô pé nghut é nghut le gi, Abraham kut é su kut kó râ nghut lê. ⁴⁰ Nghut kôlhang, nungmoq gi, haú Garai Gasâng chyáng mai wó gyô yu é tengmán hkyô lé taí kyo sù nghut é Ngo lé, sat pyám nau akô nghut ri. Haú sù é hkyô gi, Abraham a kut é nghut lê. ⁴¹ Nungmoq gi, nungmoq é îwa kut é muzó lé yhang, kut nyi akô." ga taí ri.

Haú hkûn, yhangmoq gi, "Ngamoq gi, dezo amyû a nghut; ngamoq gi, Îwa rayuq za wó lê; haú gi, Garai Gasang nghut lê." ga taí he akô nghut ri.

Zô Wui É A-kyang Gi, Mó Ó Nghut É Hkyô Shit

⁴² Yesuq gi, yhangmoq lé, "Garai Gasang gi, nungmoq é Îwa nghut é nghut jáng, nungmoq gi, Ngo lé chyitdap kó râ nghut lê; hkâsu mù gâ le, Ngò gi, Garai Gasâng chyáng mai lé jé luí, ahkuí, shí má nyi tô é nghut lê. Ngò gi, Ngá myit dông lé lo é a nghut, Yhang sheq Ngo lé nhang kat é ru nghut lê. ⁴³ Nungmoq gi, haí mù Ngá é

dang lé a sê gyo kô é lúhú gâ le, Ngò taí é dang lé, nungmoq a wó lhom yù kô é yanmai nghut ri. ⁴⁴ Nungmoq gi, haú nungmoq é îwa nghut é nat Tsadán eq sêng é bang nghut luí, nungmoq é îwa ô nau é hkyô lé kut nau bum akô. Yhang gi, a-nham sâng-hi mai byù sat sù nghut ri. Yhang má tengmán hkyô a bo é yanmai, yhang gi, haú tengmán hkyô má a yap gîng nyi nghut ri. Yhang gi, mhaú é hkûn, yhâng é myit má bo é dông taí ri; hkâsu mù gâ le, Yhang gi, byù mhaú nghut luí, mhaú hkyô pé é îwa nghut ri. ⁴⁵ Haú su mù, Ngò, nungmoq lé, haú tengmán hkyô taí kyô é yanmai, nungmoq gi, Ngo lé a lumjîng kó nghut ri. ⁴⁶ Nungmoq mâ é ó yuq wá, Ngo lé mara bo lê nghú saksé wó tûn shit akô lúhú? Ngò gi, haú tengmán hkyô lé taí nyi é nghut le nhîng, nungmoq, Ngo lé haí mù a lumjîng kô é lúhú? ⁴⁷ Garai Gasang eq sêng é sù gi, Garai Gasang taí é dang lé gyô lê. Nungmoq a gyo kô é gi, nungmoq, Garai Gasang eq a séng kô é yanmai nghut ri." ga taí ri.

Yesuq Eq Abraham

⁴⁸ Haú hkûn, haú Yudaq byu pé gi, Yhang lé, "Nàng gi, Samariq byù nghut é htoq agó, nat gang wang jûng to sù nghut lê nghú, ngamoq taí é dang gi, jô lê a nghut lúhú?" ga myí akô.

⁴⁹ Yesuq gi, "Ngò gi, nat gang wang jûng é hui sù a nghut; Ngò gi, Ngá Wa lé

sheq hkunggâ é ru nghut lhê; nungmoq kúm gi, Ngo lé taí hpoî nyi akô nghut ri. ⁵⁰ Ngò gi, Ngá é matú aróng ho nyi é a nghut; nghut kôlhang, hô byi Sû rayuq nyi lhê, haú yuq jéyáng sháng gaq. ⁵¹ Ngò, nungmoq lé teng za taí kôlé, Ngá dang lé châng é sù gi, hkâ-nhám le, shî râ a nghut." ga taí ri.

⁵² Hau é yanmai, haú Yudaq byu pé gi, "Nàng gi, nat gang wang júng to sù nghut é lé, ahkuí, ngamoq sé bê! Abraham gi, shi byuq bê; haú myiqhtoí pé le, shi byuq bekô nghut ri; nghut kôlhang, Nàng gi, 'Ngá dang lé châng é sù gi, hkâ-nhám le, shî râ a nghut.' ga taí ri. ⁵³ Nàng gi, ngamoq é îwa Abraham htoq hkik lhê lú? Yhang gi, shi byuq bê; haú myiqhtoí pé le, shi byuq bekô nghut ri. Náng gûng nàng ó yuq su ngàm lhê lú?" ga taí akô.

⁵⁴ Yesuq gi, "Ngá gûng Ngò lhoq gyaú yu é nghut jáng, Ngá é aróng gi, hai hpaudap é a nghut; nghut kôlhang, haú nungmoq é Garai Gasang nghut lhê ga nungmoq taí é sù, Ngá Wa gi, Ngo lé lhoq gyaú é sù ru nghut lhê. ⁵⁵ Nungmoq gi, Yhang lé a sé kó nghut ri; nghut kôlhang, Ngò gi, sê lhê. Yhang lé a sé nghû Ngò taí é ru nghut le gi, Ngò le nungmoq su byù mhaú dut râ nghut lhê; nghut kôlhang, Ngò gi, Yhang lé sé luí, Yhâng é dang gyo sù

nghut lhê. ⁵⁶ Nungmoq é îwa Abraham gi, Ngo lé râ buinyi lé myoqbyu gabú nyi é nghut luí, myàng mù, gabú bê nghut ri." ga taí ri.

⁵⁷ Haú hkûn, haú Yudaq byu pé gi, Yhang lé, "Nàng gi, asak ngo xê zàn lhang a nghut shî é nhîng, Abraham lé myàng wú é nghut lhê lú?" ga taí akô.

⁵⁸ Yesuq gi, "Ngò, nungmoq lé teng za taí kôlé, Abraham lhang a hkû shi má, Ngò nyi gù bê nghut lhê."* ga taí ri.† ⁵⁹ Haú mù luí, yhangmoq gi, Yesuq lé, dú râ ga luqgok kui yu akô; nghut kôlhang, Yesuq gi, haú noqkuq yhûm mai haq htoq ló byuq bê nghut ri.

9

Myoqjit Sù Lé Lhoq Gê Byí É Hkyô

¹ Yesuq gi, sô yông ló nyi é u lé, hku lé é mai myoqjit to gû nghut é byù rayuq lé myang ri. ² Haú hkûn, Yhâng é chángzô pé gi, Yhang lé, "Rabai é, shí yuq, myoqjit gû hku lé é gi, ó yuq kut shut é yubak é yanmai nghut lhê lú? Yhang kut shut é lú? A nghut jáng, yhâng nu yhâng wa kut shut é lú?" ga myí akô.

³ Yesuq tû taí é gi, "Haú gi, yhang kut shut é yanmai le a nghut, yhâng nu yhâng wa kut shut é yanmai le a nghut; haú Garai Gasâng é muzó lé, yhang má wó lhoq htoq shit râ matú, haú dut é ru nghut

* 8:58 Htoq Ló 3:14 † 8:58 Bun zo shî má, Yesuq gi, Yhânggùng yhang Garai Gasang nghut lhê gâ nyi nghut ri.

lhê. ⁴ Nga-nhúng gi, haû Ngo lé nhang kat Su é muzó lé, nyí nghut tô ashî hkûn, zui saî nyí ra râ dut lhê; myín jé jáng gi, ó yuq le, mù wó zui sai râ a nghut. ⁵ Ngò gi, mingkan htoq má nyi tô é u lé, mingkân é maubó nghut lhê." gâ ri.

⁶ Yhang gi, haû su ga tai luí, myigùng má sôkan byé hkyó mù, tse-nyhaq saî yù luí, haû yuq é myoqjí má but byi ri. ⁷ Hau htâng, haû yuq lé, "Haû Siloam wuhtum má ê chí pyám aq." ga tai ri. (Siloam gâ é gi, nhang é gâ é lichyúm nghut lhê.). Haû mù, haû yuq gi, ê chí mù, myoq myàng luí, yhûm shut ló bê nghut ri.

⁸ Haû yhâng é yhumkyo bang eq yhang dung zô wún é lé myang wú é bang gi, "Shí yuq gi, haû zung to mù, dung zo zo lhaq kut é sù, a nghut kó lhú?" ga myi bum akô. ⁹ Ra-am gi, "Haû yuq nghut lhê." gâ bum akô.

Góbang gi, "A nghut, haû yuq su dut e za ru nghut lhê." ga tai akô.

Nghut kôlhang, yhang gi, "Ngò, haû yuq yhang nghut lhê." ga tai ri.

¹⁰ Haû hkûn, yhangmoq gi, "Haû nghut le gi, náng myoq hkâsu kut wó myang é lhú?" ga myi akô.

¹¹ Yhang gi, "Haû Yesuq gâ é byù rayuq, tse-nyhaq ratsuí saî yù luí, ngá é myoqjí má but byi mù, 'Siloam wuhtum má ê chí pyám aq.' ga ngo lé tai ri; haû mù, ngò ê chí pyám é htâng má, ngá myoq

wó myang é nghut lhê." ga tú tai ri.

¹² Haû hkûn, yhangmoq gi, "Byù haû yuq gi, hkâmá nyi ri lhú?" ga, yhang lé myi akô.

Yhang gi, "Ngò a sé." ga tai ri.

Myoq Dum Myang Byuq É Hkyô Lé, Hparishe Pé Gôn Wú É Hkyô

¹³ Yhangmoq gi, haû myoqjit wú bê sù lé, Hparishe pé chyáng shuí lé akô. ¹⁴ Yesuq, tse-nyhaq saî yù mù, haû yuq é myoq lé lhoq myâng byi é buinyi gi, Bánno buinyi nghut ri. ¹⁵ Haû mù, yhang, myoq hkâsu kut wó myang é hkyô lé, haû Hparishe pé le dum myi akô. Haû jáng, yhang gi, "Haû yuq gi, ngá é myoqjí má tse-nyhaq but byi mù, ngò gi, ê chí pyám jáng, ngá myoq myàng bê nghut lhê." ga tú tai ri.

¹⁶ Haû Hparishe pé ra-am gi, "Shí yuq gi, Bánno buinyi é tará lé a châng é sù nghut é yanmai, Garai Gasâng chyáng mai lé é sù a nghut." ga tai akô.

Nghut kôlhang, ra-am gi, "Yubak dap sù rayuq gi, haû su é limik kumlhá pé lé, hkâsu wó kut htoq râ lhú?" ga myi akô. Haû mù, yhangmoq gi, myit a huí lhûm bùm lò kó nghut ri.

¹⁷ Haû mù, yhangmoq gi, haû myoqjit wú sù shut lhîng mù, "Nang lé myoq lhoq myâng byi é sù gi, hkasú é byù nghut lhê nghû, náng tai râ lhú?" ga dum myi kôjáng,

"Yhang gi, myiqhtoi rayuq nghut ri." ga, yhang tû taí ri.

18 Haú Yudaq byu pé gi, haú yuq myoqjit wú é hkyô lé le, ahkuí myoq dum myàng bê nghut é hkyô lé le, haú yhâng nu eq yhâng wa lé, é ji lò nhang é hkûn jé shoq, a lumjîng kó nghut ri. 19 Haú mù, Yhangmoq gi, haú yhâng nu eq yhâng wa lé, "Shí yuq gi, nungnhik é yhangzo nghut lhê lú? Hku lé é hkûn mai, myoqjit gù nghut lhê lú? Yhang, ahkuí, hkâsu kut wó myang é lú?" ga myí akô.

20 Haú hkûn, yhâng nu eq yhâng wâ nhik gi, "Yhang gi, ngá-nhik é yhangzo nghut é lé le, hku lé é hkûn mai myoqjit gù nghut é lé le, ngá-nhik sê lhê. 21 Nghut kôlhâng, yhang, ahkuí hkâsu kut wó myang é hkyô lé le, yhâng é myoq lé ó yuq èq lhoq myâng byí é hkyô lé le, ngá-nhik a sé. Yhang, asak wáng bê, yhang lé myí wú keq, yhânggùng yhang dat taí kyo râ nghut lhê." ga tû taí akô. 22 Haú yhâng nu eq yhâng wâ nhik gi, Yudaq byu pé lé gyuq kô é yanmai, haú su ga taí kô é nghut ri; hkâsu mù gâ le, Yesuq gi, haú Hkrisduq nghut lhê ga yín yu é sù, ó yuq lé nghut kôle, haú tarajong mai lhoq htoq pyám râ nghut lhê ga, haú Yudaq suwún wúî chôm myit hpyit to bekô nghut é yanmai nghut ri. 23 Hau é yanmai, yhâng nu eq yhâng wâ nhik gi, "Yhang, asak wáng bê, yhang lé myí wú keq." ga taí kô é nghut ri.

24 Haú Hparishe pé gi, myoqjit wú bê sù haú yuq lé dum ji yù mù, "Garai Gasang lé za hkya-on waq toq aq! Haú yuq gi, yubak dap sù rayuq nghut é lé ngamoq sê lhê." ga taí akô.

25 Haú hkûn, yhang tû taí é gi, "Yhang gi, yubak dap sù rayuq nghut lhê luq, a nghut é luq, ngò a sé. Ngò gi, hí lé myoqjit sù nghut kôle, ahkuí wó myâng bê nghut é lé za, ngò ru sê lhê." gâ ri.

26 Hau htâng, yhangmoq gi, "Yhang, nang lé haí kut byí ri lú? Náng é myoq lé, yhang, hkâsu kut lhoq myâng byí ri lú?" ga, yhang lé myí akô.

27 Haú hkûn, yhang gi, "Ahkuí za, ngò, nungmoq lé taí kyo bê le, nungmoq sheq a gyo kôluí nhîng! Nungmoq gi, haí mù dum gyô nau akô lú? Nungmoq le, Yhâng é chángzô pé dut nau akô lú?" ga taú myí ri.

28 Haú mù, yhangmoq gi, yhang lé gyaí rhoí é đông mai, "Nàng gi, haú yuq é chángzo nghut ri-nhung! Ngamoq kúm gi, Mosheq é chángzô pé ru nghut lhê! 29 Garai Gasang gi, Mosheq lé dâng nyo é hkyô lé, ngamoq sê lhê; nghut kôlhâng, haú yuq eq séng luí, Yhang gi, hkâmai lé é sù nghut é lé lhang, ngamoq a sé." ga taí akô.

30 Haú hkûn, haú yuq gi, "Yhang, ngo lé myoq wó lhoq myang byi kôlhâng, Yhang gi, hkâmai lé é sù nghut é lé, nungmoq a sé kô é gi, mauhpo yhang nghut bê!

³¹ Garai Gasang gi, yubak dap bâng é dang lé a gyo byî é hkyô lé, nga-nhung sê lhê. Garai Gasang gi, Yhang lé noqkuq luî, Yhâng ô nau é hkyô lé, kut é sù é dang lé kúm gyo byî lhê. ³² Hku lé é hkûn mai myoqjit gù nghut é byù lé, ó yuq eq myoq lhoq myâng byî é gâ é hkyô lé, mingkan lé joq é hkûn mai, ó yuq le a wó gyô wú é nghut lhê. ³³ Haú yuq gi, Garai Gasâng chyáng mai lé é sù za a nghut le gi, haî le wó kut râ a nghut." ga tû taî ri.

³⁴ Haú su ga jáng, yhang-moq gi, "Nàng gi, yubak htui má hku lé é sù nghut to luî nhîng, ngamoq lé wám mho-qshit lhê lhú?" ga tû taî kôluî, yhang lé hkat htoq pyâm akô nghut ri.

Woi-nyí Má Myoqjit É Hkyô

³⁵ Yesuq gi, haú yuq lé yhangmoq hkat htoq pyâm é hkyô lé wó gyo luî, yhang lé myàng hui jáng, "Nàng gi, haú Byu Yhangzo lé lumjîng lhê lhú?" ga myî ri.

³⁶ Haú hkûn, haú yuq gi, "Yhumsîng ê, haú gi, ó yuq nghut lhê lhú? Yhang lé, ngò wó lumjîng sháng gaq, taî kyo laq." ga myî ri.

³⁷ Yesuq gi, "Nàng, haú yuq lé myàng wú bê nghut lhê; ahkuî, nàng eq dáng nyo nyi é sù gi, haú yuq yhang nghut lhê." ga taî ri.

³⁸ Haú mù, haú yuq gi, "Yhumsîng ê, ngò lumjîng lhê!" ga taî luî, Yhang lé noqkuq ri.

³⁹ Haú hkûn, Yesuq gi, "Haú myoqjit bang myoq myàng kó râ hkyô eq myoq myàng bang myoqjit kó râ hkyô lé, tarâ jéyáng râ matú, mingkan shî má Ngò jé lé é nghut lhê." ga taî ri.

⁴⁰ Yhang eq rahá nghut nyi é Hparishe pé ra-am gi, Yhang haú su ga taî é lé wó gyo kôjáng, "Hkâsu htà? Ngamoq gi, myoqjit bang dut bê lhú?" ga myî akô.

⁴¹ Haú hkûn, Yesuq gi, "Nungmoq, myoqjit é bang ru nghut le gi, yubak mara a bò kó râ nghut lhê; nghut kôlhang, ahkuî, nungmoq gi, myoq myàng bang nghut lhê ga kô é yanmai, nungmoq má yubak mara bo ashî kó nghut ri.

10

Sau Zúng Sù Eq Sau Hpúng

¹ Ngò, nungmoq lé teng za taî kôlé, haú sau hkup má, hkúmdong mai a wang e za, gó hkyô dông doq lut wang é sù gi, hkau sù eq damyaq nghut ri. ² Haú hkúmdong mai wang é sù kúm gi, sau zúng sù nghut ri. ³ Haú hkum zúng sù gi, yhang lé hkum hpông byî é htoq agó, haú sau pé gi, yhâng é htê lé gyo byî akô. Yhang gi, yhâng é sau pé lé, myîng lang luî wut yù mù, yhangmoq lé shuí htoq htoq kut nyi ri. ⁴ Yhâng é sau pé banshoq lé hpông htoq yù mù, yhang gi, hí má sô ri; sau pé gi, yhâng é htê lé sê gyo kô é yanmai, yhâng é htâng má châng akô nghut

ri. ⁵ Nghut kôlhang, yhangmoq gi, byù bing é htâng má, hkâ-nhám lhang cháng kó râ a nghut e za, yhâng chyáng mai kúm hpang byuq kó râ nghut lhê; hkâsu mù gâ le, haù byù bing é htê lé, yhangmoq a sê gyo kô é yanmai nghut ri." ga taí ri. ⁶ Yesuq gi, dangtú haù lé yù mù, yhangmoq lé taí kyô ri; nghut kôlhang, yhangmoq gi, Yhang haí taí kyô nyi é lé, a sê gyo kó nghut ri.

⁷ Haù mù, Yesuq dum taí é gi, "Ngò, nungmoq lé teng za taí kôlé, Ngò gi, haù sau pé wang é hkúmdong nghut lhê. ⁸ Ngá é hí má lé é lhunglhang bang gi, hkau bang eq damyaq pé nghut akô; haù sau pé kúm gi, yhangmoq é dang lé a lhom gyo byi kó nghut ri. ⁹ Ngò gi, hkúmdong nghut lhê; Ngò mai wang é sù ó yuq nghut kôle, hkyi yu é hui râ nghut lhê. Haù yuq gi, htoq htoq wàng wàng wó kut râ eq mhan-yô myang hô râ nghut lhê. ¹⁰ Haù hkau sù gi, hkau râ, sat râ eq lhoq htên pyám râ matú, lé e za nghut lhê. Ngo lé é gi, yhangmoq, asak wó yù râ eq byíngiup é asak lé wó yù râ matú sheq nghut lhê.

¹¹ Ngò gi, ge é sau zúng sù nghut lhê; haù ge é sau zúng sù gi, sau pê é matú, yhumsing é asak lé ap byi pyám é nghut lhê. ¹² Haù langchyáng kut sù gi, sau pé lé sing é sau zúng sù a nghut; haù mù, yhang gi, haù wamhkuí lé lo é lé myàng

jáng, saù pé lé pyám to mù hpang ló byuq râ nghut lhê; haù hkûn, wamhkuí gi, sau hpúng lé é htim luí, lhoq pyo pyám râ nghut lhê. ¹³ Yhang gi, langchyáng hpó nghut luí, haù sau pê é matú haí le a myit chiq byí é yanmai, hpang é nghut ri.

¹⁴ Ngò gi, haù ge é sau zúng sù nghut lhê; haù Íwa gi, Ngo lé sê é nghut luí, Ngò le, haù Íwa lé sê é eq rajung za, ¹⁵ Ngá é sau pé lé, Ngò sê lhê; Ngá é sau pé le, Ngo lé sê akô nghut ri; Ngò gi, haù sau pê é matú, yhumsing é asak lé ap byí pyám é nghut lhê. ¹⁶ Ngò gi, sau hkup shí mâ é a nghut é gotù sau pé wó ashí; sau haù pé lé le, Ngò, shuí yù ra râ nghut lhê; sau haù pé le, Ngá é htê lé gyo kó râ nghut lhê; haù hkûn, sau hpúng rahpúng za dut luí, sau zúng sù le rayuq za, nghut râ nghut lhê.* ¹⁷ Ngò gi, Ngá é asak lé dum wó taù yù sháng gaq nghù, yhumsing é asak lé ap byí pyám é yanmai, Ngá Wá gi, Ngo lé chyitdap é nghut lhê. ¹⁸ Ngá é asak lé, ó yuq èq le wó yu pyám é a nghut, Ngá é myit đông byi pyám é ru nghut lhê. Ngò gi, yhumsing asak lé ap byi pyám râ ahko ahkáng eq haù lé dum taù yù râ ahko ahkáng wó sù nghut lhê. Haù gi, Ngá Wá chyáng mai Ngò wó yu é hkunmó nghut lhê." gâ ri.

¹⁹ Dang haù pê é yanmai, haù Yudaq byu pé gi, myit a huí lhum dum dut byuq

bekô nghut ri. ²⁰ Haú mã é bang myo myo gi, "Yhang gi, nat gang wang júng to luí, nâ byuq bê nghut ri. Yhâng é dang lé, haí mù gyô nyi akô lú?" ga taí bum akô.

²¹ Nghut kôlhang, gôbang gi, "Dang shi pé gi, nat gang wang júng tô é byù taí é dang a nghut. Nat gang gi, myoqjit sù lé, myoq wó lhoq myâng nhâng râ lú?" ga taí bum akô nghut ri.

Yudaq Byu Pé A Lumjínq Kô É Hkyô

²² Yerusalem và mó má, Ap Nóng Poí* jé bê nghut ri. Haú gi, gyoqmyò nám nghut ri. ²³ Haú hkûn, Yesuq gi, haú noqkuq yhûm wàng mã é, Sholumon é Jirop má sô yông wún ri. ²⁴ Haú u lé, haú Yudaq byu pé gi, Yhâng é lhínghkyuq má lé zîng bùm kômù, "Nàng gi, ngamoq lé hkâ-myháng jé shoq úng-âng nhang nyi râ lú? Nàng, Hkrisduq nghut le gi, ngamoq lé san za taí kyô pyám laq." ga taí akô.

²⁵ Yesuq gi, "Ngò, nungmoq lé taí kyo bê nghut lhê; nghut kôlhang, nungmoq a lumjínq kó nghut ri. Ngá Wâ é myìng mai, Ngò kut é laklaí kumlhá haú pé gi, Ngá é matú saksé hkám byí nyi ri. ²⁶ Nghut kôlhang, nungmoq gi, Ngá é sau a nghut kô é yanmai, a lumjínq kó nghut ri. ²⁷ Ngá é sau pé gi, Ngá é htê lé dat gyô akô; Ngò gi, yhangmoq lé sê lhê; yhangmoq le, Ngá htâng châng akô nghut ri.

²⁸ Ngò gi, yhangmoq lé, ah-tum abyuq é asak byí é nghut mù, yhangmoq gi, hkâ-nhám le htên byoq kó râ a nghut; ó yuq èq le, yhangmoq lé, Ngá é loq mai wó lú yú râ a nghut.

²⁹ Yhangmoq lé, Ngá é loq má ap byi tô é sù, haú Ngá Wa gi, lhunglhang htoq má je gyaú Sù nghut lhê; ó yuq èq le, yhangmoq lé, Ngá Wâ é loq mai wó lú yú râ a nghut. ³⁰ Ngò eq haú Íwa gi, rayuq za nghut lhê." ga tú taí ri.

³¹ Haú hkûn, haú Yudaq byu pé gi, Yesuq lé, dú râ matú luqgok dum kui akô.

³² Nghut kôlhang, Yesuq gi, yhangmoq lé, "Haú Íwâ chyáng mã é laklaí kumlhá mó pé myo myo, Ngò, nungmoq lé tûn shit bê nghut lhê. Nungmoq, Ngo lé dú râ gi, hká lhûm é yanmai nghut akô lú?" ga myí ri.

³³ Haú Yudaq byu pé gi, "Ngamoq, Nang lé dú râ gi, haú pé hká lhûm é yanmai le a nghut; Nàng gi, byù rayuq nghut to luí, Garai Gasang nghut é đông taí whuí luí, Yhang lé rhoi dang taí é yanmai, dú râ nghû lhê." ga tú taí akô.

³⁴ Haú hkûn, Yesuq gi, yhangmoq lé, "Nungmoq gi, garaí pé nghut akô nghû, Ngò taí bê nghut lhê.[☆] ga nungmoq é tarâ má kâ to lhê a nghut kó lú? ³⁵ Chyúmdang haú lé gi, a ge lhoq hpyoq pyám é nghut luí, haú Garaí Gasâng é mungdang lé wó

* **10:22** Ap Nóng Poí gâ é gi, Garai Gasâng é yhûm lé ap nóng lé gâ lhê. ☆ **10:34** Hkya-on 82:6

yu é bang lé, 'garaî pé' gâ é nghut le gi, ³⁶ haû Íwa mai, Yhang é matú hkyin htoq yú luí, mingkan má nhang é Sû eq séng luí gi, hká đông nghû kó râ lhú? 'Ngò gi, Garai Gasâng é Yhangzo nghut lhê.' nghû taí é yanmai, Ngò gi, Garai Gasang lé taí hpoî ri nghû, nungmoq, haí mù Ngo lé mara hùn akô lhú? ³⁷ Ngá Wâ é muzó pé lé, Ngò kut é a nghut jáng, Ngo lé hkâlumjúng kó. ³⁸ Nghut kôhang, Ngò, haú pé lé kut é nghut le gi, nungmoq, Ngo lé a lumjúng kôhang, haû muzó pé lé lumjúng keq; haú hkûn, haû Íwa gi, Ngò má nghut nyi é hkyô lé le, Ngò gi, haû Íwa má nghut nyi é hkyô lé le, nungmoq wó sé luí, sê gyo kó râ nghut lhê." ga tû taí ri. ³⁹ Yhangmoq gi, Yhang lé chyup râ dum hen akô; nghut kôhang, Yhang gi, yhangmoq é loq mai wó lut ló bê nghut ri.

⁴⁰ Hau htâng, Yesuq gi, haû Yodan làng he hpoq mã é, Yohan, wui-myhup hkám byí hi é jowò má ló jé ri. Haû má, Yhang nyi nyi é nghut luí, ⁴¹ byù myo myo gi, Yhâng chyáng lé jé bum akô. Yhangmoq gi, "Yohan gi, limik kumlhá a kut wú é nghut kôhang, shí yuq eq séng luí, Yohan taí é hkyô lhunglhang gi, têng ri." ga taí bum akô. ⁴² Haú jowò má, byù myo myo gi, Yesuq lé lumjúng bùm bekô nghut ri.

Lazaruq Shi Byuq É Hkyô

¹ Ahkuí, Lazaruq gâ é byù rayuq gi, no nyi ri. Yhang gi, haû Mariq eq yhângnhá Mah-taq nhik nyi é Behtani wà mã é sù nghut lhê. ² Mariq haû gi, Yhumsîng lé namngón-xû hut gyun luí, hkyî má yhâng xam èq sùt byí é sù nghut ri; yhang gi, haû no nyi é Lazaruq é yhângnhá nghut ri. ³ Haû mù, haû yhângnhá nhik gi, "Yhumsîng ê, Nàng chyitdap é sù gi, no nyi ri." ga, Yesuq chyáng ê taí nhang akô.

⁴ Yesuq gi, dang haû lé wó gyo jáng, "Nòhpyo haû gi, shì-nò a nghut. Haû Garai Gasâng é Yhangzo gi, hau é yanmai, hpungwup shingkang wó dan hù é hui sháng gaq ga, Garai Gasâng é hpungwup shingkang é matú dut é ru nghut lhê. ⁵ Yesuq gi, Mahtaq eq yhanggu Mariq lé le, Lazaruq lé le, chyitdap ri. ⁶ Haû su mù, Yhang gi, haû Lazaruq no nyi ri gâ é lé, wó gyô é hkûn, haû Yhang nyi é jowò má, í nyi nyi tô ashí nghut ri.

⁷ Hau htâng, Yhang gi, Yhâng é chángzô pé lé, "Nga-nhúng gi, Yuda mau shut dum taû ló sháng." ga taí ri.

⁸ Haú hkûn, yhangmoq gi, "Rabai ê, hkû-yoq za, haû Yudaq byu pé, Nang lé luqgok èq dú sat râ da kô é nghut le nhíng, ahkuí, haú shut dum taû ló râ lhú?" ga Yhang lé myí akô.

⁹ Yesuq gi, "Nýi gi, hkyíng hkum raxe í hkum bo lhê

a nghut kó lúhú?*" Nyí má hkyô sô é sù gi, mingkan shi é maubó é yanmai myoq myàng luí, lengbat râ a nghut. ¹⁰ Myín lé hkyô sô é sù kúm gi, maubó lé a wó é yanmai, lengbat lhê." ga tû taí ri.

¹¹ Haú su ga taí é htâng má, Yhang, yhangmoq lé xoq taí kyô é gi, "Nga-nhùng é luzúm Lazaruq yhup myhî byuq bê nghut ri; nghut kôlhang, Ngò gi, yhang lé ê nhaú toq râ nghut lhê." gâ ri.

¹² Haú hkûn, Yhâng é chángzô pé gi, "Yhumsîng ê, yhang yhup myhî tô é nghut le gi, ge lò râ nghut lhê." gâ taí akô. ¹³ Yesuq gi, Lazaruq shi byuq bê hkyô lé taí é nghut ri; nghut kôlhang, Yhâng é chángzô pé gi, gè gè yhup myhî tô é lé taí é su ngam pyâm akô nghut ri.

¹⁴ Haú mù luí, Yesuq, yhangmoq lé san za jáng taí kyô é gi, "Lazaruq gi, shi byuq bê nghut lhê. ¹⁵ Ngò haú má a nyi záng é gi, nungmoq wó lumjîng râ matú nghut luí, nungmoq é matú Ngò gabú byî ri; yhâng chyáng e ló sháng hkoi." gâ ri.

¹⁶ Haú mù, haú Zozûm le gâ é Htomaq gi, gotú chángzô pé lé, "Nga-nhúng le, Yhang eq rahá shî sháng gaq, châng e ló sháng." ga taí ri.

Haú Ê-nhâ Nhik Lé, Yesuq Nhik Tîng É Hkyô

¹⁷ Yesuq gi, jé e é hkûn, haú Lazaruq lé lup má kat pyâm

é myi nyí nghut bê hkyô lé, lhom taí kyô akô. ¹⁸ Behtani wà gi, Yerusalem wà mó eq í déng kô za wê lhûm ri. ¹⁹ Haú mù, Yudaq byu pé myo myo gi, Mahtaq eq Mariq nhik é yhanggu shi byuq é yanmai, nhik tîng byi kó râ ga lé jé nyi bum akô nghut ri. ²⁰ Mahtaq gi, Yesuq jé lé lo é hkyô lé wó gyo jáng, htoq ê mù, Yhang lé ê huí ri; nghut kôlhang, Mariq gi, yhûm má nyi tô ri.

²¹ Mahtaq gi, Yesuq lé, "Yhumsîng ê, Nàng, shî má nyi tô é ru nghut le gi, ngá gu shi byuq râ a nghut.

²² Nghut kôlhang, ahkuí le, Garaí Gasâng chyáng Nàng haí dung kôlhang, Yhang byi râ nghut é lé, ngò sê lhê." ga taí ri.

²³ Yesuq gi, yhang lé, "Nung gu, dum dui toq râ nghut lhê." ga taí ri.

²⁴ Haú hkûn, Mahtaq gi, "Haú jîhtûm buinyi má dum dui toq é hkûn, yhang le dum dui toq râ nghut é lé, ngò sê lhê." ga tû taí ri.

²⁵ Haú hkûn, Yesuq gi, yhang lé, "Ngò gi, dum dui toq hkyô eq asak nghut lhê. Ngo lé lumjîng é sù gi, shi byuq kôlhang, dum dui râ nghut lhê. ²⁶ Asak dui nyi luí, Ngo lé lumjîng é sù ó yuq nghut kôle, hkâ-nhám le shi é huí râ a nghut. Nàng gi, dang shî lé lumjîng lhê lúhú?" ga taí ri.

²⁷ Haú hkûn, yhang gi, "Yhumsîng ê, ngò lumjîng lhê. Nàng gi, haú mingkan má jé lé

* **11:9** Nyí gi, hkyíng hkum raxe í hkum bo lhê a nghut kó lúhú? gâ é gi, ahkyíng a jé shimá, muzó nô é gi, a ge é nghut lhê gâ é nghut ri.

lô râ nghut é, Garai Gasâng é Yhangzo, Hkrisduq† nghut é lé, ngò lumjǐng lhê." ga, Yhang lé tai kyô ri.

28 Yhang gi, haû su ga tai é htâng má, taû lô mù, yhanggu Mariq lé, tsik za wut yû lui, "Haû Sará jé tô ri; Yhang gi, nang lé myi nyi ri." ga tai kyô ri. 29 Mariq gi, haû lé wó gyo jáng, hân za toq mù, Yesuq chyáng ê bê nghut ri. 30 Haû u lé, Yesuq gi, haû wâ hkaû má a wang lô shi e za, Mahtaq eq huí é jowò má ru nyi tô ashí nghut ri. 31 Haû yhúmhaû má, Mariq lé nhik tǐng nyi é Yudaq byu pé gi, yhang hân za toq lui, htoq lô é lé myàng kôjáng, yhang, lup má ê ngaû râ dâ lhê abe ga, myit yû kômù, yhang htâng châng e lô bum akô nghut ri.

32 Mariq gi, Yesuq nyi tô é jang má jé mù, Yhang lé myàng jáng, Yhâng é hkyi wang má ngóm gop to lui, "Yhumsing ê, Nang, shi má nyi tô é ru nghut le gi, ngá gu shi byuq râ a nghut." ga tai ri.

33 Yesuq gi, Mariq ngaû nyi é lé le, haû yhang eq rahá lé lo é Yudaq byu pé ngaû nyi kô é lé le, myàng jáng, Yhâng é myit má gyai yhang hkâm zo wui é eq myit wui myit hke dut nyi ri. 34 Haû mù, Yhang gi, "Yhang lé, hkâmá tô tô akô lhú?" ga myi jáng, yhangmoq gi, "Yhumsing ê, lé wú wú aq." ga tû tai akô.

35 Yesuq gi, ngaû bê nghut ri.

36 Haû mù, haû Yudaq byu pé gi, "Wú keq, Yhang gi, Lazaruq lé, haû-í yhang chyit ri-nhung!" ga tai akô.

37 Nghut kôhang, ra-am gi, "Haû myoqjit sù lé, myoq wó lhoq myâng byi é Sù gi, shi yuq lé le, a shi lo shoq a wó kut é lhú?" ga tai bum akô nghut ri.

Lazaruq Lé Lhoq Dui Toq É Hkyô

38 Yesuq gi, Yhâng é myit má radâm dum gyai yhang hkâm zo wui é eq, lup má lé jé ri. Lup haû gi, luqkyûng dong nghut lui, luqgok rachâm eq chí tô akô. 39 Haû mù, Yhang gi, "Luqgok haû lé yu pyám keq." ga tai ri.

Haû hkûn, haû shi byuq su é yhângnhá Mahtaq gi, "Yhumsing ê, yhang lé, haû má tô tô é myi nyi lhâng nghut bê yanmai, ahkuí gi, bup nàm berá nghut lhê." ga tai ri.

40 Haû mù, Yesuq gi, "Nang, lumjǐng é nghut le gi, haû Garai Gasâng é hpungwup shingkang lé, wó myâng râ nghut lhê nghû, Ngò, nang lé tai kyô wú bê a nghut lhú?" ga tai ri.

41 Haû mù lui, yhangmoq gi, luqgok haû lé yu pyám akô. Hau htâng, Yesuq gi, mauhkûng shut tu wú lui, "Áwa ê, Nang, Ngá é dang lé gyo byi é yanmai, Ngò, Nang lé jeju hkya-ôn lhê. 42 Nang gi, hkâ-nhám le, Ngá é dang lé gyo byi nyi é lé, Ngò sê lhê; nghut kôhang, Nang, Ngo

† 11:27 Hkrisduq lé Mesaia le gà lhê.

lé nhang kat é hkyô lé, shî má yap tô é bang lumjîng kó sháng gaq nghû, yhangmoq é matú, Ngò, isu nghû taí é nghut lhê." ga taí ri.

⁴³ Yhang gi, haú su ga taí luí, "Lazaruq ê, htoq lô aq." ga htê mó eq wut kat ri. ⁴⁴ Haú hkûn, haú shi byuq bê sù gi, yhâng é loq hkyî pé má pân eq htup yup to gû eq, yhâng é myoqdong má hpajet eq htup to gù htoq lo ri.

Haú mù, Yesuq gi, yhangmoq lé, "Yhang lé hpyi pyám byi mù, nhang kat keq." ga taí ri.

Yesuq Lé Sat Pyám Râ Haq Dâ É Hkyô

Mht 26:1-5; Mrk 14:1-2; Luk 22:1-2

⁴⁵ Haú mù luí, Mariq chyáng lé kûn é Yudaq byu pé myo myo gi, Yesuq kut é hkyô lé myàng jáng, Yesuq lé lumjîng bùm bekô nghut ri.

⁴⁶ Nghut kôlhang, yhangmoq chyáng mâ é ra-am gi, haú Hparishe pê chyáng ló mù, Yesuq kut é hkyô lé, ló taí kyô akô. ⁴⁷ Haú mù, haú hkyangjong agyi pé eq Hparishe pé gi, Yudaq byìn tú wapdoq † zuphpong lé ji tsîng to mù, "Byù shí yuq gi, limik kumlhá myo myo kut shit nyi ri. Nga-nhúng, hkâsu kut le gè râ lúh? ⁴⁸ Nga-nhúng, Yhang lé haú su ru kut nyî nhang é nghut jáng, yuq hkangmó gi, Yhang lé lumjîng kó râ nghut lhê; haú hkûn, Romaq byu pé gi, jé lé mù, nga-nhúng é jowò

eq nga-nhúng é byuhú lé, lé lhoq htên pyám kó râ nghut lhê." ga taí akô nghut ri.

⁴⁹ Haú hkûn, yhangmoq chyáng mâ é, haú zân má hkyangjong mó nghut nyi é sù, Kayahpaq gi, yhangmoq lé, "Nungmoq gi, haí lháng a sé kó nghut ri-nhung! ⁵⁰ Haú byuhú gón htên byoq byuq râ htoq má, byuhú hau é matú, byù rayuq shî hkâm byi le gi, nungmoq é matú je gè râ hkyô lé, nungmoq, a myit jé kó nghut ri." ga taí kat ri.

⁵¹ Yhang haú su ga taí é gi, yhumsing myit dông a nghut e za, haú zân má, yhang gi, hkyangjong mó nghut é eq rajung za, haú Yudaq byuhú é matú, Yesuq shî hkâm byi râ nghut é hkyô lé le, ⁵² byuhú hau é matú baú a nghut e za, haú byo myín tô é, Garai Gasâng é yhangzô pé lé, shuí tsîng yù mù, rading ralhum za dut nhâng râ matú, shî hkâm byi râ nghut é hkyô lé le, myiqhtoi dang taí é ru nghut lhê.

⁵³ Haú nyí mai, yhangmoq gi, Yesuq lé sat râ matú chôm da bekô nghut ri.

⁵⁴ Hau é yanmai, Yesuq gi, Yudaq byu pê gyoro má, de de a sô shit wún e za, haú mai htoq luí, haú yoso eq chyâng lhùm é mau mâ é, Ehprim gâ é wà má ê mù, Yhâng é chángzô pé eq rahá nyi nyi ri.

⁵⁵ Haú Yudaq byu pê é Lhoqlhai Poí jé râ za nghut é hkûn, byù myo myo gi, Lhoqlhai Poí a jé shi má, lhoq san lhoq yúng hking dông

† 11:47 Yudaq byìn tú wapdoq lé Grik dông gi, San-hedrin gâ lhê.

yhumsing gùng lé lhoq sân-yúng yû râ matú, yosô wà pé mai, Yerusalem wà mó shut doq ló bum akô. ⁵⁶ Haû mù, yhangmoq gi, Yesuq lé ho nyi kô é nghut luí, haû noqkuq yhûm wàng má yap to uchyang, rayuq eq rayuq, "Nungmoq, hkâsu wó myit akô lú? Yhang gi, Poí má a lé lô râ gâ lhê lhà?" ga myí lhûm bum akô. ⁵⁷ Nghut kôlhang, haû hkyangjong agyi pé eq Hparishe pé gi, Yesuq lé wó chyup yû râ matú, Yesuq hkâmá nyi é lé, sê é sú ó yuq nghut kôle, yhangmoq lé lo shit kyo râ lhê ga dangmó hkyó tô akô nghut ri.

12

*Yesuq, Namngón-xû But
Byi Huí É Hkyó
Mht 26:6-13; Mrk 14:3-9*

¹ Haû Lhoqlhai Poí jé râ hkyuq nyi râ ashî hkûn, Yesuq gi, Yhâng èq shi é mai lhoq dui toq yu é sù, Lazaruq nyi é Behtani wà má ló jé ri. ² Haû má, Yesuq lé hkunggâ é dông myinzang byi tsô akô; Mahtaq gi, zoshuq jaú ri; Lazaruq gi, haû Yesuq eq rahá siboí má zô zung nyi bang má é rayuq nghut ri. ³ Haú hkûn, Mariq gi, haû nardu amyit mai za saí yu é, gyai hpaû é namngón-xû raxe í rûng kô yu lé mù, Yesuq é hkyí má hut gyun byi luí, yhâng é uxam èq sùt byi ri. Haû mù, yhûm haú gi, namngón-xû shôm bying to bê nghut ri.

⁴ Nghut kôlhang, Yesuq lé ap pyám râ nghut é, Yhâng é chángzo rayuq nghut sù, Yudaq Iskarut gi, ⁵ "Haû myùng bang lé byí pyám râ matú, haû namngón-xû lé denari sum sho èq haí mù a ùng pyám é lú?" ga taí ri. ⁶ Yhang haú su ga taí é gi, myùng bang lé chiq byí é yanmai taí é a nghut, yhang gi, ngùn htùng chùng sù nghut luí, haú má kat tô é ngùn lé, yhumsing é matú lhaq yu chùng chùng kut é, hkau sù nghut é yanmai taí é nghut ri.

⁷ Yesuq gi, "Nghut shang gaq; yhang gi, Ngo lé myhup yhum râ buinyi é matú, namngón-xû shí lé hkong to byí é nghut lhê. ⁸ Haû myùng bang gi, nungmoq eq rahá hkâ-nhám le nyi râ nghut lhê; nghut kôlhang, Ngò gi, nungmoq eq rahá ayang nyi nyi râ sù a nghut." ga tû taí ri.

⁹ Haú u lé, Yudaq byu pé ajùm ayò gi, haú má Yesuq nyi é lé sé kôluí, lé lo akô; haú bang gi, Yesuq é yanmai za lé kô é a nghut, haû Yhâng èq shí bê mai lhoq dui toq yu é Lazaruq lé, lé myâng naù kô é yanmai le nghut ri. ¹⁰ Haû mù, haû hkyangjong agyi pé gi, Lazaruq lé le, sat pyám râ matú chôm hpyé lhûm akô. ¹¹ Hkâsu mù gâ le, yhâng é yanmai, haû Yudaq byu pé myo myo gi, Yesuq chyáng lhing ló kômù, Yhang lé lumjìng bûm kô é yanmai nghut ri.

Yesuq, Yerusalem Wà Mó

Má Wang E Ló É Hkyô

Mht 21:1-11; Mrk 11:1-11; Luk 19:28-40

¹² Hau htang nyí, haû Poí má lé jé é byù moq mó gi, Yerusalem và mó shut Yesuq jé doq ló é hkyô lé, wó gyô bum akô. ¹³ Haû mù, yhang-moq gi, byùm-haq pé yu chùng mù, Yhang lé ê tê uchyang, "Hosana!"*

Haû Yhumsing é myìng mai jé lé lô Sû gi, hkungsô wó nyí sháng gaq ô!

Haû Israelaq byu pê é Hkohkâm gi, hkungsô wó nyí sháng gaq!"*

ga, taí garû bum akô nghut ri.

¹⁴ Haû hkûn, Yesuq gi, logúng zo radu lé myàng luí, doq jî ri;

¹⁵ haû gi, "Zi-un byizo† é, hkâgyuq; wú keq, nungmoq é hkohkâm gi, logúng zo má ji mù lé lo nyi ri."*

ga, kê tô é eq rajung za nghut ri.

¹⁶ Haû pé banshoq lé, Yhâng é chângzô pé gi, sâng-hi lé a sê gyo kó; nghut kôlhang, Yesuq gi, hpungwup shing kang dan hu huí é htâng má za sheq, haû pé gi, Yhang eq séng luí kê tô é hkyô lé le, haû eq rajung za, Yhang lé, yhangmoq mai kut bê hkyô lé le, bûn sê kat akô nghut ri.

¹⁷ Haû Yesuq gi, lup hkaû mâ é Lazaruq lé wut luí, shi é mai lhoq ðui toq yu é hkûn, Yhang eq rahá nghut é shiwa hpúng gi, haû hkyô lé, saksé

hkám byí nyi akô. ¹⁸ Haû mù, byù myo myo gi, Yesuq tûn shít é limik kumíhá hau é hkyô lé, wó gyo kê é yanmai, Yhang lé huí râ matú htoq e akô. ¹⁹ Hau é yanmai, haû Hparishe pé gi, "Wú keq, nganhúng, hkâsu yhang a ge kut lo nhung! Haû mingkan gón gi, Yhâng htâng châng bùm bekô." ga, rayuq eq rayuq taí lhùm bum akô nghut ri.

Yesuq, Yhang Shî Râ Hkyô Lé Te Taí É Hkyô

²⁰ Haû hkûn, noqkuq râ matú Poí má doq ló é bang má, Grik pé ra-am le bo tô akô. ²¹ Yhangmoq gi, Galile mau, Bet-saida và mó mâ é Hpilip chyáng lé jé kômù,

"Âhkaú ê, ngamoq gi, Yesuq lé myàng nau ri." ga, dung tôngbán akô. ²² Haû mù, Hpilip gi, Andre lé, ê taí kyô ri; Andre eq yháng nhik gi, Yesuq lé, ê taí kyô akô.

²³ Haû mù, Yesuq gi, "Haû Byu Yhangzo gi, hpungwup shing kang dan hû é huí râ matú, ahkyíng jé bê nghut ri.

²⁴ Ngò, nungmoq lé teng za taí kôlé, sungso racham gi, myigùng má gyó luí, shi byuq e za a nghut jáng, acham roq za dut nyi râ nghut lhê. Nghut kôlhang, shi byuq é nghut le gi, ashí myo myo lhoq htoq râ nghut lhê. ²⁵ Haû yhumsing é asak lé chyitdap é sù gi, asak sùm byuq râ nghut lhê. Mingkan shí má, haû

* **12:13** Hebre dang má, hosana gâ é gi, "ahkuí hkyi yù aq" gâ é nghut lhê. Nghut kôlhang, bun zo shí má gi, hkyá-on dang đông chung é nghut lhê. ✨ **12:13**

Hkyá-on 118:25-26 † **12:15** Hebre myíng đông Zi-un byizo gâ é gi, Yerusalem mâ é byu pé lé gâ é nghut lhê. ✨ **12:15** Zhk 9:9

yhumsing é asak lé a jú é sù kúm gi, ahtum abyuq é asak matú, yhumsing é asak lé wó sing to râ nghut lhê. ²⁶ Ngo lé dojaú é sù ó yuq nghut kôle, Ngá htâng cháng râ lhê; Ngò, hkámá nyi le, Ngá é dui-nhâng zoshâng le nyi râ nghut lhê. Ngá Wa gi, haú Ngo lé dojaú é sù lé, shigyaú râ nghut lhê.

²⁷ Ahkuí, Ngò, myit wuîhke nyi ri; Ngò hkâsu nghû taí râ lhi? 'Áwa ê, ahkyíng shî mai Ngo lé lhoq lhut yù laq.' nghû taí râ lhu? Nghut kôle, Ngò gi, ahkyíng shi é matú za sheq jé lé é ru nghut lhê. ²⁸ Áwa ê, Náng é myíng lé hpungwup shíngkang dan hu nhâng aq hkoí!" ga taí ri.

Haú hkûn, "Ngò gi, Ngá é myíng lé hpungwup shíngkang dan hu nhâng bê nghut luí, dum dan hu nhâng shirâ nghut lhê." gâ é htê, mauhkûng mai htoq lo ri. ²⁹ Haú má nyi tô é byù moq mó gi, haú lé wó gyo kôjáng, "Maugum gum ri." gâ bum akô; ra-am gi, "Yhang lé, maumang lagyo rayuq nyo ri." ga taí bum akô nghut ri.

³⁰ Haú hkûn, Yesuq gi, "Danghtê shî gi, Ngá é matú a nghut, nungmoq é matú ru nghut lhê. ³¹ Ahkuí gi, mingkan shî lé jéyáng râ ahkyíng nghut bê; mingkan shi é zau gi, ahkuí hkat htoq pyâm é hui râ nghut lhê. ³² Nghut kôlhang, Ngò gi, myigùng mai tu shap kat é hui é hkûn, byù lhunglhang bang lé, Ngá chyáng shê yù râ nghut lhê." ga taí ri. ³³ Yhang

haú su ga taí é gi, Yhang hkâsu kut shî râ nghut é hkyô lé shit é nghut ri.

³⁴ Haú hkûn, haú byù moq mó gi, "Haú tarâ laiká má, Hkrisduq gi, ahtum abyuq dui nyi râ nghut lhê gâ é lé sheq, ngamoq wó gyô wú é ru nghut le nhîng, 'Haú Byu Yhangzo gi, tu shap é hui ra râ nghut lhê.' nghû, Nàng hkâsu kut wó taí lhê lhu? Haú Byu Yhangzo gi, ó yuq nghut lhê lhu?" ga, myí akô.

³⁵ Haú mù, Yesuq gi, yhangmoq lé, "Nungmoq chyáng, haú maubó joq nyi râ ahkyíng gi, a lûm myáng lo nghut ri. Mauchut gi, nungmoq chyáng a hkyit jé sháng gaq, nungmoq chyáng, haú maubó joq nyi ashí hkûn sô nyi keq; hkâsu mù gâ le, haú mauchut má sô nyi é sù gi, yhang hká shut e ló nyi é lé, a sé nghut ri. ³⁶ Nungmoq gi, maubó é yhangzô pé wó dut kó sháng gaq, haú maubó joq nyi ashí hkûn, haú lé lumjíng keq." ga taí ri. Yesuq gi, dang haú ban taí jáng, yhangmoq chyáng mai htoq ló luí, haq byuq bê nghut ri.

Yudaq Byu Pé, A Lumjíng Ru Dut Nyi Kô É Hkyô

³⁷ Yesuq gi, yhangmoq é hí má, limik kumlhá haú pé banshoq kut shit kôlhang, yhangmoq gi, Yhang lé a lumjíng shi kó nghut ri.

³⁸ Haú gi, "Yhumsîng ê, nga-nhûng é danglù lé, ó yuq wá lumjíng byí wú é lhu?"

Haû Yhumsing é loq†
gi, ó yuq lé htoq shít
wú é l hú?"☆
ga, myiqhtoi Esai-aq taí tô é
dang lo dik é nghut ri.

39 Yhangmoq a wó lumjín
kô é hkyô gi, Esai-aq taí é
dang má,

40 "Yhang gi, yhangmoq é my-
oqjí lé lhoq chít byi
luí, yhangmoq é i-myít
lé lhoq htan to byi bê
nghut ri;

haû mù, yhangmoq gi, my-
oqjí èq a wó myâng, i-
myít èq a wó sê gyo,
Ngò, yhangmoq lé yâ
ge byi râ matú, a wó
lhing taû lò kó dut râ
nghut lhê."☆

ga le bo tô é yanmai nghut
lhê. 41 Esai-aq gi, Yesuq
é hpungwup shingkang lé
myang é yanmai, Yhang eq
sêng é hkyô lé, haû su ga taí é
nghut ri.

42 Nghut kôlhang, haû
uphkâng bang myo myo
lhang gi, haû u má, Yesuq lé
lumjín bum akô. Nghut kôle,
yhangmoq gi, Hparishe pé èq
tarajong mai lhoq htoq pyâm
é hui râ lé, gyuq kô é yanmai,
yhangmoq lumjín bê hkyô
lé a yín yu bùm kó nghut ri.

43 Hkâsu mù gà le, yhangmoq
gi, Garai Gasâng chyáng mâ é
aróng lé, ô nau é htoq má, byu
pê chyáng mâ é aróng lé, je ô
nau kô é yanmai nghut ri.

44 Haû mù, Yesuq, htê mó
èq taí é gi, "Ngo lé lumjín é
sû gi, Ngo lé baú lumjín é a

nghut; haû Ngo lé nhang kat
é Sû lé le, lumjín é nghut lhê.
45 Ngo lé myang é sû gi, haû
Ngo lé nhang kat é Sû lé le
myang é nghut lhê. 46 Ngò
gi, Ngo lé lumjín é sû ó yuq
le, mauchut hkaû má a nyi
sháng gaq nghû, maubó đông
mingkan má lé jé é nghut lhê.

47 Ngò gi, Ngá é dang lé wó
gyo luí, a châng é sû ó yuq lé
le, jéyáng râ a nghut; hkâsu
mù gà le, Ngò gi, mingkan
lé jéyáng râ matú jé lé é a
nghut; haû mingkan lé hkyi
yù râ matú sheq, jé lé é ru
nghut lhê. 48 Ngo lé he-ngik
luí Ngá é dang lé a hap yu
é sû lé, jéyáng râ Sû rayuq
nyi lhê; Ngò taí é danghkun
haû gi, haû jihtûm buinyi má,
haû yuq lé mara byi râ nghut
lhê. 49 Hkâsu mù gà le, Ngò
gi, Ngá é myít đông taí é a
nghut; nghut kôlhang, Ngò haí
taí râ eq hkâsu nghû taí râ lé
gi, haû Ngo lé nhang kat é sû
Îwa mai, Ngo lé hkunmó hkyô
to bê nghut lhê. 50 Haû Yhâng
é hkunmó gi, ahtum abyuq é
asak nghut é lé, Ngò sê lhê.
Haû mù luí, Ngò, haí taí kôlé,
haû Îwa mai Ngo lé taí kyô é lé
za, taí é nghut lhê." gà ri.

13

*Chángzô Pé É Hkyi Chi Byí É
Hkyô*

1 Haû Lhoqlhai Poí jé râ
hí má za, Yesuq gi, Yhang,
mingkan shí mai Yhâng Wâ
chyáng htot ló râ ahkyíng jé

† 12:38 Yhumsing é loq gà é gi, Yhumsing é hpungwup a-tsam lé gà é nghut lhê.

☆ 12:38 Esai 53:1 ☆ 12:40 Esai 6:10

bê hkyô lé, sê ri. Yhang gi, mingkan má nyi é, Yhâng é byu pé lé chyitdap nyi é nghut luí, jihtûm jé shoq Yhâng é chyitdap myit lé shit râ nghut lhê.

² Myinzang zô nyi bùm kô é u lé, nat Tsadán gi, Simun é yhangzo Yudaq Iskarut chyáng, Yesuq lé ap pyám râ myit kat byí to gû nghut ri. ³ Yesuq gi, haú lhunglhang lé Íwa mai Yhâng é loq má ap byi to bê nghut é lé le, Yhang gi, Garai Gasâng chyáng mai lé é sù nghut luí, Garai Gasâng chyáng dum taú ló râ sù nghut é lé le, sê ri. ⁴ Haú mù, Yhang gi, zohpoq mai toq luí, Yhâng é bumó lé hkyut pyám mù, hpyidum má hpajet ralhûm eq hpyihit hit tô ri. ⁵ Hau htâng, Yhang gi, jirung má uchyam hut kat mù, Yhâng é chángzô pé é hkyí chi byi luí, haú Yhâng é hpyidum má hit tô é hpajet eq sut huí byí ri.

⁶ Yhang gi, Simun Petruq chyáng jé jáng, Simun Petruq gi, "Yhumsîng ê, Nàng gi, ngá hkyí lé chi byi râ nghut lhê lú?" ga myí ri.

⁷ Haú hkûn, Yesuq gi, "Ngò, haí kut nyi é hkyô lé, ahkuí, nàng sê gyo râ a nghut; nghut kôlhang, htâng má sê gyo râ nghut lhê." ga tú tâi ri.

⁸ Petruq gi, "Ngá hkyí lé, Nàng, hkâ-nhám le wó chi byi râ a nghut." ga táí jáng, Yesuq gi, "Nàng lé, Ngò a chi byí é nghut jáng, nàng gi, Ngò eq séng râ a nghut." ga tú tâi ri.

⁹ Haú hkûn, Simun Petruq gi, "Yhumsîng ê, haú su nghut jáng gi, ngá é hkyí lé baú za a nghut, ngá é loq eq ulhum lé le chi byi laq!" ga tú tâi ri.

¹⁰ Yesuq gi, "Gùng chi bê sù gi, hkyí za chi jáng, ragùngdú é sanséng bê nghut ri. Nungmoq gi, sanséng bekô; nghut kôlhang, yuq hkangmó gi, sanséng é a nghut." ga tú tâi ri. ¹¹ Hkâsu mù gâ le, Yhang gi, Yhang lé ap pyám râ sù ó yuq nghut é lé, sê é yanmai, "Nungmoq gi, sanséng é bang chyat a nghut." ga táí é nghut ri.

¹² Yesuq gi, yhangmoq é hkyí lé ban chi byi jáng, Yhâng é bumó lé wut mù, Yhâng é jowò má ló dum zùng luí, yhangmoq lé myi é gi, "Nungmoq gi, ahkuí, ngò kut byí é hkyô lé, sê gyo akô lú? ¹³ Nungmoq, Ngo lé, 'Sará' ga le, 'Yhumsîng' ga le, wut kô é gi, a shut; hkâsu mù gâ le, Ngò gi, haú yuq yhang nghut lhê. ¹⁴ Ngò, nungmoq é Sará eq Yhumsîng nghut sù lhang, nungmoq é hkyí lé chi byí é nghut le gi, nungmoq le, rayuq eq rayuq é hkyí lé chi byí lhum râ dut lhê. ¹⁵ Nungmoq gi, Ngò, nungmoq lé kut byí é su kut kó sháng gaq nghû, Ngò, nungmoq lé alik kut shit tô é nghut lhê. ¹⁶ Ngò, nungmoq lé teng za táí kôlé, dui-nhâng zoshâng gi, yhumsîng htoq je kô é a nghut; lagyo gi, nhang kat é sù htoq je kô é a nghut. ¹⁷ Ahkuí, nungmoq gi, haú pé lé sé bekô nghut luí, châng kut

kô é nghut jáng, hkungsô wó kó râ nghut lhê.

Yesuq Lé Ap Pyám Râ Lé, Te Taí É Hkyô

¹⁸ Ngò gi, nungmoq ban-shoq bang lé lhoq ang luí taí é a nghut; Ngò hkyin yu é bang lé gi, Ngò sê lhê. Nghut kôlhang, 'Haú ngá é muk lé bo zô é sù gi, ngo lé, yhâng é hkyihtáng la-nhik èq nâng htíng râ nghut lhê.'[☆] gâ é Chyúmdang lé, lhoq dik râ matú ru nghut lhê.

¹⁹ Haú a dut htoq shimá, Ngò, nungmoq lé taí kyô nyi é gi, haú dut é hkûn, Ngò gi, haú Yuq* nghut é lé, nungmoq wó lumjíng kó râ matú nghut lhê.

²⁰ Ngò, nungmoq lé teng za taí kôlé, Ngò nhang kat é sù lé, lhom hap yu é sù ó yuq nghut kôlé, Ngo lé hap yu é nghut bê; Ngo lé hap yu é sù ó yuq nghut kôlé, haú Ngo lé nhang kat é Sù lé hap yu é nghut bê." gâ ri.

²¹ Yesuq gi, haú su ga taí é htâng má, myit wuîhke nyi mù, saksé hkâm é gi, "Ngò, nungmoq lé teng za taí kôlé, nungmoq má é rayuq sù gi, Ngo lé ap pyám râ nghut lhê." gâ ri.

²² Haú mù, Yhâng é chángzô pé gi, ó yuq lé taí záng nyi é hkyô lé, rago a sé kô é yanmai, rayuq eq rayuq wú tsuq lhùm bum akô nghut ri. ²³ Haú Yesuq chyitdap é chángzo rayuq gi, Yesuq é tanghkoí nâm má leq nge zung tô ri. ²⁴ Haú mù, Simun

Petruq gi, chángzo haú yuq lé, loq lik kat mù, "Yhang, ó yuq lé lhoq ang luí, taí nyi é hkyô lé, myi wú aq." ga taí ri.

²⁵ Haú mù, chángzo haú gi, Yesuq é tanghkoí má saí leq nge zung mù, "Yhumsîng ê, haú gi, ó yuq nghut lhê lhú?" ga, Yhang lé myi ri.

²⁶ Yesuq gi, "Ngò, muk jap zo shí lé jum yù mù, byí é sù gi, haú yuq nghut lhê." ga tû taí luí, muk jap zo haú lé jum yù mù, Simun é yhangzo Yudaq Iskarut lé byí ri. ²⁷ Yudaq gi, muk haú lé yù zo kat é eq, Tsadán gi, yhâng chyáng wàng bê nghut ri.

Haú mù, Yesuq gi, "Nàng kut râ é hkyô lé, hân kut aq hkoí." ga yhang lé taí kat ri.

²⁸ Nghut kôlhang, yhang lé, Yesuq haú su ga haí mù taí é hkyô lé, zohpoq haú má nyi tô é bang gi, rayuq lháng a sé gyo kó nghut ri. ²⁹ Haú Yudaq gi, ngùn zum sù nghut é yanmai, ra-am gi, haú Poí má râ é hkyô lé, ê wuî râ matú, Yesuq taí ri ga luí le, myùng bang lé rajung jung byí nhang ri ga luí le, myit yu bum akô nghut ri. ³⁰ Yudaq gi, muk haú lé lhom yù eq, htoq ló byuq bê nghut ri. Haú u gi, mauchut bê nghut ri.

Petruq He-ngik Pyám Râ Lé, Yesuq Te Taí É Hkyô

Mht 26:31-35; Mrk 14:27-31; Luk 22:31-34

³¹ Haú yuq htoq ló byuq jáng, Yesuq taí é gi, "Ahkuí,

☆ 13:18 Hkya-on 41:9 * 13:19 Haú Yuq gâ é gi, Hkrisduq lé gâ é nghut lhê.

haù Byu Yhangzo gi, hpungwup shing kang dan hù é nghut luí, Garai Gasang gi, haù Byu Yhangzô é yanmai, hpungwup shing kang dan hu bê nghut ri. ³² Garai Gasang gi, haù Byu Yhangzô é yanmai, hpungwup shing kang dan hù é nghut jáng, Yhang le, Yhang má haù Zo lé hpungwup shing kang dan hu nhâng râ nghut lhê; radá dâm dan hu nhâng râ nghut lhê.

³³ Ngá zo pé ê, Ngò, nungmoq eq rahá nyi râ gi, razup za ru nghut alô. Nungmoq gi, Ngo lé hô kó râ nghut lhê; nghut kôlhang, 'Ngò ló é jang má, nungmoq wó jé kó râ a nghut.' nghú, haù Yudaq byu pé lé, Ngò taí é eq rajung za, ahkuí, nungmoq lé le, Ngò taí lhê.

³⁴ Ngò, nungmoq lé, hkunmó asik byi to kô lé, nungmoq yhangchang chyitdap lhum keq. Ngò, nungmoq lé chyitdap é su, nungmoq yhangchang chyitdap lhum râ dut lhê. ³⁵ Nungmoq yhangchang chyitdap lhum kô é nghut jáng, nungmoq gi, Ngá é chángzô pé nghut é hkyô lé, byù lhunglhang bang sé kó râ nghut lhê." gâ ri.

³⁶ Haù hkûn, Simun Petruq gi, "Yhumsîng ê, Nang, hká shut ló râ lú?" ga, Yhang lé myi jáng, Yhang gi, "Ngò ló é jang má, nungmoq, ahkuí a wó châng kó râ nghut lhê. Nghut kôlhang, htâng má gi, nungmoq châng ra kó râ nghut lhê." ga tû taí ri.

³⁷ Petruq gi, "Yhumsîng ê, haí mù luí, ahkuí ngò Nang htâng a wó châng é lú? Ngò gi, Nang é matú, shí hkám râ rì rì nghut lhê." ga taí ri.

³⁸ Haù mù, Yesuq taí é gi, "Nang gi, gè gè yhang, Ngá é matú shí hkám râ lú? Ngò, nang lé teng za taí lé, woq a tûn shimá, nang, Ngo lé sum dâm he-ngik pyám râ nghut lhê.

14

Yesuq, Yhang É Chángzô Pé Lé Nhk Tîng É Hkyô

¹ Nungmoq é i-myt nhikhum lé, myit wui myit hkê hkâdut nhâng kó. Garai Gasang lé lùm keq; Ngo lé le lùm keq. ² Ngá Wâ é yhûm má, nyi jowò myo myo joq lhê; a joq é ru nghut le gi, noq mai, Ngò, nungmoq lé taí kyo râ nghut lhê. Ngò, haù má ló é gi, nungmoq é nyi jowò ló hên lánng râ matú ru nghut lhê. ³ Ngò gi, ló mù, nungmoq é matú nyi jowò ló hên é nghut jáng, Ngò nyi é jang má nungmoq le wó nyi shoq, Ngò eq rahá nyi râ matú, Ngò dum taù lé mù, nungmoq lé, lé shuí yù râ nghut lhê. ⁴ Ngò ló é jang má jé é hkyô lé, nungmoq sê lhê." gâ ri.

Yesuq Za Hkyô

⁵ Haù hkûn, Htomaq gi, Yhang lé, "Yhumsîng ê, Nang hká shut ló é lé lhang, ngamoq a sê le nhîng, hkyô haù lé, ngamoq hkâsu kut wó sé râ lú?" ga myí ri.

⁶ Yesuq gi, "Ngò gi, hkyô nghut lhê; haû tengmán hkyô eq asak le nghut lhê. Ngò mai za a nghut jáng, ó yuq le, Íwâ chyáng wó jé é a nghut. ⁷Nungmoq, gè gè yhang, Ngo lé sé kô é nghut le gi, Ngá Wa lé le, nungmoq sé kó rá nghut lhê. Ahkuí mai, nungmoq gi, Yhang lé sé kô é htoq agó, myàng le myang wú bekô nghut lhê." ga tú taí ri.

⁸ Haú hkûn, Hpilip gi, "Yhumsîng ê, ngamoq lé, haú Íwa tân shit laq, haú hkûn, ngamoq nhik shî rá nghut lhê." ga taí ri.

⁹ Yesuq tú taí é gi, "Hpilip ê, Ngò, nungmoq eq shî myáng lhang nyi lò bê le nhîng, nàng, Ngo lé a sé lúhú? Ngo lé myang é sù gi, haú Íwa lé myàng bê nghut ri; haú nghut le nhîng, 'Ngamoq lé, haú Íwa tân shit laq.' nghû, nàng hkâsu wó taí lhê lúhú? ¹⁰ Ngò gi, haú Íwa má nghut nyi lúi, haú Íwa gi, Ngò má nghut nyi é hkyô lé, nàng a lumjîng lúhú? Ngò, nungmoq lé taí é dang haú pé gi, Ngá é myit mai taí é a nghut; haú Ngò má lúng nyi é Íwa sheq, Yhâng é mú zuí nyi é ru nghut lhê. ¹¹ Ngò gi, haú Íwa má nghut nyi lúi, haú Íwa gi, Ngò má nghut nyi lhê nghû é lé lumjîng keq; haú a nghut jáng, kut shit é limik kumlhá pé dông za lhang, lumjîng keq. ¹² Ngò, nungmoq lé teng za taí kôlé, Ngo lé lumjîng é sù gi, Ngò kut é muzó lé kut rá nghut lhê. Ngò gi, haú Íwâ chyáng

ló rá nghut é yanmai, haú yuq gi, hau htoq je kô é muzó pé lé lhang kut rá nghut lhê. ¹³ Haú Yhangzô é yanmai, Íwâ é hpungwup shingkan wó hû ló shoq, Ngá é myîng lé lang lúi, nungmoq hái jung dung kôlhang, Ngò gyo byi rá nghut lhê. ¹⁴ Nungmoq gi, Ngá é myîng lé lang lúi, hái dung kôlhang, Ngò gyo byi rá nghut lhê.

Chyoiyúng Woi-nyí Byi Râ Danggidîq

¹⁵ Nungmoq gi, Ngo lé chyitdap kô é nghut jáng, Ngò hkyô tô é hkunmó pé lé, cháng kó rá nghut lhê. ¹⁶ Haú Íwa gi, nungmoq eq ahtum abyuq nyi nyi rá nghut é, hpaqchyí byi Sû gotû rayuq, nungmoq lé byi rá matú, Ngò gi, haú Íwa lé dung rá nghut lhê. ¹⁷ Haú yuq gi, tengmán é Woi-nyí nghut lhê. Haú mingkan gi, Woi-nyí haú lé a myàng a sê é yanmai, Yhang lé a wó hap yu é nghut lhê. Nghut kôlhang, Yhang gi, nungmoq eq rahá nyi nyi é nghut lúi, nungmoq má nyi to rá Sû nghut é yanmai, nungmoq gi, Yhang lé sê akô. ¹⁸ Ngò gi, nungmoq lé, chuizô pé dông pyâm to rá a nghut; nungmoq chyáng Ngò dum jé lé rá nghut lhê. ¹⁹ Adê myáng má, haú mingkan gi, Ngo lé a myàng lo rá nghut lhê; nghut kôlhang, nungmoq gi, Ngo lé myàng kó rá nghut lhê. Hkâsu mù gâ le, Ngò gi, asak dui nyi é nghut mù, nungmoq le dui kó rá nghut lhê. ²⁰ Ngò gi, Ngá

Wâ chyáng nghut nyi é lé le, nungmoq gi, Ngò má nghut nyi é lé le, Ngò gi, nungmoq má nghut nyi é lé le, haú buinyi má, nungmoq sé kó râ nghut lhê. ²¹ Ngá é hkunmó pé lé wó mù, châng kut é sù ó yuq nghut kôle, Ngo lé chyitdap é sù nghut ri. Ngo lé chyitdap é sù lé gi, Ngá Wa chyitdap râ nghut lhê; Ngò le, haú yuq lé chyitdap luí, Ngá gûng lé yhang, yhang lé shit râ nghut lhê." gâ ri.

²² Hau htâng, (Yudaq Iskarut a nghut sù) Yudaq gi, "Yhumsing ê, Nàng gi, haú mingkan lé Náng gûng a shit e za, ngamoq lé shit râ nghut é gi, haí mù nghut lhê lú?" ga myí ri.

²³ Haú hkûn, Yesuq tû taí gi, "Rayuq yuq, Ngo lé chyitdap é nghut le gi, Ngá dang lé gyo râ nghut lhê. Ngá Wa le, haú yuq lé chyitdap râ nghut luí, Ngá hpe gi, haú yuq chyáng lé mù, yhang eq rahá nyi râ nghut lhê. ²⁴ Ngo lé a chyitdap é sù gi, Ngá dang lé gyo râ a nghut. Nàng wó gyô é dang shí pé gi, Ngá myit mai taí é a nghut; dang haú pé gi, Ngo lé nhang kat é Sù, haú Íwâ é ru nghut lhê.

²⁵ Ngò gi, shí pé banshoq lé, nungmoq eq rahá nyi tô ashî u lé taí bê nghut lhê.

²⁶ Nghut kôlhang, Ngá é mying dông, haú Íwa nhang kat râ nghut é, hpaqchyí byi Sù nghû é, haú Chyoiyúng Woinyí gi, nungmoq lé, jung hkanmó mhoq byi râ eq, Ngò, nungmoq lé taí kyo bê

hkyô lhunglhang, nungmoq lé lhoq pun râ nghut lhê. ²⁷ Ngò gi, nungmoq chyáng, nguingón hkyô tô to byi bê; Ngá é nguingón hkyô, Ngò, nungmoq lé byí é nghut lhê. Ngò gi, mingkan byí é dông, nungmoq lé byí é a nghut. Nungmoq é i-myt nhiklhum lé, myit wui myit hke é eq gyuq kyûm é hkâdut nhâng kó.

²⁸ 'Ngò gi, ló byuq luí, nungmoq chyáng dum taú lé râ nghut lhê.' nghû, Ngò taí é lé, nungmoq wó gyô yù bê nghut lhê. Nungmoq, Ngo lé chyitdap kô é nghut le gi, haú Íwâ chyáng Ngò ló râ nghut é hkyô lé, nungmoq gabú kó râ nghut lhê; hkâsu mù gâ le, haú Íwa gi, Ngá htoq je ko Sù nghut lhê. ²⁹ Haú dut é hkûn, nungmoq lumjing kó sháng gaq nghû, ahkuí, haú a dut shimá, Ngò, nungmoq lé taí kyô é nghut lhê. ³⁰ Ahkuí mai, Ngò gi, nungmoq lé, dang myo myo wó nyô râ a nghut lo; hkâsu mù gâ le, mingkan shi é zau gi, jé lé lo nyi bê nghut ri. Haú yuq gi, Ngo lé up râ ahkáng haí a wó é sù nghut ri. ³¹ Nghut kôlhang, haú Íwa lé Ngò chyitdap é hkyô, mingkan sé sháng gaq nghû, Ngò gi, Ngá Wa hkyô tô é hkunmó eq roq za kut nyi lhê.

Toq keq, e ló sháng hkoi.

15

Tsibiyiq Nuí Eq Akoq Pê É Hkyô

¹ Ngò gi, haú tsibiyiq nuí akying nghut lhê; Ngá Wa

gi, tsibiyiq hkyâm yhumsîng nghut lhê. ² Yhang gi, ashi a zuî é akoq hkangmó lé, Ngá chyáng mai kyik pyám luî, ashi zuî é akoq hkangmó lé kúm gi, ashi je myo zui sháng gaq ga, shang pyám byî ri. ³ Nungmoq gi, Ngò, nungmoq lé tai é mungdang hau é yan-mai, sanséng gû nghut bekô nghut ri. ⁴ Ngò má nyi nyi keq; Ngò le, nungmoq má nyi nyi râ nghut lhê. Akoq hkangmó gi, tsibiyiq nuî má nui nyi é za a nghut jáng, yhang baú ashi wó zuî é a nghut. Haû eq rajung za, nungmoq le, Ngò má nyi nyi e za a nghut jang, ashi wó zui kó râ a nghut.

⁵ Ngò gi, tsibiyiq nuî nghut lhê; nungmoq gi, akoq pé nghut akô. Byù rayuq yuq, Ngò má nyi nyi é nghut luî, Ngò gi, yhang má nyi nyi é nghut jáng, haú yuq gi, ashi myo myo zui râ nghut lhê; hkâsu mù gâ le, Ngò mai gang jáng, nungmoq gi, haî le a wó kut kô é nghut lhê. ⁶ Ngò má a nyi nyi é sù gi, haû dú pyâm é hui luî, kyuq shi byuq é akoq eq wuí ri; haû sù é akoq pé gi, byu pê eq guq yù mù, myihkyóm má dú kat pyâm é hui luî, nyé gyó byuq râ nghut lhê. ⁷ Nungmoq gi, Ngò má nyi nyi luî, Ngá é dang pé gi, nungmoq má bo nyi é nghut le gi, nungmoq ô nau é haî nghut kôlhang, dung keq; haú hkûn, nungmoq lé byi râ nghut lhê. ⁸ Nungmoq gi, haû ashi ga-myhó zuî é dông, Ngá Wâ é hpungwup shing kang lé

lhoq htoq shit é nghut luî, Ngá é chángzô pé nghut é hkyô lé tân shit nyî bekô nghut ri.

⁹ Haû Îwa gi, Ngo lé chyitdap é su, Ngò gi, nungmoq lé chyitdap é nghut lhê. Ahkuî, Ngá é chyitdap myit má gîng nyi keq. ¹⁰ Ngò gi, Ngá Wâ é hkunmó lé châng é nghut luî, Yhâng é chyitdap myit má gîng nyi é su, Ngá é hkunmó lé, nungmoq châng nyi kô é nghut jáng, nungmoq gi, Ngá é chyitdap myit má gîng nyi kó râ nghut lhê. ¹¹ Nungmoq má Ngá é gabú hkyô joq nyi râ eq, nungmoq é gabú hkyô wó byíng jup râ matú, Ngò, nungmoq lé, dang shí pé tai é nghut lhê. ¹² Ngò, nungmoq lé chyitdap é su, nungmoq yhangchang chyitdap lhum keq; haû gi, Ngá é hkunmó nghut lhê. ¹³ Haû yhumsing é luzúm wui é matú, yhumsing é asak ap byî pyâm é chyitdap myit htoq kô é, chyitdap myit gi, ó yuq chyáng le a bò nghut ri. ¹⁴ Ngò hkyô tô é hkunmó pé lé, nungmoq châng kut é nghut jáng, nungmoq gi, Ngá é luzúm wuí nghut bekô. ¹⁵ Ngò gi, Ngá Wâ chyáng mai Ngò wó gyô yu é hkyô lhunglhang, nungmoq lé sé nhâng bê nghut é yanmai, nungmoq lé, dui-nhâng zoshâng wui nghû, a wut lô e za, luzúm wui nghû wut é nghut lhê; hkâsu mù gâ le, dui-nhâng zoshâng gi, yhâng yhumsîng hpô é muzó lé a châng sé nghut ri. ¹⁶ Nungmoq, Ngo lé hkyin yu é a nghut, Ngò sheq,

nungmoq lé, htoq e ló mù, gîng nyi é ashi zui râ matú hkyin masat tô é ru nghut lhê. Hau hkûn sheq, Ngá é mying lé lang mù, haû Íwâ chyáng nungmoq hái jung dung kôle, Yhang byi râ nghut lhê.¹⁷ Nungmoq yhangchang chyitdap lhum keq; haû gi, Ngá é hkunmó nghut lhê.

Haû Mingkan Gi, Chángzô Pé Lé A Jú É Hkyô

¹⁸ Haû mingkan, nungmoq lé a jú é nghut jáng, Ngo lé hí a jú kut bé nghut é lé, sé nyi keq. ¹⁹ Nungmoq gi, haû mingkan eq sêng é bang nghut é nghut jáng, haû mingkan gi, yhang eq sêng é bang nungmoq lé chyitdap râ nghut lhê. Nghut kôlhang, nungmoq lé gi, Ngò, haû mingkan mai hkyin htoq yû bê nghut luí, nungmoq gi, haû mingkan eq a séng lo kô é yanmai, mingkan gi, nungmoq lé a jú é nghut ri. ²⁰ 'Dui-nhâng zoshâng gi, yhâng é yhumsing htoq je kô é a nghut.' nghû, Ngò, nungmoq lé taí é dang pé lé bûn nyi keq. Ngo lé lhang, yhangmoq zing-rî yû bekô nghut le gi, nungmoq lé le, zing-ri kó râ nghut lhê. Ngò mhoqshit é hkyô lé, yhangmoq cháng kô é nghut le gi, nungmoq mhoqshit é lé le, cháng kó râ nghut lhê. ²¹ Nghut kôlhang, yhangmoq gi, Ngá é mying é yanmai, nungmoq lé haû su kut kó râ nghut lhê; hkâsu mù gâ le, haû Ngo lé nhang

kat é Sû lé, yhangmoq a sé kôluí nghut ri. ²² Yhangmoq lé, Ngò a lé nyo wú é nghut le gi, yhangmoq mara bò kó râ a nghut; nghut kôlhang, ahkuí gi, yhangmoq mara wó taí hkyut râ a nghut lo. ²³ Ngo lé a jú é sù gi, Ngá Wa lé le a jú é sù nghut ri. ²⁴ Haû ó yuq lhang a wó kut é muzó lé, Ngò, yhangmoq chyáng a kut é nghut le gi, yhangmoq mara bò kó râ a nghut; ahkuí kúm gi, laklaí kumlhá haû pé lé yhangmoq myang nyi kôlhang, Ngò eq Ngá Wa lé a jú kô é nghut ri. ²⁵ Haû gi, 'Yhangmoq gi, jungúyô má Ngo lé a jú kut akô nghut ri.'* ga, yhangmoq é tarâ má kâ tô é dang lé lhoq dik é nghut ri.

²⁶ Haû Íwâ chyáng mâ é, Ngò nhang kat râ nghut é, Íwa mai htoq lé lo é tengmán é Woi-nyí nghut é, haû hpaqchyí byi Sû jé lé é hkûn, Ngá é hkyô lé saksé hkâm byi râ nghut lhê. ²⁷ Nungmoq le, Ngò eq rahá sâng-hi mai nyi bekô nghut é yanmai, saksé hkâm byi ra kó râ nghut lhê.

16

¹ Nungmoq gi, myit lingbat jowò a joq kó sháng gaq nghû, haû pé banshoq lé, Ngò, nungmoq lé taí kyo bê nghut lhê. ² Yhangmoq gi, nungmoq lé, tarajong mai hkat htoq pyám kó râ nghut lhê; ó yuq nghut kôle, yhang mai nungmoq lé sat pyâm é hkûn, yhang gi, haû đông mai Garai Gasang lé dojaú

* 15:25 Hkya-on 35:19; 69:4

nyi lê ga myit yu é ahkyíng, gè gè yhang, jé râ nghut lê.
³ Yhangmoq gi, haû Íwa lé le, Ngo lé le, a sé kô é yanmai, haû su kut kó râ nghut lê. ⁴ Nghut kôlhang, nungmoq lé, Ngò sidiq byí é hkyô lé, ahkyíng jé jáng nungmoq bûn nyi kô sháng gaq nghû, Ngò haû hkyô taí kyô é nghut lê. Ngò gi, nungmoq eq rahá nghut nyi é yanmai, haû hkyô lé, hí hkûn nungmoq lé a taí kyô é nghut lê.

Choyiyúng Woi-nyí é muzó

⁵ Nghut kôlhang, ahkuí, Ngò gi, Ngo lé nhang kat Su chyáng ló râ nghut lê. Nghut kôlhang, nungmoq ó yuq le, 'Nàng, hká shut ló râ lú?' ga, Ngo lé a myi kó nghut ri. ⁶ Ngò, nungmoq lé, haû hkyô pé taí kyô é yanmai, nungmoq é i-myt unghkaû má iyon hkyô byíng to bekô nghut ri. ⁷ Nghut kôlhang, Ngò, nungmoq lé teng za taí kôlé, Ngò ló byuq é gi, nungmoq é matú je gè râ hkyô ru nghut lê. Ngò ló byuq e za a nghut jáng, haû hpaqchyí byi Sù gi, nungmoq chyáng lé râ a nghut; Ngò ló jáng sheq, Yhang lé, Ngò, nungmoq chyáng nhang kat byi râ nghut lê. ⁸ Yhang jé lé é hkûn, Yhang gi, haû mara wó é eq séng luí le, dingmán hkyô eq séng luí le, tarâ jéyáng hkyô eq séng luí le, haû mingkan lé tân shit râ nghut lê. ⁹ Haû yubak mara wó é eq séng luí ga jang, byu pé gi, Ngo lé a lumjíng kô é yanmai nghut ri. ¹⁰ Haû

dingmán hkyô eq séng luí ga jang, Ngò gi, haû Íwa chyáng ló râ nghut luí, nungmoq, Ngo lé a myàng lo kó râ nghut é yanmai nghut ri. ¹¹ Haû tarâ jéyáng hkyô eq séng luí ga jang, mingkan shi é zau gi, mara byí é huí é nghut é yanmai nghut ri.

¹² Ngò gi, nungmoq lé taí râ hkyô myo myo wó ashí; nghut kôlhang, ahkuí, nungmoq wó hkâm kó râ a nghut. ¹³ Nghut kôlhang, haû tengmán é Woi-nyí jé lé é hkûn, Yhang gi, tengmán hkyô lhungháng lé shuí sé râ nghut lê. Yhang gi, Yhâng myit dông taí râ a nghut; Yhang, wó gyô yu é hkyô lé za taí luí, dut lò râ hkyô pé lé le, nungmoq chyáng taí pyô râ nghut lê. ¹⁴ Yhang gi, Ngò wó é lé, yù mù, nungmoq lé taí kyô é eq sé nhang é dông, Ngá é hpungwup shingkang lé hú ló nhâng râ nghut lê. ¹⁵ Haû Íwa wó é lhungháng gi, Ngá é chyat nghut lê. Hau é yanmai, haû Woi-nyí gi, Ngò wó é lé yù mù, nungmoq lé sé nhâng râ nghut lê nghû, Ngò taí é nghut lê.

¹⁶ Adê myáng má, nungmoq gi, Ngo lé a myàng lo kó râ nghut lê; hau htâng, dum adê myáng má, nungmoq gi, Ngo lé myàng kó râ nghut lê." gâ ri.

Changzô Pé É Iyon Hkyô Gi, Gabú Hkyô Taû Dut Râ

¹⁷ Yhâng é chángzô pé ram gi, "Adê myáng má, nungmoq gi, Ngo lé a myàng lo

kó rã nghut lhê; hau htâng, dum adê myáng má, nungmoq gi, Ngo lé myàng kó rã nghut lhê.' gâ é eq 'Ngò gi, Íwã chyang ló rã nghut é yanmai nghut lhê.' ga, Yhang taí é gi, haí jung gá nau é nghut lhê lú?" ga, rayuq eq rayuq myí lhúm bum akô. ¹⁸ Hau htoq agó, yhangmoq gi, "Adê myáng má,' gâ é gi, Yhang haí jung gá nau lhê lú? Nga-nhúng gi, Yhang haí taí nau é lé a sê gyo." ga, taí lhúm bum akô nghut ri.

¹⁹ Yesuq gi, yhangmoq myi nau kô é hkyô lé sê ri; hau mù, Yhang, yhangmoq lé taí é gi, "Adê myáng má, nungmoq gi, Ngo lé a myàng lo kó rã nghut lhê; hau htâng, dum adê myáng má, nungmoq gi, Ngo lé myàng kó rã nghut lhê.' nghú, Ngò taí é lé, haí jung gá nau lhê laq nghú, rayuq eq rayuq myi lhum nyi akô lú?" ²⁰ Ngò, nungmoq lé teng za taí kôlé, hau mingkan gi, gabú nyi é u lé, nungmoq gi, ngaù é eq iyon yón é hui kó rã nghut lhê. Nungmoq gi, iyon yón é hui kó rã nghut lhê; nghut kôlhang, nungmoq é iyon hkyô gi, gabú hkyô taú dut rã nghut lhê. ²¹ Myiwe gi, zoshâng hkú rã nghut jáng, zohkú-nò nò rã ahkyíng jé bê nghut é yanmai, myit chiq nyi ri; nghut kôlhang, zoshâng lé wó hku htoq kat é hkún gi, mingkan htoq má zoshâng rayuq wó hku to bê nghut lui, yhang gabú é yanmai, hau no hpu é hkyô lé a bun byuq lo nghut ri. ²² Haú eq ra-

jung za, ahkuí gi, nungmoq iyon yón é ahkyíng nghut ri; nghut kôlhang, Ngò, nungmoq lé dum huí é hkún, nungmoq gi, gabú kó rã nghut lhê; nungmoq é gabú hkyô hau lé, nungmoq chyang mai ó yuq èq le wó yu pyám byi rã a nghut. ²³ Haú buinyi má, nungmoq gi, Ngo lé, haí le a dung lo kó rã nghut lhê. Ngò, nungmoq lé teng za taí kôlé, nungmoq gi, Ngá myíng lang lui, Ngá Wã chyang haí dung kôle, Yhang byi rã nghut lhê. ²⁴ Ahkuí jé shoq, nungmoq gi, Ngá myíng lé lang lui, haí le a dúng wú shi kó nghut ri. Dung keq, hau hkún, nungmoq myang hap yù kó rã nghut lui, nungmoq é gabú hkyô gi, byíng jup lò rã nghut lhê.

²⁵ Ngò gi, nungmoq lé, dangtú dông hau pé taí kyo bê nghut lhê; nghut kôlhang, Ngò gi, dangtú a chùng lô e za, hau Íwa eq sêng é hkyô, nungmoq lé san za taí kyô é ahkyíng jé rã nghut lhê. ²⁶ Haú buinyi má, nungmoq gi, Ngá é myíng lé lang lui dung kó rã nghut lhê. Ngò gi, nungmoq é matú, hau Íwã chyang dung byi rã nghut taí nyi é a nghut. ²⁷ Hkásu mù gâ le, nungmoq gi, Ngo lé chyitdap kô é eq, Ngò gi, Íwa Garai Gasâng chyang mai jé lé é Sù nghut é lé, nungmoq lumjíng kô é yanmai, hau Íwa yhang, nungmoq lé chyitdap é nghut lhê. ²⁸ Ngò gi, hau Íwã chyang mai htoq lé mù, mingkan má lé jé wang é nghut lhê; ahkuí,

Ngò gi, mingkan mai htoq mù, haú Íwâ chyáng dum taú ló râ nghut lhê." gâ ri.

²⁹ Haú hkûn, Yesuq é chángzô pé gi, "Ahkuí, Nàng gi, dangtú a chûng é dông, san za taí kyô nyi é nghut bê!
³⁰ Nàng gi, lhunglhang lé sê é sù nghut é lé le, Nàng lé, ó yuq èq le dangmyi myi nó a râ é hkyô lé le, ahkuí, ngamoq wó sé bê. Hau é yanmai, Nàng gi, Garai Gasâng chyáng mai lé é sù nghut é lé, ngamoq lumjǐng lhê." ga taí bum akò.

³¹ Haú hkûn, Yesuq tũ taí é gi, "Nungmoq, ahkuí lumjǐng bekò lhú? ³² Nghut kòlhang, nungmoq gi, lhoq pyo pyâm é hui luí, Ngo lé baú za tô pyâm to kômù, ó le ô yhũm shut ló byuq râ ahkyíng jé lo nyi bê nghut ri; ahkuí lhang jé to bê. Nghut kòlhang, Ngò gi, Ngò baú za a nghut; hkâsu mù gâ le, Ngá Wa gi, Ngò eq rahá nghut nyi lhê.

³³ Nungmoq gi, Ngò má nuingón hkyô wó kó sháng gaq nghũ, Ngò gi, haú hkyô pé lé taí kyô é nghut lhê. Nungmoq gi, mingkan shí má, wuĩhke hkyô hui kó râ nghut lhê; nghut kòlhang, myit wum lhoq kǐng keq. Ngò gi, mingkan lé ung pyâm bê nghut lhê." gâ ri.

17

Yesuq Kyũdũng É Hkyô

¹ Yesuq gi, haú su ga taí é htàng má, mauhkũng shut tu wú luí, kyũdũng é gi, "Áwa ê, ahkyíng jé bê nghut ri; haú Nung Zo gi, Nang lé

hpungwup shingkang wó hu nhâng sháng gaq, Nung Zo lé hpungwup shingkang hũ ló nhâng laq ô! ² Hkâsu mù gâ le, Nàng mai Yhang lé ap byi tô é bang banshoq lé, Yhang, ahtum abyuq é asak wó byi sháng gaq ga, Nàng gi, byũ lhunglhang bang lé up râ ahkáng, Yhang lé byi tô é yanmai nghut ri. ³ Nàng za tengmán é Garai Gasang nghut é eq Nàng nhang kat é sù Yesuq Hkrisduq lé, sê é gi, ahtum abyuq é asak nghut lhê. ⁴ Ngò gi, Nàng, Ngo lé wũn waq nhang é muzó lé lhoq pán é dông, myidàm htoq má, Náng é hpungwup shingkang lé lhoq htoq shit bê nghut lhê. ⁵ Áwa ê, haú mingkan lhang a joq shí mai, Ngò, Nàng eq rahá chòm wó é hpungwup shingkang èq, ahkuí, Náng é myoq hí má, Ngo lé hpungwup shingkang dan hu nhâng laq.

Chángzô pé matú, Yesuq kyũdung byi é hkyô

⁶ Mingkan mai, Nàng, Ngo lé hkyin htoq yũ byi é bang lé, Ngò gi, Náng é myìng lhoq htoq shit bê nghut lhê. Yhangmoq gi, Náng é byu pé nghut bekò; Nàng gi, yhangmoq lé, Ngá é loq má ap byi bê nghut luí, yhangmoq gi, Náng é dang lé châng kut bekò nghut ri. ⁷ Nàng, Ngo lé byi é lhunglhang gi, Náng chyáng mâ é nghut é lé, ahkuí, yhangmoq sé bekò nghut ri. ⁸ Hkâsu mù gâ le, Nàng, Ngo lé byi kat é mungdang pé lé, Ngò, yhangmoq lé

byi bê nghut luí, yhangmoq gi, haú pé lé hap yù bekô nghut ri; Ngò gi, Náng chyáng mai lé é sù nghut é lé le, yhangmoq hkyak sê akô; Nàng, Ngo lé nhang kat é hkyô lé le, yhangmoq lumjìng bekô nghut ri. ⁹ Ngò gi, yhangmoq é matú kyûdung byí lhê. Ngò gi, haú mingkan byu pê é matú dung byi nyi é a nghut; Nàng, Ngo lé ap byi tô é bâng é matú sheq dung byí nyi é ru nghut lhê; hkâsu mù gâ le, yhangmoq gi, Náng é byu pé nghut akô. ¹⁰ Ngò wó é lhunglhang gi, Náng é chyat nghut mù, Nàng wó é lhunglhang le, Ngá é chyat nghut lhê. Haú mù, Ngò gi, yhangmoq má hpungwup shing kang hù é hui bê nghut lhê. ¹¹ Ngò gi, Nàng chyáng lò râ nghut lhê mù, mingkan htoq má nyi nyi râ a nghut lo; nghut kôlhang, yhangmoq gi, mingkan htoq má nyi nyi shirâ nghut lhê; chyoyúng é Âwa ê! Ngá hpe gi, ragùng za nghut é su, yhangmoq le ragùng za wó dut nyi kó sháng gaq, Nàng, Ngo lé byi é, haú Náng myìng é a-tsam èq yhangmoq lé upzúng nyi aq. ¹² Ngò gi, yhangmoq eq rahá nghut nyi é u lé, yhangmoq lé upzúng bê nghut luí, Nàng, Ngo lé byí é myìng hau èq, yhangmoq lé rago zúng bê nghut lhê. Haú Chyúmdang lhoq dik sháng gaq ga, haú bang mâ é htên byoq hui râ sù mai lai luí, ó yuq le a byuq byuq é nghut lhê.

¹³ Ngò gi, ahkuí, Náng

chyáng lò râ nghut bê; nghut kôlhang, Ngá é gabú hkyô gi, yhangmoq chyáng byíng jup sháng gaq nghù, Ngò gi, haú pé lé mingkan má taí é nghut lhê. ¹⁴ Ngò gi, yhangmoq lé, Náng é mungdang byi bê nghut lhê; haú mingkan gi, yhangmoq lé a jú nghut ri; hkâsu mù gâ le, Ngò gi, mingkan mâ é a nghut é su, yhangmoq le, mingkan mâ é a nghut kô é yanmai nghut ri. ¹⁵ Ngò kyûdung é gi, Nàng, yhangmoq lé mingkan mai shuí htoq yú râ matú dúng é a nghut, haú agè ashop su chyáng mai, yhangmoq lé upzúng yú râ matú sheq dúng é ru nghut lhê. ¹⁶ Ngò gi, mingkan mâ é a nghut é su, yhangmoq le, mingkan mâ é a nghut kó. ¹⁷ Yhangmoq lé, haú tengmán hkyo èq lhoq sân-yúng yú laq; Náng é mungdang gi, tengmán hkyô nghut ri. ¹⁸ Nàng, Ngo lé, mingkan má nhang hâng kat é su, Ngò le, yhangmoq lé, mingkan má nhang hâng kat é nghut lhê. ¹⁹ Yhangmoq lé, tengmán hkyô má wó lhoq sân-yúng yú kó sháng gaq nghù, Ngò gi, yhangmoq é matú, yhumsing gùng lé lhoq sân-yúng yu é nghut lhê.

Lumjìng Bang Lhunglhang É Matú, Yesuq Kyûdung Byí É Hkyô

²⁰ Ngò gi, yhangmoq é matú baú za kyûdung byí é a nghut; Yhangmoq é danglu é yanmai, Ngo lé lumjìng kó râ bâng é matú le, Ngò kyûdung byí é

nghut lhê. ²¹ Haû mù, yhangmoq banshoq bang gi, rading ralhum za dut nyi kó sháng gaq. Haû mingkan gi, Nàng, Ngo lé nhang kat é hkyô lé wó lumjǐng sháng gaq; Áwa, Nàng gi, Ngò má nyi nyi mù, Ngò gi, Nàng má nyi nyi é su, yhangmoq le, ngá hpe má nyi nyi kó sháng gaq. ²² Ngá hpe gi, ragùng za nghut é su, yhangmoq le, rading ralhum za dut nyi kó sháng gaq nghû, Ngò gi, Nàng, Ngo lé byi é hpungwup shingkang lé, yhangmoq lé byi bê nghut lhê. ²³ Nàng, Ngo lé nhang kat bê hkyô eq Nàng, Ngo lé chyitdap é su, yhangmoq lé chyitdap é hkyô lé, haû mingkan wó sé râ matú, yhangmoq gi, gumjup shoq rading ralhum za wó dut kó sháng gaq nghû, Ngò gi, yhangmoq má nyi nyi luí, Nàng gi, Ngò má nyi nyi é nghut lhê.

²⁴ Áwa ê, haû mingkan lháng a joq shi mai, Nàng, Ngo lé chyitdap luí byi tô é hpungwup shingkang haû lé, Nàng, Ngo lé byi tô é bang, wó myàng kó râ matú le, Ngò nyi é jang má, Ngò eq rahá wó nyi kó râ matú le, Ngò ô nau ri.

²⁵ Dingmán é Áwa ê, haû mingkan gi, Nang lé a sé kôlháng, Ngò gi, Nang lé sê lhê; Nàng, Ngo lé nhang kat é hkyô lé gi, yhangmoq sé akô nghut ri. ²⁶ Nàng, Ngo lé chyitdap é chyitdap myit gi, yhangmoq má wó joq nyi râ matú le, Ngò gi, yhangmoq má wó nyi nyi râ matú le, yhangmoq lé, Ngò, Nang é hkyô sé nhâng bê

nghut luí, xoq mù sé nhang nyi shirâ nghut lhê." gâ ri.

18

Yesuq Chyup Yû Huí É Hkyô

Mht 26:47-56; Mrk 14:43-50; Luk 22:47-53

¹ Yesuq gi, haû su ga kyûdûng é htáng má, Yhâng é chángzô pé eq rahá, Kedron wuìhkung mai lai byit dap ló luí, haû hpoq má joq é hkyâm ralhum má wang e akô nghut ri.

² Hkyâm haû gi, Yesuq eq Yhâng é chángzô pé lhaq hui hui kut é jowò nghut é yanmai, haû Yesuq lé ap pyám râ sù Yudaq le sê ri. ³ Haû mù, Yudaq gi, haû hkyangjong agyi pé eq Hparishe pè chyáng mai nhang kat é noqkuq yhûm zúng bang ra-am eq gyezo rajum lé, haû jowò shut shuí wang lé lo ri. Haû bang gi, myihu, myibung eq shâm lham pé chung lé lo akô.

⁴ Yesuq gi, Yhang má dut lò râ hkyô lhunglháng lé sé gû nghut mù, htoq ê luí, yhangmoq lé, "Nungmoq, ó yuq lé ho akô lú?" ga myi ri.

⁵ Haû hkûn, yhangmoq gi, "Nazaret wà byù Yesuq lé ho lhê." ga tû taí kôjáng, Yesuq gi, "Ngò gi, haû yuq nghut lhê." ga taí ri. (Yesuq lé ap pyám sù Yudaq le, yhangmoq eq rahá yap tô ri.) ⁶ "Ngò gi, haû yuq nghut lhê." ga Yesuq taí kat é hkûn jáng, yhangmoq gi, nungzut zut mù, myigùng

má lêng leq ló bum akô nghut ri.

⁷ Yhang gi, "Nungmoq, ó yuq lé ho akô lú?" ga, yhangmoq lé dum myî kat jáng, yhangmoq gi, "Nazaret wà byù Yesuq lé ho lhê." ga taî akô.

⁸ Haú hkûn, Yesuq gi, "Ngò gi, haú yuq nghut lhê nghû, nungmoq lé taî kyo bê nghut lhê; nungmoq, Ngo lé hô kô é nghut le gi, shí bang lé ló nhang pyám keq." ga tû taî ri. ⁹ Haú gi, "Nàng, Ngo lé byî tô é bang rayuq le lhang, Ngò, a lhoq hpyuq pyám." ga, Yhang taî tô é dang dik rá matú nghut ri.

¹⁰ Haú hkûn, Simun Petruq gi, shâm wun tô é nghut lú, shâm shê mù, haú hkyangjong mó é dui-nhâng zôshang é loqyo nohkyap lé zân hpyit kat byî ri. (Dui-nhâng zoshâng haú yuq é mying gi, Malhku gâ ri.)

¹¹ Haú mù, Yesuq gi, Petruq lé, "Náng é shâm lé, sham-byâng má xâng pyám aq! Haú Íwa, Ngo lé byî é góm* lé, Ngò a shuq é wó nyî rá lú?" ga taî kat ri.

Yesuq Lé, Anna Chyáng Shuî É É Hkyô

Mht 26:57-58; Mrk 14:53-54; Luk 22:54

¹² Hau htâng, gyezo haú jûm eq yhangmoq é gyezau hpó, Yudaq byu pê é mingsuwún wuî gi, Yesuq lé chyup yû mù, tuî akô nghut ri. ¹³ Yhangmoq gi, haú zân má é hkyangjong mó Kayahpaq é yhâng-tsa

Anna chyáng hí, Yhang lé shuî ló akô nghut ri. ¹⁴ Kayahpaq gi, byu pê é matú rayuq shî hkám byî le je gè rá nghut lhê ga, haú Yudaq byu pé lé hpaqchyî byî é sù yuq nghut ri.

Yesuq Lé, Petruq Sâng-hi Dam He-ngik Pyâm É Hkyô

Mht 26:69-70; Mrk 14:66-68; Luk 22:55-57

¹⁵ Simun Petruq eq gotú chángzo rayuq gi, Yesuq htâng châng e ló akô nghut ri. Gotú chángzo haú yuq gi, hkyangjong mó lé rago sê lhê nghut mù lú, hkyangjong mó é yhumwàng hkaú shut, Yesuq é htâng má châng wang ló ri. ¹⁶ Petruq kúm gi, hkúmdong shinggan má lánng yap tô ri. Haú hkyangjong mó lé rago sê é sù, gotú chángzo haú yuq gi, taú htoq ló mù, hkum zúng é myiwe myhí lé taî lú, Petruq lé shuî hâng yu ri.

¹⁷ Haú hkûn, haú hkum zúng é myiwe myhí gi, Petruq lé, "Nàng gi, haú yuq é chángzô pé mâ é rayuq a nghut lú?" ga myi jáng, yhang gi, "Ngò a nghut." ga tû taî ri.

¹⁸ Haú u lé, gyoq é yan-mai, dui-nhâng zoshâng wuî eq noqkuq yhûm zúng bang gi, yhangmoq gyoq gâng rá matú myigyê eq mut tô é myihkyóm má, gyoq gang yap nyi bum akô. Petruq le, yhangmoq eq rahá gyoq gang yap tô ri.

* 18:11 Góm lé shuq gâ é gi, jamjau hui rá eq shî hkám rá lé, taî nau é nghut lhê.

Yesuq Lé, Hkyangjong Mó Myi Choq Wú É Hkyô

Mht 26:59-66; Mrk 14:55-64; Luk 22:66-71

¹⁹Haú u lé, haú hkyangjong mó gi, Yesuq lé, Yhâng é chángzô pê hkyô eq Yhâng mhoqshit é hkyô eq séng lui myi ri.

²⁰Haú hkûn, Yesuq gi, "Haú mingkan htoq má, Ngò, de de tái bê nghut lhê. Ngò gi, haú Yudaq byu pé banshoq bang chôm zing é, tarajong pé má le, noqkuq yhûm má le, ayang mhoqshit é nghut lhê. Ngò gi, haq zaú lui tái é hkyô haí le a joq. ²¹Nàng, haí mù Ngo lé myi lhê lú? Haú, Ngò tái é lé wó gyô é bang lé myi aq; Ngò haí tái é hkyô lé, yhangmoq gè gè sê akô nghut ri." ga tû tái ri.

²²Yesuq haú su ga tái jáng, haú nàm má nyi tô é noqkuq yhûm zúng sù rayuq gi, Yhang lé pyuq kat lui, "Hkyangjong mó lé wá, Nàng, haú su nghũ dang tû lhê lú?" ga tái ri.

²³Haú hkûn, Yesuq gi, "Ngò tái shut é nghut le gi, shut é hkyô lé saksé tûn shit aq. Nghut kôlhang, Ngò gi, têng é đông ru tái le nhîng, nàng, haí mù Ngo lé pyuq lhê lú?" ga tû tái ri. ²⁴Hau htâng, Anna gi, Yhang lé tuí to gù, haú hkyangjong mó Kayahpaq chyáng dé kat nhang ri.

Yesuq Lé, Petruq Xoq Hengik Pyâm É Hkyô

Mht 26:71-75; Mrk 14:69-72; Luk 22:58-62

²⁵Haú Simun Petruq gyoq gang yap tô é hkûn, "Nàng

gi, Yhâng é chángzô pé mâ é rayuq a nghut lú?" ga, yhang lé myi kôjáng, yhang gi, "Ngò a nghut." ga, dum he pyâm ri.

²⁶Haú Petruq eq nohkyap zân hpyit pyám byi é huí su é buinùm nghut é sù, haú hkyangjong mó é dui-nhâng zoshâng rayuq gi, yhang lé, "Haú hkyâm má, nàng, Yhang eq rahá nghut nyi é lé, ngò a myang é su ngam lhê lú?" ga tái ri. ²⁷Haú hkûn, Petruq gi, xoq he pyám ri; haú u yhang, woq tûn bê nghut ri.

Pilat É Myoq Hí Má, Yesuq Jé Nyi É Hkun Lhê Hkyô

Mht 27:1-2, 11-14; Mrk 15:1-5; Luk 23:1-5

²⁸Hau htâng, yhangmoq gi, Yesuq lé, Kayahpaq chyáng mai, haú mauzau hpô é yhûmwàng shut shuí e ló akô. Haú u gi, napsûn noq ashí nghut ri. Yhangmoq gi, agot a-û a dut e za, htûngli đông Lhoqlhai Poí lé wó zo rã matú, yhûmhkaú má a wàng kó nghut ri. ²⁹Haú mù lui, mauzau Pilat gi, yhangmoq chyáng htoq ê mù, "Shí yuq lé, nungmoq hai mara hûn nau akô lú?" ga myi ri.

³⁰Haú hkûn, yhangmoq gi, "Shí yuq, a ge é muzó kut é a nghut le gi, Yhang lé, nàng é loq má ngamoq lé ap byi rã a nghut." ga tû tái akô.

³¹Pilat gi, "Yhang lé, nungmoq yhang shuí ló mù, nungmoq é tarâ đông ló jéyáng keq." ga tái jáng, haú Yudaq byu pé gi, "Nghut kôlhang, ngamoq gi, ó yuq lé sat rã ahkáng le a wó é nghut lhê."

ga tũ taĩ akô nghut ri. ³² Haũ su dut é hkyô gi, Yesuq, Yhang hká đông shĩ rã ga taĩ é dang lé lhoq dik rã matũ nghut lhê.

³³ Haũ mù, Pilat gi, yhũmhkaũ má taũ wang ló mù, Yesuq lé wut yũ luĩ, "Nàng gi, Yudaq byu pê é hkohkãm nghut lhê lú?" ga myĩ ri.

³⁴ Haũ hkũn, Yesuq gi, "Haũ gi, nãng é myit đông taĩ é nghut lhê lú? A nghut jãng, góbang mai, nang lé, Ngá é hkyô taĩ kyo luĩ nghut lhê lú?" ga taũ myĩ ri.

³⁵ Pilat gi, "Ngò gi, Yudaq byũ nghut lhê lú? Haũ Nãng é byũ myũ eq Nãng é hkyangjong agyi pé sheq, Nang lé, ngá loq má ap byĩ é ru nghut lhê. Nàng gi, haĩ kut é nghut lhê lú?" ga dum myĩ ri.

³⁶ Haũ hkũn, Yesuq gi, "Ngá é mingdãn gi, mingkan shĩ eq a séng. Mingkan shĩ eq séng é ru nghut le gi, haũ Yudaq byu pé, Ngo lé a wó chyup yu lo shoq, Ngá é dui-nhãng zoshãng wuĩ, Ngo lé chôm hung yũ kó rã nghut lhê. Nghut kôhlang, Ngá é mingdãn gi, mingkan shĩ eq a séng é ru nghut lhê." ga taĩ ri.

³⁷ Haũ mù, Pilat gi, "Haũ jãng, Nàng gi, hkohkãm nghut bê lú?" ga myĩ jãng, Yesuq gi, "Ngo lé, hkohkãm nghut lhê ga, nàng taĩ nyi é jô ri. Gè gè ga jãng, Ngò gi, hau é yanmai hku lé lo é sũ nghut lhê; haũ tengmán hkyô lé saksé hkãm rã matũ, Ngò, mingkan htoq má jé lé é nghut lhê. Haũ tengmán hkyô eq séng é sũ ó

yuq le, Ngá é dang lé gyô ri." ga tũ taĩ ri.

³⁸ Haũ hkũn, Pilat gi, "Tengmán hkyô gã é gi, haĩ jung lú?" ga myĩ ri. Yhang gi, haũ su ga myi luĩ, haũ Yudaq byu pê chyáng dum htoq ê mù, "Shĩ yuq chyáng mara hũn rã hkyô, ngò a myàng nghut ri. ³⁹ Nghut kôhlang, haũ Lhoqlhai Poĩ u lé, nungmoq é matũ, ngò, htóng byũ rayuq nhang htoq kat byi byi kut é htũng, nungmoq wó akô. Haũ mù, 'Yudaq byu pê é hkohkãm' lé, nhang htoq kat byi rã lé, nungmoq ô nau akô lú?" ga myĩ ri.

⁴⁰ Haũ hkũn, yhangmoq gi, "Haũ yuq lé a nghut! Barabaq lé sheq nhãng byi aq." ga, garũ kat akô. Barabaq gi, damyaq nghut ri.

19

Yesuq Lé, Tapzĩng Má Jén Sat Rã Matũ Doqđãn É Hkyô

Mht 27:15-31; Mrk 15:6-20; Luk 23:13-25

¹ Haũ mù luĩ, Yesuq lé lãng she yũ mù, nhuq bat rã matũ, Pilat hkunmó hkyô ri. ² Haũ gyezô pé gi, zujanmaũ saĩ yũ kôluĩ, Yesuq é ulhum má tsung byi kômũ, Yhang lé, buhĩng nè hut byĩ akô nghut ri. ³ Hau htãng, yhangmoq gi, Yhãng chyáng dum huĩ ê é kut luĩ, "Yudaq byu pê é hkohkãm ê! Chyung hĩng xê hĩng nyi shãng gaq ô!" ga taĩ kômũ, Yhãng é myoqđong má pyuq byĩ akô nghut ri.

⁴ Pilat gi, haù Yudaq byu pê chyáng radàm dum htoq é mù, "Wú keq, shí yuq chyáng mara hùn râ hkyô, ngò a myang é lé nungmoq sé sháng nghû, Yhang lé, ngò nungmoq chyáng shuí htoq lé byí lhê." ga taí ri. ⁵ Yesuq gi, haù zumuq tsùng tô é eq bu nè hîng wut to mù htoq lé jáng, Pilat gi, yhangmoq lé, "Wú keq, Yhang, shí yuq nghut lhê." ga taí ri.

⁶ Haù hkyangjong agyi pé eq yhangmoq é noqkuq yhúm zúng bang gi, Yhang lé myang kat kôjáng, "Yhang lé tapzîng má jén sat pyám aq! Yhang lé tapzîng má jén sat pyám aq!" ga garû bum akô.

Nghut kôlhang, Pilat gi, "Nungmoq shuí yù mù, tapzîng má jén sat keq. Ngò gi, Yhâng chyáng mara hùn râ hkyô a myàng." ga tû taí ri.

⁷ Haù hkûn, haù Yudaq byu pé gi, "Ngamoq chyáng tarâ rahkat joq lhê; tarâ haù dông ga jang, Yhang gi, shí gíng bê nghut ri; hkâsu mù gâ le, Yhang gi, Garai Gasâng é Yhangzo haù nghut lhê gâ ri." ga xoq taí akô.

⁸ Pilat gi, dang haù lé wó gyo jáng, je gyô gyuq luí, ⁹ yhúmhkaù shut dum wang ló mù, Yesuq lé, "Nàng, hkâmâ é sù nghut lhê lú?" ga myí ri. Nghut kôlhang, Yesuq gi, dang rahkun lhang a tû taí byi nghut ri. ¹⁰ Haù hkûn, Pilat gi, "Nàng, ngo lé a tû taí kut lhê lú? Ngò gi, Nàng lé, wó lhoq lhut kat é eq tapzîng má wó jén sat pyám é ahkáng wó sù

nghut é lé, Nàng a sé lú?" ga myí ri.

¹¹ Yesuq gi, "Nàng lé, haù ahtoq mai ahkáng byí e za a nghut le gi, nàng, Ngo lé haí kut râ a-tsam le wó râ a nghut. Haù mù luí, Ngo lé, nàng é loq má ap byí é sù gi, mara je bo é nghut lhê." ga tû taí ri.

¹² Haù hkûn mai, Pilat gi, Yesuq lé lhoq lhut kat byi nau nyi bê nghut ri. Nghut kôlhang, haù Yudaq byu pé gi, "Nàng, haù yuq lé nhang pyám é nghut jáng, nàng gi, hkoséng Kehtaq é luzúm a nghut lo; yhumsing gùng lé, hkohkâm gâ é sù gi, hkoséng Kehtaq eq shai lhúm é sù nghut lhê." ga, ru jâng garû nyi bum akô nghut ri.

¹³ Haù lé wó gyo jáng, Pilat gi, Yesuq lé shuí htoq é mù, Hebre myíng dông Gabahta gâ é Luqgok hkâng myhang to jang nghu é jowò mâ é tarâ jéyáng tanghkuq má zung tô ri. ¹⁴ Haù u gi, Lhoqlhai Poí é matú, Hên Lajâng é Buinyi nyí-káng raxe í hkyíng nghut ri.

Pilat gi, haù Yudaq byu pé lé, "Nungmoq é hkohkâm lé wú keq." ga taí ri.

¹⁵ Nghut kôlhang, yhangmoq gi, "Yhang lé yu pyám aq! Yhang lé yu pyám aq! Yhang lé tapzîng má jén sat pyám aq!" ga garû bum akô.

Haù hkûn, Pilat gi, "Nungmoq é hkohkâm lé wá, ngò, tapzîng má jén sat pyám râ lú?" ga myí jáng, haù hkyangjong agyi pé gi, "Haù hkoséng Kehtaq mai lai luí,

gotû hkohkâm ngamoq a wó." ga, tû taí akô nghut ri.

¹⁶ Hau htâng má, Pilat gi, Yesuq lé tapzîng má jén sat pyám râ matú, yhangmoq é loq má ap byí kat bê nghut ri. Haû mù luí, yhangmoq gi, Yesuq lé shuí ló bekô nghut ri.

Tapzîng Má Jén Pyâm É Hkyô

Mht 27:32-44; Mrk 15:21-32; Luk 23:26-43

¹⁷ Yesuq gi, yhumsing é tapzîng lé waq mù, Hebre myíng đông Golgahta gâ é, Ugyap joq é Jowò gâ é jang má htoq jé e ri. ¹⁸ Yhangmoq gi, haú má, Yesuq lé tapzîng htoq má jén tap pyám akô; Yhang eq rahá, gotû í yuq lé le, rahkyam shut rayuq kut jén to kô é nghut luí, Yesuq gi, gyoro má nghut ri.

¹⁹ Pilat le, masat laiká kâ yù luí, haû tapzîng htoq má tap tô ri. Haú má gi, "YU-DAQ BYU PÊ É HKOHKÂM, NAZARET WÀ BYÛ YESUQ" gâ tô ri. ²⁰ Yesuq lé jén tô é jowò gi, myuq eq chyâng lhùm é htoq agó, haû masat laiká gi, Hebre đông le, Latin đông le, Grik đông le, kâ tô é yanmai, haû Yudaq byu pé myo myo gi, masat laiká haû lé nghap bum akô nghut ri. ²¹ Haû Yudaq byu pé é hkyangjong agyi pé gi, Pilat lé, "'Yudaq byu pé é hkohkâm' nghû hkáká, 'Ngò gi, Yudaq byu pé é hkohkâm nghut lhê ga, Yhang taí ri.' nghû luí sheq ká aq." ga taí akô.

²² Haú hkûn, Pilat gi, "Ngò kâ é đông, ngò kâ to bê nghut lhê." ga tû taí ri.

²³ Haû gyezô pé gi, Yesuq lé tapzîng má jén tap pyâm é htâng má, Yhâng é mebu pé lé yù mù, myí hkyam gàm luí, rayuq rahkyam yu akô; haû ahte bu lé le, gàm râ dâ akô; nghut kôlhang, haû gi, hkyup-shi a bo e za, awang mai ah-pyo hpyot kut woq tô é nghut ri.

²⁴ Haû mù, yhangmoq gi, "Bu shí lé gi, a lîng cheq e za, ó yuq myang yù ang râ laq, hkyîn shosé she wú sháng." ga, rayuq eq rayuq taí lhum akô.

Haû gi,

"Yhangmoq, Ngá é mebu lé chôm gam yù kó râ; Ngá é ahtê bû é matú, hkyîn shosé shê kó râ nghut lhê."^{*}

gâ é Chyûmdang lé lhoq dik râ matú dut é nghut lhê. Haû mù, gyezô pé gi, haû su kut bekô nghut ri.

²⁵ Haû Yesuq é tapzîng nàm má gi, Yhângnu, Yhângnû é yhanggu byizo eq, Klopa é yhangmyi Mariq eq Magadalaq wà mâ é Mariq pé, yap tô bum akô. ²⁶ Yesuq gi, Yhang nàm má, Yhang chyitdap é chángzo eq Yhâng nu yap tô é lé myang kat jáng, Yhâng nu lé, "Ânu ê* nung zo lé wú aq." ga taí mù, ²⁷ chángzo haû lé le, "Náng nu lé wú aq." ga taí ri. Haú hkûn mai, chángzo haû yuq gi,

^{*} 19:24 Hkyá-on 22:18 * 19:26 Ânù ê, gâ é lé, Grik đông gi, "myiwe myhí ê" ga bo tô é nghut lhê.

Yesuq é yhângnu lé, yhâng é yhâm shut shuî lô bê nghut ri.

Yesuq Soqkâng Byit É Hkyô Mht 27:45-56; Mrk 15:33-41; Luk 23:44-49

²⁸ Hau htâng, Yesuq gi, ahkuî, muzó bàn bê nghut é lé sé luî, haû Chyúmdang lhoq dik râ matú, "Ngò, wuî shit ri." ga taî ri. ²⁹ Haú má, tsibiyiq wing chyîn rayambú joq tô ri; haû mù, yhangmoq gi, wuîmaù lé tsibiyiq wing chyîn haú má jum yù luî, jàm-yang ahyo má tuî tap mù, Yhâng é nhutwuî jé shoq yhun byî akô nghut ri. ³⁰ Yesuq gi, tsibiyiq wing chyîn haú lé shuq yù mù, "Mù bàn bê." ga taî ri. Yhang, haû su ga taí eq yhang, ulhum nghuq lô mù, kâng byit bê nghut ri.

³¹ Htang nyî gi, ahkyak é Bánno buinyî nghut luî, haú nyî gi, Hên Lajang Buinyî nghut ri. Haû mù, Yudaq byu pé gi, Bánno buinyî má, mâng pé lé tapzîng htoq má a joq to nhâng naù kô é yanmai, hkyî pé lé bat hkyuî pyám mù, mâng pé lé yù hkyô pyám nhâng râ matú, Pilat chyáng dúng tôngbán akô. ³² Haû mù luî, gyezo pé gi, lé mù, Yesuq eq jén hui su nhik mâ é, rayuq é hkyî lé hí bat hkyuî pyám mù, rayuq é hkyî lé dum bat hkyuî pyám akô nghut ri. ³³ Nghut kôlhang, yhangmoq gi, Yesuq chyáng jé é hkûn, Yhang shi to láng bê nghut é lé myàng kômù, Yhâng é hkyî lé a bat hkyuî byi kó

nghut ri. ³⁴ Nghut kôlhang, gyezo rayuq gi, Yesuq é namcham má lham eq htaû kat byi jáng, radá dâm sui eq wuî yui htoq lo ri. ³⁵ Haû lé myàng é sù gi, saksé hkám byî ri; yhâng saksé hkám é hkyô gi, tengmán ri. Haû yhang taî kyô é hkyô gi, têng é lé, yhang sé mù, nungmoq le wó lumjîng kó sháng gaq ga, saksé hkám byî é nghut ri. ³⁶ Haú hkyô pé dut é gi, "Yhâng é showui rahkat lháng a lhoq hkyuî râ nghut lhê."* gâ é Chyúmdang haû lhoq dik râ matú nghut lhê. ³⁷ Chyúmdang gotû rahum má le, "Yhangmoq eq htau htông é sù lé, yhangmoq tu wú kó râ nghut lhê."* gâ é bo tô ashî nghut ri.

Yesuq Lé, Myhup Yhum É Hkyô

Mht 27:57-61; Mrk 15:42-47; Luk 23:50-56

³⁸ Hau htâng, Yesuq é chángzo dut nyi é Aramahti myuq byû Yosep gi, haû Yudaq byu pé lé gyuq é yanmai, tsik za Pilat chyáng Yesuq é gungsôm lé, lé dúng ri. Pilat eq ahkáng byî kat jáng, yhang gi, gungsôm haû lé, lé yu lô bê nghut ri. ³⁹ Yhang gi, hí hkûn, myín lé, Yesuq lé ê huî é sù, Nikodema eq rahá lé é nghut ri; Nikodema gi, mura eq achyo nyhò tô é namngón jung sum xê joí kô yu lé ri. ⁴⁰ Yhangnhik gi, Yesuq é gungsôm lé yù mù, Yudaq byu pé é mâng yhum

htûng eq rajung za, namngón jung eq rahá, pán yúng èq htup yup to byî akô. ⁴¹ Haû Yesuq lé tapzîng má jén sat pyâm é jowò nàm má, hkyâm ralhum joq ri; ó yuq lé le a lheq wú shî é, lup sik ralhum hkyâm hkaû má joq tô ri. ⁴² Haû nyî gi, Yudaq byu pê é Hên Lajang Buinyî nghut é yanmai le, lup haû le chyâng é yanmai le, yhangnhik gi, Yesuq lé, haû má ê lheq tô akô nghut ri.

20

Lup Akôm

Mht 28:1-10; Mrk 16:1-8; Luk 24:1-12

¹ Bánno buinyî htâng, napsûn noq le mau a bó shimá, Magadalaq wà mâ é Mariq gi, haû lup má ê jé le, lup hkum mâ é luqlong huí hpyuq to láng é lé myang ri. ² Haû mù, yhang gi, Simun Petruq eq Yesuq chyitdap é chángzo góyuq chyáng dîn jé ló mù, "Haû Yhumsîng lé, lup mai yu htoq ló byuq bekô; hkâmá ê kat to kô é lé, ngamoq a sé." ga taî ri.

³ Haû mù, Petruq eq chángzo haû gi, lup shut e ló akô. ⁴ Yhangnhik í yuq é dîn akô; nghut kôlhang, chángzo haû gi, Petruq htoq má wó dîn luî, lup má hí dîn jé e ri. ⁵ Haû mù, yhang gi, ahkaû shut ngóm wú kat é hkûn, haû pán yúng htui leq tô é lé myang ri; nghut kôlhang, yhang gi, a wang ê nghut ri. ⁶ Hau htâng, Simun Petruq gi, châng jé luî, lup hkaû shut

wang e ri; haû hkûn, yhang gi, haû má pán yúng htui joq tô é lé le, ⁷ haû Yesuq é ulhum má htup é panchoq lé le, myang ri. Panchoq haû gi, pán yúng htui eq rahá a nghut e za htui jup leq tô ri. ⁸ Haû lup má hí jé é chángzo le, ahkaû má wang é luî, myàng jáng, lumjîng bê nghut ri. ⁹ (Yesuq gi, shi é mai dum dui toq lô râ nghut lê ga bo tô é Chyúmdang lé, yhangnhik gi, a sé gyo shi kó nghut ri.) ¹⁰ Hau htâng, haû chángzô nhik gi, yhûm taû ló bekô nghut ri.

Magadalaq Wà Mâ É Mariq Lé, Yesuq Htoq Shit É Hkyô

Mrk 16:9-11

¹¹ Nghut kôlhang, Mariq gi, lup shinggan má ngau yap tô ri. Yhang gi, ngau uchyang lup hkaû má ngóm wú kat ri. ¹² Haû hkûn, yhang gi, Yesuq é gungsôm lheq tô é jang má, hpyu é mebu wut é maumang lagyo í yuq hkyî htâng shut rayuq, umhtúng shut rayuq, zung to kô é lé, myang ri.

¹³ Yhangnhik gi, "Myiwe myhí ê, nàng, haî mù ngau nyî lhê lhú?" ga myi kôjáng, yhang gi, "Ngá é Yhumsîng lé yù ló hpyuq kôluî, Yhang lé hkâmá ló lheq to kô é lé, ngò a sé é yanmai nghut lhê." ga tû taî ri. ¹⁴ Haû su ga luî, yhang, lhing wú kat é hkûn, Yesuq yap tô é lé myàng kôlhang, Yesuq nghut é lé yhang a wú sé nghut ri.

¹⁵ Yesuq gi, "Myiwe myhí ê, nàng, haî mù ngau nyî lhê lhú? Nàng gi, ó yuq lé ho

wún lîê lîú?" ga myi jáng, yhang gi, hkyâm sai zo sù su ngam pyám mù, "Sarà ê, nàng, Yhang lé waq htot pyâm é nghut le gi, hkâmá ê lîeḡ tô é, ngo lé taí kyo laḡ, ngò, Yhang lé yu ló rà." ga taí ri.

16 Haú hkûn, Yesuḡ gi, yhang lé, "Mariḡ ê" ga wut kat ri.

Mariḡ gi, Yhâng shut lhîng mù, Hebre myíng dōng, "Raboni!" ga wut kat ri. (Haú gi, "Sarà ê" gâ é lichyúm nghut ri.)

17 Yesuḡ gi, "Ngo lé hkâzáng shi; hkâsu mù gâ le, Ngò gi, haú Íwâ chyáng a taú doḡ ló shî é nghut lîê. Nàng gi, Ngá é gumang wui chyáng ló mù, yhangmoḡ lé, 'Ngò gi, Ngá Wa eq nungmoḡ é Yhângwa, Ngá é Garai Gasang eq nungmoḡ é Garai Gasang nghut su chyáng doḡ ló zó nghut lîê.' gâ ri ngî, ló taí kyo aḡ." ga, yhang lé taí kat ri.

18 Magadalaḡ wà mâ é Mariḡ gi, chángzô pê chyáng ló mù, "Yhumsîng lé, ngò myàng bê!" ga taí luí, yhang lé shit kat é pé lé, taí kyô ri.

Yesuḡ, Yhâng É Chángzô Pé Lé Htoḡ Shit É Hkyô

Mht 28:16-20; Mrk 16:14-18; Luk 24:36-49

19 Haú nyí, Bánno buinyi htang myin lé, haú chángzô pé gi, Yudaḡ byu pé lé gyuḡ kô é yanmai, hkum tsing myhî pyám mù, zîng tô bum kô é u lé, Yesuḡ gi, lé jé mù, yhangmoḡ é agùng má yap to luí, "Nungmoḡ nguínḡn yuḡyo nyi sháng gaḡ!" ga taí

ri. 20 Yhang gi, haú su ga taí é htàng má, yhangmoḡ lé, Yhâng é loḡ pé eq namcham lé tûn shit ri. Chángzô pé gi, haú Yhumsîng lé myàng kôjáng, gyai gabú bùm bekô nghut ri.

21 Yesuḡ gi, "Nungmoḡ nguínḡn yuḡyo nyi sháng gaḡ! Haú Íwâ gi, Ngo lé nhang kat é su, Ngò gi, ahkuí, nungmoḡ lé nhang kat é nghut lîê." ga dum taí ri. 22 Haú su ga taí mù, Yhang gi, yhangmoḡ é ahtoḡ má soḡ mut luí, "Haú Chyoiyúng Woi-nyí lé hap yù keḡ. 23 Ó yuḡ é mara pé lé nghut kôle, nungmoḡ hkyut byí é nghut jáng, mara haú pé gi, hkyut pyám byí é hui rà nghut lîê; nungmoḡ a hkyut byí é nghut jáng, mara haú pé gi, hkyut pyám é hui rà a nghut." ga taí ri.

Htomaḡ Lé, Yesuḡ Htoḡ Shit É Hkyô

24 Haú chángzô raxe í yuḡ má bo é, Zozûm le gâ é Htomaḡ gi, Yesuḡ lé jé é hkûn, haú chángzô pé eq rahá a nyi to nghut ri. 25 Haú mù luí, gotû chángzô pé gi, yhang lé, "Haú Yhumsîng lé, ngamoḡ myàng bê." ga taí kyô akô.

Nghut kôlhang, yhang gi, yhangmoḡ lé, "Ngò gi, Yhâng é loḡ pé mâ é shamtoḡ zuhkô lé myàng mù, ngá é loḡnyhuí èḡ jói wú é eq, Yhâng é namcham má, ngá é loḡ èḡ myang lap wú é za a nghut jáng, haú lé ngò lumjîng rà a nghut." ga taí ri.

²⁶ Rabat myáng jáng, chángzô pé gi, haû yhúmkaû má dum nyi tô akô; Htomaq le, yhangmoq eq rahá nghut nyi ri. Haû hkum pé myhî to kôlhang, Yesuq gi, lé jé mù, yhangmoq é agùng má yap to luí, "Nungmoq nguingón yuqyo nyi sháng gaq!" ga taí ri. ²⁷ Hau htâng, Yhang gi, Htomaq lé, "Náng é loqnyhui, shî má lé joí mù, Ngá é loq pé lé wú aq. Náng é loq lham kat mù, Ngá é namcham má lé lap wú aq. A lùm hkâkut, lumjǐng nyi aq." ga taí ri.

²⁸ Haû hkûn, Htomaq gi, "Ngá é Yhumsîng, ngá é Garai Gasang ê!" ga Yhang lé taí ri.

²⁹ Yesuq gi, yhang lé, "Nàng gi, Ngo lé myang é yanmai, lumjǐng é a nghut lhu? A myàng kôlhang, lumjǐng é bang gi, hkungsô wó nyi ri." ga taí ri.

³⁰ Laiká buk shî má a kê tô é limik kumlhá pé gotû myo myo lé le, Yesuq gi, Yhâng é chángzô pê hí má kut shit bê nghut ri. ³¹ Nghut kôlhang, Yesuq gi, Garai Gasâng é Yhangzo Hkrisduq nghut é lé, nungmoq wó lumjǐng râ matú eq, lumjǐng é yanmai, nungmoq Yhâng é mying má asak wó kó râ matú, shí hkyô pé lé kê tô é nghut lhê.

21

Ngozo Wó Chyup Yu É Limik Kumlhá

¹ Hau htâng má, Yesuq gi, Tiberi nhông yàm má, Yhâng é chángzô pé lé dum htoq shit ri. Yhang htoq shit é hkyô

gi, a-ô mâ é dông nghut ri. ² Simun Petruq, Zozûm le gâ é Htomaq, Galile mau Hkanaq wà mó mâ é Nahtanelaq, Zebedi é yhangzo nhik eq gotû chángzo í yuq pé gi, rahá nyi to bum akô. ³ Haû hkûn, Simun Petruq gi, yhangmoq lé, "Ngò gi, ngozo kóng ê râ." ga taí jáng, yhangmoq gi, "Ngamoq le châng lé râ." ga taí akô. Haû mù luí, yhangmoq gi, htoq ê mù, haû lhai má wàng bekô nghut ri; nghut kôlhang, haû myîn, radu lhang a wó kóng kó nghut ri.

⁴ Htang napkyó maubó lo é hkûn, Yesuq gi, wuiyàm má yap tô ri; nghut kôlhang, haû chángzô pé gi, Yesuq nghut é lé a wú sé kó nghut ri.

⁵ Yesuq gi, yhangmoq lé, "Luzúm wuì ê, nungmoq, ngozo wó akô lhu?" ga, wut myi kat jáng, yhangmoq gi, "A wó." ga tû taí akô.

⁶ Haû hkûn, Yhang gi, "Nungmoq é gùn lé, haû lhai é loqyo hkyam shut dú hkyô kat keq; haû jáng, nungmoq wó kông yù kó râ nghut lhê." ga taí ri. Haû mù, yhangmoq gi, gùn dú hkyô kat é hkûn, ngozo lùm myô é yanmai, haû gùn lé lhang a wó lhang yù lo kó nghut ri.

⁷ Haû mù luí, haû Yesuq chyitdap é chángzo gi, Petruq lé, "Yhumsîng ru nghut ri." ga taí ri. Simun Petruq gi, "Yhumsîng ru nghut ri." gâ é lé wó gyo eq yhang, yhang gi, mebu hkyut pyâm tô é yanmai, buhǐng mó lé, yhâng

é gùng má baíyup yù mù, wuì hkaû má byam wang ló bê nghut ri. ⁸ Haû chángzo góbang gi, wuiyàm eq ngo xê làm kô za wê é yanmai, ngozo byíng tô é gùn lé, wuiyàm shut lhaí mai she jé lo akô nghut ri. ⁹ Yhangmoq gi, wuiyàm má jé dap ló kô é hkûn, myigye gyúng é myihkyóm htoq má ngozo nyhîn tô é lé le, muk ratsuí joq tô é lé le, myang akô.

¹⁰ Yesuq gi, yhangmoq lé, "Haû, ahkuí za nungmoq wó kông yu é ngozo, ra-am yù lé keq." ga taí ri.

¹¹ Haû mù, Simun Petruq gi, lhaí má doq ji luí, kô é ngozo rasho ngó xe sùm du yhang bo é gùn lé, dùng yàm má she htoq tô ri. Ngozo haû myhó myo kôlhang, gùn gi, a jeq nghut ri. ¹² Yesuq gi, yhangmoq lé, "Napzang lé zo keq." ga taí ri. Chángzô pé gi, Yhang, haû Yhumsing nghut é lé sé kô é yanmai, ó yuq lhang, "Nàng, ó yuq nghut lhê?" ga, a wám myi kó nghut ri. ¹³ Yesuq gi, lé mù, muk lé ê yù luí, yhangmoq lé byí ri; ngozo lé le, haû su kut ri. ¹⁴ Yesuq gi, shi é mai lhoq dui toq yù huí é htâng, Yhâng é chángzô pé lé htoq shit é má, shí gi, sum dâm nghû râ dâm nghut ri.

Yesuq Eq Petruq

¹⁵ Yhangmoq bàn zô bùm kô é htâng má, Yesuq gi, Simun Petruq lé, "Yohan é yhangzo Simun ê, nàng gi, shí

bang htoq má, Ngo lé teng za je chyitdap lhê lhú?" ga myi jáng, yhang gi, "Nghut lhê; Yhumsing ê, ngò, Nàng lé chyitdap é hkyô lé, Nàng sê lhê." ga tú taí ri. Haû hkûn, Yesuq gi, "Ngá é sau zô pé lé, baú aq." ga, yhang lé taí ri.

¹⁶ Hau htâng, Yesuq gi, "Yohan é yhangzo Simun ê, nàng gi, Ngo lé teng za chyitdap lhê lhú?" ga dum myi jáng, yhang gi, "Nghut lhê; Yhumsing ê, ngò, Nàng lé chyitdap é hkyô lé, Nàng sê lhê." ga tú taí ri. Haû hkûn, Yesuq gi, "Ngá é sau pé lé, rêm aq." ga taí ri.

¹⁷ Dum radàm, Yesuq gi, yhang lé, "Yohan é yhangzo Simun ê, nàng gi, Ngo lé chyit lhê lhú?" ga myí ri.

Haû hkûn, Petruq gi, "Nàng gi, ngo lé chyitdap lhê lhú?" ga, yhang lé Yesuq eq sùm dam dâm taí é yanmai, yhâng myit nò luí, "Yhumsing ê, Nàng gi, lhunglhang lé sê lhê; ngò, Nàng lé chyitdap é hkyô lé, Nàng sê lhê." ga taí ri.

Haû hkûn, Yesuq gi, "Ngá é sau pé lé, baú aq. ¹⁸ Ngò, nàng lé teng za taí lé, nàng, zorâm nghut é hkûn gi, yhumsing gùng yhumsing hpyihit baíyup* yù mù, ê nau é jowò hkangmó má wó é é nghut lhê; nghut kôlhang, nàng mang jáng gi, loq í loq lham luí, nang lé góyuq eq hpyihit baíyup byi mù, nàng a ê nau é jowò shut shuí ê râ nghut lhê." ga taí ri. ¹⁹ (Yesuq

* **21:18** Hpyihit baíyup gá é lichyúm gi, mebu wut luí ri ri kut tô é lé gá lhê.

haú su ga taí é gi, haú Petruq, hkâsu kut shi é đông mai, Garai Gasâng é hpungwup shingklang lé dan hu nhâng râ nghut é lé, taí nau é nghut ri.) Hau htâng, Yesuq gi, yhang lé, "Ngá htâng cháng aq." ga taí ri.

²⁰ Haú hkûn, Petruq gi, lêng wú kat le, haú Yesuq chyítđap é chángzo, yhang-moq htâng châng wún é lé myàng ri. Chángzo haú gi, hí hkûn, myinzang zô é u lé, Yesuq chyáng leq ngè mù, "Yhumsîng ê, Nang lé appyám râ sủ gi, ó yuq lú?" ga, myi wú é sủ nghut ri. ²¹ Petruq gi, haú yuq lé myàng jáng, Yesuq lé, "Yhumsîng ê, shí yuq gi, hkâsu dut râ lú?" ga myi ri.

²² Yesuq gi, "Ngò jé lé é hkûn jé shoq, Ngò, yhang lé dui nyi nhâng nau é nghut le gi, nàng eq haí sêng lêng lú? Nàng gi, Ngá htâng cháng aq." ga tú taí ri. ²³ Dang hau é yan-mai, chángzo haú yuq a shí râ nghut lêng gâ é danglám gi, haú gumang wui chyáng byo myín to bê nghut ri. Nghut kôlhang, Yesuq gi, haú yuq a shí râ hkyô lé taí é a nghut, "Ngò jé lé é hkûn jé shoq, Ngò, yhang lé dui nyi nhâng nau é nghut le gi, nàng eq haí sêng lêng lú?" ga, taí é ru nghut lêng.

²⁴ Shí pé lé saksé hkám mù, shí pé lé kê tô é sủ gi, chángzo haú yuq nghut lêng. Yhâng é saksé gi, têng é lé, ngamoq sê lêng.

²⁵ Yesuq gi, gotú muzó myo myo le kut ashí nghut ri. Muzó haú pé lhum jup lé,

kê htoq yu é ru nghut le gi, kê tô é laiká buk haú pé gi, mingkan gón má lêng ngo râ a nghut nghu, ngò wó myit ri.

LAGYO Laiká (Acts)

*Yesuq, Mauhkûng Má Shuí
Yù Huí É Hkyô*

¹ Htohpiluq ê, Yesuq yhang hkyin yu tô é lagyô pé lé, Chyoiyúng Woi-nyí wum-o èq dang ban pying tô é htâng má, Garai Gasang yhang lé mauhkûng shut shuí yu é buinyi jé shoq, ² Yhang kut shit é hkyô pé eq, mhoqshit é hkyô pé banshoq lé, hí lhê é laiká buk má ngò kê kat bê nghut lhê. ³ Yesuq gi, shí hkâm é htâng má, Yhang dui toq bê hkyô lé, lumgíng é saksé myo myô èq yhangmoq lé tân shit mù, buinyi myi xê nyí gyoro má yhangmoq chyáng lé htoq shit kut luí, Garai Gasang é mingdán hkyô lé hko kyô ri. ⁴ Yhang, yhangmoq eq rahá zup tô é hkûn, hkunmó hkyô é gi, "Nungmoq gi, Yerusalem wà mó mai a htoq é za, ngá chyáng mai wó gyô yu é, ngá wâ ê danggidiq byí tô é chyunghuq lé lánng nyí keq. ⁵ Hkâsu mù gâ le, Yohan gi, wui èq wui-myhup hkám byí é nghut lhê; nghut kôlhang, nungmoq kúm gi, buinyi hkâ-myháng a myáng má, Chyoiyúng Woi-nyí mai baptisma wó hkam yù kó râ nghut lhê." gâ ri.

⁶ Lagyô pé gi, Yhang eq rahá chôm zup míng tô é hkûn, Yhang lé, "Yhumsíng ê,

nàng, haû Israelaq byu pé lé mingdán dum xuq byi râ gi, ahkuí yhang nghut bê lhú?" ga myí akô.

⁷ Yesuq gi, "Áwa gi, Yhâng é ahkáng ayá èq kut to bê é ahkyíng yam-yoq pé lé, nungmoq sé nó a ra. ⁸ Nghut kôlhang, Chyoiyúng Woi-nyí nungmoq chyáng jé jáng, nungmoq gi, wum-o a-tsam wó yû mù luí, Yerusalem wà mó eq Yuda mau banshoq, Samariq mau eq maumyí htáng shoq, ngá é saksê pé dut kó râ nghut lhê." ga luí, yhangmoq lé taí ri.

⁹ Dang haû ban taí é htâng má, yhangmoq wú nyi le, Yhang gi, mauhkûng shut shuí yu é hui mù, yhangmoq hí mai Yhang lé a myàng loshoq, mhut èq htup ló byuq bê nghut ri.

¹⁰ Yesuq doq ló nyi é u lé, yhangmoq mauhkûng shut ru wú tsuq nyi bum ashí le, hpyu é mebu wut é byù í yuq gi, radá dâm yhangmoq nàm má htoq yap lò mù, ¹¹ "Galile byu pé ê, haí mù luí mauhkûng shut wú tsuq nyi akô lhú? Nungmoq é hí mai mauhkûng shut shuí yù huí é, haû Yesuq mauhkûng shut doq ló é u lé, nungmoq myang kat é su, Yhang dum jé lé râ nghut lhê." ga taí akô.

*Yudaq É Jowò Má, Mahtiaq
Lé Hkyin Kat É Hkyô*

¹² Hau htâng má, yhangmoq gi, Tsanlun Bùm mai, Yerusalem wà mó shut taú

lô bekô.* Haú gyoro gi, Bánno buinyì má ge sô é í za wê ri. ¹³ Yhangmoq jé lô kôjáng, yhangmoq nyi nyi kô é yhùm ahtoq pyâm mâ é wap shut doq lô akô; haú bang gi, Petruq, Yohan, Yakuq, Andre, Hpilip eq Htomaq, Barhtolume eq Mahte, Alhpe é yhangzo Yakuq, Zelutuq dut é Simun, góyuq Yakuq é yhangzo Yudaq pé nghut akô. ¹⁴ Yhangmoq lhunglhâng bang gi, myiwe wuì le, Yesuq é yhângnu Mariq le, yhanggu pé le kut mù, i-myyit rahkat za kyú chòm dung dung kut nyi akô.

¹⁵ Buinyì haú yoq má, Petruq gi, lumjínng é gumang gu-nhá† wuì rasho í xê yuq kô zup zínng tô é gung gung má, toq yap mù, ¹⁶ "Gumang gu-nhá wuì ê, Yesuq lé chyup é bang lé hkyô shuì hî é sù Yudaq eq séng luì, hí hpyang Dawiq é nhut mai Chyoiyúng Woi-nyí taí tô é Chyúmdang gi, dik byuq bê nghut ri. ¹⁷ Yhang gi, nga-nhúng má nghap lhôm é hui mù, hpúng sará ayá wó bê sù nghut kôlháng shí hkyô dut bê nghut ri." ga taí ri.

¹⁸ (Yudaq gi, yhang kut é agè ashop é muzó mai wó é ahpau èq myigùng ratóng wui yu é htàng, haú má yhang, a-nghop dông byit gyó mù wam buq goq luì, ù banshoq buq myín byuq bê nghut ri. ¹⁹ Haú hkyô lé Yerusalem wà

mó má nyi é lhunglhâng bang wó gyo kôjáng, myigùng haú lé yhangmoq é myíng dông, 'Akeladama' ga myhíng akô; haú gi, 'Sui myigùng', gâ é nghut ri.)

²⁰ Petruq xoq taí é gi, "Hkâsu mù gâ le, Hkya-on Kungtôn Laiká má,

'Yhâng é jowò chamchyuyiui dut byuq sháng gaq; haú má ó le a nyi kó sháng gaq.'☆

ga luì le, dum

'Yhang wó é ayá lé byù góyuq wó yu pyâm byi sháng gaq.'☆

ga luì le, bo tô ri. ²¹⁻²² Haú mù luì, Yohan bapisma byi hi é hkùn mai, Yesuq lé nga-nhúng chyáng mai shuì yu é buinyì jé shoq, Yhumsíng Yesuq nga-nhúng eq rahá htoq htoq wàng wàng kut nyi é buinyì banshoq pé má, nga-nhúng eq yhang zum nyi sù rayuq lé, hkyin kat râ dut ri. Haú yuq gi, Yesuq dum dui toq é hkyô lé nga-nhúng eq rahá saksé dut râ sù nghut lhê." gâ ri.

²³ Haú hkùn, yhangmoq gi, Yustu ga le myhíng é, Barsabaq gâ é Yosep eq Mahtiaq nhik lé hkyin tô akô. ²⁴⁻²⁵ Haú mù, yhangmoq kyúdung kô é gi, "Byù banshoq é i-myyit lé sê é Yhumsíng ê, Yudaq Iskarut gi, yhang lô gíng é jowò shut lô râ ga, tô pyâm tô é yhâng é lagyo ayá é matú shí nhik má é

* **1:12** Tsanlun bùm eq Yerusalem gyoro gi, déng rawuí hkup kô we ri. † **1:15** Gumang gu-nhá gâ é lé, Grik má gi, gumang za gâ to lhê. ☆ **1:20** Hkya-on 69:25
☆ **1:20** Hkya-on 109:8

nàng hkyin tô é sũ lé tũn shit laq ò." ga akô. ²⁶ Hau htàng, yhangmoq, byù hkyin shosé she le, Mahtiaq chyáng ang bê. Haù mai, Mahtiaq lé gi, haù lagyo raxe rayuq má jat kat bê nghut ri.

2

Chyoiyúng Woi-nyí Jé Gyó Lo É Hkyó

¹ Penteko-ti* buinyi jé jáng, lumjínng bang banshoq gi, jowò ralhum má za, chòm zup míng nyi tô akô. ² Haù hkũn, laidun mó lo é su gâ é htê gi, byodàn ratung, mauhkũng mai mying htoq lô mù luí, yhangmoq zing tô é yhũm byíng shoq dut to bê nghut ri. ³ Myishâm su dut é le byò myín htoq lô mù, yhangmoq yuq jup é ahtoq má jé to bùm bê nghut ri. ⁴ Yhangmoq lhunghâng bang gi, Chyoiyúng Woi-nyí byíng lo bùm kômù, Woi-nyí èq taí nhang é eq rajung za, laklaí dang đông nyo lo bum akô.

⁵ Haù u lé, mauhkũng ô má joq é mingdán hkangmó mâ é, tará hkunggâ é Yudaq byu pé gi, Yerusalem wà mó má bíng nyi bum akô. ⁶ Haù mying é htê lé wó gyo kôjáng, byù rajùm rayò zíng lé lô kômù, ó le ô é myíng đông sê gyô yù kô é yanmai, maú úng-àng byuq bùm kôluí, ⁷ maú bùm uchyang taí kô é gi, "Wú keq, ahkuí dang taí nyi é byù shí bang lhungháng gi, Galile byu pé chyat a nghut kó lúhú?"

⁸ Haù nghut é wa, hkâsu mù nga-nhúng ó le ô é yhumsing mau mâ é myíng đông sê gyô yu lè lúhú? ⁹ Parhti, Medi, Elam mau mâ é bang eq Mesopotamiaq mau, Yuda eq Kapadokia mau, Pontuq eq Asia, ¹⁰ Hprugi eq Pamhpuli, Egutuq míng má nyi é bang eq Kuruni myuq nâm má nyi é Libya míng mâ é bang, Romaq myuq mai lé bíng nyi é Yudaq byu pé eq Yudaq noqkuq htũng má lhing wang lò bang, ¹¹ Kreti zinlóng eq Arabiq mau mâ é bang, nga-nhúng gi, yhangmoq hko kyô é Garai Gasâng é mauhpo muzó hkyô lé, yhumsing mau mâ é myíng đông yhang wó sê gyô yu ri-nhung." gâ ri. ¹² Yhangmoq banshoq bang gi, maú úng-àng byuq kômù, "Shí gi, haí wá nghut lè lúhú?" ga le, rayuq eq rayuq myí lhum bum akô.

¹³ Nghut kôlhang, byù ra-am gi, "Shí bang gi, í shuq wut é bang nghut akô." ga luí, taí jihpoi bum akô nghut ri.

Petruq Hko Kyô É Mung-dang

¹⁴ Haù hkũn, Petruq gi, lagyo góbang raxe rayuq eq toq yap mù, htê mó èq byù haù bang lé taí é gi, "Yudaq byu pé eq Yerusalem wà mó má nyi nyi é lhunghâng bang ê, rago gyô wú keq! Ngò, nungmoq lé, shí hkyô taí kyo kôlé. ¹⁵ Shí bang gi, nungmoq sũ-ngam é đông, shuq wut é bang a nghut; hkâsu mù gâ le,

* **2:1** Penteko-ti gâ é gi, Lhoqlhai Poí lai é htàng ngo xê nyi jé é buinyi má, kut é poí lé gâ lhê.

ahkuî gi, napkyó gau hkyíng
za ru nghut ashî. ¹⁶ Shí hkyô
kúm gi, myiqhtoi Yoelaq taî tô
é eq rajung za dut é nghut ri.
¹⁷ Yhang taî tô é gi,

'Garai Gasang îsu gâ ri: Ló
htâng é buinyì pé má,
Ngò Ngá é Woi-nyí lé
byù lhunglhâng bâng é
ahtoq má hut gyun râ
nghut lhê.

Haù mù, nungmoq é yuqzo
byizô pé gi, myiqhtoi
htoi kó râ; nung-
moq é zorâm wuì gi,
myoqwup shing-rán
myàng kó râ; nungmoq
é hpaù mâng pé gi,
yhpumoq myàng kó râ
nghut lhê.

¹⁸ Buinyì haù pé má, Ngá
é dui-nhâng zoshâng
hpô pé eq dui-nhâng
zoshâng myhî pé é ah-
toq má lhang, Ngò Ngá
é Woi-nyí lé hut gyun
mù luí, yhangmoq gi,
myiqhtoi htoi kó râ
nghut lhê.

¹⁹ Ngò gi, ahtoq mauhkûng
htoq má mauhpo
muzó pé lé, a-ô
myigùng htoq má,
kumlhá pé lé, sui eq,
myi eq, myihkau dùm
pé eq kut mù tân shit
râ.

²⁰ Haù Yhumsing é kô
hkikhkam é buinyì a jé
shimá, buì gi, mauchut
byuq, lhamó gi, sui dut
byuq é hí dut râ nghut
lhê.

²¹ Haù hkûn, Yhumsing é
myíng lé lhang é bang
yuq hkanmó gi, hkyi
yu é hui kó râ nghut
lhê.^{1*}

gâ ri.

²² Israelaq byu pé ê, dang
shî lé gyô yù keq, nungmoq
sê é eq rajung za, Nazaret
wà byù Yesuq nungmoq é hí
má tân shit é, laklaí kumlhá,
mauhpo muzó eq kumlhá pé
gi, Yhang lé Garai Gasang
nhang kat é saksé dut bê
nghut ri. ²³ Shí yuq gi, Garai
Gasang myit hpyit tô é hkyô
eq, hí te sê é hpaqchyí dông,
nungmoq chyáng ap pyâm é
hui mù, nungmoq gi, agè
ashop byu pé é loq èq, Yhang
lé tapzing htoq má jén sat
pyám nhâng bekô nghut ri.

²⁴ Nghut kôlhâng, haù shî-nò
hkyô gi, Yhang lé wó hkûm
zing jung a nghut é yanmai,
Garai Gasang gi, Yhang lé shî-
nò jamjau mó mai, lhut pyám
byi luí lhoq dui toq yù bê
nghut ri. ²⁵ Dawiq gi, shí yuq
eq séng luí taî é má,

'Haù Yhumsing gi, ngá é
myoq hí má hkâ-nhám
le nyi nyi é lé ngò
myàng bê.

Yhang ngá é loqyo hkyam má
nyi nyi é yanmai, ngo
lé wó lhoq nhún râ a
nghut lo.

²⁶ Haù mù, ngá i-myt gi, ngu-
ingón nyí luí, ngá nhut
shô gabú hkya-ôn nyi
ri;

ngá é gungdu le myit my-
oqbyù jowò má nyi nyi

râ nghut lâ.

27 Hkâsu mù gâ le, nâng,
ngá é woi-nyí lé mo-
sumhkung má tô pyâm
to râ a nghut.

Nâng, nâng é Chyoiyúng Sû lé
bup byuq é hui nhâng
râ a nghut.

28 Nâng, ngo lé asak dui é hkyô
sé nhâng bê.

Nâng é myoq hí má, nâng,
ngo lé gabú hkyô lhoq
pyíng byi râ nghut
lê.[✱]

gâ ri.

29 Gumang wui ê, nga-
nhûng é îchyi íké Dawiq kâng
byit mù, myhup pyám hui bê
hkyô lé le, yhâng é lup gi, hkû-
nyí jé shoq nga-nhûng chyáng
joq tô é lé le, ngò, nungmoq
lé a gyuq a kyum wám tái
lê. ³⁰ Dawiq gi, myiqhtoi
rayuq nghut é yanmai, yhâng
é awut ashín mâ é rayuq lé,
yhâng é hkohkâm tanghkuq
má zùng nhâng râ ga Garai
Gasang byi tô é danggidiq
lé sê to mù, ³¹ 'Hkrisduq† gi,
mosumhkung má pyâm to a
hui râ eq, Yhâng é gungsho
a bup byuq é za, dum dui
toq lô râ nghut lê.', gâ é
hkyô lé te sê to lui tái tô ri.

³² Garai Gasang gi, haú Yesuq
lé lhoq dui toq yù bê. Ngamoq
banshoq bang gi, haú hkyo é
saksê pé nghut nyi ri. ³³ Haú
mù, Garai Gasang gi, Yesuq
lé Yhâng é loqyo hkyam má
lhoq toq to bê. Yesuq gi, Garai
Gasang byi tô é danggidiq

Chyoiyúng Woi-nyí lé hkam
yù mù, hut hkyô kat bê nghut
é yanmai, ahkuí nungmoq
shí su wó myâng, wó gyo bekô
nghut ri. ³⁴⁻³⁵ Hkâsu mù gâ
le, Dawiq gi, mauhkûng htoq
tsáng myhâng má a doq lô wú
kôlhang, yhang gi,

'Haú Yhumsîng Garai gi, ngá é
Yhumsîng lé,

"Ngò, nâng é gye pé lé, nâng
é hkyî nang tanghkuq
kut pyám byí é hkyíng
jé shoq,

Ngá é loqyo hkyam shut zung
nyí shi aq." gâ ri.[✱]

ga lui, tái ri.

³⁶ Hau é yanmai, Garai
Gasang gi, nungmoq eq
tapzîng má jén sat pyâm é
haú Yesuq lé, Yhumsîng eq
Hkrisduq dut nhang é hkyô,
Israelaq byu pé lhunglhang
bang hkyak sê nyi kó sháng
gaq ô." gâ ri.

Sâng-hi Lumjîng É Bang

³⁷ Yhangmoq gi, haú lé wó
gyô bùm kôjáng, yhangmoq é
i-myt má záng kô é nghut mù
lui, "Gumang wui ê, ngamoq
hkâsu kut lo râ lú?" ga lui,
Petruq eq lagyo góbang lé myí
akô.

³⁸ Petruq gi, "Nungmoq
yuq hkgamó myit lhîng
mù, Yesuq Hkrisduq é myîng
mai wui-myhup hkâm yù
keq; Haú jáng, nungmoq
é yubak hkyut pyám byí é
hui kó râ nghut lê. Haú
hkûn, Chyoiyúng Woi-nyí gâ é
chyunghuq lé, nungmoq wó

✱ 2:28 Hkya-on 16:8-11 † 2:31 Grik dong Hkrisduq gâ é gi, xú but hui Sû gâ é
lichyúm nghut mù, Hebre dong Mesaia gâ é eq rajung za nghut lê. ✱ 2:34-35
Hkya-on 110:1

yû kó râ nghut lhê. ³⁹ Hkâsu mù gâ le, danggidiq haû gi, nga-nhông é Yhumsing Garai Gasang ji yù râ bang banshoq nghut é, nungmoq eq nungmoq é yhangzo yhangshû pé eq le, mau we má nyi é lhunglhâng bang eq le, sêng lhê." ga luí, yhangmoq lé tai kyô ri.

⁴⁰ Yhang gi, dang gotû myo myô eq le saksé hkâm mù, "Shî agè ashop é amyû mai wó lut htoq lo keq ô!" ga luí, yhangmoq lé lhoq pun lhoq kyîng ri. ⁴¹ Dang haû lé guq yu é bang gi, wui-myhup hkâm yu bùm kôluí, haû nyí má byù sum hkyîng kô jat wàng lo bum bekô nghut ri.

Lumjing Bang Zùm Yap É Hkyô

⁴² Haú bang gi, lagyo pé mhooqshit é hkyô, zùm yap é hkyô, muk hpê gam é hkyô[†] eq akyû dúng é hkyô má, i-myit rahkat za chôm châng nyi akô. ⁴³ Lagyo pé kut shit é mauhpo muzó eq limik kumlhá pé myo myô é yanmai, lhunglhâng bang gi, gyuq maú nyi bum akô nghut ri. ⁴⁴ Lumjing é lhunglhâng bang gi, rawò má za zup zîng to mù, azîng zè banshoq lé chôm chung nyi akô. ⁴⁵ Yhangmoq gi, yhumsing é sutzè pé lé, ûng pyám mù, yuq hkangmó lé, yhang râ tô é eq rajung za gàm byí akô. ⁴⁶ Yhangmoq gi, nyí wuî myit rahkat zâ

eq noqkuq yhûm wàng má nyi nyi akô. Yhumsing é yhûm pé má le muk hpê gam é hkûn, ⁴⁷ Garai Gasang lé hkya-on kungtôn uchyang, gabú é eq myit huí é eq chôm zo chôm shuq nyi bum akô; byù banshoq bâng é hí má le myoqdong wó bum akô. Haû Yhumsing gi, nyí wuî yhangmoq chyáng hkyi yù hui bang jat lò nhang ri.

3

Hkyi Hten Sû Rayuq Lé, Petruq Lhoq Gê Byí É Hkyô

¹ Ahkuí, Petruq eq Yohan gi, myinhâng zó sum hkyîng lhê é kyûdung nám má, noqkuq yhûm shut doq e ló akô. ² Haú hkûn, ínû unghkaú mai hkyi hten lugù dut é byù rayuq lé, noqkuq yhûm má wang lé lô bâng chyáng mai dung zo sháng gaq ga, Yúnglho hkum ga myhîng é hkúmdong má nyí hkang nyí mó waq lé lô mù, lé nyhi to to kut akô. ³ Yhang gi, Petruq eq Yohan, noqkuq yhûm haú má wang e ló é lé, myàng luí, lhom dúng nyi ri. ⁴ Petruq eq Yohan kúm gi, yhang lé chôm wú tsuq to mù, "Nga-nhik lé tu wú aq." gâ akô. ⁵ Haú mù, yhang, yhangnhik chyáng mai rajung jung wó yû râ lé myit myoqbyù luí, yhangnhik lé rago za saí wú tô ri.

⁶ Petruq kúm gi, "Ngùn, hîng gi, ngò a wó; nghut kôlhâng, ngò wó é nang lé

[†] 2:42 Muk hpê gam hkyô gâ é lé lichyúm í dông wó yu lhê - radông gi, rahá chôm zo chôm shuq é lé gâ lhê; radông gi, Poído chôm zô é lé gâ lhê.

byi lé: Nazaret wà byù Yesuq Hkrisduq é myìng mai toq sô lô aq." ga taí uchyang, 7 yhâng é loqyo loq má zui mù lêng toq kat ri; haú hkùn jáng, yhâng é hkyí kochang-chap pé wúm bo lò bê nghut ri. 8 Haú mù, yhang gi, radá dâm toq yap mù sô kat luí, so uchyang, byàm uchyang Garai Gasang lé hkya-on mù, yhangnhik eq rahá noqkuq yhâm má wang lô ri. 9 Yhang sô e lô nyi é eq Garai Gasang lé hkya-on kungton nyi é lé, lhunghâng bang chòm myang akô. 10 Haú yuq gi, noqkuq yhum é Yúngl hó hkum gâ é hkúmdong má zung to mù, dung zo sù nghut é lé yhangmoq matsing kô é nghut mù luí, yhâng chyáng dut lò bê hkyo é yanmai, maú hong byuq bum akô nghut ri.

Petruq Hkô Kyô É Mung-dang

11 Petruq eq Yohan chyáng haú dung zo sù byìn châng tô é hkùn, shiwa byu pé gi, wú maú uchyang, Sholumon jìrop shut, yhangmoq chyáng din yán wang lé lo bum akô. 12 Petruq haú lé myàng jáng, shiwa byu pé lé taí é gi, "Israelaq byu pé ê, shí yuq é hkyô lé haí mù luí maú nyi akô lú? Nga-nhik é dingmán hkyô eq wum-o a-tsâm èq, shí yuq lé wó so nhang é su ngâm luí, ngá-nhik lé wú tsuq bum akô lú? Haú dông a nghut. 13 Abraham, Isak eq Yakup pé é Garai Gasang, nga-nhông é íchyí iwa pé é Garai Gasang gi, Yhâng é dui-nhâng

zoshâng Yesuq lé hpungwup shing kang lhoq htoq byí é nghut ri; nungmoq kúm gi, Yhang lé sat hui shoq ga ap pyám kômù luí, Pilat zau hpó mai Yhang lé nhang pyám râ ga myit to bê lé, nungmoq gi, Yhâng é hí má yhang, Yhang lé he-ngik pyám akô nghut ri. 14 Haú chyoiyúng dingmán é Sù lé nungmoq he-ngik pyám kômù, byù sat sù lé sheq dúng htoq yú kôluí, 15 Asak Yhumsing lé gi, sat pyám bekô. Garai Gasang kúm gi, haú yuq lé shí é mai lhoq dui toq yú bê nghut ri; ngá-nhik gi, haú hkyo é saksé nghut nyi lhê. 16 Yesuq é myìng lé lumjìng é yanmai, haú lumjìng myit mai za, shí nungmoq myang é sê é sù lé wum-o lhoq pyíng byi bê nghut ri; nghut bê, Yesuq lé lumjìng é yanmai, shí yuq lé, nungmoq banshoq bâng é hí má, gumjup shoq lhoq ge to byi bê nghut ri.

17 Ahkuí, gumang wuè ê, nungmoq é uphâng bang kut é su, nungmoq le haú hkyô lé a sé mù kut pyám é hkyô lé ngò sê nyi lhê. 18 Nghut kôlhâng, haú hkyô gi, Garaí é Hkrisduq shí-nò jamjau hui râ nghut lhê ga luí, myiqhtoi banshoq bang lé hí hí mai taí nhang tô é Garai Gasang yhang, lhoq dik é nghut ri. 19 Hau é yanmai, haú Yhumsing chyáng mâ é nguìngón é ahkyíng yàm yoq jé lô râ matú le, 20 nungmoq é matú hkyin tô é Hkrisduq nghut é Yesuq lé, Yhang

nhang kat byi râ matú le, nungmoq é yubak mara hkyut pyâm byí é hui râ matú le, nungmoq gi, myit lhîng mù Garai Gasâng chyáng lhîng lò keq. ²¹ Garai Gasang gi, a-nham pyat mai, Yhâng é chyoyúng myiqhtoî pê é nhut mai, taí nhang to bê eq rajung za, nyi mi-nyi, joq mijoq lé asik dum saí é pyat jé shoq, Yesuq lé mauhkûng htoq má nyi nhang to râ nghut lhê. ²² Hkâsu mù gâ le, Mosheq taí tô é le, 'Haû Yhumsîng Garai Gasang gi, nungmoq é yhanggu yhangmâng pê chyáng mai, nungmoq é matú ngò sù é myiqhtoî rayuq pô htoq lô nhâng râ nghut lhê; haû yuq taí mitaí nungmoq gyo ra râ nghut lhê. ²³ Myiqhtoî hau é dang lé a gyo sù ó yuq nghut kôlhâng, yhumsîng é byù myû mai chyung hpyit pyâm é hui râ nghut lhê.'* gâ ri.

²⁴ Gè gè yang, Samuelaq mai, yhâng é htâng má châng pô htoq lo é myiqhtoî pé banshoq bang hko kyô lo é má le, buinyi shí pé eq séng mù taí to bekô nghut ri. ²⁵ Nungmoq gi, haû myiqhtoî pê é dang silí wunlí eq, Garai Gasang mai, Abraham lé, 'Náng é awut ashîn é yanmai, mingkan htoq mâ é byù myû chângjup hkungsô wó kó râ nghut lhê!*' gâ é eq rajung za, nungmoq é íchýí îwâ pé eq tô tô é danggidiq lé wó hkam yù râ bang nghut akô. ²⁶ Garai Gasang gi, nungmoq

yuq hkangmó lé yhumsîng agè ashop é hkyô mai wó lhîng taû lò nhang é dông, shimân byi râ matú, Yhâng é dui-nhâng zoshâng lé pô htoq lô nhâng luí, nungmoq chyáng hí nhang kat byi bê nghut ri." gâ ri.

4

Petruq Eq Yohan Nhik Chyup Huí É Hkyô

¹ Hkyangjông pé, noqkuq yhûm zúng é suwún hpó eq Saduke pé gi, Petruq eq Yohan shiwa byu pé lé dang nyo nyi é hkûn, htoq lé lô kômù, ² yhangnhik, shiwa byu pé lé mhoqshit é eq, Yesuq é yanmai shi byuq bê bang Yesuq má dum dui toq lô râ gâ é hkyô lé taí nyi kô é yanmai, yhangmoq gyai yang myit myô nyi bum akô. ³ Haû mù, yhangmoq gi, yhangnhik lé chyup yú luí, myinhâng mauchut lô bê nghut é yanmai, htang napkyó jé shoq htóng má lhûng tô akô. ⁴ Nghut kôlhâng, mungdang lé wó gyô yu é bang myo myo gi, lumjîng kômù luí, yuqgè ngo hkyîng kô jé shoq myô jat lò bekô nghut ri.

Yudaq Byîn Tú Wapdoq Má, Yhangnhik Lé Myî Jep Wú É Hkyô

⁵ Htang nyí, yhangmoq é zau wuî, suwún wuî eq tarâ sará pé gi, Yerusalem wà mó má chôm huí zup akô. ⁶ Hkyangjong mó Anna,

Kayahpaq, Yohan, Alesander pé eq hkyangjong mó é amyû pé banshoq le, haú má bo tô akô. ⁷ Haú mù, yhangmoq gi, Petruq eq Yohan lé gung gung má nyhi to luí, "Nungnhik gi, haí a-tsam, ó yuq é mying mai mù shí lé kut akô lúhú?" ga myí akô.

⁸ Haú hkûn, Petruq gi, Chyoiyung Woi-nyí bying tô é nghut mù luí, yhangmoq lé taí é gi, "Mingbyû wuì é zaugun suwún wuì ê, ⁹ hkyí hten sù shí yuq lé lhoq gê byí é jeju yanmai, yang hkâsu kut lhoq ge yù huì é hkyô lé, hkû-nyí nungmoq ngá-nhik lé myí gôn wú naú kô é nghut le gi, ¹⁰ nungmoq lunglhang bang eq Israelaq byu pé banshoq lé sé nhâng kôlé, nungmoq eq tapzîng má jén sat pyám mù, Garai Gasâng eq shí é mai lhoq dui toq yu é, Nazaret wà byù Yesuq Hkrisduq é mying mai, shí yuq gi, nungmoq é hí má ísu wáng wáng zán zán yap tô é nghut ri.

¹¹ 'Yhûm saí bang nungmoq hkyin htoq pyâm é luq-gok gi, htungchyûn mâ é ahkyak dik é luqgok dut bê.^{1*}

gâ é gi, Yesuq lé taí é dông nghut ri. ¹² Hkyi yù hkyô gi, Yhang mai lai luí gotú a nyi lo, hkâsu mù gâ le, nga-nhung hkyi yu é hui rá matú, mauhkung a-ô má, Yhâng é mying mai lai luí, xângzo byu pé lé byí tô é mying gotú a joq lo é yanmai nghut ri." gâ ri.

¹³ Yhangmoq kúm gi, Petruq eq Yohan nhik a gyuq a kyum taí é lé myàng kôjáng, yhangnhik, jong a doq wú é, mayú byù za nghut é hkyô lé sé to kô é yanmai, maú nyi bum akô; nghut kôlhang, hí hpyang Yesuq eq zum wún wú sù nhik nghut é lé, yhangmoq bûn kat akô nghut ri. ¹⁴ Hau htoq agó, lhoq gê byí é hui sù le, yhangnhik eq rahá yap tô é lé, yhangmoq myàng kô é nghut mù luí, taí rá hkyô haí le a joq lo kó nghut ri. ¹⁵ Haú mù, yhangnhik lé, haú Yudaq byin tú wapdoq* mai lhoq htoq to mù, yhangmoq rayuq eq rayuq hpyê lhum kô é gi, ¹⁶ "Shí nhik lé hkâsu kut lé gè rá lúhú? Yhangnhik kut shit e laklai kumlhá gi, Yerusalem wà mó má nyi é lunglhang bâng é hí má de za dut bê nghut é yanmai, nga-nhung haú lé a wó hê lo nghut ri. ¹⁷ Nghut kôlhang, mingbyû wuì má shí hkyô je riyhang a byo myín ló sháng gaq, ahkuí mai mying haú lé lang mù ó lé le a taí kyo lo rá matú, yhangnhik lé kyuq hkúm pyám sháng." gâ bum akô.

¹⁸ Haú mù, yhangnhik lé dum wut hâng yù luí, Yesuq é mying lé lang mù, haí le hkâtaí, hkâ-mhoqshit kó ga chôm hkûm akô. ¹⁹ Petruq eq Yohan kúm gi, "Garai Gasâng é mungdang lé gyo rá htoq má, nungmoq é dang gyo le gi, Garai Gasâng é hí má gè

* 4:11 Hkyá-on 118:22
San-hedrin gâ lhê.

* 4:15 Yudaq byin tú wapdoq lé Grik dông gi,

râ, a gè râ lé, nungmoq yhang doqđân yù keq. ²⁰ Nga-nhik kúm gi, myàng yù, wó gyô yù bê é hkyô pé lé, a taí é, a wó nyí nghut lhê." ga luí, yhangmoq lé dum tú taí akô.

²¹ Haú hkûn, yhangmoq gi, dut lai lò bê hkyo é yanmai, shiwa byu pé Garai Gasang lé hkya-on kungton nyi bùm kôluí, yhangnhik lé dâm byi râ hkyô a myàng kó ê nghut mù luí, yhangnhik lé dum tân kyuq luí nhang pyám bekô nghut ri. ²² Hkâsu mù gâ le, haú laklai kumlhá dông lhoq gê byi huí é sù gi, asak myi xê zàn chyân bê sù nghut é yanmai nghut ri.

Lumjıng Bång É Kyûdung Dang

²³ Yhangnhik gi, nhang kat pyám é hui kôjáng, yhangnhik é luzúm wui chyáng taú ló kômù, hkyangjong agyi pé eq suwún wui eq yhangnhik lé hkyim é dang banshoq lé, ló taí kyo akô nghut ri. ²⁴ Haú hkyô lé wó gyo kôjáng, yhangmoq gi, myit rahkat zâ eq yhumsing é htê lhoq ko mù, Garai Gasang lé kyûdung kô é gi, "Mauhkûng eq myigûng, wuishuq lung-aú eq, haú pé má, nyi mi-nyi lé hpan tô é, ahko ahkáng lhunglhang wó é Yhumsing ê, ²⁵ Nang, nang é dui-nhâng zoshâng, ngamoq é îchyí íké Dawiq é nhut mai, Chyoiyúng Woi-nyí eq taí tô é gi,

'Haí mù luí, tûngbaù amyú pé gi, nhikjum yô akô? haí mù luí, byu pé gi, akôm dâ pyám akô lhu?'

²⁶ Haú Yhumsing eq Yhâng é Hkrisduq lé gumlau toq râ matú, mingkan hkohkâm pé gi, toq mù, zau suwún wui eq rahá zup zıng bum akô.^{1*}

gâ ri. ²⁷ Gè gè yhang, Herut eq Pontu Pilat nhik gi, tûngbaù pé eq Israelaq byu pé le mù, wà mó shı má chôm zıng to kôluí, nang xú but byi é sù,† nang é Chyoiyúng dui-nhâng zoshâng Yesuq lé gum-lau toq râ dâ nyi akô. ²⁸ Nang é wum-o a-tsam eq nang ô nau é dông dut râ matú, hí hkûn mai nang myit hpyit doqđân tô é hkyô lé, yhangmoq gi, kut pyám bekô nghut ri. ²⁹ Yhumsing ê, ahkuí yhangmoq taí kyuq nyi é dang lé myàng byi laq ô! Nang é dui-nhâng zoshâng wui, a gyuq a kyum é myit eq nang é dang lé taí râ matú wum-o byi laq! ³⁰ Nang é wum-o bo é loq lhâm kat luí, nolı nojàng lé lhoq gê byi mù, nang é Chyoiyúng dui-nhâng zoshâng Yesuq é mying mai, limik kumlhá eq mauhpo muzó pé lé kut shit laq ô!" gâ akô.

³¹ Haú su, kyû ban dung kôjáng, yhangmoq zıng tô é jowò gi, dui nún lô mù, yhangmoq lhunglhang bang gi, Chyoiyúng Woi-nyí byıng lô luí, Garai Gasang é mung-

* 4:26 Hkya-on 2:1-2 † 4:27 Xú but é hkyô gi, Yudaq byu pé htung dông xú but byi jang, rajung jung kut râ matú hkyin masat yu é hkyô nghut lhê. Xú but byi é sù gi, Grik dông Mesaia gâ é nghut lhê.

dang lé a gyuq a kyum é za tai bùm bekô nghut ri.

Azing Zê Lé Chôm Gam Chông Kô É Hkyô

³² Haû lumjing é lhunglhang bang gi, i-myt rahkat za nghut nyi akô; ó yuq le, yhumsing wó é zè lé ngá é a gâ é za, banshoq eq chôm gam chung nyi akô. ³³ Lagyo pé le, haû Yhumsing Yesuq dum dui toq é hkyô lé a-tsam mó èq saksé hkâm nyi kô é nghut mù luí, yhangmoq banshoq bâng é ahtoq má jeju myo myo joq nyi ri. ³⁴ Yhangmoq chyáng a wó a lom é byù rayuq le a nyi kó. Hkâsu mù gâ le, maumyí ratóng wó é, a nghut jáng, yhúm wó é bang ó yuq nghut kôlhang, haú pé lé adàm dàm ùng pyám luí wó yu é ngùn le gi, ³⁵ lagyo pé é hkyí wang má lé to byí akô. Haû mù luí, a wó a lòm sù ó yuq lé le ra tô é eq rajung za gàm byí akô nghut ri.

³⁶ Haú hkûn, Barnaba ga luí lagyo pé èq myhing byí é, Kupru ming mâ é Lewiq byù Yosep le, yhang wó é maumyí ratóng lé ung luí, wó yu é ngùn lé lagyo pé é hkyí wang má, lé to byí ri. ³⁷ Barnaba gâ é dang lichyúm gi, myit wum byí su é yhangzo gâ é lichyúm nghut lhê.

5

Anani Eq Sahpira Nhik É Hkyô

¹ Nghut kôlhang, Anani ga sù gi, yhangmyí Sahpira eq rahá, yháng nhâm wó é

maumyí ratóng lé ùng pyám luí, ² yhangmyí le bo sê é dông, ngùn haû ra-am lé gi, haq myhit yu to mù, ra-am lé za lagyo pé é hkyí wang má lé to byí akô.

³ Haû mù luí, Petruq gi, "Anani é, Chyoiyúng Woi-nyí lé mhaû pyám râ matú eq, maumyí hpau mâ é ra-am lé haq yu to râ matú, haí mù luí, náng é myit má Tsadán le byíng nhang tô lhê lhú? ⁴ Maumyí haû joq tô le, náng é zè nghut lhê a nghut lhú? Wó ung é ngùn le náng é zè nghut ashí, a nghut lhú? Haí mù luí, náng haú dông dâ lhê lhú? Byù lé mhaû é a nghut, Garai Gasang lé mhaû pyám bê nghut ri." ga tai ri.

⁵ Anani gi, dang haû lé wó gyo jáng, lêng mù, shi byuq bê nghut ri. Haú hkyô lé wó gyô é bang banshoq le, gyai yhang gyuq bùm bekô nghut ri. ⁶ Haú hkûn, zorâm wui gi, toq mù, yhang é mâng lé htup luí, ê waq myhup pyâm akô. ⁷ Hau htâng, sum hkyíng kô myáng jáng, yhangmyí le, wang lé lo ri. Haû su dut é hkyô lé gi, yhang a sé nghut ri.

⁸ Haú hkûn, Petruq gi, "Ngo lé tai kyô wú aq. Nungnhik ùng é maumyí hpau gi, shí gû za nghut lhê lhú?" ga myi jáng, yhang gi, "Nghut lhê, haú gû za nghut bê." ga tú tai ri.

⁹ Petruq gi, "Nungnhik gi, haû Yhumsing é Woi-nyí lé ísu kut chyam wú râ matú, hkâsu mù chôm myit huí akô lhú? Wú aq, náng é yhumsing

hpó lé ê myhup pyám bang gi, haû hkúmdong má jé bê; yhangmoq gi, nang lé le waq htoq pyám kó râ nghut lhê." ga taí ri.

¹⁰ Radá dâm, yhang le lagyo hpó é hkyî wang má lêng shi byuq bê. Zorâm wui le wang lo wú le, myiwe haû shi to lánq é lé myàng kôluí, waq ê mù, yhanglang é nàm má, ê myhup pyám bekô. ¹¹ Hau é yanmai, haû hkun lhê é hpúng byù banshoq bang eq, haû su dut é hkyô lé wó gyo má wó gyô é bang gi, gyai yhang gyuq bùm bekô nghut ri.

Byù Myo Myo Lé, Lagyo Pé Lhoq Gê Byî É Hkyô

¹² Ahkuí, lagyo pé gi, ming-byù wui é hí má limik kumlhá eq mauhpo muzó myo myo lé, kut shit nyi akô. Haû lumjínq bang gi, i-myt rahkat zâ èq, Sholumon jiroq má chôm hui hui kut bum akô. ¹³ Shiwa byu pé gi, yhangmoq lé hkunggâ nyi bùm kôlháng, yhangmoq lé a wám ê zum bùm kó. ¹⁴ Nghut kôlháng, haû Yhumsîng lé lumjínq é myiwe yuqgê wui gi, myo sheq myô jat lò kômù, yhangmoq chyáng je myô jat lò bê nghut ri. ¹⁵ Haû mù luí, byu pé gi, Petruq laí lo é hkûn, yhâng é wupzo za lháng rayuq yuq é ahtoq má zang sháng gaq ga, nõhpyo huí é bang lé, wà má é hkyô yàm má waq htoq ê mù, yhuphpú pé eq taphkang pé má lheq tô akô. ¹⁶ Hau htoq agó, Yerusalem awui ayàm má é

wà pé mai le, byù ajùm ayò gi, no é bang eq agè ashop é nat wang zing-ri huí é bang lé shuí jé lé bum akô; haû bang lhunglháng gi, lhoq gê lhoq yò byí é huí bum akô nghut ri.

Lagyo Pé Zing-ri Huí É Hkyô

¹⁷ Hkyangjong mó eq yhâng é luzúm wui, Saduke hpúng má é byu pé kúm gi, gyai yhang wú manon bùm kôluí, toq mù, ¹⁸ lagyo pé lé chyup yù luí, wà má é htóng má lhung tô akô. ¹⁹ Nghut kôlháng, haû myín lé, Yhumsîng é maumang lagyo rayuq gi, htóng hkum pé lé hpông pyám mù, yhangmoq lé shuí htoq yù uchyang, ²⁰ "Nungmoq htoq lò mù, noqkuq yhùm má ê yap to luí, dui é asak hkyô sik eq sêng é danglù banshoq, shiwa byu pé lé taí kyo keq." ga taí ri.

²¹ Napsûn myoqmyàng zó lé, yhangmoq gi, noqkuq yhùm má wàng mù yhangmoq wó gyô yu é eq rajung za, shiwa byu pé lé, mhòqshit hi lò akô.

Haû u lé, hkyangjong mó eq yhâng é luzúm wui gi, Israelaq byu pé é suwún wui lhunglháng bang lé ji yù mù, Yudaq byin tú wapdoq chôm zung yù luí, lagyo pé lé é shuí yù râ matú htóng shut byù nhang kat akô. ²² Haû bang kúm gi, htong má jé é hkûn, lagyo pé lé a myàng kôjáng, dum taû lò mù lo taí kyo kó é gi, ²³ "Htóng hkum le gíng gíng myhî to lánq ri, htóng zúng bang le hkum yàm má

yap tô akô. Nghut kôlhang, hpông wú le, ahkaû má ó le a nyi to lo nghut ri." gâ ri. ²⁴ Noqkuq yhûm zúng é zau hpó eq hkyangjong agyì wuì gi, dang haû lé wó gyo kôjáng, "Shí hkyô haí dut lô râ lhú?" ga, gyai gyuq maú bum akô.

²⁵ Haú hkûn, byù rayuq wang lé lô mù, "Wú keq, nungmoq eq htóng má lhùng tô é bang gi, noqkuq yhûm má yap to mù byu pé lé mhoqshit nyi bum akô." ga luí, yhangmoq lé taí kyô ri. ²⁶ Haú mù luí, zau hpó haû gi, yhâng é a-ô mâ é bang eq ê mù, lagyô pé lé ê shuí yu akô. Nghut kôlhang, shiwa byu pé luqgok eq dú lô kó râ lé gyuq kô é yanmai, htân htân a wám kut kó nghut ri.

²⁷ Lagyô pé lé shuí jé lô kôjáng, Yudaq byìn tú wapdoq hí má yhangmoq lé nyhi tô akô. Haú hkûn, hkyangjong mó gi, ²⁸ "Yesuq é mying lé lang luí a mhoqshit râ matú, nungmoq lé, htan é hkunmó hkyô to bê nghut lhê. Nghut kôle, nungmoq mhoqshit é hkyô gi, Yerusalem wà mó jàm shoq, nungmoq kut bekô nghut luí, Yesuq é sui lé, ngamoq é ahtoq má ke byi râ dá nyi akô." ga luí, yhangmoq lé taí akô.

²⁹ Haú hkûn, Petruq eq gotû lagyô pé tú taí kô é gi, "Ngamoq gi, byù dang lé gyo ra htoq má Garai Gasâng é mungdang lé je luí gyo râ dut lhê. ³⁰ Nga-nhùng é îchyí îwâ

pê é Garai Gasang gi, nungmoq eq tapzîng má lhâng sat pyâm é Yesuq lé, shi e mai lhoq dui toq kat bê nghut ri. ³¹ Israelaq amyû lé, myit lhîng hkyô eq mara hkyut byi hkyô hpông byi râ matú, up é ahkáng wó Sû eq hkyi yù Sû kut nhâng râ ga, Garai Gasang gi, Yhang lé, Yhâng é loqyo loq* má waq toq to bê nghut ri. ³² Ngamoq le shí hkyo é saksé pé nghut nyi lhê; mungdang lé gyô yù luí châng é bang lé Garai Gasang byi tô é Chyoiyúng Woi-nyí le, shí pê é saksé nghut lhê." ga akô.

Gamalelaq Hpaqchyî Byî É Hkyô

³³ Yhangmoq gi, dang haû lé wó gyo kôjáng, lûm gyo nhik-yo naû kômù, lagyô pé lé sat pyâm râ lhâng myit akô. ³⁴ Nghut kôlhang, mingbyû banshoq bâng é hí má aróng wó é tarâ sará Gamalelaq gâ é Hparishe rayuq, haû Yudaq byìn tú wapdoq má toq yap mù, lagyô pé lé razup zo lhoq htoq to nhâng luí, ³⁵ yhang taí é gi, "Israelaq byu pé ê, shí bang lé hkâsu kut râ hkyô, rago za hí myit wú keq. ³⁶ Hkâsu mù gâ le, hí hpyang Htudaq gâ é byù rayuq pô htoq lô mù, yhânggùng yhang byù mó rayuq yuq nghut lhê ga taí jáng, byù myi shô kô yhâng chyáng châng wú bekô. Yhang sat pyâm é hui luí, yhang htâng châng é lhunglhâng bang le byo myín byuq kômù, haí le a wó

* 5:31 Garai é loqyo loq gâ é gi, hpautap hkungga gíng é jowò lé taí nau é nghut lhê.

kut dut byuq akô nghut ri.
³⁷ Hau htâng, mying jihpán guq yu é buinyi má, Yudaq gâ é Galile byù rayuq pô htoq mù, mingbyû wui lé yhâng hkyam shut mhoq hpyoq yu ri. Yhang le sat pyâm é hui mù, yhang htâng châng é lhunglhâng bang le, byo myín byuq bekô nghut ri.
³⁸ Ahkuî le, shí bang lé haî le hkâgon ko, yhangmoq kâm é dông nghut nyî kô shâng gaq; yhangmoq kut nyi é hkyô eq dâ nyi é hkyô pé gi, byù myit dông kut é nghut jâng, htên byoq byuq râ za nghut lhê. ³⁹ Nghut kôlhang, Garai Gasâng chyáng mâ é nghut le gi, nungmoq wó lhoq hkyîng pyâm kô râ a nghut. Garai Gasâng é gye sheq dut lò kô râ nghut lhê." gâ ri.

⁴⁰ Dang haû lé yhangmoq gyô htuk bum akô. Haû mù, lagyô pé lé wut yù mù luî, nhuq bat yù kômù, Yesuq é mying lé lang luî mhoqshit é hkyô a ge kut râ nghut lhê ga taí kômù, nhang pyâm akô nghut ri.

⁴¹ Lagyô pé kúm gi, Yesuq é mying é yanmai ru hpuzô é hkyô gi, gingdán nyi ri, ga myit yù kômù, Yudaq byin tú wapdoq haû mai gabú myit eq htoq lô bekô. ⁴² Hau htâng, yhangmoq gi, nyí wui làng noqkuq yhûm má le, rayhûm htâng rayhûm má le, Yesuq gi, Hkrisduq nghut é hkyô gabú danglù lé mhoqshit hkô kyô nyi akô nghut ri.

6

Garúm Râ Byù Nyhit Yuq Lé Hkyin Yu É Hkyô

¹ Ahkuî, chángzô pé myô jat lo nyi é buinyi pé má, Grik dang nyo é Yudaq byu pé gi, yhangmoq é chuimó myhî pé lé, nyi wui lhê é gàm tso gàm huq é hkyô má rago a wó kut kô é yanmai, Hebre myíng mu é Yudaq byu pé lé mara hûn dang taí bum akô. ² Haû hkûn, lagyo raxe í yuq gi, chángzô pé lhunglhâng bang lé wut yù mù, "Ngamoq, Íwa Garai Gasâng é mungdang hko kyô é muzó lé rap pyâm to mù, zangbó amû lé za lajang nyi é nghut le gi, a htuk râ nghut lhê. ³ Haû mù luî, gumang wui ê, Chyoiyúng Woi-nyí byíng é eq hpaqchyî byéng-yá bo é nhik bo byù nyhit yuq lé nungmoq chyáng mâ é hkyin to keq. Haû bang lé muzó shí lhum hun to râ nghut lhê. ⁴ Ngamoq kúm gi, kyûdûng é hkyô eq mungdang hkô é hkyô lé za, noqzuq tung kut nyi râ nghut lhê." ga taí akô.

⁵ Dang haû lé shiwa byù lhunglhâng bang gyô htuk kômù luî, lumjing myit kô é, Chyoiyúng Woi-nyí byíng é Stehpan ga sù eq, Hpilip, Prokoru, Nikanora, Timun, Parmena, Yudaq noqkuq htûng má lhing wang lò bê sù Antioku wà mó má é Nikolaq pé lé hkyin yù mù, ⁶ lagyô pé chyáng shuî lô akô; lagyô pé gi, kyûdung byi kômù, yhangmoq lé loq ke byi akô nghut ri.

⁷ Garai Gasâng é mung-

dang gi, je myô jam lò luî, Yerusalem wà mó má chángzô pé gyai myô jat lawán lo é htoq agó, hkyangjông pé myo myo le, haû lumjîng hkyô má châng nyi bum akô.

Stehpan Chyup Yû Huî É Hkyô

⁸ Ahkuî, Stehpan gi, Garai Gasâng é jeju chyunghuq eq wum-o a-tsam byíng nyi é nghut mù, byu pé é hí má mauhpo muzó pé eq limik kumlhá mó pé tún shit ri.

⁹ Haû hkûn, luthkyô ga bâng é tarajong eq sêng é Kuruni, Alesander eq Kiliki, Asia mau mâ é bang ra-am gi, toq mù, Stehpan eq dang chyin chyin lhûm akô. ¹⁰ Nghut kôlhang, Stehpân é dang gi, Chyoiyúng Woi-nyí lom é hpaqchyí dang nghut é yanmai, yhangmoq a ûng kó nghut ri.

¹¹ Haû mù, yhangmoq gi, "Shí yuq, Mosheq eq Garai Gasang lé rhoi dang taí nyi é lé, ngamoq wó gyô ri." ga luî, nhaû taí nhâng râ byû haq lung tô akô.

¹² Haû mù, yhangmoq gi, mingbyû wuì eq nhik bô suwún wuì, tarâ sará pé lé, chun htau mù, Stehpan lé chyup yû nhâng luî, Yudaq byìn tú wapdoq má shuí nyhi tô akô. ¹³ Mhaû é saksé byu pé lé le lhoq hâng kat luî, haû bang gi, "Shí yuq, shí chyoiyúng jowò* eq jep é tarâ lé shut shai é dang ru taí nyi ri. ¹⁴ Nazaret wà

byû Yesuq ga sù gi, jowò shî lé hpyoq pyám mù, nga-nhúng lé Mosheq eq byi tô é htunghking lé htaí pyám râ nghut lhê ga luî, yhang taí é dang lé ngamoq wó gyô é nghut lhê." ga taí akô.

¹⁵ Haû Yudaq byìn tú wapdoq má zung to bang ban-shoq, yhang lé chôm wú tsuq nyi kô é hkûn, yhâng é myoqdong gi, maumang lagyo é myoqdong su dut é lé, yhangmoq myang akô nghut ri.

7

Stehpan Taí É Dang

¹ Haû hkûn, hkyangjong mó gi, "Dang haû pé têng lhê lú?" ga luî, yhang lé myi jáng,

² Stehpan tú taí é gi, "Gumang wuì eq îwa wuì ê, gyô wú keq, nga-nhúng lhunglhâng bâng é îchyí Abraham gi, Haran wà má a ló nyi shi lé, Mesopotamiaq mau má nyi tô ashî hkûn, hpungwup shingkang bo é Garai Gasang gi, yhâng chyáng lé htoq shit mù, ³ Náng é ming eq náng é amyû mai htoq ló luî, ngò tún shit râ ming shut e ló aq.* ga luî, yhang lé taí ri.

⁴ Haû mù, yhang gi, Hkaldea byu pé é mau mai htoq ló luî, Haran wà má ló nyi nyi ri. Yhâng wa shi byuq é htâng má, Garai Gasang gi, ahkuî, nungmoq nyi nyi é ming shî má yhang lé htot lô nhâng bê nghut ri. ⁵ Garai Gasang gi, shí ming má yhang

* **6:13** Shí chyoiyúng jowò gi, Yerusalem noququq yhùm lé gâ lhê. ✱ **7:3** Apùn 12:1

lé silí wunlí nghû râ, hkyî rahkô nang í é myigùng lhang a byî é nghut kôlhang, yhang, zodù lhang a wò shi mai, yhang lé le, yhang é awut ashín pé lé le, maumyî shî byi râ ga danggidiq byî to bê nghut ri. ⁶ Hau htoq agó, shí hkyô lé Garai Gasang xoq taí é gi, 'Náng é awut ashín pé, tungbàu ming má bíng nyî mù, haú ming bâng èq myi shô zàn jùn zô é eq zing-rî é lé hui kó râ. ⁷ Nghut kôlhang, yhangmoq lé jùn zô é amyû lé le, ngò jéyáng râ nghut lhê.' gâ ri. 'Haú hkûn, yhangmoq gi, haú ming mai htoq lô mù, jowò shî má ngo lé noqkuq kó râ nghut lhê.'^{*} ga le, Garai Gasang taí ri. ⁸ Hau htâng, yhang lé ahpyo-kuq hpyit byi râ hkyô eq sêng é dangshikaq le, byî ri. Haú mù, Abraham gi, Isak lé hku é htâng shit nyí buinyî má ahpyo-kuq hpyit byi ri; Isak gi, Yakup lé hkû mù, Yakup gi, íchyí îwa achýng raxe í yuq lé hku kat bê nghut ri.

⁹ Haú íchyí îwâ pé gi, Yosep lé manôn kôluí, Egutuq ming shut jùn dông úng kat akô. Nghut kôlhang, Garai Gasang gi, yhang eq rahá nghut nyî mù luí, ¹⁰ wuîhke jamjau banshoq mai yhang lé lhoq lhut yû mù, Egutuq hkohkâm Hpara-uq é hí má le myoqdong wó, hpaqchyí byéng-yá le bò nhang é yanmai, hkohkâm haú gi, Egutuq ming eq, yhang é hkohkâm-wâng banshoq lé up

nhang ri.

¹¹ Haú u lé, Egutuq ming eq Hkanan ming banshoq má mutmó gyó lô mù, wuîhke jamjau mó hui bekô. Nga-nhung é íchyí îwâ pé le zoshuq a myang hô zo lo dut byuq bekô nghut ri. ¹² Ahkuí, Yakup gi, Egutuq ming má guqzo joq é hkyô lé wó gyo jáng, nga-nhung é íchyí îwâ pé lé sâng-hî dâm ê nhang ri. ¹³ Htang dâm dum ê é hkûn, Yosep gi, yhanggu yhangmâng pé lé yhang ó nghut é hkyô taí kyô ri. Hpara-uq le Yosep é yhumbyù ikun hkyô lé sê yù byi bê nghut ri. ¹⁴ Hau htâng, Yosep gi, yhang wa Yakup eq yhumbyù banshoq nyhit xe ngo yuq lé, yhang chyáng pying yù bê nghut ri. ¹⁵ Yakup le Egutuq ming má jé gyó lô luí, yhang eq nga-nhung é íchyí îwâ pé gi, banshoq haú ming má shî lô byuq bekô nghut ri. ¹⁶ Yhangmoq é mâng lé gi, Shehkem wà má yu taú lô mù, Shehkem wà má é Hamora é yhangzo yhangshu pê chyáng mai, Abraham èq ngùn byi mù wui hpyit tô é lupdùng má lô myhup tô akô nghut ri.

¹⁷ Abraham lé Garai Gasang byî tô é danggidiq dik râ ahkyíng jé lo nyî é u lé, ¹⁸ nga-nhung é amyû gi, Egutuq ming má Yosep lé a sê é hkohkâm pô htoq é pyat jé shoq, myoluq jebe lò bekô nghut ri. ¹⁹ Hkohkâm hpó haú gi, nga-nhung é amyû

htoq má a ge é hpaqchyî da luî, nyheqnú pé lé shi byuq sháng gaq ga, dú pyám nhang é dông mai nga-nhông é îchyî îwâ pé lé zing-ri bê nghut lhê.

²⁰ Haû u má, Mosheq lé hkû to bê. Yhang gi, Garai Gasâng é hí má gyai yúnglhô é sù nghut ri; yhang gi, yhângwâ é yhûm má lhamó sum hkyap baú tô é hui mù, ²¹ htot tô tô é hui jáng, yhang lé Hpara-uq é byizô èq xe yù mù, zosíng kut yû luî, hku kô ri. ²² Mosheq gi, Egutuq ming mâ é hpaqchyî byéng-yá banshoq lé mhoq yû luî, nhut shô a-tsam eq hkyî loq a-tsam gyai bò sù nghut ri.

²³ Yhang asak myi xê zàn jé lò jáng, yhâng é gumang Israe-laq byu pé chyáng ê kûm wú râ matú wó myit htoq kat ri.

²⁴ Ê jé jáng, zing-ri hui nyi é sù rayuq lé é myâng luî, haú yuq lé búng mù, zing-rî nyi é Egutuq byù lé, loqchoq hpuq é dông sat pyâm ri. ²⁵ Mosheq gi, yhâng é byu pé lé yhâng é loq dông Garai Gasang hkyî yù hkyô byi nyi é lé, yhâng é amyù pé sê gyo byi nhô ngâm kôlhang, yhangmoq a sê gyo byi kó nghut ri. ²⁶ Htang nyí lé, Israe-laq byù yhangchang mabyoq htoq nyi é má, e ang mù, yhangnhik lé pyîn nau luî, 'Ahkaû nhik ê, gumang yhangchang sheq ru nghut lhê nhîng, haî mù rayuq eq rayuq byoq lhum nyi akô lhú?' ga taî ngón wú ri.

²⁷ Luzúm hpó lé zing-rî nyi sù yuq gi, 'Ngamoq é ahtoq

má zau eq tarâ agyî kut râ matú, nàng lé ó yuq hkyin tô é lhú? ²⁸ A-nyí nap Egutuq byù lé sat pyâm é su, ngo lé le sat pyâm nau ri lhú?'* ga luî, tû taî uchyang yhang lé dùn chyûn pyâm ri. ²⁹ Mosheq gi, dang hau é yanmai, hpâng luî Midian ming má é nyi byuq ri. Haû má yuqzo í yuq é wó ri.

³⁰ Haû ming má myi xê zàn lai jáng, Sinaq Bùm yàm, yoso hkaû mâ é myi gyúng tô é mhanpúng mai, maumang lagyo rayuq gi, Mosheq lé htoq shit ri. ³¹ Mosheq gi, haû lé myàng jáng, hau é yanmai maú luî, wú wú râ ga huî e ló le, Yhumsíng é htê htoq lo é gi, ³² 'Ngò gi, náng îchyî îwâ pé é Garai Gasang, Abraham, Ísak, Yakup é Garai Gasang nghut nyi lhê.'* gâ ri. Mosheq kúm gi, gyuq nán luî, a wám tu wú nghut ri.

³³ Haû Yhumsíng gi, 'Náng é hkyî-tsung hkyut pyám aq, nàng yap tô é jowò gi, chy-oiyúng é myigùng nghut lhê.

³⁴ Egutuq ming má ngá é amyù pé zik zo huî nyi é hkyô lé, ngò gè gè yhang myàng bê; yhangmoq é ngàu nhik ngàu htê lé ngò wó gyo bê; yhangmoq lé hkyi yù râ matú ngò gyó lé é nghut lhê; ahkuî, lé aq, ngò, nang lé Egutuq ming shut nhang taû kat râ.'* ga luî, yhang lé dum taî ri.

³⁵ Yhangmoq èq, 'Nang lé zau eq tarâ agyî kut râ matú, ó yuq hkyin tô é lhú?' ga luî he-ngik pyâm é Mosheq

lé yhang, mhanpúng má htoq shit é maumang lagyo đông mai, Garai Gasang gi, yhangmoq é zau eq hkyi yù sù kut nhâng luí, taú nhang kat é nghut ri. ³⁶ Haú Mosheq yhang, Egutuq ming má le, Nhông Nè má le, yoso hkaú pé má le, myi xê zàn gyoro má mauhpo muzó pé eq limik kumlhá pé tân shit uchyang, yhâng é byù myû pé lé Egutuq ming mai shuí htoq ló ri.

³⁷ Israelaq byu pé lé, 'Nung gu nung mâng pé mai, nungmoq é matú ngò eq du é myiqhtoi rayuq lé, Garai Gasang gi, pô htoq lô nhâng râ nghut lhê.[☆] ga luí, taí tô é sù le Mosheq yhang nghut ri. ³⁸ Yoso hkaú má nghut nyi ashí hkùn lé, shiwa byù hpúng má, Sinaq Bùm má yhang lé dang taí é maumang lagyo eq le, nga-nhông é íchý íwâ pé eq le rahá nghut sù gi, yhang yhang nghut nyi ri; nga-nhông lé ap byi râ asak dui é mungdang lé lom yu é sù le, yhang nghut nyi ri.

³⁹ Nghut kôlhang, nga-nhông é íchý íwâ pé kúm gi, yhâng é dang lé a kâm gyo kômù, yhang lé he pyám luí, Egutuq ming shut taú nau é myit bo bum akô. ⁴⁰ Haú mù, Arun lé, 'Egutuq ming mai nga-nhông lé shuí htoq lo é Mosheq gi, haí dut byuq bê hkyô lé, ngamoq a sé lo; haú mù, nga-nhông hí má so byi râ hpara lô pé saí byi aq.[☆] ga taí akô. ⁴¹ Haú buinyi pé má, yhangmoq gi,

nojông zo lô saí mù, alhô haú lé hkungga nhông byi uchyang, yhangmoq é loq èq saí tô é muzó jizó má gabú nhik dik nyi akô. ⁴² Haú mù luí, myiqhtoi pé é laiká má ká tô é gi,

'Israelaq byu pé ê, myi xê zàn tup yoso má chung é shigu eq hkungga gi, ngo lé nhông byi é nghut akô lú?

⁴³ Nungmoq gi, nungmoq noq râ matú saí yu é alhô, Molak é zúm eq Rehpan hpara é kyí lé sheq, waq lhing wún ko é yanmai,

Babelon lai shoq ngò nungmoq lé lhoq lham pyám râ nghut lhê.[☆]

ga luí, bo tô é eq rajung za, Garai Gasang gi, yhangmoq chyáng mai myoqdong lhing pyám mù, mauhkung htoq má é bui, kyí, lhamó pé lé noqkuq râ matú ap pyám bê nghut ri.

⁴⁴ Mosheq lé, nàng myang é azòng eq rajung za saí aq ga, Garai Gasang taí é đông saí tô é saksé zúm lé, haú yoso má nga-nhông é íchý íwâ pé wó yù bekô nghut ri. ⁴⁵ Haú mù, nga-nhông é íchý íwâ pé gi, yhangmoq é myoq hí mai Garai Gasang èq hkat htoq pyám byi é byù myû pé é mau má, Yosuq eq rahá wang nyi ló kô é hkùn, saksé zúm haú lé yu wang ló akô. Haú gi, Dawiq é pyat jé shoq joq to bê nghut ri. ⁴⁶ Dawiq kúm gi, Garai Gasang hí má myoqdong wó sù nghut mù luí,

☆ 7:37 Tarâ Pun 18:15

☆ 7:40 Htoq Ló 32:1

☆ 7:43 Amo 5:25-27

Yakup é Garai Gasâng matú nyi jowò saí râ ahkáng dung kôlhang, ⁴⁷ Sholumon èq sheq saí bê nghut ri.

⁴⁸ Nghut kôlhang, Myhang htáng htum Sû gi, byu é loq èq za saí é yhùm má nyi é a nghut, haú hkyô eq séng luí myiqhtoi wá taí tô é gi,

⁴⁹ 'Mauhkûng gi, ngá é zùng tanghkuq, myigùng gi, ngá é hkyî nang jang nghut nyi lhê;

ngá é matú hkasû é yhùm saí byi shi kó râ lúh? Ngò nô yù râ jang gi, hkâmá nghut kó râ lúh?

⁵⁰ Haú banshoq lé ngá é loq èq baú saí tô é a nghut kó lúh? ga luí, haú Yhumsîng taí ri. ^{*}

gâ ri.

⁵¹ I-myyit htân mù, i-myyit eq nohkyap má ahyo-kuq a hpyit é bang* ê, nungmoq gi, nungmoq é íchyí îwâ pé su, Chyoiyúng Woi-nyí lé hkâ-nhám le lhom he-ngik pyâm nyi akô; ⁵² Nungmoq é íchyí îwâ pé èq a zing-rî wú é myiqhtoi, ó yuq wá nyi lhê lúh? Haú Dingmán Sû pô htoq râ hkyô lé hko kyô é bang lé, yhangmoq sat pyâm é chyat nghut akô; ahkuí, nungmoq le, haú Dingmán Sû lé ap pyâm é bang eq sat pyâm é bang nghut nyi akô.

⁵³ Maumang lagyô èq shit kyo byi é tarâ lé nungmoq wó yù kôlhang, haú lé a cháng kó nghut ri." gâ ri.

Stephan Lé Luqgok Èq Dú Sat É Hkyô

⁵⁴ Haú hkyô lé yhangmoq wó gyo kôjáng, yhangmoq é nhiklhum má lùm htaú záng kô é yanmai, Stephan lé, zui wang ngat kyáng shoq wú nhik-yô nyi akô. ⁵⁵ Stephan kúm gi, Chyoiyúng Woi-nyí byíng mù, mauhkûng shut tu wú kat le, Garai Gasâng é hpungwup shingkang lé le, Garai Gasâng é loqyo hkyam shut Yesuq yap tô é lé le, myang ri. ⁵⁶ Haú mù, yhang gi, "Wú keq, mauhkûng hpông tô é lé le, Garai Gasâng é loqyo hkyam shut haú Byu Yhangzo yap tô é lé le, ngò myàng ri." ga taí kat ri.

⁵⁷ Haú hkûn, yhangmoq gi, htê mó o mó garu uchyang, yhumsing é nohkyap xaú pyám mù, radá dâm yang lé chôm htim kômù, ⁵⁸ yang lé wá mai she htoq ló kôluí, luqgok èq chôm dú ló bekô nghut ri; saksé kut é bang gi, Sholuq gâ é zoram é hkyî wang má yhangmoq é buhîng pé lé hkyut bum tô akô.

⁵⁹ Luqgok èq dú nyi bùm kô é u lé, Stephan gi, "Yhumsîng Yesuq ê, ngá é woi-nyí lé hap yù laq." ga kyûdûng ri. ⁶⁰ Hau htâng, yang gi, hky-ihput htuq mù, "Yhumsîng ê, yhangmoq kut é mara haú lé hkyut pyám byi laq." ga luí, htê mó èq wut dúng ri; haú ban taí jáng, yang kâng byit byuq bê nghut ri.

^{*} 7:50 Esai 66:1-2 ^{*} 7:51 I-myyit eq nohkyap má ahyo-kuq a hpyit é bang gâ é gi, Garaí dang lé a lùm a châng é bang lé gâ lhê.

8

Hpúng Byû Lé Sholuq Zing-ri É Hkyô

¹ Sholuq gi, haû má nyi to mù, Stehpan lé sat pyâm é muzó má myit bo huí ri.

Haû nyí mai, Yerusalem wà mó mâ é noqkuq hpúng gi, zing-ri mó huí lo é nghut mù luí, lagyô pé mai lai luí, lumjǐng bang lhunglhang gi, Yuda mau eq Samariq mau jowò hkangmó má byo myín ló bekô. ² Nghut kôlhang, tarâ hkunggâ é bang gi, Stehpan lé yhum pyâm é htâng má, yhang é yanmai iyon mó huí nyi akô nghut ri. ³ Sholuq kúm gi, rayhum htâng rayhúm wàng mù, myiwe yuqgè lé she hkyut htoq yû luí, htóng má lhùng tô é dông mai, noqkuq hpúng haû lé lhoq hpyoq ló nyi ri.

Samariq Wà Má, Gabú Danglù Hkô Kyô É Hkyô

⁴ Byo htoq ló é bang kúm gi, jé é jowò hkangmó má mungdang lé hkô kyô ló akô. ⁵ Haû hkûn, Hpilip gi, Samariq mau mâ é myuq ra-myuq shut e ló mù, Hkrisduq é hkyô lé hkô kyô ri. ⁶ Byû ajùm ayò gi, Hpilip tai kyô é hkyô lé wó gyô é eq, yhang tûn shit é limik kumlhá lé myàng kôjáng, i-myit rahkat za eq yhang é dang chôm gyô nyi bum akô. ⁷ Nat wang júng é byû myo myô pê chyáng mai, agè ashop é nat pé wut garu uchyang htoq ló byuq bum akô; gùngjum shi é bang eq hkyi htên é bang myo myo le,

ge ló byuq bum akô. ⁸ Haû mù luí, haû myuq má gabú hkyô gyai yhang wó bekô nghut ri.

Myoqheq Sará Simun É Hkyô

⁹ Simun gâ é byû rayuq gi, hí lé haû myuq má myoqheq hpaqchyî kut shit mù, Samariq byu pé lé lhoq maú luí, yhang gùng lé yhang, laklaí sù nghut lhê gâ ri.

¹⁰ Byû tiq ko banshoq le, "Byû shí yuq gi, 'haû a-tsam mó' gâ é, Garaí chyáng mai hpungwup a-tsam wó yû sù nghut ri." ga luí, yhang é dang lé gyô bum akô.

¹¹ Haû yuq gi, myáng myáng yhang é myoqheq hpaqchyî eq yhangmoq lé lhoq maú lo é yanmai, yhang dang lé chôm lum bum akô. ¹² Nghut kôlhang, Hpilip hko kyô é Garaí Gasâng é mingdán hkyô eq, Yesuq Hkrisduq é mying eq sêng é gabú danglù hkyô lé, lumjǐng kôjáng, myiwe yuqgè wui-myhup hkâm yu bum akô. ¹³ Simun yhang yhang le lumjǐng mù luí, wui-myhup hkâm yû mù, Hpilip htâng châng wún ri. Hpilip é kumlhá mó eq laklaí kumlhá pé lé myàng jáng, yhang gi, gyai maú byuq ri.

¹⁴ Garaí Gasâng é mungdang lé Samariq byu pé, lhom hap yû bê hkyô lé, Yerusalem wà mó má nyi é lagyô pé wó gyô bùm kôjáng, yhangmoq gi, Petruq eq Yohan nhik lé haû má nhang kat akô. ¹⁵ Yhangnhik gi, lé jé jáng, byû haû bang Choyiyung Woi-nyí wó yû râ matú kyûdung byí

akô. ¹⁶ Hkâsu mù gâ le, Chyoyíyúng Woi-nyí gi, yhangmoq chyáng ó yuq é ahtoq má lé, a gyó lô shí; Yhumsíng Yesuq é myng mai wui-myhup hkâm yu é za ru nghut bùm ashí. ¹⁷ Haû mù luí, lagyô nhik yhangmoq é ahtoq má loq ke byi jáng, yhangmoq gi, haû Chyoyíyúng Woi-nyí lé wó hkâm yù bekô nghut ri.

¹⁸ Lagyô nhik é loq ke kat jáng Chyoyíyúng Woi-nyí wó hkâm yu é lé, Simun myàng jáng, yhang gi, yhangnhik lé ngùn ê byi wú mù, ¹⁹ "Hká yuq é ahtoq má nghut kôhang, ngò loq ke byi jáng, haû yuq gi, Chyoyíyúng Woi-nyí wó yù râ matú, haû su é a-tsam ngo lé le byi kó laq." ga dung ri.

²⁰ Petruq kúm gi, "Garai Gasâng é chyunghuq lé ngun èq wó wui yù râ nghut lhê ga luí, myit é yanmai, náng é ngùn gi, nàng eq rahá htên byoq byuq sháng gaq. ²¹ Nàng gi, Garai Gasâng é hí má myit a dítg sù nghut é yanmai, shí hkyô má nàng wó bo lhóm râ a nghut. ²² Haû mù luí, shí agè ashop é hkyô mai myit lhing mù, Yhumsíng Garai chyáng dúng tôngbán aq. Haû hkún, náng é unghkaû má myit pyám é hkyô lé, mara hkyut pyám byi abe. ²³ Nàng gi, ladu lai shoq nhikhko zo mù, yubak marâ èq tuí zing to huí é lé, ngò myàng ri." ga yhang lé taí ri.

²⁴ Haû hkún, Simun gi, "Nungnhik taí é hkyô haí le ngá chyáng a jé sháng gaq,

ngá é matú haû Yhumsing chyáng kyûdung byi kó laq." ga tû taí ri.

²⁵ Yhangnhik kúm gi, haû Yhumsing é mungdang lé saksé hkâm mù ban hko kyo jáng, Samariq byu pê é wà myo myo má, haû gabú danglù lé hko kyo uchyang, Yerusalem wà mó shut dum taû lò bekô nghut ri.

Hpilip Eq U-nuk Nhik É Hkyô

²⁶ Ahkuí, Yhumsíng é mau-mang lagyo gi, Hpilip lé, "Toq aq, Yerusalem wà mó mai Gaza shut ló é hkyô jé shoq, maupyí shut nyâng za e ló aq. Hkyô haû gi, yoso hkyô nghut lhê." ga taí ri. ²⁷ Haû hkún, yhang toq mù e ló ri. Haû u lé, Ehtiopi ming lé up é hkohkâm myhí Kandake é hí má ahko ahkáng mó wó mù, yhâng é sutzè banshoq lé zûm é, Ehtiopi byù u-nuk rayuq gi, noqkuq râ ga Yerusalem wà mó má ê mù, ²⁸ dum taû lo é hkún, yhâng é myanglhêng má zùng luí, myiqhtoi Esai-aq laiká lé nghap nyi ri. ²⁹ Woi-nyí gi, Hpilip lé, "Myanglhêng shut chyâng e ló aq." ga taí ri.

³⁰ Haû mù, Hpilip gi, din ê mù, myiqhtoi Esai-aq laiká nghap nyi é lé wó gyo jáng, "Nàng nghap nyi é hkyô lé sê gyo ri lú?" ga luí, yhang lé myí ri.

³¹ Haû yuq gi, "Mhoqshit sù yuq a nyi le, ngò hkâsu kut sê gyo râ lú?" ga tû taí mù, yhang eq rahá lo doq zùng aq ga Hpilip lé lung ri.

32 Yhang nghap é
Chyúmdang gi,

"Sat rã sau lé su, Yhang lé she
e ló bê nghut ri;

sau zo gi, sau maú nyhám su é
hí má zim za nyi tô é su,
Yhang le nhut a hpông
é za nyi tô ri.

33 Yhânggùng lé lhoq shôm
pyâm to huí é hkûn,
Yhang lé a tara é đông
doqdân pyám bekô;

Yhâng é asak lé myigùng
htoq mai yù pyám bekô
nghut mù luí, Yhâng é
awut ashín lé ó yuq wó
gôn kyo rã lúhú?"*

gã ri.

34 Haú hkûn, haú u-nuk wa
gi, Hpilip lé, "Haú nghut le
gi, ngo lé taí kyo laq! My-
iqhtoi shí yuq gi, ó lé lhoq
ang luí, taí é nghut lhê lúhú?
Yhânggùng lé taí é nghut lhê
lúhú? Haú a nghut jáng, góyuq
é hkyô lé taí é nghut lhê lúhú?"
ga myí ri. 35 Haú hkûn, Hpilip
gi, Chyúmdang haú lé yù mù,
Yesuq eq sêng é gabú danglù
lé taí kyô ri.

36 Haú su e ló kô le, wuì joq
é má jé jáng, haú u-nuk hpó gi,
"Wú aq, shí má wuì joq tô ri,
wui-myhup hkâm yù rã matú
ngo lé hkúm rã jang haí joq
ashí lúhú?" ga taí ri. 37 Hpilip
gi, "Náng i-myit banshoq èq,
nàng lumjíng bê nghut le gi,
hkâm yu le ge lhê." ga taí
ri; yhang le, "Yesuq Hkrisduq
gi, Garaí Gasâng é Yhangzo
nghut é lé, ngò lumjíng bê." ga
tú taí ri.* 38 Haú hkûn, yhâng

é myanglhêng hkying nhâng
mù, yhangnhik wuì má gyó
wâng luí, Hpilip gi, u-nuk hpó
lé wui-myhup hkâm byí ri.
39 Wuì hkaú mai htoq ló kô é
hkûn, haú Yhumsing é Woi-
nyí gi, Hpilip lé myhik za
shuí ló byuq mù, u-nuk hpó
le Hpilip lé dum a myàng lo;
nghut kôlang, yhang gi, e ló
é hkyô shut gabú myit èq xoq
sô e ló bê nghut ri. 40 Hpilip
kúm gi, Azutu wà má lo htoq
jé kat mù luí, Kesare wà mó
jé shoq haú mau mâ é myuq
pé wà pé hkanmó má gabú
danglù hkô kyô wún ri.

9

*Sholuq Lhik Wang Lo É
Hkyô*

1 Haú u lé, Sholuq kúm
gi, Yhumsing é chángzô pé
lé hkat kyuq nha rã eq sat
pyám rã ga, nhikmó-yô nyi
é nghut mù luí, hkyangjong
mó chyáng è mù, 2 Yhumsing
é Hkyô lé lumjíng é myiwe
yuqgè myàng mi-myàng lé
chyup yù luí, Yerusalem
wà mó shut wó she ló rã
matú, Damaskuq myuq mâ
é tarajong pé má byi rã laiká
pé lé dúng chùng ri. 3 Yhang
e ló le, Damaskuq myuq eq
chyáng ló nyi é hkûn, yhâng
é lêngghkyuq má mauhkûng
mai dân loq tung duqbo htoq
ló ri. 4 Yhang myigùng má
lêng ngop tô é u lé, "Sholuq,
Sholuq, nàng ngo lé haí mù
zing-rí nyi lhê lúhú?" ga luí,
yhang lé taí é htê wó gyô ri.

* 8:33 Esai 53:7-8

* 8:37 Bun zo 37 shí lé Chyúmlaiká ra-am má gi, bo lhê; ra-am
má gi, a bò.

⁵ Haú hkûn, yhang gi, "Yhumsîng ê, nàng gi, ó yuq nghut lhê lú?" ga myi jáng, haú Yhumsîng gi, "Nàng zing-rî nyi é Yesuq nghut lhê, ⁶ toq aq, myuq shut wang ló aq. Nàng zui saí rá hkyô lé lhom taí kyo rá nghut lhê." ga tû taí ri.

⁷ Yhang eq rahá e ló é luzúm wuí gi, htê haú wó gyo kôhang, ó yuq lé le a myàng kô é yanmai, maú hong yap tô bum akô. ⁸ Sholuq toq mù, myoq hpông kat wú le, haí lé le a myàng dut byuq mù luí, yhangmoq gi, yhang lé loq mai shê mù Damaskuq myuq shut shuí wang ló akô. ⁹ Sholuq gi, sum nyí tup myoqjit byuq mù luí, a zo a shuq é nyi byuq ri.

¹⁰ Damaskuq myuq má Anani gâ é chángzo rayuq nyi ri. Yhumsîng gi, yhang lé, "Anani ê." ga shing-rán đông wut ri.

Yhang gi, "Yhumsîng ê, shí má nyi lhê." ga tû taí ri.

¹¹ Haú Yhumsing dum taí é gi, "Toq aq, Hkyô-Nyàng gâ é wà hkyô shut ê mù, Yudaq é yhúm má, Tarshu byù Sholuq lé ê hô aq, yhang gi, kyûdông nyi ri. ¹² Yhang gi, Anani ga sú wang lé lô mù, yhâng é myoq dum myàng sháng gaq ga, yhâng é ahtoq má loq ke byí é lé, shing-rán đông myàng bê nghut ri." gâ ri.

¹³ Anani kúm gi, "Yhumsîng ê, shí yuq gi, Yerusalem wà mó má, náng é sân-yúng bang lé a ge é đông hkâ-myhó kut laí lo é hkyanglù lé ngò myo

myo wó gyô wú bê; ¹⁴ Shí pé má le, náng é myìng lé lêng é bang banshoq lé chyup rá ga, hkyangjong agyi pê chyàng mà é ahko ahkàng wó yu to sú nghut ri." ga tû taí ri.

¹⁵ Nghut kôhang, Yhumsîng gi, "Ru ê aq, shí yuq gi, tûngbaù pé eq yhangmoq é hkohkam pê é hí má le, Israelaq byu pê é hí má le, ngá é myìng lé wùn waq rá matú, ngò chûng rá nghú luí hkyin to sú nghut lhê; ¹⁶ Ngá mying é yanmai hkâ-í hpuzo ra hkyô lé, Ngò, yhang lé tûn shit rá nghut lhê." ga taí ri.

¹⁷ Hau htâng, Anani gi, jé ê mù, yhúm haú má wàng luí, Sholuq é ahtoq má loq kê to mù, "Gumang Sholuq ê, náng myoq dum wó myàng mù, Chyoiyúng Woi-nyí byíng sháng gaq ga, nàng lé lo é hkyô má, nàng lé htoq shit é Yhumsing Yesuq eq ngo lé nhang kat é nghut lhê." ga taí ri. ¹⁸ Haú hkûn jáng, Sholuq é myoq mai akyap sú é wuí gyó byuq mù, yhang myoq dum wó myàng bê. Haú hkûn, yhang gi, toq mù wui-myhup hkâm yù luí, ¹⁹ zoshuq lé zo mù, wum-o dum lhoq pyíng yù bê nghut ri.

Sholuq, Damaskuq Myuq Má Mungdang Hko É Hkyô

Hau htâng, yhang gi, Damaskuq myuq mà é chángzô pé eq rahá rayoq zo zùm yap nyi uchyang, ²⁰ Yesuq gi, Garai Gasâng é Yhangzo nghut é hkyô, haú hkûn jáng tarajong pé má hko kyô nyi bê nghut ri.

21 Sholuq é dang lé wó gyô é lhunglhang bang gi, maú byuq bùm kômù, "Shí yuq gi, Yerusalem wà mó má myìng haù lêng é bang lé lhoq hten lhoq hpyoq sù nghut lhê, a nghut kó lúhú? Ahkuí, shí má le, haù su é bang lé chyup yù mù, hkyangjong agyi pè chyáng ló ap rã da luí jé lé é sù a nghut kó lúhú?" ga myi bum akô. 22 Sholuq kúm gi, atsam je bo lò mù, Damaskuq myuq má nyi é Yudaq byu pé lé taí hpyi kyo luí, Yesuq gi, Hkrisduq yhang nghut nyi é hkyô lé saksé tûn shit ri.

23 Buinyí tsómra myáng é htâng má, Yudaq byu pé gi, yhang lé sat pyám rã matú haq dâ akô. 24 Nghut kôlhang, yhangmoq dâ é hkyô lé Sholuq sê pyâm ri. Yhangmoq gi, yhang lé wó sat pyám shoq ga, nyí lé myín lé myuq hkum pé má lhom nyi akô. 25 Sholuq é chángzô pé kúm gi, myín má yhang lé shuí yù mù, manghkoq má lúng nhâng luí, wà kyám xewâm mai lhoq nyhum hkyô kat akô nghut ri.

Sholuq, Yerusalem Wà Mó Má Taú Jé Lo É Hkyô

26 Hau htâng, yhang gi, Yerusalem wà mó má jé lo é hkûn, chángzô pé eq zùm yap rã matú shikut wú kôlhang, yhang gi, chángzo dut bê hkyô lé a jing kô é yanmai, lhunglhang bang gi, yhang lé gyuq bum akô. 27 Barnaba kúm gi, Sholuq lé lagyo pé chyáng shuí lò mù, Sholuq, hkyô má Yesuq eq hkâsu kut

huí é hkyô lé le, Yesuq èq yhang lé taí é dang wó gyô é hkyô lé le, Damaskuq myuq má Yesuq é myìng mai gyuq myit a bo é za hkâsu kut hko kyô é hkyô lé le, yhangmoq lé taí kyô ri. 28 Haù mù, Sholuq gi, yhangmoq eq rahá Yerusalem wà mó má htoq htoq wàng wàng kut nyí uchyang, Yhumsing é myìng mai a gyuq a kyum é za hko kyô nyi ri. 29 Grik dang nyo é Yudaq byu pé eq le, taí he lhûm nyi akô; nghut kôlhang, yhangmoq gi, yhang lé sat pyám rã dâ akô. 30 Haù hkyô lé, gumang wuì sé kôjáng, yhang lé Kesare wà mó má jé shoq dé mù, Tarshu myuq shut nhang kat akô nghut ri.

31 Yuda mau, Galile mau eq Samariq mau jowò hkanmó mâ é noqkuq hpúng gi, haù yoq pé má, lhoq ging lhoq tîng é hkyô wó yù mù, ngu-ingón nyi akô; haù Yhumsing lé gyuq hkunggâ é hkyô má le, Chyoiyung Woi-nyí èq lhoq pun lhoq kyîng é hkyô pé má le châng nyi mù, myô jat lo bùm bekô nghut ri.

Ainea Ge Byuq É Hkyô

32 Haù hkûn, Petruq gi, haù mau pé má hkat kûm wún uchyang, Ludaq wà mó má nyi é sân-yúng bâng chyáng é jé ri. 33 Haù wà má, gùngjum shí luí shit zân tup yhupjang mai a wó toq é Ainea gâ é byù rayuq lé ê myang ri. 34 Haù mù, Petruq gi, "Ainea ê, Yesuq Hkrisduq, nang lé lhoq gè byi bê nghut ri, toq mù, náng é yhupphú hen yù aq." ga luí,

yang lé tai ri. Haú hkùn jáng, Ainea wó toq yap bê nghut ri. ³⁵ Ludaq eq Sharon pá má nyi é lhunglhang bang gi, haú yuq lé myàng mù luí, Yhumsing Yesuq chyáng lhing wang lo bum akô.

Dorka Ga Sû Dum Dui Lo É Hkyô

³⁶ Ahkuí, Yopa myuq má Tabihta gâ é chángzo myiwe rayuq nyi ri; mying haú lé Grik dang đông gi, Dorka* gâ é nghut lhê. Myiwe haú gi, ge é muzó kut nyi é sù eq, asho awuí bang lé alu byi nyi é sù nghut ri. ³⁷ Haú u lé, yang gi, nõhpyo hui mù shi ló bê nghut ri. Yhang mâng lé gi, chi mù luí ahtoq gok má jang tô akô. ³⁸ Ludaq wà mó gi, Yopa myuq eq chyáng é yan-mai, haú myuq má Petruq nyi é lé chángzô pé wó gyo kôjáng, yangmoq gi, byù í yuq lé nhang kat mù, "Ng-amoq chyáng myap lé lô aq." ga jì nhang kat akô.

³⁹ Haú hkùn, Petruq gi, toq mù, haú nhik htâng châng e ló ri. Yhang jé jáng, ahtoq pyâm gok má shuí hâng yu akô. Chuimó myhî pé lhunglhang bang gi, yhang nàm má yap mù ngaù uchyang, yang-moq eq rahá nyi tô ashî hkùn Dorka hkyup é buhing eq gotû mebu pé lé tûn shit nyi akô.

⁴⁰ Petruq kúm gi, lhunglhang bang lé htoq ló nhâng mù, hkyihput htuq luí, kyûdung mù, mâng shut lhing wú luí,

"Tabihta ê, toq aq!" ga tai ri, haú hkùn myiwe haú myoq hpóng lô mù, Petruq lé myàng jáng, toq zung lo ri. ⁴¹ Petruq gi, loq lhâm kat mù yang lé llang toq yù luí, lumjing bang eq chuimó myhî pé lé wut yù mù, dui gû ap byi ri. ⁴² Haú hkyô lé, Yopa myuq mâ é bang banshoq wó gyô ló kômù luí, byù myo myo gi, haú Yhumsing Yesuq lé lumjing bum akô nghut ri. ⁴³ Haú mù, Petruq gi, shokuq loqmú sai é Simun ga sù eq rahá, Yopa myuq má rayoq zo nyi nyi ri.

10

Koneli É Shing-rán

¹ Ahkuí, Kesare wà mó má gyezo rashô up é Koneli gâ é gyezau rayuq nyi ri. Yang gi, Itali gyedap mâ é nghut lhê. ² Yang gi, tarâ hkungga myit bò luí, yhang é yhumbyù banshoq bang eq rahá Garai Gasang lé gyuq hkunggâ nyi lhê eq, myùng bang lé alu myo myo byi uchyang, Garai Gasang lé hkâ-nhâm le kyûdung nyi ri. ³ Ra-nyí lé, myinhâng sum hkying kô má, Garai Gasang é maumang lagyo rayuq gi, yhang chyáng jé mù, "Koneli ê." ga luí, yang lé wut é lé, shing-rán mai de de myang ri.

⁴ Haú mù, haú yuq lé wú tsuq to mù, "Yhumsing ê, hai hkyô nghut lhê lú?" ga gyuq myit eq myi ri.

* 9:36 Dorka gâ é lichyúm gi, "chochí" gâ é nghut lhê.

Maumang kúm gi, "Náng é kyûdung dang eq alu byî é hkyô gi, Garai Gasâng é hí má, hkungga masat đông hkyâng bê nghut ri. ⁵ Ahkuî, Yopa myuq shut byù nhang kat mù, Petruq gâ é sù Simun lé é shuî lò nhâng aq. ⁶ Yhang gi, wuimau yàm mâ é, shokuq hkyup zô é Simun yhûm má bíng nyi ri." ga taí ri.

⁷ Koneli gi, yhang eq dang taí é maumang lagyo ló byuq jáng, dui-nhâng zoshâng í yuq eq, yhâng chyáng hkâ-nhám le châng nyi bang mâ é, tarâ hkunggâ é gyezo rayuq lé ji yù mù, ⁸ dut laí lo é hkyô ban-shoq, yhangmoq lé taí kyo luî, Yopa myuq shut nhang kat ri.

Petruq É Shing-rán

⁹ Htang nyí nyí-káng u lé, yhangmoq, Yopa myuq jé ló yâm má, Petruq gi, kyûdung râ ga, yhumhkûng shut doq ló ri. ¹⁰ Haú hkûn, yhang gi, zòmut luî rajung jung zô nau nyi ri; nghut kôlhang, zoshuq ru gáí nyi ashî le, yhang moq byuq ló mù myoqwup shing-rán myang é gi, ¹¹ mauhkûng bóng lô mù, hpajóng mó sù é lé, myi chyûn má zui luî myigùng shut lhoq hkyô kat é azíng lé myang ri. ¹² Haú hkaû má, myigùng htoq mâ é hkyî myi hkyî dap é jung dusak ahú hú eq dô yê é jung ahú hú, mau má dang é nghoq ahú hú, lúng tô ri. ¹³ "Petruq ê, toq mù, sat zo aq." gâ é danghtê le mying htoq lo ri.

¹⁴ Petruq kúm gi, "Yhumsîng ê, haú gi, a wó dut, achayut é eq a sansêng é zè lé, ngò hkâ-nhám le a zô wú." ga tú taí ri.*

¹⁵ Haú hkûn, "Garai Gasang lhoq san lhoq séng bê zè lé, a sanséng hkâ-nghû." ga luî, yhang lé dum taí kat ri.

¹⁶ Haú su ga sum dâm taí é htâng má, zè haú lé radá dâm mauhkûng shut wup yu ló bê nghut ri.

¹⁷ Ahkuî, Petruq gi, yhang myang é shing-rán lé haí wá nghut lhê lú ga luî, myit máu nyi é hkûn, haú Koneli nhang kat é bang gi, Simun é yhûm lé myang hô kômù, hkumtot má yap to luî, ¹⁸ Petruq gâ é sù Simun, yhûm haú má nyi a nyi é lé, wut myî wú akô.

¹⁹ Petruq gi, shing-rán haú lé ru myit wú nyi ashî le, Woi-nyí gi, "Wú aq, byù sum yuq nang lé ho nyi akô, toq mù gyó ló aq; ²⁰ yhangmoq gi, ngò nhang kat é bang nghut é yanmai, myit haí a úng-âng é za, yhangmoq eq rahá bo ló aq." ga taí ri.

²¹ Haú mù, Petruq gi, haú bâng chyáng gyó ló luî, "Nungmoq hô nyi é sù gi, ngò nghut lhê, haí ra luî lé kô é lú?" ga myí ri.

²² Yhangmoq taí é gi, "Dingmán é, Garai Gasang lé gyuq hkunggâ é, Yudaq amyû lhunglhâng bâng é hí má myoqdong wó é, shô up gyezau Koneli gi, nang lé yhâng é yhûm má ji hâng yù mù, nàng taí é dang gyo yù

* 10:14 Nhung 11 lé wú aq.

râ matú, yhang lé chyoiyúng maumang lagyô èq taí shit kyô é hkyô lé wó yû luí, ngamoq lé nhang kat é nghut lhê." ga akô. ²³ Haú mù luí, Petruq gi, yhangmoq lé wut hâng yù mù, bíng nhang ri. Hau htang nyi, yhang gi, toq mù, yhangmoq eq rahá bo ló ri; Yopa myuq má é gumang wuì ra-am le châng akô nghut ri.

Koneli Lé Petruq Huí É Hkyô

²⁴ Hau htang nyí, yhangmoq gi, Kesare wà mó shut wang ló akô. Koneli gi, yhâng é gumang wuì eq buinùm ji-myi wuì lé ji tsíng to mù, yhangmoq lé lánng nyi ri. ²⁵ Petruq wang ló jáng, Koneli gi, te yù mù, yhâng é hkyí wang má paí gop noqkuq ri. ²⁶ Petruq kúm gi, "Toq aq, ngò le byù ru nghut lhê." ga luí, taí uchyang yhang lé tu toq ri.

²⁷ Haú mù, Petruq gi, yhang eq dang nyô uchyang wang ló wú le, byù myo myo zup zíng tô bum é lé myang ri. ²⁸ Haú hkûn, yhang gi, yhangmoq lé, "Yudaq byù rayuq gi, noqkuq htúng dông túngbaù rayuq eq a wó zùm yap é, htoq htoq wàng wàng a wó kut é hkyô lé, nungmoq sé lugù nghut akô. Nghut kôhlang, ó yuq lé le achag achyut dut ri, a sanséng dut ri nghû a ge taí é hkyô lé gi, Garai Gasang, ngo lé tân shit bê. ²⁹ Hau é yanmai, nungmoq ngo lé ji kat é hkûn, ngò a he pyâm é za châng lé lo é nghut lhê. Haú mù luí, haí ra kô é yanmai,

ngo lé ji akô nghû ngò myí nau ri." ga taí ri.

³⁰ Haú hkûn, Koneli gi, "Laí lò bê myi nyí nyí, myinhâng sum hkyíng má, ngá é yhùm má, ngò kyûdúng nyi le, danso loq, duqbó é mebu wut é byù rayuq ngá é hí má yap htoq shit mù, ³¹ 'Koneli é, Garai Gasang gi, nánng é kyûdung danghtê lé le gyo byi bê; nàng alu byí é hkyô lé le, bun byi bê nghut ri. ³² Hau é yanmai, Yopa myuq shut byù nhang kat mù, Petruq gâ é Simun lé ji nhâng aq. Haú yuq gi, wuimau yàm má é shokuq hkyup zô é Simun yhùm má bíng nyi ri.' ga taí ri. ³³ Haú mù luí, haú hkûn jáng ngò nánng chyáng byù nhang kat bê nghut lhê. Ahkuí, nàng jé é gi, gyai gê bê nghut ri. Yhumsíng yhang nang lé taí nhang é gû banshoq gyô yù râ matú, ahkuí ngamoq lhunglhang bang Garai Gasang é hí má nghut nyi lhê." ga taí ri.

Petruq Hko Kyô É Mung-dang

³⁴ Haú hkûn, Petruq dang-hi hpông é gi, "Garai Gasang, myoqdong a hkyin é hkyô lé, ahkuí ngò gè gè yhang sé bê. ³⁵ Byù myû chângiup má, Yhang lé gyuq hkunggâ é eq tengmán é muzó jizó saí é sù gi, Yhang é hí má myoqdong wó nyi ri. ³⁶ Nyi mi-nyì, joq mijoq é Yhumsíng, Yesuq Hkrisduq é yanmai, nguínón hkyô eq sèng é gabú danglù lé hko kyo sháng gaq ga, Israelaq byu

pê chyáng Garai Gasang hun kat é mungdang eq rajung za, ³⁷ baptisma hkyô lé, Yohan hko é htâng, Galile mau mai Yuda mau banshoq má taí pyo ló é hkyô lé, nungmoq sé gû nghut nyi lhê. ³⁸ Haú gi, Garai Gasâng eq Chyoiyúng Woi-nyí eq wum-o a-tsam byí to bê sũ, Nazaret wà byù Yesuq é hkyô nghut nyi ri. Garai Gasang yhang eq rahá nghut nyi é yanmai, yhang gi, ge é muzó lé kut wún é eq, nat eq zing-ri huí é bang banshoq lé lhoq gê byí wún ri.

³⁹ Haú mù, Yudaq byu pé é ming má le, Yerusalem wà mó má le, yhang zui saí bê muzó banshoq é saksê pé gi, ngamoq nghut nyi lhê. Haú yuq lé yhang, yhangmoq sik zing má jén sat pyám bekô nghut ri. ⁴⁰ Garai Gasang kúm gi, sum nyí nghû râ buinyí má, haú yuq lé lhoq dui toq kat é nghut mù luí, byù banshoq é hí má a nghut e za, saksé kut râ matú Garai Gasang hkyin to gù nghut é bang ngamoq é hí má za htoq shit bê nghut ri. ⁴¹ Yhang shí é mai dum dui toq ló é htâng má, ngamoq yhang, Yhang eq rahá razo rashuq wó kut yu é nghut lhê. ⁴² Yhang gi, asak dui é bang eq shí bê bâng é tarâ agyí kut râ matú, Garai Gasâng eq Yhang lé hkyin tô é sũ nghut é hkyô lé, byu pé lé hko kyo râ eq, saksé hkám râ matú, ngamoq lé hkunmó hkyô to bê nghut ri. ⁴³ Yhang lé lumjینگ é bang yuq hkanngmó gi, Yhâng é my-

ing é yanmai, yubak hkyut pyám byí é hui kó râ nghut lhê.' ga luí, taí é myiqhtoi banshoq gi, Yhâng é hkyô lé saksé hkam byí é bang nghut nyi akô." ga taí ri.

Chyoiyúng Woi-nyí Lé, Tungbaù Pé Wó Hap Yu É Hkyô

⁴⁴ Petruq gi, haú hkyô lé ru taí nyi ashí le, dang haú wó gyô é banshoq bâng ahtoq má Chyoiyúng Woi-nyí gyó jé lo ri. ⁴⁵ Tungbaù pé é htoq má lhang Chyoiyúng Woi-nyí gâ é chyunghuq lé hut hkyô kat é yanmai, Petruq eq rahá lé é, ahpyo-kuq hpyit bê é lumjing bang Yudaq byu pé gi, maú bum akô. ⁴⁶ Hkâsu mù gâ le, yhangmoq gi, laklai dang nyo é lé le, Garai Gasang lé hkyaon kô é lé le, wó gyô bùm kô é yanmai nghut ri.

⁴⁷ Haú mù, Petruq gi, "Ngamoq su Chyoiyúng Woi-nyí hkâm yù bê bang lé, baptisma a byi nhâng râ gi, wui lé ó yuq wó hkúm to râ lúh?" ga taí ri. ⁴⁸ Hau htâng, yhang gi, yhangmoq lé Yesuq Hkrisduq é mying lang luí wui-myhup hkâm yù râ matú pying tô ri. Haú hkûn, yhangmoq gi, Petruq lé buinyí ra-í nyí, nyi gyó shí aq ga chôm hkâm akô.

11

Petruq, Yhang Kut É Muzó Lé Shit Kyô É Hkyô

¹ Tungbaù pé le, Garai Gasâng é mungdang lhom yù bê gâ é hkyô lé, lagyô pé eq Yuda mau pé mã é gumang wui wó gyô akô.

² Haù mù, Petruq, Yerusalem wà mó má doq ló é hkûn, ahpyo-kuq hpyit hkyô lé myit zuq é lumjîng bang gi, ³"Nàng gi, ahpyo-kuq a hpyit é bâng é yhûm má wàng mù, yhangmoq eq razo rashuq kut ri." ga luî, yhang lé mara lhom taì hun bum akô.

⁴ Haù hkûn, Petruq gi, haù dut lò bê hkyô lé awang mai ahpyo hpyot, yhangmoq lé taì sân kyô hi kat é má, ⁵"Ngò gi, Yopa myuq má kyûdûng nyi le, moq byuq ló mù shing-rân myang é gi, mauhkûng mai hpajóng mó sù é myi chyûn shut zui luî, ngá shut lhoq hkyô kat é zè gyó jé lo é lé, myang ri. ⁶ Haù lé rago za saì wú le, myigùng htoq má hkyî myi hkyî dap é jung dusak, yosô zè, dô yê é jung eq, maulat nghoqzô pé bo tô é lé, ngò myàng luî, myit wú nyi é hkûn, ⁷'Petruq ê, toq mù, sat zo aq.' gâ é danghtê lé, ngò wó gyô ri.

⁸ Ngò kúm gi, 'Yhumsîng ê, haù gi, a wó dut, achaq achyut é eq a sansêng é zè, ngá é nhut má hkâ-nhám le a wang wú.' nghû taì kat é nghut lhê.

⁹ Haù hkûn, 'Garai Gasang lhoq san lhoq yúng bê zè lé, a sansêng hkâ-nghû.' ga luî, mauhkûng mai dum taì kat ri. ¹⁰ Haù su ga sum dâm taì é htâng má, haù pé banshoq lé mauhkûng shut dum wup yu lò bê nghut ri.

¹¹ Haù hkûn jáng, Kesare wà mó mai, ngá chyáng nhang kat é byù sum yuq gi,

ngò nyi é yhûm hkumtot má jé nyi tô akô. ¹² Chyoiyúng Woi-nyí gi, ngo lé myit a úng-âng é za, yhangmoq htâng châng ê aq ga taì ri; shí gumang hkyuq yuq le ngò eq rahá ê mù, Koneli é yhûm má ngamoq wang é. ¹³ Haù hkûn, haù yuq gi, yhâng é yhûm má maumang lagyo lé htoq shit é hkûn, yhang hkâsu myang é hkyô lé le; maumang lagyo êq yhang lé, 'Yopa myuq shut byù nhang kat mù, Petruq gâ é sù Simun lé ê jî nhâng aq; ¹⁴ nàng eq náng yhumbyù lhunglhâng bang hkyi yù hui râ danglù, yhang, náng chyáng wun lé lô byi râ nghut lhê.' ga taì é hkyô lé le, ngamoq lé taì kyô ri.

¹⁵ Ngò dang taì hi ló nyi é u lé, Chyoiyúng Woi-nyí gi, sâng-hi lé ngamoq é ahtoq má gyó lé é su, yhangmoq ahtoq má le gyó lé bê nghut ri. ¹⁶ Haù hkûn sheq, ngò gi, 'Yohan gi, wui êq wui-myhup hkám byi ri; nungmoq kúm gi, Chyoiyúng Woi-nyí êq wui-myhup hkám byi é hui kó râ nghut lhê.' ga luî, Yhumsîng taì é dang lé bûn kat ri. ¹⁷ Haù mù luî, Yhumsîng Yesuq Hkrisduq lé lumjîng é hkûn, ngamoq lé Garai Gasâng jeju chyunghuq byi é su, Yhang, yhangmoq lé le byi é nghut le gi, ngò gi, hkasû é byù nghut luî, Garai Gasang lé wó lhom hkûm pyám râ l hú?" ga taì ri.

¹⁸ Yhangmoq gi, haù hkyô lé wó gyo kôjáng, taì jang a joq

lo kô mù, "Ó! Nghut bê, Garai Gasang gi, tûngbaù pé lé le, asak duì râ matú myit lêng hkyô byi bu-nhung!" ga luí, Garai Gasang lé chôm hkyâ-ôn akô nghut ri.

Antioku Wà Mã É Noqkuq Hpúng

¹⁹ Ahkuí, Stehpan lé sat pyám kô é htâng má, zing-ri hui kô é yanmai, byo myín ló é bang gi, Hpinisi mau, Kupru zinlóng eq Antioku wà mó jé shoq byo ló kô mù, Yudaq byu pé lé baù za, mung-dang haù hko kyô akô nghut ri. ²⁰ Nghut kô lhang, yhang-moq mã é Kupru byù eq Kuruñi byù ra-am gi, Antioku wà mó má châng jé ló kô mù, Yhumsing Yesuq é gabú dang-lù lé, Grik pé lé le taí kyô bum akô. ²¹ Haù Yhumsing é loq gi, yhangmoq eq rahá nghut nyí mù luí, byù myo myo gi, lumjing mù, Yhumsing chyáng lhing wang lo bùm bekô nghut ri.

²² Haù bâng é hkyô lé, Yerusalem noqkuq hpúng é no má hkyang jé ló é nghut mù luí, yhangmoq gi, Barnaba lé Antioku wà mó jé shoq nhang kat akô. ²³ Yhang jé é hkûn, Garai Gasâng jeju bo nyi é lé myàng jáng, yhang gi, gabú luí, yhangmoq é myit nhiklum banshoq èq haù Yhumsing má lhumzui nyi râ matú, lhunglhang bang lé myit wum byi ri. ²⁴ Hkâsu mù gâ le, Barnaba gi, byù gè nghut mù, Chyoiyúng Woi-nyí le, lumjing myit le byíng tô é sù nghut nyi ri. Haù

mù, byù myo myo gi, haù Yhumsing chyáng jat wang lo bùm bekô nghut ri.

²⁵ Hau htâng, Barnaba gi, Sholuq lé è hô râ ga Tarshu myuq shut è mù, yhang lé myàng jáng, Antioku wà mó má shuì lo ri. ²⁶ Haù mù, yhangnhik gi, razàn gón no-qkuq hpúng haù eq rahá zum nyi kô é nghut mù luí, byù myo myo lé wó mhogshit akô. Chángzô pé gi, Hkristan gâ é mying lé, Antioku wà mó má sâng-hi wó yù bekô nghut ri.

²⁷ Haù u lé, myiqhtoí pé ra-am gi, Yerusalem wà mó mai, Antioku wà mó má lé jé bum akô. ²⁸ Haù bang mã é Agabu gâ é sù gi, toq yap mù, Romaq mingkan tîng má mutmó gyólô râ nghut é hkyô lé, Woi-nyí eq tûn shit é dông taí kyô ri; (Haù gi, hkohkâm Klodi é pyat má dut bê nghut lhê.) ²⁹ Haù mù luí, chángzô pé gi, Yuda mau mã é gumang wui lé, ó le ó wó dut é myhó garum kat râ ga, myit hpyit yu bum akô. ³⁰ Haù eq rajung za kut kô mù, yhangmoq gi, chyunghuq haù pé lé Barnaba eq Sholuq nhik é loq mai suwún wui pé chyáng hun kat bekô nghut ri.

12

Petruq, Htóng Mai Wó Lut Htoq Lo É Hkyô

¹ Haù u lé, Herut hkohkâm gi, hpúng byù ra-am lé chyup yù mù, zing-ri râ ga ngantsâ nyi ri. ² Haù mù, Yohan é yhangmang Yakuq lé sham èq sat pyám nhang ri. ³ Haù

hkyô lé Yudaq byu pé wú gabú é lé myàng jáng, yhang gi, Petruq lé le, jâng chyup yu ri. Haû dut é gi, mún a kat é muk zo poî u lé nghut ri. ⁴ Herut gi, Lhoqlhai Poi lai jáng sheq, mingbyû wui hí má jéyàng râ ga myit tô é yanmai, yhang lé chyup yu é htâng má, htóng má lhung to mù, yhang lé zúng râ matú, gyè myi yuq yuq kut myi hpúng lé ap tô ri.

⁵ Haû mù, Petruq gi, htóng má lúng tô ri; hpúng byû wui kúm gi, yhang é matú Garai Gasâng chyáng kyû gyai chôm dung byî nyi akô nghut ri.

⁶ Petruq gi, Herut eq yhang lé jéyàng râ matú she htoq yû râ hí myìn lé, shamtoq-tui í hkat eq tuî é hui luî, gyezo í yuq é gyoro má yhup myhî tô ri; zúng é bang le htóng hkum má zúng nyi bum akô. ⁷ Haû hkûn, Yhumsing é maumang lagyo rayuq lé htoq shit mù, gok haû má duqbó lo ri. Maumang lagyo haû gi, Petruq é namcham má ê hpuk kat mù, "Myap toq wú aq." ga nhaû ri; haû hkûn, Petruq é loq mâ é toqjâng tui pé le gyut gyó ló bê nghut ri.

⁸ Maumang dum taî é gi, "Hpyihit hit mù, hkyî-tsung tsung aq." gâ ri; Petruq le taî é eq rajung za kut ri. "Náng é bumó wut mù ngá htâng cháng aq." ga yhang lé maumang lagyo dum taî ri. ⁹ Haû hkûn, yhang gi, htóng mai yhâng htâng châng htoq ló ri; nghut kôlhang, maumang lagyo kut é muzó haû gi, gè gè nghut é lé, yhang a sé

mù, shing-rán myang é nghut ri ga myit yu ri. ¹⁰ Ahkuî, yhangnhik gi, zúng tô é jowò í wô lai mù, wà má htoq é shamtoq hkum má jé jáng, hkum haû le yhang baú bóng lô mù, yhangnhik htoq luî, wà hkyô rahkat má sô ló le, maumang lagyo gi, haû hkûn jáng, yhâng chyáng mai gâng ló byuq bê nghut ri.

¹¹ Ahkuî, Petruq gi, dum bûn gyîng lò jáng, "Yhumsing gi, Yhâng é maumang lagyo lé nhang kat mù, Herut é loq eq Yudaq byu pé myit myoqbyû tô é hkyô banshoq mai, ngo lé hkyi yû bê nghut é lé, ahkuî ngò gè gè sé bê." ga taî ri.

¹² Haû hkyô lé myit sê kat jáng, yhang gi, byû myo myo zing mù, kyûdûng nyi é jowò, Markuq gâ é Yohan é yhângnu Mariq é yhûm má jé ló ri. ¹³ Haû mù, yhang gi, yhûm wàng hkum lé ló bat é hkûn, Roda gâ é dui-nhâng zoshâng myiwe zo rayuq gi, gyô wú râ ga htoq lé lo ri. ¹⁴ Yhang gi, Petruq é htê nghut é lé sê gyô kat jáng, lûm gabú luî hkum a hpóng byi shî é za, yhûmhkaû shut din wang ló mù, "Petruq gi, hkum mhó lut má lo yap tô ri." ga ló taî kyô ri.

¹⁵ Yhangmoq kúm gi, "Nàng na bê nghut ri." ga yhang lé taî akô. Yhang gi, gè gè nghut ri ga ru taî nyi ri. Dum, yhangmoq gi, "Yhâng é maumang lagyo nghut âng ri." ga taî akô.

¹⁶ Nghut kôlhang, Petruq gi, hkum ru bat nyí mù, yhangmoq hpông kat é hkûn, yhang

lé myàng kôjáng, chôm maú byuq bum akô. ¹⁷ Yhang gi, yhangmoq lé zim za nyi keq ga loq lik shit mù, yhang lé Yhumsing èq htóng mai hkâsu kut shuí htoq yu é hkyô lé taí kyo luí, "Shí hkyô lé Yakuq eq gumang wui lé taí kyô kat keq." ga taí ri. Hau htâng, yhang htoq ló luí, jowò gó shut e ló bê nghut ri.

¹⁸ Ahkuí, maubó jáng, gyezô pé gi, Petruq haí dut byuq é hkyô lé a sé kô é yanmai, gyai maú gabyông bum akô. ¹⁹ Herut kúm gi, Petruq lé ho wú le a myàng jáng, zúng é bang lé myí gôn wú mù, yhangmoq lé sat pyám râ matú hkunmó hkyô ri.

Herut Hkohkâm Shi Byuq É Hkyô

Hau htâng, yhang gi, Yuda mau mai Kesare wà mó má gyó ló mù ló nyi nyi ri. ²⁰ Haú gyoro má, Herut hkohkâm gi, Turuq eq Sidun byu pé lé gyai nhik-yô nyi ri. Haú mù luí, yhangmoq gi, myit rahkat zâ èq yhâng chyáng ê mù, Blastu gâ é, hkohkâm wa lum tô é suwún hpó lé ê lûm hkaú mù, simsaq hkyô ê dúng akô. Hkâsu mù gâ le, yhangmoq é zoshuq wó râ matú gi, Herut é ming lé lùm hkaú nyi kô é yanmai nghut ri.

²¹ Haú hkûn, ding lhûm tô é buinyi má, Herut gi, hkohkâm hking wut chûng mù, hkohkâm tanghkuq má zùng luí, yhangmoq lé hkohkâm mungdang byí ri.

²² Haú jáng, mingbyû wui gi, "Htê shí gi, waxâng byu é htê a nghut, garai wá é htê sheq nghut ri." ga garû bum akô. ²³ Radá dâm, Herut gi, Garai Gasâng é hpungwup shingkang lé a tê byí é yanmai, Yhumsing é maumang lagyo gi, yhang lé dâm byi luí, yhang gi, luq èq hkê é hui mù, shi byuq bê nghut ri.

²⁴ Haú Garai Gasâng é mungdang gi, sê é bang myô jat lò mù, je riyhang byo myín lò bê nghut ri.

²⁵ Barnaba eq Sholuq nhik gi, Yerusalem wà mó má yhangnhik saí tûm nyi é muzó ban saí jáng, Markuq gâ é Yohan lé shuí chûng mù, Antioku wà mó shut taú ló bekô nghut ri.

13

Barnaba Eq Sholuq, Hkyin Nhang Kat Huí É Hkyô

¹ Ahkuí, Antioku wà mó mâ é noqkuq hpúng má, myiqhtoí pé eq sará pé le lom nyi akô. Haú bang gi, Barnaba, Niger* gâ é Simeon, Kurni byù Luki, (Herut zau hpó eq zum kô lò sù) Man-aen eq Sholuq pé nghut akô.

² Yhangmoq gi, zoshuq gám luí Yhumsing lé noqkuq do-jau nyi é hkûn, Chyoiyúng Woi-nyí gi, "Ngá é mù wùn waq râ matú ji tô é Barnaba eq Sholuq nhik lé, hkyin to keq." ga taí ri. ³ Haú mù luí, yhangmoq gi, zoshuq gám luí

* 13:1 Grik dong Niger gâ é gi, byù noq gâ é nghut lhê.

kyûdung mù, yhangnhik ah-toq má loq ke byi kô é htâng, yhangnhik lé nhang htoq kat akô nghut ri.

Kupru Zinlóng Má Dut É Hkyô

⁴ Haû mù, yhangnhik gi, Chyoiyúng Woi-nyí eq nhang kat é eq rajung za, Seluki wà shut gyó ló mù, haû mâ é lhai ji luí, Kupru zinlóng má jé ló luí, ⁵ Salami wà mó má nyi nyi é hkûn, Yudaq byu pê é tarajong pé má, Garai Gasâng é mungdang hko kyô akô. Markuq gâ é Yohan le yhangnhik lé htuqluq htuqbang kut nyi ri.

⁶ Yhangmoq gi, haû zinlóng mai lai byit e ló mù Pahpu wà mó jé ló kô é hkûn, myiqhtoi pyoq nghut sù Bara-Yesuq gâ é Yudaq byù myoqheq sará rayuq eq htung hui akô.

⁷ Haû yuq gi, Sergi Poluq gâ é, myit hpaqchyí kung é ginwáng zau hpó é byù rayuq nghut lhê. Minggyi hpó haû gi, Garai Gasâng é mungdang gyô yù naù mù, Barnaba eq Sholuq nhik lé ji yu ri.

⁸ Haû hkûn, myoqheq sará gâ é lichyúm đông myhîng é Eluma le gâ é Bara-Yesuq kúm gi, ginwáng zau hpó lé haû lumjîng hkyô má a jau ló nhâng nau é nghut mù luí, yhangnhik lé lhom he tang pyâm ri. ⁹ Haû hkûn, Poluq le gâ é Sholuq gi, Chyoiyúng Woi-nyí byíng mù, yhang lé wú tsuq to luí, ¹⁰ "Myit goí é hkyô eq hpuq lô lhik é hkyô banshoq byíng tô é, nat é yhangzo nghut sù, tengmán

hkyô hkangmó é gyè hpó ê, Yhumsing é tengmán hkyô lé a lhoq hpyoq é a wó nyí lúhú? ¹¹ Ahkuí, wú aq, Yhumsing é loq gi, náng chyáng jé mù, nàng gi, rayoq zo builoq a wó myang é za, myoqjit byuq rá nghut lhê." ga tái ri.

Haû hkûn jáng, yhâng é myoq gi, myhì-myhà ga luí mauchut tuq dut lò byuq ri; haû mù, yhang lé shê rá byù ho sop lîng wún ri. ¹² Haû hkyô lé ginwáng zau hpó myàng jáng, Yhumsîng eq sêng é mhoqshit é hkyô lé wú maú luí lumjîng bê nghut ri.

Antioku Wà Mó Má Dut É Hkyô

¹³ Hau htâng, Poluq eq yhâng luzúm wuí gi, Pahpu wà mó mai lhai ji mù, Pamhpuli mau mâ é Perga wà má jé ló akô. Markuq gâ é Yohan kúm gi, yhangmoq eq gang luí, Yerusalem wà mó shut taù lú byuq bê nghut ri. ¹⁴ Dum, yhangmoq gi, Perga mai toq e ló le, Pesidi ginwáng mâ é Antioku wà mó má jé ló akô. Bánno buinyí má, yhangmoq gi, tarajong má wang zung tô akô. ¹⁵ Haû hkûn, Mosheq é tarâ laiká eq myiqhtoi laiká pé lé ban nghap jáng, tarajong má up bang gi, "Gumang wui ê, mingbyú wui lé myit wum byi dang joq kô é nghut le gi, ahkuí tái lo keq." ga luí, yhangmoq chyáng tái nhang kat ri.

¹⁶ Haû hkûn, Poluq gi, toq yap mù, zím byuq kó sháng gaq ga loq tù luí, "Israelaq

byu pé eq Garai Gasang lé gyuq hkunggâ é byu pé ê, chôm gyô yù keq. ¹⁷ Israelaq byu pé é Garai Gasang gi, ngamoq é íchyî ikê pé lé hkyin yù bê nghut mù luí, Egutuq ming má byùbing dut nyi to ashî hkûn, yhangmoq lé kô myhâng nhâng mù, hpungwup a-tsam bo é loq èq haú mau mai shuí htoq ló ri. ¹⁸ Dum, myi xê zàn kô, yoso pé má yhangmoq é a-kyang lé jân pyám byi mù, ¹⁹ Hkanan ming mâ é byuhú nyhit hú lé lhoq htên pyám luí, haú bâng é mingdán mâ é silí wunlí yhangmoq lé gàm byî ri. Haú gi, myi shô ngo xê zàn kô myáng ri.

²⁰ Hau htâng má, Garai Gasang gi, myiqhtoi Samuelaq é pyat jé shoq tarâ agyî pé lé to byî ri. ²¹ Hau htâng má, yhangmoq mai hkohkâm dung kômù, Garai Gasang gi, yhangmoq lé, Ben-yamyin amyù mâ é, Kisha é yhangzo Sholuq lé byi luí, yhang gi, myi xê zàn up bê nghut ri. ²² Hau htâng, Sholuq lé lhoq hkyô pyám mù, Dawiq lé, yhangmoq é hkohkâm kut nhang ri. Dawiq é hkyô lé Yhang saksé hkâm é gi, 'Ngò nhik dik é Yese é yhangzo Dawiq lé myàng bê; yhang gi, ngò kut nhang é hkyô banshoq lé kut râ nghut lhê.' gâ ri.

²³ Garai Gasang gi, Yhâng é danggidiq joq é eq rajung za, Israelaq byu pé é matú, haú yuq é awut ashín mai, hkyi yù Sû Yesuq lé, pô htoq nhâng

bê nghut ri. ²⁴ Yesuq a jé lé shimá, Yohan gi, Israelaq byu pé banshoq lé myit lêng hkyô eq sêng é baptisma hkyô lé hko kyo bê nghut ri. ²⁵ Dum Yohan gi, yhang zuí é muzó ban ló é u lé, 'Ngo lé ó nghut é su ngâm tô akô lú? Ngò gi, haú yuq a nghut, wú keq, ngá é htâng má rayuq jé râ nghut lhê, haú yuq é hkyî-tsung tui hpyî râ lhang ngò a gíng.' ga taí ri.

²⁶ Abraham é yhangzo yhangshû pé eq Garai Gasang lé gyuq hkunggâ é tungbaù, gumang wuì ê, shî hkyi yù hkyô mungdang lé, nganhung chyáng byi kat bê nghut ri. ²⁷ Yerusalem wà mó mâ é bang eq, yhangmoq é zau suwún wuì gi, Yhang hkyi yù sù nghut é lé le, Bánno buinyî hkgámó nghap é myiqhtoi pé é dang lé le, a sê gyo kô é yanmai, Yesuq lé sat râ doqdân é hkûn, myiqhtoi pé é dang lé lhoq dik pyám bekô nghut ri. ²⁸ Yhâng chyáng shî gíng é mara a myàng kôlhang, Yhang lé sat pyám nhâng râ matú, Pilat chyáng dúng akô. ²⁹ Yhangmoq gi, yhang eq séng luí, kâ to má kâ to ban lhoq dik kôjáng, Yhang lé tapzîng mai yu hkyó mù, lup má kat tô akô nghut ri. ³⁰ Garai Gasang kúm gi, Yhang lé shi é mai lhoq dui toq yù bê nghut lhê. ³¹ Yhang gi, Galile mau mai Yerusalem wà mó jé shoq, hí lé Yhâng htâng châng é bâng chyáng buinyî tsómra myáng shoq

htoq shit shit kut ri. Haú bang gi, ahkuî, nga-nhúng Israelaq byu pé é hí má, Yhâng é saksé dut bekô nghut ri.

³² Haú mù, í dam lhê é Hkya-on Kungtôn Laiká má,

'Nàng gi, Ngá Zo nghut ri.
Hkû-nyí, Ngò gi, Náng
Wa dut bê nghut lhê. [☆]

ga luí, kê tô é eq rajung za,

³³ Garai Gasang gi, íchyí íwâ pé lé byi tô é danggidiq lé, Yesuq lé lhoq dui toq byí é dông, yhangmoq é yhangzo yhangshu ngamoq é matú, lhoq dik byí é gabú danglù lé, nungmoq chyáng ngamoq wun lé byi bê. ³⁴ Hau htoq agó, Yhang htên byoq é hkâ-nhám a hui shoq, shi é mai lhoq dui toq yû râ hkyô eq séng luí, Garai Gasang taí é gi,

'Dawiq lé byí tô é danggidiq eq rajung za, chyoiyúng é eq lungíng é jeju lé, ngò nungmoq lé byi râ nghut lhê. [☆]

gâ ri. ³⁵ Hkya-on Kungtôn Laiká gó wô má le,

'Náng é Chyoiyúng Sû lé, Nàng htên byoq nhâng nau râ a nghut. [☆]

ga taí tô ri.

³⁶ Ahkuî, Dawiq gi, yhâng é pyat banshoq má Garai Gasang ô nau é dông ban wùn waq jáng, shi byuq luí, íchyí íwâ pé eq rahá myhup pyám hui mù, htên byoq byuq é hui bê nghut ri. ³⁷ Garai Gasang lhoq dui toq yu é sù kúm gi, htên byoq huí é a nghut.

³⁸ Haú nghut é yanmai, gumang wui ê, haú yuq mai yubak wó hkyut pyám byí é hkyô lé, nungmoq lé hkyô nyi é nghut é le, sê nyi keq. ³⁹ Hau htoq agó, Mosheq é tarâ eq mara hkyut san byí é a hui kôlhang, haú yuq lé lumjíng é bang gi, hkyô lhumjup má mara hkyut san byí é hui râ nghut lhê. ⁴⁰ Hau é yanmai,

'Wú keq, jihpoí é bang ê, maú mù luí htum byuq keq; nungmoq é buinyi pé má ngò rajung jung kut htoq râ nghut lhê;

⁴¹ haú hkyô lé, rayuq yuq, nungmoq lé hkaî kyo kôlhang, jíng kó râ a nghut. [☆]

ga luí, myiqhtoí pé taí é dang, nungmoq má a ang sháng gaq, sidiq nyi keq." ga hko kyô nyi ri.

⁴² Ahkuî, Poluq eq Barnaba nhik tarajong mai htoq ló le, htâng lhê é Bánno buinyi má le, haú pé lé dum hkaî kyo râ matú yhangmoq chôm dúng akô. ⁴³ Chôm byo htoq ló kô é hkûn, Yudaq byu pé eq Yudaq noqkuq htung má lhing wang lo é tarâ hkunggâ é byù myo myo gi, yhangnhik é htâng má châng bùm kô é nghut mù luí, Garai Gasang jeju má gíng nyi râ matú, yhangnhik gi, yhangmoq lé lhoq pun lhoq kyíng akô nghut ri.

*Tungbàu Pé Chyáng Lhing
Lo É Hkyô*

44 Hau htang lhê é Bánno buinyì má, Garai Gasâng é mungdang gyô yù râ matú, rawa bang aluq shoí ban-shoq, lé zup zîng to bum akô. 45 Yudaq byu pé kúm gi, byù moq mó haú lé myàng jáng, manon myit baú byíng búm kômù luí, Poluq taí é dang lé taí htíng é eq nhîng pyâm akô.

46 Poluq eq Barnaba le gyuq myit a bo é dông taí é gi, "Garai Gasâng é mungdang lé, nungmoq lé hí taí kyo râ dut é yanmai, ngá-nhik taí bê nghut lhê. Nghut kôlhang, nungmoq gi, haú lé lhom he-ngik pyám kômù, ahtum abyuq é asak eq gingdán é dông yhumsing gùng lé a myit yù kô é yanmai, wú keq, ahkuí, ngá-nhik gi, tûngbaù pé shut lhing ló berâ nghut lhê. 47 Hkâsu mù gâ le, haú Yhumsîng gi, 'Hkyi yù hkyô lé maumyí htum shoq wó chûng jé râ matú, Ngò, nàng lé tûngbaù pé é maubó dut nhâng bê.'*

ga luí, ngamoq lé hkunmó hkyó kat bê." gâ ri. 48 Tûngbaù pé gi, dang haú lé wó gyo kôjáng, gabú é eq Yhumsing é mungdang lé hkya-on kungtôn nyi bum akô. Ahtum abyuq é asak lé wó râ matú hkyin to huí é lhunglhang bang le, lumjîng bum akô nghut ri.

49 Yhumsîng é mungdang gi, haú ming gón jam lò bê nghut ri. 50 Yudaq byu pé kúm gi, Poluq eq Barnaba nhik lé zing-ri râ matú, aróng

wó é myiwe wuì mâ é tarâ hkungga bang eq, haú wà mâ é suwún wuì lé, nhik lhoq yo kôluí, yhangnhik lé maukyo mai chôm hkat htoq pyâm akô. 51 Yhangnhik gi, yhangmoq lé a nau é hkyô tûn shit é dông, yhumsing é hkyí mâ é hpuilhaú lé yhangmoq chyáng ko hkyô pyâm to kômù, Ikoni wà mó shut ló byuq bekô nghut ri. 52 Chángzô pé kúm gi, gabú é htoq agó, Chyoiyúng Woi-nyí byíng nyi bum akô nghut ri.

14

Poluq Eq Barnaba Nhik, Ikoni Wà Mó Má Ló Jé É Hkûn Lhê Hkyô

1 Ahkuí, Ikoni wà mó má nghut nyi é hkûn, Poluq eq Barnaba nhik gi, Yudaq byu pé é tarajong má rahá wàng mù, Yudaq byù eq tûngbaù pé ajùm ayò lumjîng bùm kó shoq, wum kat hko kyô akô.

2 Nghut kôlhang, a lumjîng é Yudaq byu pé gi, lumjîng é gumang wuì lé a ngui râ dông tûngbaù pé lé mhoq hpyoq yù mù, shuí gumlaù akô. 3 Haú mù luí, yhangnhik gi, tsómra myang shoq haú má nyi mù, haú Yhumsing é matú gyuq myit a bo é za hko kyô akô; Yhang Yhumsîng le yhangnhik é loq mai limik kumlhá eq mauhpo muzó dut nhang é dông, Yhâng é jeju mungdang lé saksé hkám byí nyi ri. 4 Haú wà mâ é bang kúm gi, myit byo ló búm kô é nghut mù luí, Yudaq byu

pê chyáng ra-am, lagyô pê chyáng ra-am, lom byuq lô akô. ⁵ Ahkuî, tûngbaù pé le, Yudaq byù eq yhangmoq é uphkâng bang le, yhangnhik lé rhoî mù luqgok eq dú sat rã ga htím lo bum akô. ⁶ Nghut kôlhàng, yhangnhik gi, haù hkyô lé bûn sê kat kôjáng, Lukaoni ginwáng mã é Lustra eq Derbe wà mó eq, hau é awui ayàm wà tiq wà zo pé shut hpang e lô akô. ⁷ Haù pé má le, gabú danglù xoq hko kyô wún akô nghut ri.

Lustra Wà Mó Má Lô Jé É Hkûn Lhê Hkyô

⁸ Ahkuî, Lustra wà mó má, înu unghkaù mai hkyî hten mù luî, hkâ-nhám le hkyô a wó sô wú é sù rayuq zung tô ri. ⁹ Yhang le Poluq taí é dang lé gyô nyi ri. Poluq gi, haù yuq lé wú tsuq kat é hkûn, wó lhoq gê byi hui rã nghut lhê gã é lumjîng myit yhâng chyáng bo tô é lé, myàng byî ri. ¹⁰ Haù mù, Poluq gi, "Toq yap aq!" ga luî, htê mó eq yhang lé taí kat jáng, yhang gi, byam toq kat mù, wó so bê nghut ri.

¹¹ Haù mù, Poluq kut é muzó lé shiwa byu pé myàng kôjáng, yhangmoq gi, Lukaoni dang đông, "Nat hparà pé gi, byù gùng đông kut luî ngamoq chyáng gyó lô bekô nghut ri." ga luî, wut garu bum akô. ¹² Hau htâng, Poluq gi, dang myô taí sù nghut é yanmai, yhang lé Herme ga, Barnaba lé gi, Zeu ga myhîng byî akô. ¹³ Haù wà yàm mã é Zeu hparà noqkuq yhùm hkyangjong hpò gi, wà

hkum má nohtó pé eq ban hkóng pé yu lé mù, shiwa byu pé eq rahá yhangnhik lé hkungga nhông byi rã hen akô.

¹⁴ Nghut kôlhàng, lagyo nhik Barnaba eq Poluq gi, haù lé wó gyo kôjáng, yhum-sing é mebu lâng cheq pyám kôluî, shiwa hpong gung gung shut din wang é kômù, garú taí kô é gi, ¹⁵ "Hkaù pé ê, haì mù haù su kut lo akô lú? Nga-nhik le nungmoq eq rajung za, xângzo byù za nghut lhê, akyû a bo é hkyô shí pé lé tô pyâm to mù, mauhkûng eq myigùng, wuîshuq lung-aù eq haù pé má nyi mi-nyi, joq mijoq lé hpan to sù, rû dui nyi é Garai Gasâng chyáng lhing wang lò kó sháng gaq nghú luî sheq, nungmoq lé gabú danglù hko kyô é nghut lhê. ¹⁶ Garai Gasang gi, byù myû chângiup lé hí hpyang lhê é pyat bán má ó le ó kâm é đông kut nhâng bê nghut ri. ¹⁷ Nghut kôlhàng, Yhang gi, mauhkûng mai mau wô nhâng luî, kyôshi zúí nhang é ahkyíng yam-yoq byi mù, nungmoq lé zoshuq agùn agó byî é eq, nungmoq lé i-myt ngón nhang nyi é đông, Yhang ge é hkyô lé tûn shit mù, Yhang nyi é hkyô lé saksé hkâm nyi ri." ga akô. ¹⁸ Haù su ga taí kô le lhang, yhangnhik lé shiwa byu pé mai hkungga nhông byi rã hkyô lé, yhangnhik gi, gyai wuihke luî sheq wó hkûm pyâm akô nghut ri.

¹⁹ Hau htâng, Antioku wà

mó eq Ikoni wà mó pé mâ é Yudaq byu pé ra-am lé jé kômù, shiwa byu pé lé shuí-u luí, Poluq lé luqgok eq chôm dú kômù, yhang lé shi byuq bê su ngàm kô é yanmai, wà shinggan shut shê hkyut htoq pyâm akô. ²⁰ Nghut kôlhang, Poluq gi, yhâng é lhînghkyuq má chángzô pé yap tô kô é hkûn, toq mù wà shut tau wang ló ri. Hau htang nyí, yhang gi, Barnaba eq rahá Derbe wà mó shut e ló bekô nghut ri.

Antioku Wà Mó Má Tau Jé Ló É Hkyô

²¹ Haú wâ má yhangnhik eq gabú danglù hkô kyo kô é yanmai, byù myo myo gi, chángzô pé dut lo akô. Hau htâng, yhangnhik gi, Lustra, Ikoni, Antioku wà mó hkyô dum tau ló kômù, ²² chángzô pé lé myit lhoq ging byi uchyang, haú lumjîng hkyô má ru gîng nyí râ matú myit wum byi akô. "Nga-nhúng gi, Garai Gasâng é mingdán má wàng râ matú, wúhke jamjau myo myo hui ra râ nghut lhê." ga le, mhoqshit akô. ²³ Yhangnhik gi, noqkuq hpúng hkangmó má, hpúng suwún kut râ bang lé hkyin yù mù, zoshuq gám luí kyûdung mù, yhangmoq lumjîng nyi é Yhumsîng Garai chyáng ap byi tô akô. ²⁴ Hau htâng, yhangnhik gi, Pesidi ginwáng mai lai byit ló mù, Pamhpuli ginwáng má jé ló akô nghut ri. ²⁵ Haú ginwáng mâ é Perga wà mó má mungdang hko kyo luí,

Atali wà mó shut lai gyó ló akô nghut ri.

²⁶ Haú mai, lhai ji mù, ahkuí yhangnhik wùn waq lai ló bê muzó é matú, Garai Gasâng jeju má ap luí yhangnhik lé nhang kat é Antioku wà mó má dum jé lò bekô nghut ri. ²⁷ Jé lo é hkûn, yhangnhik gi, hpúng byû wui lé wut tsîng yù mù, yhangnhik dông mai Garai Gasang kut é hkyô banshoqlé le, tûngbaù pé lé haú lumjîng hkyô hkum hpóng byi é hkyô lé le, shit kyô akô. ²⁸ Haú mù, yhangnhik gi, haú wâ má chángzô pé eq tsómra myang shoq nyi nyi akô nghut ri.

15

Ahpyo-kuq Hpyit Hkyô Eq Sêng É Manghkáng

¹ Ahkuí, Yuda mau mâ é byù ra-am gi, Antioku wà mó má lé jé mù, gumang wui lé, "Nungmoq gi, Mosheq é htûngtarâ eq rajung za, ahpyo-kuq a hpyit é nghut jáng, hkyi yu é hui râ a nghut." ga luí, mhoqshit bum akô. ² Hau é yanmai, myit a huí lhûm é hkyô htoq lô mù, Poluq eq Barnaba nhik gi, haú bang eq gyai yhang myíng myô lhûm akô; haú mù luí, gumang wui gi, Yerusalem wà mó má nyi é lagyô pé eq suwún wui chyáng, haú hkyô lé ló hpyê lhum râ matú, Poluq, Barnaba nhik eq rahá, yhangmoq chyáng mâ é ra-am lé, nhang kat râ ga hkyin tô akô. ³ Haú mù, hpúng

byû wuì yhangmoq lé dé kat kôjáng, yhangmoq gi, Hpinisi mau eq Samariq mau gyoro mai sô laíló uchyang, tûngbaù pé lhing wang lò bê hkyô lé taí kyô akô. Haú mâ é gumang wuì lé gyai yhang gabú nhang akô nghut ri.

⁴ Yhangmoq, Yerusalem wà mó má jé kô é hkûn, hpúng byû wuì, lagyô pé eq suwún wuì gi, yhangmoq lé lhom hkûlum yù kô é nghut mù luì, yhangmoq gi, yhangmoq dông mai Garai Gasang kut é hkyô lhunglhang lé, haù bang lé shit kyô akô.

⁵ Haú hkûn, Hparishe hpúng mâ é lumjúng bang ram gi, toq mù luì, "Tûngbaù pé lé, ahpyo-kuq hpyit nhâng râ eq, Mosheq é tarâ dông cháng nhâng râ gi, ra yhang râ lhê." ga taí bum akô nghut ri.

Yerusalem Wà Mó Má Kut É Byìn Tú Wap Hpong

⁶ Ahkuì, lagyô pé eq hpúng suwún wuì gi, shí hkyô lé chôm myit wú râ ga, zup tô bum akô. ⁷ Shí hkyô lé gyai yhang dang rhâng lhùm bùm kô é htâng má, Petruq gi, toq mù luì, "Gumang wuì ê, Garai Gasang gi, ngá nhut mai taí é, haù gabú danglù lé, tûngbaù pé gyô yù mù lumjúng kó sháng gaq ga, hí hkûn nungmoq chyáng mai ngo lé hkyin yù bê hkyô lé, nungmoq sé lugù nghut bê.

⁸ Haù mù, myit nhiklhum lé sé byi sù Garai Gasang gi, nga-nhúng lé byi é eq rajung

za, yhangmoq lé le Chyoiyúng Woi-nyí byí é dông, yhangmoq lé hap yù bê hkyô lé saksé tûn shit bê nghut ri. ⁹ Garai Gasang gi, yhangmoq lumjúng luì, yhangmoq é myit nhiklhum lé lhoq san lhoq yúng byi bê nghut é yanmai, nga-nhúng eq yhangmoq é gyoro má gamhkuì é hkyô a joq nhâng lo nghut ri. ¹⁰ Haù nghut le gi, íchýí iwâ pê èq le, nga-nhúng èq le a ung é wòlai lé, haù chángzô pê é lingzing má ke byí é dông mai, haù mù, ahkuì Garai Gasang lé chyam wú nyi akô l hú? ¹¹ Nghut kôlhang, ngamoq gi, yhangmoq eq rajung za, Yhumsing Yesuq é jeju mai za hkyi yu é huì é hkyô lé lumjúng é bang nghut lhê." ga luì, yhangmoq lé taí ri.

¹² Haú hkûn, zup míng tô é bang lhunglhang gi, zim za kut luì, Barnaba eq Poluq nhik mai, tûngbaù pê chyáng, Garai Gasang eq yhangnhik é loq dông limik kumlhá pé eq mauho muzó pé kut shit é hkyô, taí kyô nyi é lé chôm gyô nyi akô. ¹³ Yhangnhik dang ban taí kôjáng, Yakuq gi, "Gumang wuì ê, ngá dang lé gyô wú keq. ¹⁴ Garai Gasang gi, tûngbaù pê chyáng mai Yhâng mying é matú byù ra-myù hkyin yù râ ga, yhangmoq lé sâng-hi mai hkâsu kut lé kùm nyi é hkyô lé, Simun taí kyo bê nghut ri. ¹⁵⁻¹⁶ Shí hkyô gi,

'Hau é htâng má gi, ngò dum taù lò mù luì, lêng

* **15:15-16** Dawiq é yhùm gâ é gi, Dawiq eq yhâng é awut ashin pé up é hkyô lé gâ é nghut lhê.

gyop byuq bê Dawiq é yhûm* lé dum saí rá nghut lhê.

Haû byoq htên tô é pé lé saí saí mù, haû lé dum lhoq toq rá nghut lhê.

17 Haû hkûn sheq, ngá myîng mai ji yu é tûngbaù pé eq, myit gyo tô é byù lhunglhâng bang gi, Yhumsîng Garai lé hô kó rá nghut lhê ga,

18 a-nham mau htoq xâng hkun mai, shí hkyô pé lé sé nhang é Yhumsîng Garai taí ri.*[✱] ga myiqhtoí pé kê tô é dang eq rajung za nghut ri.

19 Haû mù luí, ngò taí nau é gi, tûngbaù pè chyáng mai Garai Gasâng shut lhing lo é bang lé, gotû haí le a lhoq wuî é za, ²⁰ hparà lhô pé lé kyáng byí é a sansêng é zoshuq pé lé le, ashop é dông gungsho zùm yap é hkyô lé le, lingzing mai myhik sat é dusak sho lé le, sui lé zô é hkyô lé le, koi pyám rá matú za, yhangmoq lé, nga-nhúng laiká mai wó shit kat lhê. ²¹ Hkâsu mù gà le, gó hkûn mai yhang, Mosheq é tarâ lé wà hkanmó má hko kyô ló kômù, Bánno buinyì hkanmó tarajong pé má ng-hap kyo kyo kut bûm kô é nghut lhê." ga taí ri.

Lumjîng É Tûngbaù Pé Chyáng Hun Kat É Laiká

²² Haû hkûn, lagyo pé, suwún wuî eq, hpúng byù wuì lhunglhâng bang gi, Poluq, Barnaba nhik eq rahá

Antioku wà mó shut nhang kat rá byù lé, yhangmoq chyáng mai hkyin yù rá matú chôm myit hpyit akô. Haû eq rajung za, yhangmoq gi, gumang wuì chyáng mâ é nhik bô suwún nhik Barsabaq gà é Yudaq eq Sila lé hkyin yu akô nghut ri. ²³ Yhangnhik é loq má, hun kat kô é laiká gi,

"Antioku wà mó, Suriq mau eq Kiliki mau pé má nyi é, tûngbaù gumang wuì ê, nungmoq é gumang wuì nghut é, ngamoq lagyo pé eq suwún wuì gi, nguingón dang shit kyô kat lhê.

²⁴ Ngamoq nhang kat é le a nghut bang ra-am gi, ngamoq chyáng mai htoq lô mù, nungmoq lé dâng èq lhoq byok pyám luí, nungmoq é myit lé lhoq nhúng byí nyi é hkyô lé, ngamoq wó gyo bê. ²⁵ Haû mù, ngamoq lhunglhâng bang gi, byù ra-am lé hkyin yù mù, ²⁶ nga-nhúng é Yhumsîng Yesuq Hkrisduq é matú, yhumsîng asak lé lhâng a hâ é nga-nhúng chyitdap é Barnaba, Poluq nhik eq rahá, nungmoq chyáng nhang kat rá matú chôm myit hui bê. ²⁷ Haû mù luí, ngamoq gi, Yudaq eq Sila lé nhang kat lhê; yhangnhik gi, laiká má bo é eq rajung za, yhangnhik é nhut mai yhang taí kyo kó rá nghut lhê. ²⁸ Nungmoq é matú gi, hparà lhó pé lé tîng byí é zoshuq eq sui,

lingzing mai myhik sat é dusak sho eq ashop é dōng gungsho zùm yap é hkyô pé lé, koi pyám râ hkyô mai lai luí, gotû wòwùn hún râ hkyô a joq nghû luí, Chyoiyúng Woi-nyí le, ngamoq le, myit huí to bê. ²⁹ Nungmoq haú pé lé koi pyám nyí kôjáng gi, gè râ nghut lhê.

Nguingón wángzán nyí kó sháng gaq ô!" ga kâ tô ri.

³⁰ Yhangmoq lé nhang kat kôjáng, yhangmoq gi, Antioku và mó má gyó jé lô kômù, hpúng byû wuì lé ji tsíng to kôluí, haú hún kat é laiká lé ap byí akô nghut ri.

³¹ Hpúng byû wuì gi, laiká haú lé ban nghap kôjáng, wum-o byí é danglù hau é yanmai, gabú nyi bum akô. ³² Yudaq eq Sila gi, myiqhtoí nhik le nghut kômù luí, gumang wuì lé mungdang myo myô èq lhoq pun lhoq kying kômù, wum-o lhoq gíng to byí akô.

³³ Rayoq zo haú má nyi nyí kô é htâng má, gumang wuì gi, yhangmoq lé nhang kat é bâng chyáng, ngui ngui ngón ngón dum tau ló nhâng bekô nghut ri. ³⁴ (Sila kúm gi, yhang ô nau é dōng nyi gyó tô ri.)† ³⁵ Poluq eq Barnaba kúm gi, Antioku và mó má nyi gyó to kômù, Yhumsíng Yesuq é mungdang lé, góbang myo myo eq, mhoq kyo hko kyô akô nghut ri.

Poluq Eq Barnaba Nhik

Gâng Lhum É Hkyô

³⁶ Hau htâng, buinyí tsómra myáng jáng, Poluq gi, Barnaba lé, "Yhumsíng é mungdang hko kyô lai lo wú bê, và hkyap hkangmó má é gumang wui chyáng taú lò luí, yhangmoq hkâsu dut nyi é hkyô lé, ló dum kúm wú lo goq." ga taí ri. ³⁷ Barnaba gi, Markuq gâ é Yohan lé le shuí chùng nau ri. ³⁸ Nghut kôlháng, Poluq gi, haú yuq lé a kâm shuí chùng nau nghut ri; hkâsu mù gâ le, yhang gi, Pamhpuli mau má yhangnhik lé tô pyám to mù, yhangnhik eq rahá muzó a kâm xoq zui nau é sũ nghut é yanmai nghut ri. ³⁹ Hau é yanmai, yhangnhik gi, gyai yhang taí shai lhum kômù, rayuq eq rayuq gâng lhum bekô nghut ri. Barnaba gi, Markuq lé shuí chùng luí, lhai ji mù Kupru zinlóng shut e ló byuq bê nghut ri. ⁴⁰ Poluq kúm gi, Sila lé hkyin yù mù, gumang wui èq yhang lé Yhumsíng Garaí é jeju má ap kat kô é htâng má, yhangnhik gi, htoq e ló byuq bekô. ⁴¹ Haú mù, Poluq gi, Suriq mau eq Kiliki mau mai sô lai ló uchyang, haú má é noqkuq hpúng pé lé wum-o lhoq gíng byí wún bê nghut ri.

16

Poluq Eq Sila Nhik Chyáng Timohti Châng É Hkyô

¹ Poluq gi, Derbe và mó má jé é htâng, Lustra và mó

† 15:34 Bun zo shí lhum gi, Grik Chyúmlaika myo myo má a bò nghut lhê.

má dum jé ri. Haú wà má, Timohti gâ é chángzo rayuq nyi ri. Yhâng nu gi, Yesuq lé lumjínng é Yudaq myiwe myhí nghut ri; yhâng wa kúm gi, Grik amyú nghut ri. ²Timohti gi, Lustra wà mó eq Ikoni wà mó má nyi é gumang wui èq hkya-ôn é hui sù nghut ri. ³ Poluq gi, hkyowui má yhang lé shuí chûng naù mù luí, ahpyo-kuq hpyit byí ri. Hkâsu mù gâ le, yhâng wa gi, Grik nghut é hkyô lé haú má é Yudaq byu pé lhunglhâng bang sé kômù, haú bang lé myit tê byí é yanmai nghut ri. ⁴ Haú mù, yhangmoq gi, rawa htâng rawà mai lai lò uchyang, Yerusalem wà mó má é lagyo pé eq hpúng suwún wui, chôm myit hpyit tô é hkyô lé, cháng kó sháng gaq ga, yhangmoq lé taí kyô akô. ⁵ Haú mù luí, hpúng byú wui gi, lumjínng hkyô má wum-o bo lò kômù, ra-nyí èq ra-nyí byù du myô jat lo nyi ri.

Makedoni Byù Rayuq Lé, Poluq Shing-rán Myang É Hkyô

⁶ Ahkuí, yhangmoq gi, Asia mau má mungdang é hko kyo râ hkyô lé Chyoiyúng Woi-nyí èq yhangmoq lé hkùm pyâm é yanmai, Hprugi mau eq Galatiq mau dông sô lai lò mù, ⁷ Musi mau kyo má jé lò kôjáng, Bihtuni mau shut wang lò râ dâ akô; nghut kôlhang, Yesuq é Woi-nyí gi, yhangmoq lé ahkáng a byi nghut ri. ⁸ Haú mù, yhangmoq gi, Musi mau mai sô lai lò luí, Troa myuq má gyó jé ló

akô. ⁹ Haú má, myín lé, Poluq gi, Makedoni byù rayuq lé yap to mù, "Makedoni mau shut dap lé luí, ngamoq lé le garúm yù laq." ga luí, yhang lé dung wut nyi é shing-rán myang ri. ¹⁰ Shing-rán haú lé Poluq myang é eq, Makedoni byu pé lé gabú danglù hko kyo râ matú, ngamoq lé Garai Gasang wut yù bê nghut ri nghû myit yù luí, haú hkûn yhang, ngamoq gi, Makedoni mau shut dap é râ matú rì rì kut lò bê nghut lhê.

Ludia Gâ É Myiwe Myhí Hpúng Byù Dut Lo É Hkyô

¹¹ Haú mù luí, ngamoq gi, Troa myuq mai Samohtake zinlóng ang ang shut lhai ji é mù luí, htang nyí gi, Neapoli wà má jé bê nghut lhê. ¹² Haú mai lai jáng, Makedoni mau má, Romaq byu pé xuq tô é, haú ginwáng má é ahkyak wà mó nghut é, Hpilipi myuq má ngamoq jé mù, haú má rayoq zo nyi nyi é nghut lhê.

¹³ Bánno buinyí jé jáng, ngamoq gi, kyûdung jowò joq nhô ngam mù, wà hkum shinggan má é, wuilàng yàm shut htoq é luí, haú má zing to lánng é myiwe wui lé, zung gyó mù nyo hi é nghut lhê. ¹⁴ Haú dang gyo nyi é bang má, Garai Gasang lé noqkuq é, Htuatira myuq byù, pán nê ung zo sù Ludia gâ é myiwe myhí rayuq bo ri; Yhumsîng Garai gi, Poluq taí kyô é hkyô lé rago gyô yù sháng gaq ga, yhang lé myit hkum hpóng byí ri. ¹⁵ Yhang gi, yhang

eq yhâng yhumbyù wuì wui-myhup ban hkâm yù kôjáng, "Nungmoq gi, ngo lé haù Yhumsîng Yesuq má lumjîng bê sù nghut é dông, myit yù byi kô é nghut jáng, ngá yhûm má lé bíng keq." ga luí, ngamoq lé zuq zuq ji yu ri.

Poluq Eq Sila Nhik Htóng Lúng É Hkyô

¹⁶ Ra-nyí lé, ngamoq gi, haù kyûdung é jowò shut e ló nyi le, nat wang júng luí gumhpân hpan é jûnmyhí rayuq ngamoq lé lhom huí ri. Haù yuq gi, gumhpân hpan é dông yhâng yhumsîng wuì lé ngunzè gyai yang hô byí é sù nghut lê. ¹⁷ Myiwe haù gi, Poluq eq ngamoq htâng má châng to mù, "Shí bang gi, nungmoq lé hkyi yù hkyô tai kyô wún é, Myhang Htâng é Garai Gasâng é dui-nhâng zoshâng wuì nghut bum akô ô!" ga wut garû ri. ¹⁸ Buinyi myo myo haù su chyat châng garû wún é yanmai, Poluq gi, gyai yang myit hpêbu byuq mù, lhing wú kat luí, nat haù lé, "Yesuq Hkrisduq é myîng lang luí ngò nang lé hkunmó hkyô kat lê, yhâng chyáng mai htoq ló byuq aq." ga luí, nat haù lé, nhik-yô kat ri. Haù hkûn jáng, nat haù gi, yhâng chyáng mai htoq ló byuq bê nghut ri.

¹⁹ Ahkuí, myiwe hau é yhumsîng wuì gi, ngunzè myàng zo râ myoqbyù jowò a joq lo é hkyô lé sé kôjáng, Poluq eq Sila nhik lé chyup yù mù, gai mâ é suwún wui chyáng she hkyut e

akô. ²⁰ Dum, yhangmoq gi, yhangnhik lé tarâ agyì pé chyáng shuì ê mù, "Shí nhik gi, Yudaq byù nghut mù luí, ngamoq Romaq byu pé mai a ge châng é htunghking lé mhoqshit byí nyi é dông, ²¹ nga-nhûng é myuq lé gunjáng nyi akô nghut ri." ga tai akô.

²² Haù mù luí, shiwa byu pé gi, yhangnhik lé chôm htîm akô. Tarâ agyì pé gi, yhangnhik é mebu lé lêng hkyut pyám luí, wumchûm hkat eq bat râ matú, hkunmó hkyô kat akô. ²³ Yhangmoq gi, yhangnhik lé gyai yang nhuq bat yu é htâng, htong má lhung kat mù, rago za wú zúng râ matú htóng suwún lé hkunmó hkyô tô akô.

²⁴ Htóng suwún hpó gi, haù sù é hkunmó lé wó jáng, yhangnhik lé hkyi kyum hut luí, htóng mâ é, je ahtê gok má lhung tô ri.

Htóng Suwún Hpó Hkyi Yù Huí É Hkyô

²⁵ Nghut kôlhang, gunggàm yoq lé, Poluq eq Sila nhik gi, kyûdung luí, Garai Gasang lé mahkôn hkya-ôn nyi kô é hkûn, htóng byû góbang gi, yhangnhik é htê lé chôm gyô nyi bum akô. ²⁶ Haù hkûn, byodàn ratung layàng mó nún lô mù htóng yhûm gón le nún lô luí, hkum pé banshoq le radá dâm bóng hâ lo bum ri; dum nghut jáng, yuq hkanmó mâ é toqjáng tui pé le gyut gyó byuq bê nghut ri. ²⁷ Htóng suwún hpó gi, yhup bún lò mù, htóng hkum pé bóng hâ

tô bum é lé myang kat jáng, htóng byu pé ban h pang byuq bùm bekô râ nghut lê ga myit yù luí, sâm shê mù, yhanggùng yhang sat shí râ dâ ri. ²⁸ Nghut kôlhang, Poluq gi, "Ê, náng gùng yhang nàng haù su hkâkut, ngamoq banshoq shí má nyi tô lê." ga luí, hté mó èq wut garu taí kat ri.

²⁹ Haù hkùn, yhang gi, duq é myibung lé dúng yù mù, ahkaù shut din wang ló luí, Poluq eq Sila nhik é hí má gyuq nán é eq ngóm gop tô ri. ³⁰ Hau htàng, yhang gi, yhangnhik lé shuí htoq yù luí, "Sarâ nhik ê, ngò hkyi yu é hui râ matú, haí kut ra râ lú?" ga myi kat ri.

³¹ Haù hkùn, yhangnhik gi, "Yhumsing Yesuq lé lumjín jáng, nàng eq náng yhumbyù lunglhang bang hkyi yu é hui râ nghut lê." ga taí akô.

³² Hau htàng, yhangnhik gi, haù htóng suwún hpó eq yhang yhumbyù lunglhang lé, Yhumsing é mungdang hko kyô akô. ³³ Haù myîn haù u lé yhang, htóng suwún hpó gi, yhangnhik lé shuí è mù, yhangnhik é dàm pé lé tsing chí pyám byi luí, haù htàng, yhang eq yhang yhumbyù banshoq bang wui-myhup hkâm yù bekô nghut ri. ³⁴ Hau htàng, yhang gi, yhangnhik lé, yhang é yhúmkaù má shuí wang ló mù, zoshuq hkang byi ri.

Yhang eq yhang yhumbyù banshoq bang gi, Garai Gasang lé wó lumjín bekô nghut é yanmai, gyai gabú

nyi bum akô nghut ri.

Haq Nhang Pyám Râ Lé A Đông É Hkyô

³⁵ Ahkuí, maubó jáng, tarâ agyi wui gi, "Haù nhik lé nhang pyám aq." ga, htóng suwún hpô chyáng pyata pé lé taí nhang kat akô. ³⁶ Haù hkùn, htóng suwún hpó gi, "Nungnhik lé nhang pyám aq ga, tarâ agyi wui mai byù nhang kat ri; haù mù, ahkuí, nungnhik gi, ngón za htoq ló lo keq." ga luí, Poluq lé taí ri.

³⁷ Poluq kúm gi, "Nga-nhik gi, Romaq mingdán byù sheq ru nghut le wa, myi gôn wú é hkyô le a bo é, byu pê hí má ngá-nhik lé nhuq bat mù, htóng má hkyô kat kôluí nhing, ahkuí tsik za haq nhang pyám râ dâ akô nhung lhi? A wó dut, yhangmoq yhang sheq lé shuí htoq yù kó sháng gaq." ga luí, yhangmoq lé tũ taí kat ri.

³⁸ Pyata pé gi, tarâ agyi wui lé dang haù pé ló taí kyo kôjáng, tarâ agyi wui gi, Poluq eq Sila nhik Romaq mingdán byù nghut é hkyô lé wó gyo kôjáng, gyô gyuq kôluí, ³⁹ yhangmoq yhang, yhangnhik chyáng lé mù, tôngbán luí, shuí htoq yù mù, wà haù mai htoq ló byuq râ matú chôm dúng akô. ⁴⁰ Haù mù, Poluq eq Sila nhik gi, htóng mai htoq ló é htàng, Ludia é yhùm má wang ló akô; haù má, gumang wui eq le hui kômù, yhangmoq lé wum-o byi luí, htoq ló bekô nghut ri.

17

Htesaloni Wà Mó Má Mungdang Hko Kyô É Hkyô

¹ Hau htâng, yhangmoq gi, Amhipoli wà mó eq Apolon wà mó mai sô laî ló mù, Htesaloni wà mó má jé akô. Haú wà má gi, Yudaq byu pé é tarajong ralhum joq ri. ² Poluq gi, yhang lhaq kut nyi é eq rajung za, tarajong má wàng luî, Bánno buinyi sum nyi yhang, Chyúmdang má bo é eq séng mù, yhangmoq eq chôm ming lhum uchyang, ³ Hkrisduq wuîhke jamjau hui mù, shî bê mai dum dui toq lô râ hkyô lé taî hkoq san kyo luî, "Nungmoq lé, ngò hko kyô nyi é haú Yesuq gi, Hkrisduq nghut lhê." ga taî ri. ⁴ Yudaq byu pé mâ é ram gi, gyô jing kômù, Poluq eq Sila nhik chyáng lé xoq yu akô; haú eq rajung za, Garai Gasang lé hkunggâ é Grik pé myo myo eq, ahkyak é myiwe wuî tsómra myo shoq le, gyô jing kômù, lé xoq yu akô.

⁵ Nghut kôlhang, a gyô jing é Yudaq byu pé gi, manôn kôluî, gai mâ é byùgang jùm ra-am lé lung yù mù, byù moq mó tsing yù luî, rawa é shuî gabyong kômù, shiwa byu pé é hí má Poluq eq Sila nhik lé wó shuî htoq shit shoq ga, Yason é yhûm má htîm e ló akô. ⁶ Nghut kôlhang, yhangnhik lé a myàng kôjáng, yhangmoq gi, Yason eq gumang wuî ram lé, yhangmoq é wà suwún wuî chyáng lãng she é kômù, "Mingkan gón lé atau ahû kut é byù shí nhik, ahkuî shî

má jé jáng, Yason gi, yhâng é yhûm má lhom hkûlum yu ri. ⁷ Yhangmoq lhunglhâng bang gi, Yesuq gâ é hkokhâm góyuq nyi lhê ga kôluî, hkoséng Kethaq é tará lé lhoq shai é dông kut é bang nghut akô." ga taî garû bum akô. ⁸ Shiwa byu pé eq wà suwún wuî gi, dang haú lé wó gyo kôjáng, myit wui myit hke dut nyi bum akô. ⁹ Hau htâng, yhangmoq gi, manghkáng a lhoq htoq râ matú Yason eq góbang lé danggidiq zè byi nhâng mù, nhang pyám bekô nghut ri.

Beria Wà Mó Bang, Mungdang Lé Lhom Yu É Hkyô

¹⁰ Haú myîn jáng yhang, gumang wuî gi, Poluq eq Sila nhik lé Beria wà mó shut nhang kat akô; yhangnhik gi, haú wà má jé jáng, Yudaq byu pé é tarajong má wang ló akô nghut ri. ¹¹ Haú Beria wà mó byu pé gi, Htesaloni wà mó byu pé htoq má je riyhang nhik bo bum akô; haú mù, danglù haú lé gyai ô nau é myit eq hap yù mù, danglù shî teng a têng é hkyô lé wó sé shoq ga, nyi wuî Chyúmdang lé chôm nghap wú nyi akô nghut ri. ¹² Haú mù luî, Yudaq byu pé myo myo gi, lumjing bum akô, haú eq rajung za, aróng wó é Grik myiwe wuî eq yuqgè wuî myo myo le, lumjing bùm bekô nghut ri.

¹³ Poluq gi, Beria wà mó má le, Garai Gasang é mungdang hko kyô nyi é hkyô lé,

Htesaloni wà mó mâ é Yudaq byu pé sé kôjáng, yhangmoq gi, haú má lé kômù, wà byù wuì lé mhoq hpyoq luí, gabyông lò nhang akô. ¹⁴ Haú hkùn, gumang wuì gi, Poluq lé wuimau yàm jé shoq, radá dâm dé kat akô; nghut kôlhang, Sila eq Timohti nhik gi, Beria wà mó má nyi gyó tô akô nghut ri. ¹⁵ Poluq lé châng dé é bang gi, Ahten myuq jé shoq lé dé to kômù, Sila eq Timohti nhik lé hân hân châng ló râ matú pying kat é dang lé wun chûng mù, dum taù lò bekô nghut ri.

Poluq, Ahten Myuq Má Nyi É U Lhê Hkyô

¹⁶ Ahkuí, Poluq gi, Ahten myuq má haú nhik lé láng nyi tô é u lé, haú wâ má rawa é hparà lhô baú dut tô é lé myàng mù luí, yhâng i-myt gyai yhang a ngón dut byuq ri. ¹⁷ Hau é yanmai, yhang gi, tarajong pé má Yudaq byu pé eq Garai Gasang lé gyuq hkunggâ é Grik pé eq le, gài pé má hui mihui bang eq le, nyí wuì taí sânh kyô lhûm nyi akô nghut ri. ¹⁸ Haú mù luí, Epikuri hpaqchyí eq Sto-i hpaqchyí* lé sê é, myit wú hpaqchyí bo é bang ra-am gi, yhang eq dang chyin chyin lhûm akô; haú hkùn, yhang gi, Yesuq é hkyô eq dum dui toq hkyô é gabú danglù lé hko kyô é yanmai, ra-am gi, "Byù pyok shí yuq gi, haí wá taí nyi lhê lhú?" ga;

ra-am gi, "Góming hparà pé é hkyô lé taí kyo sù nghut sam ri." ga, taí bum akô nghut ri. ¹⁹ Hau htâng, yhangmoq gi, Aripagu gâ é byìn tú wap shut Poluq lé shuí doq ló mù, "Nang mhoqshit é hkyô asik, ngamoq lé sé nhang le a gè lhú? ²⁰ Nang èq taí é maú nhô za gâ é hkyô lé ngamoq wó gyô ri; haú é dang kyîng lé ngamoq sé nau ri." ga taí bum akô. ²¹ (Ahten byu pé eq haú má nyi é góming byu pé lhunglhang bang gi, dang sik lù sik haú lé taí kún gyô kún mù, yhangmoq é ahkyîng lé lhoq pán nyi bum akô nghut ri.)

Poluq, Aripagu Zuphpong Má Mungdang Hko É Hkyô

²² Haú u lé, Poluq gi, Aripagu zuphpong má toq yap mù, "Ahten byu pé ê, nungmoq gi, hkyô hkat hkanngó má hparà lhô pé lé gyai yhang dat gyuq hkungga kô é lé, ngò myang ri. ²³ Hkâsu mù gâ le, ngò sô lhing wún mù nungmoq jaú é ze pé lé rago wú wú lé, 'A sê é Garaí matú.', ga luí, kâ tô é hkungga gyap ralhum lé myang záng ri; haú nungmoq a sê é za jaú nyi é Garaí hkyô lé, ngò, nungmoq lé hkaí kyo kôlé.

²⁴ Myidàm htoq eq haú má joq mijoq lé hpan tô é Garaí Gasang gi, mauhkûng eq myigùng é Yhumsîng le nghut lhê mù luí, byu loq èq saí é noqkuq yhûm má

* **17:18** Epikuri hpaqchyí gi, htang pyat a joq, ahkuí ngón yû râ za ahkyak gâ é nghut lhê. Sto-i hpaqchyí gi, haí wá dut kôlhang i-myt zim za kut mù, htang pyat matú chiq a ra gâ é nghut lhê.

nyì rã a nghut. ²⁵ Yhang gi, byù lhunglhang bang lé asak, soq, ra mira gumjup shoq byì to sũ nghut nyì é yanmai, rajung jung rã é sũ lé su, byu loq èq dojaú rã sũ a nghut. ²⁶ Yhang gi, gunchyung rayuq mai za byuhú chãngjup myô lò nhâng mù, myidàm htoq jãm shoq má nyì nhâng luì, yhangmoq é matú hí hí mai ahkying yam-yoq eq nyì rã jowò masat to byi bê nghut ri. ²⁷ Yhang gi, nga-nhúng yuq hkangmó eq a we to kôle, byu pé yhang lé chãng hô mù, myang hô kó sháng gaq ga shí hkyô lé kut é nghut ri. ²⁸ Hkãsu mù gã le, nungmoq é jihkyang kat bang, 'Nga-nhúng le yhang é awut ashin pé nghut nyì lhê.' ga taí tô bum é eq rajung za, nga-nhúng gi, Yhang é yanmai wó nyì, wó dui é eq ãsu wó dut é nghut lhê.

²⁹ Haù mù, nga-nhúng gi, Garai Gasang é yhangzô pé nghut nyì é yanmai, Garai gung gi, byu é hpaqchyì loq èq kyung kã tô é hing, ngùn, luqgok pé eq pũng lhê nghũ luì hkã-myit yù kó. ³⁰ Laì lò bê haù myoq a bóng shi é pyat lé, Garai Gasang gi, haì le a ga lhaì pyãm to kôlhang, ahkuì gi, jowò hkangmó mã é byù lhunglhang bang lé, myit lhang keq ga hkunmó hkyô to bê nghut ri. ³¹ Hkãsu mù gã le, Yhang hkyin to sũ mai mingkan gón lé tara é dông jéyáng rã buinyì ra-nyì masat to bê nghut ri. Shí hkyô lé, byù lhunglhang bang é hí má

wó lum é saksé dut sháng gaq ga, Yhang haù yuq lé shi é mai lhoq dui toq yũ bê nghut ri." ga taí ri.

³² Shí é mai dum dui toq lo é hkyô lé wó gyô bùm kôjáng, ra-am gi, taí hpoì pyãm byì akô; ra-am kúm gi, "Nàng shí hkyô taí é lé ngamoq dum gyô wú nau ashí." ga taí akô. ³³ Hau htang, Poluq gi, haù zuphpong mai htoq ló byuq bê nghut ri. ³⁴ Nghut kôlhang, byù ra-am gi, Poluq é htang cháng kômù, lumjing bang dut bekô nghut ri. Haù bang má, Aripagu zuphpong má bo é Dionisi ga sũ le bo ri. Hau htoq agó, Damari gã é myiwe rayuq eq gotũ byu pé le, bo bum akô nghut ri.

18

Poluq, Korinhtuq Myuq Má Nyì É U Lhê Hkyô

¹ Hau htang má, Poluq gi, Ahten myuq mai htoq luì, Korinhtuq myuq má jé lo ri. ² Haù má, yhang gi, Romaq myuq mai Yudaq byù lhunglhang bang htoq ló byuq rã dut lhê ga, hkohkãm Klodi èq hkunmó hkyô é yanmai, a myáng shi lé Itali ming mai yhangmyi Priskila eq htoq jé lo é, Pontuq mau byù nghut é, Akula gã é Yudaq byù rayuq lé hui luì, yhangnhik chyáng ê ri. ³ Yhangmoq gi, jonghpang saí zo bang chyat nghut kô é yanmai, muzó pũng kôluì, Poluq gi, yhangnhik eq rahá nyì nyì mù, muzó chôm saí akô. ⁴ Bánno buinyì hkangmó,

Poluq gi, tarajong má Yudaq byù eq, Grik pé lé, taí sâñ kyo luí, lhoq pun lhoq kyíng yu ri.

⁵ Ahkuí, Sila eq Timohti nhik Makedoni mau mai châng jé jáng, Poluq gi, mungdang hkô hkyô má za wum kat luí, haù Yesuq gi, Hkrisduq yhang nghut lhê ga, Yudaq byu pé lé saksé hkâm kyô ri. ⁶ Nghut kôlhang, Yudaq byu pé gi, lhom hengik pyám kômù, yhang lé rhoi dang taí pyâm akô; haù mù, Poluq gi, yhâng mebu ko shit é dông yhangmoq lé a nau é hkyô tûñ shit uchyang, "Nungmoq é sui mara gi, nungmoq é ulhum má jé sháng gaq, ngò eq haí a séng lo; ahkuí mai, ngò gi, tûngbaù pé chyáng e ló berâ nghut lhê." ga luí, yhangmoq lé taí ri.

⁷ Hau htâng, yhang gi, tarajong mai htoq luí, jong haù eq yhep nghut é, Garai Gasang lé noqkuq é Titu Yustu ga su é yhùm má wang ló ri. ⁸ Krispu gâ é tarajong má up sù gi, yhâng yhumbyù lhunglhâng bang eq rahá, Yhumsing lé lumjíng akô. Korinhtuq myuq byu pé myo myo le, Poluq é dang lé gyô yù mù, lumjíng luí, wui-myhup hkâm yu bum akô nghut ri.

⁹ Ra-myìn lé, shing-rán ralhum má Yhumsing mai Poluq lé taí é gi, "Hkâgyuq, taí aq, zim za hkâ-nyí. ¹⁰ Ngò nàng eq rahá nghut nyi lhê, nàng lé ó yuq eq le haí wó kut rá a nghut, hkâsu mù gâ le, myuq shí má, ngá é byù myo myo nyi bum lhê." gâ

ri. ¹¹ Haù mù luí, Poluq gi, Garai Gasâng é mungdang mhoqshit uchyang, razàn eq lhamó hkyuq hkyap yhang, haù myuq má nyi nyi ri.

¹² Galio ga sù, Ahkaia mau mâ é ginwáng zau kut nyi é u lé, Yudaq byu pé gi, myit rahkat zâ eq Poluq lé chôm chyup yù kôluí, tarâ hpyit wap má she háng kômù, ¹³ "Byù shí yuq gi, jep é tarâ eq shai lhùm é dông, Garai Gasang lé noqkuq rá matú, byu pé lé mhoq hpyoq wún ri." ga mara hùn akô.

¹⁴ Haù hkûn, Poluq tû taí rá dâ lò jáng, Galio gi, Yudaq byu pé lé, "Yudaq byu pé ê, muzó shí gi, tarâ lu lai é muzó, haù a nghut jáng, agè ashop é muzó mai, dut lo é nghut le gi, nungmoq lé ngò gyo byi rá hkyô joq lhê. ¹⁵ Nghut kôlhang, muzó shí gi, nungmoq é tarâ eq séng luí, dang eq séng luí, mying eq séng luí, taí lhum kô é hkyô nghut é yanmai, nungmoq yhang ru ló hpyit lhum keq. Haù sù é muzó má, ngò gi, tarâ agyì kut byi rá a nghut." ga taí mù, ¹⁶ tarâ hpyit wap mai yhangmoq lé hkat htoq pyám nhang ri. ¹⁷ Haù hkûn, yhangmoq lhunglhâng bang gi, tarajong má up sù Sositeni lé chyup yù mù, tarâ hpyit wap hí má chôm bat akô. Galio kúm gi, haù hkyô lé hai gùn a kut byi nghut ri.

Poluq, Antioku Wà Mó Má Dum Taù Jé É hkyô

¹⁸ Poluq gi, Korinhtuq myuq má buinyi tsómra

myáng shoq lumjǐng bang eq nyi nyi ri. Hau htàng, yhang gi, haú bang lé shi-kyâm to luí, Priskila eq Akula nhik lé byinzùm kut mù, lhaí ji luí Suriq mau shut e ló akô. Hau hí má, yhang gi, danggidiq tô tô é yanmai, Kenhkrea wà má xâm nyhâm pyâm ri.*¹⁹ Yhangmoq Ehpesu myuq má jé kô é hkûn, Poluq gi, Priskila eq Akula nhik lé nyhi pyâm to luí, yhang baú tarajong má wàng mù, Yudaq byu pé lé taí sân kyo byí ri.²⁰ Haú mâ é bang gi, yhangmoq eq rahá rayoq zo nyi shi râ dông yhang lé dung kô é nghut kôlhang, yhang gi, a nhô lo nghut ri.²¹ Haú mù, yhang gi, Ehpesu myuq mai lhaí ji mù htoq ló uchyang, "Garai Gasang ô nau é hkyô nghut le gi, ngò nungmoq chyáng dum jé lé râ nghut lhê." ga, yhangmoq lé danggidiq byí tô ri.²² Ahkuí, Poluq gi, Kesare wà mó má ló jé dap jáng, Yerusalem wà mó shut doq ló mù, noqkuq hpúng lé ló huí tô é htàng, Antioku wà mó má dum gyó ló ri.

²³ Yhang gi, haú wà má rayoq zo nyi é htàng, htoq ló mù, Galatiq mau eq Hprugi mau mai sô lai ló uchyang, rawa htàng rawà mâ é chángzô pé lé wum-o lhoq ging byí ri.

²⁴ Ahkuí, Alesandru myuq byù nghut é sù, Apolo gâ é Yudaq byù rayuq gi, Ehpesu myuq má jé lé ri. Yhang gi, hpaqchyí bò sù nghut é htoq agó, Chyúmdang le gyai kúng é sù nghut ri.²⁵ Yhang gi, Yohan é bapisma hkyô lé za sé sù nghut kôlhang, Yhumsing é hkyô lé mhoq yú bê nghut luí, Yesuq é hkyô pé lé mhoq yu to bê eq rajung za wum zuq tung ga luí, hkyak hkyak mhoqshit byí ri.²⁶ Ahkuí, yhang gi, gyuq kyûm myit a bo é za tarajong má taí hi ló ri. Haú hkûn, Priskila eq Akula nhik gi, haú lé wó gyo kôjáng, yhang lé ji yù mù, Garai Gasâng é mungdang hkyô lé azó tung taí sân kyo byí akô nghut ri.

²⁷ Apolo gi, Ahkaia mau shut dap e ló nau é hkûn, gumang wui gi, yhang lé wum saí byi mù, yhang lé lhom hkûlum yù râ matú, chángzô pé chyáng laiká ká byí kat akô; yhang gi, jé jáng, Garai Gasâng jeju mai lumjǐng bê bang lé, gyai yhang wó garúm sù dut bê nghut ri.²⁸ Hkâsu mù gâ le, yhang mai, Yesuq gi, Hkrisduq yhang nghut nyi ri ga luí Chyúmdang má tân shit uchyang, byu pé hí má Yudaq byu pé lé, wum kat wó taí ung pyâm é yanmai nghut ri.

19

Poluq, Ehpesu Myuq Má Nyi U Lhê Hkyô

Apolo Zui Saí É Muzó

* **18:18** Xâm nyhâm pyâm é gi, Yudaq htùng dông rajung jung kut râ matú danggidiq to luí, haú lé ban kut jáng, yhumsing xâm lé nyhâm pyâm é nghut lhê.

¹ Ahkuî, Apolo gi, Korinhtuq myuq má nyi tô é hkûn, Poluq gi, mau káng mai sô lai ló mù, Ehpesu myuq má jé ri. Haú má, yhang gi, chángzô pé ra-am eq hui lui, ² yhangmoq lé, "Nungmoq gi, lumjǐng é hkûn, Chyoiyúng Woi-nyí lé, wó yú bekô lúhú?" ga myí ri.

Haú hkûn, yhangmoq gi, "Chyoiyúng Woi-nyí nyi lhê gâ é lháng, ngamoq a wó gyô wú." ga tú tai akô.

³ Haú mù, Poluq gi, "Haú nghut jáng, nungmoq gi, hai jung baptisma hkam yú kô é lúhú?" ga lui, yhangmoq lé myi jáng, yhangmoq gi, "Yohan é baptisma hkam yu é nghut lhê." ga tú tai akô.

⁴ Haú hkûn, Poluq gi, "Yohan é baptisma nghu é gi, myit lǐng mù wui-myhup hkâm yu é hkyô lé gâ lhê. Yohan gi, yhang é htàng má jé lé rã sũ, haú Yesuq lé sheq lumjǐng rã lhê ga shiwa byu pé lé tai ri." ga tai ri. ⁵ Yhangmoq gi, dang haú lé wó gyo kôjáng, Yesuq é myǐng lang lui baptisma byi é lé, hkam yu bum akô. ⁶ Poluq gi, yhangmoq é htoq má loq ke byi jáng, haú Chyoiyúng Woi-nyí gi, yhangmoq htoq má jé lé mù, yhangmoq gi, laklai dang nyo lo é htoq agó myiqhtoi le htoi lo bum akô.

⁷ Haú bang lhungháng gi, yuqgè raxe í yuq kó nghut ri.

⁸ Hau htàng, Poluq gi, tarajong má wàng lui, gyuq kyúm myit a bo é za lhamó sum hkyap Garai Gasang é mingdán hkyô lé tai sân kyo

mù, lhoq pun lhoq kyǐng yu ri. ⁹ Nghut kôlhang, ra-am gi, myit htan lo bùm kôlui a kâm lumjǐng kô é htoq agó, haú Yhumsing é Hkyô lé byu pé hí má lhoq hpoi pyám byi kôjáng, Poluq gi, yhangmoq chyáng mai htoq lui, chángzô pé lé shui chùng mù, Turanu gá su é hpaqchyí mhoq jong má, nyi wui tai sân kyô lhum nyi akô. ¹⁰ Haú su kut í zân yhang mhoqshit nyi é yanmai, Asia mau gón má é Yudaq byu pé eq Grik pé lhungháng bang gi, Yhumsing é mungdang lé wó gyô yu bum akô nghut ri.

Skewa É Yhangzo Nyhit Yuq É Hkyô

¹¹ Garai Gasang gi, Poluq é loq dông laklai kumlhá kut ri. ¹² Haú mù, Poluq chyáng mâ é hpajet eq hpyihit rajung jung lé, nò bâng chyáng yu ló mù, ló záng byi jáng lháng, yhangmoq é nòhpyo ge ló byuq é eq, agè ashop é nat pé lé yhangmoq chyáng mai htoq ló byuq bum akô.

¹³ Haú u lé, nat hkat htoq wun é Yudaq byu pé ra-am gi, agè ashop é nat pé lé, "Poluq hko tai é Yesuq é myǐng mai, ngò, nungmoq lé hkat htoq lhê." ga, agè ashop é nat wang júng to bâng é ahtoq má, Yhumsing Yesuq é myǐng lé lang lui, hkat chyam wú akô. ¹⁴ Skewa gâ é, Yudaq hkyangjong agyi rayuq é yuqzo nyhit yuq le haú su kut wun akô. ¹⁵ Ra-nyí lé, agè ashop é nat gi, yhangmoq lé, "Yesuq lé ngò sê lhê; Poluq é

hkyô lé le ngò sê lhê; nghut kôlhang, nungmoq gi, ó pé nghut akô?" ga tû taí mù, ¹⁶ agè ashop é nat haú wang júng é byù gi, yhangmoq htoq má byam doq jî to luí, nhuq bat yû mù yhangmoq lé ung pyâm ri. Yhangmoq gi, yhûm haú mai gùngchîn sui nê yang yang hpang htoq ló bekô nghut ri.

¹⁷ Haú hkyô lé, Ehpesu myuq má nyi é Yudaq byu pé eq Grik pé sé kôjáng, yhangmoq lhunglhang bang gi, chôm gyô gyuq bum akô. Yhumsîng Yesuq é myîng gi, hkya-on lhoq toq é hui bê nghut ri. ¹⁸ Lumjîng bê bang myo myo gi, lé mù, yhumsîng kut shut é agè ashop hkyô lé, myo myô hí má yín yu akô. ¹⁹ Myoqheq hpaqchyî kut zô é bang le, yhangmoq é laiká lé yu lé kôluí, shiwa byu pé hí má nyhê hkyô pyâm akô. Mausau haú pê é ahpau lé sôn wú le, ngùn chap ngo mun záng ri. ²⁰ Haú dông mai, haú Yhumsing é mungdang gi, ko lam lò mù, wum-o a-tsam je bo lò bê nghut ri.

Ehpesu Myuq Má Gabyông É Hkyô

²¹ Shí pé ban dut lâi htâng má, Poluq gi, Makedoni mau eq Ahkaia mau dông sô lâi ló mù, Yerusalem wà mó má ló jé râ ga myit hpyit yû luí, "Haú má ló jé tô é htâng má, ngò, Romaq myuq má le, jé wú râ dut ashí." ga taí ri. ²² Haú mù, yhang lé htũqbang garúm é Timohti

eq Erastu nhik lé hí Makedoni mau shut nhang kat luí, yhang gi, Asia mau má rayoq rabun zo nyi gyó tô ri.

²³ Haú yoq lé, haú Yhumsing é Hkyô yanmai gyai yhang gabyông lo bum akô. ²⁴ Demetri gâ é ngùn bat zo sũ rayuq gi, Artemi hpara é ngùn yhûm zông zo saí luí, mù saí luzúm wuî lé wó sùt nhang nyi ri. ²⁵ Yhang gi, yhâng é ngùn bat zo luzúm wuî eq haú jung amũ kut é góbang lé le jî tsîng to mù, taí é gi, "Luzúm wuî ê, muzó shí lhûm é yanmai, nga-nhúng nyi ngón yuqyo nyi é hkyô lé, nungmoq sê lhê. ²⁶ Nghut kôle, ahkuí gi, Ehpesu myuq má za le a nghut lo, Asia mau lhang aluq jam shoq, byu loq eq saí é zè lé, garaí pé a nghut ga, shí Poluq ga sũ mai byù myo myo lé mhoq hpyoq yû mù, hkyô shuí lhoq nghoq nyi é hkyô lé, nungmoq wó myâng, wó gyô nyi akô. ²⁷ Haú mù luí, nga-nhûng é muzó shí gi, hpoí byuq râ lé chiq râ é za a nghut, hparà myhí mó Artemi é noqkuq yhûm gi, haí a dut byuq luí, Asia mau gón eq mingkan gón mai noq é hparà myhí é shingkang hpoí byuq râ lé le myit chiq râ dut bê." gâ ri.

²⁸ Yhangmoq gi, dang haú lé wó gyô bùm kôjáng, nhik mó gyô yo kôluí, "Ehpesu myuq byu pé é Artemi gi, kô nyi sháng gaq ô!" ga chôm garú bum akô. ²⁹ Hkâ-myháng a nghut má, rawa bang gabyông lò bekô. Shiwa byu

pé gi, Poluq é byinzùm Make-doni byù Ge-u eq Aristakuq nhik lé chyup she yù mù, yhangmoq é poî wàng mó shut radá dâm chyîn chyap wang ló bum akô. ³⁰ Poluq gi, moq hpúng hau hí má htoq shit naû kôlhang, chángzô pé gi, yhang lé a wàng nhâng kó nghut ri. ³¹ Poluq é luzúm wuî nghut é, haú mau má é suwún wuî ra-am lhang, yhang lé poî wàng hkaû má a ê râ matú, hkûm pyám nhang akô nghut ri.

³² Zîng tô é bang gi, hai hû háng le a sé lo dut byuq kômù luî, ra-am rajung ga garû bum akô. Myo mi-myo gi, hai mù luî yhangmoq haû má nyi tô é lé lhang a sê bùm kó nghut ri. ³³ Yudaq byu pé gi, Alesander lé hí má chôm chyûn htoq kat kôluî, shiwa hpong mai ra-am gi, yhang hká dông taí râ hkyô lé mhoq byi kat akô. Alesander le shiwa hpong lé taí san kyo naû luî, zim byuq râ matú loq tu ri. ³⁴ Nghut kôlhang, Alesander, Yudaq byù nghut é lé sé kôjáng, yhangmoq lunglhang bang gi, rahtê za kut kôluî, "Ehpesu myuq byu pé é Artemi gi, kô nyi sháng gaq ô!" ga hkyíng hkum í hkum kô garû bum akô.

³⁵ Haû, myuq chyare hpó gi, shiwa moq mó lé lhoq zim luî taí é gi, "Ehpesu myuq byu pé é, Ehpesu myuq shí gi, Artemi myhí mó é noqkuq yhùm eq mauhkûng mai byit gyó lo é yhang é alhô lé, wú zúng nyi é wà nghut é hkyô

lé, mingkan má a sê é ó yuq wa nyi lhê lhê? ³⁶ Haû mù luî, shí hkyô pé gi, wó he pyâm jung a nghut é yanmai, zim za nyi le ge lhê, hân so hân dùn hkâkut ko. ³⁷ Shí nhik gi, noqkuq yhùm lé hpyoq zo su nhik le a nghut, nga-nhúng é hparà myhí lé lhoq hpoi su nhik le a nghut kô é le nhing, nungmoq shuí lé bekô nghut ri. ³⁸ Demetri eq yhang é ngùn bat zo luzúm wuî gi, rayuq yuq é ahtoq má mara hûn râ hkyô joq kô é nghut jáng, tarâ rûng pé hpông tô lhê. Tarâ agyì pé nyi lhê. Haû má yhangmoq é kó sháng gaq. ³⁹ Nungmoq taí nau é gó hkyô rajung jung joq é nghut le kúm gi, tarâ wang zuphpong mó má chôm taí pyám râ nghut lhê. ⁴⁰ Hkû-nyí gabyông é mù shí má, mù htoq wang a bo é yanmai, nga-nhúng lé mara hûn râ chiq râ ri. Shí su kut chôm míng é hkyô lé, hai é yanmai nghut lhê nghû, nga-nhúng a wó taí kyo nghut ri." gâ ri. ⁴¹ Shí pé ban taí é htâng má, yhang gi, shiwa moq mó lé lhoq pyo kat bê nghut ri.

20

Makedoni Mau Éq Grik Mau Dông Láiló É U Lhê Hkyô

¹ Haû gabyông é hkyô zim byuq é htâng má, Poluq gi, chángzô pé lé ji yù luî, yhangmoq lé wum byi dang taí to mù, shi-kyâm to luî, Makedoni mau shut htoq e ló bê nghut ri. ² Yhang gi, haû mau mai sô láiló uchyang, byu pé lé wum byi é dang

myo myo taí luí, Grik mau má ló jé bê. ³ Yhang haú má lhamó sum hkyap nyi yù mù, lhaí ji luí Suriq mau shut ê râ hen nyi é hkún, Yudaq byu pé gi, yhang lé gyám nyí kô é yanmai, yhang gi, Makedoni mau dông tau lò râ lé myit hpyit bê nghut ri. ⁴ Yhang eq rabyìn za châng é bang gi, Beria wà mó mâ é Purú yhangzo Sopata, Htesaloni wà mó mâ é Aristakuq eq Sekundu nhik, Derbe wà mó mâ é Ge-u, Timohti, Asia mau mâ é Tuhkiku eq Trohpimu nhik pé nghut akô. ⁵ Yhangmoq gi, hí so láng luí, ngá-nhik lé Troa myuq má ló láng nyi akô. ⁶ Nghut kôlhâng, ngá-nhik gi, Azuma Poí* laí é htâng má, Hpilipi wà mó mai lhaí ji ló le, ngo nyí nghú jáng, Troa myuq má yhangmoq lé hui luí, haú má nyhit nyí chôm nyi é nghut lhê.

Troa Wà Má, Utuhku Ga Sú Lhoq Tui Toq Hui É Hkyô

⁷ Rabat é sâng-hi nyí lé, ngamoq gi, muk hpê gàm râ matú lé chôm zup zîng tô é hkún, Poluq gi, htang nyí ló byuq râ ga hen tô é yanmai, chángzô pé lé gunggàm jé shoq hko kyô nyi ri. ⁸ Ngamoq zup zîng nyi é haú ahtoq pyâm wap má, myibung myo myo le đưq tô ri. ⁹ Poluq dang nyo hing nyi é u lé, Utuhku gâ é zorâm zo rayuq gi, hkohot hkum yâm má yhup mui zung tô ri. Haú yuq gi, yhupmó myi byuq luí,

yhôm sum tsáng mai byit gyó mù, yhang lé bún toq wú le shi byuq bê nghut ri. ¹⁰ Haú hkún, Poluq gi, gyó ló mù, po ngop to luí, "Hkâdân ko, yhang soq bo ashî." ga taí ri. ¹¹ Haú mù, yhang gi, dum tau doq ló luí, muk lé hpê mù, zo luí, maubó shoq yhangmoq eq dang nyo kún mù htoq ló bê nghut ri. ¹² Zorâm zo haú lé duì gù shuì ló kômù, nhik tîng é gyai yhang hui bekô nghut ri.

Troa Wà Eq Melitu Wà Gyoro Má É Hkyowui

¹³ Poluq gi, myì hkyô ló râ matú hen tô é yanmai, yhang lajang byí é eq rajung za, yhang lé Asu wà má lhaí lhom shuì ji râ matú, ngamoq gi, lhaí ji mù hí ló láng bê nghut lhê. ¹⁴ Haú mù, yhang gi, Asu wà má ngamoq eq hui luí, ngamoq gi, yhang lé lhaí má shuì jî chûng mù, Mitulene myuq shut e ló bê. ¹⁵ Htang nyi, ngamoq gi, haú mai lhaí ji mù, Kiu zinlóng yâm mai laí ló luí, hau htang nyí gi, Samu zinlóng má laí dap ló luí, htang nyi gi, Melitu wà mó má jé ló bê nghut lhê. ¹⁶ Poluq gi, wó dut é nghut jáng, Penteko-ti buinyi lé Yerusalem wà mó má wó jé shoq gâ é yanmai, Asia mau má buinyi a kâm lhoq htum naù mù luí, Ehpesu myuq lé lhaí pyâm to râ matú, myit hpyit to bê nghut ri.

Ehpesu Hpúng Suwún Wuí Lé, Poluq Shi-kyâm Tô É Dang

* 20:6 Múnchi a bo é Muk zo Poí lé, Azuma Poí le gâ lhê.

17 Poluq gi, Melitu wà mó mai Ehpesu shut byù nhang kat luî, hpúng suwún wuî lé ê jî nhang ri. 18 Haú bang jé lé kôjáng, yhang yhang-moq lé taí é gi, "Ngò, Asia mau má sâng-hi jé é buinyì mai, nungmoq eq hkâsu kut nyi nyi é ahkyíng banshoq lé le; 19 Yudaq byu pé jeq hô luî, ngò wuîhke jamjau hui zo kôlhang, haú Yhumsing é muzó lé, ngò myit gyai lhoq nyhûm é eq ngaubyi ngau nhap é eq wún waq é hkyô lé le; 20 nungmoq é matú akyû bo é hkyô banshoq lé, a my-hit to loshoq taí é hkyô lé le; shiwa byu pê hí eq rayhûm htâng rayhûm má ngò nungmoq lé mhogshit é hkyô lé le; 21 ngò gi, Yudaq byu pé eq Grik pé lé, myit lhíng mù Garai Gasâng chyáng lhing lò ra eq, nga-nhûng é Yhumsing Yesuq lé lumjíng ra hkyô lé, saksé hkâm kyo lugù nghut bê lé le, nungmoq sê nyi akô.

22 Ahkuî, ngò gi, Woi-nyí má tuí tô é hui bê yanmai, Yerusalem wà mó má e ló lhê; haú má, ngò haí ló dut râ lé kúm gi, a sé nghut ri. 23 Ngò gi, htóng eq wuîhke jamjau hkyô ngo lé lánng tô ri ga, wà hkangmó má Chyoiyúng Woi-nyí eq lhoq pûn é hkyô lé za sê nyi lhê. 24 Nghut kôlhang, ngò gi, òn râ hkyô ban òn râ eq, Garai Gasâng jeju eq sêng é gabú danglù lé saksé hkâm râ matú, Yhumsing Yesuq ngo lé byi tô é muzó lé ban wún waq râ za nghut jáng, ngá asak lé

ratsuí le a myit ha lô é nghut lhê.

25 Garai Gasâng é mingdán hkyô lé hko kyô wún é hkùn, ngò eq huí é nungmoq lhunglhang bang gi, htâng nùng má ngo lé a myàng lo kó râ nghut é lé, ahkuí ngò sê to bê. 26 Haú mù luî, ó yuq nghut kôlhang, yubak mara má shi byuq ló é nghut le, haú yuq é sui chyín gi, ngò má a dap lô é hkyô lé, hkû-nyí, ngò saksé hkâm tô lhê. 27 Hkâsu mù gâ le, Garai Gasang ô nau é hkyô banshoq nungmoq lé hko kyo râ matú, ngò zaú tô é hkyô a joq wú é yanmai nghut lhê. 28 Nungmoq gi, yhumsing gùng lé le, nungmoq lé Chyoiyúng Woi-nyí eq up zúng nhang é sau hpúng† lhunglhang lé le, zúng nyí keq. Garai Gasang Yhâng suí eq wui tô é noqkuq hpúng lé le, rém zúng nyí keq. 29 Ngò ló byuq é htâng má, sau hpúng lé a shogyô é, ashop é wamhkuí gi, nungmoq chyáng jé râ nghut é hkyô lé, ngò sê lhê. 30 Hau htoq agó, chángzô pé lé wó mhoq hpyoq yû shoq ga, shut é òng taí é byu pé lhang nungmoq chyáng mai htoq lô râ nghut lhê. 31 Haú mù luî, nungmoq yuq hkangmó lé, ngò sum zân tup ngaubyi ngau-nhap eq nyí myín a hkying loshoq, lhoq pun lhoq kyíng tô é dang pé lé, nungmoq gi, myit bun mù machya nyí keq.

32 Ahkuî, ngò gi, nungmoq lé, Garai Gasâng chyáng le,

† 20:28 Sau hpúng gâ é gi, lumjíng é bang lé gâ lhê.

nungmoq lé wó lhoq ging lhoq títng mù, lhoq chyoyúng é hui bê bang eq nungmoq lé silí wunlí wó byí é, Yhâng é jeju mungdang má le, ap tô lhê. ³³ Ngò gi, ó yuq é hîng, ngùn, mebu pé lé le a my-oqnoq wú. ³⁴ Ngá é loq shí í loq gi, ngò eq ngá htâng châng é bang ra châ é lé kut byi bê hkyô lé, nungmoq yhang sé gû nghut lhê. ³⁵ Ngò kut é muzò banshoq gi, nungmoq é alik dut bê nghut luí, shí su kut shikut é dông mai, ngan-húng gi, wum-o nyhóm bang lé htuoq bang luí, 'Lhom yu é htoq má byí é gi, je riyhang hkungsô wó nyi ri.' ga luí, Yhumsîng Yesuq taí é dang lé bûn nyi sháng." gâ ri.

³⁶ Poluq gi, haú su ga ban taí jáng, hkyihput htuoq mù, yhangmoq lhunglhâng bang eq rahá za kyûdûng ri. ³⁷ Yhangmoq lhunglhâng bang gi, yhang lé po to luí, bopuq puq mù, chôm ngau akô. ³⁸ Htâng nùng má, yhang lé dum myàng râ a nghut lo gâ é dang yanmai, yhangmoq gi, je riyhang yón kuq bum akô. Yhang lé, lhai má jé shoq lé châng dé kat akô nghut ri.

21

Yerusalem Wà Mó Shut Doq Ló Nyi É U Lhê Hkyô

¹ Ngamoq gi, yhangmoq lé kang pyâm to luí, lhai jî chûng mù, nyâng za Kusa zinlóng má jé é nghut lhê. Hau htang nyí gi, Rode zinlóng má jé mù, haú mai Patara

wà má dum jé bê. ² Haú wâ má Hpinisi mau shut dap ló é lhai lé, ngamoq myàng luí, haú mai chôm jî chûng bê. ³ Haú hkûn, ngamoq gi, Kupru zinlóng lé myàng jáng, hau é loqyo hkyam dông lai ló luí, Suriq mau shut e ló le, hpugá zê lé hkyó râ matú, Turuq myuq má nô é nghut lhê. ⁴ Haú wâ má, chángzô pé lé myang hô luí, yhangmoq chyáng nyhit nyí bíng yu é. Chángzo haú bang gi, Chyoyúng Woi-nyí eq lhoq pûn é dông Poluq lé Yerusalem wâ mó shut a ló râ matú, chôm hkûm akô. ⁵ Nghut kôlhâng, nyhit nyí haú lai jáng, ngamoq gi, ngamoq é hkyowuì shut dum xoq sô htoq ló bê. Chángzô pé lhunglhâng bang gi, yhangmoq é myi zo wuì eq rahá, ngamoq lé wâ shinggan jé shoq châng dé kôluí, ngamoq gi, yhangmoq eq rahá wuiyâm má hkyihput htuoq mù, kyû chôm dung bê nghut lhê. ⁶ Hau htâng, rayuq eq rayuq ban shi-kyâm lhum jáng, ngamoq gi, lhai má wàng bê; yhangmoq gi, yhûm shut dum tau ló byuq bekô nghut ri.

⁷ Ngamoq gi, Turuq myuq mai lhai jî chûng mù, Toleme wâ má jé ló bê. Ngamoq gi, haú wâ má é gumang wuì lé shichyên yù mù, yhangmoq eq rahá ra-nyí chôm nyi kûn é nghut lhê. ⁸ Htang nyí gi, ngamoq haú wâ mai htoq ló mù, Kesare wâ mó má dum jé bê. Haú wâ má, haú

* 21:8 Lagyo 6:1-6

htuqluq htuqbang nyhit yuq* má bò sù, gabú danglù hko taí é Hpilip gá su é yhùm má, ngamoq wang bíng bê nghut lhê. ⁹ Yhang gi, yhang hku tô é byizo zomyi myiqhtoi myi yuq wó ri.

¹⁰ Ngamoq gi, haú yhùm má rayoq zo nyi é htâng má, Agabu gâ é myiqhtoi rayuq, Yuda mau mai jé lé ri. ¹¹ Yhang gi, ngamoq chyáng jé lé luí, Poluq é hpyihit lé yù mù, yhânggùng yhang loq eq hkyí pé má tui mù luí, taí é gi, "Shí hpyihit yhumsing lé, Yerusalem wà mó má é Yudaq byu pé mai shí su kut lhom tui luí, tungbaù pé é loq má ap pyám kó rà nghut lhê;" ga luí, Chyoiyúng Woi-nyí taí ri." gâ ri.

¹² Dang haú lé wó gyo jáng, haú má é bang eq ngamoq gi, Poluq lé Yerusalem wà mó má a doq ló rà matú, gyai yhang chòm hkúm bê nghut lhê. ¹³ Nghut kôlhang, Poluq gi, "Nungmoq gi, haí mù luí ngaubyi ngau-nhap kut é eq, ngo lé myit wum gyui rà đông kut nyi akô l hú? Ngò gi, Yhumsing Yesuq é yanmai, Yerusalem wà mó má, tui é huí rà za a nghut, shí hkâm rà matú le rì rì nghut lhê." ga tui taí pyám ri. ¹⁴ Yhang lé wó taí hkúm rà su a dut lo jáng, ngamoq gi, "Garai Gasang ô nau é đông nghut sháng gaq." nghu luí, zim za chòm nyi bùm bê.

¹⁵ Hau htâng má, ngamoq gi, zè món chùng mù Yerusalem wà mó shut doq

ló bê nghut lhê. ¹⁶ Kesare wà mó má é chángzô pé ra-am le, ngamoq eq rabyìn za nghut kôluí, yhangmoq gi, ngamoq lé Kupru byù Manason ga sù, hí hí lhê é chángzo rayuq é yhùm má shuí ló mù, yhâng chyáng bíng nhang akô.

*Yerusalem Wà Mó Má,
Yakuq Lé Ê Huí Ê Hkyô*

¹⁷ Yerusalem wà mó má ngamoq jé é hkùn, gumang wui gi, ngamoq lé gabú tung lhom hkúlum yu akô. ¹⁸ Htang nyí, Poluq eq ngamoq gi, Yakuq lé ê huí le, hpúng suwún wui le zing nyi to lánng akô. ¹⁹ Poluq gi, yhangmoq eq ban shichyen jáng, yhang wùn waq lai lo é hpúng mù đông mai, Garai Gasang eq tungbaù pé chyáng kut byi bê hkyô pé lé, jihkúm nuqguq shit kyô ri.

²⁰ Yhangmoq gi, haú lé wó gyo kôjáng, Garai Gasang lé hkya-ôn akô. Hau htâng, Poluq lé taí kô é gi, "Âmang ê, Yudaq byu pé má lumjáng é bang hkâ-myhó hkyíng mun nghut bê lé, nàng sê lhê. Haú bang lunglhang gi, jep é tarâ má myit zuq to bê bang chyat nghut bum akô. ²¹ Nghut kôlhang, yhangmoq lunglhang bang gi, tungbaù pé chyáng nyó lúng tô é Yudaq byù banshoq bang lé, nàng, yhumsing yhangzo yhangshù pé é matú ahpyokuq hpyit a ra nghu é eq nganhung é htung tarâ lé cháng nyi a ra nghu luí, Mosheq é tarâ lé tô pyám rà đông mhoqshit ri gâ é dang lé,

wó gyô yu bùm bekô nghut ri. ²² Nàng jé bê hkyô lé, yhangmoq wó gyo berâ za nghut lhê. Ahkuí, ngamoq hkâsu kut lo râ lhu? ²³ Haú mù, ngamoq taí é dông kut aq, ngamoq chyáng danggidiq mó byi bê byù myi yuq nyi lhê. ²⁴ Nàng gi, haú bang lé ji yù mù, yhangmoq eq rahá lhoq san lhoq yúng yû aq, yhangmoq lé u wó wuq yù râ matú, ahpau le htoq byi aq. Haú hkûn sheq, byù lhunglhâng bang gi, yhangmoq wó gyô tô é hkyô a têng byuq é eq, nàng yhang lháng, jep é tarâ lé, châng kut nyi sù nghut é hkyô lé, sé kó râ nghut lhê. ²⁵ Lumjîng é tûngbaù pè é matú kúm gi, hparâ lhô pé lé tîng byi é zoshuq, sui, lingzing mai myhik sat é dusak sho eq ashop é dông gungsho zùm yap é hkyô pé lé, yhangmoq koi pyám râ matú, ngamoq chôm doqdan luí, kê hún kat bê nghut lhê." ga akô.

²⁶ Haú mù luí, Poluq gi, hau htang nyi haú bang lé ji yù luí, yhangmoq eq rahá, lhoq san lhoq yúng yû mù, noqkuq yhûm má wàng luí, yhangmoq yuq hkingmó é matú hkingga wó byi shoq ga, yhangmoq é lhoq san lhoq yúng buinyi ngap bê hkyô lé, taí kyô ri.

Poluq Chyup Yû Huí É Hkyô

²⁷ Buinyi nyhit nyi haú ngap râ yàm má, Asia mau má é Yudaq byu pé ra-am gi, noqkuq yhûm má Poluq lé

myàng kômù, shiwa byu pé lé shuí gabyong luí, yhang lé chyup yû mù, garû taí kô é dang gi, ²⁸ "Israelaq byu pé ê, garúm yû keq, shí yuq gi, nga-nhûng byuhú lé le, jep é tarâ lé le, jowò shí lé le, shut shai é dông jowò hkingmó má é byù banshoq lé mhoqshit sù nghut ri. Hau htoq agó, noqkuq yhûm má Grik pé lé shuí háng é eq, chyoyúng jowò shí lé achag achyut kut é sù nghut ri." gâ akô. ²⁹ (Hkâsu mù gâ le, yhangmoq gi, Ehpesu myuq byû Trohpimu ga sù eq Poluq wà hkaú má rahá nghut kô é lé, myàng kômù, haú yuq lé noqkuq yhûm shut shuí háng nhô ngam pyám kô é yanmai nghut ri.)

³⁰ Rawà gón gabyông lo mù, shiwa byu pé lhinghkyuq mai din lé lô kôluí, Poluq lé chyup zing to uchyang, noqkuq yhûm shinggan shut she hkyut htoq lô akô. Haú hkûn jáng, hkingmó pé lé myhi pyám akô nghut ri. ³¹ Poluq lé yhangmoq sat râ dâ nyi kô é hkûn, Yerusalem wà gón gabyông nyi akô gâ é hkyô lé, Romaq dap up zaù é no má, lò jé ri. ³² Haú mù, yhang gi, radá dâm shô up gyezau ra-am eq gyezô pé lé shuí chûng mù, byù hpúng shut, din yán gyó lô akô. Yhangmoq gi, gyezau eq gyezô pé lé lhom myàng kôjáng, Poluq lé nhuq nyi é mai hkyîng byuq akô nghut ri.

³³ Haú hkûn, dap up zau hpó gi, Poluq chyáng é jé mù,

yang lé chyup yû luí, toqjâng tui í hkat eq tuí to nhang ri; hau htâng, yang ó yuq nghut é hkyô lé le, haí kut shut é hkyô lé le myí wú ri.

³⁴ Shiwa byu pé kúm gi, rayuq rajung ga garû bum akô. Haú mù, gyezau hpó gi, lûm garu kô é yanmai, têng é hkyô lé rago a wó sê yù jâng, Poluq lé gyewap má shuí ló nhang ri.

³⁵ Poluq gi, zumhtâng wang má jé lo é hkûn, byù moq mô lûm htim chyîn chyap lô kô é yanmai, gyezô pé gi, yang lé waq doq ló akô. ³⁶ Shiwa byu pé gi, "Yang lé sat pyâm keq." ga châng garû nyi akô nghut ri.

Poluq, Yhumsing Gùng Mara A Bo É Lé Taí Sân Kyô É Hkyô

³⁷ Gyezô pé gi, Poluq lé gyewap má shuí wàng râ za nghut é hkûn, Poluq gi, dap up zau hpó lé, "Ngò nàng lé dang wó nyô râ lú?" ga myi jâng, dap up zau hpó gi, "Nàng, Grik myíng dat mu lhê lú? ³⁸ Nàng gi, hí hkûn gum-lau kut mù, byù sat wún bang myi hkyíng lé, yoso shut shuí htoq ló é sù, Egutuq byû a nghut lú?" ga tau myí ri.

³⁹ Haú hkûn, Poluq gi, "Ngò gi, Kiliki mau Tarshu myuq mâ é Yudaq byû nghut lhê; ngò nyi é wà gi, wà chyap wà zo za a nghut, jeju mai, byù shí bang lé ngò dang taí râ ahkáng byi laq." ga dúng ri.

⁴⁰ Gyedap up zau hpó ahkáng byi jâng, Poluq gi, zumhtâng má yap to mù, shiwa byu pé shut loq he

ri. Haú hkûn, yangmoq lunglhang bang zim byuq kômù, Poluq, yangmoq lé Hebre myíng đông taí é gi,

22

¹ "Gumang wui eq îwa pé é, ahkuí, ngò mara a bô nghu taí é dang lé gyô wú shi keq." gâ ri.

² Yangmoq gi, yang Hebre myíng đông taí é dang lé wó gyô bùm kôjâng, gyai yang zim byuq bekô. Haú mù, Poluq xoq taí é gi, ³ "Ngò gi, Yudaq byù rayuq nghut lhê. Kiliki mau Tarshu myuq má choq hpyit kôlhang, wà mó shí má nyi kô lò sù nghut lhê. Ngò gi, nga-nhông íchí îwa pé é jep é tarâ lé, Gamalelaq é loq má jihkúm nuqguq mhoq yû luí, hkû-nyí lhê é nungmoq lunglhang bang su, Garai Gasang lé gyai myit zìng zuq é sù nghut lhê.

⁴ Ngò gi, shí Hkyô châng bang lé shí é jé shoq, zing-rî wú é sù eq, myiwe yuqgè ó yuq lé nghut kôlhang, chyup yû mù htóng má lhung pyâm wú bê sù nghut lhê. ⁵ Hkyangjong mó eq byìn tú wap suwún wui lunglhang bang gi, ngá é saksê pé nghut akô. Ngò gi, Damaskuq myuq má nyi é yangmoq é Yudaq gumang wui lé byi râ laiká yangmoq chyáng mai wó yu chûng luí, haú mâ é bang lé le Yerusalem wà mó má dam byi râ matú, chyup tuí ló râ nghû, Damaskuq myuq shut e é nghut lhê.

⁶ Nyigûng tú zó lé, ngò Damaskuq myuq shut sô

chyang ló nyi é hkûn, maubó gi, ngá é lêngkhyuq má mauhkûng mai byodàn tung duqbó to bê nghut ri. ⁷ Haú mù, ngò myigùng má lêng gop tô le, wó gyô kat é danghtê gi, 'Sholuq, Sholuq, nàng ngo lé haí mù zing-rî nyi lê lú?' gâ ri.

⁸ Ngò le, 'Yhumsîng ê, nàng ó nghut lê lú?' nghu myi kat jáng, 'Ngò gi, nàng zing-rî wún é sù, Nazaret wà byù Yesuq nghut lê.' ga luí, Yhang tú taí kat ri. ⁹ Ngò eq rahá e ló é bang kúm gi, maubó lé myàng kôlhang, ngo lé taí é danghtê lé a sê gyo kó nghut ri.

¹⁰ Dum, ngò gi, 'Yhumsîng ê, ngò haí kut ra râ lú?' nghu myi jáng, haú Yhumsîng gi, 'Toq mù, Damaskuq myuq má wang ló aq, nàng kut râ matú wò byi tô é hkyô pé lhunglhang, nang lé haú má lhom taí kyo berâ nghut lê.' ga ngo lé dum taí ri. ¹¹ Haú maubó é shingkâng é yanmai, ngò myoqjit byuq mù, ngá é byinzùm wui gi, Damaskuq myuq shut ngo lé loq mai she wang ló akô.

¹² Haú hkûn, Anani gâ é yuqgè rayuq ngá chyang lé huí ri. Yhang gi, jep é tarâ lé gyuq hkunggâ é eq, haú má nyi é Yudaq byù lhunglhang bâng é hí má myoqdong gyai wó é sù nghut ri. ¹³ Yhang gi, ngá nâm má yap to luí, 'Gumang Sholuq ê, nàng myoq myàng aq hkoi!' ga taí ri. Haú hkûn jáng yhang, yhang lé ngò wó myang kat bê nghut

lê.

¹⁴ Yhang dum xoq taí é gi, 'Nga-nhùng íchyí îwa pé é Garai Gasang gi, nang lé, Yhang ô nau é hkyô sé sháng gaq ga luí le; Dingmán Sù lé wó myàng luí, Yhâng é nhut mâ é mungdang lé wó gyo sháng gaq ga luí le, hkyin to bê nghut ri. ¹⁵ Haú mù, nàng gi, nàng myang é eq wó gyô yu é hkyô pé lé, byù lhunglhang bâng é hí má, Yhâng é matú saksé hkám byi râ su dut râ nghut lê. ¹⁶ Ahkuí, nàng haí lé lánng nyi ashí lú? Toq aq, Yhâng é myìng lé lang luí wui-myhup hkâm yu é eq, náng é yubak mara pé lé chí sân pyám aq.' gâ ri.

¹⁷ Hau htâng, ngò gi, Yerusalem wà mó má dum taú jé ló mù, noqkuq yhùm má kyû é dúng nyi le, moq byuq ló mù, ¹⁸ 'Nàng, ngá é hkyô lé saksé hkám râ dang lé, yhangmoq a lhom hap yù kó râ nghut é yanmai, Yerusalem wà mó mai hân htoq ló aq.' ga Yhumsîng ngo lé taí nyi é lé, myoqwup shing-rán dông myang ri.

¹⁹ Haú mù, ngò gi, 'Yhumsîng ê, tarajong ralhùm htâng ralhùm má nang lé lumjìng bang lé, htóng má chyup lhung pyám é eq, hkat bat lhing wún é hkyô lé, yhangmoq sê bum akô. ²⁰ Náng é saksé Stehpan sat hui luí suí shun u lé, ngò nàm má yhang yap to mù, haú hkyô lé myit bo hui luí, yhang lé sat pyám bâng é mebu lé zúng byí é nghut lê.' nghu tú taí bê.

21 Haú hkûn, Yhumsîng gi, 'Ê aq, ngò, nang lé, wê gânđ é tûngbaù pè chyáng nhang kat râ.' ga, ngo lé taí ri." gâ ri.

Poluq, Romaq Mingdán Byû Nghut É Hkyô

22 Shiwa byu pé gi, dang haú hkun jé za gyô yù kômù, "Shî sù é byù gi, myigùng htoq má nyi a gîng, sat pyám keq." ga, htê mó èq garû bum akô.

23 Yhangmoq gi, haú su garu uchyang, yhumsing buhîng lé hkyut dú pyâm lhê, hpuilhup lé mauhkûng shut kyaq tâng lhê, kut nyi kôjáng, 24 dap up zau hpó gi, Poluq lé gyewap má shuí hâng yù nhâng mù, yhang lé shiwa byu pé haí mù shî su ga garû bùm kô é hkyô lé wó sé shoq ga, nhuq bat nhâng luí, myí choq nhang ri. 25 Nhuq bat râ matú shokuq tuí eq tui kôjáng, Poluq gi, nàm má yap tô é shô up gyezau lé, "Romaq mingdán byû ru nghut sù lé nhîng, lháng a jéyáng shimá, nungmoq nhuq bat le gi, tarâ wang akô lhú?" ga taí ri.

26 Rashô up gyezau gi, dang haú lé wó gyo jáng, dap up zaù chyáng ló mù, "Nâng haí kut râ dâ nyi lhê lhú? Shî yuq gi, Romaq mingdán byû sheq ru nghut ri." ga luí, yhang lé ló taí kyô ri.

27 Haú mù, dap up zau gi, Poluq chyáng ê mù, "Nâng gi, Romaq mingdán byû nghut lhê lhú? Taí kyô wú laq." ga myí ri.

Poluq gi, "Ngò, Romaq mingdán byû nghut lhê." ga tû taí ri.

28 Haú hkûn, dap up zau hpó gi, "Ngò lháng ahpau myo myo byi pyám luí sheq, Romaq mingdán byû ru wó dut é nghut lhê." ga tû taí jáng, Poluq gi, "Ngò kúm gi, Romaq mingdán byû dut gû hku lé ló é sù nghut lhê." ga taí ri.

29 Yhang lé myí choq wú râ gâ é bang gi, haú hkûn jáng, yhâng chyáng mai huí zut ló bûm bekô. Gyedap up zau hpó le, Poluq gi, Romaq mingdán byû nghut é lé sé jáng, yhang lé tuí pyám bê nghut é yanmai, gyuq byuq bê nghut ri.

Yudaq Byìn Tú Wapdoq Suwún Wuí Gam Hkoq Byuq É Hkyô

30 Htang nyí, dap up zau hpó gi, Yudaq byu pé mai Poluq lé hun é mara haí nghut é hkyô lé hkyak wó sé shoq ga, Poluq lé tuí hpyi pyám byi mù, hkyangjong agyi pé eq Yudaq byìn tú wapdoq suwún wuí lhunglháng lé jì tsîng to luí, yhangmoq é gung gûng má Poluq lé shuí wàng mù, shap to bê nghut ri.

23

1 Haú hkûn, Poluq gi, Yudaq byìn tú wapdoq suwún wuí lé wú tsuq to mù, "Ngá gumang wuí ê, ngò gi, hkûnyí jé shoq Garai Gasâng é hí má sansêng é i-myt èq asak dui nyi bê nghut lhê." ga taí ri. 2 Haú mù luí, hkyangjong mó Anani gi, Poluq nâm má

yap to bang lé, yhang nhut má bat byi keq gâ ri. ³ Haú hkûn, Poluq gi, yhang lé, "But hpyu tô é xewâm* nàng ê, nàng lé sheq Garai Gasâng eq bat râ nghut lhê. Nàng gi, tarâ eq rajung za ngo lé jéyáng râ matú shî má zung to luî nhîng, haî mù tarâ eq shut shai é dông ngo lé bat nhang lhê lhú?" ga tâi ri.

⁴ Poluq nâm má yap tô é bang gi, yhang lé, "Nàng gi, Garai Gasâng é hkyangjong mó lé wám rhoi lhê lhú?" ga luî, chôm taî akô.

⁵ Poluq gi, "Gumang wui ê, yhang gi, hkyangjong mó nghut é lé ngò a sê pyám mù nghut bê. Chyúmdang má le, 'Náng amyû lé up é sù lé wó rhoi râ a nghut.'[☆] ga le kê tô é nghut lhê." ga tù taî ri.

⁶ Hau htâng, haú zîng tô é bang mâ é ra-am gi, Saduke pé, góbang gi, Hparishe pé nghut é lé, Poluq gi, sé jáng, Yudaq byîntú wapdoq suwún wui lé, "Gumang wui ê, ngò gi, Hparishe awut ashín mâ é, Hparishe rayuq nghut lhê. Shî bê bang dum dui toq lô râ hkyô lé myit myoqbyù é yanmai, ngò jéyáng é huî nyi ri." ga luî, garû taî kat ri.

⁷ Yhang haú su ga taî kat jáng, Hparishe pé eq Saduke pé gi, dang jet jet lhûm lò kômù, Yudaq byîntú wapdoq hpong gi, gam hkoq lô byuq bekô nghut ri. ⁸ (Hkâsu mù gâ le, Saduke pé gi, dum dui toq hkyô a joq; maumang lagyo

pé le, sobyo pé le, a nyi ga taî bum akô. Hparishe pé kúm gi, haú pé joq lhê ga, lumjîng bang nghut akô.)

⁹ Haú mù luî, gyai yhang taî garû bum akô. Haú hkûn, Hparishe hpúng mâ é tarâ sará pé ra-am gi, toq mù, "Shí yuq chyáng hai mara le, ngamoq a myàng nghut ri. Sobyô a nghut jáng, mau-mang lagyo rayuq yuq, yhang lé dang taî bê nghut jáng gi, hkâsu nghû kó râ lhú?" ga luî, zuq zuq taî htîng lhûm akô nghut ri. ¹⁰ Haú su kut gyai yhang taî htîng lhûm lò kôjáng, dap up zau hpó gi, Poluq lé lîng myha pyám kó râ lé chiq é yanmai, yhang-moq chyáng gyó ê mù, Poluq lé haú bâng é gung gûng mai ê lú shuí lò luî, gyewap má shuí wang ló râ matú, gyezô pé lé nhang kat ri.

¹¹ Haú myîn, Yhumsîng gi, Poluq é nâm má yap to luî, "Hkâgyuq, Yerusalem wà mó má nàng ngá é hkyô lé saksé hkám bê eq rajung za, Romaq myuq má le saksé hkám ra shirâ nghut lhê." ga, yhang lé taî ri.

Poluq Lé Sat Râ Haq Dâ É Hkyô

¹² Htâng napkyó, Yudaq byu pé gi, Poluq lé sat râ hpaqchyî chôm da kômù, yhang lé a wó sat sat gi, a zo a shuq râ nghut lhê ga, ó le ó dakam yu akô nghut ri.

¹³ Hpaqchyî shî lé chôm dâ é bang gi, myi xê yuq chyân

* 23:3 But hpyu tô é xewâm gâ é gi, gegùn labyoq kut bang lé gâ lhê. ☆ 23:5 Htoq Lô 22:28

nghut bum akô. ¹⁴Yhangmoq gi, hkyangjong agyi pé eq suwún wui chyáng ê kômù, "Poluq lé a wó sat sat gi, ngamoq haí le a zo nghù, chôm dakam yu to bê nghut lhê. ¹⁵Hau é yanmai, ahkuí nungmoq gi, Yudaq byìn tú wapdoq suwún wui eq rahá kut luí, Poluq é hkyô lé rago za myí gon wú râ nghu mhaú é dông, yhang lé nungmoq chyáng wut yú râ matú, dap up zaú chyáng dúng kat keq. Háu hkûn, ngamoq gi, hkyolat má yhang lé lhom sat pyám râ rì rì kut to râ nghut lhê." ga taí akô.

¹⁶Nghut kôlhang, hau lhom haq sat kó râ gâ é hkyô lé, Poluq é yhâng nhammó é yhangzo yuqgè zo wó gyô yú luí, yhang gi, gyewap má wang ê mù, Poluq lé é taí kyô ri.

¹⁷Háu hkûn, Poluq gi, shô up gyezau rayuq lé ji yú mù, "Zorâm shí lé dap up zaú chyáng shuí ê aq, yhang, yhang lé shit kyo râ hkyô rajung joq lhê ga." ga taí ri. ¹⁸Háu mù luí, shô up gyezau hpó gi, zorâm hau lé dap up zaú chyáng shuí ê mù, "Zorâm shí nang lé shit kyo râ hkyô rajung joq lhê gâ ri ga, yhang lé náng chyáng shuí lé râ matú, htóng byú Poluq gi, ngo lé ji yú mù taí ri." ga, yhang lé taí ri.

¹⁹Háu jáng, dap up zau hpó gi, jauwò má zorâm hau lé yhâng loq mai she ê mù, "Nàng ngo lé haí jung shit kyó

nau ri lú?" ga, yhang lé baú tsik za myí ri.

²⁰Háu hkûn, zorâm hau gi, "Yudaq byu pé gi, Poluq lé rago za saí myí wú râ su kut mhaú mù, napmá, Yudaq byìn tú wapdoq má shuí yú râ matú, náng chyáng dung kó râ ga, myit chôm huí to bekô nghut ri. ²¹Háu mù luí, yhangmoq ô nau é dông hkâgyo byi, hkâsu mù gâ le, Poluq lé a wó sat sat gi, haí le a zo a shuq râ nghut lhê ga, byú myi xê yuq chyân yhang, ó le ó dakam yú bekô nghut ri. Háu bang gi, yhang lé lhom chyup yú râ matú haq lhom to lánq kó râ nghut lhê. Ahkuí lháng, yhangmoq gi, mù hau kut râ matú rì rì nghut bùm bekô; náng é ahkáng lé za lánq nyi bum akô nghut ri." ga shit kyô ri.

²²Háu hkûn, dap up zau hpó gi, zorâm hau lé, "Nàng, ngo lé shí hkyô shit kyo bê hkyô lé, ó yuq lé le hkâtaí kyo." ga, sidiq byi mù, taú nhang kat bê nghut ri.

Mingzau Hpilik Chyáng Poluq Lé Dé Kat É Hkyô

²³Hau htâng, yhang gi, shô up gyezau í yuq lé ji yú mù, "Hkû-myîn sum hkyíng† má Kesare wà mó shut ê râ matú, gyezô pé í shô, myang ji bang nyhit xê, lhâm chùng bang í shô kut mù, rì rì hen to keq. ²⁴Hau htoq agó, Poluq lé mingzau Hpilik chyáng ngón za wó dé kat râ matú, yhang ji râ myang pé le lajang byi

† 23:23 Myín sum hkyíng gi, nga-nhùng é myín gau hkyíng nghut lhê.

keq." ga, yangnhik lé pying kat ri.

²⁵ Laiká hun kat é le:

²⁶ "Aróng wó dik é mauzau Hpilik ê, ngò Klodi Lusi gi, nguingón danglù shit kyô kat lhê.

²⁷ Shí yuq lé gi, Yudaq byu pê eq chyup yû mù sat pyám râ dâ nyi bekô za nghut lhê. Nghut kôlhang, ngò gi, gyezô pé eq rahá ê wú le, yang Romaq mingdán byû nghut é lé wó sê yu é yanmai, yangmoq chyáng mai yang lé hkyi lo é nghut lhê. ²⁸ Haû su mù, haû mù yang lé mara hûn kô é hkyô lé sé nau é yanmai, yangmoq é Yudaq byìn tú wapdoq má yang lé shuí jé byi wú bê nghut lhê. ²⁹ Haû hkûn, yangmoq é tarâ hkyô eq séng luî za mara hun bùm kô é lé ngò myang ri. Nghut kôlhang, shî gíng é eq htóng lhúng gíng é mara haû le a bò nghut ri. ³⁰ Shí yuq lé sat pyám râ hpaqchyí da kô é hkyô, ngo lé shit kyo kô é hkûn, radá dâm, yang lé ngò náng chyáng dé nhang kat bê. Yang lé mara hûn nau é bang lé gi, nang hí má yang hun lhum keq nghû pying kat bê nghut lhê." ga ri.

³¹ Haû mù luî, gyezô pé gi, haû pying kat é dang eq rajung za, myín lé yang, Antipatri và mó jé shoq Poluq lé dé kat bekô nghut ri. ³² Htang nyí, myang ji bang lé ê châng dé nhâng kômù, yangmoq gi, gyewap shut dum taû lò

bekô nghut ri. ³³ Myang ji é gyezô pé gi, Kesare và mó má jé kô é hkûn, mauzau hpó lé laiká byi mù, Poluq lé le jâng ap byi akô nghut ri. ³⁴ Haû hkûn, mauzau hpó gi, laiká haû lé ban nghap jâng, Poluq hká mau má é byû nghut é hkyô lé myi wú luî, Kiliki mau má é byû nghut é lé sé jâng, ³⁵ "Nang lé mara hûn bang jé jâng sheq, náng mù lé ngò gôn wú râ." ga taí ri. Hau htâng, yang gi, Poluq lé Herut é hkohkâm-wâng má byam zúng byi keq ga hkunmó hkyô tô ri.

24

Poluq, Mara Hûn Huî É Hkyô

¹ Hau htâng, ngo nyí lai jâng, hkyangjong mó Anani gi, suwún wuî ra-am eq tarâ sé sù Tertulu lé shuí gyó ló mù, mauzau hpô hí má Poluq lé mara lé taí hun bum akô, ² Haû hkûn, Poluq lé hí má ji hâng tô é nghut mù, Tertulu, yang lé mara hûn dang taí hi é gi, "Aróng wó dik é Hpilik ê, ngamoq gi, nyi-ngón yuqyo é hkyô lé nang é yanmai gyai myáng shoq wó hkam yu bum é nghut lhê. Nang sê up sê hkgang é jeju lé, byû myû shí wó hkâm zô nyi é yanmai, ³ ngamoq gi, haû lé hkyô hkat hkgangmó eq jowò hkgangmó má jeju bûn é myit eq hkam yu nyi bê nghut lhê. ⁴ Nghut kôlhang, ngò nang lé lhoq hkyik é dông a dut sháng gaq, taí râ dang ratot zo lé,

myit hîng hîng to mù gyo byi
laq nghû dúng tôngbán lhê ô!

⁵ Shí yuq gi, byù lé gunjang
sû, mingkan gón mâ é Yu-
daq byu pé lhunglhang lé shuí
gabyong sû eq, haû Nazaret
hpúng mâ é hkyô-u shê sû
nghut é lé, ngamoq myang ri.
⁶ Hau htoq agó, yhang gi, no-
qkuq yhûm lé achau achyut
kut râ dô nyi luí, yhang lé
ngamoq chyup yù mù, (ng-
amoq é tarâ dông jéyáng râ
hen nyi é hkûn, ⁷ dap up zau
Lusi gi, lé lô mù, ngamoq é
loq mai yhang lé lé lú shuí
yù luí, yhang lé mara hûn
bang lé, náng chyáng jé keq
ga hkunmó hkyô tô é nghut
lhê.) ⁸ Haû mù, náng, yhang lé
myí wú jáng, ngamoq yhang
lé hun é mara banshoq têng é
hkyô lé, náng wó sé râ nghut
lhê." gâ ri.

⁹ Yudaq byu pé le, haú pé
gi, têng lhê ga bo chôm tai akô
nghut ri.

Poluq, Mara A Bò É Lé Tai Hung É Hkyô

¹⁰ Mingzau hpó gi, Poluq lé
dang tai râ dông loq lik kat
jáng, Poluq tai é gi, "Zau ê, shí
mau bâng é ahtoq má, náng
zanwut myo myo jéyáng byí
nyi é hkyô lé, ngò sé é yanmai,
ngò gabú myit èq yhumsing
matú, mara a bo é hkyô tai
bá. ¹¹ Ngò, Yerusalem wà mó
má noqkuq râ matú doq e
é buinyi raxe í nyí lhang a
chyân shi é gi, náng lui za wó
sé râ nghut lhê. ¹² Noqkuq
yhûm má ngò ó yuq eq tai

htîng lhûm é lé lhang, tara-
jong, a nghut jáng, wà hkaû
hka jowò má le byu pé lé shuí
gabyông é lé lhang, ngo lé
mara hun é bang gi, a myàng
kó. ¹³ Ahkuí, ngo lé yhang-
moq hun é mara pé lé, náng
hí má yhangmoq saksé lhang
a wó tûn shit kó nghut ri.
¹⁴ Nghut kôlhang, náng hí má
ngò yín yû râ hkyô rahkat
gi, yhangmoq èq shut shaí
hkyô ga myhîng tô é Hkyô
lé cháng luí, ngamoq é îchýí
îwâ pé é Garai Gasang lé no-
qkuq nyi lhê. Jep é tarâ eq
myiqhtoi laiká pé má kê tô é
lhunglhang lé le lumjîng lhê.
¹⁵ Ngò gi, dingmán é bang eq a
dingmán bâng é dum dui toq
lô râ hkyô joq é lé, yhangmoq
eq rajung za Garai Gasang
má myit myoqbyu nyi é sû
nghut lhê. ¹⁶ Haû mù luí,
Garai Gasang eq byu é hí má,
ngò gi, râ é hkyô a bo é za,
myit é hkyô san za wó dut nyi
shoq, shikut nyi lhê.

¹⁷ Zanwut tsómra lai é htâng
má, ngò gi, ngá é byù myû mâ
é myûng bang lé chyunghuq
byi râ eq alu kat râ matú,
Yerusalem wà mó shut ló jé
bê nghut lhê. ¹⁸ Haû su kut
nyi é hkûn, ngò eq rahá hai
byù moq mó le a nyi, hai
jung gabyông é hkyô le a htoq,
ngò noqkuq yhûm má lhoq
san lhoq yung yû bê hkyô
lé za, yhangmoq myang akô.
¹⁹ Nghut kôlhang, Asia mau
mâ é Yudaq byù ra-am gi,
haú má nyi tô é nghut lhê;
yhangmoq mai ngo lé mara
hûn râ hkyô joq kô é nghut

le gi, shî náng é hí má yhang-moq lé jé kó ra nghut lhê. ²⁰⁻²¹ Haú a nghut jáng, shî má nyi tô é bang gi, ngò Yudaq byìn tú wapdoq hí má yap to mù, 'Shi byuq bâng é dum dui toq râ hkyô é yanmai, hkû-nyí nungmoq ngo lé jéyáng nyi akô.' nghû luí, garû é dang hkûn mai lai luí, ngò má gotû mara myàng shi kô é nghut le gi, yhangmoq yhang taí kyo kó sháng gaq." gâ ri.

²² Hpilik gi, Hkyô haú lé rago sê lhê nghut mù, "Gyedap up zau Lusi jé jáng sheq, ngò, nungmoq é mù lé doqdan byi râ nghut lhê." ga luí, yhangmoq lé ahkýng htot kat byí ri. ²³ Poluq lé le, zúng za zúng to mù, yhâng é buinùm ji-myi wui mai yhang ra châ é hkyô lajang byi naú kô é bang nyi le gi, ahkáng byi keq ga luí, shô up gyezau lé hkunmó hkyô kat ri.

²⁴ Buinyì rayoq zo lai é htâng má, Hpilik gi, Yudaq myiwe myhí nghut é sù yhangmyi Drusila eq jé lé mù, Poluq lé ji lò nhâng luí, yhang, Hkrisduq Yesuq lé lumjíng hkyô taí kyô é le gyô yu ri. ²⁵ Poluq gi, dingmán hkyô, yhumsing gùng lé hkang é hkyô eq, jé lô râ tarâ dara hkyô lé mhoqshít jáng, Hpilik gi, gyô gyuq mù, "Nàng ahkuí wó ló bê, ngò jìn jáng sheq nang lé dum ji yù râ nghut lhê." ga taí ri. ²⁶ Hpilik kúm gi, Poluq eq ngùn haq byi râ lé myit myoqbyù mù, yhang lé anum num ji yù luí, yhang eq nyo lhum lhum kut ri.

²⁷ Zanwut í zân lai jáng, Hpilik é mauzau ayá má Porku Hpestu lé htaí kat pyâm akô. Nghut kôhlang, Hpilik gi, Yudaq byu pé é hí má myoqdong wó nau é yanmai, Poluq lé htóng má jáng lhùng pyâm to bê nghut ri.

25

Poluq, Kehtaq Chyáng Jé Râ Matú Dúng È Hkyô

¹ Hpestu gi, haú mau má jé é sum nyí lai jáng, Kesare wà mó mai Yerusalem wà mó shut doq ló ri. ² Haú hkûn, hkyangjong agyi pé eq Yudaq byù hkyô-u shê bang gi, yhang lé Poluq é hkyô lé hkyang lhom shit kômù, ³ yhangmoq gi, Poluq lé hkyolat má lhom haq sat pyám râ dâ to kômù luí, jeju ralhum kut byí é dông Poluq lé Yerusalem wà mó shut dé kat byi râ matú, Hpestu lé lhom dúng akô. ⁴ Nghut kôhlang, Hpestu gi, "Poluq lé Kesare wà mó má sheq ru lhùng tô lhê, hkâ-myháng a myáng má, ngò yhang le haú má dum taú ló râ nghut lhê. ⁵ Haú mù, nungmoq mâ é hkyô-u shê bang ra-am, ngò eq rahá gyó ló mù, haú yuq kut shut é hkyô bo é nghut jáng gi, yhang lé mara lé hùn kó sháng gaq." ga tû taí ri.

⁶ Hau htâng, yhang gi, shit nyi, raxê nyí kô yhangmoq chyáng nyi yù luí, Kesare wà mó má taú ló mù, htang nyí gi, tarâ tanghkuq má zùng luí, Poluq lé yhâng hí má shuí wang lò râ matú hkunmó

hkyô kat ri. ⁷ Poluq jé jáng, Yerusalem wà mó mai gyó lo é Yudaq byu pé gi, yhâng é lêngghkyuq má yap to kôluí, saksé a wó tûn shit é mara mó myo myo lé, yhâng é ahtoq má chôm taí hun akô nghut ri.

⁸ Haú hkûn, Poluq gi, "Yudaq byu pê é jep é tarâ eq shai é đông le, noqkuq yhâm lé shut é đông le, Kehta^{*}q lé shut é đông le, ngò a kut wú." ga luí, mara a bo é hkyô taí ri.

⁹ Nghut kôlhang, Hpestu gi, Yudaq byu pê é hí má myoq-dong wó naú mù, Poluq lé, "Nàng, Yerusalem wà mó má doq ló luí, shí hkyô pé lé ngò haú má doqdan byi râ matú, nàng dóng lêng lú?" ga myí ri.

¹⁰ Poluq kúm gi, "Ngò gi, doqdan hui râ nghut jáng, shí doqdan é jowò, Kehta^q é tarâ hpyit wap má ahkuí yap to bê nghut lêng. Nàng sê é eq rajung za, ngò gi, Yudaq byu pé lé haí lêng a shut wú sù nghut lêng. ¹¹ Laq má mù, shí gíng é mara lé, ngò kut shut pyâm é nghut le gi, shí hkám râ hkyô lé ngò a he pyám; nghut kôlhang, shí Yudaq byu pé mai ngo lé mara hun é hkyô a teng é nghut jáng gi, ó yuq lêng ngo lé yhangmoq é loq má ap byi râ ahkáng wó râ a nghut, ngò gi, Kehta^q chyáng wang taí râ nghut lêng." ga tû taí ri.

¹² Haú hkûn, Hpestu gi, yhâng é byin tú wap bang eq ban hpyê lhum jáng, "Nàng Kehta^q chyáng wang taí râ ga

bê nghut lêng, Kehta^q chyáng wang ló aq hkoí!" ga taí kat ri.

Poluq Lé, Hkôhkâm Agripa Hí Má Shuí Hâng Yu É Hkyô

¹³ Hau htâng, buinyì hkâ-myháng a myáng má, Hkôhkâm Agripa eq yhanggu myiwe zo Bernike gi, Kesare wà mó má jé lé mù, Hpestu lé lé huí nyo akô nghut ri. ¹⁴ Haú mù, yhangnhik tâng gi, buinyì tsómra myáng nyi nyi é htâng má sheq, Hpestu gi, haú Poluq é hkyô lé hkôhkâm wa eq taí kyô lêng é gi, "Hpilik, lêng to lêng é htóng byû rayuq nyi ri. ¹⁵ Ngò Yerusalem wà mó má nyi tô é hkûn, hkyangjong agyi pé eq Yudaq byu pê é suwún wuí gi, haú yuq é hkyô lé taí kyo kôluí, haú yuq lé mara byi râ matú ngo lé chôm dúng akô.

¹⁶ Haú hkûn, ngò gi, mara hun é hui sù, mara hun é bang eq chyung chyoy yoy kut luí, yhangmoq hun é mara lé yhumsing matú mara a bo é hkyô a wó taí shi lé, ó yuq lé ap byi pyám râ le, Romaq htung a joq ngú luí yhangmoq lé taí kyo bê nghut lêng. ¹⁷ Yhangmoq ngá htâng châng gyó lô kô é hkûn, ngò gi, a nô yu é za, htang nyí jáng tarâ tanghkuq má zùng luí, haú yuq lé shuí wang ló râ matú hkunmó hkyô kat é. ¹⁸ Haú hkûn, haú yuq lé yhangmoq mara chôm hun bùm kôle, ngò myit ngàm tô é su mara ralhum le a hun htoq lô kó nghut ri. ¹⁹ Yhangmoq

* 25:8 Kehta^q gâ é gi, "hkoséng" gâ é nghut lêng.

é noqkuq htông hkyô eq, haú dui nyi ri ga Poluq eq taí é, shi byuq bê Yesuq é hkyô lé za dang jet jet lhùm bum akô. ²⁰ Haú mù, ngò gi, haú hkyô lé hká dông gon yù râ le a sé lô é yanmai, haú hkyô lé Yerusalem wà mó má doqdân é ló hkam yù râ matú, yhang dóng a dóng é hkyô lé myí wú le, ²¹ Poluq yhang sheq, Hkoséng mó chyáng jé râ ga taí é yanmai, Kehtaq chyáng a dé kat shi é u lé, yhang lé zúng nyí shirâ matú, ngò hkunmó hkyô kat é nghut lhê." gâ ri.

²² Haú hkûn, Agripa gi, "Ngò le haú yuq é dang gyô wú nau ri." ga, Hpestu lé taí jáng, yhang gi, "Napmá, nàng wó myang gyo râ nghut lhê." ga tú taí ri.

²³ Htông nyí, Agripa eq Bernike nhiktâng gi, shing kang bò bò za lé lô mù, dap up zau wuî eq wà mâ é agyì suwún wuî eq rahá, rûng gok mó má wang zung tô bùm kô é hkûn, Hpestu hkunmó hkyô kat jáng, Poluq lé shuí hâng tô akô. ²⁴ Haú hkûn, Hpestu taí é gi, "Hkohlâm Agripa eq ahkuí shí má zup zing tô é lhunglhâng bang ê, Yerusalem wà mó eq shí wà mâ é Yudaq byu pé banshoq bang, ngá chyáng lé taí kôluí, shí yuq lé asak a wó duì nhang to lo ga garû bùm é gi, ahkuí nungmoq myang é shí yuq yhang nghut bê. ²⁵ Nghut kôlhâng, shí yuq zui saí é má shí gíng é mara haí lé lhang ngò a myàng nghut ri. Yhang gi, Hkoséng chyáng wâng râ ga

taí é yanmai, yhang lé Romaq myuq shut dé kat râ matú ngò myit hpyit to bê. ²⁶ Dé kat bá nghù jáng le, ngá é yhumsing Hkoséng chyáng yhang é hkyô jihkúm nuqguq kâ hun kat râ haí le a bò nghut ri. Haú mù luí, yhang lé ban myí gôn wú jáng sheq, ká râ hkyô rajung jung hkálhâng ngò myàng abe nghù, nungmoq banshoq bâng é hí má le, je riyhang nàng Hkohlâm Agripa é hí má le, yhang lé ngò lhoq htoq shit é nghut lhê. ²⁷ Hkâsu mù gâ le, htông byú rayuq yuq lé dé kat é hkûn, yhang lé hun é mara a wó tûn shit lé gi, a htuk nghù luí, ngò myit lhê." gâ ri.

26

Poluq É Hí Hpyang Lhê É Nyi Yap Hkyô

¹ Haú hkûn, Agripa gi, Poluq lé, "Nàng, nàng matú dang tai râ ahkáng wó bê." ga taí ri.

Haú mù luí, Poluq loq tú kat mù mara a bo é hkyô taí é gi, ²⁻³ "Hkohlâm Agripa ê, nàng gi, Yudaq byu pé é htunghking banshoq eq taí htíng lhùm é hkyô hkat hkangmó lé, gyai sê to sú nghut é yanmai, Yudaq byu pé ngo lé hun é mara hkat hkangmó lé, ngò hkû-nyí nàng é hí má mara a bò é hkyô myang taí é gi, ngá matú gabú hpo yhang nghut ri nghù myit yu nyi lhê; haú mù luí, ngá dang lé myit hing é eq gyô yù byi laq nghù, dúng tôngbán kat lhê.

⁴Ngò gi, zoshâng hkûn mai, ngá amyû má le, Yerusalem wà mó má le, hkâsu kut nyi kô lo é hkyô lé, Yudaq byu pé lhunglhang bang gi, sé gû nghut akô. ⁵Yhangmoq gi, ngo lé hí hkûn mai sé kô é yanmai, ngò, ngamoq é noqkuq htûng mâ é tarâ htan dik é hpúng má bo é Hparishe rayuq nghut é hkyô lé, saksé hkâm naû kô é nghut jáng, yhangmoq wó hkâm lhê. ⁶Nghut kôlhang, doqdân é hui zo rà matú, ahkuî ngò shî má yap tô é gi, Garai Gasang eq ngamoq é íchýí îwa pé lé byí tô é danggidíq lé myit myoqbyù nyi é yanmai nghut lhê. ⁷Ngamoq é byù myû raxe í hú gi, danggidíq jeju haû lé wó hkâm yù shoq ga, Garai Gasang lé nyí myín noqkuq dojaú shikut nyi bum akô; Hkohkâm wa ê, myit myoqbyù hkyô hau é yanmai, ngo lé Yudaq byu pé mara hun bum akô nghut ri. ⁸Garai Gasang gi, shî bê bang lé dum lhoq tui lhê gâ é hkyô lé, a wó lûm nghû, haî mù myit yu akô lhú?

⁹Ngò le, Nazaret wà byù Yesuq é mying eq shai lhum é dông myo myo wó kut rà nghut lhê nghû, gè gè yhang myit yu wú bê nghut lhê. ¹⁰Gè gè haû dông le Yerusalem wà mó má kut wú bê nghut lhê; hkyangjong agyi pé chyáng mâ é ahkáng wó yû luí, ngò gi, sân-yúng bang myo myo lé htóng má kat pyâm é eq, yhangmoq sat hui kôjáng le, ngò myit bo huí

wú bê nghut lhê. ¹¹Ngò gi, tarajong banshoq má a lhung lhung yhangmoq lé dam byi luí, Yesuq lé rhoi dang tái kó shoq shikut wú bê nghut lhê; nhik mó góng yo luí, gó mau mâ é wà pé lhang jé shoq, yhangmoq lé châng zing-rí wú bê nghut lhê.

Poluq Hpúng Byû Dut Lo É Hkyô

¹²Haû hkûn, radàm lé, ngò gi, hkyangjong agyi pé chyáng mai ahko ahkáng eq hkunmó lé yu chùng mù, Damaskuq myuq shut e ló nyi le, ¹³Hkohkâm wa ê, nyigùng tu ló zó lé, bui htoq má je duq é maubó gi, haû hkyô má, ngò eq ngá é luzúm wui é lhunglhyuq má, mauhkung mai duq bó htoq lo é lé myang ri. ¹⁴Haû hkûn, ngamoq banshoq bang myigùng má lêng gop tô bum le, Hebre mying dông, 'Sholuq, Sholuq, nang, ngo lé haî mù zing-rí nyi lhê lhú? Zuchûn lé pik le gi, nang é matú gyai yhang wui lhê.' ga luí, ngo lé taí é danghtê lé ngò wó gyô kat ri.

¹⁵Haû mù, ngò gi, 'Yhumsing ê, nang gi, ó yuq nghut lhê lhú?' nghû luí, myi jáng, haû Yhumsing tù tái é gi, 'Nang zing-rí nyi é Yesuq nghut lhê. ¹⁶Ahkuî toq yap aq, hkâsu mù gâ le, ahkuî, nang, ngo lé myàng bê hkyô eq, ngò, nang lé tân shit shirâ nghut é hkyô pé é matú, ngá é mù wùn rà byù eq saksé dut nhâng rà dông nang lé hkyin to rà nghû, ngò nang chyáng lé htoq shit é nghut

lê. ¹⁷ Náng é amyû pê é loq mai le, tungbaù pê é loq mai le, ngò, nang lé hkyi yù nyi râ nghut lê. ¹⁸ Yhangmoq, yubak hkyut pyám byí é jeju wó yû râ eq, ngo lé lumjǐng é yanmai, lhoq sân-yúng huí é bang eq rahá silí wunlí wó hkam yù kó sháng gaq nghû, yhangmoq é myoq lhoq hpóng byi mù, mauchut hkaù mai maubó shut, Tsadán é a-tsam hkaù mai Garai Gasâng shut yhangmoq lhing ló râ matú, ngò, nang lé yhangmoq chyáng nhang kat râ nghut lê.' gâ ri.

Poluq Kut É Muzó Hkyô

¹⁹ Haù mù luí, hkohkâm Agripa ê, ngò gi, mauhkûng mâ é myoqwup shing-rán haù lé a gyô é a wó é nyí nghut lê. ²⁰ Ngò gi, yhangmoq myit lhing luí, Garai Gasang shut lhing taù lò mù, myit lhing bê hkyô lé, hkyi zó loq zó đông mai tân shit kó sháng gaq nghû, sân-hi má Damaskuq myuq má nyi é bâng chyáng mai hí luí, Yerusalem wà mó mâ é bâng chyáng má le, Yuda mau gón má é bâng chyáng má le, tungbaù pê chyáng má le, hkò kyo bê nghut lê. ²¹ Hau é yanmai, Yudaq byu pé gi, ngo lé noqkuq yhúm má chyup yû luí, sat pyám râ da kô é nghut lê. ²² Nghut kôhang, ngò gi, hkû-nyí jé shoq Garai Gasâng èq garúm é lé wó yû luí, ahkuí shí má yap to mù, tiq ko banshoq bang lé saksé wó hkâm kyô é nghut lê. ²³ Ngò taí é má, Hkrisduq gi, hpuzo luí, shí bê

bang mai sân-hi dui toq lò mù, Yhâng é amyû eq tungbaù amyû pé lé maubó é hkyô lé wó taí kyo râ nghut lê ga luí, dut lò râ hkyô lé, myiqhtoí pé eq Mosheq taí tô é hkyô mai lai luí, ngò gotú haí le a taí é nghut lê." gâ ri.

²⁴ Yhang haù su ga mara a bo é hkyô taí é lé, Hpestu gi, "Poluq ê, nang na bê! Lúm mhoq myô yu é yanmai na bê nghut ri." ga luí, htê mó eq dang lat taí hpyit kat ri.

²⁵ Poluq kúm gi, "Aróng wó dik é Hpestu ê, ngò gi, nâ é a nghut, ngò taí é dang gi, tengmán é dang eq dang gyíng nghut lê. ²⁶ Shí hkyô lé hkohkâm wa yhang le sê to gù nghut lê mù, yhâng é hí má ngò a gyuq a kyum taí é nghut lê. Hkâsu mù gâ le, shí hkyô gi, nungwò má kut é a nghut é yanmai, hkohkâm wa yhang a bo sê é gi, haí le a joq ra nghut lê nghû, ngò myit lum nyi lê. ²⁷ Hkohkâm Agripa ê, nang gi, myiqhtoí pê é dang lé lumjǐng lê lú? Nang lumjǐng é hkyô lé ngò sê lê." ga tû taí ri.

²⁸ Haù hkûn, Agripa gi, Poluq lé, "Razup za má, nang, ngo lé Hkristan rayuq wó dut nhâng nhô ngam ri lú?" ga taí ri.

²⁹ Dum Poluq gi, "Razup za má nghut nghut, myáng myáng má nghut nghut, shí shamtoq-tui pé mai lai luí, nang za a nghut, hkû-nyí ngò taí é dang lé gyô nyi é lhunglhang bang, ngò su dut râ matú, ngò gi, Garai Gasang

lé kyûdûng nyi lê." ga tû tai ri.

³⁰ Haú hkûn, hkohkâm wa gi, ginwáng zau hpó eq Bernike le mù, haú má zùng tô é bang eq rahá toq yap ri. ³¹ Yhangmoq htoq ló kô é hkûn, "Shí yuq gi, sat gíng é mara eq htóng lhúng gíng é mara haí le a kut shut nghut ri." ga, rayuq eq rayuq tai lhum bum akô nghut ri.

³² Agripa gi, Hpestu lé, "Shí yuq gi, yhang mai Kehtaq chyáng jé râ ga a tai tô é nghut le gi, yhang lé wó nhang pyám berâ nghut lê." ga tai ri.

27

Poluq, Romaq Myuq Shut Wui-sanghpo Mai E Ló É Hkyô

¹ Ahkuí, ngamoq lé Itali ming shut wui-sanghpo mai gû dap ló nhâng râ matú myit hpyit to kôluí, yhangmoq gi, Poluq eq htongbyû góbang ram lé, Augustuq Hkosêng é gyewap mó mâ é, Yuliu gâ é shô up gyezaú é loq má ap byí kat akô. ² Haú hkûn, Asia mau mâ é wuimau gin-gau cháng luí wà pé má wang jón ló é, Adramuti myuq mai toq é wui-sanghpo má ngamoq wang ji bê nghut lê. Htesaloni wà mó mâ é Aristakuq gâ é Makedoni byù rayuq le ngamoq eq rahá nghut lê.

³ Htang nyí, ngamoq gi, Sidun myuq má no bê nghut lê. Yuliu gi, Poluq lé shogyo mù, yhâng chyáng râ é hkyô lé yhâng é buinùm wui mai lhom lajang byi kó sháng gaq

ga, yhangmoq eq é hui râ matú ahkáng byí kat ri. ⁴ Haú mai dum toq ló é hkûn, lai tau mut é yanmai, Kupru zinlóng lé lai hkaú uchyang jî lai ló mù, ⁵ Kiliki eq Pamhpuli mau mâ é wuimau dông lai byit ló le, Laiki mau mâ é Mura myuq má jé bê nghut lê. ⁶ Haú má, shô up gyezau hpó gi, Itali ming shut dap e ló é, Alesandru myuq mâ é wui-sanghpo lé myang hkyup luí, ngamoq lé haú má ji nhâng bê nghut ri. ⁷ Haú mai buinyi myo myo yhó yhó lé za jî e ló luí, awui ahke yhang Kidu wà mó eq ang má wó jé ló jáng, lai tau mut é yanmai, hí shut a wó lai ló lo mù, ngamoq gi, lai lé cháng luí, Kreti zinlóng lé lai hkaú mù, Salamone kongzô é tû tap âng é mai lai ló é nghut lê. ⁸ Haú mâ é wuiyàm mai awui ahke ji ló lé, Lasea wà eq a wê lhùm é Yuqyo é Guhkan gâ é jowò má jé ri.

⁹ Ahkuí, buinyi tsómra lhoq lhai pyám luí, haú Zoshuq gám poi lai bê nghut é yanmai, wui-sanghpo mai sô wún le gi, gyuq chiq râ nám jé bê nghut ri. Haú mù, yhangmoq lé Poluq tai pun tai kyíng é gi, ¹⁰ "Âhkaú pé ê, shí dâm lê é wui hkyô gi, wuihke mó hui luí, wui-sanghpo eq zè pé sùm pyám râ htoq agó, nga-nhùng é asak lhang sum râ dut é hkyô lé, ngò byu myang ri." gâ ri. ¹¹ Nghut kôlhang, shô up gyezau hpó gi, Poluq é dang lé gyo râ malaí, wui-sanghpo hkàng sù eq wui-

sanghpo yhumsing é dang lé, je lum ri. ¹² Guhkan haû gi, gyoqmyò* wó lhoq hai râ su a dut é yanmai, myo hpyang gi, Hponik guhkan má wó jé le jé mù, haû má gyoqmyò ló nyi hai râ matú chôm myit huî akô. Guhkan haû gi, Kreti zinlóng má maupyî buiwàng hkyam eq mautsûng buiwàng hkyam shut hu tô é jowò nghut ri.

Wuimau Má, Laidun Mó Htûng Huî É Hkyô

¹³ Maupyî shut mâ é lai yhó le hik lô jáng, yhangmoq myit tô é má hkyak nghut bê su ngam pyám kôluî, shamtoq goknghe lé lhoq toq yû kômù, Kreti zinlóng yâm dông jì e ló bê nghut lhê. ¹⁴ Nghut kôlhang, hkâ-myháng a myáng má, Buihtoq mautsûng lai gâ é laidun mó gi, haû zinlóng mai mut lò luî, ¹⁵ wui-sanghpo lé lo mut htûng é yanmai, hí shut a wó ló lo jáng, ngamoq gi, lai mut ló é shut châng yông ló bê nghut lhê. ¹⁶ Ngamoq gi, Koda gâ é zinlóng zo lé lai hkaû uchang yông ló nyi é hkûn, haû sakhkyîlhaî lé gyai shikut é èq wó lêng yù luî, ¹⁷ wui-sanghpo ahtoq má lêng toq to bê. Wui-sanghpo lé gi, a byoq lo shoq tuî èq tuî kîng to bê nghut lhê. Dum, yhangmoq gi, Surti gâ é semuî bùm má ló kê gyâm to râ lé chiq kô é yanmai, wui-sanghpo mâ é panlong pé lé lhoq nyhum hkyô yù mù, châng yông ló

bekô nghut ri. ¹⁸ Laidun mó lûm htan é yanmai, htang nyí yhangmoq gi, hpugá zê pé lé hkyom dú hkyó pyám bekô nghut ri. ¹⁹ Sum nyí nghu é nyí má, yhangmoq gi, wui-sanghpo zê pé lé yhumsing é loq èq yhang hkyô pyám bekô. ²⁰ Buinyi myáng myáng, bui lé le, kyí pé lé le a myàng é eq, laidun mó za ru mut nyi é yanmai, wó lut râ ngû myit myoqbyu tô é hkyô lé, ngamoq tô pyám bê nghut lhê.

²¹ Yhangmoq zoshuq a zô é, buinyi tsómra myáng lô bê nghut mù luî, Poluq gi, yhangmoq é gung gûng má yap to mù, "Âhkaú pé ê, nungmoq ngá é dang gyo luî, Kreti zinlóng mai a htoq ló é nghut le gi, shî su htên byoq é marop hui zo râ a nghut. ²² Ahkuî nghut kôlhang, ngò taî é dang lé gyô yù mù myit wum yù keq; nungmoq mâ é hká yuq lé asak sum râ a nghut, wui-sanghpo za sheq htên byoq byuq râ nghut lhê. ²³ Hkâsu mù gâ le, ngo lé sing é, ngò dojaú nyi é Garai Gasâng é maumang lagyo rayuq, amàn ngá é nàm má lé yap to mù, ngo lé taî é gi, ²⁴ 'Poluq ê, hkâgyuq, Kehtaq é hí má nàng wó yap râ nghut lhê. Wui-sanghpo shî má nàng eq rahá jì tô é lhunglhang bâng é asak lé, Garai Gasang gi, nàng é yanmai, lai lai byi râ nghut lhê.' gâ ri. ²⁵ Hau é yanmai, âhkaú pé ê, myit wum yù keq, ngo lé

* 27:12 Gyoqmyò lé, haû mau má laidun mó lò lò dut mù, yông wún le gyuq chiq nám nghut lhê.

taí kyô é eq rajung za dut lò
râ nghut lhê nghû luí, Garai
Gasang lé ngò lumjǐng nyi lhê.
26 Nghut kôlhang, nga-nhúng
gi, zinlóng ralhum lhum má
ló htung chyap to râ nghut
lhê." ga luí, yhangmoq lé i-
myit taí tǐng ri.

27 Buinyì raxe myi nyí myín
má, gunggàm yoq lé, ngamoq
gi, Adria wuimau má yông
lǐng wún é hkún, sanghpo
hkáng bang gi, dùng yàm
eq chyâng lo nyi é su gâ é
lé sê gyo kat akô. 28 Haú
su mù, wuì nik é lé kê wú
lé, loqlam í xê kô nik é lé
wó sê akô. Razup zo má
dum kê wú le, loqlam raxe
ngò kô za nik é lé myàng
akô nghut ri. 29 Haú mù
luí, luqmó má ló záng htung
râ lé chiq kômù, yhangmoq
gi, wuì-sanghpo htâng shut
mâ é shamtoq goknghe myí
lhum lé lhoq hkyô kat luí,
mau hân bó sháng gaq ga
kyúdũng nyi bum akô nghut
ri. 30 Wuì-sanghpo hkáng bang
gi, wuì-sanghpo lé tô pyâm to
luí hpâng râ dâ é myit eq,
wuì sanghpo-u shut mâ é
shamtoq goknghe pé lé lhoq
hkyó râ su kut mhaú luí,
sakhkyílhaí lé wuì má lhoq
hkyô nyi bum akô. 31 Haú
mù, Poluq gi, shô up gyezau
eq gyezô pé lé, "Shí bang
wuì-sanghpo má a nyi le gi,
nungmoq wó lut râ a nghut."
ga taí ri. 32 Haú hkún, gyezô
pé gi, sakhkyílhaí lé tuí tô
é tui lé zân hpyit kat kôluí,
sakhkyílhaí gi, byit gyó byuq
bê nghut ri.

33 Maubó lô jáng, Poluq gi,
yhangmoq banshoq bang lé
zang zo râ matú myit wum
byí é gi, "Nungmoq gi, myit
chiq luí, zoshuq haí le a zô é,
hkú-nyí raxe myi nyí myáng
lô bê. 34 Haú mù luí, zoshuq
rajung jung zo keq! Haú
gi, nungmoq wó lut râ matú
nghut lhê. Nungmoq chyâng
mâ é ó yuq é xâm rahkat lháng
byuq râ a nghut." gâ ri. 35 Haú
su ga ban taí é eq, yhang
gi, muk lé yù luí, yhangmoq
banshoq bâng é hí má Garai
Gasang jeju lé hkyá-on mù,
muk lé hpé luí, zô hí bê nghut
ri. 36 Haú hkún sheq, ban-
shoq bang gi, myit wum wó
yù kômù, zoshuq zô bùm bekô
nghut ri. 37 Wuì-sanghpo haú
mâ é byù lhunglháng gi, í
sho nyhit xe hkyuq yuq nghut
lhê. 38 Yuq hkangmó bàn zô
gyí é htâng má, wuì-sanghpo
sóm râ matú, sungsô pé lé wuì
má dú kat pyâm akô nghut ri.

*Wuì-Sanghpo Htên Gyop
Byuq É Hkyô*

39 Myoq san za myàng jáng,
yhangmoq gi, jowò haú lé a
sé kôlhang, semuì-jàng chyûn
ralhum lé byu myàng kôluí,
wó dut é nghut jáng, haú
má sanghpo lé kôn gyam râ
matú chôm doqdân yu akô
nghut ri. 40 Haú mù, yhang-
moq gi, shamtoq goknghe pé
lé wuimau má hkyut hkyô
pyâm tô akô. Lhaishap tui lé
le hkyut yù luí, wuì-sanghpo
ulhum mâ é panlong lé lhoq
toq yù mù, lai hkyô cháng luí
wuiyàm shut mut lò bê nghut

ri. ⁴¹ Nghut kôlhang, semui lo bum tô é jowò ralhum má, wui-sanghpo ló htung chyap byuq lui, sanghpo u gi, a wó duí lo mù, sanghpo htang lé gi, wuiheng eq lò bat hkyop myha pyám bê nghut ri.

⁴² Haú hkûn, gyezô pé gi, htongbyû pé wuili lí hpang byuq kó rá lé gyuq kô é yanmai, yhangmoq lé sat pyám rá chôm dá akô. ⁴³ Nghut kôlhang, shô up gyezau hpó gi, Poluq lé hkyi yù nàu lui, yhangmoq dá é hkyô lé hkûm pyám mù, wuili dat li bang gi, wui má byam gyó lui wuiyàm shut hí li dap ló kó sháng ga lui le, ⁴⁴ góbang gi, siklong eq wui-sanghpo mâ é gotû zè pé má zui mù, gu dap ló sháng ga le, hkunmó hkyô kat ri. Haú đông mai lhunglhang bang gi, wuiyàm shut rago wó jé dap ló bekô nghut ri.

28

Malata Zinlóng Má Jé Nyi Tô É U Lhê Hkyô

¹ Ngamoq wó lut dap ló jáng sheq, zinlóng haú gi, Malata gâ é lé sê ri. ² Zinlóng byu pé gi, ngamoq lé shogyo myit gyai lhom tûn shit akô. Mau ru jâng wo nyi lui gyoq é yanmai, yhangmoq gi, myi mut byi mù, ngamoq ban-shoq bang lé hkûlum yu akô. ³ Haú hkûn, Poluq gi, htang rawaq guq tsing yù mù, myihkyóm má kat kat é hkûn, myi soq htan lò jáng, duq htân lhangmui radu gi, htoq ló mù, yhang é loq má htê zing tô ri. ⁴ Zinlóng byu pé

gi, Poluq é loq má lhang-mui haú htê lhang tô é lé myàng kôjáng, "Shí yuq gi, gè gè yhang byù sat é sù teng rá dut ri; wui mai wó lut ló kôlhang, yhang asak dui nyi rá matú, Tengmán tarâ gi, a dóng lo nhung!" ga lui, rayuq eq rayuq taí lhum bum akô nghut ri. ⁵ Poluq kúm gi, lhangmui haú lé myihkyóm má ko hkyô kat lui, haí le a dut é za nyi tô ri. ⁶ Yhangmoq gi, yhanggùng wâm lò berâ, haú a nghut jáng, byodàn ratung shí hkyaq léng ló berâ, ga myit lánng nyi bum akô. Nghut kôlhang, myáng myáng lánng wú nyi bum le, yhang má haí le a dut lo é lé myàng kôjáng, yhangmoq é i-myit dum htaí pyám kôlui, shí yuq gi, hparà rayuq sheq nghut ri ga dum taí bum akô nghut ri.

⁷ Hau é nàm má, zinlóng agyi hpó Popli sing é maumyi pé joq tô ri. Haú yuq gi, ngamoq lé lhom te yù mù, yhang yhûm má sum nyi yhang lalúm la-nye lhom hkûlum yu ri. ⁸ Haú u lé, Popli é yhangwa gi, àli nyé no nyi é eq wuiwam shun leq tô ri. Poluq gi, haú yuq chyáng wàng mù, kyûdung byi lui, yhang é ahtoq má loq ke byi mù, yhang lé lhoq gè byi ri. ⁹ Haú su dut é yanmai, zinlóng mâ é nò byù góbang ban-shoq le, lé lui lhoq gè byi é hui bekô nghut ri. ¹⁰ Yhangmoq gi, ngamoq lé a hkyô hkyô đông hkungga kôlui, ngamoq wui-sanghpo ji mù, dum toq ló rá hkûn,

ngamoq râ é gû lé châng byi kat akô nghut ri.

Romaq Myuq Má, Poluq Jé É Hkyô

¹¹ Lhamó sum hkyap lai jáng, Alesandru myuq mâ é, "Hparà zozûm nhiktâng" gâ é alhô dap é wuì-sanghpo má, ngamoq wang jî htoq ló bê nghut lhê. Wuì-sanghpo haú gi, gyoqmyò lé zinlóng haú má joq lai é nghut ri. ¹² Surakusa wà mó má jé jáng, haú má ngamoq sum nyí nô yu é nghut lhê. ¹³ Haú mai jî xoq lhing ló le, ngamoq gi, Regi wà mó má jé ri. Htang nyí gi, maupyí lai hik lô mù luí, í nyí nyí má nghut jáng, Potioli wà mó má jé lô bê nghut lhê. ¹⁴ Haú mâ é gumang wuì ra-am eq hui luí, ngamoq lé nyhit nyí no râ matú lùng kômù, ngamoq gi, nô yù bê; hau htâng, Romaq myuq má jé ló bê nghut lhê. ¹⁵ Haú mâ é gumang wuì gi, ngamoq jé lo nyi é hkyô lé wó gyo kôjáng, te yù râ ga, Api Gai gâ é wà eq Bíng Yhûm Sûm Lhum gâ é wà jé shoq lé akô. Poluq gi, haú bang lé lhom myàng jáng, Garai Gasang lé hkyá-on kungtôn mù, myit wum wó yù bê nghut ri. ¹⁶ Ngamoq, Romaq myuq má jé wang ló é hkûn, Poluq gi, yhang lé zúng râ gyezo rayuq eq gotû san nyi râ matú, ahkáng wó ri.

Poluq, Romaq Myuq Má, Mungdang Hko Kyô É Hkyô

¹⁷ Buinyì sum nyí lai é htâng má, Poluq gi, haú mâ é Yudaq suwún wuì lé ji yu ri. Yhangmoq jé lé bûm kôjáng, yhang gi, "Gumang wuì ê, ngò gi, nga-nhûng é amyû lé le, íchýí íwa pè é htunghking lé le, shut shai é dông haí le a kut wú; nghut kôlhang, ngò gi, Yerusalem wà mó má chyup yu é hui mù, Romaq byu pè é loq má ap byi kat é hui bê nghut lhê. ¹⁸ Romaq zau wuì kúm gi, ngo lé ban jep gôn wú jáng, ngá chyáng shí gíng é mara lé a myàng kô é yanmai, ngo lé nhang kat nau akô nghut ri. ¹⁹ Nghut kôlhang, haú lé Yudaq byu pé a dông kô é yanmai, ngò hkâsu a dat kut lo mù, Kehtaq chyáng jé râ matú dúng é nghut lhê. Haú nghut kôle, ngá amyû lé mara hún râ jowò joq é yanmai gi, a nghut. ²⁰ Haú mù luí, Israelaq amyû é myit myoqbyù hkyô* é yanmai, shí shamtoq-tuì èq tuì é ngò hui zô é hkyô eq séng luí, nungmoq eq nyo kún râ matú, ngò, nungmoq lé ji kat é nghut lhê." ga luí, yhangmoq lé taí ri.

²¹ Haú hkûn, yhangmoq gi, "Náng é hkyô eq séng luí Yuda mau mâ é laiká ngamoq a wó yù nghut ri. Haú mai lé é gumang wuì ó yuq le, nàng eq séng é a ge é luhkyang lé shit kyô é a bò kó nghut ri. ²² Nghut kôlhang, shí nàng lom é hpúng gi, jowò hkingmó má taí he pyâm é huí é hkyô lé, ngamoq sê é yanmai, nàng

* **28:20** Israelaq amyû é myit myoqbyù hkyô gi, Mesaia gâ é hkyi yù sù lé myoqbyù nyi é nghut lhê.

byu myang é hkyô lé ngamoq
gyô wú nau ri." ga tû taí akô.

²³ Yhangmoq gi, yhang eq
huí kún râ buinyì ding to
kôluí, yhang bíng é yhûm
má byù myo myo lé zîng
bum akô. Haú hkûn, yhang
gi, napkyó mai myín htâng
jé shoq, Garai Gasâng é
mingdán hkyô lé saksé hkâm
kyô é eq, Mosheq é tarâ eq
myiqhtoí pê é dang má cháng
mù, yhangmoq lé shikut luí,
Yesuq é hkyô taí pun taí kyîng
ri. ²⁴ Yhang taí é hkyô lé,
ra-am gi, lumjîng bum akô;
ra-am kúm gi, a lumjîng kó
nghut ri. ²⁵ Yhangmoq rayuq
eq rayuq haú su myít a huí
lhûm bùm kô é yanmai, Poluq
gi, yhangmoq lé, "Chyoiyúng
Woi-nyí, Myiqhtoi Esai-aq é
nhut mai nungmoq é îchyíîwâ
pé lé taí é dang gi, gyai yhang
têng ri. Dang haú gi,

²⁶ Byù haú hú chyáng ê mù,
"Nungmoq gyô tsuq to
kôlhang, sê gyo kó râ a
nghut;
wú tsuq to kôlhang, wú sé
kó râ a nghut.", nghû ê
taí aq.

²⁷ Hkâsu mù gâ le, amyû shi é
i-myít gi, htan byuq luí,
yhangmoq é nohkyap gi,
htu byuq bê nghut ri;
yhangmoq é myoq gi,
chûm byuq bê nghut
ri;

haú a nghut le gi, yhangmoq
é myoq èq myàng mù,
yhangmoq é nohkyap èq
wó gyo luí,

yhangmoq é i-myít má sê
hkyâng kômù,

ngá chyáng lhing lò kôluí, ngò
yhangmoq lé lhoq gê
byi berâ nghut lhê.*

gâ ri.

²⁸ Haú mù luí, shí Garai
Gasâng é hkyi yù hkyô lé,
tûngbau pê chyáng byí kat bê
nghut luí, yhangmoq lhom
gyô yù berâ hkyô lé, nung-
moq yhang sê nyi keq ô!" ga
luí, danghkun haú taí kat é
htâng má, yhangmoq gi, htoq
ló byuq bùm bekô nghut ri.
²⁹ (Poluq haú su ga taí é htâng
má, Yudaq byu pé gi, yhang-
moq yhangchang dang jet jet
lhum uchyang ló byuq bekô
nghut ri.)

³⁰ Poluq gi, yhang nghô
lúng é yhûm má í zân tup
nyi é u lé, yhâng chyáng lé
má lé é bang lé lhom hkûlum
yu ri. ³¹ Haú mù, a gyuq a
kyum é za, Garai Gasâng é
mingdán hkyô lé hko taí kyô
é eq, Yhumsîng Yesuq Hkris-
duq eq sêng é hkyô lé mho-
qshit byí ri; yhang lé, ó le a
hkûm zing to kó nghut ri.

* 28:27 Esai 6:9,10

ROMAQ Pê Chyáng Hun Kat é Laiká (Romans)

¹ Hkrisduq Yesuq é dui-nhâng zoshâng eq lagyo dut râ matú, Garai Gasâng eq ji yu é hui luí, chyoyúng Chyúmdang pé má, ² Garai Gasang gi, hí hí mai Yhâng é myiqhtoí pé dông danggidiq byí to bê nghut é, Yhâng é Yuqzô é hkyô nghut é, Garai Gasâng é gabú danglu é matú hkyin to huí é sù, ngò Poluq gi, Romaq myuq má nyi é, Garai Gasâng eq chyitdap é hui luí, sân-yúng bang dut râ matú jî yu é bang banshoq lé, dang kyô kat lhê. ³ Yhâng é Yuqzo haú gi, byù hkyam dông ga jáng, Dawiq é awut ashín nghut ri; ⁴ Yhang gi, shi é mai dum dui toq é dông, Garai Gasâng é Yhangzo nghut é hkyô lé, chyoyúng hkyo é Woi-nyí dông mai, hpungwup a-tsâm eq sé nhâng bê nghut ri. Yhang gi, nga-nhúng é Yhumsíng Yesuq Hkrisduq nghut ri. ⁵ Yhang dông mai le, Yhâng myíng é matú le, ngamoq gi, byù myû chângjup mai byù ji yù mù, lumjíng hkyô lé châng nyi nhâng râ matú, jeju eq lagyo ayá lé wó hkam yù bê nghut lhê. ⁶ Nungmoq le, Yesuq Hkrisduq eq séng râ matú jî yù huí é bang má lòm bekô nghut ri.

⁷ Nga-nhúng é Íwa Garai Gasang eq Yhumsíng Yesuq Hkrisduq chyáng má é jeju eq nguínón hkyô gi, nungmoq chyáng ru joq nyí sháng gaq ô!

Poluq, Romaq Myuq Má Ló Kum Nau É Hkyô

⁸ Nungmoq é lumjíng hkyô lé, mingkan gón má taí pyo ló bê nghut é yanmai, sân-hi má, ngò gi, Yesuq Hkrisduq é myíng mai, nungmoq banshoq bâng é matú, ngá é Garai Gasang lé, jeju hkya-on lhê. ⁹ Ngá é kyúdung dang pé má, ngò, nungmoq lé hkâ-nhám le bûn nyi é hkyô lé, Yhâng é Yuqzô é hkyô gabú danglù lé hko kyô nyi é má, ngá é myit nhiklhum banshoq eq dojaú é Garai Gasang gi, ngá é saksé nghut lhê; ¹⁰ Garai Gasang ô nau é nghut jáng, hkâ-í a myáng má, ngò, nungmoq chyáng wó jé lé râ hkyô htong byi râ matú, ahkuí, ngò kyúdung lhê.

¹¹ Ngò gi, nungmoq lé, woi-nyí hkyô eq sêng é chyunghuq wó gâm byi mù, nungmoq lé wum-o wó lhoq kíng byi râ matú, nungmoq lé gyai yhang myàng nau nyi ri. ¹² Haú su nghu é gi, nga-nhúng rayuq eq rayuq é lumjíng hkyô dông mai, nungmoq eq ngò, myit wum byí é hui râ matú nghut lhê. ¹³ Gumang wui ê, ngò gi, haú tûngbaù pê chyáng mai ashi wó yu é eq rajung za, nungmoq chyáng mai le ashi wó yù râ matú, nungmoq chyáng lé jé râ nghú adàm dàm dâ wú é nghut kôhang,

ahkuí jé shoq hkûm tang pyám huí é hkyô lé, nungmoq lé sé nhâng nau ri.

¹⁴ Ngò gi, Grik pé lé le, Grik a nghut bang lé le, hpaqchyí bò bang lé le, hpaqchyí a bò bang lé le, chyín dap to sù nghut lhê. ¹⁵ Haù nghut é yanmai, ngò gi, Romaq myuq mâ é bang nungmoq lé le, haù gabú danglù gyai yhang hko kyo nau nyi é nghut lhê.

¹⁶ Haù gabú danglù hkyô má, ngò gi, a hoq é nghut lhê; hkâsu mù gà le, haù gi, sâng-hi má Yudaq byu pé, hau htâng tûngbaù pé má, lumjîng é sù yuq hkangmó lé hkyi yu é wó huí nhâng râ nghut é, Garai Gasâng é hpungwup a-tsam nghut lhê. ¹⁷ Hkâsu mù gà le, lumjîng myit mai wó yû luí, lumjîng myit má gîng nyi é, Garai Gasâng chyáng mâ é dingmán hkyô lé gi, gabú danglù haù má hpông shit bê nghut ri. Haù gi, "Haù dingmán sù gi, lumjîng myit mai asak duì râ nghut lhê."* ga kê tô é eq rajung za nghut ri.

Xângzo Byu Pê Htoq Má Garai Nhkmo-yô É Hkyô

¹⁸ Haù tengmán hkyô lé, yhumsing é agè ashop hkyo èq zik hkûm pyám é byu pé é agè ashop hkyô eq garai a bo é hkyô pé banshoq htoq má, mauhkûng mai Garai Gasâng é nhikmo-yo hkyô lé hpông shit bê nghut ri. ¹⁹ Haù mù gà le, Garai Gasang gi, Yhang eq sêng é hkyô, yhangmoq lé san za tûn shit bê nghut é yanmai,

Garai Gasang lé sé âng é hkyô gi, yhangmoq chyáng san za dut bê nghut ri. ²⁰ Hkâsu mù gà le, mau htoq xâng hkun mai, hpan tô é zè pé lé wú jáng, Yhâng é a byu-myang é isâm nghut é, ahtum abyuq é hpungwup a-tsam eq Garaí é myit sâmlai lé gi, san za wó myâng, wó sê gyô é nghut lhê. Haù mù luí, byu pé gi, mara mai wó he lut râ hkyô a joq lo nghut ri.

²¹ Haù mù gà le, yhangmoq gi, Garai Gasang lé sê to kôlhâng, Yhang lé Garai dông a shigyaú kê é eq, jeju a hkya-on kô nghut ri; yhangmoq myit é hkyô pé gi, akôm dut byuq é eq, nhik a gyîng é yhangmoq é myit nhiklhum gi, chut byuq bê nghut ri. ²² Yhangmoq gi, hpaqchyí bò bang nghut lhê ga kôlhâng, a-ngok é bang dut byuq bekô nghut ri. ²³ Haù mù, htên byoq a sê é Garai Gasâng é hpungwup shing kang lé, htên byoq sê é byù zòng, nghoq lhô, dusak lhô eq yê jung dusak lhô pé èq, htaí lhik pyám bekô nghut ri.

²⁴ Hau é yanmai, Garai Gasang gi, yhangmoq é gungdu lé rayuq eq rayuq hpau a tap lhum kó râ matú, a sansêng é gungsho zùm-yap hkyô kut râ nghut é, yhangmoq é yut yut ô nau é i-myt má, yhangmoq lé ap pyám bê nghut ri. ²⁵ Yhangmoq gi, haù Garai Gasâng é tengmán hkyô lé, mhaù é hkyo èq htaí lhik pyám kômù, hpân Sù

lé noqkuq dojaú râ malaî, mhaú hkyô nghut é hpan tô é zè pé lé noqkuq mù, dojaú akô nghut ri. Hpân Sû haú gi, ahtum abyuq hkya-on hui sù nghut ri. Amen.

²⁶ Haú nghut é yanmai, Garai Gasang gi, yhangmoq lé, ahoq ahî é yut yut ô nau hkyô má ap pyám bê nghut ri. Yhangmoq é myiwe wuì lháng gi, htûng akying lé tô pyám kômù, haú eq shai é dông htaî lhik pyâm nyi akô nghut ri. ²⁷ Haú eq rajung za, yuqgè wuì le, myiwe wuì eq zum é htûng akying lé tô pyám kômù, rayuq eq rayuq, myi su nyé shoq yut yut ô nau lhum kômù, yuqgè yhangchang rayuq eq rayuq agot a-û hkyô kut shut lhum kôluí, yhangmoq kut shut é eq gingdán é yubak dam lé, yhumsing gùng yhumsing hkam yù nyi bekô nghut ri.

²⁸ Hau htoq agó, haú Garai Gasang lé sê é hkyô gi, akyû bo é a nghut ga yhangmoq myit yù kô é yanmai, a kut âng é hkyô kut nhâng râ matú, Garai Gasang gi, yhangmoq lé, htên byoq sê é myit má ap pyám é nghut lhê. ²⁹ Yhangmoq gi, agè agaú hkyô ajung jung, agè ashop hkyô, myoqnoq hkyô eq a jú lhûm é hkyô pé bying jup tô é bang dut bekô nghut ri; manon é, byù sat é, mabyoq jishûm htoq é, mhaú zô é eq myit goí bo é pé le bying bum ri. ³⁰ Yhangmoq gi, lumu é bang, gansang é bang, Garai lé a jú é bang, byù rhoi é bang,

nghtubûn é bang, gyáng é bang, agè ashop kut râ hkyô lhoq htoq é bang, mó wui é jino a gyô é bang nghut akô. ³¹ Yhangmoq gi, a gying a hâng é bang, gidiq a zung é bang, chyit myit a bo é bang, shogyo nhikmyin a sê é bang nghut akô. ³² Haú pé lé kut é bang gi, shî gíng lhê gâ é, Garai Gasang é dingmán tarâ joq é lé, yhangmoq sê to kôlhang, haú pé lé, yhangmoq xoq kut nyi kô é htoq agó, haú hkyô lé kut é bang lé le, hkya-on waq toq akô nghut ri.

2

Garai Gasang Tarâ Jéyáng É Hkyô

¹ Haú mù luí, góyuq lé tarâ jéyáng é sù nàng é, nàng gi, mara mai wó he lut râ hkyô a joq lo; hkâsu mù gâ le, nàng yhang jéyáng nyi luí, mù haú pé lé, nàng kut nyi é yanmai, byù góbang lé jéyáng é hkûn, náng gûng nàng mara byi nyi bê nghut ri. ² Haú dông kut nyi é bang lé, Garai Gasang gi, tengmán é dông tarâ jéyáng é lé, nga-nhúng sê nyi lhê. ³ Haú mù, byù za nghut to luí, góbang lé gi, jéyáng mù, yhumsing gi, haú dông roq châng kut nyi é sù nàng é, nàng gi, Garai Gasang é tarâ jéyáng hkyô mai wó hpang lut râ su ngam nyi lhê lhú? ⁴ Haú a nghut jáng, nàng gi, Garai Gasang é ge é hkyo eq nang lé myit wó shuí lhing nhang é lé a sê é za, Yhâng é agùn agó é ge é hkyô lé le, myit hing é

hkyô eq jân shirang é hkyô lé le, wú tiq pyâm nyi lâ thú?

⁵ Nghut kôlhang, náng é myit htân hkyô eq myit a lêng é nhiklhum é yanmai, haû Garai Gasang dingmán é dông tarâ jéyáng shit râ nghut é, Yhâng é nhikmo-yô é buinyi má hkâm zo râ nhikmo-yo hkyô lé, yhumsing gùng yhang hkong tô nyi bê nghut ri. ⁶ Garai Gasang gi, yuq hkanmó lé, ó le ó kut é má cháng luí, hkâm zo nhâng râ nghut lâ. ⁷ Jân shirâng mù, ge é hkyô kut nyi é dông, hpungwup shingkan lé le, aróng eq htên byoq a sê é hkyô lé le, ho é bang lé, Yhang gi, ahtum abyuq é asak byi râ nghut lâ. ⁸ Nghut kôlhang, haû yhumsing wuizat hkyô za hô luí, tengmán hkyô lé he-ngik pyám mù, agè ashop hkyô lé cháng bâng é matú gi, nhikmo-yo hkyô eq nhikjum yo hkyô jé râ nghut lâ. ⁹ Wuíhke hkyô eq iyon yon hkyô gi, agè ashop kut é xângzo byu yuq hkanmó chyáng jé râ nghut lâ; sâng-hi má Yudaq byu pè chyáng jé mù, tûngbaù pè chyáng le jé râ nghut lâ. ¹⁰ Nghut kôlhang, hpungwup shingkan, aróng eq nguingón hkyô gi, haû ge é hkyô kut é bang yuq hkanmó chyáng jé râ nghut lâ: sâng-hi má Yudaq byu pè chyáng jé mù, tûngbaù pè chyáng le jé râ nghut lâ. ¹¹ Hkâsu mù gâ le, Garai Gasang gi, myoqdong a hkyin

é Sû nghut lâ.

¹² Haû jep é tarâ lé a sê é mara kut shut é bang lhunglhang gi, jep é tarâ dông a nghut é za htên byoq kó râ nghut lâ. Haû jep é tarâ hkaû má mara kut shut é bang lhunglhang gi, jep é tarâ dông jéyáng é hui zo kó râ nghut lâ.* ¹³ Hkâsu mù gâ le, haû jep é tarâ lé wó gyô é bang lé, Garai Gasang é hí má dingmán bang gâ é a nghut é za, jep é tarâ lé châng kut é bang za sheq, dingmán bang gâ é hui râ nghut lâ. ¹⁴ Haû jep é tarâ lé a wó é tûngbaù pé gi, jep é tarâ hkyô lé, yhang baú yhang châng nyi kô é hkûn, jep é tarâ lé a wó kôlhang, yhumsing gùng yhumsing é matú tarâ dut bekô nghut ri. ¹⁵ Yhangmoq gi, haû jep é tarâ hkyô pé lé, yhangmoq é i-myt unghkaû má kâ to bê nghut é lé, tûn shit bekô nghut mù, yhangmoq é myit má hkâm zô é hkyô le, haû lé saksé hkám byi nyi é eq, yhangmoq myit é hkyô gi, ahkuí mara hun kat, ahkuí mara hkyut kat kut nyi ri. ¹⁶ Haû hkyô gi, ngò tái pyo é gabú danglù eq rajung za, byu pè é záu nghop tô é hkyô pé lé, Hkrisduq Yesuq dông mai Garai Gasang èq tarâ jéyáng é buinyi má dut râ nghut lâ.

Yudaq Byu Pé Eq Jep É Tarâ

¹⁷ Nghut kôlhang, nàng gi, náng gùng nàng Yudaq byu

* **2:12** Haû jep é tarâ lé a sê bang gâ é gi, tûngbaù pé lé gâ é nghut luí, haû jep é tarâ hkaû má é bang gâ é gi, Yudaq byu pé lé gâ é nghut lâ.

rayuq nghut lâ ga mù, haû jep é tarâ lé lumhkau nyi é eq Garai Gasang lé xoq é hkyô má nghutbun nyi é sù; ¹⁸ Yhâng ô nau é hkyô lé sê é eq haû jep é tarâ mhoqshit é hkyô wó yû bê nghut é yanmai, je ahkyak é hkyô lé sê gàm hkoq é sù; ¹⁹ haû jep é tarâ má, hpaqchyî eq tengmán hkyo é alik wó sù nghut é yanmai, haû myoqjit bâng é matú hkyô-u shê sù eq mauchut hkaû mâ é bâng é matú maubó nghut sù; ²⁰ byù ngok pé lé mhoqshit sù eq zoshâng wui é sará nghut sù nghut é lé, sê gyô to sù nghut é nghut le gi, ²¹ nàng, góbang lé mhoq byi sù nhîng, yhum-sing gùng yhumsîng a mhoq yû lú? A wó hkau ga hko taí lú nhîng, nàng gi, hkaû lâ a nghut lú? ²² Su-myi sulàng lú hkyô a wó kut ga byu pé lé taí lú nhîng, nàng gi, su-myi sulàng lú hkyô kut lâ a nghut lú? Hparâ lô lé a jú dik sù nàng gi, noqkuq yhûm lé hpyoq zo hpyoq shuq nyi lâ a nghut lú? ²³ Jep é tarâ eq séng lú nghutbun sù nàng gi, haû jep é tarâ lé lu laî é dông, Garai Gasang lé a hkungga kut lâ a nghut lú? ²⁴ Haû gi, "Garai Gasâng é myîng gi, nungmoq é yanmai, tûngbaù pé chyáng lhoq hpoî pyâm é huî ri."* ga kê tô é eq rajung za nghut ri.

²⁵ Haû jep é tarâ lé nàng châng é nghut jâng, ahpyo-kuq hpyit hkyô gi, akyû bò bê nghut ri. Nghut kôhang, nàng,

jep é tarâ lé lu laî é nghut jâng, a hpyit é eq rajung za dut bê nghut ri. ²⁶ Ahpyo-kuq a hpyit kôhang, jep é tarâ hkyô pé lé châng é bang lé gi, ahpyo-kuq hpyit bê bang dông ge sôn byi lâ a nghut kó lú? ²⁷ Kê tô é tarâ lé wó mù, ahpyo-kuq hpyit hkam to gù nghut é, tarâ lu laî é sù nàng lé, gungsho má ahpyo-kuq a hpyit kôhang, jep é tarâ lé châng é sù gi, mara hûn râ nghut lâ.

²⁸ Hkâsu mù gâ le, shinggan má za Yudaq byù nghut é sù gi, Yudaq byù kyîng a nghut; gungsho má za ahpyo-kuq hpyit é gi, ahpyo-kuq hpyit kyîng a nghut. ²⁹ Ahte myit hkaû má Yudaq byù nghut sù za, Yudaq byù kyîng nghut lâ. Kê tô é tarâ dông a nghut é za, Woi-nyî eq myit má ahpyo-kuq hpyit é gi, ahpyo-kuq hpyit kyîng nghut bê. Haû yuq é hkya-on kungtôn hkyô gi, byù mai lo é a nghut, Garai mai lo é ru nghut lâ.

3

Garai É Lhumzui Hkyô

¹ Haû dông ga jang, Yudaq byù rayuq dut nyi é gi, hai akyû hkâm zo râ lú? Ahpyo-kuq hpyit hkyô gi, hai akyû bò râ lú? ² Hkyô hkangmó má gyai akyû bò lâ! Je hí má gi, haû Garai Gasâng é mung-dang lé yhang, yhangmoq lé ap byi bê nghut ri.

³ Yhangmoq mâ é ra-am lumjîng myit a bo é nghut le gi, hkâsu kó lú? Yhangmoq

lumjǐng myit a bo é yanmai, Garai Gasâng é lhumzui hkyô lé akyû a bò nhâng wó dut râ lúhú? ⁴ Hká đông le a wó dut!

"Haû mù, nàng dang taí é hkûn, dingmán é hkyô wó lhoq htoq râ eq, nàng jéyáng huí é hkûn, ùng râ nghut lhê."[☆]

ga kê tô é eq rajung za, byù yuq hkangmó gi, byù-mhaû dut kôlhang, Garai Gasang gi, tengmán nyí sháng gaq.

⁵ Nghut kôlhang, nga-nhúng é a dingmán hkyô gi, Garai Gasâng é dingmán hkyô lé san za je lhoq htoq shit é nghut lhê; haû nghut jáng, nga-nhúng hkâsu nghû taí râ lúhú? Nga-nhúng lé Garai Gasang nhikmo-yô é hkyô gi, Yhang a tarâ mù nghut lhê lúhú? (Ngò gi, byù hkyam đông taí htǐng é nghut lhê.) ⁶ Ratsuí lhang a nghut! Haû su ru nghut le gi, haû mingkan lé, Garai Gasang hkâsu wó jéyáng râ lúhú? ⁷ Rayuq yuq, "Ngò mhaû é hkyô gi, Garai Gasang tengmán é hkyô lé lhoq ko jat mù, Yhâng é hpungwup shingkan lé je wó lhoq hu nhang é nghut le nhǐng, haí mù luí, ngò, yubak byù rayuq đông mara byí é hui zô nyí ra shirâ lúhú?" ga taí dang-rháng râ nghut lhê. ⁸ "Ge é hkyô htoq sháng gaq, nga-nhúng, agè ashop hkyô kut sháng." nghû haí mù a taí kô é lúhú? Dang haû lé ngamoq taí é nghut lhê ga luí, ngamoq lé lumù gansang é đông byù

ra-am taí akô. Haû bang gi, mara dam byí é hui zo gǐng bang nghut akô.

Dingmán Byù A Nyì

⁹ Haû jáng, hkâsu nghû lo râ lúhú? Nga-nhúng gi, je gè bang nghut lhê lúhú? Ratsuí lhang a nghut. Yudaq byù nghut nghut, tǔngbaù pé nghut nghut, yubak mara hkaû mâ é bang chyat nghut lhê nghû, ngamoq taí san kyô wú bê nghut lhê. ¹⁰ Chyúmdang má kê tô é le,

"Dingmán é byù a nyì, rayuq lhang a nyì nghut ri;

¹¹ Sê gyô é byù rayuq le a nyì, Garai Gasang lé ho é byù le a nyì nghut ri;

¹² Lhunglhang bang gi, lhing ló byuq bekô; yhang-moq gi, hpau a dap bang chyat dut byuq bekô nghut ri.

Ge é kut sù ó a nyì, rayuq lhang a nyì nghut ri."[☆]

gâ ri.

¹³ "Yhangmoq é hkyung gi, hpông tô é lup pé nghut akô; yhangmoq é shô gi, mhaû akô."[☆]

"Yhangmoq é nhutwuí pé má gi, shíduq bò lhangmui é duq dap bum ri."[☆]

gâ tô ri.

¹⁴ "Yhangmoq é nhut pé gi, nhing myǐng nhing hté eq myit nò danghko baú byǐng zan tô ri."[☆]

gâ tô ri.

¹⁵ "Yhangmoq é hkyí pé gi, byù sat sui lhoq htoq râ matú, lawán nau akô;

☆ 3:4 Hkya-on 51:4 ☆ 3:12 Hkya-on 14:1-3 ☆ 3:13 Hkya-on 5:9 ☆ 3:13 Hkya-on 140:3 ☆ 3:14 Hkya-on 10:7

16 Yhangmoq sô nyi é hkyô pé gi, htên byoq é eq wuîhkê é ahkô tông tô é nghut mù,

17 ngingón é hkyô lé gi, yhangmoq a sé kó nghut ri."*

gâ tô ri.

18 "Yhangmoq é myoq hí má Garai Gasang lé gyuq hkunggâ é hkyô, a bô kó nghut ri."*

gâ tô ri.

19 Byù yuq hkangmó é nhut gi, tû táj jang a joq dut byuq mù, mingkan gón gi, Garai Gasâng é hí má mara bo é bang dut nyi sháng gaq ga, haû jep é tarâ má taî é lhunglhang gi, jep é tarâ ô má nyi é bang lé taî é nghut é hkyô lé, nga-nhung sê lhê.

20 Haû mù luî, jep é tarâ lé châng é đông mai, ó yuq le, Yhâng é hí má dingmán sù gâ é wó hui râ a nghut; jep é tarâ đông gi, yubak mara bo é hkyô lé wó sê yu é za nghut lhê.

Lumjîng Jáng, Dingmán Sù Wó Dut É Hkyô

21 Ahkuî kúm gi, jep é tarâ đông a nghut é za, haû jep é tarâ eq myiqhtoi laiká pé mai saksé hkâm tô é Garai Gasâng chyáng mâ é dingmán hkyô lé, sé nhâng bê nghut ri. 22 Garai Gasâng chyáng mâ é dingmán hkyô haû gi, Yesuq Hkrisduq lé lumjîng é đông mai nghut mù, lumjîng bang banshoq htoq má jé é nghut lhê. Gamhkuî é hkyô a joq. 23 Hkâsu mù gâ le,

lhunglhang bang gi, yubak mara kut shut bê bang chyat nghut mù, Garai Gasâng é hpungwup shingkang lé a hkyit hkap byuq lo kó nghut ri. 24 Ahkuî kúm gi, Hkrisduq Yesuq mai lo é hkyi yù hkyô đông, Garai Gasâng é jeju eq, mara hkyut san byî é laî laî wó hui bê nghut ri. 25 Garai Gasang gi, Yesuq é sui lé lumjîng bâng matú, shîhtái gunglik hkungga ralhum đông, Yesuq lé byî pyám bê nghut ri. Haû gi, laî lò bê yubak mara lé lhut pyám byi shoq, Garai Gasang myit hîng byi bê nghut é yanmai, Yhâng é tengmán hkyô lé tûn shit é nghut ri. 26 Garai Gasang haû su kut é gi, Yhânggùng yhang dingmán Sù nghut é eq, Yesuq lé lumjîng é sù lé mara hkyut san byî é Sù nghut râ matú, ahkuî lhê ipyat má, Yhâng é tengmán hkyô lé shit byî é nghut lhê.

27 Haû su nghut jáng, nghutbun jowò joq ri lú? A joq. Hai tarâ mai a joq dut byuq é lú? Haû jep é tarâ châng é yanmai nghut lhê lú? A nghut, lumjîng hkyo é yanmai sheq a joq dut byuq é nghut lhê. 28 Hkâsu mù gâ le, byù gi, haû jep é tarâ châng é đông a nghut é za, lumjîng luî, mara hkyut san byi hui é hkyô lé, ngamoq lum nyi lhê. 29 Garai Gasang gi, Yudaq byu pê é Garai Gasang za nghut lhê lú? Tûngbaù pê é Garai Gasang le a nghut lú? Nghut lhê, tûngbaù pê é Garai

Gasang le nghut lhê. ³⁰ Hkâsu mù gâ le, Garai Gasang gi, rayuq za nghut é yanmai, rajung za lumjîng luî, ahpyo-kuq hpyit hkam é bang lé le, ahpyo-kuq a hpyit é bang lé le, Yhang, mara hkyut san byi râ nghut lhê. ³¹ Haû nghut jâng, nga-nhúng gi, lumjîng myit hau èq, jep é tarâ lé lhoq hpoî pyám râ lú? Ratsui lhang a nghut! Nga-nhúng gi, jep é tarâ haû lé lhoq ging tîng é bang ru nghut lhê.

4

Abraham, Mara Hkyut San Huî É Hkyô

¹ Haû su nghut jâng, nga-nhúng é îchyí îwa Abraham gi, haû hkyô mai haî wó sê yu ri nghû, taí râ lú? ² Abraham gi, zui saî é dông mai, mara hkyut san byi huî é ru nghut le gi, yhang nghut-bun jang joq râ nghut lhê; nghut kôlhang, Garai Gasâng é hí má gi, yhang haû dông a nghut. ³ Chyúmdang má hkâsu gâ tô ri lú gâ le, "Abraham gi, Garai Gasang lé lumjîng bê nghut mù, yhang lé, dingmán sù ga són byi bê nghut ri."* gâ ri.

⁴ Zui saî é sù gi, yhang é zuihpau lé, chyunghuq dông wó yu é a nghut é za, wó yû gîng luî, wó yu é ru nghut lhê. ⁵ Nghut kôlhang, zui saî é hkyô dông a nghut é za, haû agè ashop hkyô lé mara hkyut san byí é Garai Gasang lé lumhkau é sù gi, yhang é lumjîng myit é yanmai,

dingmán sù ga són byi huî é nghut lhê. ⁶ Haû eq rajung za, yhang zui saî é hkyô dông a nghut é za, Garai Gasâng èq dingmán sù ga són byi huî é, Garai Gasâng chyáng má é shimân jeju wó é sù eq séng luî, Dawiq taí é gi,

⁷ "Tarâ lu laí é lé mara hkyut pyám byi huî é eq yubak mara lé nghop pyám byi huî é bang gi, hkungsô wó nyi ri.

⁸ Bo tô é mara lé, Yhumsing èq mara a són byí é huî sù gi, hkungsô wó nyi ri."^{*}

gâ ri.

⁹ Haû sù é jeju gi, ahpyo-kuq hpyit hkâm bâng é matú za nghut lhê lú? Ahpyo-kuq a hpyit bâng é matú le nghut lhê lú? Hkâsu mù gâ le, Abraham é lumjîng myit lé, dingmán sù ga són byi bê nghut lhê nghû, ngamoq taí nyi bê nghut lhê. ¹⁰ Haû su són byí é gi, hkâ-nhám nghut lhê lú? Ahpyo-kuq hpyit hkâm é htâng má lú? A nghut jâng, hí má lú? Haû gi, ahpyo-kuq hpyit hkâm é htâng má a nghut é za, hí má ru nghut lhê. ¹¹ Hau htoq agó, Abraham gi, yhang, ahpyo-kuq hpyit a hkam yù shí é hkûn mai, lumjîng luî wó é dingmán hkyô gâ é dizik nghut é, ahpyo-kuq hpyit masat lé myang hkam yù bê nghut ri. Haû mù, yhang gi, haû ahpyo-kuq hpyit a hkam yù kôlhang, lumjîng é lunglhang bang lé dingmán

* 4:3 Apûn 15:6,22 * 4:8 Hkya-on 32:1-2

bang ga són byî é wó hui râ matú, haú bâng é îwa dut bê nghut ri. ¹² Haú ahpyo-kuq hpyit hkâm é za a nghut, nga-nhông é îwa Abraham, ahpyo-kuq hpyit a hkam yù shi má wó é lumjîng hkyô é hkyî-kâm lé cháng luî ahpyo-kuq hpyit bâng é îwa le, yhang nghut ri.

¹³ Mingkân é amyû hkông xoq pé dut râ ga, Abraham eq yhâng é awut ashín pé lé byî tô é danggidiq gi, jep é tara é yanmai a nghut é za, lumjîng hkyô mai lo é dingmán hkyô dông ru nghut lhê. ¹⁴ Hkâsu mù gâ le, jep é tarâ dông nyi yap é bang gi, amyû hkông xoq pé nghut é nghut jáng, lumjîng hkyô gi, akyû a bo é eq, danggidiq gi, hpau a dap é dut byuq lhê. ¹⁵ Haú jep é tarâ gi, nhikmo-yo hkyô lhoq htoq é nghut lhê; nghut kôlhâng, jep é tarâ a joq jáng gi, tarâ lu lai hkyô le joq râ a nghut.

¹⁶ Haú mù luî, danggidiq gi, Abraham é awut ashín lhunglhang bâng chyáng, jeju mai za lo é eq gingtîng nyi é dut sháng gaq ga, lumjîng hkyô mai lo é nghut lhê. Haú gi, jep é tarâ má lôm bâng é matú baú za a nghut, Abraham é lumjîng hkyô má lôm bâng é matú le nghut lhê. Abraham gi, nga-nhông lhunglhang bâng é îwa nghut ri. ¹⁷ "Ngò gi, nang lé, byù myû myo myô é îwa dut nhâng bê."* ga kê tô é eq rajung za, haú shi byuq bê bang lé wó lhoq dui é eq a joq wú é zè lé joq shoq wó kut é, yhang

lumjîng é sù Garai Gasâng hí má, Abraham gi, nga-nhông é îwa nghut lhê.

¹⁸ "Náng é awut ashín pé le, haú eq rajung za myô lò râ nghut lhê."* ga yhang lé taî kyô to bê eq rajung za, yhang gi, myit myoqbyù jowò haî a joq kôlhâng, lumjîng luî myoqbyu nyi é nghut mù, byù myû myo myô é îwa dut bê nghut ri. ¹⁹ Yhang gi, rashô zàn kê jé byuq bê nghut mù, yhânggùng gi, shi é gyá dut é hui zô é eq Sarah é zoyhûm shibó le shum byuq kôlhâng, yhang gi, lumjîng myit a yom byuq nghut ri. ²⁰ Hau htoq agó, Garai Gasâng é danggidiq eq séng luî, a lumjîng a dut é eq hê myit mhô myit a dut é za, yhâng é lumjîng myit lé saî lhoq ging tîng mù, Garai Gasâng lé hkya-on kungtôn luî, ²¹ Garai Gasâng gi, Yhang byî tô é danggidiq eq rajung za wó kut râ a-tsam bò sù nghut é lé, yhang myit zing nyi ri. ²² Hau é yanmai, "Yhang lé, dingmán sù ga són byi bê nghut ri."* gâ tô é nghut lhê. ²³ "Yhang lé, són byi bê." ga, kê tô é dang gi, yhang é matú za a nghut, ²⁴ nga-nhông é Yhumsîng Yesuq lé, shi é mai lhoq dui toq yû sù Garai Gasâng lé lumjîng luî, Yhang eq dingmán bang ga són byi râ nghut é, nga-nhông é matú le nghut lhê. ²⁵ Yhumsîng Yesuq gi, nga-nhông é yubak marâ é matú, shi hkâm byi râ dông ap pyâm é hui luî, nga-nhông,

* 4:17 Apûn 17:5

* 4:18 Apûn 15:5

* 4:22 Apûn 15:6

mara hkyut san byî é hui râ matú, lhoq dui toq é hui bê nghut ri.

5

Nguingón Hkyô Eq Gabú Hkyô

¹ Haû mù luî, nga-nhúng gi, lumjîng é dông mai mara hkyut san byî é hui bê nghut é yanmai, nga-nhúng é Yhumsîng Yesuq Hkrisduq dông, Garai Gasang eq buinùm wó xoq yû bê nghut lâ. ² Yesuq é yanmai, nga-nhúng gi, ahkuî wó yu to bê jeju shî má, lumjîng luî wó wâng bê nghut mù, Garai Gasâng é hpungwup shingkan lé myoqbyù luî gabú gumrong nyi lâ. ³ Haû za a nghut, nga-nhúng gi, wuîhke jamjau hkyô pé má le gabú gumrong nyi lâ. Hkâsu mù gâ le, wuîhke jamjau hkyô gi, hkam jan hkyô lhoq htoq ri; ⁴ hkam jan hkyô gi, myit a-tsam lhoq htoq lâ; myit a-tsam gi, myoqbyu to hkyô lhoq htoq é lé, nga-nhúng sê lâ. ⁵ Myoqbyu to hkyô haû gi, nga-nhúng lé myit wum gyui nhang é a nghut; hkâsu mù gâ le, Garai Gasang gi, Yhâng é chyitdap myit lé, Yhang mai, nga-nhúng lé byî tô é Chyoiyúng Woi-nyí dông, nga-nhúng é i-myit unghkaû má hut kat byi bê nghut ri.

⁶ Hkâsu mù gâ le, nga-nhúng gi, a-tsam a bò dut tô ashî u lé, ahkyíng hkyak má yhang, Hkrisduq gi, yubak dap bang nghut é nga-nhúng é matú shî hkám byi bê nghut

ri. ⁷ Gè gè ga jáng, dingmán su é matú shî hkám byi râ byù gi, shau râ nghut lâ; nghut kôlhâng, byù gè rayuq é matú kúm gi, wám shî hkâm é byù nyi sê lâ. ⁸ Nghut kôlhâng, nga-nhúng gi, yubak dap bang nghut nyi ashî hkûn, nga-nhúng é matú Hkrisduq shî hkám byî é má, Garai Gasang gi, Yhâng é chyitdap myit, nga-nhúng lé shit byi bê nghut ri.

⁹ Nga-nhúng gi, ahkuî, Yhâng é sui mai mara hkyut san byî é hui bê nghut mù, Yhâng é yanmai, Garai Gasâng é nhikmo-yo hkyô mai, hkyi yu é je riyhang hui râ nghut lâ. ¹⁰ Hkâsu mù gâ le, nga-nhúng gi, Garai Gasâng é gyè pé nghut nyi ashî u le, Yhâng Zo shî hkám byî é dông, Garai Gasang eq buinùm wó xoq yu é hui bê nghut lâ. Wó xoq yu to bê nghut jáng, nga-nhúng gi, Yhâng é asak dông mai, gè gè yhang hkyi yu é hui râ nghut lâ. ¹¹ Haû su za a nghut, nga-nhúng gi, nga-nhúng é Yhumsîng Yesuq Hkrisduq dông mai, buinùm wó xoq yu é jeju lé, ahkuî wó yu to bê nghut mù, Yhâng é yanmai, Garai Gasang má le, gabú gumrong nyi lâ.

Shi É Gi, Adam É Yanmai, Dui É Asak Gi, Hkrisduq É Yanmai

¹² Byù rayuq dông mai, yubak mara gi, mingkan má jé wâng bê nghut luî, shî-nò hkyô gi, yubak marâ é yanmai châng jé bê nghut ri; haû

dông mai, byù lhunghâng bang gi, yubak dap bang chyat nghut byuq mù, shî-nò hkyô gi, byù lhungháng bâng chyáng jé bê nghut ri. ¹³ Hkâsu mù gâ le, haû jep é tarâ lé a byi shimá, yubak mara gi, mingkan má joq to bê nghut lê. Nghut kôlhâng, jep é tarâ a joq shî é hkûn gi, yubak mara lé mara su a ngàm shî é nghut lê. ¹⁴ Haû su ga kôlhâng, Adam su hkunmó lé lu lai é dông mara a kut shut bâng é ahtoq má lháng, shî-nò hkyô gi, Adâm é ipyat mai Mosheq é ipyat jé shoq up nyi bê nghut ri. Adam gi, jé lé lò râ su é azòng nghut ri.

¹⁵ Nghut kôlhâng, jeju chyunghuq gi, haû mara kut shut é hkyô su a nghut; hkâsu mù gâ le, mara kut shut é byù rayuq é yanmai, byù myo myo shi pyâm é nghut le gi, Garai Gasâng jeju eq Yesuq Hkrisduq gâ é byù rayuq é jeju mai lo é chyunghuq gi, byù myo myô é htoq má hkâ-í yhang byíng mui nyi ri-nhung! ¹⁶ Garai Gasâng jeju chyunghuq gi, byù rayuq kut é yubak mara su a nghut; hkâsu mù gâ le, tarâ jéyáng é hkyô gi, byù rayuq é mara má cháng mù, mara dam byi é hkyô lhoq htoq é nghut lê; nghut kôlhâng, jeju chyunghuq gi, tarâ lu lai bang myo myo má cháng mù, mara hkyut san byi hkyô lhoq htoq é nghut lê. ¹⁷ Hau htoq agó, byù rayuq tarâ lu lai luí, haû

rayuq é yanmai, shî-nò hkyô up nyi bê nghut lê, ahkuí kúm, haû Garai Gasâng é agùn agó shimân jeju eq dingmán hkyo é chyunghuq lé hap yu é bang gi, Yesuq Hkrisduq gâ é byù rayuq dông mai, je riyhang asak duì hkyô má uphkang nyi kó râ nghut lê.

¹⁸ Haû mù luí, tarâ lu lai é hkyô ralhûm é yanmai, byù lhunghâng bang gi, mara dam byi é hui zo kô é su, dingmán hkyo é muzó ralhûm é yanmai, byù lhunghâng bang gi, asak duì hkyô eq sêng é mara hkyut san byi hkyô lé wó bê nghut ri. ¹⁹ Hkâsu mù gâ le, byù rayuq jìno a gyô é yanmai, myo myo gi, yubak dap bang dut byuq é su, byù rayuq jìno gyô é yanmai, myo myo gi, dingmán bang gâ é hui kó râ nghut lê.

²⁰ Haû jep é tarâ jat é gi, tarâ lu lai hkyô je myo râ matú nghut lê. Nghut kôlhâng, yubak mara myô jat é hkûn, jeju gi, je riyhang myô jat lo é nghut lê. ²¹ Haû mù, yubak mara gi, shî-nò hkyô dông uphkâng bê su, jeju gi, nga-nhung é Yhumsîng Yesuq Hkrisduq é yanmai, ahtum abyuq é asak wó byi é dingmán hkyô dông up râ nghut lê.

6

Hkrisduq Eq Rading Ralhum

¹ Haû nghut jáng, nga-nhung gi, hkâsu nghû tai râ lú? Jeju myô jat lò sháng

gaq nghû, nga-nhúng, yubak mara kut xoq nyi râ lúhú? ² Haû su a nghut sháng gaq! Nga-nhúng gi, yubak mara eq shi gang bê bang nghut lâ; hkâsu mù haú má wó dui nyi lo râ lúhú? ³ Hkrisduq Yesuq eq rading ralhum za dut râ matú, wui-myhup hkâm yù bê bang nga-nhúng banshoq gi, Yhâng é shi hkâm hkyô má le rading ralhum za dut râ matú, wui-myhup hkâm yù bê nghut é lé, nungmoq a sé kó lúhú? ⁴ Haû mù luí, Hkrisduq gi, Íwâ é hpungwup shingkâng eq, shi bê mai lhoq dui toq huí é su, nga-nhúng le, asak asik dông wó dui nyi sháng gaq nghû, nga-nhúng gi, wui-myhup hkâm é dông, Yhang eq rahá, shi hkâm é eq myhup yhum é hui bê nghut lâ.

⁵ Nga-nhúng gi, Yhang shi hkâm é hkyô má, Yhang eq rading ralhum za dut bê nghut jáng, Yhâng é dum dui toq hkyô má le, Yhang eq rading ralhum za hkyak dut râ nghut lâ. ⁶⁻⁷ Hkâsu mù gâ le, shi bê sù gi, yubak mara mai lhoq lhut é hui bê nghut é yanmai, nga-nhúng gi, yubak marâ é jùn dut nó a ra lo mù luí, yubak mara gùng gi, lhoq htên pyâm é hui râ matú, nga-nhúng é byù xau gi, Yhang eq rahá jén sat pyâm é hui bê nghut é hkyô lé, nga-nhúng sê lâ.

⁸ Haû mù, nga-nhúng gi, Yhang eq rahá shi hkâm bê nghut jáng, Yhang eq rahá dui nyi râ nghut lâ nghû,

lumjǐng lâ. ⁹ Hkâsu mù gâ le, Hkrisduq gi, shi bê mai lhoq dui toq é hui bê nghut mù, Yhang gi, dum wó shi lo râ a nghut é lé, nga-nhúng sê lâ; shi-nò hkyô gi, Yhang lé hkâ-nhám le wó sing to râ a nghut lo. ¹⁰ Yhang shi hkâm é shi-nò hkyô gi, banshoq bâng é matú, yubak mara eq séng luí radàm za shi hkâm byi bê nghut ri; nghut kôlhang, Yhang dui nyi é asak gi, Garai Gasâng hí má dui nyi é nghut lâ.

¹¹ Haû eq rajung za, nungmoq gi, yubak mara eq shi gang luí, Hkrisduq Yesuq dông Garai Gasâng é matú asak dui nyi lâ nghû, sôn yù keq. ¹² Haû mù luí, nungmoq é htên byoq sê é gungdu má, yubak mara lé hkâ-uphkâng nhâng, uphkâng nhâng kô é nghut jáng, gungdu yut yut ô nau é agè ashop hkyô lé, nungmoq châng é nghut bê. ¹³ Nungmoq é gungdu showui showang pé lé, agè ashop hkyo é chùng zè pé dông yubak mara má hkâ-ap byi pyám kó, shi bê mai lhoq dui toq yù huí é bang su, yhumsing gùng yhumsing, Garai Gasâng chyáng kúm ap byi keq; nungmoq é gungdu showui showang pé lé, dingmán hkyo é chùng zè pé dông, Garai Gasâng chyáng ap byi keq. ¹⁴ Hkâsu mù gâ le, nungmoq gi, jep é tarâ hkaú má a nghut lô é za, jeju hkaú má nghut nyi bekô yanmai, yubak mara gi, nungmoq lé sîng sù wó dut râ a nghut lo.

Dingmán Hkyo É Jùn Pé

15 Haû jáng gi, hkâsu kó lú? Nga-nhúng gi, jep é tarâ hkaû má a nghut lo é za, jeju hkaû má nghut nyî bekô yanmai, mara wó kut shut kó râ lú? Haû su a wó kut! 16 Nungmoq gi, rayuq yuq é jìno gyo râ matú, yhum-sing gùng lé jùn pé dông ap pyâm é hkûn, shî-nò hui rà nghut é yubak marâ é jùn dông nghut kôlhang, dingmán hkyô wó râ nghut é jìno gyo hkyô nghut kôlhang, nungmoq châng nyi é nghut le gi, nungmoq, haû é jùn dut bê lé, a sé kó lú? 17 Nungmoq gi, yubak marâ é jùn dut wú bê bang nghut kôlhang, nungmoq hkam yu to bê mho-qshit hkyô lé, nungmoq é myit nhiklhum banshoq èq cháng bekô nghut é yanmai, Garai Gasang lé jeju hkya-on sháng. 18 Nungmoq gi, yubak mara mai lhoq lhut é hui bang nghut kômù, dingmán hkyo é jùn dut bekô nghut ri.

19 Nungmoq gi, sê gyô é nyan má wum nyhôm é bang nghut kô é yanmai, byu pé sê gyo râ dông ngò tái râ ga jáng: nungmoq gi, nungmoq é gungdu showui showang pé lé, a sansêng é hkyô eq agè ashop hkyô myô jat nhang é má jùn dông lhang ap byi wú bekô nghut é su, ahkuî gi, chyoyúng hkyô wó yû râ matú, haû pé lé, dingmán hkyô má jùn dông ap byi keq. 20 Nungmoq gi, yubak marâ é jùn dut nyî kô é hkûn, dingmán hkyo èq uphkanq é

mai lut nyî kô é nghut lê. 21 Ahkuî, nungmoq hoqjung nghu wú htoq é pé gi, haû u lé, hai akyû wó yû kô é lú? Hau pé gi, shi byuq é má htûm é chyat nghut ri. 22 Nghut kôlhang, ahkuî gi, nungmoq, yubak mara mai lhoq lhut é hui bekô nghut mù, Garai Gasang é jùn dut bekô nghut ri; hau é akyû gi, chyoyúng hkyô wó yu é nghut mù, ahtum abyuq é asak wó râ nghut lê. 23 Hkâsu mù gâ le, yubak marâ é ahpau gi, shi é hkyô nghut ri; nghut kôlhang, Garai Gasang é chyunghuq gi, nga-nhúng é Yhumsing Hkrisduq Yesuq é yanmai, ahtum abyuq é asak nghut ri.

7

Tarâ Mai Lut É Hkyô

1 Gumang wuî è, ngò gi, tarâ lé sê é bang nungmoq lé tái nyi lê: haû tarâ gi, byù rayuq lé, yhang, asak dui nyi é u lé za wó uphkanq é lé, nungmoq a sé kó lú? 2 Dangké, ikun wàng bê myiwe myhí rayuq gi, yhang é yhumsing hpó asak dui nyi é ahkýing má, tarâ èq up zing tô é hui ri; nghut kôlhang, yhang é yhumsing hpó shi byuq é nghut jáng gi, haû ikun wàng tarâ mai, yhang wó lut bê nghut ri. 3 Haû nghut é yanmai, yhang é yhumsing hpó asak dui nyi ashî u lé, yuqgè góyuq eq hâng lhùm é nghut jáng gi, yhang lé, sulàng lú sù ga kó râ nghut lê. Nghut kôlhang, yhang

é yhumsîng hpó shi byuq é nghut jáng gi, yhang, tarâ haû mai lut bê nghut luî, yuqgè góyuq eq hâng lhum kôlhang, sulàng lú sù a nghut lo.

⁴ Haû mù luî, ngá é gumang wuê ê, nungmoq le, haû shi byuq é mai lhoq dui toq yù hui bê sù Yuqgè chyáng wó xoq mù, nga-nhúng gi, Garai Gasang lé ashi wó zui byi sháng gaq ga, Hkrisduq é gungdu dông mai, jep é tarâ eq shi gang bê nghut lhê.

⁵ Hkâsu mù gâ le, nga-nhúng, yubak gungsho má nghut nyi é hkûn, nga-nhúng gi, shî-nò hkyo é ashi zui sháng gaq ga, jep é tarâ é yanmai htoq lo é yubak yut yut ô nau é hkyô gi, nga-nhúng é gungdu pé má mù zui nyi é nghut lhê.

⁶ Nghut kôlhang, ahkuî gi, nga-nhúng lé up zing tô é jep é tarâ eq shi gang bê nghut mù, jep é tarâ mai lut bê nghut é yanmai, kê tô é hkyô xau dông a nghut é za, Woi-nyí é hkyô sik dông nga-nhúng dojaú nyi é nghut lhê.

Jep É Tarâ Eq Yubak Mara

⁷ Haû jáng, nga-nhúng hkâsu tái râ lú? Jep é tarâ gi, yubak mara nghut lhê lú? Ratsuí lhang a nghut! Gè gè ga jáng, haû jep é tarâ dông mai za a nghut le, yubak mara lé, ngò wó sê é a nghut. Hkâsu mù gâ le, "myoqnoq myit hkâbô"☆ ga jep é tarâ má a tái tô é nghut jáng, myoqnoq é hkyô lé, ngò sé râ a nghut.

⁸ Nghut kôlhang, yubak mara

gi, hkunmó é ahkáng lé chûng mù, ngò má myoqnoq hkyô jung hkangmó lhoq htoq byî ri; hkâsu mù gâ le, jep é tarâ hkaû má a nghut jáng, yubak mara gi, shi é za nghut lhê.

⁹ Ngò gi, tarâ hkaû má a nghut é za asak dui wú bê nghut lhê; nghut kôlhang, haû hkunmó htoq lô jáng, yubak mara gi, dui lò mù, ngò gi, shî bê nghut lhê. ¹⁰ Haû mù luî, asak dui nhâng râ matú nghut é hkunmó haû gi, shî-nò hkyô dut byuq é lé, ngò wó sê é nghut lhê. ¹¹ Hkâsu mù gâ le, yubak mara gi, hkunmó é ahkáng lé chûng mù, ngo lé mhaû yù luî, hau eq ngo lé shî nhang ri. ¹² Hau pé lé wú jáng, jep é tarâ gi, chyoiyúng ri; haû hkunmó gi, chyoiyúng, dingmán é eq ge é nghut ri.

¹³ Haû nghut jáng, ge é hkyô haû gi, ngá é matú shî-nò hkyô dut byuq bê lú? Haû dông a nghut! Nghut kôlhang, yubak mara lé gi, yubak mara dông hkyak wó lhoq htoq shit râ matú, haû ge é hkyô dông mai, yubak mara gi, ngò má shî-nò hkyô lhoq htoq bê nghut luî, yubak mara gi, gè gè yhang agè ashop dut é lé, hkunmó dông mai tân shit é nghut lhê.

¹⁴ Hau htoq agó, jep é tarâ gi, woi-nyí eq sêng é hkyô nghut é lé, nga-nhúng sê lhê; nghut kôlhang, ngò má gi, gungsho eq sêng é hkyô za bo é nghut luî, yubak mara má jùn dông ung zô é hui bê nghut lhê. ¹⁵ Ngò haî kut nyi

é hkyô lé, ngò a sé. Hkâsu mù gâ le, ngò kut nau é hkyô lé gi, a kut é za, ngò a jú é hkyô lé kut é yanmai nghut lhê. ¹⁶ Ngò a kut nau é lé kut é nghut jáng gi, haû jep é tarâ ge é lé, ngò myit huí é nghut lhê. ¹⁷ Ahkuí gi, haû lé ngò yhang kut nyi é a nghut lo, ngò má lúng tô é haû yubak sheq kut é ru nghut lhê. ¹⁸ Ngò má, nghut bê, ngá é yubak gungsho má ge é hkyô haí le a bo é lé, ngò sê lhê. Hkâsu mù gâ le, ge é hkyô lé kut nau é myit ngò má bò kôlhang, haû lé a wó kut htoq nghut ri. ¹⁹ Hau é yanmai, ngò kut nau é ge é hkyô lé gi, a kut é za, ngò a kut nau é agè ashop hkyô lé gi, ngò xoq kut nyi ri. ²⁰ Ahkuí, a kut nau é hkyô lé ngò kut nyi é nghut jáng, haû lé ngò yhang kut nyi é a nghut lo é za, ngò má lúng tô é haû yubak sheq haû lé kut nyi é ru nghut lhê.

²¹ Haû mù, ge é hkyô lé ngò kut nau é hkûn, ngò má agè ashop hkyô htoq lô lô mù é tarâ lé, ngò myang ri. ²² Hkâsu mù gâ le, ngò gi, Garai Gasâng é tarâ lé, ngá é i-myit unghkaú má myit nguì gabú nyi lhê. ²³ Nghut kôlhang, ngá é gungdu showui showang pé má bo é gotû tarâ gi, ngá é i-myit tarâ eq majan zân lhûm é nghut luí, ngá é gungdu showui showang hkaú má mù zui nyi é yubak é tarâ má, ngo lé shúmbyû dut nhang é lé, ngò myang ri. ²⁴ Ngò gi, shogyo ray-hup dut sù nghut ri-nhung!

Shî nhang é gungdu shî mai, ó yuq wá, ngo lé wó hkyi yù râ lhu? ²⁵ Nga-nhúng é Yhumsîng Yesuq Hkrisduq dông mai wó lut bê nghut mù, Garai Gasang lé jeju hkya-ôn nyi lhê!

Haû mù luí, ngò yhang, myit é dông gi, Garai Gasâng é tarâ lé châng lhê, nghut kôlhang, yubak gungsho dông gi, yubak é tarâ lé châng lhê.

8

Haû Woi-nyí Mai Asak Dui É Hkyô

¹ Haû mù luí, ahkuí, Hkrisduq Yesuq má nghut nyí bâng é matú gi, mara byí é hkyô a joq lô é nghut lhê. ² Hkâsu mù gâ le, asak dui hkyô eq sêng é Woi-nyí é tarâ gi, Hkrisduq Yesuq dông, yubak mara eq shî-nò hkyo é tarâ mai, ngo lé lhoq lhut yû bê nghut lhê. ³ Haû jep é tarâ gi, yubak gungshô é yanmai, wum nyhóm luí a wó kut é hkyô lé, Garai Gasang gi, yubak mara hkungga dut nhâng râ matú, yubak byu é gungghkyâng dông, Yhang Zo sîng lé nhang kat é dông kut pyám bê nghut ri. ⁴ Haû mù, Garai Gasang gi, yubak gungsho dông asak a dui é za Woi-nyí dông asak dui bang nghut é nga-nhúng má, haû jep é tarâ má bo é hkyô pé lé, wó lhoq dik râ matú, gungsho ralhum má, mara lé doqđân pyám bê nghut ri.

⁵ Haû yubak gungsho dông asak dui é bang gi, gungsho yut yut ô nau é hkyô pé lé

myit zuq nyi akô; haû Woi-nyí dông asak dui é bang kúm gi, Woi-nyí ô nau é hkyô pé lé myit zuq nyi akô nghut ri. ⁶Haû yubak byu é myit gi, shí é hkyô nghut ri; haû Woi-nyí èq hkang to huí su é myit kúm gi, asak eq nguingón hkyô nghut ri. ⁷Haû yubak myit gi, Garaí é tarâ ô má a nyi é htoq agó, haú lé a wó cháng kut é yanmai, Garaí é gyè nghut ri. ⁸Haû yubak gungshô èq hkang tô é hui bang gi, Garaí Gasang lé a wó gabú nhâng kó nghut ri.

⁹Nghut kôle, Garaí Gasâng é Woi-nyí gi, nungmoq chyáng lúng nyí bê nghut jáng, nungmoq gi, haû yubak gungshô èq hkang to huí é bang a nghut lô é za, Woi-nyí èq hkang to huí é bang nghut akô. Rayuq yuq gi, Hkrisduq é Woi-nyí lé a wó é nghut jáng, Hkrisduq eq a sêng é sù nghut lhê. ¹⁰Nghut kôlhang, nàng má Hkrisduq nyi nyi é nghut jáng, náng é gungdu gi, yubak marâ é yanmai shí kôlhang, náng é woi-nyí gi, dingmán hkyo é yanmai dui nyi ri. ¹¹Hau htoq agó, Yesuq lé shi é mai lhoq dui toq yû Su é Woi-nyí gi, nungmoq má nyi nyi é nghut jáng, Hkrisduq Yesuq lé shi é mai lhoq dui toq yû Sù gi, nungmoq má nyi nyi é, Yhâng é Woi-nyí dông mai, nungmoq é, shí sê é gungdu pé lé le, asak dui nhâng râ nghut lhê.

¹²Haû mù luí, Gumang wuì ê, nga-nhúng gi, yubak

gungsho dông asak dui râ matú, wò wó é bang a nghut. ¹³Hkâsu mù gâ le, haû yubak gungsho dông asak dui kô é nghut jáng, nungmoq gi, shí râ nghut lhê; nghut kôlhang, haû gungshô é shut shaí hkyô lé, Woi-nyí èq sat pyám kô é nghut jáng, nungmoq gi, asak dui râ nghut lhê. ¹⁴Garaí Gasâng é Woi-nyí èq shuí u é hui bang gi, Garaí Gasâng é yhangzô pé nghut lhê. ¹⁵Hkâsu mù gâ le, nungmoq gi, gyuq râ matú, nungmoq lé jùn dum taû dut nhang é woi-nyí lé, a hap yu é za, nga-nhúng lé zo yín yu é Woi-nyí lé hap yu tô é bang ru nghut lhê; haû mù, nga-nhúng gi, Yhang é yanmai, "Aba,* Áwa ê" nghú wut é nghut lhê. ¹⁶Nga-nhúng gi, Garaí Gasâng é yhangzô pé nghut é lé, Woi-nyí haû gi, nga-nhúng é woi-nyí eq rahá saksé hkâm nyi ri. ¹⁷Ahkuí, nga-nhúng gi, zo wuì nghut bê yanmai, Hkrisduq eq rahá, Garaí Gasâng é amyû hkûngxoq pé wó dut é nghut lhê. Nga-nhúng gi, Hkrisduq é wuìhke jamjau pé lé, gè gè yhang bo hui zô é nghut jáng, Yhâng é hpungwup shing kang lé le, bo myang hkam yù râ nghut lhê.

Htângnùng Lhê É Hpungwup Shing kang

¹⁸Nga-nhúng é ahkuí lhê é wuìhke jamjau hkyô pé gi, nga-nhúng lé shit râ nghut é hpungwup shing kang eq

* 8:15 Aba gâ é gi, Aramaik dang dông "âwa" gâ é lichyúm nghut lhê.

whuí rã a gingdán nghû, ngò wó myit ri. ¹⁹ Haû hpan to huí é lhunglhang gi, Garai Gasang é yhangzô pé lé lhoq htoq shit byi rã lé, gyai yhang myit lãng nyi akô nghut ri. ²⁰ Hkãsu mù gã le, haû hpan to huí é lhunglhang gi, akyû a bo é chyat dut byuq bê nghut ri. Haû gi, yhumsing hkyin yu é đông a nghut é za, haû su dut nhãng Sû ô nau é đông kut é nghut ri. ²¹ Haû hpan to huí é lhunglhang gi, htên byoq byuq rã matú shúm dut é mai lhoq lhut é hui lui, Garai Gasang é yhangzo pé é hpungwup bo é luthkyô má wó wãng rã matú, myoqbyu tô é nghut lhê.

²² Haû hpan to huí é lhunglhang gi, ahkuí hkying jé shoq, zohkû-nò no é su nò-kying kying nyi kô é lé, nga-nhung sê lhê. ²³ Haû pé za a nghut, Woi-nyí é sãng-hi ashi† lé wó yû bê bang nga-nhung le, zo pé đông yin yu é jeju lé lãng uchyang, i-myit unghkaû má nò-kying kying é nghut lhê. Zo pé đông yin yu é jeju haû gi, nga-nhung é gungdu hkyi xe yû hkyô nghut lhê. ²⁴ Hkãsu mù gã le, nga-nhung gi, myit myoqbyu hkyô haû mai hkyi yu é hui bê nghut lhê. Nghut kôlhang, byu-myang é lé myit myoqbyu é gi, myit myoqbyu é hkyô ratsuí le a nghut. Yhumsing myang to bê é lé, ó yuq wá myit myoqbyu shirã lhú? ²⁵ Nghut kôlhang, nga-

nhung gi, a wó shí é lé myit myoqbyu é nghut jãng, myit hing hing kut lãng é nghut lhê.

²⁶ Haû eq rajung za, Woi-nyí gi, nga-nhung wum nyhôm é hkyô má garúm byi ri. Nga-nhung gi, haû dung rã é lé a sé kôlhang, haû Woi-nyí yhang gi, dang mai a wó tai htoq é nò-kying htê đông, nga-nhung é matú bo dũng xoq byi ri. ²⁷ Nga-nhung é i-myit unghkaû lé gôn wú é Sû gi, haû Woi-nyí myit é hkyô lé sê lhê, hkãsu mù gã le, haû Woi-nyí gi, Garai Gasang ô nau é đông, sãn-yũng bãng é matú bo dũng xoq byi ri.

Banshoq Lé Je Wó Ung Pyám Rã Hkyô

²⁸ Garai Gasang gi, Yhang myit sôn tô é eq rajung za, ji yû lui, Yhang lé chyitdap bãng é matú, lhunglhang lé ge é đông chyat kut é hkyô lé, nga-nhung sê lhê. ²⁹ Hkãsu mù gã le, Yhang Zo gi, gumang wui myo myo má zomún dut shãng gaq ga, Garai Gasang gi, hí te sê tô é bang lé, Yhang Zô é sãmlai eq wó pũng nhãng rã matú, hí mai masat to bê nghut ri. ³⁰ Hau htoq agó, Yhang, hí mai masat to bê bang lé gi, ji yu ri; ji yû bê bang lé gi, mara hkyut san byi ri; mara hkyut san byi é hui bang lé gi, hpungwup shingkang bò nhang ri.

³¹ Haû jãng gi, shí hkyô eq séng lui, nga-nhung hai tai shirã lhú? Garai Gasang gi, nga-nhung hkyam shut

† 8:23 Woi-nyí é sãng-hi ashi gã é gi, Woi-nyí gi, Garai Gasang byí é chyunghuq pé mã é sãng-hi lhum nghut lhê.

nghut jáng, nga-nhúng lé, ó yuq wá gyè wám kut râ lúhú?
³² Yhumsing é Yhangzo lé lhang a ha bûn é za, nga-nhúng banshoq bâng é matú ap byí pyâm é Sû gi, Yhang lé le, lhungháng lé le, rahá lai lai byi râ a nghut lúhú?
³³ Garai Gasâng èq hkyin yu to bê bang lé, ó yuq wá mara wó hûn râ lúhú? Garai Gasang gi, mara hkyut san byi Sû nghut ri. ³⁴ Hkrisduq Yesuq gi, shí hkám luí, shí hkâm é htoq agó, shi é mai lhoq dui toq yu é hui mù, Garai Gasâng é loqyo hkyam má nghut nyí luí, nga-nhúng é matú bo dúng xoq byí nyi bê nghut é yanmai, ó yuq wá mara wó byi râ lúhú? ³⁵ Hkrisduq é chytidap myit mai, nga-nhúng lé, hai eq wá wó lhoq kang râ lúhú? Gunjang huí é hkyo èq luq? Wuíhke huí é hkyo èq luq? Zing-ri huí é hkyo èq luq? Mutmó huí é hkyo èq luq? Gùng chîn dut huí é hkyo èq luq? Gyuq jung èq luq? Sham èq luq? ³⁶ Haú gi,

"Náng é yanmai, ngamoq, nyí wuí sat pyâm é huí nyi ri;

sat râ matú nyhi tô é sau pé lé su, ngamoq lé myit pyâm akô.*

ga kâ tô é eq rajung za nghut ri. ³⁷ A wó lhoq kang; nga-nhúng lé chytidap Su é yanmai, nga-nhúng gi, haú pé banshoq lé je wó ung pyâm é nghut lhê. ³⁸ Hkâsu mù gâ le, shí kôlhang, byùn kôlhang, maumang lagyô pé

nghut kôlhang, agè ashop é nat pé nghut kôlhang, shí ipyat nghut kôlhang, htang pyat nghut kôlhang, hai jung a-tsam pé nghut kôlhang, ³⁹ htoq tsáng mâ é nghut kôlhang, a-ô tsáng mâ é nghut kôlhang, hpan tô é gotú hai nghut kôlhang, nga-nhúng é Yhumsing Hkrisduq Yesuq má bo é Garai Gasâng é chytidap myit mai, nga-nhúng lé wó lhoq kang pyám râ a nghut nghú, ngò gi, hkyak wó sê yu ri.

9

Garai Gasang Hkyin Yu É Israelaq Byu Pé

¹ Ahkuí, ngò gi, Hkrisduq má tengmán é dang taí râ; ngò a mhaú é lé, haú Chyoiyúng Woi-nyí gi, ngá é unghkaú myit má hkyak saksé hkâm nyi ri. ² Ngò gi, ngá é myit nhiklum má, gyai yhang yón kuq nyi é eq ayang hpuzô nyi lhê. ³ Hkâsu mù gâ le, ngò gi, ngá é byuhú, ngá é gumang wui é matú, nhing é hui luí Hkrisduq eq gang le lhang gè râ su gâ ri. ⁴ Haú bang gi, Israelaq byu pé nghut lhê. Zo yín yû huí é hkyô le, hpungwup shingkang le, dangshikaq pé le, tará lé myang hap yu é hkyô le, noqkuq yhúm má noqkuq é hkyô le, danggidiq pé lé le, yhangmoq wó yu akô nghut ri. ⁵ Haú mying hû é íchýí iwâ pé gi, yhangmoq é íchýí iwâ pé nghut luí, byu é hkyam đông gon jáng, Hkrisduq gi,

yangmoq amyû mâ é nghut ri. Yhang gi, lhunglhang lé up é, ahtum abyuq hky-a-on huí é Garai Gasang nghut ri! Amen.

6 Haû gi, Garai Gasang é danggidiq akôm dut byuq bê nghû nau é a nghut. Hkâsu mù gâ le, Israelaq byu pé banshoq bang gi, Israelaq byû akying chyat a nghut kó nghut ri. 7 Abraham é awut ashín banshoq bang gi, yhang é zo wuí akying chyat nghû a wó taí é nghut lhê. Hau é malaí, "Isak đông mai lo é lé, náng é awut ashín nghû són byi râ nghut lhê."* gâ tô ri. 8 Radông taí sháng ga jáng, gungsho mai hku é zo wuí gi, Garai Gasang é zo wuí akying a nghut kó, danggidiq eq sêng é zo wuí za sheq, Abraham é awut ashín pé đông són byi é nghut lhê. 9 Hkâsu mù gâ le, "Masat tô é ahkying má, ngò dum taû lé mù, Sarah gi, yuqzo hkû râ nghut lhê."* ga taí tô é danggidiq é yanmai nghut lhê.

10 Haû za a nghut, Rebeka é yangzô nhiktang é îwa gi, nga-nhúng é îwa nghut su Isak rayuq za nghut lhê. 11-12 Nghut kôlhang, Garai Gasang myit hpyit to mù hkyin yu é hkyô gi, muzó mai a nghut é za, hkyin ji yù Su é yanmai nghut é lé, wó gíng nyi sháng gaq ga, haû zozúm nhik a hku lé shí é htoq agó, ge é eq a ge é muzó haí lhang a kut shimá, "Haû ko sù yuq gi,

tiq sù yuq lé dojaú râ nghut lhê."* ga, Rebeka lé taí kyô tô é nghut lhê. 13 Haû gi, "Yakup lé, ngò chyt dap lhê, nghut kôlhang, Eso lé gi, a ngui é nghut lhê."* ga kê tô é eq rajung za nghut ri.

14 Haû nghut é yanmai, nga-nhúng hkâsu nghû taí râ? Garai Gasang gi, a tará é sù nghut lhê lú? Ratsuí lhang a nghut! 15 Hkâsu mù gâ le,

"Ngò, shogyo nhikmyin naù sù lé, shogyo nhikmyin râ nghut lhê;

Ngò, jeju byi naù sù lé, jeju byi râ nghut lhê."*

ga, Mosheq lé Yhang taí ri.

16 Haû mù luí, haû hkyin yu é hkyô gi, byû yut yut ô nau é yanmai le a nghut, shikut é yanmai le a nghut, Garai Gasang é shogyo nhikmyin é yanmai za nghut lhê.

17 Hkâsu mù gâ le, Chyúmdang má, "Náng chyáng Ngá é a-tsam wó tân shit râ eq mingkan gón má Ngá é myìng lhoq pyo é hui râ matú sheq, Ngò, nang lé lhoq toq kat é nghut lhê."* ga, Hpara-uq lé taí ri. 18 Haû mù luí, Garai Gasang gi, shogyo nhikmyin naù sù lé, shogyo nhikmyin mù, myit lhoq htân byi naù sù lé, myit lhoq htân byi ri.

19 Nungmoq mâ é rayuq yuq, "Haû jáng, Garai Gasang gi, ngamoq lé haí mù mara hun nyi ashí lú? Yhang ô nau é hkyô lé, ó yuq wá wó hkûm pyâm lhê lú?" ga, ngo lé taí kó râ nghut lhê. 20 Nghut

* 9:7 Apûn 21:12 * 9:9 Apûn 18:10,14 * 9:11-12 Apûn 25:32 * 9:13 Mal 1:2-3 * 9:15 Htoq Lô 33:19 * 9:17 Htoq Lô 9:16

kôlhang, Garai Gasang lé dang tu sù byù nàng gi, ó yuq wá nghut lhê lúhú? Saí to hui bê é zè pé gi, "Nàng, haí mù ngo lé shí su kut saí tô lhê lúhú?" nghũ saí é Sù lé wó taí rã lúhú?
 21 Tso-au saí sù gi, tsohtung ralhũm mai za, hkik é tso-au pé eq a hkik é tso-au pé saí rã ahkáng wó lhê a nghut kô lúhú?

22 Garai Gasang gi, Yhâng é nhikmo-yo hkyô tũn shít luí, Yhang é a-tsam lé sé nhâng naũ kôlhang, htên byoq rã matú hen tô é, nhikmo-yo gíng é tso-au pé lé, myit hĩng hĩng shirang pyâm nyi é hkyô lé, taí rã jang haí joq ashí lúhú? 23 Hpungwup shingkâng é matú noq mai hen to bang nghut é, Yhang shogyo nhikmyin huí é bang lé, Yhâng é agũn agó é hpungwup shingkang lé sé nhâng naũ mù, Yhang haũ su kut é nghut jáng, taí rã haí joq ashí lúhú? 24 Haũ bang gi, Yudaq byu pé mai za a nghut, tũngbaũ pé mai le ji yù huí é bang nga-nhúng nghut lhê.
 25 Haũ eq rajung za, Hosea laiká má Yhang taí tô é gi,

"Ngá é byù myũ a nghut é bang lé, 'Ngá é byù myũ' nghũ;
 Ngò a chyit é byizo lé 'Ngò chyit sũ' nghũ wut rã nghut lhê."*

gã ri. 26 Haũ mù,

"Nungmoq gi, ngá é byù myũ pé a nghut.' nghũ yhangmoq lé taí é jowò má yhang,

yhangmoq gi, 'Rũ dui nyi é Garai Gasang yhangzô pé' ga wut é hui kó rã nghut lhê."*

gã ri.

27 Esai-aq le, Israelaq byu pé eq séng luí garu taí é gi, "Israelaq yhangzo yhangshũ pé gi, wuĩshuq lung-aũ yàm mã é semuĩ su myo kôlhang, myit gyó tô é bang za sheq hkyi yu é hui kó rã nghut lhê.

28 Hkãsu mù gã le, haũ Yhumsĩng gi, myidãm htoq má Yhâng é tarã jéyáng hkyô lé hân hân lhoq dik lhoq htũm pyám rã nghut lhê."*

gã ri.

29 Haũ eq rajung za, hí lé Esai-aq taí tô é gi, "A-tsam dik shoq bò sũ haũ Yhumsĩng za, nga-nhúng lé, awut ashín a myhit to byĩ é nghut jáng, nga-nhúng gi, Sodom wã su dut byuq luí, Gomoraq myuq eq pung byuq rã nghut lhê."*

gã ri.

Israelaq Byu Pé A Lumjĩng Kô É Hkyô

30 Haũ mù, nga-nhúng hkãsu nghũ taí rã lúhú? Dingmán hkyô lé a chãng hkat é tũngbaũ pé gi, haũ lé wó yù bekô; haũ gi, lumjĩng hkyo é yanmai wó yu é dingmán hkyô nghut ri.

31 Nghut kôlhang, tarã eq séng

é dingmán hkyô lé châng hkat é Israelaq byu pé gi, haú lé a wó yù kó nghut ri. ³² Haí mù a wó yù kô é lúhú? Yhangmoq gi, lumjǐng myit èq châng hkat kô é a nghut é za, muzó pè èq châng hkat kô é yanmai, a wó yù kô é nghut ri. Yhangmoq gi, "htung htê râ luqgok" má htung leng bekô nghut ri. ³³ Haú,

"Wú keq, htung leng râ luqgok eq myit leqbat nhâng râ luqmó cham lé, Ngò, Zi-un bùm má lhez to lúí,

Yhang lé lumhkaú sù gi, hkâ-nhám le hoq hpu é hui râ a nghut."*

ga kâ tô é eq rajung za nghut ri.

10

¹ Gumang wuì ê, ngò gi, haú Israelaq byu pé hkyi yu é hui kó sháng gaq nghú, gyai yhang myit shirông luí, Garai Gasâng chyáng yhangmoq é matú kyúdung byí nyi lhez. ² Hkâsu mù gâ le, yhangmoq gi, Garai Gasâng é hkyô lé gyai yhang myit zuq é bang nghut é lé, ngò saksé hkâm lhez; nghut kôlhang, yhangmoq myit zuq é hkyô gi, hpaqchyí bo é đông a nghut kó. ³ Yhangmoq gi, Garai Gasâng chyáng mai jé lé é dingmán hkyô lé a sé kômù, yhumsing dingmán bûn é hkyô lé za ho shikut nyi kô é yanmai, Garai Gasâng é dingmán hkyô hkaú má a nyi kó nghut ri. ⁴ Hkrisduq gi,

lumjǐng bang yuq hkangmó, dingmán é má wó jé kó sháng gaq ga, jep é tarâ ló htum jang dut bê nghut ri.

⁵ Mosheq gi, "Haú pé đông châng é sù gi, haú pé mai asak duì râ nghut lhez."* ga, jep é tarâ eq sêng é dingmán hkyô lé kâ sân kyô tô é nghut lhez. ⁶ Nghut kôlhang, lumjǐng hkyô eq sêng é dingmán hkyô gi, "Náng é myit nhiklhum má, 'Mauhking má, ó yuq doq ló râ lúhú?'"* (Haú gi, Hkrisduq lé shui gyó lò râ gá nau é nghut lhez), ⁷ haú a nghut jáng, 'Nik é jang má, ó yuq gyó wâng râ lúhú?'"* (Haú gi, Hkrisduq lé, shi é mai dui toq nhâng râ gá nau é nghut lhez.), nghu hkâtaí kó." gâ tô ri. ⁸ Haú jáng, hkâsu gâ tô ri lúhú? "Haú mungdang gi, nàng eq chyâng nyi ri; náng é nhut má le, náng é myit nhiklhum má lé nghut nyi ri."* gâ tô ri. Haú gi, ngamoq hko taí é lumjǐng hkyô eq sêng é mungdang nghut lhez. ⁹ Haú mù, "Yesuq gi, Yhumsing nghut ri." nghu náng é nhut eq yin yu mù, Garai Gasang gi, Yhang lé, shi é mai dui toq nhâng bê nghut lhez nghu, náng é myit nhiklhum má lumjǐng é nghut jáng, nàng gi, hkyi yu é hui râ nghut lhez. ¹⁰ Hkâsu mù gâ le, byù gi, myit nhiklhum má lumjǐng jáng, mara hkyut san byí é hui mù, nhut mai yin yu jáng, hkyi yu hui é nghut lhez. ¹¹ Haú Chyúmdang taí é gi, "Yhang lé lumhkaú é sù ó

* 9:33 Esai 8:14; 28:16 * 10:5 Nhung 18:5 * 10:6 Tarâ Pun 30:12 * 10:7 Tarâ Pun 30:13 * 10:8 Tarâ Pun 30:14

yuq le, hkâ-nhám lháng hoq hpû é hui râ a nghut."*¹² Hkâsu mù gâ le, Yudaq byù eq tûngbaù pé é gyoro má gam hkoq é hkyô hái le a joq é za, haù Yhumsîng gi, ban-shoq bâng é Yhumsîng nghut lhê mù, Yhang lé wut dung bang lhunglháng lé, agùn agó shimân byî ri. ¹³ Hkâsu mù gâ le, "Haù Yhumsîng é myîng lé lâng é bang yuq hkgangmó gi, hkyi yu é hui râ nghut lhê."*¹⁴ gâ tô ri.

¹⁴ Haù nghut lé gi, yhang-moq a lumjîng é sù lé nhîng, hkâsu wó wut dung kó râ lhú? Yhangmoq a wó gyô wú é sù lé nhîng, hkâsu wó lumjîng kó râ lhú? Hko kyô é sù a nyi le nhîng, hkâsu wó gyo kó râ lhú? ¹⁵ Nhang kat é a hui le gi, yhangmoq hkâsu kut wó hko kyo kó râ lhú? Haù eq rajung za, "Gabú danglù pé hko kyo bâng é hkyî-kám pé gi, hkâ-í yhang yúng ri myhi-nhung!"*¹⁶ ga kê tô ri.

¹⁶ Nghut kôlhang, Israelaq byu pé banshoq bang gi, gabú danglù lé hap yù kô é a nghut. Hkâsu mù gâ le, Esai-aq gi, "Yhumsîng ê, ngamoq é danglù lé ó yuq wá lumjîng é lhú?"*¹⁷ ga taí ri. ¹⁷ Haù nghut mù luí, lumjîng myit gi, danglù lé wó gyô é mai lò mù, danglù gyô yu é gi, Hkrisduq é mungdang mai lo é nghut lhê. ¹⁸ Nghut kôlhang, ngò myi kó lé: yhangmoq gi, a wó gyô wú kô é nghut lhê lhú?

Yhangmoq gi, wó gyo gù za nghut lhê, haù eq rajung za, "Yhangmoq é htê gi, myidàm htoq banshoq má jâm bê nghut ri;

yhangmoq é mung-dang pé gi, mingkan htungchyûn hkgangmó má jé bê nghut ri."*¹⁹

gâ tô ri. ¹⁹ Ngò dum myi kó lé: Israelaq byu pé gi, a sê gyo kô é nghut lhê lhú? Mosheq sâng-hi má taí é gi,

"Byù rahú lháng a nghut bang eq, Ngò, nungmoq lé manôn nhâng râ;

sê gyo nyan a bo é amyù eq, Ngò, nungmoq lé wú nhik-yo nhâng râ nghut lhê."*²⁰

gâ ri. ²⁰ Hau htoq agó, Esai-aq a gyuq a wàm taí é gi,

"Ngo lé a ho é bang gi, Ngo lé myang hô bekô nghut ri;

Ngá hkyô lé a myî é bang lé, Ngò htoq shit bê nghut lhê."*²¹

gâ ri. ²¹ Nghut kôlhang, Israelaq byu pé eq séng luí, Yhang taí é gi,

"Ngò gi, jîno a gyô é eq ngegáng-htu é byù myú lé, nyi wuî Ngá loq lham mù ji nyi lhê."*²²

gâ ri.

11

Israelaq Byu Pé Lé A Hengik Pyám

¹ Haù mù luí, ngò myi kó lé, Garai Gasang gi, Yhâng é

* 10:11 Esai 28:16 * 10:13 Yol 2:32 * 10:15 Esai 52:7 * 10:16 Esai 53:1

* 10:18 Hkya-on 19:4 * 10:19 Tarâ Pun 32:21 * 10:20 Esai 65:1 * 10:21

Esai 65:2

byu pé lé he-ngik pyám bê nghut lhê lhú? Ratsuí lháng a nghut! Ngò yang le, Israe-laq byù myû nghut luí, Abraham é awut ashín eq Ben-yamyin hú mâ é sù nghut lhê. ² Garai Gasang gi, Yang te sê to gû nghut é, Yhâng é byu pé lé a he-ngik pyâm é nghut lhê. Eliyaq eq sêng é hkyô Chyúmdang má bo tô é lé, nungmoq a sé kó lhú? Garai Gasâng é hí má, yang, Israe-laq byu pé lé mara hûn é gi, ³ "Yhumsing ê, yangmoq gi, Náng é myiqhtoí pé lé sat pyám kô é eq Náng é hkungga gyap pé lé tu lhêng pyâm akô nghut ri; ngò rayuq za myit gyó tô é nghut luí, ngo lé sat râ matú le yangmoq ho nyi akô nghut ri."☆ gâ ri. ⁴ Garai Gasang gi, yang lé, hkâsu ga tû taí é nghut lhê lhú? Haû gi, "Balaq hpara é hí má hkyihput a htuq shî é byù nyhit hkyíng lé, Ngá é matú myhit to lhê."☆ gâ é nghut lhê. ⁵ Haû eq rajung za, ahkuí gi, jeju yanmai hkyin yù huí é bang za myit gyó tô é nghut lhê. ⁶ Jeju yanmai nghut é nghut le gi, muzó é yanmai a nghut lo; muzó dông ru nghut le gi, jeju gi, jeju a nghut lo.

⁷ Haû nghut jáng, hkâsu lhú? Israe-laq byu pé gyai ho shikut kôhang, a wó kô é lé, hkyin htoq yù huí é bang kúm gi, wó bekô nghut ri. Góbang gi, myit lhoq htân byi é hui akô nghut ri; ⁸ haû gi,

"Garai Gasang gi, hkû-nyí

jé shoq, yangmoq lé nhikshi jit é woi-nyí lé le, a wó myang é myoqjí lé le, a wó gyô é nohkyap lé le, byi to bê nghut ri."☆

ga kâ tô é eq rajung za nghut ri. ⁹ Dawiq taí é le,

"Yangmoq é zangbó gi, yangmoq é matú, dumzo eq lhai, myit leqbat jowò eq lató hpuq hkyô dut sháng gaq;

¹⁰ Yangmoq myoq a wó myâng shoq, myoqjí lhoq chut pyám byi é hui sháng gaq;

yangmoq é nunghkûng gi, ayang wòlai wun goí nhang é hui sháng gaq."☆

gâ ri.

Tûngbaù Pé Lé Hkyi Yu É Hkyô

¹¹ Ngò dum myi kó lé: Israe-laq byu pé gi, a wó dum gè râ í leqbat byuq bekô lhú? Ratsuí lháng a nghut! Yangmoq é tarâ lu lai hkyo é yanmai, yangmoq lé manôn nhâng râ matú, hkyi yù hkyô gi, tûngbaù pê chyáng jé byuq é nghut lhê. ¹² Nghut kôhang, yangmoq é tarâ lu lai hkyô gi, mingkân é matú wó sùt hkyô eq, yangmoq sum pyám é hkyô gi, tûngbaù pê é matú wó sùt hkyô dut é nghut jáng, yangmoq é byíng jup hkyô gi, je riyhang kô é wó sùt hkyô dut râ nghut ri-nhung!

13 Nungmoq tûngbaù pé lé ngò taí nyi lâ: ngò gi, tûngbaù pé é lagyo nghut nyi é u má, ngá é hpungmû lé hpautap nyi lâ. 14 Haù gi, ngá é amyú pé lé manôn myit wó bô nhâng mù, yhangmoq ra-am lé wó hkyi yù râ lé myit myoqbyu é hkyô nghut lâ. 15 Hkâsu mù gâ le, yhangmoq lé he-ngik pyâm é hkyô gi, mingkân é matú Garai eq buinùm xoq hkyô dut bê nghut jáng, yhangmoq lé dum hap yu é hkyô gi, shi é mai dui toq é dông dut bê a nghut lhi? 16 Hau htoq agó, sâng-hî ashi dông nhông byi é mún ra-am gi, chyoiyúng é nghut jáng, muk htung gón gi, chyoiyúng é nghut lâ; haù amyit gi, chyoiyúng é nghut jáng, akoq pé le chyoiyúng é nghut lâ.

17 Haù tsanlun akoq pé* ra-am gi, lhoq hkyui pyâm é hui luí, yosô tsanlun a-nyuq† nghut sù nàng gi, haù pé má xoq é hui mù, haù tsanlun amyit é xû lé bo shuq lom é nghut jáng, 18 akoq haù pé lé hkâwú tiq pyám kó. Nungmoq haù su kut é nghut jáng, nungmoq gi, haù amyit lé htuoq é a nghut é za, amyit haù sheq nungmoq lé htuoq é hkyô lé, nungmoq myit sé keq. 19 Nungmoq kúm gi, "Ngò, haù má xoq é hui râ matú sheq, akoq haù pé gi, lhoq hkyui pyâm é hui é ru nghut lâ." ga taí râ nghut lâ. 20 Haù su gi, nghut

lâ. Nghut kôlhang, yhangmoq gi, a lumjîng é yanmai, lhoq hkyui pyâm é hui kômù, nungmoq kúm gi, lumjîng é yanmai, wó ging tîng nyi é nghut lâ. Hkâ gumrong nyi, gyuq kyum nyi keq. 21 Hkâsu mù gâ le, Garai Gasang gi, akoq akying pé lé a ha bûn é nghut le gi, nungmoq lé le ha bun râ a nghut.

22 Haù mù luí, Garai Gasâng é shogyo nhikmyin hkyô eq htân htân kut pyâm é hkyô lé, myit wú keq: leqbat é bang lé htân htân kut pyâm kôlhang, nungmoq gi, Yhâng é shogyo nhikmyin hkyô má xoq nyi nyi é myhâng, nungmoq lé gi, shogyo nhikmyin nyi râ nghut lâ. Haù a nghut jáng, nungmoq le, zân hpyit pyâm é hui râ nghut lâ.

23 Yhangmoq gi, a lumjîng hkyô lé tô pyám kô é nghut jáng, dum xoq yu é hui kó râ nghut lâ; hkâsu mù gâ le, Garai Gasang gi, yhangmoq lé dum wó xoq yu é Sû nghut lâ. 24 Haù mù gâ le, yosô tsanlun gàm akoq nghut gù nungmoq lé hpyit yù mù, htûng a nghut é dông, hô é tsanlun agàm má xoq é nghut le gi, haù akoq akying pé nghut é yhangmoq gi, ó le ó é tsanlun- ngut akying má xoq yu é lé je riyhang hui râ nghut lâ ô!

Israellaq Byu Pé Hkyi Yu É Hui Râ Hkyô

25 Haù mù, gumang wui ê, nungmoq a nghutbun kó

* 11:17 Tsanlun akoq pé gi, Israellaq byu pé lé taí nau é nghut lâ. † 11:17 Yosô tsanlun a-nyuq gi, tûngbaù pé lé taí nau é nghut lâ.

sháng gaq nghû, zau tô é hkyô shî lé, nungmoq a sé dut râ lé, ngò a ô nau é nghut lhê: haû gi, tûngbaù pé wang lo é laké byíng é hkûn jé shoq, Israelaq byu pé ra-am gi, myit lhoq htan é huí é hkyô nghut lhê.

²⁶ Hau htâng sheq, Israelaq amyû banshoq bang hkyi yu é hui râ nghut lhê. Haû gi,

"Hkyi yù Sû gi, Zi-un bùm mai htoq lô râ nghut lhê;
Yhang gi, Garai lé nunghtáng tô pyâm é hkyô lé, Yakup é awut ashín mai huí sêng pyám byi râ nghut lhê.

²⁷ Ngò, yhangmoq é yubak mara lé huí sêng pyám byi jáng,
haû gi, yhangmoq lé Ngò byi tô é Ngá é dang-shikaq nghut lhê."*

ga kê tô é eq rajung za nghut ri.

²⁸ Haû gabú danglù eq séng luí ga jang, yhangmoq gi, nungmoq é matú gyè nghut akò; nghut kôlhang, hkyin htoq yû hkyô eq séng luí ga jang, yhangmoq gi, myíng hû é íchyí îwa pê é yanmai, chyitdap é huí akò nghut ri; ²⁹ hkâsu mù gâ le, Garai Gasâng é chyunghuq pé eq Yhang ji yu é hkyô lé gi, wó htaí lhik pyâm é a nghut. ³⁰ Nungmoq gi, Garai Gasâng é jìno a gyô é bang radàm dut wú kô é nghut kôlhang, yhangmoq jìno a gyô é yanmai, ahkuí kúm, shogyo nhikmyin hkyô wó hkam yù bekô nghut é su, ³¹ ahkuí,

yhangmoq gi, nungmoq wó hkam yu é Garai Gasâng é shogyo nhikmyin hkyo é yanmai, shogyo nhikmyin hkyô lé wó hkam yù kó sháng gaq ga, yhangmoq le, ahkuí, jìno a gyo bang dut bekô nghut ri. ³² Hkâsu mù gâ le, Garai Gasang gi, byù lunglhang bang lé, shogyo nhikmyin hkyô wó tûn shit shoq ga, lunglhang bang lé, jìno a gyo hkyo é shúm dut nhang to bê nghut ri.

Hkya-on Kungtôn Dang

³³ Ô! Garai Gasâng é agùn agó é sùt nghut é, hpaqchyí byéng-yá eq nyan hpaqchyí gi, hkâ-í yhang nik ri-nhung!

Yhâng é tarâ jéyáng hkyô gi, ung sê jung a nghut nhung!

Yhang kut é hkyô pé gi, hkâ-í yhang ho htoq wuí jung nghut ri-nhung!

³⁴ "Haû Yhumsing é myit lé, ó yuq wá ung sê lhê lhú? Yhâng é hpaqchyí byi sù gi, ó yuq wá dut wú é lhú?"*

gâ ri.

³⁵ "Garai Gasâng èq jeju dum tau byi râ dut shoq, ó yuq wá, Garai Gasang lé byi wú é lhú?"*

gâ ri.

³⁶ Hkâsu mù gâ le, joq mijoq gi, Yhâng chyáng mai nghut mù, Yhang dông mai nghut luí,

Yhâng é matú chyat
nghut ri. Haû hpung-
wup shing kang gi,
Yhâng chyáng ahtum abyuq
ru joq nyî sháng gaq ô!
Amen.

12

*Dui É Hkungga Pé Dut Râ
Hkyô*

¹ Haû mù luî, gumang wui
ê, nungmoq é gungdu pé lé,
Garai Gasang myit ngui ô
nau é eq chyoiyúng é, dui
é hkungga dông nhông byi
keq nghû, Garai Gasâng é
shogyo nhikmyin hkyô mai,
ngò, nungmoq lé wum byî kat
lê. Haû gi, woi-nyî hkyô
dông nungmoq noqkuq dojaú
é hkyô nghut lê. ² Míngkan
shí lhum é sâmlai dông a cháng
lo é za, myit sik wó yû rà
dông nungmoq é a-kyang lé
htaî pyám byi nhâng keq. Haû
hkûn sheq, Garai Gasâng é ge
é, myit ngui é eq gumjup é
ô nau hkyô lé, nungmoq wó
chyâm, wó sê gàm hkoq yû kó
rà nghut lê.

³ Hkâsu mù gâ le, ngo lé byî
tô é jeju yanmai, nungmoq
yuq hkan gmó lé ngò taî kôlé:
nungmoq gi, yhumsing gùng
lé lai shoq a nghutbûn é
za, ó le ó lé, Garai Gasâng
èq lumjîng myit tsing gàm
byî to bê eq rajung za, myit
yù gíng é í za myit yù keq.

⁴ Nga-nhúng yuq hkan gmó
é gungdu ralhum má gi,
gungdu showui showang pé
myo myo bo é nghut luî,
gungdu showui showang
haû pé banshoq gi, jai chûng

jang a pung é nghut lê.
⁵ Haû eq rajung za, myo
myo nghut é nga-nhúng le,
Hkrisduq má gungdu ralhum
za dut luî, yuq hkan gmó gi,
rayuq eq rayuq gungsho sêng
lhum é bang chyat nghut
lê. ⁶ Nga-nhúng lé byî tô é
jeju yanmai, nga-nhúng wó é
chyunghuq gi, gotû tû nghut
lê. Byù rayuq é chyunghuq
gi, myiqhtoi htoî é nghut
jáng, yhâng é lumjîng hkyô
eq rajung za htoi sháng gaq;
⁷ dojaú é nghut jáng, dojaú
sháng gaq; mhoq kyô é nghut
jáng, mhoq kyo sháng gaq;
⁸ myit wum byî é nghut jáng,
myit wum byi sháng gaq; ra
châ é bang lé garúm byî é
nghut jáng, a ha bûn é za byi
sháng gaq; shuí u é nghut
jáng, lumluq tung shuí u
sháng gaq; shogyo nhikmyin
hkyô shit é nghut jáng, gabú
myit èq kut sháng gaq.

Chyitdap Myit

⁹ Chyitdap myit má gegùn
labyoq a ge bò. Agè ashop dut
é lé, nhik noq pyám keq; ge é
lé, myit tuî nyî keq. ¹⁰ Rayuq
eq rayuq, gumang chyitdap
myit mai lhumzui lhum keq.
Rayuq eq rayuq, yhumsing
gùng htoq je hpautap lhum
keq. ¹¹ Myit zuq hkyô má,
hkâ-nhám le wum a lhoq
shôm é za, nungmoq é woi-
nyî hkyô má myit toq nyî mù,
haû Yhumsîng lé dojaú nyî
keq. ¹² Myit myoqbyù hkyô
má gabú keq; wuihke hkyô
má hkam jan keq; kyûdung
hkyô má lhumzui keq. ¹³ Ra
châ tô é Garai Gasâng é byu pé

lé gàm byi keq. B́ng hkulum é lé rago kut keq.

14 Nungmoq lé zing-rî é bang lé shimân byi keq; shimân byi keq, hkâ-nhing kó. 15 Gabú é bang eq rahá bo gabú keq; yón é bang eq rahá bo yón keq. 16 Rayuq eq rayuq byìn hpyé gohut huî nyi keq. A nghutbùn é za, nyi yap hkyô nyhûm bang eq zùm yap keq. Hpaqchyî bo é sù su hkâ-myt ngàm kó.

17 Ó yuq lé le, agè ashop é yanmai, agè ashop é đônglató hkâhpuq kó. Yuq hkanqmó é myoq hí má ge é lé kut rã rago myit keq. 18 Wó dut é nghut jáng, nungmoq wó dut é í, yuq hkanqmó eq nguingón shoq nyi keq. 19 Ngá é buinùm wui ê, lató a hpuq é za, Garai Gasâng é nhikmo-yo hkyô lé sheq láng nyi keq. Hkâsu mù gà le, "Ngò sheq lató hpuq rã sù nghut lhê; ngò lató hpuq rã."* ga, haû Yhumsîng taî ri ga kã tô ri. 20 Haû mù,

"Nungmoq lé gyè kut sù zòmut é nghut le gi, byi tso keq; yhang wuîshit é nghut le gi, rajung jung byi huq keq.

Haû đông kut jáng, nàng, yhang é ulhum htoq má gyúng é myigye bum to byi é nghut lhê.*

ga le kã tô ri. 21 Agè ashop é gi, nungmoq lé a ung pyám sháng gaq, ge é hkyo èq agè ashop é lé ung pyám keq.

13

Ahkáng Ayá Wó Bâng Ô Má Nyi Rã Ê Hkyô

1 Yuq hkanqmó gi, up é ahkáng ayá wó bâng é a-ô má nyi ra rã nghut lhê; hkâsu mù gà le, Garai Gasâng chyáng mai za a nghut le gi, up é ahkáng ayá joq é a nghut. Joq tô é ahkáng ayá pé gi, Garai Gasâng èq byi tô é chyat nghut lhê. 2 Hau é yanmai, up é ahkáng ayá lé gumlau toq é sù gi, Garai Gasâng byi tô é up é ahkáng ayá lé gumlau toq é sù nghut ri; haû su kut é bang gi, tarã jéyáng é hui zo rã hkyô lé ho yù nyi é bang nghut akô. 3 Hkâsu mù gà le, uphkanq é bang gi, ge é hkyô kut bâng é matú gyuq nán hpo a dut é za, shut shaî hkyô kut bâng é matú sheq dut é ru nghut lhê. Up é ahkáng wó sù lé gyuq é mai lut nau lhê a nghut lí? Haû jáng, ge é hkyô kut aq, haû hkûn, yhang, nang lé hkya-on rã nghut lhê. 4 Hkâsu mù gà le, yhang gi, náng é matú ge é akyú kut byi rã nghut é, Garai Gasâng é dui-nhâng zoshâng nghut lhê. Nghut kôlhâng, nàng, shut shaî hkyô kut é nghut le gi, gyuq nán nyi aq; haî mù gà le, yhang gi, shâm lé ajè wun tô é a nghut. Yhang gi, Garai Gasâng é dui-nhâng zoshâng nghut mù, shut shaî hkyô kut sù lé dam byi rã matú nhikmo-yo Su é gunglik nghut lhê. 5 Haû mù luí, dam byi rã lé chiq é yanmai za a

nghut, yhumsîng nhik bô râ é yanmai le, haû up é ahkáng ayá wó bâng é a-ô má nyi râ dut lhê.

⁶ Nungmoq hkansê kat râ é gi, hau é yanmai le nghut lhê; hkâsu mù gâ le, haû up é ahkáng ayá wó bang gi, Garai Gasâng é dui-nhâng zoshâng wui nghut lhê mù, uphkang é mù lé, ahkýing byíng shoq wùn waq nyi akô nghut ri. ⁷ Yuq hkanmó lé byi âng é eq rajung za byi keq; hkansê kat byi ang sù lé gi, hkansê kat byi keq; kang kat byi ang sù lé gi, kang kat byi keq; gyuq kyum ang sù lé gi, gyuq kyum keq; hkungga ang sù lé gi, hkungga keq.

Rayuq Eq Rayuq Chyitdap Lhum Râ Hkyô

⁸ Rayuq eq rayuq chyitdap lhûm é chyîn mai lai lui, hai chyîn le hkâdap lhum kó; hkâsu mù gâ le, góyuq lé chyitdap é sù gi, haû jep é tarâ lé lhoq dik bê sù nghut ri. ⁹ "Su-myi sulàng lú hkyô hkâkut," "Byù hkâsat," "Hkâhkau," "Hkâ-myoqnoq,"* gâ tô é hkunmó pé eq gotù hkunmó haî nghut nghut, "Náng gûng lé náng chyitdap é su, náng é chyangnâm mâ é bang lé le chyitdap aq."* gâ é tarâ má lo jup to bê nghut lhê. ¹⁰ Chyitdap myit gi, chyangnâm mâ é byù lé a ge é haî le a kut é nghut lhê. Haû mù lui, chyitdap myit gi, haû jep é tarâ lé lhoq dik é hkyô nghut ri.

¹¹ Haû mù, ahkuî lhê é ahkýing yàm-yoq lé sê gyo lui, haû hkyô lé kut keq. Nungmoq yhup mui é mai bûn gyíng râ ahkýing jé bê; haî mù gâ le, nga-nhûng é hkyi yù hkyô gi, lumjíng hi é hkun lhê htoq má ahkuî je chyáng bê nghut ri. ¹² Haû myín ahkýing gi, lai byuq ló râ za nghut bê; nyí ahkýing gi, jé lô berâ nghut lhê. Haû mù lui, mauchut é muzó lé tô pyám mù, maubó é gyehking lé wut to sháng. ¹³ Ye lhai é eq shuq wut é, ashop é dông gungsho zùm yap é eq shut é dông nyi zô lhúm nau é myit bo é, mabyoq jishûm htoq é eq manon é pé a kut é za, nyí-káng lhê su, ge é a-kyang dông nyi yap sháng. ¹⁴ Hau htoq agó, Yhumsîng Yesuq Hkrisduq lé, mebu su wut to keq; yubak gungsho ô nau é dông lhoq dik râ matú hkâ-myit kó.

14

Gumang Wui Lé A Jéyáng Râ Hkyô

¹ Lumjíng myit má wum nyhóm sù lé, myíng myo nhô zâ é hkyô pé lé a jéyáng byí é za hap yù keq. ² Byù rayuq é lumjíng myit gi, jung hkanmó zô ri; nghut kôlháng, lumjíng myit nyhóm sù gotù rayuq gi, mhan-haq hpoqnoq za zô ri. ³ Jung hkanmó zo sù gi, a zo sù lé a ge wú tiq pyám; jung hkanjung mó a zo sù gi, zo sù lé mara a ge byi; hkâsu mù gâ le, Garai Gasang gi, yhang lé

hap yu to bê nghut ri. ⁴ Nàng gi, ó yuq wá nghut mù, góyuq é dui-nhâng zoshâng lé jéyáng lê lú? Yhang, yap ging kôlhang, leqbat kôlhang, yhâng é yhumsing myit za nghut lê. Yhang gi, wó yap ging râ nghut lê; hkâsu mù gâ le, haû Yhumsing gi, yhang lé wó yap ging nhâng Sû nghut lê.

⁵ Rayuq myit é gi, buinyi ra-nyí gi, gó nyí htoq je ge lê gâ ri; dum rayuq myit é gi, nyí wuî rajung za nghut lê gâ ri. Yuq hkangmó gi, yhumsing myit yu é lé a úng-âng nyi sháng gaq. ⁶ Buinyi ra-nyí lé, ahkyak lê ga myit yù sù gi, haû Yhumsing é matú kut é nghut ri. Zô é sù gi, Garai Gasang lé jeju hkya-ôn é yanmai, haû Yhumsing lé bun luí zô nyi ri; a zo sù le, haû Yhumsing lé bun luí Garai Gasang lé jeju hkya-ôn nyi ri. ⁷ Hkâsu mù gâ le, nga-nhúng ó yuq nghut kôle, yhumsing matú za asak dui é a nghut; ó yuq nghut kôle, yhumsing matú za shi é a nghut. ⁸ Nga-nhúng asak dui nyi le gi, haû Yhumsing é matú dui é ru nghut lê; nga-nhúng shi byuq le gi, haû Yhumsing é matú shi é ru nghut lê. Haû mù, asak dui nyi kôlhang, shi byuq kôlhang, nga-nhúng gi, haû Yhumsing eq sêng é bang nghut lê.

⁹ Haû su mù, Hkrisduq gi, shi byuq bang eq asak dui bâng é Yhumsing dut sháng gaq ga, shi hkâm mù dum dui toq é nghut lê. ¹⁰ Haû mù,

nàng gi, haî mù náng é gumang hpó lé jéyáng nyi lê lú? Haî mù náng é gumang hpó lé wú tiq nyi lê lú? Nga-nhúng lhunglhang bang gi, Garai Gasang é tarâ jéyáng tanghkuq hí má yap râ bang chyat nghut lê. ¹¹ Hkâsu mù gâ le,

"Haû Yhumsing gi, 'Ngò rû dui nyi é eq rajung za, Ngá é hí má hkyih-put hkangmó htuq râ nghut lê;

Garai Gasang lé, shô hkangmó eq yín yû kó râ nghut lê.' ga taî ri."^{*}

ga kê tô ri. ¹² Haû mù luí, nga-nhúng yuq hkangmó gi, yhumsing kut laî lo é hkyô lé, Garai Gasang chyáng shit ra râ nghut lê.

¹³ Haû nghut mù, nga-nhúng gi, rayuq eq rayuq tarâ jéyáng lhùm é hkyô lé tô pyám sháng. Ó yuq nghut kôlhang, yhumsing é gumâng é hkyowuî má, myit leqbat jowò eq htung htê jowò a to byi râ matú, myit sidiq keq. ¹⁴ Haû Yhumsing Yesuq má nghut nyi é sù ngò gi, haî jung zoshuq nghut kôlhang, yhang baú yhang a sansêng a dut é hkyô lé, hkyak wó sé luí, jing nyi lê. Nghut kôlhang, ó yuq le, rajung jung lé a sansêng ga myit yu é nghut jáng, yhang é matú, zè haû gi, a sansêng é nghut lê. ¹⁵ Nàng zô é zoshuq yanmai, náng é gumang hpó myit a ngón é nghut le gi,

nàng, chyitdap myit mai sô nyi é sũ a nghut lo. Hkrisduq shĩ hkám byi bê sũ nghut é, náng é gumang hpó lé, nàng zoshuq é đông mai hkâlhoq hten pyám. ¹⁶ Nàng, ge ri nghũ myit yu é hkyô lé, agè ashop é đông hkâtaĩ pyám nhâng. ¹⁷ Hkâsu mù gâ le, Garai Gasâng é mingdán gi, zo zo shuq shuq hkyô a nghut é za, dingmán hkyô, nguingón hkyô eq Chyoiyúng Woi-nyí má gabú é hkyô ru nghut lhê. ¹⁸ Haĩ mù gâ le, shĩ hkyô đông mai Hkrisduq lé dojaú é sũ gi, Garai Gasang ô nau é sũ eq byu pè eq hkya-ôn é hui sũ nghut ri.

¹⁹ Haũ mù luĩ, nguingón hkyô má nyi rã eq, rayuq eq rayuq wum byĩ lhum rã hkyô lé, shikut nyi keq. ²⁰ Zoshuq é yanmai, Garai Gasâng é muzó lé hkâlhoq hten pyám. Zoshuq lunglhang gi, sansêng é chyat nghut lhê; nghut kôlhang, góyuq lé myit leqbat nhang é jung lé zô é sũ gi, shut é nghut lhê. ²¹ Tsibiyiq wing shuq é eq sho zô é hkyô má nghut kôlhang, gotũ haĩ jung kut é nghut kôlhang, náng é gumang hpó lé myit leqbat nhang é nghut le gi, a kut le je ge lhê.

²² Haũ mù, haũ pé eq séng luĩ, nàng lumjĩng é haĩ nghut kôle, nàng eq Garai Gasâng gyoro má za joq nyi sháng gaq. Yhumsĩng ge lhê gâ é eq, yhumsĩng gũng yhumsĩng mara byi jang a joq é sũ gi, hkungsô wó nyi ri. ²³ Nghut

kôlhang, úng-âng é myit eq zô é nghut le gi, mara byĩ é hui ri, haĩ mù gâ le, yang zô é gi, lumjĩng myit mai a nghut; lumjĩng myit mai a kut é haĩ nghut kôlhang, mara nghut ri.

15

Góyuq Lé Myit Ngón Nhâng Rã Hkyô

¹ Lumjĩng hkyô má wum-o bo é nga-nhúng gi, yhumsĩng myit ngón rã hkyô lé a ho é za, wum-o a bò bãng é wum nyhóm hkyô lé, hkam jan byĩ nyi rã dut lhê. ² Nga-nhúng yuq hkangmó gi, yhumsĩng é chyangnãm mã é su é ge é hkyô dut rã matú, yang wó kô myhang lò shoq, yang lé lhoq ngón byĩ nyi sháng. ³ Hkâsu mù gâ le, Hkrisduq lhang gi, Yhânggũng yang lhoq ngón é a nghut; haũ gi, "Nang lé rhoĩ bãng é dang gi, Ngá chyáng gyó ke bê nghut ri."* ga, kã tô é eq rajung za nghut ri. ⁴ Hkâsu mù gâ le, laĩ lò bê hkũn kã tô é lunglhang gi, nga-nhúng lé mhoq byi rã matú chyat kã tô é nghut lhê; haũ gi, Chyũmdang mã é hkam jan hkyô eq myit wum byi hkyô đông mai, nga-nhúng myit myoqbyũ hkyô wó rã matú nghut lhê.

⁵ Haũ hkam jan hkyô eq myit wum byi hkyô lé byĩ é Garai Gasang gi, nungmoq, Hkrisduq Yesuq é htâng châng nyi é u lé, nungmoq yangchang rading ralhum za dut é woi-nyĩ byi sháng

gaq; ⁶ haû jáng sheq, nungmoq gi, i-myt rahkat eq nhut htê ralhúm èq za, nganhûng é Yhumsîng Yesuq Hkrisduq é Yhângwa nghut Sû, Garai Gasang lé, wó hkya-on kungtôn kó râ nghut lhê.

⁷ Haû mù luí, Hkrisduq gi, nungmoq lé hap yù bê é eq rajung za, Garai Gasâng é hpungwup shingkang lé lhoq htoq shit râ matú, nungmoq le, rayuq eq rayuq hap yu lhum keq. ⁸ Hkâsu mù gâ le, ngò, nungmoq lé taí kôlé, haû myîng hû é íchyí íwâ pé lé byí tô é danggidiq pé lé lhoq ging râ matú, Hkrisduq gi, Garai Gasâng é tengmán hkyo é malaí, Yudaq byu pé é dui-nhâng zoshâng dut bê nghut ri. ⁹ Haû mù, Garai Gasâng é shogyo nhikmyin hkyo é yanmai, haû tûngbaù pé, Garai Gasang lé wó hkya-on kungtôn kó râ nghut lhê. Haú hkyô gi,

"Haú mù luí, tûngbaù pé chyáng má, Nang lé, ngò hkya-on râ nghut lhê;

Náng é myîng lé, ngò hkya-on mahkôn râ nghut lhê."[☆]

ga kâ tô é eq rajung za nghut ri. ¹⁰ Dum,

"Tûngbaù pé ê, Yhâng é byu pé eq rahá gabú nyí keq."[☆]

gâ tô ri. ¹¹ Dum,

"Nungmoq tûngbaù pé lhunglhâng bang ê,

haû Yhumsîng lé hkya-on keq, byù myù lhunglhâng bang ê, Yhang lé hkya-on mahkôn hkôn keq."[☆]

gâ tô ashí nghut ri. ¹² Hau htoq agó, Esai-aq taí é gi,

"Yese é Amyit gi, yuq htoq lô luí, Yhang gi, byù myù chângjup é ahtoq má up râ sù nghut lhê;

tûngbaù pé gi, Yhang má myit myoqbyù kó râ nghut lhê."[☆]

gâ ri.

¹³ Haû myit myoqbyù hkyô byí é Garai Gasang gi, Yhang lé lumhkau nyí é bang nungmoq lé, gabú hkyô banshoq eq nguîngón hkyô lhoq pyîng byí sháng gaq; haû jáng sheq, nungmoq gi, Chyoiyúng Woi-nyí é wum-o a-tsâm èq, myit myoqbyù hkyô wó byíng mui nyí kó râ nghut lhê.

A Gyuq A Wam É Za, Poluq Laiká Kâ É Hkyô

¹⁴ Ngá é gumang wui ê, nungmoq gi, ge é hkyô byíng jup é bang, hpaqchyí má gumjup é bang, rayuq eq rayuq mhoqshit lhum é má kûng é bang nghut é lé, ngá gûng ngò yhang hkyak lumjîng lhê. ¹⁵ Ngò gi, nungmoq lé dum lhoq pûn é dông, ahkyak é pé ra-am lé a gyuq a wàm kâ kat bê nghut lhê. ¹⁶ Hkâsu mù gâ le, tûngbaù pé gi, Chyoiyúng Woi-nyí dông mai lhoq sân-yúng é hui luí, Garai Gasâng èq hap yù gíng é hkungga wó

☆ 15:9 Hkya-on 18:49 ☆ 15:10 Hkya-on 32:43 ☆ 15:11 Hkya-on 117:1

☆ 15:12 Esai 11:10

dut kó sháng gaq ga, Garai Gasâng é gabú danglù lé hkô râ hkyangjong é wò dông, tungbaù pé chyáng, Hkrisduq Yesuq é hpungmù wùn sù dut râ matú, Garai Gasang, ngo lé jeju byí é yanmai nghut lhê.

¹⁷ Haù mù luí, ngò gi, Garai Gasang lé dojaú é hkyô eq séng luí, Hkrisduq Yesuq má nghutbùn nyi lhê. ¹⁸ Ngò gi, ngò taí é eq zui saí é muzó dông le, haù Woi-nyí é a-tsam chùng mù, kumlhá pé eq laklaí kumlhá pé dông le, tungbaù pé lé, Garai Gasâng é jìno gyo shoq shuí ù é má, ngo lé Hkrisduq nhang é muzó hkyô lé taí é mai lai luí, gotù haí lé le wám taí é a nghut. ¹⁹ Haù mù luí, ngò gi, Yerusalem wà mó mai Il-urikhkam mau jé shoq é hkyô awui ayàm jam shoq, Hkrisduq é gabú danglù lé hko kyo bê nghut lhê. ²⁰ Ngò hkâ-nhám le myit tuí nyi é hkyô gi, góyuq hi tô é apùn awang má dum a puq saí pyâm é za, Hkrisduq lé a sé shí é jowò má gabú danglù hko kyo râ hkyô nghut lhê. ²¹ Haù gi,

"Yhâng é hkyô lé, taí kyô é a hui shí é bang, myàng kó râ nghut luí,

a wó gyô wú é bang, sê gyo kó râ nghut lhê."^{*}

ga kâ tô é eq rajung za nghut ri. ²² Haù mù luí, ngò, nungmoq chyáng lé jé râ lé, anum num hkyikyo luqlhum dut nyi é gi, muzó hau é yanmai nghut lhê.

Romaq Myuq Lé Ló Kum Râ Sôn É Hkyô

²³ Nghut kôlhang, ahkuí gi, shí mau pé má ngò zui saí râ jowò a joq lo é nghut mù, nungmoq lé myàng nau nyi é zanwut myo myo nghut bê eq rajung za, ²⁴ ngò, Sipin ming shut ló é hkùn, nungmoq chyáng wàng râ sôn tô lhê. Ngò gi, lai ló é hkùn, nungmoq lé lò sô kum mù, nungmoq eq rayoq zo zùm yap ngón é htâng má sheq, ngá é hkyowui matú, nungmoq haù mai htuqbang kat râ lé, ngò myoqbyu tô lhê. ²⁵ Ahkuí, ngò kúm gi, Yerusalem wà mó má é sân-yúng bang lé dojaú râ matú, haù wâ shut e ló é hkyolat má nghut nyi lhê. ²⁶ Hkâsu mù gâ le, Makedoni eq Ahkaia mau má é bang gi, Yerusalem wà mó má é sân-yúng bâng chyáng má é myùng bâng é matú, garúm chyunghuq hkyui tsing nau bùm bekô nghut ri. ²⁷ Yhangmoq gi, haù su kut nau bùm bekô nghut ri, gè gè ga jáng, haù gi, yhangmoq chyín dap tô é dông ru nghut lhê. Hkâsu mù gâ le, haù Yudaq byu pé é woi-nyí eq séng é shimân jeju lé, tungbaù pé bo hkam yù bê nghut le gi, yhangmoq é sutzè shimân jeju lé, Yudaq byu pé eq chôm chùng râ chyín dap tô é dông nghut lhê. ²⁸ Haù mù luí, ngò gi, muzó shí lhum ban kut mù, garúm chyunghuq shí lé, yhangmoq wó hap yù bê lé hkyak sê é

htâng má, Sipin ming shut ló râ nghut mù, laí ló uchyang, nungmoq chyáng lé sô kum râ nghut lhê. ²⁹ Ngò gi, nungmoq chyáng lé jé é hkún, nungmoq é matú Hkrisduq é shimân jeju byíng jup é èq jé lé râ nghut é lé, ngò sê lhê.

³⁰ Gumang wui ê, ngá é matú Garai Gasâng chyáng kyûdung byí é dông, ngò wum kat yhang shikut é hkyô má nungmoq bo wàng lòm râ matú, nga-nhûng é Yhumsîng Yesuq Hkrisduq eq Woi-nyí é chyitdap myit é yanmai, ngò, nungmoq lé wum tai tsuq kat lhê. ³¹ Yuda mau mâ é a lumjîng bâng chyáng mai, ngò hkyi yu é wó hui luí, Yerusalem wà mó má ngò wùn waq é muzó lé, haú mâ é sân-yúng bang hap yù gíng é wó dut râ matú kyû bo dung byi keq. ³² Haú jáng sheq, ngò gi, Garai Gasang ô nau é dông mai, gabú myit èq nungmoq chyáng wó jé lé mù, nungmoq eq rahá wum-o wó yû râ nghut lhê. ³³ Haú nguingón hkyo é Garai Gasang gi, nungmoq banshoq bang eq rahá rû nyi nyi sháng gaq ô. Amen.

16

Shi-kyám Dang

¹ Ngò gi, Kenhkrea noqkuq hpúng mâ é hpungtê, nga-nhûng é gu-nhá Hpobe lé, nungmoq chyáng shichyen byí kat lhê. ² Nungmoq gi, sân-yúng bang kut gíng é eq rajung za, haú Yhumsîng má yhang lé hap yù luí, yhang râ tô é hkyô haí nghut

kôle, yhang lé htuqbang keq. Hkâsu mù gâ le, yhang gi, byú myo myo lé le, ngo lé le, gyai yhang garúm lai bê sù nghut lhê.

³ Hkrisduq Yesuq má ngò eq mù wùn luzúm nhik nghut é, Priskila eq Akula lé bo shi-kyám byi keq. ⁴ Yhangnhik gi, ngá é asak é matú, yhangnhik é asak sum râ í yhang dut wú kô é nghut mù, ngò za a nghut, tûngbaù pé é noqkuq hpúng pé banshoq le, yhangnhik lé jeju bûn lhê.

⁵ Yhangnhik é yhûm má chôm hui zup é noqkuq hpúng lé le, bo shi-kyám byi keq.

Asia mau má, Hkrisduq lé sâng-hi lumjîng wang lo é, ngò chyitdap é Epanetu lé bo shi-kyám byi keq.

⁶ Nungmoq é matú gyai yhang shikut wú bê sù nghut é Mariq lé bo shi-kyám byi keq.

⁷ Ngò eq rahá htóng lúng wú bê nghut é, ngá é buinùm, Androniku eq Yunia nhik lé bo shi-kyám byi keq. Yhangnhik gi, lagyô pé má myoqdong wó su nhik nghut é htoq agó, ngá é hí má, Hkrisduq má ngò a nyi shi le nyi bê sù nhik nghut akô.

⁸ Haú Yhumsîng má, ngò chyitdap é sù, Ampliatu lé bo shi-kyám byi keq.

⁹ Hkrisduq má, ngamoq é mù zui luzúm nghut é Orban eq ngá é chyitdap luzúm Staku lé, bo shi-kyám byi keq.

¹⁰ Hkrisduq má chyam é hui mù, wó lûm bê sù, Apele lé bo shi-kyám byi keq.

Aristobulu eq sêng é yhumbyù wuì lé bo shi-kyám byi keq.

¹¹ Ngá é buinùm Herudion lé bo shi-kyám byi keq.

Haù Yhumsîng má nghut nyî bê bang, Narkiso é yhumbyù wuì lé bo shi-kyám byi keq.

¹² Haù Yhumsîng má mù zui shikut é myiwê nhik, Truhpena eq Truhposa lé bo shi-kyám byi keq.

Haù Yhumsîng má mù zui gyai yhang shikut é myiwe góyuq, ngá é chyitdap luzúm Persi lé bo shi-kyám byi keq.

¹³ Haù Yhumsîng má hkyin yu é hui bê sù, Ruhpu lé le, ngá nu dông nghut wú bê nghut é Ruhpû é yhângnu lé le, bo shi-kyám byi keq.

¹⁴ Asunkritu, Hpelegon, Herme, Patroba, Herma eq yhangmoq eq rahá nyi é gumang wuì lé, bo shi-kyám byi keq.

¹⁵ Hpilologu, Yulia, Nerea eq yhâng é nhammó eq, Olumpa, yhangmoq eq rahá nyi é sân-yúng bang banshoq lé, bo shi-kyám byi keq.

¹⁶ Rayuq eq rayuq, chyoiyúng bopuq é èq shi-kyâm lhum keq.

Hkrisduq é noqkuq hpúng pé banshoq gi, nungmoq lé shi-kyám dang sang kat akò nghut ri.

¹⁷ Gumang wuì ê, nungmoq é lumjîng hkyô má, nungmoq mhoq hkam yù bê nghut é mhoqshit hkyô eq shai lhùm é, gam hkoq hkyô pé eq myit leqbat hkyô pé lhoq htoq é

bang lé sidiq keq nghû, wum taì tsuq kat lhê. Yhangmoq lé koi pyám keq. ¹⁸ Hkâsu mù gâ le, haù sù é bang gi, nga-nhûng é Yhumsîng Hkrisduq lé dojaú é bang a nghut é za, yhumsîng é wamdaù matú dojaú é bang nghut akò. Yhangmoq gi, myit nú-nhâm é bang lé, dang ngón dang nguì dông mhaù zô akò nghut ri. ¹⁹ Nungmoq, jino gyo kô é hkyô lé, yuq hkangmó wó gyo bê nghut ri; haù mù, ngò gi, nungmoq é matú gyai yhang gabú nyi lhê; nghut kôlhâng, ge é hkyô eq séng luí gi, nungmoq hpaqchyî bò mù, agè ashop hkyô eq séng luí gi, nungmoq a bo lòm râ lé, ngò ô nau ri.

²⁰ Nguingón hkyo é Garai Gasang gi, a myáng má, nungmoq é hkyiwa ô má Tsadán lé nang pyeq pyám râ nghut lhê.

Nga-nhûng é Yhumsîng Yesuq é jeju gi, nungmoq eq rahá nghut nyî sháng gaq ô.

²¹ Ngá é mù zui luzúm Timohti gi, nungmoq lé shi-kyám dang sang kat ri; haù eq rajung za, ngá é buinùm wuì Luki, Yason eq Sosipata pé le, shi-kyám dang sang kat akò nghut ri.

²² Laiká shî lé bo ká sù ngò Tertiu gi, haù Yhumsîng má nungmoq lé shi-kyám kat lhê.

²³ Ngo lé le, noqkuq hpúng gón lé le, bíng hkulum é sù Ge-u gi, nungmoq lé shi-kyám dang sang kat ri.

Haù wa mâ é ngùnzui sù Erastu eq nga-nhûng é gumang hpó Kuartu gi,

nungmoq lé shi-kyám dang sang kat akô. ²⁴ Nga-nhông é Yhumsîng Yesuq Hkrisduq é jeju gi, nungmoq lhunghâng bang eq rahá nghut nyí sháng gaq. Amen.*

²⁵ Byù myû chângjup bang lumjîng luî, Yhang é jîno gyo sháng gaq ga, a-nham pyat mai haq tô é hui kôlhang, ²⁶ ahkuî, ahtum abyuq é Garai Gasâng é hkunmó é yanmai, myiqhtoi laiká pé dông hpông shit é eq sé nhâng bê nghut é, sê gyo wuî é hkyo é shing-rán má cháng luî, ngá é gabú danglù eq Yesuq Hkrisduq é hkyô taî pyo é dông, nungmoq lé wó lhoq ging tíng byî é, ²⁷ rayuq za é hpaqchyî bo sù Garai Gasâng chyáng, Yesuq Hkrisduq dông mai, hpungwup shingkang gi, ahtum abyuq ru joq nyí sháng gaq ô! Amen.

* **16:24** Chyúmding ra-am má chyúmbun 24 shî a bo é nghut lhê.

KORINHTUQ

Pê Chyáng Hî Dàm

Hun Kat é Laiká

(1 Corinthians)

1 Garai Gasang ô nau é eq rajung za, Hkrisduq Yesuq é lagyo dut râ matú ji yù huí é sù ngò Poluq eq, ngamoq é gumang hpó Sositeni gi, 2 jowò hkanmó má nga-nhông é Yhumsîng Yesuq Hkrisduq é myîng lé lîng é bang eq rahá, chyoyúng bang dut râ matú ji yù huí é eq Hkrisduq Yesuq má lhoq sân-yúng é huí é bang nghut é, Korinhtuq myuq mâ é, Garai Gasang é noqkuq hpúng lé, dang kyô kat lhê; Hkrisduq gi, ngamoq é eq yhangmoq é Yhumsîng nghut lhê.

3 Nga-nhông é Îwa Garai Gasang eq Yhumsîng Yesuq Hkrisduq chyáng mâ é jeju eq nguîngón hkyô gi, nungmoq chyáng ru joq nyí sháng gaq ô.

Hkrisduq É Yanmai Wó É Jeju

4 Garai Gasang jeju lé Hkrisduq Yesuq dông mai nungmoq lé byi bê nghut mù luí, ngò gi, nungmoq é matú Garai Gasang lé ayang jeju hkyâ-ôn nyi lhê. 5 Hkâsu mù gâ le, nungmoq gi, Hkrisduq dông mai, nungmoq dang taí é hkyô banshoq eq nungmoq é sumpsé hpaqchyí banshoq má je lhoq gumjup é huí bekô nghut ri. 6 Haú gi, Hkrisduq Yesuq eq séng luí,

ngamoq saksé hkâm é hkyô têng é lé, nungmoq chyáng shit nyi é nghut lhê. 7 Haú mù, nga-nhông é Yhumsîng Yesuq Hkrisduq dum htoq shit râ lé, nungmoq gyai myoqbyu lîng nyi é u má, nungmoq gi, woi-nyí hkyô eq sêng é chyunghuq haí lé le langhpyut kó râ a nghut. 8 Nga-nhông é Yhumsîng Yesuq Hkrisduq é buinyi má, nungmoq lé mara hùn râ hkyô a bò shoq, Hkrisduq gi, nungmoq lé, htáng shoq gingtîng nhang nyi râ nghut lhê. 9 Nga-nhông é Yhumsîng nghut é Yhang Zo Yesuq Hkrisduq eq rahá zùm yap râ matú, nungmoq lé ji yù bê sù Garai Gasang gi, lhumzui Sù nghut ri.

Noqkuq Hpúng Má Gam Hkoq Lhûm É Hkyô

10 Gumang wuî ê, nungmoq hkaú má gam hkoq lhûm é hkyô pé a joq é za, nungmoq é myit eq myit sôn wú é hkyô má gumjup shoq rading ralhum za dut nyi sháng gaq, nungmoq lhunglhâng bang rayuq eq rayuq byî hpyé gohut huí nyi keq nghû, ngò, nungmoq lé, nga-nhông é Yhumsîng Yesuq Hkrisduq é myîng mai dîng tôngbán kat lhê. 11 Ngá é gumang wuî ê, Hkloe é yhûm byù wuî gi, nungmoq hkaú má mabyoq htoq hkyô joq é lé, ngo lé hkyáng lo shit akô. 12 Ngò haú su nghû taí é gi, nungmoq mâ é rayuq yuq gi, "Ngò gi, Poluq htáng châng lhê." ga, góyuq gi, "Ngò gi, Apolo htáng

châng lhê." ga, dum rayuq gi, "Ngò gi, Kehpa htâng châng lhê." ga, dum góyuq gi, "Ngò gi, Hkrisduq htâng châng lhê." ga, taí bùm kô é yanmai nghut lhê.

¹³ Hkrisduq gi, gam hkoq é hui bê lhú? Ngò Poluq gi, nungmoq é matú tapzîng má jén sat é hui bê lhú? Nungmoq gi, ngá é myîng mai wui-myhup hkâm yù kô é lhú?

¹⁴ Ngò gi, Krispu eq Ge-u nhik mai lai luî, nungmoq ó yuq lé le wui-myhup a hkâm byî wú é yanmai, ¹⁵ nungmoq ó yuq le, ngá é myîng mai wui-myhup hkâm yù bê nghú a wó taí é nghut mù, ngò, Garai lé jeju hkya-ôn lhê. ¹⁶ (Stehpana é yhumbyù wuî lé le, ngò wui-myhup hkâm byî é nghut lhê, haú mai lai luî gotû ó lé hkâm byî záng ashî laq, ngò a myit bun lo nghut ri.) ¹⁷ Hkâsu mù gâ le, Hkrisduq, ngo lé nhang kat é gi, wui-myhup hkâm byi râ matú a nghut, gabú danglù hko kyo râ matú sheq nhang kat é ru nghut lhê; nghut kôlhang, waxâng zô wui é hpaqchyî byéng-yá dang dông hko kyô é a nghut mù, Hkrisduq é tapzing é a-tsam gi, akôm a dut byuq é nghut lhê.

Garai É A-tsam Eq Hpaqchyî Byéng-yá Gi, Hkrisduq

¹⁸ Hkâsu mù gâ le, tapzîng má Yesuq shî hkâm é hkyô eq sêng é danglù gi, htên byoq hui râ bâng é matú, danggang dut byuq ri; nghut kôlhang,

hkyi yu é huî nyi bang nga-nhông é matú gi, Garai Gasâng é a-tsam nghut ri. ¹⁹ Hkâsu mù gâ le, Chyúmdang má kâ tô é gi,

"Hpaqchyî bò bâng é hpaqchyî byéng-yá lé, Ngò lhoq htên pyám râ nghut lhê; nyan bò bâng é nyan lé, Ngò, ajè dut pyám nhâng râ nghut lhê."*

ga ri.

²⁰ Hpaqchyî byéng-yá bò bang gi, hkâmá lhú? Hpaqchyî laiká kung bang gi, hkâmá lhú? Ipyat shi é dang taí kung bang gi, hkâmá lhú? Garai Gasang gi, mingkân é hpaqchyî byéng-yá lé lhoq ngok pyám bê a nghut lhú?

²¹ Hkâsu mù gâ le, Garai Gasâng é hpaqchyî byéng-yá mai ga jang, mingkan zo wuî gi, yhumsing é hpaqchyî byéng-yá dông mai Garai Gasang lé a wó sé kô é yanmai, danggang gâ pyám byi kô é mungdang lé hko kyô é dông lumjîng bang lé hkyi yù râ matú, Garai Gasang myit hpyit é nghut lhê. ²² Yudaq byu pé gi, limik kumlhá pé lé dúng akô; Grik byu pé gi, hpaqchyî byéng-yá lé ho akô nghut ri. ²³ Nghut kôlhang, ngamoq gi, tapzîng má jén sat huî é Hkrisduq é hkyô lé hko kyô lhê. Haú gi, Yudaq byu pé é matú myit leqbat jowò eq tûngbaù pé é matú danggang dut byuq ri. ²⁴ Nghut kôlhang, Garai Gasâng èq ji yù huî é Yudaq

* 1:19 Esai 29:14

byu pé eq Grik byu pé é matú, Hkrisduq gi, Garai Gasâng é a-tsam eq Garai Gasâng é hpaqchyî byéng-yá nghut ri. ²⁵ Hkâsu mù gà le, Garai Gasâng é ngok hkyô gà é lháng gi, byu é hpaqchyî byéng-yá htoq má je gyaú ri; Garai Gasâng é wum nyhóm hkyô gà é lháng gi, byu é wum-o htoq má je gyaú ri.

²⁶ Gumang wui ê, Garai Gasang, nungmoq lé ji yu é hkûn, nungmoq hkâsu dut nyi é hkyô lé myit wú keq. Waxâng zô wui é nyi yap a-tsáng dông hpaqchyî byéng-yá bo é bang, ahkáng ayá wó é bang, zaugun suwún amyû mâ é bang a myô é nghut lhê. ²⁷ Nghut kôlhang, Garai Gasang gi, hpaqchyî byéng-yá bò bang lé hoq lhoq hpu râ matú, mingkan mâ é ngok bang gà é lé hkyin yu é nghut lhê; Garai Gasang gi, wum bô bang lé hoq lhoq hpu râ matú, mingkan mâ é wum nyhóm bang gà é lé hkyin yu é nghut lhê. ²⁸ Yhang gi, mingkân èq ahkyak tô é lé lhoq htên pyám râ matú, haí a nghut é lé le, mingkan mâ é aróng a bo é eq wú tiq pyám huí é lé le, hkyin yu é nghut lhê. ²⁹ Haú gi, ó yuq le, Yhâng é hí má a ge nghutbun râ matú nghut ri. ³⁰ Garai Gasâng é yanmai, nungmoq gi, Hkrisduq Yesuq má nghut nyî bekô nghut ri; Hkrisduq gi, nga-nhông é matú, Garai Gasâng chyáng mâ é hpaqchyî byéng-yá dut bê nghut ri. Haú gi,

nga-nhông é dingmán hkyô, chyoiyúng hkyô eq hkyi yù hkyô nghut ri. ³¹ Haú mù luí, "Gumrong é sù gi, haú Yhumsîng má gumrông sháng gaq."* ga kê tô é eq rajung za nghut ri.

2

Woi-nyí Mai Lo É Garai Gasâng É Hpaqchyî Byéng-yá

¹ Gumang wui ê, ngò gi, Garai Gasang eq sêng é saksé hkyô lé nungmoq chyáng tai pyô râ matú jé lé é hkûn, dang tai kûng é eq hpaqchyî byéng-yá mó bo é dông lé é a nghut. ² Hkâsu mù gà le, ngò, nungmoq eq rahá nyi é u lé, Yesuq Hkrisduq eq Yhang tapzîng má jén sat huí é hkyô mai lai luí, jung hkangmó lé tô-myhî pyám râ nghú myit hpyit yú bê nghut lhê. ³ Ngò gi, nungmoq chyáng jé lé é hkûn, wum nyhóm é eq gyai yhang gyuq nán é nghut lhê. ⁴ Ngá é danglù eq ngò hko kyô é hkyô gi, hpaqchyî bo é eq mhuí yu é dang pé dông a nghut é za, Woi-nyí é a-tsâm èq nungmoq lé shit é dông ru nghut mù, ⁵ nungmoq é lumjîng myit gi, byù é hpaqchyî byéng-yá má a nghut é za, Garai Gasâng é hpungwup a-tsam má nghut nyi lhê.

⁶ Nghut kôlhang, ngamoq gi, myit ding bê bang lé hpaqchyî byéng-yá dông nyo lhê; shí pyat lhê é hpaqchyî byéng-yá eq htên byoq nyi huí é shí pyat mâ é zaú wui é hpaqchyî byéng-yá dông kúm

a nghut. ⁷ Ngamoq taí é gi, haq tô é eq, ahkyíng nghu é lhang a joq shi mai nga-nhung é hpungwup shingkang é matú Garai Gasang tô to byí é hpaqchyí byéng-yá nghut é, Garai Gasang é zaú tô é hpaqchyí byéng-yá lé taí é ru nghut lhê. ⁸ Shí pyat lhê é zau wuí gi, hpaqchyí byéng-yá haú lé rayuq lhang a sê gyo kó nghut ri; yhangmoq sê gyo kô é ru nghut le gi, hpungwup shingkang bo é Yhumsing lé tapzing má jén sat pyám kó rá a nghut. ⁹ Nghut kôlhang, Chyúmdang má,

"Ó yuq èq le a myang wú, ó yuq èq le a wó gyô wú, ó yuq èq le a bún myit wú é hkyô lé, Garai Gasang gi, Yhang lé chyitdap bang é matú lajang to byi bê nghut ri."*

ga kê tô é eq rajung za nghut ri. ¹⁰ Nghut kôlhang, Garai Gasang gi, haú hkyô lé, Yhang é Woi-nyí dông nga-nhung lé hpông shit bê nghut ri.

Woi-nyí haú gi, jung hkangmó lé ho gôn wú é nghut luí, Garai Gasang é zaú tô é hkyô lé lhang ho gôn wú é sũ nghut ri. ¹¹ Byù má lúng é woi-nyí za a nghut jáng gi, byù rayuq myit é hkyô pé lé, ó yuq wá wó sê lhê lú? Haú eq rajung za, Garai Gasang é Woi-nyí za a nghut jáng, Garai Gasang myit é hkyô lé, ó yuq le wó sê é a nghut. ¹² Nga-nhung gi, mingkân é woi-nyí lé hap yu tô é a nghut

é za, Garai Gasang èq nga-nhung lé byí to bê jeju lé, ngamoq wó sê gyo rá matú, Garai Gasang chyáng mâ é Woi-nyí lé sheq hap yu tô é ru nghut lhê. ¹³ Haú mù luí, ngamoq gi, waxang zô wui é hpaqchyí byéng-yá èq mhoq byí é dang dông taí é a nghut, Garaí é Woi-nyí èq mhoq byí é dang dông taí é sheq ru nghut mù, woi-nyí eq sêng é tengmán hkyô lé woi-nyí eq sêng é dang dông taí sân kyô é nghut lhê. ¹⁴ Haú Woi-nyí lé a wó é sũ gi, Garai Gasang é Woi-nyí mai lo é hkyô pé lé a hap yu é nghut lhê; haí mù gâ le, haú pé gi, yhang é matú ngok é hkyô nghut luí, woi-nyí hkyô dông mai haú hkyô lé a wú é yanmai, yhang gi, haú pé lé a wó sê gyo nghut ri. ¹⁵ Woi-nyí eq sêng é byù gi, lunglhang lé wó jéyang lhê, nghut kôlhang, yhang lé kúm gi, ó yuq èq le wó jéyang é a nghut. ¹⁶ Chyúmdang má,

"Hkâsu mù gâ le, ó yuq wá, haú Yhumsing é myit lé sé mù, Yhang lé wó mhoqshit wú é lú?"*
ga kê tô ri. Nghut kôlhang, nga-nhung gi, Hkrisduq é myit lé wó é bang nghut lhê.

3

Noqkuq Hpúng Má Gam Hkoq Lhâm É Hkyô

¹ Gumang wui é, hí hkûn, ngò gi, nungmoq lé, Woi-nyí eq sêng é bang lé dông wó taí é a nghut; mingkan eq sêng é bang dông nghut kômù,

Hkrisduq má zonú su dut bang lé dông sheq taí wú é nghut lhê. ² Nungmoq gi, zoshuq apat lé a wó zo shi kó nghut é yanmai, ngò gi, nungmoq lé naú byi huq é nghut lhê.* Ahkuí lhang, nungmoq gi, zoshuq apat lé a wó zo shi kó nghut ri. ³ Nungmoq gi, mingkan eq sêng é bang ru nghut nyi ashí kó nghut ri. Hkâsu mù gâ le, manôn hkyô eq byoq lhum hkyô gi, nungmoq chyáng joq nyi é yanmai, nungmoq gi, mingkan eq sêng é bang nghut lhê a nghut kó luq? Mingkan zo wú su nyi yap bum lhê a nghut kó luq? ⁴ Rayuq gi, "Ngò gi, Poluq htâng châng lhê." ga, góyuq gi, "Ngò gi, Apolo htâng châng lhê." ga taí nyi bum kô é nghut jáng, nungmoq gi, mingkan zo wú nghut nyi bum lhê a nghut kó luq?

⁵ Apolo gi, ó wá nghut lhê? Poluq gi, ó wá nghut lhê? Nga-nhik gi, Garaí é dui-nhâng zoshâng za nghut lui, ó le ó lé, haú Yhumsing eq hun tô é muzó eq rajung za wùn waq é nghut lui, nungmoq gi, ngá-nhik dông mai wó lumjínk kô é ru nghut lhê. ⁶ Ngò gi, gabú danglù amyui lé hô kat, Apolo gi, wui hpyun byi, nghut kôlhang, yuq kô lò nhang é gi, Garaí Gasang za ru nghut lhê. ⁷ Haú mù, amyui hô kat sù eq wui hpyun byi sù gi, ahkyak mó a nghut, yuq kô lò nhang é

Garaí Gasang za sheq ahkyak ru nghut lhê. ⁸ Amyui hô kat sù eq wui hpyun byi su nhik myoqbyu tô é hkyô gi, rajung za nghut ri; nghut kôlhang, yhumsing shikut é eq rajung za, ó le ô é shigyaú chyunghuq wó yú kô rá nghut lhê. ⁹ Hkâsu mù gâ le, ngamoq gi, Garaí Gasang é mù zui luzúm wui nghut lhê; nungmoq gi, Garaí Gasang é yò, Garaí Gasang é yhùm nghut nyi akô.

¹⁰ Garaí Gasang, ngo lé byi to bê jeju eq rajung za, yhùm saí kung sù rayuq dông, ngò gi, yhùm apùn awang hi to bê nghut lhê; gotú byù gi, hau é ahtoq má saí toq jat nyi é nghut lhê. Nghut kôlhang, yuq hkangmó gi, yhumsing saí é má rago sidiq râ lhê. ¹¹ Hkâsu mù gâ le, hi to gù nghut é, Yesuq Hkrisduq nghu é yhùm apùn awang mai lai lui, ó yuq le, gotú yhùm apùn awang lé wó saí é a nghut. ¹² Yhùm apùn awang hau é ahtoq má, hîng, ngùn, hpaudap luqgok pé, sik, mhan, hkowá pé lé chùng mù saí jat kô é nghut jáng, ¹³ yuq hkangmó é muzó hkâsu nghut é hkyô lé lhoq htoq shit é hui râ nghut lhê. Haí mù lui gâ le, haú Yesuq é Buinyi gi, haú lé byu-myàng nhâng mù, haú buinyi lé gi, myi eq lhoq htoq shit râ nghut lhê. Haú myi gi, yuq hkangmó saí é muzó hkasú é nghut é lé chýâm râ nghut lhê. ¹⁴ Rayuq yuq saí é yhùm

* 3:2 Nungmoq lé naú byi huq é, gâ é gi, lui é hkyô pé lé hí mhoq byi é lé gâ lhê.

gi, ru gîng nyi é nghut jáng, haú yuq gi, yhang é shigyau chyunghuq wó yû râ nghut lâ. ¹⁵ Nghut kôlhang, yhûm haú nyé gyó byuq é nghut jáng, yhang gi, yhûm sûm byuq é hui zo râ nghut lâ; yhang gi, asak lut kôlhang, myishâm mai wó lut é byù su dut râ nghut lâ.

¹⁶ Nungmoq gi, Garai Gasâng é noqkuq yhûm nghut luí, Garai Gasâng é Woi-nyí gi, nungmoq má lúng nyí bê hkyô lé a sé kó lúh? ¹⁷ Rayuq yuq, Garai Gasâng é noqkuq yhûm lé lhoq htên é nghut jáng, Garai Gasang gi, haú yuq lé lhoq htên pyám râ nghut lâ. Hkâsu mù gâ le, Garai Gasâng é noqkuq yhûm gi, chyoiyúng lâ; nungmoq gi, noqkuq yhûm haú nghut akô.

¹⁸ Nungmoq gi, yhumsing gùng yhumsing hkâlhoq nghoq kó. Nungmoq mâ é rayuq yuq, shí ipyat mâ é byù nyí a-tsáng đông hpaqchyí byéng-yá bò sù ga myit é nghut jáng, hpaqchyí byéng-yá akying bò sù wó dut sháng gaq, yhang gi, a-ngok sù dut râ lâ. ¹⁹ Hkâsu mù gâ le, mingkan shî mâ é hpaqchyí byéng-yá gi, Garai Gasâng é hí má ngok é hkyô nghut ri. Haú gi, "Garai Gasang gi, hpaqchyí byéng-yá bò bang lé, yhangmoq é hpaqchyí má yhang myí to nhang ri."* ga kê tô é eq rajung za nghut ri. ²⁰ Hau htoq agó, "Haú Yhumsing gi, hpaqchyí

byéng-yá bò bang myit é hkyô pé akôm nghut é lé sê lâ."* ga le kê tô ri. ²¹ Haú mù luí, ó yuq le, byù eq sêng é hkyô má gyáng é dang a tái kó sháng gaq! Lhunglhang gi, nungmoq é chyat nghut lâ. ²² Poluq le, Apolo le, Kehpa le, mingkan le, dui nyi é hkyô le, shi é hkyô le, ahkuí lâ hkyô eq htângnùng mâ é hkyô le, banshoq gi, nungmoq é chyat nghut ri. ²³ Nungmoq gi, Hkrisduq é nghut akô; Hkrisduq gi, Garai Gasâng é nghut ri.

4

Hkrisduq É Lagyô Pé

¹ Haú mù luí, byu pé gi, ngamoq lé, Hkrisduq é dui-nhâng zoshâng wui đông eq Garai Gasâng é záu tô é hkyô pé lé tái pyô râ matú ap byí tô é hui bang đông sôn yù râ lâ. ² Haú đông nghut jáng, ap byí tô é hui bang gi, yhumsing lhumzui hkyô lé saksé shit râ dut lâ. ³ Nungmoq eq nghut nghut, waxâng zô wui é tarâ rûng mai nghut nghut, ngo lé jéyáng kê le, ngá é matú atiq azo za nghut lâ; gè gè ga jáng, ngá gùng ngò lhang a jéyáng é nghut lâ. ⁴ Haí mù gâ le, ngá gùng ngò mara a bò bún é nghut kôlhang, haú gi, ngo lé wó lhoq sân-yúng byí é a nghut. Ngo lé jéyáng é sù gi, haú Yhumsing nghut lâ. ⁵ Haú mù, masat tô é ahkying a jé shimá haí lé le a jéyáng é za, haú Yhumsing jé lé shoq, lánng nyí keq. Yhang

gi, mauchut hkaû má haq tô é pé lé byu-myàng nhâng mù, byu pê é myit nhiklhum má lúng é hkyô lé lhoq htoq shit râ nghut lhê. Haú hkûn, yuq hkangmó gi, ó le ó wó gíng é hkya-ôn hkyô lé, Garai Gasâng chyáng mai wó yù râ nghut lhê.

⁶ Gumang wui ê, ngò gi, "Kâ tô é gû mai hkâlai." gâ é sanghkyâng é lichyúm lé, ngamoq chyáng mai nungmoq wó mhoq yû sháng gaq nghû, nungmoq é akyu é matú, ngò eq Apolo má haú pé lé yù mù dangtú kut é nghut lhê. Haú hkûn, nungmoq gi, nghutbûn é dông, rayuq lé gi, wú ko, góyuq lé gi, wú shóm, a kut kó râ nghut lhê. ⁷ Ó yuq wá, nang lé, góyuq eq shaí shoq kut lhê lú? Nang hap yu é a nghut le gi, wó râ lú? Nang, hap yu é nghut le gi, a hap yu é dông haí mù nghutbûn nyi lhê lú?

⁸ Nungmoq gi, râ é lhunglhang gumjup bang nghut bekô hung! Nungmoq gi, wó bang dut gù nghut bekô hung! Ngamoq a lom é za, nungmoq gi, hkohkam pé dut bekô hung! Ngamoq le, nungmoq eq rahá hkohkam pé wó dut sháng gaq, nungmoq gi, gè gè yhang hkohkam pé dut to bekô râ lé, ngò hkâ-í yhang ô nau nyi lhê ô! ⁹ Nghut kôlhang, sat râ matú doqdan huí é shúm byû pé lé su, Garai Gasang gi, lagyô pé nghut é ngamoq lé de de kut htoq shit bê nghû, ngò wó myit ri. Ngamoq gi, nyi

mi-nyì, joq mijoq, maumang lagyô pé eq waxâng zô wui é hí má, wú kûn jung dông dut nhang é huí nyì gù bê nghut lhê. ¹⁰ Ngamoq gi, Hkrisduq é yanmai ngok é bang dông sôn yu é hui kôlhang, nungmoq kúm gi, Hkrisduq má hpaqchyî gyaí bo é bang dông dut bekô hung! Ngamoq gi, wum nyhôm é bang dông sôn yu é hui kôlhang, nungmoq kúm gi, wúm bo é bang dông dut bekô hung! Nungmoq gi, hkunggâ é huí akô; ngamoq kúm gi, hkunggâ é a hui hung! ¹¹ Shí hkyíng shí u jé shoq, ngamoq gi, zòmut wuishit huí é, mebu ajeq amyhâ dut huí é, nhuq bat huí é, yhumsing é nyì jowò a wó é bang nghut nyi lhê. ¹² Ngamoq gi, yhumsing loq èq yhang mú zui wum kat nyi lhê. Ngamoq gi, nhîng pyâm é hui jáng, shimân byi, zing-rí é hui jáng, jân pyám kut lhê. ¹³ Ngamoq gi, lumù gansang é hui jáng, dang ngón dang nguí tû nyo lhê. Ngamoq gi, ahkuí jé shoq, myidàm htoq mâ é hpoqkyuq hpoqpyâng eq mingkân é buzaq pé dông sôn yu é huí nyi lhê.

¹⁴ Ngò gi, nungmoq lé hoq lhoq hpu râ matú haú pé lé kâ é a nghut, ngá é chyitdap zo wui lé dông lhoq pûn kying râ matú ru nghut lhê. ¹⁵ Nungmoq gi, Hkrisduq má mhoqshit bang ra mun wó kô é nghut kôlhang, iwâ pé myo shoq wó kô é a nghut; hkâsu mù gâ lé, ngò gi, haú gabú

danglù dông mai, Hkrisduq Yesuq má nungmoq é iwa dut é nghut lhê. ¹⁶ Haù mù luí, ngò kut é su cháng keq nghû, ngò, nungmoq lé lung kat lhê. ¹⁷ Hau é yanmai, ngò gi, haù Yhumsing má lhumzui sù nghut é, ngò chyitdap é ngá zo dông nghut sù Timohti lé, nungmoq chyáng nhang kat é nghut lhê. Yhang gi, Hkrisduq Yesuq mâ é ngá é asak duì hkyô lé, jowò hkangmó mâ é noqkuq hpúng hkangmó lé ngò mhoq byí é eq rajung za, nungmoq lé lhoq pun byi râ nghut lhê.

¹⁸ Nungmoq mâ é ra-am gi, nungmoq chyáng ngò a dum jé lé râ su ngam pyám kômù, nghutbùn byuq bekô nghut ri. ¹⁹ Nghut kôlháng, haù Yhumsing gyô é nghut jáng, ngò gi, nungmoq chyáng hân za jé lé râ nghut lhê; haù hkùn, ngò gi, nghutbùn é byù haù bang hai taí é hkyô lé za a nghut, yhangmoq hai a-tsam wó é hkyô lé le gôn htoq râ nghut lhê. ²⁰ Hkâsu mù gâ le, Garai Gasâng é mingdán gi, taí é dang má bo é a nghut, a-tsam má sheq ru nghut lhê. ²¹ Nungmoq hká dông ô nau akô lú? Ngò gi, nungmoq chyáng, nuichùm hkat eq, a nghut jáng, chyitdap é eq nú-nhâm é myit mai lé lô ra râ lú?

5

*Ashop É Dông Gungsho
Zùm Yap É Hkyô Kut É Sù Lé
Lhoq Htoq Pyám Râ Hkyô*

¹ Nungmoq chyáng, ashop é dông gungsho zùm yap é hkyô joq é lé, hkyak taí hù lò bekô; haù gi, a lumjáng bâng chyáng lhang a dut wú é hkyô nghut é, yuqgè rayuq gi, yhangwâ é myiwe eq nyi zô lhum nyi é hkyô nghut ri. ² Nghut kôle, nungmoq gi, nghutbùn nyi bum akô nhung! Haù dông a nghut é za, nungmoq gi, yón é myit tân shit mù, haù su kut é byù lé, nungmoq é hpúng mai lhoq htoq pyám le, a gè kó lú? ³ Ngò gi, ngá gungdu, nungmoq eq rahá a nyi to kôlháng, ngá é i-myt gi, nungmoq eq rahá nghut nyi luí, gungdu jé nyi tô é dông mai, haù hkyô kut é sù lé jéyáng doqdan gù nghut lhê. ⁴ Nungmoq gi, nga-nhông é Yhumsing Yesuq é mying mai zup zing mù, ngá é i-myt gi, nungmoq eq rahá nghut nyi luí, nga-nhông é Yhumsing Yesuq é a-tsam le, nungmoq eq rahá nghut nyi é hkùn, ⁵ byù haù yuq lé, Tsadán é loq má ap byí pyám keq.* Haù jáng, Yhumsing é buinyi má, yhang é woi-nyí gi, hkyi yu é hui râ matú, yhang é yubak gungsho gi, lhoq htên pyám é hui râ nghut lhê.

⁶ Nungmoq é nghutbun hkyô gi, ge é a nghut. Mún† ra tsuí zo gi, muk long gón

* **5:5** Tsadán é loq má ap byí pyám keq gâ é gi, hpúng byù wui eq a zùm yap nhang lo râ lé taí é nghut lhê. † **5:6** Mún gâ é gi, yubak mara lé taí nau é nghut lhê. Lhoqlhai Poí jé jáng, Israelaq byu pé gi, yhangmoq wó é múnchi banshoq lé lhuí pyám mù, múnchi a bo é muk saí kô é nghut lhê.

lé wó lhoq daú nhang é lé, nungmoq a sé kó lúhú? ⁷ Nungmoq gi, múnchi a bo é bang nghut nyí kô é eq rajung za, múnchi a bo é muk htung asik su wó dut kô sháng gaq, múnchi axau lé lhuí pyám keq. Hkâsu mù gâ le, nga-nhúng é Lhoqlhai Poî sauzo, Hkrisduq gi, hkungga nhong é hui bê nghut lhê. ⁸ Haú mù luí, nga-nhúng gi, agè agaú hkyô eq hpuzo nhâng hkyô nghut é múnchi axau bo é đông a nghut é za, lhumzui hkyô eq tengmán hkyo é muk nghut é, múnchi a bo é muk eq, Poî haú lé kut nyí sháng.

⁹ Ashop é đông gungsho zùm yap é bang eq hkâzùm kó nghú, ngò, nungmoq lé, ngá é laiká má kâ kat byi bê nghut lhê. ¹⁰ Nghut kôlhang, mingkan shí eq sêng é, ashop é đông gungsho zùm yap é bang, myoqnoq é bang, mhaú zô é bang eq hparà noq é bang lé hkâzùm yap kó nghú é gi, a nghut. Haú su ru nghut le gi, mingkan htoq shí mai nungmoq htoq ló byuq ra kô râ nghut lhê. ¹¹ Nghut kôlhang, yhânggùng yhang gi, gumang ga kôle, ashop é đông gungsho zùm yap é, myoqnoq é, hparà noq é, lumù gansang é, î shuq wut é, mhaú zô é sù ó yuq eq le a ge zùm yap kô râ nghut lhê nghú, ahkuí, ngò, nungmoq lé kâ kat nau é nghut lhê. Haú sù é byù eq gi, rahá lhang hkâzo kó.

¹² Haú noqkuq hpúng shinggan mâ é bang lé jéyáng

râ gi, ngò eq haí sêng lhê lúhú? Nghut kôlhang, hpúng ahkaú mâ é bang lé nungmoq jéyáng râ dut lhê. ¹³ Hpúng shinggan mâ é bang lé gi, Garai Gasang jéyáng râ nghut lhê. Nghut kôlhang, "Haú agè agaú é sù lé, nungmoq chyáng mai lhoq htoq pyám keq."* gâ tô ri.

6

Lumjínng Bâng Hkaú Má Jéyáng Lhùm É Hkyô

¹ Nungmoq mâ é rayuq yuq gi, gumang góyuq eq dang-rhâng lhùm tô é nghut jáng, haú hkyô lé jéyáng nhâng râ matú, haú sân-yúng bâng é hí má taí râ malaí, Garai a wó bâng é hí má wám taí râ lúhú? ² Haú sân-yúng bang gi, mingkan lé jéyáng râ nghut é hkyô lé, nungmoq a sé kó lúhú? Nungmoq gi, mingkan lé jéyáng râ bang nghut kôle nhíng, tiq é mù pé lé wó jéyáng é bang a nghut kó lúhú? ³ Nga-nhúng gi, maumâng pé lé jéyáng râ nghut é hkyô lé, nungmoq a sé kô lúhú? Haú mù, shí pyat mâ é hkyô pé lé, gè gè yhang wó jéyáng kô râ nghut lhê ô! ⁴ Haú mù luí, nungmoq gi, dang-rhâng lhùm é mù pé joq é nghut jáng, noqkuq hpúng má ahkyak a nghut é bang lé tará agyì kut nhâng kô râ lúhú? ⁵ Ngò, haú su nghú taí é gi, nungmoq lé hoq hpu nhâng râ matú nghut lhê. Lumjínng bâng chyáng dang-rhâng lhùm é hkyô lé wó jéyáng râ hpaqchyí luq shoq bo é byù, nungmoq chyáng

rayuq lhang a nyi dut ko ra lu? ⁶ Nghut kolang, nungmoq gi, gumang yhangchang rayuq eq rayuq, a lumjing bang e hi ma lhang rung shok lum ako nhung!

⁷ Nungmoq hkau ma mu jeyang lum e hkyo joq e nghut jang, nungmoq gi, sum lugu nghut be. Goyuq eq shut le lhang ru ge le a nghut ko lu? Mhau zo e hui le lhang ru ge le a nghut ko lu? ⁸ Nghut kole, nungmoq yhang gi, mhau zo ko e eq shut ko e nghut lui, hau gi, nungmoq e gumang wui le kut e nghut le.

⁹ Age agau e bang gi, Garai Gasang e mingdan ma e shimân jeju a myang hkam yu ko ra nghut e hkyo le, nungmoq a se ko lu? Hka-na nyi ko. Ashop e dong gungsho zum yap e bang le, hpara noq e bang le, su-myi sulang lu e bang le, shiwa hpó kut e bang le, yuqge yhangchang nyi zo lum e mara kut shut e bang le, ¹⁰ hkau bang le, myoqnoq bang le, i shuq wut bang le, lumu gansang e bang le, mhau zo e bang le, Garai Gasang e mingdan ma e shimân jeju le myang hkam yu ko ra a nghut. ¹¹ Nungmoq ma e ra-am gi, hau su kut ko e bang nghut ako. Nghut kolang, nungmoq gi, nganhung e Garai Gasang e Woi-nyí eq Yhumsing Yesuq Hkrisduq e mying mai, mara hkyut san byi e, lhoq san-yung e eq chi san pyam byi e hui

beko nghut ri.

*Ashop E Dong Gungsho
Zum Yap E Hkyo*

¹² "Jung hkangmo kut ra ahkang ngo wo le." Nghut kolang, jung hkangmo gi, akyu byi e a nghut. "Jung hkangmo kut ra ahkang ngo wo le." Nghut kolang, hai jung eq le ngo le wo sing pyam ra a nghut. ¹³ "Zoshuq gi, wamdaui e matu nghut mu, wamdaui gi, zoshuq e matu nghut ri." ga nungmoq ra-am tai ko ra nghut le. Nghut kolang, Garai Gasang gi, hau i jung e le lhoq hten pyam ra nghut le. Gungdu gi, ashop e dong gungsho zum yap hkyo e matu a nghut e za, hau Yhumsing e matu nghut mu, hau Yhumsing gi, gungdu e matu nghut ri. ¹⁴ Garai Gasang gi, Yhang e a-tsâm eq, hau Yhumsing le, shi e mai lhoq dui toq yu be nghut mu, nga-nhung le le lhoq dui toq yu ra nghut le. ¹⁵ Nungmoq e gungdu pe gi, Hkrisduq e gungsho showui showang pe yhang nghut e le, nungmoq a se ko lu? Hau nghut le nhing, Hkrisduq e gungsho showui showang pe le yu mu, shiwa myhi pe eq rading ralhumi za kut pyam nhang ko ra lu? Hka-nham le a ge dut nhang! ¹⁶ Shiwa myhi eq gungsho zum e su gi, yhang eq gungsho ralhumi za dut be hkyo le, nungmoq a se ko lu? Hkasu mu ga le, "Yhangnhik gi, gungsho

ralhum za dut kô râ nghut lhê."☆ ga taí tô ri. ¹⁷ Nghut kôlhang, haú Yhumsîng eq rading ralhum za dut é sũ gi, woi-nyí má Yhang eq ralhum za dut bekô nghut ri.

¹⁸ Ashop é dông gungsho zùm yap é hkyô lé koi pyám keq. Byù rayuq kut shut é gotù mara pé banshoq gi, yhang é gungdu shinggan má nghut lhê; nghut kôlhang, ashop é dông gungsho zùm yap é hkyô kut shut é sũ gi, yhumsing gùng lé mara shut é sũ nghut ri. ¹⁹ Nungmoq é gungdu gi, Garai Gasâng chyáng mai nungmoq wó yû bê nghut é, nungmoq má lúng nyi é Chyoiyúng Woi-nyí é noqkuq yhûm nghut é lé, nungmoq a sé kô lhú? Nungmoq gi, yhumsîng gùng lé sing é bang a nghut. ²⁰ Hkâsu mù gâ le, nungmoq gi, ahpau ralhum byi mù wui hpyit tô é hui bê bang nghut akô. Haú mù luí, nungmoq é gungdû èq, Garai Gasang lé, hkunggâ é hkyô shit nyí keq.

7

Myí Yu É Eq Sêng É Hkyô

¹ Ahkuí, nungmoq kâ kat é hkyô pé eq séng luí ga jang, yuqgè rayuq gi, myí a yu le gè ri. ² Nghut kôlhang, ashop é dông gungsho zùm yap é hkyô gyai myô é yanmai, yuqgè hkanmó gi, yhumsing é myiwe wó râ lhê; myiwe hkanmó gi, yhumsing é yuqgè wó râ lhê. ³ Haú yhumsîng hpó gi, wò joq é eq rajung za, yhang

yhumsîng myhí eq zùm sháng gaq; haú dông za, yhumsîng myhí le, yhang yhumsîng hpó eq zùm sháng gaq. ⁴ Haú yhumsîng myhí é gungdu gi, yhanggùng yhang za sêng é a nghut, yhang é yhumsîng hpó eq le sêng lhê. Haú eq rajung za, yhumsîng hpó é gungdu gi, yhanggùng yhang za sêng é a nghut, yhang é yhumsîng myhí eq le sêng lhê. ⁵ Nungmoq myit huí lhum luí, kyûdûng é má rago ap nóng râ ahkyíng ayoq za a nghut jáng gi, rayuq eq rayuq hkâhe lhum kó. Nungmoq yhumsing gùng lé a wó hkanmó é yanmai, Tsadán èq gunglaú é a hui kô sháng gaq, ahkyíng ayoq haú lai jáng, rahá dum zùm keq. ⁶ Ngò, haú su nghut taí é gi, hkunmó hkyô é dông a nghut, ahkáng byí kat é dông ru nghut lhê. ⁷ Byù banshoq bang gi, ngò su nyi râ lé ô nau ri. Nghut kôlhang, yuq hkanmó gi, ó le ô é chyunghuq lé Garai Gasâng chyáng mai wó bum akô nghut ri; rayuq gi, rajung chyunghuq, góyuq gi, gó jung chyunghuq wó bum akô.

⁸ Ahkuí, myiwe a yù lô é bang eq chuimó pé lé ngò taí kôlé, ngò su, haú dông jâng nyi pyám kô é nghut le, yhangmoq é matú ge é hkyô nghut ri. ⁹ Nghut kôlhang, yhumsing gùng lé a wó hkanmó kô é nghut le gi, yhangmoq, myi yû myi ló râ lhê; hkâsu mù gâ le, myi su nyé luí ô nau nyi râ malaí, myi yu myi ló le je ge lhê.

¹⁰ Myi yû bê bang lé, ngò,

hkunmó hkyó kôlé, shî gi, ngò đông hkyô é a nghut, Yhumsing chyáng mâ é ru nghut lâ: Yhumsing myhí gi, yhâng é yhumsing hpô chyáng mai a ge gang râ nghut lâ. ¹¹ Nghut kôlhang, yhang gâng é nghut jáng, myi a dum ló é za nyi râ lâ, haú a nghut jáng, yhâng é yhumsing hpó eq dum xoq yú râ lâ. Yhumsing hpó le, yhâng é yhumsing myhí lé a ge kâng pyám râ nghut lâ.

¹² Góbang lé ngò shî su nghu tai kôlé, shî gi, Yhumsing chyáng mâ é a nghut, ngò đông mai tai é ru nghut lâ. Gumang rayuq yuq gi, lumjínng sù a nghut é yhumsing myhí wó é nghut le, myiwe haú, yhang eq rahá nyi nau é nghut jáng, yhang lé a ge kâng pyám râ nghut lâ.

¹³ Myiwe rayuq gi, lumjínng sù a nghut é yhumsing hpó wó é nghut le, yuqgè haú, yhang eq rahá nyi nau é nghut jáng, yhang eq a ge gang râ nghut lâ. ¹⁴ Hkâsu mù gâ le, haú a lumjínng sù yhumsing hpó gi, yhâng yhumsing myhí đông mai lhoq sân-yúng é hui bê nghut mù, a lumjínng sù yhumsing myhí le, lumjínng sù nghut é yhâng é yhumsing hpó đông mai lhoq san lhoq yúng é hui bê nghut ri. Haú a nghut jáng, nungmoq é zo wuí gi, a sanséng dut kô râ nghut lâ; nghut kôlhang, yhangmoq gi, haú đông mai, chyoiyúng bekô nghut ri.

¹⁵ Nghut kôlhang, haú a lumjínng sù gâng ló naú jáng gi, gâng ló sháng gaq. Lumjínng

é yuqgè nghut nghut, myiwe nghut nghut, haú sù é hkyô pé má gi, hkâm zing tô é hkyô a joq é nghut lâ. Garai Gasang gi, nga-nhúng lé, nguingón shoq nyi sháng gaq ga ji yù bê nghut lâ.

¹⁶ Yhumsing myhí ê, náng é yhumsing hpó lé wó hkyi yù râ nghu, hkâsu wó sé râ lú? Yhumsing hpó ê, náng é yhumsing myhí lé wó hkyi yù râ nghu, hkâsu wó sé râ lú?

¹⁷ Hká đông nghut kôlhang, yuq hkangmó gi, Garai Gasang, yhang lé ji yu tô é hkâm, haú Yhumsing mai yhang lé nyi nhang tô é đông asak dui nyi râ lâ. Haú gi, noqkuq hpúng pé banshoq má ngò tô to byi é tarâ nghut lâ. ¹⁸ Byù rayuq gi, ji yu é huí é hkâm, ahpyo-kuq hpyit hkam yu to gù bê nghut jáng, ahpyo-kuq hpyit a hkâm sù đông a dut byuq sháng gaq. Byù rayuq gi, ji yu é huí é hkâm, ahpyo-kuq hpyit a hkam yu to shî é nghut jáng, ahpyo-kuq hpyit a hkam yù sháng gaq. ¹⁹ Ahpyo-kuq hpyit hkâm hkyô gi, haí ahkyak a nghut; ahpyo-kuq hpyit a hkâm hkyô gi, haí ahkyak a nghut. Garai Gasang é hkunmó pé lé châng nyi é za sheq ahkyak nghut lâ.

²⁰ Yuq hkangmó gi, yhang lé Garai Gasang eq ji yu é hkâm lâ su xoq nyi nyi râ lâ. ²¹ Nàng gi, ji yù huí é hkâm jùn dut nyi é lú? Haú hkyô lé hkâ-myit chiq. Nghut kôlhang, nàng gi, luthkyô wó yu é nghut jáng,

haú dông nyi aq. ²² Hkâsu mù gâ le, haú Yhumsing eq ji yu é huí é hkûn, jùn dut nyi é sù gi, haú Yhumsing eq lhoq lhut yu é byù nghut bê. Haú eq rajung za, ji yu é huí é hkûn, luthkyô wó é sù gi, Hkrisduq é jùn nghut ri. ²³ Nungmoq gi, Garai Gasâng eq ahpau byi mù wui hpyit yu é hui bê bang nghut akô. Haú mù, byu pê é jùn hkâdut kó. ²⁴ Gumang wui ê, yuq hkgangmó gi, yhumsing lé Garai Gasâng eq ji yu é huí to bê dông, Yhâng é hí má xoq nyi nyi rá lhê.

²⁵ Ahkuí, zomyi zorâm wui é hkyô tai kôlé. Haú Yhumsing chyáng mâ é hkunmó gi, ngò a wó; nghut kôlhang, Yhumsing é shogyo nhikmyin é yanmai, lunging sù rayuq nghut nyi é dông, ngò, nungmoq lé hkyô shit rá nghut lhê. ²⁶ Ahkuí hui zô é wuîhke hkyo é yanmai, nungmoq gi, yhumsing nyi to é su xoq nyi nyi le je ge ri nghû, ngò wó myit ri. ²⁷ Nang, myiháng bê a nghut lhi? Lhoq kang rá hkâda lo. Nang, myi a háng shi a nghut lhi? Myi hkâhô lo. ²⁸ Nghut kôlhang, nang, myiháng é nghut le gi, mara a nghut. Zomyi gi, myi ló é nghut jáng, mara a nghut. Nghut kôlhang, myiháng é bang gi, shí pyat má wuîhke hkyô pé myo myo hui kó rá nghut mù, ngò, nungmoq lé haú mai hkyi yù nau ri.

²⁹ Gumang wui ê, ngò tai

nau é lichyúm gi, ahkying tot byuq bê nghut mù, ahkuí mai, myi wó é bang gi, a wó é bang dông nyi kó sháng gaq.* ³⁰ Yón ngaú huí é bang gi, a huí é bang su; gabú é bang gi, a gabú é bang su; sutzè lé wui yu é bang gi, sutzè a wó é bang su; ³¹ haú mingkan zè pé lé chung é bang gi, haú pé lé a myit tuí é bang su, nghut kó sháng gaq. Hkâsu mù gâ le, shí mingkân é ahkuí lhê é azông isâm gi, lai ló nyi é nghut lhê.

³² Ngò gi, nungmoq lé a myit myo nhâng naù. Myi a yù shí é sù gi, haú Yhumsing lé hkâsu wó gabú nhâng rá matú, haú Yhumsing é muzó lé myit chiq nyi ri. ³³ Nghut kôlhang, myi yù bê sù gi, yhâng é yhumsing myhí lé hkâsu wó gabú nhâng rá matú, mingkan shi é muzó eq séng luí myit chiq nyi ri. ³⁴ Haú mù, yhâng shirong é myit gi, byo myin nyi ri. Myi a ló é myiwe nghut nghut, zomyi gying nghut nghut gi, yhâng é gungdu eq woi-nyí má haú Yhumsing lé rago wó ap nóng rá matú, Yhumsing é muzó pé eq séng luí myit chiq nyi ri. Nghut kôlhang, myi ló bê myiwe gi, yhâng é yhumsing hpó lé hkâsu wó gabú nhâng rá matú, mingkan shi é muzó eq séng luí myit chiq nyi ri. ³⁵ Ngò, haú su nghû tai é gi, nungmoq é matú ge é hkyô nghut lhê; nungmoq lé tara

* **7:29** A wó é bang dông nyi kó sháng gaq gâ é gi, Garai mù lé je myit zuq nyi sháng gá naù é nghut lhê.

èq zuí zing é a nghut é za, myit a byò lo shoq Yhumsîng lé wó ap nóng râ matú, jô é đông asak wó duí kô sháng gaq nghu é hkyô ru nghut lhê.

³⁶ Nghut kôlhang, rayuq yuq gi, yhang dưng tô é zomyi gyíng lé a htuk é đông kut nyi é su wó myit ngàm jáng, myiwe haú asak kô lo nyi mù, hâng yù râ dut bê nghu myit é nghut le gi, yhang ô nau é đông kut sháng gaq. Yhang mara kut é a nghut. Yhangnhik gi, hâng lhum râ lhê. ³⁷ Nghut kôlhang, yhang gi, haú hkyô lé yhâng é myit mai wó lhoq zîm pyâm é nghut mù, yut yut ô nau hkyo é ahkaú má a nghut é za, yhumsîng ô nau é hkyô lé wó hkúm zing pyâm é sù nghut luí, haú zomyi gyíng lé a hâng yù râ matú wó myit hpyit bê sù nghut é nghut jáng, yhang gi, ge é hkyô kut bê nghut ri. ³⁸ Haú mù luí, zomyi gyíng haú lé hâng yu é sù gi, jô é hkyô kut bê nghut ri; nghut kôlhang, zomyi gyíng haú lé a hâng yu é sù gi, je ge é hkyô kut bê nghut ri.

³⁹ Myiwe rayuq gi, yhâng é yhumsîng hpó rú dui nyi nyi, yhang eq xoq tô ashî nghut lhê. Nghut kôlhang, yhâng é yhumsîng hpó shi byuq é nghut jáng, yhang gi, myi ló râ ahkáng dum wó bê nghut lhê, nghut kôle, haú yuq gi, Yhumsîng eq sêng é sù dut râ lhê. ⁴⁰ Ngò jéyáng é đông ga jáng, myi a dum ló é wó nyi le gi, yhâng é matú je gabú hkyô dut râ nghut lhê. Ngò le,

Garai Gasâng é Woi-nyí wó sù nghu wó myit ri.

8

Hparà Lhò Lé Tîng Byí É Zoshuq

¹ Ahkuí, hparà lhò pé lé tîng byí é zoshuq hkyô: nga-nhúng banshoq bang gi, haú hkyô eq séng luí sê lhê. Sê é hkyô gi, nghutbun sê lhê; nghut kôlhang, chyitdap myit gi, lhoq kô myhang lhê. ² Byù rayuq yuq gi, rajung jung lé sé bún é nghut le, yhang sé âng é lé lhang a sé shi nghut ri. ³ Nghut kôlhang, Garai Gasang lé chyitdap é sù gi, Garai Gasâng èq sê é sù nghut ri.

⁴ Haú mù luí, hparà lhò pé lé tîng byí é zoshuq lé zô é eq séng luí gi: hparà lhò gi, mingkan má haí lhang a nghut é hkyô lé le, Garai Gasang gi, Yhang rayuq mai lai luí gotú a nyi é lé le, nga-nhúng sê lhê. ⁵ Hkâsu mù gâ le, mauhkûng htoq má nghut nghut, myigùng htoq má nghut nghut, byù ra-am mai hparà pé ga bang nyi mù, "hparà pé" myo myo eq "yhumsing pé" myo myo nyi kôlhang ⁶ nga-nhúng é matú gi, Íwa nghut é Garai Gasang rayuq za nyi é nghut mù, lhunglhang gi, Yhang mai hpan é nghut luí, nga-nhúng gi, Yhâng é matú asak dui nyi é nghut lhê. Yesuq Hkrisduq nghu é Yhumsîng rayuq za nyi é nghut mù, lhunglhang gi, Yhang đông mai hpan é nghut luí, nga-nhúng gi,

Yhang đông mai asak dui nyi é nghut lê.

7 Nghut kôlhang, yuq hkgangmó gi, haú hkyô lé sê gam hkoq yu é a nghut. Ram gi, ahkuí jé shoq hparà lhô pé má mán byuq kô é yanmai, haú sô é zoshuq lé yhangmoq zô é hkûn, hparà lhô lé tîng byí é zoshuq đông myit sôn yu akô. Yhangmoq myit sôn sê é hkyô wum nyhôm é yanmai, mara wó bûn akô nghut ri. 8 Nghut kôlhang, zoshuq gi, nganhúng lé, Garai Gasâng shut shuí chyâng e é a nghut. Nganhúng a zô é nghut le gi, je sôm byuq ló é a nghut, zô é nghut le gi, je ge lo é a nghut.

9 Haú su ga kôlhang, nungmoq a htung a htê zô é hkyô gi, lumjîng myit wum nyhóm bâng é matú myit leqbat jowò a dut shoq sidiq keq. 10 Hkâsu mù gâ le, sumpsé hpaqchyí wó é bang nungmoq gi, hparà lho é noqkuq yhûm má zô nyi kô é lé, haú myit sôn sê é hkyô má wum nyhôm é sô rayuq yuq myang é nghut jáng, hparà lhô pé lé tîng byí é zoshuq lé, yhang wám zo râ lé wum byí é a dut kó râ lú? 11 Haú mù, Hkrisduq shí hkám byi bê nghut é, wum nyhôm é gumang hpó haú yuq gi, nungmoq é sumpsé hpaqchyí eq lhoq htên pyâm é hui berâ nghut lê. 12 Nungmoq gi, haú hkyô đông mai, nungmoq é gumang wui lé mara kut shut é eq, yhangmoq é myit sôn sê é hkyô wum nyhôm é lé

nò nhang é hkûn, Hkrisduq lé mara kut shut é nghut bekô. 13 Haú mù luí, ngò zô é gi, ngá é gumang hpó lé mara kut shut nhang é nghut jáng, yhang lé myit a leqbat nhâng sháng gaq, ngò, hkâ-nhám le, sho lé a zo lo râ nghut lê.

9

Lagyo Rayuq É Ahko Ahkáng

1 Ngò gi, lut sô a nghut lú? Ngò gi, lagyo rayuq, a nghut lú? Ngò gi, nga-nhûng é Yhumsîng Yesuq lé myang wú bê sô, a nghut lú? Nungmoq gi, haú Yhumsîng má, ngò zui saí é muzó é ashí pé chyat, a nghut kô lú? 2 Ngò gi, góbâng chyáng lagyo a nghut kôlhang, nungmoq chyáng gè gè nghut lê! Hkâsu mù gâ le, nungmoq gi, haú Yhumsîng má, ngò lagyo nghut é hkyô saksé dizik nghut bum akô.

3 Ngá ahtoq má jéyáng bang lé, ngá gûng ngò taí hung kat kôlé. 4 Ngamoq gi, zo râ shuq râ ahko ahkáng a wó é bang nghut lê lú? 5 Gotû lagyô pé eq Yesuq é yhanggu yuqzô pé eq Kehpa kut é su, lumjîng sô nghut é yhumsîng myhí shuí chûng râ, ngamoq, ahko ahkáng a wó é nghut lê lú? 6 Ngò eq Barnaba baú za, asak dui hkyo é matú mù zui ra râ lú?

7 Ó yuq wá, yhumsîng zoshuq wùn luí, gyè mù wùn waq râ lú? Ó yuq wá, tsibiyiq hkyâm saí mù, haú mâ é tsibiyiq shí a zo kut râ lú? Ó yuq wá, sau rém mù, sau naú

a shuq kut râ lúhú? ⁸ Ngò gi, shí hkyô pé lé xângzo hkyam dông za taí é nghut lhê lúhú? Haú tarâ má le, rajung za taí tô lhê, a nghut lúhú? ⁹ Hkâsu mù gâ le, haú Mosheq é tarâ má, "Guq nâng nyi é no lé nhuttsung hkâ-tsung to byi."* ga kâ tô ri. Garai Gasang gi, no eq séng luí za chiq é nghut lhê lúhú? ¹⁰ Gè gè yhang, yhang gi, nga-nhông é matú taí é a nghut kô lúhú? Nghut lhê, haú gi, nga-nhông é matú kâ to byí é nghut lhê. Haí mù gâ le, yò hpuq sù, yò hpuq é eq, guq bat sù, guq bat é gi, kyô chòm shù yù râ lé myoqbyù luí, kut kô é nghut lhê. ¹¹ Ngamoq gi, nungmoq chyáng woi-nyí amyui sân kat bê nghut mù, nungmoq chyáng mâ é mingkan zè lé shù yu é nghut jáng, lùm myô é dut byuq bekô lúhú? ¹² Góbang gi, nungmoq chyáng mai garúm é ahko ahkáng wó kô é nghut jáng, ngamoq gi, haú lé je wó râ lhê a nghut kó lúhú?

Nghut kôlháng, ngamoq gi, ahko ahkáng haú lé a yu é nghut lhê. Haú yù râ malaí, Hkrisduq é gabú danglù gi, hkâm zing pyâm é a hui râ matú sheq, jung hkangmó lé ngamoq hkam jân nyi lhê. ¹³ Haú noqkuq yhùm má mù zuí é bang gi, yhangmoq é zoshuq lé haú noqkuq yhùm mai wó é hkyô eq, hkungga gyap má dojaú é bang gi, hkungga gyap má nhông byí é ra-am lé myàng zô é hkyô lé,

nungmoq a sé kô lúhú? ¹⁴ Haú eq rajung za, gabú danglù hko kyô é bang gi, gabú danglù hkyô mai yhangmoq é asak baú râ lhê ga, haú Yhumsing hkunmó hkyô to bê nghut ri.

¹⁵ Nghut kôlháng, ngò gi, ahko ahkáng haú pé haí lé le a yu é nghut lhê. Nungmoq, ngo lé haú su lhom kut byi râ lé myoqbyù mù, ngò, shí hkyô lé kâ é a nghut. Hkâsu mù gâ le, ngò haú su gumrong é hkyô lé, rayuq yuq lhoq htên pyám byi râ htoq má, ngò shi byuq le lháng je ge ri. ¹⁶ Nghut kôlháng, gabú danglù lé ngò hko kyô é hkâm, ngò gumrông jang a joq; hkâsu mù gâ le, haú gi, ngò a kut a ge é ngá wô nghut lhê. Haú gabú danglù lé ngò a hko kyô é nghut le gi, ngò dingnyé wó râ nghut lhê. ¹⁷ Yhumsing nau é myit mai ngò hko é nghut jáng, shigyaú chyunghuq wó râ nghut lhê; yhumsing nau é myit mai a nghut jáng gi, ngo lé lùm luí ap tô é lé, agon za wùn waq nyi é dut râ nghut lhê. ¹⁸ Haú mù luí, ngá é shigyaú chyunghuq gi, haí nghut lhê lúhú ga jang, haú gabú danglù lé hko kyô é hkâm, ngò gi, ahpau a yu é za wó ap nóng luí, gabú danglù hko kyo hkyô mâ é ngá é ahko ahkáng pé lé ngò a yu é amyat nghut lhê.

¹⁹ Ngò gi, ó yuq é a-ô má le a nyi é za, lut sù nghut kôle, byù wó myô é myhó shuí lhing yù râ matú, ngá gûng ngò, yuq hkangmó é jùn kut

nyi lâ. ²⁰ Ngò gi, Yudaq byu pé lé shuí lhing yù râ matú, Yudaq byu pê chyáng nghut nyi é hkûn, Yudaq byu rayuq dông dut nyi lâ. Ngò gi, tarâ hkaú má nyi sù a nghut kôlhang, tarâ hkaú mâ é bang lé shuí lhing yù râ matú, tarâ hkaú má nyi bâng chyáng nghut nyi é hkûn, tarâ hkaú mâ é byù rayuq dông dut nyi lâ. ²¹ Ngò gi, tarâ a wó bang lé shuí lhing yù râ matú, tarâ a wó bâng chyáng nghut nyi é hkûn, tarâ a wó sù rayuq dông dut nyi lâ. Nghut kôlhang, gè gè ga jáng, Garai Gasâng é tarâ mai a lut htoq é za, Hkrisduq é tarâ hkaú má nyi sù nghut lâ. ²² Ngò gi, wum nyhóm bang lé shuí lhing yù râ matú, wum nyhóm bâng chyáng nghut nyi é hkûn, wum nyhóm sù rayuq dông dut nyi lâ. Ngò gi, wó dut é hkyô dông mai byù ra-am lé wó hkyí sháng gaq nghû, byù lhunglhang bâng chyáng, byù ajà jà dông nyi nyi lâ. ²³ Ngò gi, gabú danglù mai wó é shimân jeju pé lé wó chôm hkam yù sháng gaq nghû, gabú danglù é yan-mai háu pé banshoq lé kut é nghut lâ.

²⁴ Din shingjóng poi má dìn râ bang banshoq dìn kôlhang, rayuq za shigyaú chyunghuq wó é hkyô lé, nungmoq a sé kô lhu? Chyunghuq wó râ matú dìn keq. ²⁵ Sup poi má shingjóng lhum é bang yuq hkanmó gi, yhumsing gùng

yhumsing tarâ htan é dông lhoq mhân yù râ lâ. Yhangmoq gi, gîng nyi râ a nghut é janmaú wó râ matú, haú su kut é nghut akô; nghut kôlhang, nga-nhung gi, ahtum abyuq gingting nyi râ nghut é janmaú wó râ matú shikut é nghut lâ. ²⁶ Haú mù luí, ngò gi, jum dìn dìn é byù rayuq su dìn é sù a nghut. Ngò gi, lai lé bat é byù rayuq su, akôm má bat é sù le a nghut. ²⁷ Ngò gi, góbâng chyáng mungdang hko é htâng má, ngá gûng ngò, shigyaú chyunghuq eq a gingdán sù a dut sháng gaq nghû, ngá gûng lé gyai yhang lhoq mhân yù mù, ngá gung lé jùn kut yu nyi lâ.

10

Israellaq Pê É Labaú Mai Sidiq Byí É Hkyô

¹ Gumang wuì ê, ngò gi, dut lai lo é hkyô lé, nungmoq lé a sé a dut nhâng nau é nghut lâ; hí hkûn, nga-nhung é íchý íwa pé banshoq bang gi, mhutdùm ô má nyi mù, Nhong Nè mai wó lai byit kô é nghut lâ.* ² Yhangmoq banshoq bang gi, mhutdùm eq Nhong Nè má, Mosheq é chángzô pé dông baptisma hkam yu é bang chyat nghut bekô. ³ Yhangmoq banshoq bang gi, rajung zâ é woi-nyí zang zo kô é eq, ⁴ rajung zâ é woi-nyí wuì shuq kô é nghut lâ; hkâsu mù gâ le, yhangmoq eq rahá nghut nyi

* **10:1** Bun zo ralhumi mai raxê lhum gi, Htoq Ló Laiká má bo é Mosheq htâng chángbâng é hkyô lé kâ tô é nghut lâ.

é woi-nyí eq sêng é luqbum mó mai, yhangmoq shuq kô é nghut lê; luqbum mó haú gi, Hkrisduq nghut bê.
 5 Nghut kôhlang, yhangmoq myo hpyang lé, Garai Gasang a nau é nghut mù, yhangmoq é gùng sôm lé yoso pé má myhîn so san kut pyâm é hui bekô nghut ri.

6 Haú hkyô pé dut htoq é gi, agè ashop hkyô má yhangmoq myit tuí bùm é su, nga-nhúng a myit tuí nyí râ matú nga-nhúng é azòng dut bê nghut ri. 7 "Byu pé gi, zùng mù, zo luí shuq luí, a lumjìng bang kut é đông, toq mù, ye bum akô."* ga kâ tô é eq rajung za, yhangmoq mâ é ra-am hparà noq é bang dut byuq é su, nungmoq hkâdut kó. 8 Yhangmoq mâ é ra-am gi, ashop é đông gungsho zùm yap é hkyô shut kômù, ra-nyí má za í mûn sum hkyîng yuq shi byuq é su, ashop é đông gungsho zùm yap é hkyô le, nga-nhúng gi, a ge kut shut râ nghut lê. 9 Yhangmoq mâ é ra-am gi, haú Yhumsîng lé chyâm luí, lhangmui pé èq hte sat é huí bùm kô é su, haú Yhumsîng lé, nga-nhúng gi, a ge chyâm râ nghut lê. 10 Yhangmoq mâ é ra-am gi, nhutluq shô-myô kôluí, lhoq htên é maumâng èq sat pyâm é hui kô é su, nungmoq gi, nhutluq shô-myô hkâkut kó.

11 Yhangmoq chyáng wú yú râ azòng đông haú pé dut htoq luí, ló htáng râ ipyat pé má nyí âng to bang nga-

nhùng é matú sidiq byi râ đông kâ to bê nghut ri. 12 Haú mù luí, nungmoq gi, yap gîng nyí bê su ngàm kô é nghut jáng, a leqbat râ matú sidiq nyí keq! 13 Byu chyáng htoq sê é gunglaú hkyô za nungmoq hui râ nghut lê. Garai Gasang gi, lhumzui sù nghut lê mù, nungmoq a wó jân é gunglaú hkyô lé hui nhâng râ a nghut. Nghut kôhlang, nungmoq gunglaú huí é hkûn, Yhang gi, haú lé nungmoq wó jan râ matú, hkyô htong byi râ nghut lê.

Hparà Lhô Noq Hkyô Lé Koi Pyâm Râ Hkyô

14 Haú mù luí, ngò chyitdap é luzúm wui ê, hparà lô noq hkyô lé koi pyâm keq. 15 Nhik gyîng bang lé ngò taí lê; ngò haí taí nyí é hkyô lé nungmoq gùng myit sôn yù keq. 16 Nga-nhúng, jeju bûn nyí é jeju góm lé shuq é hkûn, Hkrisduq é sui má chôm zùm bê a nghut kó lú? Nga-nhúng, myhik hpê é muk lé zô é hkûn, Hkrisduq é gungdu má chôm zùm bê a nghut kó lú? 17 Haí mù gâ le, muk htung ralhum za nghut mù, nga-nhúng gi, myo myo nghut kôle ragùng za nghut nyí lê. Hkâsu mù gâ le, nga-nhúng banshoq bang gi, haú rahtung zâ é muk lé chôm gàm zô é bang chyat nghut lê.

18 Israelaq byu pé é hkyô lé myit wú keq. Haú hkungga lé zô é bang gi, hkungga gyap má chôm lom é bang nghut lê, a nghut kó lú? 19 Hparà

lhô, a nghut jáng, hparà lhô lé tîng byî é hkungga gi, ra-jung jung nghut lhê nghû, ngò taí é lhu? ²⁰ Haû su taí é a nghut, a lumjîng bâng é hkungga gi, Garai Gasang lé nhông byî é a nghut, nat gâng pé lé tîng byî é ru nghut lhê. Ngò gi, nungmoq, nat gâng pé eq chôm zum nyi bang dut râ lé a ô nau é nghut lhê. ²¹ Nungmoq gi, haû Yhumsing é góm lé le, nat gâng pê é góm lé le, ge shuq râ a nghut; nungmoq gi, haû Yhumsing é zangbó má le, nat gâng pê é zangbó má le, rahá ge bo lôm râ a nghut. ²² Nga-nhúng gi, haû Yhumsing lé manôn nhâng nau é bang dut râ a nghut kô lhu? Nga-nhúng gi, Yhâng htoq je wúm bo é bang nghut lhê lhu?

Lumjîng Su É Luthkyô

²³ "Jung hkanmó kut râ ahkáng wó lhê." nghut kôlhang, jung hkanmó gi, akyû wó é a nghut. "Jung hkanmó kut râ ahkáng wó lhê." nghut kôlhang, jung hkanmó gi, byù lé wó kô làm nhang é a nghut.† ²⁴ Ó yuq le, yhumsing é gè hkyo matú ho é a nghut é za, góbâng é gè hkyo é matú hô râ dut lhê.

²⁵ Sho ûng gai má ûng é haí lé lé, úng-âng é myit èq a myî gôn é za zo keq. ²⁶ Hkâsu mù gâ le, "Myidàm htoq eq haú má joq é jung hkanmó gi, Yhumsing é chyat nghut lhê."* gâ tô ri.

²⁷ A lumjîng bang ra-am, nungmoq lé zang zo jì mù, nungmoq ê nau é nghut jáng, úng-âng é myit èq a myî gôn é za, nungmoq hí má to byî é gû lé zo keq. ²⁸ Nghut kôlhang, rayuq yuq, nungmoq lé, "Shî gi, hparà lhô lé tîng byi bê nghut lhê." ga taí kyô é nghut jáng, nungmoq lé taí kyo su é yanmai le, myit úng-âng é yanmai le, haú lé hkâzo kó. ²⁹ Úng-âng é myit haû gi, nungmoq é a nghut, góyuq é úng-âng é myit lé taí nau é ru nghut lhê. Ngá é luthkyô lé, haí mù góyuq é úng-âng é myit èq jéyáng é huí nhang lhê lhu? ³⁰ Ngò jeju bûn é myit mai bo zo bo shuq yu é nghut jáng, Garai Gasang lé jeju hkya-on bê nghut é zoshuq hau é yanmai, haí mù lumu pyâm é ngò hui râ lhu?

³¹ Haû mù luí, nungmoq zo kôlhang, shuq kôlhang, haí kut kôlhang, Garai Gasang é hpungwup shingkâng é matú chyat kut keq. ³² Ngò gi, yuq hkanmó lé, hkyô hkanmó má shikut luí myit ngón nhang é eq rajung za, nungmoq gi, Yudaq byu pé lé nghut nghut, Grik byu pé lé nghut nghut, Garai Gasang é noqkuq hpúng mâ é byù lé nghut nghut, ó yuq lé le myit hkâleqbat nhâng kó. ³³ Hkâsu mù gâ le, ngò gi, yhangmoq hkyi yu é wó hui kó sháng gaq nghû, ngá é gè hkyô ho é a nghut é za, myo myô é matú gè hkyô ho nyi é ru nghut lhê.

† 10:23 Bun zo 23 mâ é dangngho gi, Korinhtuq byu pé lhaq taí é dang nghut lhê.

* 10:26 Hkya-on 24:1

11

¹ Ngò gi, Hkrisduq é alik châng é su, nungmoq gi, ngá é alik cháng keq.

Noqkuq É Má Htap Htuk Râ Hkyô

² Nungmoq gi, hkyô hkanmó má ngo lé bûn nyi kô é yanmai le, nungmoq lé ngò lhai byi bê mhoqshit hkyô pé lé myhik zing nyi kô é yanmai le, ngò, nungmoq lé hkyâ-ôn lhê.

³ Ahkuî, ngò, nungmoq lé sê hkyâng nhâng nau é hkyô gi: yuqgè hkanmó é ulhum gi, Hkrisduq nghut ri; myiwe hkanmó é ulhum gi, yuqgè nghut ri; Hkrisduq é ulhum kúm gi, Garai Gasang nghut ri. ⁴ Yuqgè hkanmó gi, kyûdûng le nghut nghut, myiqhtoi htoî le nghut nghut, yhâng é ulhum lé nghop tô é nghut jáng, yhâng é ulhûm é aróng lé lhoq hpoî pyâm é nghut bê. ⁵ Myiwe hkanmó gi, kyûdûng le nghut nghut, myiqhtoi htoî le nghut nghut, yhâng é ulhum lé a nghop tô é nghut jáng, yhâng é ulhûm é aróng lé lhoq hpoî pyâm é nghut bê. Haû gi, yhâng é ulhum lé wuq pyâm é eq rajung za nghut ri. ⁶ Myiwe rayuq gi, yhâng é ulhum lé a nghop pyâm é nghut jáng, yhâng é xâm lé nyhâm pyâm ra râ nghut lhê. Nghut kôlhâng, xâm nyhâm pyâm é nghut nghut, xâm wuq pyâm é nghut nghut, myiwe rayuq é matú aróng hpoî lhê nghut jáng, yhang gi,

yhâng é ulhum lé nghop to ra râ nghut lhê. ⁷ Yuqgè gi, Garai Gasang é azông isâm eq hpungwup shing kang nghut é yanmai, yhâng é ulhum lé a nghop râ é nghut lhê. Myiwe kúm gi, yuqgè é hpungwup shing kang nghut ri. ⁸ Hkâsu mù gâ le, a-nham sâng-hi má, yuqgè gi, myiwe mai lo é a nghut, myiwe sheq yuqgè mai lo é ru nghut lhê. ⁹ Hau htoq agó, yuqgè lé gi, myiwê é matú hpan tô é a nghut, myiwe lé sheq, yuqgè é matú hpan tô é ru nghut lhê. ¹⁰ Haû nghut é yanmai le, maumang lagyo pé é yanmai le, myiwe gi, ahko ahkáng kumlhá đông yhâng é ulhum lé nghop râ dut lhê.

¹¹ Nghut kôlhâng, haû Yhumsing hí má, myiwe gi, yuqgè lé nghehkau é su, yuqgè le, myiwe lé nghehkau é nghut lhê. ¹² Hkâsu mù gâ le, myiwe gi, yuqgè mai lo é su, yuqgè le, myiwe mai hku lé é nghut lhê. Nghut kôlhâng, jung hkanmó gi, Garai Gasang mai lo é nghut lhê. ¹³ Myiwe rayuq, ulhum a nghop é za Garai Gasang lé kyûdûng é gi, htuk kô râ lú? Nungmoq, yhumsing gung é matú doqdân yù keq. ¹⁴ Yuqgè xâm hîng tô é nghut jáng, yhâng é matú aróng hpoî é hkyô dut é nghut kôle, ¹⁵ myiwe xâm hîng tô é nghut jáng, yhâng é matú hpungwup shing kang nghut é hkyô lé, htunglí eq nungmoq lé mhoqshit lhê, a nghut kô

lhub? Hkâsu mù gâ le, xâm hîng tô é gi, nghop râ zè dông yhang lé byi tô é nghut lhê. ¹⁶ Rayuq yuq, haû hkyô lé taî dang-rhâng nau é nghut jâng, ngamoq chyáng le, Garai Gasâng é noqkuq hpúng pè chyáng le, gotû htungli a joq é nghut lhê.

Yhumsing É Myinzang

¹⁷ Nungmoq é zuphpong pé gi, gè hkyô kut râ htoq má akyû a bo é hkyô je kut kô é yanmai, a-ô má hkyô shit tô é pé má, ngò, nungmoq lé hkya-ôn é a nghut. ¹⁸ Sâng-hi má, noqkuq hpúng ralhum dông nungmoq zup zîng é hkûn, nungmoq hkaû má gam hkoq hkyô joq é lé wó gyô é nghut luî, têng é le bò râ nghû, ngò lumjîng lhê. ¹⁹ Ô pé gi, Garai Gasang o é hkyam shut nghut é lé wó shit râ matú, nungmoq ahkaû má gam hkoq lhum hkyô joq râ dut lhê. ²⁰ Nungmoq rahá zup zîng kô é hkûn, nungmoq gi, haû Yhumsing é myinzang zô é a nghut kó. ²¹ Hkâsu mù gâ le, nungmoq zô é hkûn, góyuq lé le a lánng é za, ó le ó hí yù zô akô. Haû mù, rayuq gi, zo mut huî nyi, góyuq gi, shuq wut to dut akô nghut ri. ²² Nungmoq gi, zo jang shuq jang yhûm a wó bang nghut akô lhub? Garai Gasâng é noqkuq hpúng lé wú tiq pyám kô é eq, a wó bang lé hoq hpu nhâng kô é, nghut akô lhub? Nungmoq lé ngò hkâsu nghû taî kó râ lhub? Haû pè é yanmai, ngò, nungmoq lé hkya-

on râ lhub? Ratsuí lhang a wó dut!

²³ Hkâsu mù gâ le, haû Yhumsing chyáng mai ngò wó hap yu é gû lé, nungmoq lé lhai byi bê nghut lhê: Haû Yhumsing Yesuq gi, Yhang lé ap pyám huî é myin má, muk lé yù mù, ²⁴ jeju hkya-ôn é htâng má, haû lé myhik hpé mù, taî é gi, "Shî gi, nungmoq é matú Ngá é gungsho nghut lhê; Ngo lé bûn nyi râ matú, shî su kut nyi keq." gâ ri. ²⁵ Haû eq rajung za, myinzang bàn zô é htâng má, Yhang gi, góm lé le yù mù, "Góm shî gi, Ngá é sui má é dangshikaq asik nghut lhê; hkâ-nhám le, nungmoq shî shuq é hkûn, Ngo lé bûn nyi râ matú shî su kut keq." gâ taî ri. ²⁶ Hkâsu mù gâ le, nungmoq gi, muk shî lé zo luî, góm shî lé shuq é hkangmó, haû Yhumsing shî hkâm é hkyô lé, Yhang jé lé shoq, shit kyô nyi râ lhê.

²⁷ Haû mù luî, ó yuq nghut kôle, a gingdán é dông Yhumsing é muk haû lé zo mù, góm haû lé shuq é nghut jâng, haû Yhumsing é gungdu eq sui lé shut é mara wó bê nghut lhê. ²⁸ Haû mù, ó yuq le, muk zo góm shuq râ hí má, yhumsing gùng yhumsing jep wú ra râ nghut lhê. ²⁹ Hkâsu mù gâ le, ó yuq nghut kôle, haû Yhumsing é gungdu eq sêng é hkyô lé a sê gyô é za muk zo góm shuq é nghut jâng, yhanggùng yhang mara zô bò shuq bo yu é nghut lhê. ³⁰ Haû nghut é yanmai,

nungmoq mâ é byù myo myo gi, wum nyhôm é, nòhpyo huí é nghut bum akô. Ra-am gi, shi ló byuq bekô nghut ri. ³¹ Nghut kôlhang, nga-nhúng gi, yhumsing gùng yhumsing hí sôn sê yu é nghut jáng tarâ jéyáng é hui râ a nghut. ³² Nga-nhúng gi, mingkan eq rahá, mara byí é a hui zo sháng gaq ga, nga-nhúng lé haú Yhumsing èq jéyáng é hkûn, nga-nhúng gi, mhoqshit é huí nyí gù bê nghut lhê.

³³ Haú mù luí, ngá é gumang wuì ê, nungmoq gi, zo râ nghû rahá zup zîng é hkûn, rayuq eq rayuq lánq lhum keq. ³⁴ Nungmoq rahá zup zîng é hkûn, jéyáng é a hui zo kó sháng gaq, rayuq yuq zòmút é nghut jáng, yhûm má zô chûng râ lhê.

Gotû myit tô é hkyô pé gi, ngò jé lé é hkûn sheq shit kyo râ nghut lhê.

12

Woi-nyí Hkyô Eq Sêng É Chyunghuq Pé

¹ Gumang wuì ê, woi-nyí hkyô eq sêng é chyunghuq pé lé, nungmoq a sê gyo râ lé ngò a ô nau é nghut lhê.

² Nungmoq gi, a lumjîng bang nghut nyí kô é hkûn lé, dang a nyo é hparà lhô noq râ matú hkyô shuí nghoq é hui kô é hkyô lé, nungmoq sê lhê. ³ Haú mù luí, "Yesuq gi, nhîng pyâm é hui sháng gaq." ga, Garai Gasâng é Woi-nyí mai taí é byù ó yuq le a nyí é eq, haú Chyoiyúng Woi-nyí

mai za a nghut jáng, "Yesuq gi, Yhumsing nghut lhê." ga, ó yuq le a wó taí é nghut lhê nghû, ngò, nungmoq lé taí kyô é nghut lhê.

⁴ Woi-nyí hkyô eq sêng é chyunghuq ajung jung joq lhê; nghut kôlhang, Chyoiyúng Woi-nyí mai chyat nghut lhê. ⁵ Dojaú é hkyô ajung jung joq lhê; nghut kôlhang, Yhumsing rayuq lé za dojaú é nghut lhê. ⁶ Zui saí é hkyô ajung jung joq lhê, nghut kôlhang, Garai Gasang yhang za, byù lhunglhang bang má, haú pé banshoq lé kut é nghut lhê.

⁷ Woi-nyí é hpông shit hkyô gi, byù pé é gè hkyô matú, yuq hkangmó lé byí bê nghut ri. ⁸ Rayuq lé gi, Woi-nyí haú mai, hpaqchyí byéng-yá byíng é danglù byí é nghut ri; góyuq lé gi, Woi-nyí hau èq za, sumsé hpaqchyí byíng é danglù byí é nghut ri; ⁹ góyuq lé gi, Woi-nyí hau èq, lumjîng myit byí é nghut ri; dum góyuq lé gi, Woi-nyí hau èq, nò lhoq ge é chyunghuq byí é nghut ri; ¹⁰ dum, góyuq lé gi, hpungwup a-tsam pé; dum, góyuq lé gi, myiqhtoi htoí é ahkáng; dum, góyuq le gi, woi-nyí pé lé sê gam hkoq é ahkáng; dum, góyuq lé gi, laklaí dang ahú hú ge taí é ahkáng; dum, góyuq lé gi, dang haú pé é lichyúm taí sân kyô é ahkáng, byí é nghut ri. ¹¹ Chyunghuq haú pé banshoq gi, Woi-nyí hau èq za kut é loqmú chyat nghut mù, Yhang myit hpyit é đông yuq hkangmó lé haú pé tsing gàm byí é nghut ri.

Gungbun Myo Kôlhang, Ra Gùng Za

¹² Gungdu gi, gungsho showui showang pé myo myo lé pong tô é nghut kôlhang, ragùng za nghut ri; gungsho showui showang pé banshoq myo myo nghut kôlhang, gungdu ra gùng za dut tô é nghut ri. Haû eq rajung za, Hkrisduq eq le haû đông nghut ri. ¹³ Hkâsu mù gâ le, nga-nhúng banshoq bang gi, Yudaq byù nghut nghut, Grik byù nghut nghut, jùn nghut nghut, lut bang nghut nghut, gungdu ra lhum za dut râ matú, Woi-nyí rayuq mai za wui-myhup hkâm yù bê nghut luí, Woi-nyí rayuq lé za chôm shuq yù bê bang nghut lhê.

¹⁴ Haû gungdu gi, gungsho showui showang ra bun lé za kut tô é a nghut é za, myo myo lé pong tô é nghut lhê. ¹⁵ Haû hkyí gi, "Ngò, loq a nghut é yanmai, gungdu eq a sêng é nghut lhê." gâ é nghut jáng, hau é yanmai, gungdu eq a séng wó dut é a nghut. ¹⁶ Dum, haû nohkyap gi, "Ngò, myoqjí a nghut é yanmai, gungdu eq a sêng é nghut lhê." gâ é nghut jáng, hau é yanmai, gungdu eq a séng wó dut é a nghut. ¹⁷ Ragùng dû é gi, myoqjí za nghut é nghut jáng, gyô é hkyô gi, hkâmá nghut râ lúh? Ragùng du é gi, nohkyap za nghut é nghut jáng, shôm nam é hkyô gi, hkâmá nghut râ lúh? ¹⁸ Nghut kôlhang, Garai Gasang gi, gungsho showui

showang hkangmó lé, Yhang dut nhâng nau é eq rajung za, gungdu má kut to bê nghut ri. ¹⁹ Gungsho showui showang gi, ra bun za nghut é nghut jáng, gungdu gi, hkâmá nghut râ lúh? ²⁰ Hkyak ga jang, gungsho showui showang pé myo kôlhang, gungdu gi, ragùng za nghut ri.

²¹ Haû myoqjí gi, loq lé, "Ngò, nang lé a ra!" nghú a ge taí. Haû ulhum gi, hkyí lé, "Ngò, nang lé a ra!" nghú a ge taí. ²² Haû za a nghut, gungdu mâ é gungsho showui showang pé má wum je nyhôm é su dut é pé le, a bò a ge é chyat nghut lhê. ²³ Hau htoq agó, hpau a lûm tap râ su myit ngam é gungsho showui showang pé lé, nga-nhúng je hpautap râ lhê. Haû a shit é jung gungsho pé lé, nga-nhúng hpautap é đông rago nghop râ lhê. ²⁴ Nga-nhúng é wó shit é gungsho pé kúm gi, haû hkyô a ra nghut ri. Nghut kôlhang, Garai Gasang gi, gungdû é gungsho showui showang pé lé pong to mù, aróng nyhum é lé, je riyhang aróng byi bê nghut ri. ²⁵ Haû mù, gungdu má gamhkuí lhum é hkyô a bo é za, gungsho showui showang pé ralhum eq ralhum, rajung za kut wó myit tê byi lhum kó râ nghut lhê. ²⁶ Haû gungsho showui showang ralhum jamjau huí é nghut jáng, lhum hkangmó bo jamjau râ nghut lhê. Ralhum hpautap huí é nghut jáng, lhum hkangmó bo gabú

é nghut lhê.

²⁷ Ahkuî, nungmoq gi, Hkrisduq é gungdu nghut kôluî, nungmoq yuq hkangmó gi, haú é gungsho showui showang pé nghut akô. ²⁸ Garai Gasang gi, noqkuq hpúng má, sâng-hi lé, lagyô pé, í lhum nghû rá má, myiqhtoî pé, sùm lhum nghû rá má, mhoqshit bang, hau htâng má, laklaí kumlhá pé kut rá bang, nò wó lhoq gê rá chyunghuq wó é bang lé le, góbang lé wó garúm é bang, shuí-u rá chyunghuq wó é bang, laklaí dang ahú hú ge taí é bang lé, masat to bê nghut ri. ²⁹ Banshoq bang gi, lagyô pé nghut lhê lhú? Banshoq bang gi, myiqhtoî pé nghut lhê lhú? Banshoq bang gi, mhoqshit bang nghut lhê lhú? Banshoq bang gi, laklaí kumlhá kut akô lhú? ³⁰ Banshoq bang gi, nò lhoq ge é chyunghuq wó é nghut lhê lhú? Banshoq bang gi, laklaí dang ahú hú ge taí lhê lhú? Banshoq bang gi, dang haú pé é lichyúm ge taí sân kyô lhê lhú? ³¹ Nghut kôlhang, nungmoq gi, je gyaú é chyunghuq lé gyai yhang ô nau nyì keq.

Chyitdap Myit

Hau htoq agó, ahkuî, ngò, nungmoq lé, je gyaú dik é hkyô ralhum shit kôlé.

13

¹ Ngò gi, byu pé é eq maumang lagyô pé é myíng pé lé sê taí é nghut kôlhang, chyitdap myit a bo é nghut

jáng, mying hung htê bo é ut eq mying tui htê bo é chapchéng su za dut byuq rá nghut lhê. ² Ngò gi, myiqhtoî htoî é chyunghuq, zaú tô é hkyô pé banshoq lé sê gyô é nyan, sumsé hpaqchyí banshoq lé wó é eq, bùm pé lé wó htot nhang é lumjíng myit bo é nghut kôlhang, chyitdap myit a bo é nghut jáng, ngò haí a nghut sù dut berâ nghut lhê. ³ Ngò gi, wó é sutzè banshoq myùng bang lé byí pyâm é eq, ngá é gungdu lé nyhê pyám rá matú ap pyâm é nghut kôlhang, chyitdap myit a bo é nghut le gi, hai akyú a bò nghut ri.

⁴ Chyitdap myit gi, myit hing lhê, nú-nhâm lhê. Chyitdap myit gi, a manôn, gyáng dang a taí, a nghutbùn é nghut lhê. ⁵ Chyitdap myit gi, hpau a dap é hkyô a kut, yhumsing é akyú baú za a hô, lui za nhikjum a yo, shut é mara a matsíng é nghut lhê. ⁶ Chyitdap myit gi, agè ashop é má a gabú é za, haú tengmán hkyô má gabú nyi ri. ⁷ Chyitdap myit gi, hkâ-nhám le wú magum ri, hkâ-nhám le lumhkau ri, hkâ-nhám le myit myoqbyu ri, hkâ-nhám le hkam jân ri.

⁸ Chyitdap myit gi, hkâ-nhám le htùm byuq é a nghut. Myiqhtoî htoî é hkyô pé gi, byuq byuq rá nghut lhê; laklaí dang ahú hú ge taí é hkyô gi, zim byuq rá nghut lhê; sumsé hpaqchyí hkyô gi, laí ló byuq rá nghut lhê. ⁹ Hkâsu mù gâ le, nga-nhúng sê é gi,

ra-am rahtâng ru nghut lhê. Nga-nhúng myiqhtoi htoî é gi, ra-am rahtâng ru nghut lhê. ¹⁰ Nghut kôlhang, gumjup hkyô jé lé é hkûn, a gumjup hkyô gi, byuq byuq râ nghut lhê. ¹¹ Ngò, zoshâng nghut ashî hkûn gi, zoshâng dông dang taí, zoshâng dông myit, zoshâng dông myit sôn wú é nghut lhê. Ngò, suwún nghut jáng gi, zoshâng nyi yap hkyô pé lé tô pyám bê nghut lhê. ¹² Ahkuí, nga-nhúng gi, myoqjâm hkaú mâ é rago a sân é wupzo lé za myâng é nghut lhê; nghut kôlhang, htâng má, myoqdong hkyûm wó myâng râ nghut lhê. Ahkuí, ngò gi, ra-am rahtâng za sê é ru nghut lhê; nghut kôlhang, Garai Gasang gi, ngo lé gumjup shoq sê é su, ngò le, htâng má, gumjup shoq sé râ nghut lhê.

¹³ Ahkuí, lumjíng myit, myit myoqbyù hkyô, chyitdap myit shi sùm lhum myit tô ri. Nghut kôlhang, haú pé mâ é kô dik é gi, chyitdap myit nghut ri.

14

Myiqhtoi Htoi É Chyunghuq Pé Eq Laklaí Dang Nyo É Chyunghuq Pé

¹ Chyitdap hkyô má le cháng mù, woi-nyí hkyô eq sêng é chyunghuq lé le gyai yhang myit o nyi keq. Myiqhtoi htoî é chyunghuq lé je riyhang myit o nyi keq. ² Hkâsu mù gâ le, laklaí dang ahú hú nyo é sù ó yuq le, byù lé nyo é a nghut é za

Garai Gasang lé nyo é ru nghut lhê. Yhang lé ó yuq eq le a sê gyo byi, zaú tô é hkyô pé lé haú Woi-nyí èq nyo htoq é nghut ri. ³ Nghut kôlhang, myiqhtoi htoî é sù yuq hkangmó gi, byu pé lé wum byi dang eq nhik títng dang taí ri. ⁴ Laklaí dang rahú nyo é sù gi, yhumsing gùng lé htuqbang byi ri, nghut kôlhang, myiqhtoi htoî é sù gi, noqkuq hpúng lé htuqbang byi ri. ⁵ Ngò gi, nungmoq yuq hkangmó laklaí dang ahú hú pé nyò râ lé ô nau ri, nghut kôlhang, nungmoq myiqhtoi htoi râ lé je ô nau é nghut lhê. Hkâsu mù gâ le, laklaí dang ahú hú nyo é sù gi, haú noqkuq hpúng lé wó htuqbang râ matú, lichyúm lé taí sân kyô é za a nghut jáng, myiqhtoi htoi sù gi, yhang htoq je gyaú é nghut lhê.

⁶ Ahkuí, gumang wui ê, ngò gi, nungmoq chyáng lé jé mù, laklaí dang pé nyo é nghut kôle, shing-rân nghut nghut, sumpsé hpaqchyí nghut nghut, myiqhtoi dang nghut nghut, mhoqshit dang nghut nghut, nungmoq lé a taí kyô é nghut le gi, nungmoq é matú ngò hai akyû htoq râ lúh? ⁷ Htê lhoq htoq é asak a bo jung zè pé má lhang gi, sampyí nghut nghut, títng nghut nghut, gam hkoq tô é htê a joq é nghut jáng, mut myhíng bat myhíng é htê haí nghut é lé, hkâsu wó sé râ lúh? ⁸ Dum, tut htê le gam hkoq é dông a mut kyô é nghut jáng, majan htoq râ rì rì ó yuq

wá hên râ lúhú? ⁹ Nungmoq chyáng le haú dông nghut lâhê. Nàng, laklaí dang ahú hú nyo le, sê gyô é danghkun mai nyo é za a nghut jáng, nàng haí taí nyi é lé ó yuq wá hkâsu wó sé râ lúhú? Nungmoq gi, maulat má za taí hâng pyâm nyi kó râ nghut lâhê. ¹⁰ Míngkan má dang ahú hú yhang joq é nghut lâhê, nghut kôle, dang lichyúm a htoq é dang gi, a joq é nghut lâhê. ¹¹ Haú mù lúí, rayuq yuq haí taí nyi é lichyúm lé ngò a dat chyup é nghut jáng, ngò gi, haú dang taí su é matú maigan byù dut mù, yhang gi, ngá é matú maigan byù dut é nghut lâhê. ¹² Nungmoq chyáng le haú dông nghut lâhê. Nungmoq gi, woi-nyí hkyô eq sêng é chyunghuq pé lé gyai yhang ô nau nyi bekô nghut mù, haú noqkuq hpúng lé kô myhâng nhang é chyunghuq pé lé je ho shikut nyi keq.

¹³ Haú nghut é yanmai, laklaí dang ahú hú taí é sù ó yuq le, yhang haú taí é lichyúm wó taí sân kyo sháng gaq, kyûdung râ dut lâhê. ¹⁴ Hkâsu mù gâ le, laklaí dang ahú hú dông ngò kyûdung é nghut jáng, ngá é woi-nyí mai dúng é nghut lâhê; nghut kôlhang, ngá é myitnyân é matú, hai akyú a wó nghut ri. ¹⁵ Haú mù, ngò hkâsu kut râ lúhú? Ngò gi, ngá é woi-nyí mai le kyûdung râ, ngá é myitnyan mai le kyûdung râ nghut lâhê; ngò gi, ngá é woi-nyí mai le mahkôn hkôn râ, ngá

é myitnyan mai le mahkôn râ nghut lâhê. ¹⁶ Nungmoq gi, nungmoq é woi-nyí mai za Garai Gasang lé hkya-on kô é nghut jáng, a sê gyô é bang mâ é rayuq gi, nungmoq haí taí é lé a sê é nghut mù, nungmoq jeju hkya-ôn é hkûn, "Amen" ga hkâsu wó taí râ lúhú? ¹⁷ Nungmoq gi, ge dik shoq jeju hkya-on kô é abe, nghut kôlhang, góbang gi, htuqbâng é a hui kó nghut ri.

¹⁸ Ngò gi, nungmoq ban-shoq bâng htoq má laklaí dang ahú hú je wó taí é yanmai, Garai Gasang lé jeju bûn ri. ¹⁹ Nghut kôlhang, noqkuq hpúng má, laklaí dang rahú dông danghkun ramun ngò taí râ htoq má, góbang lé mhoqshit râ akyú bo é dang ngo hkun taí râ lé ngò je ô nau ri.

²⁰ Gumang wuì ê, zoshâng wuì su myit nyi é lé nô pyám keq. Agè ashop hkyô eq sêng é má gi, nyheqnú dông kut mù, nungmoq myit é hkyô má gi, ko bang dông kut keq. ²¹ Haú jep é tarâ má kâ tô é gi,

"A wó gyô wú é dang dông mai le, góming byu pé é nhutwuì dông mai le, byù shí bang lé ngò taí râ nghut lâhê;

nghut kôlhang, yhangmoq gi, ngá dang gyo kó râ a nghut.'

ga Yhumsîng taí ri."✠
gâ ri.

²² Haú mù, laklaí dang ahú hú nyo é hkyô gi, lumjîng bâng matú kumlhá a nghut é

za, a lumjǐng bāng matú sheq ru nghut lhê. Myiqhtoi dang kúm gi, a lumjǐng bāng matú a nghut é za, lumjǐng bāng matú sheq ru nghut lhê. ²³ Haû nghut mù, noqkuq hpúng gón chôm zing mù, yuq hkangmó laklaí dang ahú hú nyò kô é nghut jáng, a sê gyô é bang nghut nghut, a lumjǐng é bang nghut nghut, wang lé kô é hkûn, yhangmoq gi, nungmoq nâ bùm bekô ga a taí kó râ nghut lhê lhú? ²⁴ Nghut kôlhang, yuq hkangmó, myiqhtoi dang taí nyi é u má, a lumjǐng sù nghut nghut, a sê gyô é sù nghut nghut, wang lé é nghut jáng, yhang gi, yubak dap sù rayuq nghut é lé, banshoq èq lhoq pùn kyǐng é hui râ eq, banshoq èq jéyáng é hui râ nghut é htoq agó, ²⁵ yhâng é i-myt má zaú tô é hkyô pé lé de de lhoq htoq shit é hui râ nghut lhê. Haû mù, yhang gi, ngóm gop luí, Garai Gasang lé noqkuq mù, "Garai Gasang gi, gè gè yhang, nungmoq chyáng rahá nghut nyi ri!" ga taí pyo htoq kat râ nghut lhê.

Shuq Shuq Tap Tap Za Noqkuq Râ Hkyô

²⁶ Haû jáng, gumang wui é, nga-nhúng haí taí râ lhú? Nungmoq rahá lé chôm zǐng é hkûn, yuq hkangmó gi, Garai hkya-on mahkôn nghut nghut, mhoqshit é dang nghut nghut, shing-rán nghut nghut, laklaí dang ahú hú nyo é hkyô nghut nghut, taí sân kyô é nghut nghut pé lé, wó le ge ri. Haú pé banshoq gi, noqkuq hpúng lé wum-o

byi râ matú chyat kut é dut râ lhê. ²⁷ Rayuq yuq, laklaí dang ahú hú nyo é nghut jáng, í yuq eq myô htum sum yuq mai a lai é za, rayuq htâng rayuq nyò râ dut é htoq agó, rayuq yuq haû lé taí sân kyo ra râ dut lhê. ²⁸ Tai san kyô é sù a nyi é nghut jáng, laklaí dang ahú hú nyo é sù gi, noqkuq hpúng má zim za nyi râ dut mù, yhânggùng yhang eq Garai Gasang lé za nyo râ dut lhê.

²⁹ Myiqhtoi í yuq nghut nghut, sum yuq nghut nghut taí kyo râ dut lhê; góbang gi, haí taí é lé rago gyô chyam wú râ dut lhê. ³⁰ Nghut kôlhang, zung tô é sù rayuq yuq chyáng shing-rán jé é nghut jáng, hí taí nyi é sù gi, nô byuq râ dut lhê. ³¹ Hkâsu mù gâ le, yuq hkangmó gi, mhoqshit é eq myit wum byí é wó hui kó sháng gaq, nungmoq banshoq bang gi, rayuq htâng rayuq myiqhtoi wó htoí é nghut lhê. ³² Haû myiqhtoi pé é woi-nyí pé gi, myiqhtoi pé uphkan é a-ô má nghut nyi ri. ³³ Hkâsu mù gâ le, Garai Gasang gi, atau ahú dut é Garai Gasang a nghut é za, nguóngón hkyo é Garai Gasang ru nghut lhê.

Sân-yúng bāng zing tô é hpúng banshoq mâ é eq rajung za, ³⁴ myiwe wui gi, noqkuq hpúng pé má zim za nyi râ dut lhê. Yhangmoq gi, dang taí ahkáng a wó é nghut mù, haû jep é tarâ má bo é eq rajung za a-ô má nyi kó sháng gaq. ³⁵ Yhangmoq gi,

rajung jung sé naû kô é nghut jáng, yhûm má yhangmoq é yhumsîng hpô pê chyáng myi kó sháng gaq; hkâsu mù gâ le, myiwe rayuq noqkuq hpúng má dang taí é gi, ahoq ahî hkyô nghut ri.

³⁶ Haû Garai Gasâng é mungdang gi, nungmoq chyáng mai htoq lo é nghut lhê lú? Haû gi, nungmoq chyáng za lé jé bê nghut lhê lú? ³⁷ Rayuq yuq, yhang gi, myiqhtoi, a nghut jáng, woinyí chyunghuq byí é hui sù nghut lhê ga myit é nghut jáng, ngò, nungmoq lé ká byí é pé gi, haû Yhumsing é hkunmó nghut é lé, yhang sê yù sháng gaq. ³⁸ Yhang gi, haû lé haí su a ngàm kut é nghut jáng, yhânggùng le, haí su a ngàm kut é hui zo râ nghut lhê.

³⁹ Haû mù luí, ngá é gumang wui ê, myiqhtoi htoi râ lé ô nau nyi mù, laklaí dang ahú hú nyo é lé hkâhkûm pyám kó. ⁴⁰ Nghut kôlhang, jung hkangmó gi, htuk é dông eq shuq shuq tap tap zâ é hkyô dông kut é dut râ lhê.

15

Hkrisduq É Dui Toq Hkyô

¹ Gumang wui ê, ngò, nungmoq lé hko kyo bê nghut mù, nungmoq le hap yù luí, nungmoq yap gîng tô é jowò nghut é gabú danglù hkyô lé, ahkuí, ngò, nungmoq lé lhoq pûn kat nau ri. ² Ngò, nungmoq lé hko kyo bê é mungdang lé, nungmoq ging ging myhik zing

nyi kô é nghut jáng, nungmoq gi, gabú danglù hau é yanmai hkyi yù huí é nghut akô. Haû a nghut jáng, nungmoq lumjîng é gi, akôm dut bê nghut lhê.

³ Ngò hap yu tô é pé lé, sâng-hi ahkyak é dông, ngò, nungmoq lé hai byi bê nghut lhê. Haû pé gi: Chyúmdang eq rajung za, Hkrisduq gi, nganhûng é yubak marâ é matú shî hkám byi bê gâ é nghut ri; ⁴ Yhang gi, myhup yhûm é hui luí, Chyúmdang eq rajung za sum nyi nghu é nyí má lhoq dui toq é hui bê nghut mù, ⁵ Petruq lé htoq shit luí, haû lagyo raxe í yuq lé le htoq shit ri. ⁶ Hau htâng má, Yhang gi, ra-u má za, gumang wui ngo shô yuq chyân lé htoq shit ri. Haû bang mâ é myo hpyang gi, ahkuí jé shoq asak dui nyi bum akô; ra-am kúm gi, shi ló byuq bekô nghut ri. ⁷ Hau htâng, Yhang gi, Yakuq lé htoq shit mù lagyo pé banshoq bang lé htoq shit ri. ⁸ Ló htâng má, Yhang gi, hkû buinyi a jé shî é má hku é dông nghut sù ngo lé le htoq shit bê nghut ri.

⁹ Hkâsu mù gâ le, ngò gi, lagyo pé má é tiq dik sù nghut lhê. Haû Garai Gasâng é noqkuq hpúng lé zing-ri sù nghut é yanmai, ngò gi, lagyo rayuq nghû râ lhang a gingdán é sù nghut lhê. ¹⁰ Nghut kôlhang, ngò ahkuí ísu wó nghut nyi é gi, Garai Gasâng jeju mai nghut lhê. Yhâng é jeju gi, ngá chyáng akôm a dut é za,

ngò gi, yhangmoq banshoq bâng htoq má je riyhang mũ wùn waq shikut lhê. Haû gi, ngò kut é a nghut, ngò eq rahá nghut nyi é Garai Gasâng jeju sheq ru nghut lhê. ¹¹ Haû mù luí, ngò nghut nghut, yhangmoq nghut nghut, ngamoq hko kyô é gi, haú hkyô chyat nghut lui, nungmoq lumjíng é le, haú hkyô nghut ri.

Shi Byuq Bâng É Dui Toq Hkyô

¹² Nghut kôlhang, haû Hkrisduq shi é mai lhoq dui toq é hui bê hkyô lé hko kyô nyi bê nghut mù, nungmoq mâ é ra-am gi, shi byuq bâng é dui toq hkyô a joq nghû, hkâsu wó taí kó râ lúh? ¹³ Shi byuq bâng é dui toq hkyô a joq é ru nghut le gi, Hkrisduq le lhoq dui toq é hui berâ a nghut. ¹⁴ Hau htoq agó, Hkrisduq gi, lhoq dui toq é a huí é ru nghut le gi, ngamoq hko kyô é hkyô eq, nungmoq é lumjíng hkyô gi, akôm dut byuq râ nghut lhê. ¹⁵ Hau htoq agó, Garai Gasang gi, haû Hkrisduq lé shi é mai lhoq dui toq bê hkyô lé, ngamoq saksé hkám bê nghut é yanmai, ngamoq gi, Garai Gasâng é hkyô má saksé apyoq pé dut byuq râ za nghut lhê. Nghut kôlhang, shi byuq bang lhoq dui toq huí é hkyak a joq é ru nghut le gi, Garai Gasang, Yhang lé lhoq dui toq kat râ a nghut. ¹⁶ Hkâsu mù gâ le, haû shi byuq bang lhoq dui toq é a huí é nghut jáng, Hkrisduq

le, lhoq dui toq é hui berâ a nghut. ¹⁷ Hkrisduq gi, lhoq dui toq é a huí é nghut jáng, nungmoq é lumjíng hkyô gi, akôm dut luí, nungmoq gi, nungmoq é yubak mara hkaû má ru nyi nyi shi kó râ nghut lhê. ¹⁸ Haû nghut jáng, Hkrisduq má shi ló byuq bê bang le, htên byoq byuq râ za nghut lhê. ¹⁹ Nganhúng gi, shí ipyat lhê é matú za, Hkrisduq má myit myoqbyù hkyô wó é nghut jáng, byù banshoq bâng htoq má shogyo rayhup dut é je hui zo bang dut kó râ nghut lhê.

²⁰ Nghut kôlhang, Hkrisduq gi, gè gè yhang shi é mai lhoq dui toq é hui bê nghut mù, shi ló byuq bâng é sâng-hi ashi dut bê nghut ri. ²¹ Hkâsu mù gâ le, shí-nò hkyô gi, byù rayuq đông mai lò bê nghut é eq rajung za, shi byuq bâng é dui toq hkyô le, byù rayuq đông mai lo é nghut lhê. ²² Hkâsu mù gâ le, lhunglhang bang gi, Adam é yanmai shi byuq é su, lhunglhang bang gi, Hkrisduq eq rading ralhum za nghut é yanmai lhoq dui toq é hui râ nghut lhê. ²³ Nghut kôlhang, yuq hkangmó gi, ó le ó âng é hkûn lhoq dui toq é hui râ nghut lhê: Hkrisduq gi, sâng-hi lhoq dui toq huí é sù nghut lhê. Hau htâng má, Yhang jé lé é hkûn, Yhang eq sêng é bang lhoq dui toq é hui râ nghut lhê. ²⁴ Hau htâng, jihtúm jé râ nghut lhê; haú hkûn, Yhang gi, up é bang

banshoq, ahkáng ayá eq a-tsam pé lé ban lhoq htên pyâm é htâng, haû Íwa nghut sù Garai Gasang lé mingdán ap byi râ nghut lhê. ²⁵ Hkâsu mù gâ le, Yhang gi, Yhâng é gye pé banshoq lé, Yhâng é hkyî wang ô má tô pyâm é hkûn jé shoq up nyi ra râ nghut lhê. ²⁶ Haû lhoq htên pyâm é hui râ nghut é ló htâng é gye gi, shî-nò hkyô nghut ri. ²⁷ Hkâsu mù gâ le, "Garai Gasang gi, jung hkanngómó lé, Yhâng é hkyî wang ô má tô pyám bê nghut ri."* gâ Chyúmdang má kê tô ri. "Jung hkanngómó lé" Yhâng é a-ô má tô pyám bê ga taí é hkûn, jung hkanngómó lé Hkrisduq é a-ô má tô pyám bê sù Garai Gasang yhang kúm a lom é hkyô, san za nghut nyi ri. ²⁸ Yhang gi, haû hkyô ban kut é htâng má, haû Zo yhang le, jung hkanngómó lé Yhâng é a-ô má to byi bê sù Garai Gasang é a-ô má nyi sù dut nhang é hui râ nghut mù, Garai Gasang gi, lunglhang htoq má gyaú sù nghut luí, lunglhang lé sîng sù nghut râ nghut lhê.

²⁹ Dui toq hkyô a joq é ru nghut le gi, shi byuq bê bâng é matú wui-myhup hkám byi bùm kô é gi, hai akyû bò kó râ lhú? Haû shi byuq bang lhoq dui toq é a hui kô é ru nghut le gi, yhangmoq matú haî mù byu pé wui-myhup hkâm yù kó râ lhú? ³⁰ Ngamoq gi, ngamoq é matú, hkyíng hkanngómó haî

mù chiq râ jowò má nyi râ lhê lhú? ³¹ Gumang wui ê, ngò gi, nyi wui aluq shoí shoí shi é hui zô é nghut lhê. Haû su nghû é gi, nga-nhúng é Yhumsîng Hkrisduq Yesuq má, nungmoq é hkyô lé ngò hkyak wó gumrong é yanmai nghut lhê. ³² Ngò gi, xângzo hkyam dông mai za, Ehpesu myuq má tân jung dusak pé lé majan zân nyi é nghut jáng, ngá é matú hai akyû bò râ lhú? Shi byuq bang lhoq dui toq é a hui é ru nghut le gi,

"Nga-nhúng gi, napmá shî râ nghut é yanmai,

zo sháng, shuq sháng."*³³

ngû râ za nghut lhê.* ³³ "A ge é zùm yap luzúm wui gi, ge é nyi yap sâmlai lé hten nhang é nghut lhê." gâ é sanghkyang eq rajung za, hkyô shuí nghoq é hkâhui zo kó! ³⁴ Nungmoq gi, tau bûn gyíng lò mù, mara hkâkut shut lo kó; hkâsu mù gâ le, Garai Gasang lé a sê é byù ra-am nyi akô. Ngò haû su nghû taí é gi, nungmoq hoq bun râ matú nghut lhê.

Dui Toq É Gungdu

³⁵ Nghut kôhang, rayuq yuq gi, "Haû shi byuq bê bang, hkâsu kut lhoq dui toq é hui kó râ lhú? Yhangmoq gi, hkasû é gungdu nghut kó râ lhú?" ga myi râ nghut lhê.

³⁶ Haû-í nghâ sù ê! Nàng hô hkyô kat é pé gi, shi byuq é za a nghut jáng, yuq htoq lô râ a nghut mhaî. ³⁷ Nàng, kyô

* 15:27 Hkya-on 8:6 * 15:32 Esai 22:13

* 15:32 Dang ngho shî gi, a lumjîng

bang taí é dang nghut lhê.

hkyô é hkûn, yuq lò râ nghut é agàm lé hô hkat e a nghut é za, sungso amyui nghut nghut, gotû amyui rajung jung nghut nghut lé za hô kat é ru nghut lhê. ³⁸ Nghut kôlhang, Garai Gasang gi, Yhang myit hpyit to bê eq rajung za haû lé gungdu ralhum byi mù, kyôshi myui hkangmó lé, ó le ô é gungdu byi ri. ³⁹ Gungsho lhunglhang gi, rajung za a nghut. Byù pé é gungsho gi, rajung, dusak pé é gi, gó jung, nghoq pé é gi, gó jung, ngozo pé é gi, gó jung ru nghut lhê. ⁴⁰ Mauhkûng gùng pé le joq é nghut lui, myidam gùng pé le joq ri; nghut kôlhang, mauhkûng gùng pé é shingkang gi, rajung, myidam gùng pé é shingkang gi, gó jung ru nghut lhê. ⁴¹ Haû bui má bo é shingkang gi, rajung, lhamó mâ é gi, gó jung, kyí pé mâ é gi, gó jung ru nghut lhê; kyí racham eq rachâm é shingkang le gotû tú shai lhûm lhê.

⁴² Haû mù, shi byuq bê bang é dui toq hkyô le, haû eq rajung za nghut ri. Haû hô hkyô kat é gungdu gi, htên byoq sê é nghut lui, lhoq dui toq huí é gungdu kúm gi, htên byoq a sê é nghut lhê. ⁴³ Hô hkyô kat é hkûn gi, aróng a bò, lhoq dui toq huí é hkûn gi, hpungwup shingkang bo ri. Hô hkyô kat é hkûn gi, wum nyhóm mù, lhoq dui toq huí é hkûn gi, a-tsam bo ri. ⁴⁴ Gungsho gungdu gi,

hô hkyô é hui mù, woi-nyí gungdu gi, lhoq dui toq é huí ri.

Gungsho gungdu joq é nghut le gi, woi-nyí gungdu le joq é nghut lhê. ⁴⁵ Haû nghut mù, "Haû sâng-hi yuq byù Adam gi, asak dui é xângzo dut bê nghut ri."* ga kê tô ri. Haû lô htâng é Adam kúm gi, asak byí é woi-nyí nghut ri.† ⁴⁶ Haû woi-nyí eq sêng é hí lé joq é a nghut é za, gungsho eq sêng é hí lé joq é htâng má sheq, woi-nyí eq sêng é lé joq é ru nghut lhê. ⁴⁷ Haû sâng-hi yuq byù gi, myidam mâ é tseyûn lé saí é nghut mù, htang lhê yuq byù gi, mauhkûng htoq mâ é nghut ri. ⁴⁸ Haû myidam byù nghut sù su, myidam eq sêng é bang le nghut nyi akô; haû mauhkûng htoq mâ é byù nghut sù su, mauhkûng eq sêng é bang le nghut nyi akô. ⁴⁹ Nga-nhúng gi, myidam byù é gungghyâng isâm lé hkam yù bê nghut é su, mauhkûng htoq mâ é byu é gungghyâng isâm lé le myang hkam yù râ nghut lhê.

⁵⁰ Gumang wuè ê, ngò, nungmoq lé shit kyo kôlé, gungsho eq sui gi, Garai Gasâng é mingdán é silí wunlí lé wó yù râ a nghut, htên byoq sê é le, htên byoq a sê é silí wunlí lé wó yù râ a nghut. ⁵¹ Gyo to keq, zaú tô é hkyô lé, ngò, nungmoq lé taí kyo kôlé: Nga-nhúng banshoq bang gi, shi byuq râ a nghut é

* 15:45 Apùn 2:7 † 15:45 Ló htâng é Adam gi, Yesuq lé taí nau é nghut lhê.

za, htaî lhik é hui râ ru nghut lhê. ⁵² Haû gi, lô htâng é tut htê mying é hkûn, ralháp za, myoqkuq ralap má dut râ nghut lhê. Hkâsu mù gâ le, tut htê mying râ nghut lhê, haû hkûn, shi byuq bê bang gi, htên byoq a sê é shut lhoq dui toq yu é hui râ nghut mù, nga-nhúng gi, htaî lhik é hui râ nghut lhê. ⁵³ Hkâsu mù gâ le, htên byoq sê é gi, htên byoq a sê é lé htaî wut yù mù, shi byuq sê é gi, shi byuq a sê é lé htaî wut yù râ dut é nghut lhê. ⁵⁴ Haû htên byoq sê é gi, htên byoq a sê é lé htaî wut yù mù, shi byuq sê é gi, shi byuq a sê é lé htaî wut yu é hkûn sheq, "Shî-nò hkyô gi, ûng budâng èq myui pyâm é hui bê nghut ri."* ga kâ tô é eq,

⁵⁵ "Shî-nò hkyô ê, náng é ûng budang gi, hkâmá lhú? Shî-nò hkyô ê, náng é nyin gi, hkâmá lhú?"*

gâ tô é sanghkyang gi, dik râ nghut lhê. ⁵⁶ Haû shî-nò hkyô é nyin gi, yubak mara nghut ri; yubak marâ é a-tsam gi, jep é tarâ nghut ri. ⁵⁷ Nghut kôlhang, Garai Gasang lé jeju hkya-ôn lhê! Yhang gi, nga-nhúng é Yhumsing Yesuq Hkrisduq dông mai, nga-nhúng lé ûng budang byî é nghut ri.

⁵⁸ Haû mù luî, ngá é chyitdap gumang wuî ê, yap gingtîng nyî keq. Hai èq le, nungmoq lé hkâlhoq dui nún nhâng kó. Nungmoq gi, haû Yhumsing má nungmoq wùn waq é muzó akôm a nghut é lé

sé kô é nghut lhê yanmai, haû Yhumsing é muzó lé ayang wùn waq shikut nyî keq.

16

Yerusalem Wà Mó Mã É Lumjing Bâng É Matú Alu Hkyuî Râ Hkyô

¹ Ahkuî, Garai Gasâng é byu pé é matú alu hkyuî râ hkyô eq séng luî gi, haû Galatiq mau mã é noqkuq hpûng pé lé ngò kut nhang é su kut keq. ² Ngò jé lé é hkûn, alu hkyuî râ hkyô a kut ra râ dông, bat hkangmó mã é sâng-hi nyî má, yuq hkangmó gi, yhumsing wó ho é má cháng mù, gam tô to lánq keq. ³ Ngò jé lé é hkûn, ngò gi, nungmoq hkyin tô é byu pé lé, shit kyô é laiká pé byi mù, nungmoq é chyunghuq lé, Yerusalem wà mó mã é dé nhâng râ nghut lhê. ⁴ Ngò le é ang râ dut é nghut jáng, yhangmoq gi, ngá é byinzùm kut râ nghut lhê.

Poluq Lum Kat É Hkyô Pé

⁵ Ngò gi, Makedoni mau lai byit é htâng, nungmoq chyáng jé lé râ nghut lhê. Hkâsu mù gâ le, ngò gi, Makedoni mau lai byit râ za nghut lhê. ⁶ Ngò hkâmá é kôlhang, ngá é hkyowuî má nungmoq wó garúm kat kó râ matú, ngò gi, rayoq zo nghut nghut, gyoqmyò lhang lai shoq nghut nghut, nungmoq eq rahá nyî abe. ⁷ Ngò gi, lai lô uchyang za nungmoq lé lé kum râ nghut mù, ahkuî wó myâng râ lé a nau é nghut lhê;

ngò gi, haû Yhumsîng dóng é nghut jáng, nungmoq eq rahá rayoq nyi râ lé myit myoqbyu lhê. ⁸ Nghut kôlhang, ngò gi, Penteko-ti poî buinyi jé shoq Ehpesu myuq má nyi râ nghut lhê. ⁹ Haî mù gâ le, ngo lé htuq htîng é bang myo myo nyi é nghut kôlhang, akyû htoq é muzó é matú hkum mó ngo lé hpông to byi é yanmai nghut lhê.

¹⁰ Timohti jé lé jáng, yhang, nungmoq eq rahá nyi é u má, gyuq é hkyô haî le a joq râ matú wú byi keq; hkâsu mù gâ le, yhang gi, haû Yhumsîng é muzó lé, ngò su wùn waq wún é sù nghut lhê. ¹¹ Haû mù, ó yuq le, yhang lé hkâwú shóm kó. Yhang gi, ngá chyáng wó dum taû jé sháng gaq, yhâng é hkyowui má nguingón é dông nhang kat keq. Haû gumang wui eq rahá lò kó râ lé, ngò myit láng nyi lhê.

¹² Ahkuî, nga-nhûng é gumang Apolo é hkyô eq séng luî ga jang: yhang gi, haû gumang wui eq rahá nungmoq chyáng lé râ lé, ngò, gyai yhang wum taî tsuq lhê. Yhang kúm gi, ahkuî lé nau é myit a dê bò shi, nghut kôlhang, yuqyo é ahkyíng wó jáng, yhang lé lô râ nghut lhê.

¹³ Machya nyi keq; lumjîng hkyô má ging ging tîng tîng yap nyi keq; gyuq kyum myit hkâbô kó; wum bo nyi keq. ¹⁴ Jung hkangmó lé, chyitdap myit eq zui saí keq.

¹⁵ Stehpana eq yhâng é yhumbyù wui gi, Ahkaia

ming má sâng-hi hpúng wâng bang nghut luî, yhangmoq gi, yhumsîng gùng lé, haû sânyúng bâng é dojaú hkyô má ap nóng bekô lé, nungmoq sê akô nghut ri. Gumang wui ê, ngò, nungmoq lé wum taî tsuq kat kôlé, ¹⁶ haû sù é bâng é a-ô má le, haû muzó má bo wang lôm mù, mù zui shikut bang yuq hkangmó é a-ô má le, nyi keq. ¹⁷ Ngò gi, Stehpana, Hportunatu eq Ahkaiku pé jé lo é hkûn, gyai gabú é nghut lhê, haî mù gâ le, yhangmoq gi, nungmoq a kut byi é hkyô lé, lhoq pyíng byi bekô nghut ri. ¹⁸ Hkâsu mù gâ le, yhangmoq gi, ngá é woi-nyí eq nungmoq é woi-nyí lé lhoq ngón byi bekô nghut ri. Haû sù é bang lé, hpautap nyi keq.

Ló Htâng É Shi-kyám Dang

¹⁹ Asia mau mâ é noqkuq hpúng pé gi, nungmoq lé shi-kyâm kat akô. Akula eq Priskila nhik le, yhangnhik é yhûm má chôm huî é noqkuq hpúng lé, haû Yhumsîng má nungmoq lé gyai yhang shi-kyâm kat akô. ²⁰ Shí má nyi é gumang wui banshoq bang gi, nungmoq lé shi-kyâm kat akô. Rayuq eq rayuq chyoiyúng é chyitpuq eq shi-kyâm lhum keq.

²¹ Ngò, Poluq gi, shi-kyám dang shí lé, ngá é loq eq yhang ká é nghut lhê.

²² Rayuq yuq, haû Yhumsîng lé a chyitdap é nghut jáng, haû yuq gi, nhîng pyâm é hui sháng gaq. Yhumsîng ê, jé lé aq hkoi!

²³ Haû Yhumsîng Yesuq é jeju gi, nungmoq eq rahá nghut nyî sháng gaq.

²⁴ Ngá é chyitdap myit gi, Hkrisduq Yesuq má nungmoq banshoq bâng chyáng joq nyî sháng gaq. Amen.

KORINHTUQ

Pê Chyáng Htang

Dàm Hun Kat é

Laiká

(2 Corinthians)

¹ Garai Gasang ô nau é eq rajung za, Hkrisduq Yesuq é lagyo rayuq dut sù ngò Poluq gi, nga-nhúng é gumang Timohti le kut, Korinhtuq myuq mâ é, Garai Gasang é noqkuq hpúng lé le, Ahkaia mau gón mâ é sân-yúng bang banshoq chyáng le, dang kyô kat lhê: ² Nga-nhúng é Íwa nghut é Garai Gasang eq haû Yhumsing Yesuq Hkrisduq chyáng mà é jeju eq ngingón hkyô gi, nungmoq chyáng ru joq nyí sháng gaq.

Nhik tíng hkyô banshoq é Garai Gasang

³ Nga-nhúng é Yhumsing Yesuq Hkrisduq é Yhângwa eq Garai Gasang, shogyo nhikmyin hkyo é Íwa eq nhik tíng hkyô banshoq é Garai Gasang gi, hkya-on kungton é huí nyí sháng gaq. ⁴ Garai Gasang chyáng maí ngamoq wó yû bê nghut é nhik tíng hkyo eq, hkasû é wuîhke hkyô hui bang lé le nga-nhúng wó nhik tíng byi sháng gaq ga, Yhang gi, ngamoq é wuîhke hkyô banshoq má nhik tíng byí ri. ⁵ Hkâsu mù gâ le, Hkrisduq hui zô é jamjau hkyô myo myo lé ngamoq bo hui zô é su, Hkrisduq đông mai, ngamoq é nhik tíng hkyô

le byíng mui nyi é nghut lhê. ⁶ Ngamoq, myit myo uhkyî é huí é nghut jáng, nungmoq é nhik tíng hkyô eq hkyi yû hkyo é matú nghut nyi ri; ngamoq, nhik tíng é huí é nghut jáng, nungmoq é nhik tíng hkyo é matú nghut luí, haû gi, ngamoq jamjau é eq rajung za nghut é jamjau hkyô lé, myit hing é đông mai wó jân pyám râ a-tsam, nungmoq chyáng lhoq htoq byí é nghut lhê. ⁷ Haû mù, ngamoq é jamjau hkyô pé má nungmoq bo lòm bekô nghut é su, ngamoq é nhik tíng hkyô má le nungmoq bo lòm bekô nghut é hkyô lé, ngamoq sê é yanmai, nungmoq lé ngamoq myit myoqbyu kat é hkyô gi, hkyak wó lum to bê nghut lhê.

⁸ Gumang wuî ê, Asia mau má, wuîhke jamjau é ngamoq gyai yhang hui zô é hkyô lé, ngamoq gi, nungmoq lé kyô kat nau ri. Ngamoq wó jân é a-tsam lhang htum shoq hpuzô é nghut luí, ngamoq gi, asak duí lo râ lhang a myit myoqbyu lô é nghut lhê. ⁹ Gè gè yhang, ngamoq gi, sat hui berâ nghû, ngamoq é i-myt má lumjing pyâm é nghut lhê. Nghut kôlhang, haû gi, ngamoq gùng ngamoq a lumhkau é za, shí bê bang lé lhoq dui toq sù Garai Gasang lé lumhkaû râ matú dut é nghut lhê. ¹⁰ Garai Gasang gi, haû sù é shí râ hkyô mai hkyi yû bê nghut mù, ngamoq lé hkyi yû râ za nghut lhê. Yhang gi, ngamoq é matú nungmoq kyûdung byí nyi é u

má, xoq luí ngamoq lé hkyi yù râ za nghut lhê nghû, ngamoq gi, Yhang lé myit myoqbyu to bê nghut luí, ¹¹ myo myo kyûdung byî é lé gyo byî é má ngamoq shimân jeju wó mù, byù myo myo gi, ngamoq wó é shimân jejú é yanmai Garai Gasang lé jeju hkya-on kó râ nghut lhê.

Poluq, Hen Tô É Muzó Htai Pyâm É Lé Tai Hung É Hkyô

¹² Ngamoq nghutbun é gi, Garai Gasang chyáng mâ é chyoiyúng hkyô eq lhumzui hkyô má, mingkan zo wuí eq ngamoq asak duì bê hkyô lé le, je luí nungmoq eq zùm yap é hkyô lé le, ngamoq é myit sôn sê é hkyo èq, saksé hkám byî é hkyô nghut lhê. Ngamoq haù su kut é gi, mingkan hpaqchyî byéng-yá đông mai kut é a nghut é za, Garai Gasang é jeju đông mai kut é ru nghut lhê. ¹³ Hkâsu mù gâ le, ngamoq gi, nungmoq a dat nghap é eq a sê gyô é haì le a ká byî kat é nghut lhê. Ngò, myit myoqbyu kat é gi, ¹⁴ nungmoq gi, ngamoq é hkyô ra-am lé wó sê gyô yù bê eq rajung za, haù Yhumsing Yesuq é buinyì má nungmoq é hkyô lé ngamoq nghutbun râ nghut é su, ngamoq é hkyô lé nungmoq wó nghutbun râ matú, nungmoq, banshoq lé sê gyo kó râ nghut lhê.

¹⁵ Haù hkyô lé, ngò hkyak myit lum to bê nghut é yanmai, nungmoq gi, akyû í dam wó hkam yù kó sháng

gaq nghû, ngò gi, nungmoq chyáng hí lé kum râ matú hen to bê nghut lhê. ¹⁶ Ngò gi, Makedoni mau shut e ló é hkyowuì má nungmoq lé hí lé kum mù, Makedoni mau mai nungmoq chyáng dum taù lò luí, Yuda mau shut e é hkyowuì má, nungmoq, ngo lé garúm kat kó râ lé myit lum to bê nghut lhê. ¹⁷ Ngò gi, haù hkyô hen é hkún, agon za hen hkyut é nghut lhê lúhú? Haù a nghut jáng, ngò hen é pé gi, ra-u má za, "Nghut lhê, nghut lhê." nghû é eq, "A nghut, a nghut." ngu é wó táì râ matú, mingkan myit đông hen é nghut lhê lúhú?

¹⁸ Gè gè yhang, Garai Gasang gi, lhumzui sù yhang nghut é eq rajung za, ngamoq é danglù gi, nungmoq chyáng "Nghut lhê" lé, "A nghut" ngu é a nghut. ¹⁹ Hkâsu mù gâ le, ngo èq le, Sila èq le, Timohti èq le, nungmoq chyáng hko kyo bê nghut é sù, Garai Gasang é Yhangzo Yesuq Hkrisduq gi, "Nghut lhê" ngu é eq "A nghut" ngu é sù a nghut é za, Yhang má gi, hkâ-nhám le "Nghut lhê" ngu é za joq lhê. ²⁰ Hkâsu mù gâ le, Garai Gasang gi, danggidiq hkâ-myhó to kôle, haù pé gi, Hkrisduq má "Nghut lhê" chyat nghut lhê. Haù mù, Garai Gasang é hpungwup shingkâng é matú, Yhâng đông mai, nga-nhúng gi, "Amen" nghû táì é nghut lhê. ²¹ Ngamoq eq nungmoq lé Hkrisduq má yap gingtíng

nhang é sũ gi, Garai Gasang nghut ri. Yhang gi, nga-nhung lé masat é xũ but byi mù, ²² Yhang sing lhê gâ é dizik, nga-nhung lé htung tap byi luí, jé lô râ hkyô pé hkyak joq lhê nghu é masat zè dõng, Yhang é Woi-nyí lé nga-nhung é i-myt unghkaũ má kat byi bê nghut ri.

²³ Ngò gi, nungmoq hkyamsa râ matú, Korinhtuq myuq má a dum taũ lé é hkyô têng é lé, ngá é saksé dut râ dõng Garai Gasang lé wut dũng lhê. ²⁴ Haũ gi, nungmoq é lumjing hkyô lé ngamoq sing pyám byí é a nghut é za, nungmoq é gabú hkyo é matú, nungmoq eq rahá chõm zui saí é ru nghut lhê; haí mù gâ le, lumjing myit mai za nungmoq wó yap ging nyi bùm kô é ru nghut lhê.

2

¹ Haũ mù luí, ngò gi, nungmoq lé myit nò nhâng é dut râ dõng, lé dum kũm é a kut râ nghũ, myit hpyit to bê nghut lhê. ² Hkâsu mù gâ le, nungmoq lé ngò yón kuq nhang é nghut le gi, ngò yón kuq nhâng bê bang nungmoq mai lai luí, ó yuq wá ngo lé wó gabú nhâng râ lhú? ³ Ngò jé lé é hkũn, ngo lé gabú nhâng râ âng é bãng èq, ngo lé myit nò nhang é a hui sháng gaq nghũ, ngò gi, ngò kut é eq rajung za laiká kâ kat bê nghut lhê. Ngá é gabú hkyô lé nungmoq banshoq bang wó bo gabú kó râ nghut lhê nghũ, nungmoq banshoq

bang lé ngò hkyak myit lum tô lhê. ⁴ Hkâsu mù gâ le, ngò gi, nungmoq lé laiká kâ é hkũn, myit myo uhkyí mó èq le, myit má yón kuq é èq le, ngaubyi ngau-nhap é èq le, kâ kat bê nghut lhê. Haũ gi, nungmoq lé yón kuq é hui nhâng râ matú a nghut é za, nungmoq lé ngò hkâ-í chyitdap é hkyô lé sé nhâng râ matú ru nghut lhê.

Mara Hkyut Byí Lhum Râ Hkyô

⁵ Yón kuq hkyô lhoq htoq é sũ gi, yhang, nungmoq banshoq bang lé ahkyô hkyô pé má yón kuq nhang é su, ngo lé gyai wá yón kuq nhang é a nghut. Haũ hkyô eq séng luí, ngò gyai wá yhang zuq zuq a taí nau é nghut lhê. ⁶ Nungmoq myo hpyâng èq yhang lé mara dam byí é hkyô gi, yhang é matú gé bê nghut ri. ⁷ Nghut kõlhang, ahkuí, nungmoq gi, yhang a wó jan loshoq myit yón é a hui zo râ matú, yhang lé mara hkyut pyám byi mù, nhik ting byi keq. ⁸ Haũ mù luí, nungmoq é chyitdap myit gi, yhang é ahtoq má dum lhoq ging shit nyí keq nghũ, nungmoq lé ngò wum taí tsuq kat lhê. ⁹ Ngò, nungmoq lé haí mù laiká ká byí kat é hkyô gi, nungmoq chyam wú huí é hkyô lé wó jân é hkyô eq jung hkangmó má jino gyo hkyô bò a bo é lé, wó sé râ matú le nghut lhê. ¹⁰ Nungmoq, rayuq yuq lé mara hkyut byí é nghut le gi, ngò le, haũ yuq lé mara hkyut byí lhê. Mara

hkyut râ rajung jung joq é nghut jáng, ngò mara hkyut é gi, Tsadán èq nga-nhúng lé a wó ùng râ matú, nungmoq é yanmai, Hkrisduq é myoq hí má ngò mara hkyut byi bê nghut lhê. ¹¹ Hkâsu mù gâ le, Tsadán hen é hkyô pé lé nga-nhúng a sê é a nghut.

Dangshikaq Asik Mâ É Hpungmû Wùn Bang

¹² Ngò gi, Hkrisduq é gabú danglù hko kyo râ matú, Troa myuq má ê jé é hkûn, haû Yhumsing gi, ngo lé hkum hpóng byi é lé, ngò myang ri. ¹³ Nghut kôlhang, ngò gi, ngá é gumang Tituq lé haú má a myang ho é yanmai, myit myo mù, yhangmoq lé shikyâm to luî, Makedoni mau shut xoq e ló é nghut lhê.

¹⁴ Nghut kôlhang, Hkrisduq má, ngamoq lé hkâ-nhám le ùng budang hkyô shut shuî-û yù mù, Hkrisduq lé sê é sumsé hpaqchyi é nam ngón shôm lé, ngamoq đông mai jowò hkanmó má taí pyo é sù, Garai Gasang gi, jeju hkya-ôn é huî nyi sháng gaq. ¹⁵ Hkâsu mù gâ le, ngamoq gi, hkyi yu é huî nyi bâng chyáng le, htên byoq ló é huî nyi bâng chyáng le, Garai Gasâng é matú Hkrisduq é nam ngón shôm nghut nyi lhê. ¹⁶ Ngamoq gi, htên byoq nyi bâng é matú shî-nò hkyo é shôm dut mù, hkyi yù huî nyi bâng é matú nghut jáng, asak hkyo é nam ngón shôm dut é nghut lhê. Haû mù, ó yuq wá muzó shî eq htuk râ lúhú? ¹⁷ Ngamoq gi, amyat wó râ

matú Garai Gasâng é mung-danglé hkat ung zô é byù myo myo su a nghut é za, Garai Gasâng chyáng mai nhang é byu pé su, Garai Gasâng é hí má, Hkrisduq é byu pé đông lhumzui myit mai taí é nghut lhê.

3

¹ Ngamoq gi, yhumsing gùng yhumsing dum owaq hi ló é nghut lhê lúhú? Byù ra-am kut é su, nungmoq chyáng, ngamoq é matú htuqluq htuqbáng laiká ká byi kô é ngamoq ra râ luq, nungmoq yuq ngamoq é matú ká byi ra kó râ luq? ² Nungmoq gùng yhang gi, ngamoq é myit nhiklhum má kâ tô é, yuq hkanmó èq nghap luí sê yu é laiká gùng pé nghut akô. ³ Nungmoq gi, nungmoq chyáng ngamoq hpungmû wùn waq é yanmai, Hkrisduq chyáng mâ é laiká nghut kô é hkyô lé shit nyi akô. Haû gi, kâ jung chí èq kâ tô é đông a nghut é za, rû dui nyi é Garai Gasâng é Woi-nyí èq kâ tô é nghut é htoq agó, luqlong pé má kâ tô é đông a nghut é za, xângzo byu é myit nhiklhum long pé má kâ tô é ru nghut lhê.

⁴ Haû su nghû hkyak wó myit lum é hkyô gi, Garai Gasâng é hí má, Hkrisduq đông mai ngamoq wó yu é nghut lhê. ⁵ Ngamoq gi, yhumsing gùng haî lé le wó kut lhê nghu é a nghut, ngamoq é a-tsam gi, Garai Gasâng chyáng mai lo é nghut lhê. ⁶ Yhang gi, ngamoq lé,

dangshikaq asik lé wó wùn waq râ a-tsam byi bê nghut ri. Dangshikaq asik haû gi, tarâ laiká mai lo é a nghut é za, Woi-nyí mai lo é ru nghut lhê. Hkâsu mù gâ le, laiká gi, shî dâm byi lhê, Woi-nyí kúm gi, asak byí é nghut lhê.

Dangshikaq Asik É Hpungwup Shingakang

⁷ Ahkuí, haû Mosheq é myoqdong mã é hpungwup shingkâng é yanmai, haû Israelaq byu pé gi, yhâng é myoqdong lé a wó wú tsuq to kó nghut ri. Hpungwup shingakang haû shûm lo byuq sê é nghut kôlhang, luqlong má dok kê tô é, shî-nò hkyô lhoq htoq é tarâ muzó gi, hpungwup shingakang eq rahá jé lé é nghut lhê. ⁸ Haû su nghut jáng, haû Woi-nyí é muzó gi, hpungwup shingakang je riyhang dut râ a nghut kó lú? ⁹ Gè gè yhang, haû byù lé mara byí é tarâ muzó lháng, hpungwup shingakang bo é nghut le gi, dingmán nhang é hkyô sik gi, je riyhang hpungwup shingakang bo é nghut lhê ô! ¹⁰ Hkâsu mù gâ le, hpungwup shingakang bo é tarâ muzó gi, hpungwup shingakang je bo é dangshikaq asik eq whuí é hkûn, hpungwup shingakang a bò lo dut byuq bê nghut ri. ¹¹ Shum byuq ló é tarâ lháng gi, hpungwup shingakang eq rahá lé jé bê nghut le gi, ru gîng nyi é dangshikaq asik é hpungwup shingakang gi, je riyhang gyaú râ nghut lhê ô!

¹² Haû mù luí, ngamoq gi, haû sù é myoqbyù hkyô wó é yanmai, gyuq kyum myit a bo é hkyô shit é nghut lhê. ¹³ Ngamoq gi, Mosheq su a nghut. Yhang gi, duqbang é hkyô shûm byuq ló é hkûn, haû Israelaq byu pé haú lé a wú tsuq râ matú, yhâng é myoqdong lé myoqgo eq nghop pyâm é sù nghut ri. ¹⁴ Nghut kôlhang, yhangmoq é myit gi, lhoq chut byí é hui bekô nghut ri; hkâsu mù gâ le, hkû-nyí jé shoq, dangshikaq axau lé nghap é hkûn, rajung zâ é myoqgò gi, ru nghop to byí ashî nghut ri. Haû gi, huí sêng pyâm é a hui shi, haí mù gâ le, Hkrisduq dông za haú lé wó yu pyâm é nghut lhê. ¹⁵ Hkû-nyí jé shoq lháng, Mosheq é laiká lé nghap é hkûn, yhangmoq é myit nhiklhum má myoqgò eq nghop tô é nghut ri. ¹⁶ Nghut kôlhang, ó yuq le, Yhumsîng chyáng hká u lhîng lò kôlhang, haú hkûn jáng, myoqgò gi, hî pyám byí é hui râ nghut lhê. ¹⁷ Yhumsîng gi, haû Woi-nyí nghut mù, Yhumsîng é Woi-nyí nyi é jowò má, luthkyô le joq lhê. ¹⁸ Haû Yhumsîng é hpungwup shingakang lé lhoq htoq shit é bang banshoq nghut é myoqdong má myoqgò a nghop é bang nga-nhúng gi, ru myo jat nyi é hpungwup shingakang lhoq htoq byi hkyô nghut é, Yhâng é isâm shut htaí lhik wang é huí nyi bê nghut lhê. Haú hkyô gi, haú Woi-nyí nghut sù Yhumsîng chyáng mai lo é nghut lhê.

4

Tseyam Pé Má Bo É Sutzè

¹ Ngamoq gi, Garai Gasâng jeju mai muzó hkyô haû wó é nghut mù, myit wum a gyui é nghut lhê. ² Ngamoq gi, zaú tô é eq hoq htoq é hkyô pé lé tô pyám luî, mhaû zô é hkyô le a kut, Garai Gasâng é mungdang lé le ahpuq alhik a kut é bang nghut lhê. Haû su kut râ malaí, ngamoq gi, haû tengmán hkyô lé san za lhoq htoq shit é dông, Garai Gasâng é hí má yuq hkangmó é myit sôn sê é hkyô má, yhumsing gùng yhumsing htuk shoq nyi lhê. ³ Ngamoq é gabú danglù gi, myoqgo eq nghop pyâm é huí é nghut jáng, haû gi, htên byoq nyi bâng chyáng za nghop pyám huí é ru nghut lhê. ⁴ Haû Garai Gasâng é azông isâm nghut sù, Hkrisduq é hpungwup shingkang bo é gabú danglù é maubó lé, a lumjìng bang a wó myâng kó sháng gaq ga, ipyat shi é garai* gi, yhangmoq é myit lé lhoq chit byi bê nghut ri. ⁵ Haû nghut é yanmai, ngamoq gi, yhumsing gùng eq séng luî hko kyô é a nghut é za, Yesuq Hkrisduq gi, Yhumsing nghut é hkyô lé le, Yesuq é matú, ngamoq gùng yhang gi, nungmoq é jùn pé nghut é hkyô lé le, hko kyô é ru nghut lhê! ⁶ Hkâsu mù gâ le, "Mauchut hkaû mai maubó htoq lô sháng gaq."☆ ga taí

é Garai Gasang gi, Yesuq Hkrisduq é myoqdong mâ é Garai Gasâng é hpungwup shingkâng é maubó lé sê gyô é nyan lé, nga-nhúng lé byí é dông, Yhâng é maubó lé, nga-nhúng é i-myit unghkaû má duqbó nhâng bê nghut ri.

⁷ Nghut kôlhâng, ngamoq gi, sutzè haû bo é tseyam pé† nghut nyi lhê. Haû gi, gyaú dik é a-tsam mó gi, ngamoq chyáng mâ é a nghut é za Garai Gasâng chyáng mâ é nghut é hkyô lé tûn shit râ matú nghut lhê. ⁸ Ngamoq gi, wuîhke hkyo eq lhinghkyuq mai gyai yhang nhê zik é hui kôlhâng, a gyop byuq é nghut lhê; myit lhoq nhúng pyâm é hui kôlhâng, myit a htûm byuq é nghut lhê; ⁹ zing-rî é hui kôlhâng, kâng pyám huí é a nghut; bat lhêng pyâm é hui kôlhâng, htên byoq huí é a nghut. ¹⁰ Haû Yesuq é asak duí hkyô le, ngamoq é gungdu má lhoq htoq shit é hui sháng gaq nghû, ngamoq gi, Yesuq shi é hkyô lé, hkâ-nhám le, ngamoq é gungdu má wùn waq wún é nghut lhê. ¹¹ Hkâsu mù gâ le, Yesuq é asak duí hkyô gi, nga-nhúng é shî sê é gungdu má lhoq htoq shit é hui sháng gaq nghû, asak dui nyi é bang ngamoq gi, Yesuq é matú é yanmai, hkâ-nhám le, shi byuq hkyô shut ap pyâm é huí nyi ri. ¹² Haû mù luî, shi byuq hkyô gi, ngamoq má mù zuí nyi ri;

* 4:4 Ipyat shi é garai gâ é gi, Tsadán lé gâ é nghut lhê. ☆ 4:6 Apûn 1:3 † 4:7 Tseyam pé gâ é gi, nga-nhúng é wum nyhôm é gungdu lé gâ é nghut lhê.

asak duì hkyô kúm gi, nungmoq má mù zuì nyi é nghut ri.

¹³ "Ngò gi, lumjǐng bê nghut lhê, haù mù, ngò taì é nghut lhê."* ga kâ tô é eq rajung za, ngamoq le, lumjǐng hkyô hau èq yhang, lumjǐng bê nghut mù taì é nghut lhê. ¹⁴ Haì mù gâ le, haù Yhumsing Yesuq lé shi é mai lhoq duì toq é Sû gi, ngamoq lé le, Yesuq eq rahá lhoq duì toq mù, nungmoq eq rahá, ngamoq lé Yhâng é hí má shuí jé râ nghut é lé, ngamoq sê lhê. ¹⁵ Haù jeju wó é byu pé gi, je riyhang myô jat lò mù, Garai Gasâng é hpungwup shingkâng é matú, jeju hkya-ôn é hkyô gi, bying mui nyì sháng gaq ga, haù pé banshoq gi, nungmoq é akyu é matú nghut nyi ri.

¹⁶ Haù mù luì, ngamoq gi, myit wum a gyuí é nghut lhê. Ngamoq é shinggan gungdu gi, htên byoq lô nyì kôlhang, i-myt unghkaù gi, ra-nyì eq ra-nyì asik dut nhang é huì nyi ri. ¹⁷ Hkâsu mù gâ le, ngamoq é tiq é eq razup zâ é wuìhke hkyô pé gi, ngamoq é matú haù pé htoq gyai hkik é ahtum abyuq é hpungwup shingkan lé, wó yu nhang ri. ¹⁸ Haù mù, nga-nhung é myoq gi, byu-myang é lé wú tsuq nyi é a nghut é za, a byu-myang é lé sheq wú tsuq nyi é ru nghut lhê. Hkâsu mù gâ le, byu-myang é gi, razup rahtâng zâ é nghut mù, a byu-myang é kúm gi, ahtum

abyuq é nghut lhê.

5

Mauhkung Htoq Mâ É Yhûm

¹ Haù myidàm zúm nghut é nga-nhung lúng nyi é gungdu gi, htên byoq sê é nghut kôlhang, byu loq èq saì é a nghut é za, mauhkung htoq má joq é ahtum abyuq é yhûm* nghut é, Garai Gasâng chyáng mâ é yhûm lé, nga-nhung wó é hkyô lé, nga-nhung sê lhê. ² Nghut kôlhang, ahkuì, nga-nhung gi, nga-nhung é mauhkung yhûm lé tù hut byì é lé gyai yhang hui naù mù, nò-kying su kyíng nyi lhê. ³ Haì mù gâ le, nga-nhung gi, hut byì é hui jáng, gungdu a bò bang a dut lo râ nghut lhê. ⁴ Hkâsu mù gâ le, nga-nhung gi, zúm shì má lúng nyi é u lé, wòlai wùn mù, nò-kying su kyíng nyi lhê; haù gi, shì byuq sê é lé, asak duì é èq wó htaì lhiq pyám sháng gaq nghû, nga-nhung gi, a hut byì é hui râ lé a ô nau é za, nga-nhung é mauhkung yhûm lé tù hut byì é hui râ lé ô nau é yanmai nghut lhê. ⁵ Ahkuì kúm, jeju haù hkam yù râ matú, nga-nhung lé lajâng to byì é sù gi, Garai Gasang nghut mù, jé lô râ hkyô gi, hkyak joq lhê nghû é masat zè đông, nga-nhung lé haù Woi-nyì byi bê nghut ri.

⁶ Haù mù luì, ngamoq gi, hkâ-nhám le hkyak lum tô lhê.

* 4:13 Hkya-on 116:10 * 5:1 Mauhkung htoq má joq é ahtum abyuq é yhûm gâ é gi, nga-nhung, mauhkung mingdán má jé é hkún wó râ gungdu asik lé gâ é nghut lhê.

Gungdu shî má yhûm đông ru lúng nyî nyî gi, haû Yhumsîng eq wê gâng nyi ashî nghut é lé ngamoq sê nyi lê. ⁷ Ngamoq gi, byu-myang é đông mai a nghut é za, lumjîng myit mai asak dui é ru nghut lê. ⁸ Ngamoq gi, hkyak myit lum tô lê nghû, ngò taî lê, haû mù, gungdu shî mai wê gang luî, haû Yhumsîng eq rahá nyi râ lé ngamoq je riyhang ô nau é nghut lê. ⁹ Haû mù, ngamoq gi, gungdu shî má yhûm đông lúng nyi é nghut nghut, haû mai wê gâng é nghut nghut, ngamoq myit myoqbyu tô é jowò gi, Yhang lé gabú nhâng râ matú nghut lê. ¹⁰ Hkâsu mù gâ le, yuq hkangmó gi, gungdu shî má yhûm đông lúng nyi é u lé, ge é nghut nghut, a ge é nghut nghut, kut é eq rajung za hkam yù râ matú, Hkrisduq é tarâ jéyáng tanghkuq hí má, nga-nhúng banshoq bang htoq shit ra râ nghut lê.

Nguingón Hkyô Xoq É Muzó

¹¹ Haû mù, Yhumsîng lé gyuq hkungga râ hkyô haî nghut é lé ngamoq sê é nghut luî, ngamoq gi, byu pé lé taî pún kyîng shikut lê. Ngamoq haî nghut é gi, Garai Gasâng chyáng san za nghut nyî mù, nungmoq é myit sôn sê é hkyô má le san za nghut râ lé, ngò myit lum lê. ¹² Haû myit nhiklum má bo é lé gumrông râ malaî, byu-myang é lé gumrong é bang lé, nungmoq wó tû taî kó sháng gaq nghû, ngamoq gi,

nungmoq chyáng yhumsing gùng lé dum owaq shikut é a nghut é za, ngamoq é hkyô lé, nungmoq wó gumrông râ ahkáng, nungmoq lé byî é ru nghut lê. ¹³ Ngamoq a gyîng é đông nghut le gi, Garai Gasâng é matú a gyîng é nghut lê; ngamoq gyîng é đông nghut le gi, nungmoq é matú gyîng é nghut lê. ¹⁴ Hkâsu mù gâ le, Hkrisduq é chyitdap myit èq ngamoq lé kut nhang nyi é nghut lê. Haû gi, banshoq bâng é matú rayuq shî hkám byi bê nghut mù, banshoq bang shi é đông nghut bê nghû, ngamoq hkyak sê gyô é yanmai nghut lê. ¹⁵ Yhang gi, asak dui nyi é bang, yhangmoq yhumsing gung é matú a dui lô é za, yhangmoq é matú shî hkám byi luî, lhoq dui toq é huí Su é matú dui kó sháng gaq ga, banshoq bâng é matú shî hkám byi bê nghut ri.

¹⁶ Haû mù, ngamoq gi, ahkuî mai, ó yuq eq séng luî le, mingkan hkyam đông mai a wú lô é nghut lê. Ngamoq gi, hí hkûn Hkrisduq lé haû đông wú é nghut kôlhang, haû su hkâ-nhám le a kut lô é nghut lê. ¹⁷ Haû nghut mù luî, rayuq yuq gi, Hkrisduq má nghut nyi é nghut jáng, yhang gi, asik hpân hui sù dut bê nghut ri; haû axau gi, byuq byuq mù, lunglhang asik dut bu-nhung! ¹⁸ Haû pé banshoq gi, Garai Gasâng chyáng mâ é chyat nghut lê. Yhang gi, Hkrisduq đông mai nga-nhúng lé Yhànggùng eq

nguingón hkyô xoq yû luî, nguingón hkyô xoq é muzó ngamoq lé byi bê nghut ri. ¹⁹ Haû gi, Garai Gasang gi, byu pê é mara lé a matsíng byî é za, Hkrisduq dông mingkan lé Yhânggùng eq nguingón hkyô xoq yû bê nghut luî, Yhang gi, nguingón hkyô xoq yu é mungdang haû lé, ngamoq lé ap byî to bê nghû nau é nghut lhê. ²⁰ Haû mù luî, ngamoq gi, Hkrisduq é gunglik pé nghut lhê mù, Garai Gasang gi, ngamoq dông mai nungmoq lé lhoq pún kyíng nyi é nghut lhê. Garai Gasang eq nguingón hkyô xoq yû keq nghû, ngamoq gi, Hkrisduq é gunglik dông nungmoq lé dúng tôngbán nyi lhê. ²¹ Nga-nhúng gi, Hkrisduq dông mai Garai Gasâng é dingmán bang wó dut kó sháng gaq ga, Garai Gasang gi, yubak mara a bò Sû lé, nga-nhúng é matú yubak mara hkungga dut nhâng bê nghut ri.

6

¹ Ngamoq gi, Garai Gasâng é mù zui byinzùm wuì nghut nyi é eq rajung za, Garai Gasâng jeju lé akyû a bo é dông hkâhap yù kó nghû, nungmoq lé wum taí tsuq kat lhê. ² Hkâsu mù gâ le, "Ngò ô nau é ahkyíng má, nang lé ngò gyo byi bê nghut mù, hkyi yù hui rá buinyi má, nang lé ngò garúm bê nghut lhê."*

ga luî, Yhang taí ri. Ngò, nungmoq lé taí kyo kôlé, ahkuî gi, Garai Gasang ô nau é ahkyíng, ahkuî gi, hkyi yu é buinyi nghut ri.

Poluq É Wuîhke Hkyô Pé

³ Ngamoq é hpungmû gi, taí hpoì pyâm é a hui sháng gaq nghû, ngamoq gi, ó yuq é hkyô má le, leqbat jung a to byî é nghut lhê. ⁴ Haû kut râ malaí, ngamoq gi, Garai Gasâng é dui-nhâng zoshâng wuì nghut é hkyô lé, hkyô hkangmó má yhumsing gùng yhumsing shit nyi lhê. Gyai hkam jân é hkyô má le, jam-jau hkyô pé má le, wuîhke hkyô pé má le, myit myo uhkyi hkyô pé má le shit nyi lhê. ⁵ Nhuq bat huì é pé má le, htóng lhúng huì é eq toq gabyông é má htím é huì é má le, mù zui shikut é má le, a myang yhup é myín pé má le, zòmut huì é má le, shit nyi lhê. ⁶ Sân-yúng é má le, sê gyô é hkyô má le, myit hing é eq myit ge é má le, Chyoiyúng Woi-nyí eq chyitdap myit akying má le, ⁷ tengmán é mungdang hko é má le, Garai Gasâng é a-tsam má le, loqyò loqpai má dingmán hkyô nghû é lak-nak pé dông le, shit nyi lhê. ⁸ Hpungwup shingkang byî é hui kô é dông eq a hkunggâ é hui kô é dông nghut kôle, a ge é luhkyang eq ge é luhkyang taí kôle, shit nyi lhê. Ngamoq gi, tengmán kôlháng, mhaú zo bang dông sôn yu akò nghut ri. ⁹ Ngamoq lé sé kôlháng,

a sê é đông kut akô nghut ri; shi lô nyi kôhang, rû dui nyi é bang nghut lê; nhuq bat é hui kôhang, sat pyâm é a hui shi é bang nghut lê. ¹⁰ Yón hkyô byíng nhâng kôhang, hkâ-nhám le gabú nyi lê; myùng kôhang, byù myo myo lé wó sùt nhang nyi lê; haì le a wó kôhang, jung hkangmó lé sing é đông nghut lê.

¹¹ Korinhtuq bang ê, ngamoq gi, nungmoq lé san za taí bê nghut luí, ngamoq é myit nhiklum lé, nungmoq é matú làm shoq hpông to byi bê nghut lê. ¹² Ngamoq gi, ngamoq é chyitdap myit lé, nungmoq chyáng mai láng taù yu nyi é a nghut, nungmoq sheq, ngamoq chyáng mai láng taù yu nyi kô é ru nghut lê. ¹³ Nungmoq le, myit nhiklum lé làm shoq dum taù hpóng keq nghû, ngò gi, ngá zô pé lé đông taí lê.

A Lumjǐng Bang Eq A Nhunghkut Râ Hkyô

¹⁴ A lumjǐng bang eq rahá kandang hkâwaq kó. Hkâsu mù gâ le, dingmán é hkyô eq agè ashop é hkyô gi, haì sêng lhum lê lú? Maubó eq mauchut gi, hkâsu wó zùm yap kó râ lú? ¹⁵ Hkrisduq eq Beliala* gi, hkâsu kut myit wó huí lhum kó râ lú? Lumjǐng sù rayuq eq a lumjǐng sù gi, hkâsu wó pung lhum kó râ lú? ¹⁶ Garai Gasâng é no-kuq yhûm eq hparà lhô pé

gi, hkâsu wó húm râ lú? Hkâsu mù gâ le, nga-nhúng gi, rû dui nyi é Garai Gasâng é no-kuq yhûm nghut lê. Haù gi, "Ngò gi, yhangmoq eq rahá nyi mù, yhangmoq chyáng sô nyi râ nghut luí, Ngò gi, yhangmoq é Garai Gasang dut mù, yhangmoq gi, Ngá é byu pé dut kó râ nghut lê."* ga Garai Gasang taí tô é eq rajung za nghut ri.

¹⁷ "Haù mù luí, yhangmoq chyáng mai htoq lô mù, gotù san za nyi keq. A sansêng é zè lé hkâzáng kó, haù hkûn, Ngò, nungmoq lé lhom hap yù râ nghut lê."*

ga haù Yhumsǐng taí ri.

¹⁸ "Ngò gi, nungmoq é Îwa dut mù, nungmoq gi, Ngá é byizo yuqzô pé dut kó râ nghut lê."*

ga haù wum-o a-tsam dik shoq bò Sù Yhumsǐng taí ri.

7

¹ Chyitdap é luzúm wuì ê, nga-nhúng gi, danggidiq haù pé lé wó tô é bang nghut é yanmai, gungdu eq woi-nyí lé agot a-ù dut nhang é jung hkangmó mai, yhumsǐng gùng yhumsǐng lhoq sân-yúng yù luí, Garai Gasang lé gyuq hkunggâ é myit eq chyoiyúng hkyô má lhoq gumjup yu nyi sháng.

Poluq É Gabú Hkyô

² Nungmoq é i-myt unghkaù má ngamoq lé jowò

* **6:15** Beliala gâ é gi, Tsadán é mying rajà nghut lê. * **6:16** Nhong 26:12; Yer 32:38; Ezk 37:27 * **6:17** Esai 52:11; Ezk 20:34,41 * **6:18** 2 Sam 7:14

byi keq. Ngamoq gi, ó yuq lé le a shut wú, ó yuq lé le a lhoq htên wú, ó yuq lé le a mhaú zô wú é nghut lhê. ³ Ngò gi, nungmoq lé mara byi râ matú haú su taí é a nghut. Ngamoq gi, asak duì kôle, shî kôle, nungmoq eq rahá wó dut shoq, nungmoq gi, ngamoq é i-myt unghkaú má lúng nyi é nghut lhê nghû, hí hkûn ngò taí wú bê nghut lhê. ⁴ Ngò gi, nungmoq lé, hkyak yang myit lum to bê nghut lhê. Ngò gi, nungmoq é yanmai gyai yang gumrong nyi lhê. Ngò gi, myit wum byí é gyai yang huí ri; jamjau hkyô pé myo myo ngamoq hui kôlhang, ngò, gyai yang gabú nyi lhê.

⁵ Hkâsu mù gâ le, ngamoq gi, Makedoni mau má jé é hkûn, ngamoq é gungdu gi, zim za a myang nyi é htoq agó, hkyô hkangmó má ngamoq wúhke jamjau hui zô é nghut lhê. Shinggan má gi, mabyoq htoq, ahkaú má gi, gyuq kyum nyi é nghut lhê. ⁶ Nghut kôlhang, nhik ngê bang lé nhik tîng é Garai Gasang gi, Tituq lé jé lé nhang é đông mai, ngamoq lé nhik tîng byi bê nghut ri. ⁷ Yang jé lé é đông mai za a nghut, yang lé nungmoq nhik tîng byí é hkyô đông mai le nghut lhê. Ngá é gabú hkyô gi, gó nám lhê htoq má je myo sháng gaq ga, yang gi, nungmoq ngo lé myit tuí nyi é hkyô, nungmoq gyai yang shut bûn é hkyô, ngá é matú nungmoq gyai myit chiq byí é

hkyô pé lé, ngamoq lé taí kyo bê nghut ri.

⁸ Ngá é laikâ èq, nungmoq lé yón nhang é nghut kôle, ngò gi, nungngham wó é a nghut. Sâng-hi le, ngò nungngham wó é nghut kôlhang, ngá é laiká gi, nungmoq lé rayoq zo za lhoq yón nhang é lé, ngò sê lhê. ⁹ Nghut kôlhang, ngò gi, ahkuí gabú lhê; haú gi, nungmoq lé yón hui nhang é yanmai a nghut é za, nungmoq é yón hkyô èq, nungmoq lé myit lîng nhang é yanmai ru nghut lhê. Nungmoq gi, Garai Gasang ô nau é đông yón huí é bang dut bekô nghut mù, nungmoq lé, ngamoq èq hai akyú le a lhoq yôm byí é nghut lhê. ¹⁰ Hkâsu mù gâ le, Garai o é đông yón kuq huí é hkyô gi, nungngham wó hkyô a bo é za, hkyi yù hkyô wó shoq, myit lîng nhang é nghut ri. Nghut kôlhang, mingkân é yón kuq hkyô gi, shi é hkyô lhoq htoq é nghut ri. ¹¹ Garai o é đông, nungmoq chyáng akyú lhoq htoq byí é yón kuq hkyô lé wú wú keq! Haú gi, gyai yang myit zuq é hkyô, yhumsing gùng mara a bo é lé tûn shit râ lé myit ngui é hkyô, nhikmo-yo é hkyô, gyuq dan é hkyô, myit ô nau nyi é hkyô, myit chiq byí é hkyô, tengmán hkyô kut râ rì rì nghut é hkyô pé nghut lhê. Nungmoq gi, haú hkyô má mara a bo é lé hkat hkangmó má saksé tûn shit bekô nghut ri. ¹² Haú mù luí, ngò, nungmoq lé kâ kat é nghut kôlhang, kut shut su é

yanmai le a nghut, kut shut é hui zo su é yanmai le a nghut é za, ngamoq lé nungmoq hkâ-í ap nóng byí é hkyô lé, Garai Gasâng hí má nungmoq gùng nungmoq wó myâng rà matú kâ kat é sheq ru nghut lhê. ¹³ Haú pé banshoq dông mai, ngamoq gi, myit wum byí é huí ri.

Ngamoq myit wum byi huí é htoq agó, Tituq hkâ-í yhang gabú é lé myàng mù, ngamoq gi, je riyhang myit gabú é nghut lhê. Haí mù yhang gabú é gà lé, nungmoq banshoq bâng eq yhâng é myit lé lhoq nguóngón byi kô é yanmai nghut ri. ¹⁴ Ngò gi, nungmoq eq sêng é hkyô, yhang lé gumrong kyô é nghut kôle, nungmoq é yanmai hoq a hpû é nghut lhê. Nungmoq lé ngamoq taí é lhunglhang gi, têng é eq rajung za, Tituq hí má, nungmoq é hkyô lé ngamoq gumrong é le têng lhê. ¹⁵ Nungmoq banshoq bang jino gyo kômù, gyuq nán é myit mai yhang lé lhom hap yù kô é lé, yhang myitbùn é hkûn, yhang nungmoq lé chyitdap é myit gi, je riyhang kô dik nyi ri. ¹⁶ Ngò gi, nungmoq lé banshoq wó lum to bê lé sé é yanmai, gabú nyi lhê.

8

Byí É Hkyô

¹ Gumang wuì ê, ahkuì, ngamoq gi, Makedoni mau má é noqkuq hpûng pé lé Garai Gasang byí é jeju eq sêng é hkyô, nungmoq lé sé nhâng nau ri. ² Yhangmoq

gi, wuîhke jamjau hkyô myo myô eq chyam lik é huí é nghut kôlhang, yhangmoq é a ung taí loshoq gabú é hkyô eq yhangmoq é gyai yhang myung é hkyô gi, agùn agó byí nau é myit bò nhang ri.

³ Hkâsu mù gà le, yhangmoq gi, yhangmoq wó dut é myhó byi kô é htoq agó, yhangmoq é a-tsam lai shoq lhang byi kô é hkyô lé, ngò saksé hkâm lhê. Yhangmoq gi, yhangmoq é myit hkaû mai yhang haû su kut kô é nghut ri. ⁴ Yhangmoq gi, haû sân-yúng bang lé wó bo dojaú rà matú, ngamoq lé gyai yhang ahkáng dung kô é nghut ri. ⁵ Yhangmoq gi, ngamoq myit ngam tô é htoq má lhang lai shoq, Garai Gasang ô nau é hkyô lé châng é dông, yhangmoq gùng lé hí haû Yhumsing lé ap byí pyám kômù, hau htâng sheq ngamoq lé ap kô é nghut ri.

⁶ Haû mù luí, Tituq yhang hí kut hi nyi bê nghut é yanmai, ngamoq gi, jeju haû lé nungmoq chyáng le shuí lhoq byíng jup byi rà matú, yhang lé wum byi bê nghut lhê. ⁷ Nungmoq gi, lumjúng myit má, dang nyo é hkyô má le, sumsé hpaqchyí hkyô má le, myit zuq hkyô banshoq eq ngamoq lé nungmoq chyitdap é hkyô má le, jung hkangmó má agùn agó dut bekô eq rajung za, nungmoq gi, byí nau é jeju shí má le agùn agó dut rá lé, bún nyi keq.

⁸ Ngò gi, nungmoq lé hkunmó hkyô é a nghut,

nghut kôlhang, góbâng é myit zuq é hkyô eq whuí wú é dông, nungmoq é chyitdap myit jet é hkyô lé chyam wú naú luí sheq ru nghut lhê. ⁹ Hkâsu mù gâ le, nungmoq gi, nga-nhông é Yhumsing Yesuq Hkrisduq é jeju lé sê akô nghut ri. Yhang gi, Yhông é myùng hkyô dông mai nungmoq wó bang dut kó sháng gaq ga, jung hkgangmó wó sù nghut kôlhang, nungmoq é matú é yanmai, myùng sù dut bê nghut ri.

¹⁰ Shí hkyô eq sêng é má, nungmoq é matú ge dik é hkyô ngò hpaqchyí byi kôlé: A-nhik, nungmoq gi, sâng-hi, byí hî kô é za a nghut, haú su kut nau é myit bo é bang le nghut akô. ¹¹ Nungmoq wó dut é eq rajung za, haú lé lhoq pân é dông nungmoq é gyai yhang kâm kut é myit lé wó lhoq dik ko sháng gaq, ahkuí, muzó haú lhoq pán keq. ¹² Hkâsu mù gâ le, byí nau é myit bo é nghut jáng, chyunghuq haú gi, yhang a wó é má cháng luí a nghut é za, yhang wó é má cháng luí, hap yù gíng é nghut lhê.

¹³ Nungmoq é matú gi, wòlai dut, góbang gi, hkyamsâ nyi rá lé, ngamoq ô nau é a nghut, rawuí za wó dut kó rá lé sheq ô nau é ru nghut lhê. ¹⁴ Nungmoq haí rá tô é lé, yhangmoq agùn agó wó é má é wó dum taú htuqbang byi kó sháng gaq, ahkui lhê é ahkyíng má, yhangmoq haí

râ tô é lé, nungmoq agùn agó wó é má é htuqbang byi keq. Haú jáng sheq, wuí wuí za wó dut kó rá nghut lhê. ¹⁵ Haú gi, "Myo myo tsing yu é sù gi, lúm myo shoq wó é a nghut, shau za tsing yu é sù gi, lúm shau shoq wó é a nghut."* ga kâ tô é eq rajung za nghut ri.

Tituq Lé Korinhtuq Myuq Shut Nhang Kat É Hkyô

¹⁶ Nungmoq é matú ngò myit chiq byí é eq rajung zâ é myit lé, Tituq é i-myit má kat byí é Garai Gasang lé, ngò jeju hkya-ôn lhê. ¹⁷ Hkâsu mù gâ le, Tituq gi, ngamoq dúng tôngbán é lé za lhom hap yu é a nghut, gyai yhang myit toq mù, yhânggùng yhang myit hpyit yú luí, nungmoq chyáng lé lô gù za nghut ri. ¹⁸ Ngamoq gi, haú gabú danglù lé dojaú é má noqkuq hpúng pé banshoq èq hkya-on huí é gumang hpó haú lé le, yhang eq rahá nhang kat lhê. ¹⁹ Hau htoq agó, ngamoq garúm rá myit bo nyi é hkyô lé tân shit mù, haú Yhumsing lé hkungga rá matú ngamoq wú gôn nyi hkyô nghut é, alu lé ngamoq yu chung é hkùn, ngamoq é byinzùm kut rá matú, noqkuq hpúng pé èq hkyin yu é sù le yhang nghut lhê. ²⁰ Ngamoq gi, myit lòm luí byí é chyunghuq shí lé ngamoq wú gôn nyi é hkyô má, ó yuq èq le mara hô rá hkyô a htoq shoq sidiq nyi lhê. ²¹ Hkâsu mù gâ le, jô é hkyô kut rá matú ngamoq

shikut nyi é gi, haû Yhumsing é myoq hí má za a nghut, byu pê é myoq hí má le nghut lhê.

²² Hau htoq agó, ngamoq gi, hkyô myo myo má shirong é myit bo é hkyô le anum num ngamoq chyáng saksé shit é sù, ngamoq é gotû gumang hpó lé le yhangnhik eq rahá nhang kat lhê. Yhang gi, ahkuí lháng, nungmoq lé gyai yhang myit lum tô é yanmai, shirông myit je riyhang bo nyi ri. ²³ Tituq é hkyô ga jáng, yhang gi, ngá é zùm yap luzúm eq ngò eq rahá nungmoq chyáng mù zui sù nghut ri. Nga-nhúng é gumâng nhik é hkyô ga jáng, yhangnhik gi, noqkuq hpûng pê é gunglik eq Hkrisduq é aróng nghut akô. ²⁴ Haû mù luí, haû noqkuq hpûng pé wó myâng kó sháng gaq, nungmoq má ngamoq haí mù gumrong é hkyô eq nungmoq é chyitdap myit é saksé lé, haú bang lé tân shit keq.

9

¹ Ngò gi, haû sân-yúng bang lé htuqbang râ hkyô eq séng luí, nungmoq lé kê kat râ a ra nghut ri. ² Hkâsu mù gâ le, nungmoq gyai garúm nau é myit lé ngò sê lhê, haû mù, ngò gi, Makedoni mau bang lé, haú hkyô eq séng luí gumrong kyo mù, a-nhik mai yhang, Ahkaia mau má nungmoq byi râ rì rì nghut bê hkyô lé, yhangmoq lé taí kyô é nghut lhê. Nungmoq é gyai yhang myit toq é hkyô gi, yhangmoq myo hpyang lé, htuqbang nau é myit nhaú

toq byi bê nghut ri. ³ Nghut kôlháng, shí hkyô má nungmoq eq séng luí ngamoq gumrong é gi, hká đông le dangsôm a dut byuq sháng gaq, ngò taí bê eq rajung za nungmoq rì rì wó hen to râ matú, ngò gi, gumang wuì lé nhang kat é nghut lhê. ⁴ Hkâsu mù gâ le, Makedoni mau bang gi, ngò eq rahá lé mù, nungmoq rì rì a hen tô é lé, lé myang ang kô é nghut jáng, nungmoq za hoq hpu râ a nghut, ngamoq le, nungmoq lé lúm yhang lum pyâm é yanmai, hoq bo hpu râ nghut lhê. ⁵ Haû mù luí, nungmoq danggidiq byí to bê nghut é, chyunghuq lé rago wó lajâng pân to râ matú, gumang wuì lé wum taí tsuq mù, nungmoq lé hí, lé kum nhâng râ gi, ra yhang râ lhê nghû ngò wó myit ri. Haú hkûn sheq, a nau é đông byí é a nghut é za, byí nau é chyunghuq đông hen tô é dut râ nghut lhê.

Agùn Agó Byí É Hkyô

⁶ Shau za sân hkyó sù gi, shau za shû yù râ nghut mù, agùn agó sân hkyó sù gi, agùn agó shû yù râ nghut lhê gâ é dang lé, myitbûn nyi keq. ⁷ Yuq hkangmó gi, a kâm byí é eq byí nhang é đông a nghut é za, yhumsing myit má byí nau é myhó lé myit hpyit yù mù byí é đông dut râ lhê. Hkâsu mù gâ le, Garai Gasang gi, gabú myit èq byi sù lé chyitdap ri. ⁸ Haû mù, ahkyíng hkangmó jung hkangmó má, nungmoq râ é banshoq wó mù, ge é muzó hkangmó lé

nungmoq je myo wó kut kó sháng gaq ga, Garai Gasang gi, jeju lhungháng lé, nungmoq lé wó byí é sù nghut lhê.

⁹ Haú gi,

"Yhang gi, a ha bûn é za myûng bang lé yhâng é chyunghuq tsing gãm byi bê nghut ri; Yhâng é dingmán hkyô gi, ahtum abyuq gîng nyi ri."[☆]

ga kâ to eq rajung za nghut ri. ¹⁰ Kyô hkyó sù lé kyôshi, zoshuq matú muk byí é Sù gi, nungmoq lé kyôshi byi mù, lhoq myô jat byi râ eq, nungmoq é dingmán hkyo é ashi lé myô lò nhâng râ nghut lhê.

¹¹ Nungmoq gi, ayoq abun hkanmó má agùn agó byí é bang wó dut kó râ matú, hkyô hkanmó má sùt wó é bang dut é hui kó râ nghut lhê. Nungmoq agùn agó byí é hkyô lé, ngamoq lai byi mù, Garai Gasang lé jeju hkyá-on é hkyô dut râ nghut lhê.

¹² Nungmoq dojaú é hkyô shí gi, Garai Gasâng é byu pé râ é hkyô lé lajang byí é za a nghut, Garai Gasang lé jeju bûn é dang byíng mui nyi nhang é le nghut lhê. ¹³ Dojaú hkyô hau é yanmai, nungmoq lhumzui hkyô saksé tân shit bekô nghut mù, byu pé gi, Hkrisduq é gabú danglù lé nungmoq yín yû luí jîno gyo kô é yanmai le, yhangmoq eq yuq hkanmó lé, nungmoq é a ha bûn é myit mai shuí gam chûng kô é yanmai le, Garai Gasang lé hkyá-on kó

râ nghut lhê. ¹⁴ Hau htoq agó, Garai Gasang gi, nungmoq lé jeju lai shoq byí tô é yanmai nungmoq é matú yhangmoq kyûdung byí é u má, yhangmoq é myit nhiklhum gi, nungmoq chyáng htoq jé râ nghut lhê. ¹⁵ A ung htoq tai é Garai Gasâng é chyunghuq é yanmai, jeju hkyá-on hkyô gi, Yhâng chyáng ru nghut nyi sháng gaq ô!

10

Poluq, Yhâng É Hpungmû Lé Tai Hung É Hkyô

¹ Nungmoq eq myoqdong hkyûm nghut é hkûn gi, gyuq kyûm myit bo ri ga, wê gâng é hkûn gi, a gyuq a wàm dut ri ga kô é sù, ngò Poluq gi, Hkrisduq é nûm é hkyô eq nú-nhâm é hkyô dông mai, nungmoq lé pyíng kat lhê. ² Shí mingkân é nyi yap a-tsang dông ngamoq asak dui ri ga myit ngam é byù ra-am lé, ngò a gyuq a wam é myit lé shit râ dô tô lhê. Ngò jé lé é hkûn, nungmoq lé haú sù é myit a shit ra sháng gaq, ngò nungmoq lé dũng tóngbán kat lhê. ³ Hkâsu mù gâ le, ngamoq gi, mingkan shí má asak dui nyi kôlhang mingkan byu pé kut é dông majan zân é a nghut. ⁴ Ngamoq majan zân é laknak gi, mingkan shi é laknak a nghut é za, shut shai é dông dang-rháng hkyô nghut é, gíngtîng é gyedap pé lé lhoq htên pyám râ matú Garaí é a-tsam byíng é laknak ru

[☆] 9:9 Hkyá-on 112:9

nghut lhê. ⁵ Ngamoq gi, dang-rhâng rhâng lhûm é hkyô pé eq Garai Gasang lé sê é hkyô lé shut shaî shoq yhumsing gùng yhumsing lhoq myhang mhaû é hkyô hkangmó lé lhoq htên pyám mù, Hkrisduq é jìno gyo râ matú, myit sôn é hkyô hkat hkangmó lé shúm kut yu é nghut lhê. ⁶ Nungmoq é jìno gyo hkyô gi, gumjup é hkûn, jìno a gyô é hkyô hkangmó lé ngamoq dam byi râ rì rì dut râ nghut lhê.

⁷ Nungmoq gi, ahtoq pyâm lé za wú nyi é bang nghut akô. Rayuq yuq gi, Hkrisduq eq sêng é sù hkyak nghut lhê ga myit lum tô é nghut jáng, ngamoq le, yhang eq rajung za, Hkrisduq eq sêng é bang nghut é lé, yhang dum bûn sê nyi sháng gaq. ⁸ Hkâsu mù gâ le, nungmoq lé lâng hkyô râ nó gi, nungmoq lé kô myhâng nhâng râ matú, ngamoq lé haû Yhumsing byi é ahko ahkáng lé gyai gumrong le lhang, ngò gi, hoq hpû é hui râ a nghut. ⁹ Ngò gi, ngá é laiká pé èq nungmoq lé kyuq é su a dut nhâng nau é nghut lhê. ¹⁰ Hkâsu mù gâ le, ra-am gi, "Yhâng é laiká pé gi, gàng bo é eq wum-o bo é nghut ri; nghut kôlhang, yhânggùng gi, byuwup a bo é nghut mù, yhang taî é dang pé gi, haî a nghut." ga taî akô. ¹¹ Ngamoq gi, wê gâng é hkûn, ngamoq é laiká pé má bo é eq rajung za nghut é hkyô eq, rahá nghut nyi é hkûn, ngamoq zui saî râ

nghut é hkyô lé, haû sù é bang sê gyo râ dut lhê.

¹² Ngamoq gi, haû yhumsing gùng yhumsing owaq é bâng é hpúng má bo lom é hkyô nghut nghut, yhangmoq eq whuî é hkyô nghut nghut, a wám kut é nghut lhê. Yhangmoq gi, yhangmoq gùng yhangmoq chin lhûm wú é eq yhangmoq gùng yhangmoq whuî lhûm wú kô é hkûn, hpaqchyî a bo é bang dut bekô nghut ri.

¹³ Nghut kôlhang, ngamoq gi, âng é mai lai shoq gumrông râ a nghut é za, ngamoq lé Garai Gasang masat to byî é, nungmoq chyáng lhang hkyit jé shoq nghut é maukyo hkaû má za gumrông râ nghut lhê. ¹⁴ Ngamoq gi, nungmoq chyáng a jé lé wú é đông mai, gyai yhang gumrong nyi râ a nghut; hkâsu mù gâ le, ngamoq gi, Hkrisduq é gabú danglù chûng mù, nungmoq chyáng lhang lé jé bê nghut lhê. ¹⁵ Dum, ngamoq gi, góbang kut é muzó lé le, âng é mai lai luî gumrong lai é a nghut. Ngamoq myoqbyu é hkyô gi, nungmoq é lumjing myit kô myhang jat nyi jáng sheq, nungmoq chyáng ngamoq zui saî é jowò gyai wó lhoq lâm râ nghut lhê. ¹⁶ Haû gi, nungmoq é mau lhang lai shoq, gabú danglù lé ngamoq wó hko kyo râ matú nghut lhê. Hkâsu mù gâ le, ngamoq gi, góyuq èq zui saî to bê loqzó eq séng luî, gumrông nau é a nghut.

17 Nghut kôlhang, "Gumrong é sũ gi, haũ Yhumsing má gumrông sháng gaq."* ga kâ tô ri. 18 Hkâsu mù gâ le, yhumsing gùng yhumsing owaq é sũ gi, hap yù huí é a nghut é za, haũ Yhumsing èq owaq byí é sũ sheq, hap yù huí é ru nghut lhê.

11

Lagyo Apyoq Pé Eq Poluq

1 Ngò gi, ngá é ratsuí ngok é dang lé, nungmoq jân pyám byi râ lé myoqbyu é nghut lhê; gè gè yhang, nungmoq gi, haũ su kut nyí gù nghut bekô. 2 Hai mù gâ le, ngò gi, Garai Gasang mai nungmoq lé magum é myit èq, nungmoq é matú magúm byí lhê. Ngò gi, nungmoq lé, sân-yúng é zomyi gyíng lé su, Hkrisduq chyáng wó shit sháng gaq nghũ, Hkrisduq nghut é yhumsing hpô chyáng za nungmoq lé byi zo râ nghũ, danggidiq byí to bê nghut lhê. 3 Nghut kôlhang, Ewaq gi, lhangmuì hpaqchyí dâ é èq mhaú zô é huí é su, nungmoq myit é hkyô pé gi, Hkrisduq chyáng nungmoq é lhumzuí é eq sansêng é i-myit ap nóng é hkyô mai shuí nghoq ló byuq é hui râ lé, ngò myit chiq ri. 4 Hkâsu mù gâ le, rayuq yuq gi, nungmoq chyáng lé jé mù, ngamoq hko kyô é Yesuq é hkyô eq shai é dông hko kyô é nghut nghut, nungmoq hap yu to bê Woi-nyí eq a pung é woi-nyí lé nungmoq hap yu é nghut nghut, nungmoq lhom yu to

bê gabú danglù eq a pung é danglù lé lhom yu é nghut nghut, nungmoq gi, haũ lé lui lui za lhom hap yu é dut bekô nghut ri. 5 Nghut kôlhang, ngò gi, "Ahkyak-lagyô pé" ga bâng é htoq má ratsuí lhang gyamgyi gyó sũ a nghut nghũ myit ngam é nghut lhê. 6 Ngò gi, dang taí hpaqchyí kung sũ rayuq a nghut kôlhang, sumsé hpaqchyí bò sũ nghut lhê. Ngamoq gi, hkyô hkangmó má, nungmoq lé haũ hkyô hkyâng shoq sé nhâng bê nghut lhê.

7 Ngò, nungmoq lé, Garai Gasâng é gabú danglù lé ah-pau a yu é za hko kyô é dông, nungmoq lé waq toq râ matú, ngá gùng ngò lhoq nyhum é gi, ngá é mara dut byuq bê lú? 8 Ngò, nungmoq lé dojaú râ matú, gotú noqkuq hpung pé mai htuqbang é lé hap yu é gi, haũ bâng chyáng mai ngò zik lú yu é dông dut bê nghut lhê. 9 Ngò gi, nungmoq eq rahá nyi mù, rajung jung râ é hkùn, ó yuq lé le wòlai a dut nhang é nghut lhê; hkâsu mù gâ le, Makedoni mau mai lé jé é gumang wuì gi, ngò haĩ râ é lé htuqbang byi kô é yanmai nghut lhê. Hká dông nghut kôlhang, ngò gi, ngá gùng lé, nungmoq é matú wòlai a dut nhâng shoq kut bê nghut mù, xox lui le haũ dông kut nyí râ nghut lhê. 10 Haũ Hkrisduq é tengmán hkyô gi, ngò má hkyak yhang bo é nghut lhê mù, Ahkaia mau mâ é bang ó yuq lhang, ngò haũ su gumrong é hkyô lé wó hkùm

zìng rã a nghut. ¹¹ Haì mù lú? Ngò, nungmoq lé a chyitdap é yanmai nghut lê lú? Ngò, nungmoq lé chyitdap é hkyô lé, Garai Gasang sê lê. ¹² Ngò gi, yhangmoq zui saí é lé gumrong é hkyô pé má ngamoq eq rawuí za sôn byi rã ahko ahkáng ô nau é bang lé ahkáng a byi rã matú, ngò kut nyi é su xoq luí kut shi rã nghut lê.

¹³ Hkãsu mù gã le, haù sũ é bang gi, lagyo apyoq pé, mhaù zô é mù zui bang, Hkrisduq é lagyô pé đông kut mhaù é bang nghut akô. ¹⁴ Haù gi, maù ra hkyô a joq, hkãsu mù gã le, Tsadán lhang gi, maubó é maumang lagyo rayuq đông kut mhaù é sũ nghut lê. ¹⁵ Haù mù, Tsadán é dui-nhâng zoshâng wui gi, dingmán hkyô é dui-nhâng zoshâng wui đông kut mhaù é nghut jáng, maù dân rã hkyô a joq é nghut lê. Yhangmoq é ló htâng má gi, yhangmoq kut é eq rajung za hui zo kó rã nghut lê.

Yhâng É Wuĩhke Jamjau Hkyô Eq Séng Luí, Poluq Gumrong É Hkyô

¹⁶ Ngò puq tái kôlé, ó yuq le, ngo lé byù gò đông a sôn yù kó sháng gaq. Nghut kôlhang, nungmoq sôn yu é nghut jáng, ngò ratsuí wó gumrông sháng gaq, byù gò lé nungmoq hap yu é su, ngo lé hap yù kó laq. ¹⁷ Ngò, haù su gumrong é hkyô gi, haù Yhumsing o é đông ngò tái nyi é a nghut, byù gò rayuq đông tái nyi é

ru nghut lê. ¹⁸ Byù myo myo gi, mingkân é hkyô đông gumrong nyi bum lê nghut mù, ngò le gumrông rã nghut lê. ¹⁹ Nungmoq gi, hpaqchyí lúm bo kô é nghut mù, byù go pé lé gabú myit eq jân nyi akô nhung! ²⁰ Gè gè yhang, nungmoq gi, nungmoq lé jùn kut é sũ lé le, nungmoq lé rhoi zô é sũ lé le, nungmoq chyáng akyô hô zô yu é sũ lé le, yhang gung yhang owaq é sũ lé le, nungmoq lé bo-pyuq pyuq é sũ lé le, jân nyi akô nghut ri. ²¹ Ngamoq gi, nungmoq lé haù hkyô kut rã má wum gyai nyhôm lê nghu yin yu rã lé, ngò, hoq ri!

Rayuq yuq, haì lé wám gumrong é nghut jáng, ngò le, haù lé wám gumrong lê nghu, byù gò rayuq đông ngò tái nyi é nghut lê. ²² Yhangmoq gi, Hebre byu pé nghut akô lú? Ngò le nghut lê. Yhangmoq gi, Israelaq byu pé nghut akô lú? Ngò le nghut lê. Yhangmoq gi, Abraham é awut ashin pé nghut akô lú? Ngò le nghut lê. ²³ Yhangmoq gi, Hkrisduq é dui-nhâng zoshâng wui nghut akô lú? (Ngò gi, myit a gying é sũ đông haù su tái é nghut lê.) Ngò gi, je nghut lê. Ngò gi, mù zui je shikut bê, htóng anum num je lúng wú bê, je riyhang bat é huí wú bê, shí rã í é adàm dàm huí wú bê nghut lê. ²⁴ Ngò gi, Yudaq byu pé nuichum eq bat é myi xê dàm bying rã radàm ra ra dut é, ngo lhang hui zô wú é

nghut lhê. ²⁵ Ngò gi, dumbáng eq nhuq huí é sum dàm, shî sháng gaq ga luqgok eq dú huí é radàm, wuì-sanghpo byoq huí é sum dàm, wuimau má myû byôm é ra-nyí ra-myìn hui zô wú bê nghut lhê. ²⁶ Ngò gi, xoq xoq hkyowuì htoq e ló é hkún, wuì gû é gyuq chiq jung, damyaq huí é gyuq chiq jung, ngá é amyû wuì chyáng má é gyuq chiq jung, tungbau pê chyáng má é gyuq chiq jung, myuq hkaû pé má é gyuq chiq jung, yoso pé má é gyuq chiq jung, wuimau má é gyuq chiq jung eq gumang apyoq pê chyáng má é gyuq chiq jung pé hui zô wú bê nghut lhê. ²⁷ Ngò gi, mù lé zuí nguí zuí hkyik mù, anum num a myang yhup shoq dut wú bê nghut lhê. Ngò gi, zòmut wuì shit huí é eq zoshuq a wó é anum num huí lai lo wú bê nghut lhê. Ngò gi, gyoq hpû é eq gùngchîn dut é huí wú bê nghut lhê. ²⁸ Háu pé lhunglhang htoq má, noqkuq hpûng pé banshoq é matú ngò myit chiq byí é hkyô gi, nyí wuì ngò má wòlai dut nyí ri. ²⁹ Rayuq yuq wum nyhóm le, ngò le wum a nyhóm râ lúhú? Rayuq yuq mara shuí kut shut é hui le, ngò myit a nyé râ lúhú?

³⁰ Ngò gumrông râ dut é nghut le gi, ngò wum nyhóm é hkyô lé tân shit é pé lé gumrông râ nghut lhê. ³¹ Ngò a mhaû nyi é hkyô lé pyat dedu hkya-on huí é sù, haû Yhumsing

Yesuq é Îwa eq Garai Gasang sê lhê. ³² Damaskuq myuq má, Hkohlâm Areta é a-ô mâ é mauzau gi, ngo lé chyup râ matú, myuq lé zúng nhang é nghut lhê. ³³ Nghut kôlhang, ngò gi, manghkoq má lúng mù, myuq xêwâm má é hkohot dong mai lhoq hkyô kat é hui luí, yhang é loq mai wó lut é nghut lhê.

12

Poluq É Myoqwup Shing-rán Pé

¹ Ngò gi, rû gumrông nyi râ za nghut lhê. Akyû wó râ a nghut kôlhang, haû Yhumsing chyáng mai lo é myoqwup shing-rán pé eq hpông shit é shing-rán pé lé gumrông râ nghut lhê. ² Ngò gi, lai lò bê raxe myi zân hkún, mauhkung sum tsáng nghu é má shuí toq yu huí é, Hkrisduq má é byù rayuq* é hkyô lé sê lhê. Yhang gi, gungdu eq nghut é luq, a nghut é luq, ngò a sé, nghut kôlhang, Garai Gasang gi, sê lhê. ³ Yhang hparadisú má shuí toq yû huí é gi, ngò sê lhê. Yhang gi, gungdu eq nghut lhê luq, a nghut é luq, ngò a sé, nghut kôlhang, Garai Gasang gi, sê lhê. ⁴ Yhang gi, byu pé tai kyô htoq râ ahkáng a wó é hkyô pé nghut é, a wó tai sân kyô é hkyô pé lé wó gyô ri. ⁵ Ngò gi, háu yuq sù é byu é hkyô eq séng luí gumrông râ nghut lhê; nghut kôlhang, ngò gi, ngá é wum nyhóm hkyô eq

* **12:2** Hkrisduq má é byù rayuq gá é gi, Poluq yhanggùng yhang lé tai nyi é nghut lhê.

séng luí, gumrong é mai lai luí, ngá gúng ngò gumrông rá a nghut. ⁶ Ngò gi, gumrông hkyô lé hkyin yù rá dut é nghut jáng lhang, byù gò dut rá a nghut, haí mù gâ le, ngò gi, tengmán hkyô tái nyi rá nghut lhê. Nghut kôlhang, ó yuq le, ngò kut é eq ngò tái é mai myit lum to kô é htoq má, ngo lé, je a myit lo ko sháng gaq nghû, ngò a gumrông kut pyám nyi lhê.

⁷ Haú laklaí dik é đông ngo lé hpông shit é shing-rán mó pé é yanmai, ngò a nghutbùn byuq sháng gaq ga, ngo lé gunjang rá matú, Tsadán é lagyo nghut é zu lé, ngá é gungsho má kat byi to bê nghut ri. ⁸ Haú lé ngá chyáng mai yu pyám byi rá matú, ngò, Yhumsing lé sum dâm dúng tôngbán wú bê nghut lhê. ⁹ Nghut kôlhang, Yhang gi, "Ngá é jeju gi, náng é matú luqđun é nghut lhê; hkâsu mù gâ le, Ngá é a-tsam gi, wum nyhôm é hkyô má lhoq gumjup é hui ri." ga luí, ngo lé tái ri. Haú mù luí, Hkrisduq é a-tsam gi, ngò má wó joq nyi sháng gaq nghû, ngò gi, ngá é wum nyhôm é hkyô pé eq séng luí, gabú myit mai je riyhang gumrông rá nghut lhê. ¹⁰ Haú nghut mù luí, ngò gi, Hkrisduq é yanmai, wum nyhôm é hkyô pé má le, rhoi huí é hkyô pé má le, wuihke jamjau huí é hkyô pé má le, zing-ri huí é hkyô pé má le, awui ahke dut é hkyô pé má le, gabú nhik dik nyi lhê. Hkâsu mù gâ le, ngò wum

nyhôm é hkûn sheq, ngò wúm bo é nghut lhê.

Poluq Chiq Byi É Hkyô

¹¹ Ngò gi, ngá gúng ngò byù gò lhoq kut yú bê nghut ri, nghut kôlhang, haú gi, nungmoq kut nhang é nghut lhê. Ngò gi, nungmoq eq owaq é hui ang sù nghut lhê; hkâsu mù gâ le, ngò gi, haí a nghut kôlhang, "Ahkyak lagyo pé" ga bâng é htoq má ratsuí lhang gyamgyi gyó sù a nghut. ¹² Lagyo rayuq é masat kumlhá nghut é, kumlhá pé, mauhpo muzó pé eq laklaí kumlhá pé lé, ngò gi, gyai yhang hkam jan mù nungmoq chyáng kut bê nghut lhê. ¹³ Ngò gi, nungmoq é matú, hkâ-nhám le wòlai a dut é nhing, nungmoq gi, hkâsu mù, gotú noqkuq hpúng pé htoq má gyamgyi gyó nyi akô lú? Ngò, haú hkyô má shut é nghut jáng, mara hkyut pyám byi kó laq!

¹⁴ Ahkuí, ngò gi, nungmoq lé, sum lhing nghû rá dâm, lé kum rá rì rì nghut bê mù, nungmoq é matú wòlai gi, a dut rá nghut lhê. Haí mù gâ le, ngò gi, nungmoq é sutzè lé ô nau é a nghut, nungmoq lé sheq ru nghut lhê. Hká đông nghut kôle, zo wui gi, mó wui é matú sutzè hkong to byi rá dut é a nghut, mó wui sheq, zô wui é matú hkong to byi rá dut é nghut lhê. ¹⁵ Haú mù luí, ngò gi, gyai yhang gabú é myit mai, ngò wó é jung hkangmó lé nungmoq é matú chung

jaì rã nghut mù, ngá gũng lé lhang chũng jaì rã nghut lhê. Ngò, nungmoq lé myô chyitdap é yanmai, nungmoq gi, ngo lé shaú chyitdap kó rã lúhú? ¹⁶ Ngò gi, nungmoq chyáng wòlai a dut é hkyô têng lhê. Nghut kôlhang, ngò gi, hpaqchyî haq da sũ dut mù, mhaú lhik é dõng nungmoq lé chyup yũ sũ dut byuq bê ga nungmoq ra-am myit akô myhi-nhung! ¹⁷ Ngò gi, nungmoq chyáng nhang kat byî é byù dõng, nungmoq chyáng amyat kut zô yù bê nghut lhê lúhú? ¹⁸ Ngò gi, Tituq lé nungmoq chyáng lé rã matú wum taì tsuq mù, ngamoq é gumang lé, yhang eq rahá nhang kat bê nghut lhê. Tituq gi, nungmoq chyáng amyat kut zô é nghut lhê lúhú? Nganhik gi, rajung zã é myit dõng chyat kut mù, rajung zã é hkyô lé chyat chãng é su nhik nghut lhê, a nghut kó lúhú?

¹⁹ Ngamoq gi, nungmoq hí má ngamoq gũng ngamoq taì hung yu nyi ri nghũ, ahkuî jé shoq myit nyi akô lúhú? Ngamoq gi, Hkrisduq mã é byu pé dõng, Garai Gasãng hí má taì nyi é nghut lhê. Chyitdap é gumang wuì ê, ngamoq kut é jung hkgangmó gi, nungmoq é akyu matú chyat nghut lhê. ²⁰ Hkãsu mù gã le, ngo lé jé é hkũn, ngò, nungmoq lé dut nhãng nau é su, nungmoq a wó dut kó rã eq, nungmoq, ngo lé dut nhãng nau é su, ngò a wó dut rã lé, ngò myit gyuq ri. Ngò gi, mabyoq jishũm

htoq é, manon é, nhik-ũn buq é, byù hpũng gam é, gansang é, lumu é, gyai nghutbũn é eq atau ahũ dut é hkyô pé joq rã lé gyuq ri. ²¹ Ngò dum lé jé é hkũn, ngá é Garai Gasang gi, nungmoq é hí má ngo lé myit nyhũm nhãng mù, yhangmoq ô nau é myit chãng é má shut é dõng nyi zô lhum nau é i-myt, gungsho zũm yap é yubak mara eq a sãn-yũng é hkyô kut shut é mai myit a lhang bang myo myô é yanmai, yón kuq é hui zo rã lé, ngò myit chiq ri.

13

Ló Htáng Má Sidiq Byî É Dang Pé

¹ Ahkuî, ngò, nungmoq chyáng lé kum rã gi, sum lhang nghũ rã dãm nghut lhê. Haũ gi, "Mara hun é hkyô hkgangmó lé, í yuq sum yuq saksé hkãm é eq lhoq teng ra rã nghut lhê."* ga kã tô é eq rajung za nghut lhê. ² Ngò gi, í lhang nghũ rã dãm nungmoq eq rahá nyi é hkũn, nungmoq lé sidiq byi gũ bê nghut lhê. Ahkuî le, nungmoq eq wê gãng tô é u lé, dum taì kôlé, ngò dum jé lé é hkũn, noq mai mara shut tô é bang lé nghut nghut, góbang ó yuq lé nghut nghut, hkyamsa a byi lo rã nghut lhê. ³ Haũ gi, ngò dõng mai Hkrisduq dang taì nyi é hkyô saksé shit rã lé, nungmoq dũng nyi kômù nghut lhê. Yhang gi, nungmoq é hkyô lé hkãsu kut shuũ-ũ é hkyô má wum nyhôm é a nghut, nungmoq

chyáng a-tsam mó shit sù sheq ru nghut ri. ⁴ Hkâsu mù gâ le, Yhang gi, wum nyhôm é má jén sat é hui bê nghut kôlhang, Garai Gasâng é a-tsâm eq dui nyi é gi, hkyak têng lhê. Haù eq rajung za, ngamoq gi, Yhang su wum nyhóm kôlhang, nungmoq lé dojaú râ matú, Garai Gasâng é a-tsâm eq, Yhang eq rahá dui nyi râ nghut lhê.

⁵ Nungmoq gi, lumjínq hkyô má nghut nyi lhê luq, yhumsing gùng yhumsing myí wú keq. Yhumsing gùng yhumsing chyam wú keq. Nungmoq gi, chyam é má sùm byuq é za a nghut jáng, nungmoq chyáng Hkrisduq Yesuq lúng nyí bê hkyô lé sé kó râ nghut lhê. ⁶ Ngamoq gi, chyam é má a sùm é hkyô lé, nungmoq wó sé kó râ nghut lhê nghû, ngò hkyak lum tô lhê. ⁷ Ahkuí, ngamoq gi, nungmoq shut é hkyô haí a kut kó râ matú, Garai Gasâng chyáng kyûdung byi lhê. Haù gi, ngamoq chyam hui luí wó lut é hkyô lé byu pé myàng kó râ matú a nghut é za, ngamoq sùm é su dut kôlhang, nungmoq ge é hkyô kut kó râ lé myàng râ matú nghut lhê. ⁸ Hkâsu mù gâ le, ngamoq gi, haù tengmán hkyô eq shaí é dông haí le a ge kut é za, tengmán hkyo é matú za kut râ dut é nghut lhê. ⁹ Ngamoq wum nyhóm kôlhang, nungmoq wúm bo é hkûn, ngamoq gabú é nghut lhê; ngamoq kyûdung é gi, nungmoq gumjup râ matú

nghut lhê. ¹⁰ Ngò gi, wê gâng tô é hkûn, haù hkyô pé lé haí mù kê é gâ le, ngò jé lé é hkûn, ahkáng ayá lé ngò chung é má htân htân a kut râ matú nghut lhê. Ahkáng ayá haù gi, nungmoq lé lhoq htên pyám râ matú a nghut, nungmoq lé kô myhang lo nhâng râ matú, haù Yhumsing ngo lé byí é sheq ru nghut lhê.

Ló Htâng É Shi-kyám Dang

¹¹ Ló htáng má ngò taí nau é gi, gumang wuì ê, ngu-ingón yuqyo nyi keq. Gumjup hkyô shut sô nyi keq, ngò dúng tôngbán é dang lé gyo keq, myit rahkat za dut nyi keq, nguingón shoq asak dui nyi keq. Haù hkûn, chyitdap hkyô eq nguingón hkyo é Garai Gasang gi, nungmoq eq rahá nyi nyi râ nghut lhê.

¹² Chyoiyúng é bopuq puq é eq, rayuq eq rayuq shi-kyâm lhum keq. ¹³ Sân-yúng bang banshoq gi, nungmoq lé shi-kyâm kat akô.

¹⁴ Haù Yhumsing Yesuq Hkrisduq é jeju, Garai Gasâng é chyitdap myit eq Chyoiyúng Woi-nyí é zùm yap hkyô gi, nungmoq banshoq bâng chyáng ru joq nyí sháng gaq ô.

GALATIQ

Mau Bâng Chyáng Hun Kat é Laiká (Galatians)

¹ Byu pê chyáng mai le a nghut, ó yuq èq nhang é le a nghut e za, haù Yesuq Hkrisduq lé shí bê mai dum lhoq dui toq yu é sù Íwa Garai Gasang eq Yesuq Hkrisduq chyáng mai nhang kat é lagyo rayuq nghut sù, ngò Poluq gi, ² ngò eq rahá nyi é gumang wui banshoq bang le mù, Galatiq mau mâ é no-
qkuq hpûng pê chyáng dang kyô kat lhê.

³ Nga-nhûng é Íwa Garai Gasang eq Yhumsing Yesuq Hkrisduq chyáng mâ é, jeju eq nguingón hkyô gi, nungmoq chyáng ru joq nyí sháng gaq ô. ⁴ Haù Hkrisduq gi, nga-nhûng é Íwa Garai Gasang ô nau é eq rajung za, agè ashop é ipyat shí mai, nga-nhûng lé xe yù râ ga, nga-nhûng é yubak marâ é matú yhanggùng lé Yhang byí pyám bê nghut ri. ⁵ Haù hpungwup shing kang gi, Garai Gasang chyáng pyat dedu ahtum abyuq ru joq nyí sháng gaq ô. Amen.

Gotú Gabú Danglù A Joq É Hkyô

⁶ Ngò gi, haù Hkrisduq é jeju mai nungmoq lé ji yù Sù lé, nungmoq haù-í han kâng pyám to kôluí, shaí é gabú danglù shut lhing ló nyí kô

é hkyô lé, gyai yhang maù nyi ri. ⁷ Danglù haù gi, gabú danglù ratsuí lhang a nghut. Byù ra-am mai nungmoq lé lhoq shuk byi luí, haù Hkrisduq é gabú danglù lé, shikut luí lhoq shai nhang pyám nyi kô é hkyô za nghut lhê. ⁸ Nghut kôlhang, nungmoq lé ngamoq hkô kyo bê gabú danglù mai lai luí, ngamoq nghut nghut, mauhkung htoq mâ é maumang lagyo rayuq nghut nghut, shaí é gabú danglù, nungmoq lé hko kyô é nghut jáng, haù yuq gi, ahtum abyuq dam byí é hui zo sháng gaq ô! ⁹ Ngamoq taí wú bê eq rajung za, ahkuí le, ngò dum taí kôlé: rayuq yuq mai, nungmoq hap yu to bê é gabú danglù mai lai luí, gotú hko nyi e nghut jáng, haù yuq gi, ahtum abyuq dam byí é hui zo sháng gaq ô!

¹⁰ Haù su nghu taí é gi, ahkuí, ngò, byù é hí má myoqdong wó râ matú shikut nyi é nghut lhê lú? Haù a nghut jáng, Garai Gasang é hí má myoqdong wó râ matú shikut nyi é nghut lhê lú? Byù lé gabú nhâng râ matú, ngò shikut nyi é nghut lhê lú? Ngò gi, byu pé lé za ru gabú nhâng nau nyi é nghut le gi, Hkrisduq é dui-nhâng zoshâng dut râ a nghut.

Poluq Lé, Garai Gasang Ji Yu É Hkyô

¹¹ Gumang wui ê, ngò hko kyô é gabú danglù haù gi, byu èq kut htoq é hkyô a nghut é lé, ngò, nungmoq lé sé nhâng nau ri. ¹² Ngò gi, haù lé,

byu chyáng mai wó yu é le a nghut, góyuq èq mhoq byi é le a nghut e za, Yesuq Hkrisduq èq shing-rán byi é đông wó hap yu é ru nghut lhê.

¹³ Ngò, Yudaq noqkuq htông má nghut nyi ashî hkûn, Garai Gasâng é noqkuq hpúng lé ladu lai shoq hkâsu kut zing-ri luí, haû lé lhoq htên shikut wún é, ngá é hí hpyang lhê é asak duì hkyô lé, nungmoq wó gyô wú bekô râ nghut lhê. ¹⁴ Ngò gi, ngò eq ra-kyam zâ é Yudaq byu pé myo myô é htoq má, Yudaq noqkuq htông lé je cháng sù nghut é htoq agó, ngá é íchyí îwa pé é htôngli lé ladu lai shoq myit zìng zuq sù nghut lhê. ¹⁵ Nghut kôlhang, ngá nû é unghkaû mai yhang hkyin to luí, Yhang é jeju yanmai ngo lé ji yu é Garai Gasang gi, ¹⁶ haû Yhang Zô é hkyô gabú danglù lé, ngò mai tûngbaù pé chyáng hko kyo sháng gaq ga, Yhang Zo lé ngá chyáng htoq shit nhâng râ matú myit hpyit yu é hkûn, ngò gi, ó yuq eq le a hpyê yù, ¹⁷ Yerusalem wà mó má doq ló luí, ngá hí má lagyo kut é bang lé le a ló huí e za, radá dâm Arabiq mau shut è luí, Damaskuq myuq má dum taù ló bê nghut lhê.

¹⁸ Sum zân lai é htâng má, ngò gi, Yerusalem wà mó má doq ló mù, Petruq* lé ló hui luí, yhang eq raxe ngo nyí, ló nyi nyi é nghut lhê. ¹⁹ Haû má, Yhumsing é yhanggu Yakuq mai lai luí, lagyo góbang lé ngò a myàng

nghut ri. ²⁰ Nungmoq lé ngò ká byi kat é má, mhaû é hkyô a bò nghû luí, Garai Gasâng hí má, hkyak, ngò tai lhê. ²¹ Hau htâng má, ngò gi, Suriq mau eq Kiliki mau má ê jé é nghut lhê. ²² Haû hkûn, haû Hkrisduq má nghut é, Yuda mau má é noqkuq hpúng byu wui gi, ngo lé myoqno a shú kó nghut ri. ²³ Yhangmoq gi, "Hí hkûn, nga-nhúng lé zing-ri sù gi, yhang mai lhoq hten râ matú radâm shikut wú é lumjìng hkyô haû lé, ahkuí hko nyi ri." gâ é hkyanglù lé wó gyô wú kôluí za, ²⁴ ngá é yanmai, Garai Gasang lé hkya-ôn bum akô nghut ri.

2

Poluq Lé Lagyô Pé Lhom Hap Yu É Hkyô

¹ Raxe myi zân lai é htâng má, ngò gi, Barnaba eq rahá Yerusalem wà mó má dum doq ló é hkûn, Tituq lé le shuí chung é nghut lhê. ² Garai Gasang byi é shing-rán eq rajung za doq ló luí, ngò kut wú bê muzó eq ahkuí kut é muzó pé akôm a dut pyám sháng gaq nghû, tûngbaù pé chyáng ngò hko kyô nyi é gabú danglù lé, haû suwún dut bâng é hí má za shap kyô é nghut lhê. ³ Nghut kôlhang, ngò eq rahá nghut é Tituq gi, Grik byù nghut kôle, yhang lé ahpyo-kuq a hpyit nhâng kó nghut ri. ⁴ Haû hkaû wang lo é mhaû é gumang wui gi, Hkrisduq Yesuq má ngamoq wó é luthkyô má

* 1:18 Petruq lé Kehpa le gâ lhê.

jowú luí, nga-nhúng lé jùn dut nhâng rã dã kô é yanmai, haú hkyô gabyông htoq lo é nghut ri.* ⁵ Nghut kôlhang, haú gabú danglu é tengmán hkyô gi, nungmoq chyáng joq gîng nyì sháng gaq nghû, razup za lháng, yhangmoq é dang lé ngamoq gyo byí é a nghut.

⁶ Ahkyak é byù su dut é bang gi, yhangmoq hái jung kut kôlhang, ngò eq a séng nghut ri; Garai Gasang gi, du lé wú mù jéyáng é sũ a nghut; byù haú bang gi, ngá é mung-dang má hái le a jat kat e za, ⁷ Petruq gi, Yudaq byu pé† lé, haú gabú danglù hko kyo rã mù má lum tô é hui bê eq rajung za, ngò gi, tûngbaù pé‡ lé, haú gabú danglù hko kyo rã mù má lum tô é hui bê hkyô lé za, yhangmoq myang akô nghut ri. ⁸ Hkâsu mù gâ le, Yudaq byu pê é matú Petruq lé lagyo ayá dâng byí é sũ Garai Gasang gi, tûngbaù pê matú ngo lé le lagyo ayá dâng byi bê nghut lhê. ⁹ Haú hkungmó-zîng su ahkyak é, Yakuq, Petruq eq Yohan pé gi, ngo lé byi tô é jeju lé myang sé kôjáng, ngò eq Barnaba lé, zùm yap hkyô gâ é loqyo loq eq shi-kyâm yù kôluí, yhangmoq gi, Yudaq byu pê shut, ngá-nhik lé gi, tûngbaù pê shut è rã lhê ga, myit hui bekô nghut ri. ¹⁰ Yhangmoq gi, ngá-nhik mai myùng bang lé ru bûn nyì rã matú za pying kat akô; haú gi, ngò gyai

yhang kut nau nyi é hkyô nghut lhê.

Petruq Lé Poluq Htuq Htîng É Hkyô

¹¹ Antioku wà mó má Petruq jé lé é hkûn, yhang lé mara hûn rã hkyô joq é yanmai, ngò gi, byu hí má yhang, yhang lé lhom htuq htîng é nghut lhê. ¹² Hkâsu mù gâ le, Yakuq chyáng mai lé é bang a jé shí é u lé, yhang gi, tûngbaù pé eq rahá chôm zo chôm shuq lhaq kut ri. Nghut kôlhang, haú bang jé é hkûn, yhang gi, ahpyo-kuq hpyit rã lhê gâ é hpúng má lom é bang lé gyuq é yanmai, tûngbaù pê chyáng mai htoq gang luí, yhang baù nyi tô ri. ¹³ Yhang, gegùn labyoq kut é hkyô má, gotû Yudaq byu pé le bo châng kut akô nghut mù luí, Barnaba lháng yhangmoq kut é gegùn labyoq hkyô má bo châng ngoq ló bê nghut ri. ¹⁴ Haú gabú danglu é tengmán hkyô eq rajung za, yhangmoq a cháng kô é lé myàng jáng, ngò gi, yhangmoq banshoq bâng é hí má, Petruq lé, "Nâng gi, Yudaq byù nghut to mù luí, Yudaq byù rayuq dông a nyi e za, tûngbaù rayuq dông nyi luí nhîng, tûngbaù pé lé Yudaq byu pê é htûngli hkâsu kut wó cháng nhâng rã lhú?"

¹⁵ Ngamoq gi, yubak dap bang gâ é tûngbaù pé a nghut e za, hkû é buinyì mai yhang, Yudaq byù nghut gû bê nghut

* 2:4 Yudaq byu pé ra-am gi, hpúng asik wang é bang lé Yudaq htûng tarã cháng nhâng nau akô nghut ri. † 2:7 Grik má ahpyo-kuq hpyit hkam é bang ga bo tô ri. ‡ 2:7 Grik má ahpyo-kuq hpyit a hkam é bang ga bo tô ri.

lhê. ¹⁶ Byù gi, jep é tarâ lé cháng luí mara hkyut san byi huí é a nghut e za, Yesuq Hkrisduq lé lumjǐng é yanmai sheq mara hkyut san byi huí é hkyô lé, ngamoq sê lhê. Haú mù luí, ngamoq gi, jep é tarâ lé cháng luí a nghut e za, Yesuq Hkrisduq lé lumjǐng é yanmai, mara hkyut sân pyám byí é hui sháng gaq nghû, Yesuq Hkrisduq lé lumjǐng bê nghut lhê; hkâsu mù gâ le, ó yuq le, jep é tarâ lé châng é yanmai, mara hkyut san byí é hui râ a nghut.

¹⁷ Ngamoq gi, Hkrisduq má ngamoq é mara hkyut san byí é hui râ hkyô ho nyi é hkûn, yubak dap é bang ngamoq nghut é lé myang é nghut jáng, mara lé gi, Hkrisduq mai kut nhang é nghut lhê lhú? Ratsuí le a nghut. ¹⁸ Ngò gi, ngò hpyoq pyám bê hkyô lé dum saí kut é nghut jáng, tarâ lu lai é byù ngò nghut é lé tân shit ri. ¹⁹ Ngò gi, jep é tarâ eq sêng é má, jep é tarâ é yanmai shí jáng sheq, Garai Gasâng é matú wó dui nyi râ nghut lhê. ²⁰ Ngò gi, Hkrisduq eq rahá jén sat é hui bê nghut mù luí, ngá gûng ngò dui nyi é a nghut lo, Hkrisduq sheq ngò má dui nyi é ru nghut lhê. Ahkuí, ngò gungsho má asak dui nyi é gi, ngo lé chyitdap luí, ngá é matú yhânggùng lé Yhang byí pyâm é, haú Garai Gasâng é Yhangzo lé lumjǐng é yanmai ru nghut lhê. ²¹ Ngò gi, Garai Gasâng é jeju lé tô pyâm é a nghut, hkâsu mù gâ

le, dingmán é hkyô lé, jep é tarâ dông wó yu é ru nghut le gi, Hkrisduq shí hkâm é gi, akôm dut byuq râ nghut lhê." nghû taí é nghut lhê.

3

Lumjǐng Myit Lhú? Jep É Tarâ Lhú?

¹ Galatiq mau mâ é byùbâm pé ê! Yesuq Hkrisduq gi, tapzǐng má jén sat hui bê hkyô lé, nungmoq é myoq má bò nhang to bê le nhing, ó yuq èq wá nungmoq lé lãng nghoq yû bekô lhú? ² Nungmoq gi, haú Woi-nyí lé, jep é tarâ cháng luí wó yû kô é nghut lhê lhú? A nghut jáng, nungmoq wó gyô yu é gabú danglù lé lumjǐng luí wó yû kô é nghut lhê lhú? Haú rahkat lé za, ngò sê yû nau ri. ³ Nungmoq gi, haú-í yhang bâm akô lhú? Haú Woi-nyí lé lumhkaú mù kut hî kôluí nhing, ahkuí, gungsho wum-o lé lumhkaú mù, yhumsing myit tô é hkyô lé lhoq pán râ matú shikut nyi akô lhú? ⁴ Nungmoq, myo myo hpuzô pyâm é gi, akôm nghut akô lhú? Gè gè yhang, haú gi, akôm nghut byuq bekô lhú? ⁵ Garai Gasang, nungmoq lé Yhâng é Woi-nyí byí é htoq agó, nungmoq chyáng laklai kumlhá kut é gi, jep é tarâ lé nungmoq châng é yanmai nghut akô lhú? A nghut jáng, nungmoq wó gyô é gabú danglù lé, nungmoq lumjǐng é yanmai nghut akô lhú?

⁶ "Abraham gi, Garai Gasang lé lumjǐng luí, yhang

lé dingmán sủ ga sủn yu é hủi bẻ nghut ri."* ga, Abraham eq séng lủi tủi tủi é lé myit wủ keq. ⁷ Hủi mù lủi, lumjủng myit bo é bang gi, Abraham é yhangzỏ pẻ* yhang dut bẻ nghut é hkyỏ lé sé keq. ⁸ Lumjủng myit é yanmai, tủngbủi pẻ lé Garai Gasang mara hkyut san byi rủ nghut lẻ ga, Chyủmdang mai hí byu-myang to bẻ nghut mù lủi, Abraham lé hí shit kyỏ tủi é gabủ danglủ gi, "Nang é yanmai, byuhủ chủngjup gi, shimủn jeju wỏ yủ kỏ rủ nghut lẻ."* gủ ri. ⁹ Hủi mù lủi, lumjủng myit bo é bang gi, lumjủng myit bo é Abraham eq rahủ, shimủn jeju lé myang hkam yủ kỏ rủ nghut lẻ.

¹⁰ Jep é tarủ chủng é hkyỏ má ngẻ hkau é lhunglủng bang gi, nhủng pyủm é hủi bang chyat nghut lẻ. Hkủsu mù gủ le, "Tarủ laikủ má kủ tủi é lhunglủng lé a xỏq kut é sủ, ó yủq nghut kỏle, nhủng pyủm é hủi kỏ rủ nghut lẻ."* ga lủi, kủ tủi ri. ¹¹ Hủi htoq agỏ, "Hủi dingmán sủ gi, lumjủng myit mai asak đủi rủ nghut lẻ."* ga kủ tủi é yanmai, ó yủq nghut kỏle, Garai Gasủng é hí má jep é tarủ lé chủng lủi, mara hkyut san byi é a hủi é hkyỏ gi, san za nghut bẻ nghut ri. ¹² Hủi jep é tarủ gi, lumjủng myit eq hủi a sủng é nghut lủi, "Hủi pẻ đủng chủng é sủ gi, hủi pẻ mai asak đủi rủ

nght lẻ."* ga kủ tủi ri. ¹³ Hủi Chyủmdang má, "Sủk zủng má jẻn lủng to hủi é sủ ó yủq nghut kỏle, nhủng pyủm é hủi sủ nghut ri."* ga kủ tủi é eq rajung za, Hkrisduq gi, ngủnhủng é matủ nhủng pyủm é hủi sủ dut bẻ nghut é yanmai, jep é tarủ má é nhủng é hkyỏ mai ngủnhủng lé hkyủ yủ bẻ nghut ri. ¹⁴ Hủi Abraham lé byi tủi é shimủn jeju gi, Hkrisduq Yesủq é yanmai tủngbủi pẻ chyủng le jẻ shủng gaq ga, Yhang ngủnhủng lé hkyủ yủ é nghut ri; hủi mù, ngủnhủng gi, danggidủq byi tủi é Wủi-nủi hủi lé, lumjủng myit mai wỏ yủ rủ nghut lẻ.

Jep E Tarủ Eq Danggidủq

¹⁵ Gumang wủi ê, nủi wủi é asak đủi hkyỏ má é lé dangtủ yủ mù, ngỏ nungmoq lé tủi kỏle, byủ mai chỏm tủi tủi é dangshikaq lé, ó yủq eq le wỏ lhoq hpyỏq pyủm rủ a nghut, ó yủq eq le hủi má wỏ jat kat rủ a nghut. ¹⁶ Abraham eq yhủng é awut ashủn lé byi tủi é danggidủq le hủi eq rajung za nghut ri. "Awut ashủn pẻ lé" gủ é dang gi, byủ myỏ lé gủ lẻ; nghut kỏlhang, hủi Chyủmdang má, hủi lé tủi nau é a nghut e za, "nủng é awut ashủn lé"* ga tủi nau é ru nghut lẻ, hủi é lichyủm gi, byủ rayủq lé za tủi é nghut lẻ, hủi gi, Hkrisduq nghut ri; ¹⁷ hủi mù lủi, ngỏ tủi nau é gi, Garai Gasủng, dangshikaq

* 3:6 Apủn 15:6 * 3:7 Abraham é yhangzỏ pẻ gủ é gi, Garai Gasủng é yhangzỏ pẻ lé gủ é nghut lẻ. * 3:8 Apủn 12:3 * 3:10 Tarủ Pun 27:26 * 3:11 Hbk 2:4 * 3:12 Nhang 18:5 * 3:13 Tarủ Pun 21:23 * 3:16 Apủn 12:7; 13:15; 24:7

tô tô é htâng, myí sho sum xê zàn má lé joq é tarâ gi, dangshikaq haû lé le wó lhoq hpyoq pyám râ a nghut, dang-gidiq lé le wó lhoq htên pyám râ a nghut. ¹⁸ Hkâsu mù gâ le, haû silí wunlí gi, jep é tarâ eq séng lhùm é nghut jáng, dang-gidiq eq gi, haî le a séng lhum lo nghut ri; nghut kôlhang, Garai Gasang gi, Yhâng é jeju yanmai, Abraham lé dang-gidiq dông silí wunlí haû byí to bê nghut ri.

¹⁹ Haû su nghut jáng, haû jep é tarâ gi, hai akyû bò râ lú? Haû gi, danggidiq dông lhoq âng tô é Awut ashín nghut é sù jé lé é hkûn jé shoq, mara kut shut nyi bùm kô é yanmai, jat kat tô é nghut lhê; jep é tarâ haû gi, maumang lagyô pé mai gyoro sô xoq byi sù† é loq dông byí tô é ru nghut lhê. ²⁰ Gyoro sô xoq byi sù gi, rahkyam shut mâ é bang eq baú séng é a nghut, nghut kôlhang, Garai Gasang gi, rayuq za nghut lhê.

²¹ Haû mù luí, jep é tarâ gi, Garai Gasâng é danggidiq pé eq htuq htíng lhùm lhê lú? Ratsuí le a nghut. Hkâsu mù gâ le, dui é asak wó byí é jep é tarâ lé byi to bê nghut le gi, gè gè yhang, dingmán hkyô gi, jep é tarâ mai lò râ nghut lhê.

²² Nghut kôlhang, mingkan gón mâ é bang gi, yubak marâ é htongbyu pé chyat nghut akô ga Chyúmdang má bo tô ri; haû mù luí, haû byí to bê danggidiq lé gi, Yesuq Hkrisduq lé lumjínq é bang lé byi râ

nghut lhê.

²³ Lumjínq hkyô haû a jé shimá, nga-nhúng gi, haû jep é tara eq htongbyu dông lhúng tô é hui luí, lumjínq hkyô haû htoq shit é hkûn jé shoq myhí lhúng tô é huí wú bê nghut lhê. ²⁴ Haû mù luí, nga-nhúng gi, lumjínq é yanmai mara hkyut san byí é hui sháng gaq ga, jep é tarâ gi, nga-nhúng lé Hkrisduq chyáng shuí é râ matú, nga-nhúng é hkyô-u shê sù dut bê nghut ri. ²⁵ Ahkuí kúm gi, haû lumjínq hkyô jé bê nghut é yanmai, nga-nhúng gi, haû jep é tarâ mai hkyô-u shê é loq hkaû má a nghut lo.

Garai Gasâng É Yhangzô Pé

²⁶ Nungmoq lhunglhang bang gi, Hkrisduq Yesuq lé lumjínq é yanmai, Garai Gasâng é yhangzô pé nghut bê; ²⁷ Hkrisduq má wui-myhup hkám bê é bang nungmoq banshoq gi, Hkrisduq lé mebu su wut to bekô nghut ri. ²⁸ Nungmoq lhunglhang bang gi, Hkrisduq Yesuq má rading ralhum za nghut é yanmai, Yudaq byù nghu é eq Grik nghu é, jùn nghu é eq luthkyô nghu é, yuqgè nghu é eq myiwe nghu é, a gam hkoq lo nghut ri. ²⁹ Nungmoq gi, Hkrisduq eq séng bekô nghut jáng, Abraham é awut ashín pé le, haû danggidiq eq rajung za silí wunlí hkam yù bang le, nghut akô nghut ri.

† 3:19 Gyoro so xoq byi sù gi, Mosheq nghut ri.

4

¹ Ngò táí nau é lichyúm gi, haû amyû hkûng xoq dut râ sù gi, ikun sutzè banshoq lé sîng ang sù nghut kôlhang, yhang, zoshâng nghut ashî hkûn gi, jùn hpó eq haî a shaî nghut ri. ² Yhang gi, yhâng wa masat tô é ahkyíng jé shoq, yhang lé zúng é sù eq yhûm lé up su é a-ô má ru lúng nyi ashî nghut ri. ³ Haû eq rajung za, nga-nhúng le zoshâng* nghut é hkûn gi, mingkan uphkâng tarâ ô má jùn dut nyi é bang nghut lhê. ⁴ Nghut kôlhang, ahkyíng lo ngap jáng, zo dut râ ahkáng lé byíng shoq, nga-nhúng wó yû sháng gaq ga, Garai Gasang gi, jep é tarâ hkaû mâ é byu pé lé hkyi yù râ matú, ⁵ jep é tarâ hkaû má, myiwe mai hku kat nhang é Yhang Zo lé, nhang kat byi bê nghut ri. ⁶ Hkâsu mù gâ le, nungmoq le, zo wuí nghut bê yanmai, "Aba, Âwa ê." ga dat wut é, Yhang Zô é Woinyí lé, Garai Gasang gi, nga-nhúng é i-myt unghkaû má kat byi bê nghut ri. ⁷ Haû mù luí, nang gi, jùn a nghut lô e za, zo rayuq nghut bê nghut ri; nang gi, zo rayuq nghut é yanmai, Garai Gasang gi, nang lé Yhâng é amyû hkûng xoq dut nhâng bê nghut ri.

Galatiq Mau Bang Lé Poluq Myit Chiq Byi É Hkyô

⁸ Hí hkûn, Garai Gasang lé nungmoq a sé shî é u lé,

nungmoq gi, nat hparà lhang a nghut bâng é a-ô má jùn dut é bang nghut ri. ⁹ Ahkuí kúm, Garai Gasang lé nungmoq sé bê nghu é htoq agó, Garai Gasang gi, nungmoq lé sé bê nghut le nhîng, nungmoq gi, hkâsu mù, haû wum nyhôm é eq akyû a byi é, mingkan uphkâng é tarâ shut dum lhing taû ló nyi akô lú? Nungmoq gi, haû pé eq jùn zô é dum hui zó nau akô lú? ¹⁰ Nungmoq gi, buinyi wú, lhohkyap wú, ahkyíng yamyoy wú, zanwut wú é hkyô pé lé, ahkyak kut nyi ashî kó nhung! ¹¹ Nungmoq chyáng ngò wum kat pyâm é hkyô gi, akôm dut bê abe nghû, nungmoq é matú ngò myit chiq nyi ri.

¹² Gumang wui ê, ngò gi, nungmoq su dut bê nghut é yanmai, nungmoq le ngò su dut keq† nghû, nungmoq lé dúng tôngbán kat lhê. Nungmoq gi, ngo lé haî le a kut shut wú kô é nghut lhê. ¹³ Sâng-hî dàm ngò nungmoq lé gabú danglù hko kyo é hkyô gi, nungmoq sé é eq rajung za, ngò nõhpyo huí é yanmai nghut lhê. ¹⁴ Ngá é nõhpyo gi, nungmoq é matú wuîhke hkyô dut kôlhang, nungmoq gi, ngo lé a wú tiq pyám kô é htoq agó, a wú chaq pyám kó e za, Garai Gasang é maumang rayuq lé su le, Hkrisduq Yesuq lé su yhang le, ngo lé lhom hap

* **4:3** Bun zo shî má, zoshâng gâ é lichyúm gi, Yesuq lé a lumjîng shî é bang lé gâ lhê. † **4:12** Ngò su dut keq gâ é lichyúm gi, nungmoq le ngò su jep é tarâ mai lut htoq keq gâ nau é nghut lhê.

yù kô é nghut lhê. ¹⁵ Haû sù é nhîng, nungmoq é gabú hkyô banshoq gi, haî dut byuq bekô lúh? Nungmoq gi, ru wó dut é nghut jáng, nungmoq é myoqjí lé choq yû mù, ngo lé wám byí pyám kó râ í dut lai lò bê hkyô lé, ngò saksé wó hkâm lhê. ¹⁶ Ahkuî, ngò gi, nungmoq lé haû tengmán hkyô taî kyô é yanmai, nungmoq é gyè dut to bê nghut lhê lúh?

¹⁷ Haû byù góbang gi, nungmoq lé gyai shirong é hkyô tûn shit ri; nghut kôlhang, ge é hkyô haî a bò; yhangmoq ô nau é hkyô gi, yhangmoq lé nungmoq taû shirông kó abe ga, nungmoq lé ngamoq chyáng mai lhoq kâng yù râ matú ru nghut lhê. ¹⁸ Ge é hkyô lé shirong é gi, ge lhê; ngò eq rahá nyi é hkûn za a nghut, hkâ-nhám le haû su shirong le ge lhê. ¹⁹ Ngò chyitdap é zo wuí ê, Hkrisduq é a-kyang nungmoq má gumjup lo é jé shoq, ngò gi, zo hkû nò nò é su radàm dum hkâm zô nyi lú, ²⁰ nungmoq é hkyô lé myit wuíhkê tô é yanmai, ahkuî, nungmoq eq rahá myang nyi mù, ngò taî é danghtê wó htaî râ matú, gyai yhang myoqbyu nyi lhê ô.

Hagara eq Sarah Nhik É Hkyô

²¹ Haû jep é tarâ ô má nyi nau é bang ê, nungmoq gi, jep é tarâ má taî é hkyô lé a sê gyo kô é nghut lhê lúh? Ngo lé taî kyô wú kó laq. ²² Hkâsu

mù gâ le, Abraham gi, yuqzo í yuq wó ri; rayuq gi, jùn myhí é yhangzo, rayuq gi, jùn myhí a nghut su é yhangzo, ga kê tô ri. ²³ Haû jùn myhí é yhangzo gi, gungsho dông hku lé é sù nghut kôlhang, jùn myhí a nghut su é yhangzo kúm gi, danggidiq eq rajung za hku lé é sù ru nghut lhê.

²⁴ Haû hkyô pé gi, dangtú ru nghut lhê, myiwe haû í yuq gi, dangshikaq í lhum eq wuí lhê; dangshikaq ralhú gi, Sinaq Bùm mâ é† nghut lú, jùn dut râ nghut é zo wuí lé hku kat é Hagara lé taî nau é nghut ri. ²⁵ Hagara haû gi, Arabiq mau mâ é Sinaq Bùm lé taî nau é nghut lú, ahkuî lhê é Yerusalem eq wuí nyi ri. Hkâsu mù gâ le, Yerusalem haû gi, yhang zô pé eq rahá, jep é tara é jùn dut nyi kô é yanmai nghut lhê. ²⁶ Nghut kôlhang, ahtoq mâ é Yerusalem gi, jùn myhí a nghut sù nghut lú, nganhûng é înu nghut ri. ²⁷ Hkâsu mù gâ le,

"Zoshâng a hku é baùdung myhí ê, gabú nyi aq. Zo hkû nò a no wú shí é myiwe gi, gabú lú, gabú garû nyi aq;

hkâsu mù gâ le, haû cham-chyuiyui dut é myiwe myhí gi, làng wó é myiwê htoq má zo wuí je myô wó bê nghut ri."

ga kê tô ri.*

²⁸ Gumang wuí ê, ahkuî, nungmoq gi, Isak su, dang-

† 4:24 Sinaq Bùm mâ é dangshikaq gi, jep é tarâ eq sêng é dangshikaq nghut lhê.

* 4:27 Esai 54:1

gidiq byî tô é zo wuî nghut bê nghut ri. ²⁹ Haú hkûn lé, haú gungsho dông hku lé lo é sù gi, Woi-nyí wum-o dông hku lé lo é sù lé zing-rî ri. Haú eq rajung za, ahkuî le dut nyi ri. ³⁰ Nghut kôlhang, Chyúmdang má hkâsu ga kê tô ri lú gâ le, "Haú jùn myhí eq yhangzo yuqzo lé hkat htoq pyám aq; hkâsu mù gâ le, haú jùn myhí é yhangzo yuqzo gi, jùn myhí a nghut su é yhangzo yuqzo eq rahá, silí wunlí lé wó chòm hkam yù râ a nghut."* gâ ri. ³¹ Haú mù luí, gumang wuî ê, nga-nhúng gi, jùn myhí é yhangzô pé a nghut e za, jùn myhí a nghut su é yhangzô pé ru nghut lhê.

5

Hkrisduq Mâ É Luthkyô

¹ Nga-nhúng luthkyô wó râ matú, Hkrisduq gi, nga-nhúng lé lhoq lhut kat bê nghut ri. Haú mù luí, haú má ru gîng nyi mù, yhumsing gùng lé jun é wòlai hkaú má hkâtaû bainaî nyi kó.

² Ngá dang lé matsîng yù keq! Ngò Poluq, nungmoq lé taí kyo kôlé, nungmoq ahpyo-kuq hpyit hkam yù kô é nghut jáng, Hkrisduq gi, nungmoq é matú hai akyû le bò kó râ a nghut. ³ Hau htoq agó, ahpyo-kuq hpyit hkam yu é sù ó yuq lé nghut kôle, ahpyo-kuq hpyit é sù gi, jep é tarâ lhunglhang lé châng kut râ

lhê nghû, ngò kyô kat lhê. ⁴ Jep é tarâ châng shikut é dông mara hkyut san byî é hui naú bang, nungmoq gi, Hkrisduq eq gâng lhum to bekô nghut luí, haú Garaí jeju mai le byit gyó byuq bekô nghut ri. ⁵ Ngamoq kúm gi, myit myoqbyu tô é dingmán hkyô lé, haú Woi-nyí é yanmai lumjîng myit èq gyai yhang láng nyi é bang nghut lhê. ⁶ Hkâsu mù gâ le, Hkrisduq Yesuq má gi, ahpyo-kuq hpyit é nghut nghut, ahpyo-kuq a hpyit é nghut nghut, hai akyû a bò nghut ri; chyitdap myit mai htoq lo é lumjîng myit za sheq, akyû bo lhê.

⁷ Nungmoq gi, rago din wú bekô* nghut é wá, haú tengmán hkyô lé a châng sháng gaq ga, nungmoq lé ó yuq èq hkûm zing pyám kô é lú? ⁸ Haú su kut mhoq hpyoq yu é hkyô gi, nungmoq lé jì yù Su chyáng mai htoq lo é a nghut. ⁹ "Mún ratsuí zo gi, muk long gón lé wó lhoq daú lhê."† gâ é dang joq lhê. ¹⁰ Nghut kôlhang, nungmoq gi, gotû hkyô dông a lhom yù kó râ nghut lhê nghû, Hkrisduq má hkyak ngò myit lum nyi lhê. Nungmoq lé lhoq byok byî é sù, ó yuq nghut kôle, yhumsing é mara eq rajung za dam byî é hui zo râ nghut lhê. ¹¹ Gumang wuî ê, ahpyo-kuq hpyit é hkyô lé,

* 4:30 Apûn 21:10 * 5:7 Rago din wú bekô gâ é gi, woi-nyí hkyô má kô myhang laí lò bê lé taí nau é nghut lhê. † 5:9 Shut é dông mhoqshit é hkyô ratsuí gi, muk long gón lé mún èq wó lhoq daú é su, nungmoq banshoq lé wó lhoq nghoq yu pyám lhê.

ngò rû hko nyi ashî nghut le gi, haî mù luî, zing-rî é lé ngò hui zô nyi râ lúh? Haû su kut é nghut jáng, haû tapzîng eq séng luî, manghkáng joq râ a nghut lo. ¹² Nungmoq lé lhoq byok nyi é bang gi, hau htoq chyân luî, yhumsing gùng yhumsîng banshoq hpyit pyám kó sháng gaq nghû, ngò wó myit ri.

¹³ Gumang wuî ê, nungmoq gi, luthkyô wó râ matú jî yù huî é bang nghut akô; nghut kôlhang, nungmoq é luthkyô ahkáng lé, yubak gungsho má hkácháng nhâng kó, chyitdap myit mai kúm gi, rayuq eq rayuq dojaú lhûm nyi keq. ¹⁴ Hkâsu mù gâ le, "Náng gûng lé nàng chyitdap é su, náng é chyangnâm mâ é bang lé le chyitdap aq."* gâ é hkunmó má za, jep é tarâ banshoq lo bo to bê nghut lhê. ¹⁵ Nungmoq, rayuq eq rayuq ngat lhum myui lhûm nyi kô é nghut le gi, rayuq eq rayuq lhoq htên pyâm lhum kó râ nghut é lé, sidiq nyi keq.

Woi-nyí Êq Asak Dui Râ Hkyô

¹⁶ Nghut kôlhang, ngò taí kôlé, Woi-nyí shuí û é dông asak dui nyi keq; haú hkûn, nungmoq gi, yubak gungsho ô nau é hkyô cháng kó râ a nghut. ¹⁷ Hkâsu mù gâ le, yubak gungsho ô naù hkyô gi, Woi-nyí eq shai lhûm nyi; Woi-nyí gi, yubak gungsho ô naù hkyô eq shai lhûm nyi, dut ri. Haû í lhum gi, gyè dut lhûm ri; haú mù, nungmoq gi,

yhumsîng ô nau é dông hkâkut kó. ¹⁸ Nghut kôlhang, nungmoq lé Woi-nyí eq hkyô hî é nghut jáng, nungmoq gi, jep é tarâ ô má a nghut lo nghut ri.

¹⁹ Yubak gungsho é muzó gi, de de yhang nghut lhê; haú pé gi, ashop é dông gungsho zùm yap é hkyô, a sân-yúng é hkyô, shut é dông nyi zô lhúm nau é myit, ²⁰ hparà noq hkyô, myoqheq mù kut é hkyô, a jú é hkyô, byoq lhúm é hkyô, manon é hkyô, nhiksoq sup é hkyô, yhumsing wuîzat é hkyô, gâng lhum sê é hkyô, hpúng gam é hkyô, ²¹ ningsû é hkyô, î shuq wut é hkyô, zo yê shuq yê mù achayut kut é hkyô pé eq haú pé su kut é gotú hkyô pé nghut ri; haû su kut nyi yap é bang gi, Garai Gasâng mingdán é silí wunlí lé wó hkam yù râ a nghut nghû, ngò, hí hkûn nungmoq lé taí wú bê eq rajung za, ahkuî lé, nungmoq lé ngò sidiq byi nyi lhê.

²² Nghut kôlhang, Woi-nyí é ashi gi, chyitdap hkyô, gabú hkyô, nguîngón hkyô, myit hîng hkyô, nhik-u nû é hkyô, ge é hkyô, lhumzui hkyô, ²³ nûm é hkyô, yhumsing gùng lé wó hkang é hkyô pé nghut ri. Haú hkyô pé lé hkûm zing pyám râ tarâ haî le a joq nghut ri. ²⁴ Hkrisduq Yesuq eq séng bê bang kúm gi, yubak gungsho ô naù hkyô lé le, hau é yut yut ô naù myit eq shirong é hkyô pé lé le, tapzîng má jén sat pyám bekô nghut ri. ²⁵ Nga-

* 5:14 Nhung 19:18

nhúng gi, Woi-nyí mai asak duì bê nghut mù, haù Woi-nyí htâng châng nyí sháng. ²⁶ Nga-nhúng gi, akôm gyáng dang táí luí, rayuq eq rayuq jeq ho lhùm é eq manon lhùm é bang, a dut nyí sháng gaq.

6

Lhunglhâng Bang Lé, Ge É Hkyô Kut Byi Râ Hkyô

¹ Gumang wuì ê, rayuq yuq gi, mara záng kut shut é nghut jáng, Woi-nyí wum-o bò bê bang nungmoq gi, nùm é myit eq haù yuq lé lhoq pun lhoq kyíng yù keq. Nghut kôlhang, nàng gi, gunglaú é a hui sháng gaq, sidiq nyí aq. ² Rayuq eq rayuq é wòlai lé tê byí lhùm nyí keq; haù dông mai, nungmoq gi, Hkrisduq é tarâ lé wó lhoq dik kó râ nghut lhê. ³ Rayuq yuq gi, yhumsing gùng haí le a nghut é wá, ahkyak su ngam é nghut jáng, haù yuq gi, yhumsing gùng lé mhaù pyâm é sù nghut ri. ⁴ Yuq hkanmó gi, yhumsing nyí yap é hkyô lé taù myit wú keq; haù hkùn, yhumsing gùng lé góbang eq whuí nó a râ e za, yhumsing gùng má aróng wó yù râ nghut lhê. ⁵ Hkâsu mù gâ le, yuq hkanmó gi, ó le ô wò lé wùn waq ra râ dut lhê.

⁶ Haù mungdang lé mhoq yu é sù gi, mhoqshit byi sù lé, ge é zè banshoq gàm byi sháng gaq.

⁷ Garai Gasang lé gi, wó rhoi râ a nghut, yhumsing gùng yhumsing mhauzô é hkâhui nhâng kó; byù gi, hô

kat é eq rajung za, shù yù râ nghut lhê. ⁸ Haù yhumsing é yubak gungsho lé lhoq ngón râ matú hô kat é sù gi, myit haù mai htên byoq é hkyô lé myang hkam yù râ nghut lhê; haù Woi-nyí lé lhoq ngón râ matú hô kat é sù kúm gi, Woi-nyí haù mai ahtum abyuq é asak lé myang hkam yù râ nghut lhê. ⁹ Nga-nhúng gi, ge é hkyô kut é má ngu byuq é bang a dut sháng gaq, hkâsu mù gâ le, haù lé nga-nhúng a tô pyâm é nghut jáng, ahkyíng yam-yoq jé é hkùn, nga-nhúng gi, akyù myang hkam yù râ nghut lhê. ¹⁰ Haù mù luí, nga-nhúng gi, kut râ ahkyíng wó tô é u lé, byù lunglhâng bang lé ge é hkyô kut byi sháng, haù lumjáng hkyô eq sêng é ikun byu pé lé, je riyhang kut byi sháng.

Ahpyo-kuq Hpyit É Hkyô A Nghut É Za, Byù Sik Hpân Huí É Hkyô

¹¹ Ngò, nungmoq lé, ngá é loq eq hkâ-í kô é laiká cham kâ kat byí é lé, wú wú keq!

¹² Ahtoq pyâm za ge é hkyô lé kut shit nau é bang gi, ahpyo-kuq hpyit kó sháng gaq ga, nungmoq lé zik shikut nyí é bang nghut akô; yhangmoq haù su kut é hkyô gi, Hkrisduq é tapzing é yanmai zing-ri huí é hkyô lé, koi pyám râ matú za nghut ri. ¹³ Hkâsu mù gâ le, haù ahpyo-kuq hpyit é bang lhang jep é tarâ lé a cháng kó nghut ri; nghut kôlhang, yhangmoq gi, nungmoq é gungsho eq séng

luí wó gumrông kó sháng gaq
 ga, nungmoq lé ahpyo-kuq
 hpyit nhâng nau akô nghut
 ri. ¹⁴ Ngò kúm gi, nga-nhông
 é Yhumsîng Yesuq Hkrisduq
 é tapzîng eq séng luí gumrong
 é mai lai luí, haí má le a
 gumrông sháng gaq; Yhang
 é yanmai, mingkan gi, ngá é
 matú jén sat é hui bê; ngò gi,
 mingkân é matú jén sat é hui
 bê nghut lhê. ¹⁵ Ahpyo-kuq
 hpyit é hkyô nghut nghut,
 a hpyit é nghut nghut, hai
 akyû a bò; byù sik hpân huí é
 hkyô za sheq, ahkyak é nghut
 lhê. ¹⁶ Tarâ haú lé châng
 é lhunglhang bâng é ahtoq
 má le, haú Garai Gasâng é
 Israelaq byu pé* é ahtoq má
 le, nguîngón hkyô eq shogyo
 nhikmyin hkyô gi, ru joq nyí
 sháng gaq ô.

¹⁷ Ahkuí mai gi, ó yuq le
 ngo lé jamjau a lhoq htoq byi
 lo sháng gaq; hkâsu mù gâ
 le, ngò gi, Hkrisduq é dui-
 nhâng zoshâng nghut é saksé
 damhkô lé wun wún lhê.

¹⁸ Gumang wuì ê, nga-
 nhông é Yhumsîng Yesuq
 Hkrisduq é jeju gi, nungmoq
 é woi-nyí eq ru joq nyí sháng
 gaq. Amen.

* **6:16** Bun zo shí lhum mâ é Israelaq byu pé gâ é gi, hpúng byû wuì banshoq lé
 tái nau é nghut lhê.

EHPESU Pê Chyáng Hun Kat é Laiká (Ephesians)

¹ Garai Gasang ô nau é eq rajung za, Hkrisduq Yesuq é lagyo nghut sù, ngò Poluq gi, Ehpesu myuq má nyi é, Hkrisduq Yesuq má lhumzui bang nghut é, haù sân-yúng bâng chyáng nguingón dang shit kyô kat lhê.

² Nga-nhùng é Îwa Garai Gasang eq Yhumsing Yesuq Hkrisduq chyáng mâ é, jeju eq nguingón hkyô gi, nungmoq chyáng ru joq nyí sháng gaq ô!

*Hkrisduq Mâ É, Woi-nyí
Hkyô Shimân Jeju Pé*

³ Mauhkung htoq tsáng myhâng má, woi-nyí hkyô eq sêng é shimân jeju jung hkangmó lé, Hkrisduq má nga-nhúng lé shimân byi sù, nga-nhùng é Yhumsing Yesuq Hkrisduq é Yhângwa, Garai Gasang gi, hkungsô wó nyí sháng gaq. ⁴ Hkâsu mù gâ le, nga-nhúng gi, Garai Gasâng é hí má, chyoiyúng é bang eq mara a bo é bang dut râ matú, Garai Gasang gi, mingkan lé a hpân shi mai, Hkrisduq Yesuq má nga-nhúng lé hkyin yu to bê nghut ri. ⁵ Hau htoq agó, Yhang, nga-nhúng lé chyitdap é yanmai, Yhang myit ngui ô nau é eq rajung za, Yesuq Hkrisduq mai

yangzô pé kut yu râ matú, hí mai nga-nhúng lé masat to bê nghut ri. ⁶ Haù mù, Yhang chyitdap é Sù* má, nga-nhúng lé láí láí byi bê nghut é, hpungwup shingkang bo é jeju chyunghuq lé, chôm hkya-on sháng. ⁷ Garai Gasâng é agùn agó é jeju yanmai, nga-nhúng mara hkyut byí é hui luí, Yhang Zô é sui đông mai, nga-nhúng gi, Yhang má hkyi yù hkyô wó yu é nghut lhê. ⁸ Jeju haù lé gi, hpaqchyí byéng-yá eq sê gyô é nyan banshoq le kut, Yhang, nga-nhúng lé agùn agó byi bê nghut lhê. ⁹ Garai Gasang gi, Yhang myit ngui é eq rajung za, Hkrisduq đông mai kut râ matú hen to bê nghut é, Yhâng é zaù tô é hkyô lé, nga-nhúng lé shit bê nghut ri. ¹⁰ Sê gyo wui é hkyô haù gi, lhoq dik râ ahkying jé jáng, mauhkung htoq eq myigùng htoq mâ é lhunglhang lé, Hkrisduq má rading ralhum za kut râ nghut é hkyô nghut lhê.

¹¹ Hkrisduq má sân-hi myit myoqbyù bang nghut é nga-nhúng gi, Yhâng é hpungwup shingkang lé hkya-on kungtôn sháng gaq ga, ¹² Garai Gasang gi, Yhang myit sôn tô é lhunglhang lé ban kut mù, Yhâng ô nau é đông, hí mai myit hpyit doqdân to bê eq rajung za, nga-nhúng lé le, Hkrisduq má hkyin yu to bê nghut ri. ¹³ Hau htoq agó, nungmoq le, nungmoq é hkyi yù hkyo é

* 1:6 Yhang chyitdap é Sù gâ é gi, Yesuq lé taí nau é nghut lhê.

gabú danglù gâ é tengmán mungdang lé wó gyo kô é hkûn, Hkrisduq eq sêng é bang dut bekô nghut ri. Nungmoq gi, Hkrisduq lé lumjǐng bekô nghut é yanmai, haù gidiq byí tô é Chyoiyúng Woi-nyí dizik htùng tap byí é hui bekô nghut ri. ¹⁴ Garai Gasâng é hpungwup shingkang lé hkya-on râ matú, Yhang eq sêng é byu pé hkyi xe yù huí é hkyíng jé shoq, Chyoiyúng Woi-nyí haù gi, nga-nhùng é muizè lé hkyak wó yú râ nghu é masat nghut ri.

Poluq Kyúdung Byí É Hkyô

¹⁵ Haù mù luí, Yhumsíng Yesuq lé nungmoq lumjǐng é hkyô eq sân-yúng bang lunglhang lé nungmoq chyitdap é hkyô lé, ngò wó gyô é yanmai, ¹⁶ ngò gi, ngá é kyúdung dang má nungmoq lé myit bun uchyang, anum yhang, nungmoq é matú jeju hkya-ôn nyi lhê. ¹⁷ Nga-nhùng é Yhumsíng Yesuq Hkrisduq é Garai Gasang nghut é, hpungwup shingkang bò sù haù Iwa gi, Yhang lé nungmoq je sé râ matú, hpaqchyí byéng-yá wó byí é eq san za wó sé nhang é Woi-nyí, nungmoq lé byi sháng gaq nghû, ngò, Yhâng chyáng dúng nyi lhê. ¹⁸ Hau htoq agó, Yhang, nungmoq lé ji yu é myit myoqbyù hkyô, hkasú é nghut é lé le, Yhâng é hpungwup shingkang bo é muizè gi, sân-yúng bâng chyáng agùn agó joq nyi é

hkyô lé le, Yhâng é kô dik é a-tsam mó gi, lumjǐng bang nga-nhùng é matú nghut é lé le, ¹⁹ nungmoq wó sé râ matú, nungmoq é myit myoqjí lhoq gyeng byí é hui sháng gaq nghû, ngò kyúdung byí nyi lhê. A-tsam mó haù gi, Garai Gasang, Hkrisduq lé shi é mai lhoq dui toq yú mù, ²⁰ mauhkúng htoq tsáng myhâng má, Yhâng é loqyò hkyam shut zùng nhang é hkûn, chung é wum-o a-tsam mó eq rajung za nghut ri. ²¹ Hkrisduq gi, uphkan é, ahkáng ayá wó é, a-tsam bo é eq up zô é bang banshoq htoq má le, ahkuí pyat eq htang pyat má myhíng é myíng lunglhang é htoq má le, je gyaú é sù nghut lhê. ²² Hau htoq agó, Garai Gasang gi, lunglhang lé Yhâng é hkyiwa ô má tô to luí, haù noqkuq hpúng é matú, Yhang lé, jung hkanmó é ushuq dut râ dông masat to bê nghut ri. ²³ Noqkuq hpúng haù gi, Hkrisduq é gungdu nghut luí, hkyô hkanmó má jung hkanmó lhoq byíng jup é Hkrisduq byíng nyi é nghut ri.

2

Hkrisduq Má Asak Dui É Hkyô

¹ Laí ló bê hkûn, nungmoq gi, tarâ lu laí é eq mara kut shut é hkyô pê é yanmai, shi tô é bang dut kô é nghut lhê. ² Haù hkûn, nungmoq gi, mingkan ngón hkyô pé má lhaq châng nyi kô é htoq

agó, haû tarâ a cháng bang é myit má ahkuí mù zûi nyi é sobyô nghut é, maulat lé up sù htâng châng nyi kô é bang nghut lhê. ³ Nga-nhúng banshoq bang le, yhangmoq su kut nyi lai lo é bang chyat nghut mù, yubak mara byíng é suisho ô naù gadaú hkyô má nyi é bang nghut é htoq agó, gungsho ô nau é hkyô pé eq myit é hkyô pé dông za châng wú é bang nghut lhê. Haû mù, góbang eq rajung za, nga-nhúng gi, Garai Gasâng é nhikmo-yo hkyô eq gingdán wú é bang chyat nghut lhê. ⁴ Nghut kôlháng, shogyo nhikmyin myit gyaí bo é Garai Gasang gi, nga-nhúng, tarâ lu lai luí shi byuq bê bang dut kôlháng, Yhâng é chyitdap myit mó èq, nga-nhúng lé chyitdap luí, Hkrisduq eq rahá asak duì nhâng bê nghut ri. ⁵ Haû mù, nungmoq gi, Garaí jejú èq za hkyi yu é hui bekô nghut ri. ⁶ Garai Gasang gi, Hkrisduq Yesuq má, nga-nhúng lé, Yhâng é ge é hkyô shit bê nghut mù, a ung taí é Yhâng é jeju lé, htang pyat má wó shit sháng gaq ga, ⁷ nga-nhúng lé, Hkrisduq eq rahá lhoq dui toq yú mù, mauhkúng htoq tsáng myhâng má, Yhang eq rahá zùng nhang to bê nghut ri. ⁸ Hkâsu mù gà le, nungmoq gi, lumjíng é dông mai Garaí jejú èq za hkyi yu é hui bekô nghut ri. Haû gi, nungmoq chyáng mâ é a nghut, Garai Gasâng jeju chyunghuq za ru

nghut lhê. ⁹ Haû gi, yhumsing é muzó mai wó é a nghut é yanmai, ó yuq le nghutbun râ hkyô a joq. ¹⁰ Hkâsu mù gà le, nga-nhúng gi, Garai Gasâng é loqmú pé nghut mù, nga-nhúng zui saí râ matú, hí hí mai, Garai Gasang hen lajâng tô é ge é muzó pé lé zui saí râ matú, Hkrisduq Yesuq má hpan to hui bê bang nghut lhê.

Hkrisduq Má Rading Ralhum

¹¹ Haû mù luí, nungmoq gi, hí hkûn, hku lé lo é mai yhang tûngbaù pé nghut é hkyô lé le, byu loq èq za gungsho má kut é, "ahpyo-kuq hpyit hkâm bang" gà é bang mai, nungmoq lé, "ahpyo-kuq hpyit a hkâm bang" ga byi kô é hkyô lé le, myitbun keq. ¹² Haú u lé, nungmoq gi, Hkrisduq eq gâng lhûm tô é bang; Israe-laq mingbyû a nghut é bang; danggidiq eq sêng é dangshikaq pé má gó ming byû nghut é bang; mingkan htoq má, myoqbyû jowò a joq é eq Garai a wó é bang nghut é lé, myitbun keq. ¹³ Nungmoq gi, hí hkûn wê gâng nyi é bang nghut kôlháng, ahkuí kúm, Hkrisduq é sui dông mai Hkrisduq Yesuq má shuí chyâng htep é hui bekô nghut ri.

¹⁴ Hkâsu mù gà le, Yhânggùng yhang gi, nga-nhúng é nguingón hkyô nghut ri. Yhang gi, gyoro má kyo tô é madin nghut é a naù a wom hkyô lé hpyoq hpyi

* 2:14 I myú gà é gi, Israe-laq byu pé eq tûngbaù pé lé gà lhê.

pyám byi luí, haú í myû* dut nyi é lé, rahú za dut nhâng bê nghut ri. ¹⁵ Haú hkunmó pé eq hksåg tô é tarâ pé bo é jep é tarâ lé, Yhâng é gungsho má lhoq htúm pyám bê nghut ri. Haú mù, Yhang ô nau é hkyô gi, haú í myû dut tô é lé, Yhânggùng má yhang, byù sik ra-myû za hpan to râ matú nghut ri; haú dông, simsaq hkyô kut byi bê nghut ri. ¹⁶ Yhang gi, a nau a wôm lhùm é hkyô lé, haú tapzîng má lhoq htúm pyám byi mù, haú tapzîng dông mai, byù myu í myu é lé ragùng za kut luí, Garai Gasang eq xoq byi bê nghut ri. ¹⁷ Yhang gi, wê gâng nyi é bang† nungmoq lé le, chyâng htep nyi é bang‡ lé le, simsaq hkyô é danglù lé hko kyo bê nghut ri. ¹⁸ Hkâsu mù gâ le, nga-nhúng í myû gi, Yhang dông mai, Woi-nyí ralhum zâ èq, haú Íwâ chyáng wàng râ hkyô dong bê nghut ri.

¹⁹ Hau é yanmai, nungmoq gi, tûngbaù pé eq byù bíng pé a nghut lô é za, Garai é byu pé eq rahá, mingbyû wui eq yhumbyù wui chyat nghut bekô nghut luí, ²⁰ haú lagyô pé eq myiqhtoí pé, hi tô é apûn awang htoq má xuq tô é bang chyat nghut akô; Hkrisduq Yesuq yhang, haú mâ é ahkyak é htungchyûn luqgok dut bê nghut ri. ²¹ Yhang má, wahpang lhum gón xoq lhùm bùm é nghut mù, haú Yhumsîng má choyoyúng no-

qkuq yhùm ralhum dut lò bê nghut ri. ²² Woi-nyí dông mai, Garai Gasang nyi râ jang dut râ matú, nungmoq le, Yhang má, wahpang su tsuq é chôm huí nyi bùm bekô nghut ri.

3

Poluq, Tûngbaù Pê É Tarâ Hkô Sará

¹ Haú su nghut mù, Hkrisduq Yesuq é hkyô lé, nungmoq tûngbaù pê chyáng hko kyô é yanmai, htongbyû dut sù, ngò Poluq gi, nungmoq é matú kyûdung byí lhê.

² Nungmoq lé dojaú râ é matú, ngo lé byí tô é Garai Gasâng jeju ayá shí lé, nungmoq gè gè wó gyô wú bekô râ nghut lhê. ³ Haú gi, hí hkûn, ngò, tot é dông kê tô wú bê eq rajung za, haú zaú tô é hkyô lé, shing-rán dông ngo lé sé nhang é nghut ri. ⁴ Haú hkyô lé, nungmoq nghap wú é hkûn, Hkrisduq eq sêng é zaú tô é hkyô, ngò rago sé é lé, nungmoq wó sé kó râ nghut lhê. ⁵ Haú lé, lai lò bê ipyat pé mâ é byu pé lé a sé nhang é nghut kôlhang, ahkuí gi, Garai Gasâng é choyoyúng é, lagyô pé eq myiqhtoí pé lé, haú Woi-nyí eq hpông shit bê nghut ri. ⁶ Zaú tô é hkyô haú gi, gabú danglù dông mai, Hkrisduq Yesuq má, Israelaq byu pé eq rahá, tûngbaù pé le, hkûng xoq bang wó dut luí, gungdu ralhùm é gungsho showui showang pé chyat dut é eq, danggidiq byi tô é lé wó

† 2:17 Wê gâng nyi é bang gâ é gi, tûngbaù pé lé gâ lhê. ‡ 2:17 Chyâng htep nyi é bang gâ é gi, Israelaq byu pé lé gâ lhê.

chôm hkam yu é bang dut é hkyô nghut ri.

7 Yhâng é hpungwup a-tsam mai, ngo lé byî tô é Garai Gasâng jeju chyunghuq é yanmai, ngò gi, gabú danglù shî taí râ dui-nhâng zoshâng dut é nghut lhê. ⁸ Ngò gi, haû Garai Gasâng é byu pé mâ é tiq dik sù htoq má lhang je tiq sù nghut kôlhâng, haû Hkrisduq é a ung htoq taí é wó sùt hkyô lé, tûngbaù pé chyáng hko kyo râ matú le, ⁹ haû lhunglhang lé hpan é Garai Gasang má, lai lò bê ipyat pé má zaú tô é, zaú tô é hkyô haû lé hkâsu kut tô é lé, yuq hkanmó lé taí sân kyo râ matú le, jeju shî, ngo lé byi bê nghut ri. ¹⁰ Haû gi, nga-nhúng é Yhumsîng Hkrisduq Yesuq má lhoq pán bê nghut é, Yhang ahtum abyuq myit hpyit tô bê eq rajung za, ¹¹ haû Garai Gasâng é hpaqchyî mó góng lé, noqkuq hpúng dông mauhkûng htoq tsáng myhâng mâ é uphkâng bang eq ahkáng ayá wó bang lé, ahkuí sé nhâng râ matú nghut lhê. ¹² Nga-nhúng gi, nga-nhúng é Yhumsîng Hkrisduq Yesuq eq rading ralhum za nghut é yanmai le, Yhang lé lumjîng é yanmai le, Garai Gasang chyáng, wám é myit eq a gyuq a wàm é myit èq wó htep ê é nghut lhê. ¹³ Haû mù luí, ngò, nungmoq lé dúng tôngbán nau é gi, nungmoq é matú, ngò wuîhke jamjau hui zô é yanmai, nungmoq i-myit hkâgyui kó; haû gi, nungmoq

é matú akyû bò râ hkyô nghut lhê.

Ehpesu Myuq Byu Pé Lé Kyûdung Byî É Hkyô

¹⁴ Haû pé é yanmai, ngò gi, haû Íwâ é hí má hkyih-put htuoq luí kyûdung é nghut lhê. ¹⁵ Mauhkûng eq myigùng htoq mâ é Yhâng é ikun byù lhunglhang gi, Yhâng chyáng mai myìng wó yu é chyat nghut lhê. ¹⁶ Nungmoq é lumjîng myit mai, nungmoq é i-myit unghkaû má Hkrisduq wó nyi nyi sháng gaq nghû, ¹⁷ Yhang é hpungwup shingkang bo é agùn agó wó sùt é mai, nungmoq é i-myit unghkaû mâ é sù lé, Yhâng é Woi-nyí dông, hpungwup a-tsâm èq wum-o lhoq kîng byi râ matú, ngò kyûdung byi lhê. Hau htoq agó, nungmoq gi, chyitdap myit má amyit chin to luí, awang hi to mù, ¹⁸ sân-yúng bang eq rahá, hau é apyí, a-tsúng, myhâng, nik, hkâ-í nghut é lé, rago wó sé kôluí, ¹⁹ Garai Gasâng é gumjup é hkyô lhunglhang èq wó lhoq gumjup yù kó sháng gaq nghû, sê é nyan htoq má gyaú é Hkrisduq é chyitdap hkyô lé, nungmoq wó sé râ matú, ngò kyûdung byi lhê.

²⁰ Ahkuí, nga-nhúng é hkaû má mù zuí nyi é, Yhâng é wum-o a-tsâm é yanmai, nga-nhúng dúng é banshoq eq myit é hkyô lhunglhang htoq je wó kut byî é Su chyáng, ²¹ haû noqkuq hpúng é yanmai le, Hkrisduq Yesuq é yanmai le, pyat pyat zaí zaí, ahtum abyuq, hpungwup

shing kang rû bo nyi sháng
gaq ô! Amen.

4

Hkrisduq É Gungdu Má Rading Ralhum Za

¹ Haû mù luî, nungmoq gi, nungmoq lé wut yù bê nghut mù, wut yu é hkyô eq gingdán é dông asak duì keq nghû, haû Yhumsing é yanmai, htóng lúng sù ngò Poluq gi, nungmoq lé lhoq pun lhoq kyíng kat lhê. ² Hkyô hkat hkan gmó má i-myt lhoq nyhum é eq i-myt nú-nhâm nyi keq; myit hing é eq chyitdap myit mai rayuq eq rayuq hkam jân lhûm nyi keq. ³ Haû Woi-nyí èq byí é myit hui hkyô lé, nguingón hkyô dông mai châng nyi râ matú, wó dut é í shikut nyi keq. ⁴ Nungmoq gi, wut yù hui kô é hkûn, myit myoqbyù hkyô rashut za wut yù hui bekô nghut é eq rajung za, gungdu ralhum eq Woi-nyí ralhum za nghut nyi ri. ⁵ Yhumsing rayuq za, lumjíng hkyô rahkat za, baptisma ralhum za nghut nyi ri. ⁶ Banshoq bâng é Íwa nghut sù Garai Gasang le, rayuq za nghut nyi ri; Yhang gi, banshoq bâng é ahtoq má nghut luî, lunglhang dông mai mù kut é eq lunglhang é ahkaû má lúng nyi sù nghut ri.

⁷ Nghut kôlháng, nga-nhúng yuq hkan gmó gi, jeju chyung huq lé, Hkrisduq mai ké byí é dông wó yu é nghut lhê. ⁸ Hau é yanmai,

"Yhang gi, myhang é jowò shut doq ló é hkûn, shúm zung é bang lé gi, shuî chûng mù, byu pé lé gi, chyung huq tsing gàm byí ri."*

ga, Chyúmdang má tai tô é nghut lhê. ⁹ Haû "doq ló" gâ é lichyúm gi, myigùng é a-o tsáng má le, Yhang gyó jé bê nghut lhê, gá nau é a nghut lhi? ¹⁰ Haû gyó lé é Sù gi, junghkang jungmó lé lhoq byíng jup râ matú, mauhkûng banshoq é ahtoq má doq ló é Sù yhang nghut lhê. ¹¹ Yhang gi, ra-am lé, lagyô pé, ra-am lé, myiqhtoí pé, ra-am lé, gabú danglù hko kyo râ bang, ra-am lé, hpúng-up pé eq sará pé kut tsing byí to bê nghut ri. ¹² Haû bang gi, Garai Gasang é byu pé lé wùn waq âng é muzó pé é matú, hen lajâng é bang nghut ri. Haû hkûn sheq, Hkrisduq é gungdu gi, ¹³ haû lumjíng hkyô eq Garai Gasang é Yhangzo lé sê é hkyô má, nga-nhúng banshoq bang rading ralhum za wó dut mù, kô dîng bang dut luî, Hkrisduq é gumjup é isâm banshoq lé wó yu é hkûn jé shoq, wó kô jat nyi râ nghut lhê.

¹⁴ Haû mù, nga-nhúng gi, wuibaù pé èq hí shut htáng shut bat myhû é su dut é eq, byu pé é agè ashop é eq haq dâ é mhoq hpyoq hpaqchyí pé eq mhoqshit hkyô laidun hkan gmó èq, shí shut hé shut mut tâng é su dut é lé hui zô é zoshâng wuì su a nghut lô é za, ¹⁵ chyitdap myit mai

* 4:8 Hkya-on 68:18

tengmán é dang lé tai nyi jáng, Hkrisduq nghu é ulhum má hkyô hkangmó kô myhang lò râ nghut lhê. ¹⁶ Yhang đông mai, gungdu gón gi, ralhum eq ralhum htuqbâng é gungsho showui showang pé lé xoq byi to bê nghut mù, gungsho showui showang háu pé gi, yhumsing é muzó lé zui sai nyi é nghut jáng, gungdu háu gi, chyitdap myit má, yhanggùng yhang kô lò myhang lò râ nghut lhê.

Byù Sik Đông Asak Dui Râ Hkyô

¹⁷ Háu mù luí, háu Yhumsing é ahko ahkáng mai ngò nungmoq lé tai nau é hkyô gi, háu tũgbaù pé gi, akyû a bo é lé myit mù, asak dui kô é su, nungmoq gi, hkâkut kó. ¹⁸ Yhangmoq gi, sê gyô é nyan chut byuq bekô nghut é eq yhangmoq myit htan nyi kô é nghut mù, hái le a sé kô é yanmai, Garai Gasang byi é asak eq wê gâng byuq bekô nghut ri. ¹⁹ Yhangmoq gi, gyuq hoq hkyô a bo byuq lo kô é yanmai, myoqnoq myit đông a sansêng é hkyô jung hkangmó lé je wó kut xoq nyi shoq ga, yhumsing gùng lé, gungsho ô nau gadaú é hkyô má ap pyám bekô nghut ri.

²⁰ Nungmoq kúm gi, Hkrisduq é hkyô lé háu đông mhoq yû kô é a nghut. ²¹ Nungmoq gi, Yesuq chyáng mâ é tengmán hkyô đông, Yhâng é hkyô lé wó gyô wú é eq mhoq yu wú bekô nghut lhê. ²² Háu mù, nungmoq gi,

hí hpyang lhê é nungmoq é nyi yap sâmlai nghut é, ô nau gadaú luí, yhumsing gùng yhumsing mhaù pyám é đông htên byoq ló nyi é nungmoq é byù xau lé tô pyám râ matú mhoq yû bê eq rajung za, ²³ nungmoq é i-myt lé asik htaì pyám nhâng keq; ²⁴ hau htoq agó, nungmoq gi, tengmán é eq sêng é dingmán hkyô eq chyoiyúng hkyô má, Garai Gasang eq dù shoq hpan to hui bê nghut é byù sik lé, yu wut to keq.

²⁵ Háu mù, nga-nhúng ban-shoq bang gi, gungdu ralhum é gungsho showui showang pé chyat nghut é yanmai, nungmoq yuq hkangmó gi, mhaù é hkyô lé tô pyám luí, yhumsing é chyangnâm mâ é sù lé, tengmán é dang tai ra râ nghut lhê. ²⁶ "Nungmoq nhikjum yô é hkûn, mara hkâkut kó."* nungmoq gi, bui wàng shoq nhikjum hkâyô nyi kó. ²⁷ Nat Tsadán lé le, jowò hkâbyi kó. ²⁸ Hkau sù gi, a dum hkau lo sháng gaq; râ nyi é bang lé, rajung jung wó gâm byi shoq, yhumsing é loq eq akyû bo é hkyô pé lé kut nyi luí, muzó zui shikut ra râ nghut lhê.

²⁹ Nungmoq é nhut mai agè agaú é dang hái le hkâhtoq nhâng kó; wó gyô é bang akyû bò shoq, yhangmoq râ tô é má cháng luí, háu bang kô lam lò râ dang za tai keq. ³⁰ Háu hkyi yù râ buinyi é matú, dizik đông nungmoq lé tap to byi é Garai Gasang é

Chyoiyúng Woi-nyí lé hkâlhoq yón kó. ³¹ Haû myit tot é, nhikjum yô é, nhik-yô é, byoq lhum byoq cheq é eq lumù gansang é, agè agau é hkyô pé banshoq lé, nungmoq tô pyám keq. ³² Nungmoq gi, rayuq eq rayuq, ge é hkyô eq shogyo nhikmyin é hkyô tân shit lhum luí, Garai Gasang gi, Hkrisduq má, nungmoq lé mara hkyut byí é su, nungmoq yhangchang le mara hkyut byí lhùm nyí keq.

5

¹ Haû mù, nungmoq gi, chyitdap dik é zoshâng wui nghut é yanmai, Garai Gasang lé alik yu é bang kut keq. ² Hkrisduq gi, Yhânggùng lé namngón jung hkungga eq shigu hkungga dông, nga-nhùng é matú Garai Gasâng chyáng Yhânggùng yhang ap byí pyám shoq, nga-nhùng lé chyitdap é su, nungmoq le chyitdap myit eq asak dui nyí keq.

³ Hau htoq agó, ashop é dông gungsho zùm yap é hkyô, a sansêng é hkyô hkangmó eq myoqnoq é hkyô pé lé, nungmoq taí lhang hkâtaí kó; hkâsu mù gà le, nungmoq gi, Garai Gasâng é chyoiyúng byu pé nghut lhê. ⁴ Haû eq rajung za, a taí gíng é, ahoq ahî dang, dangsôm eq hkunchaq dông gyâ é dang pé lé a taí é za, jeju hkya-on dang za taí nyí keq. ⁵ Hkâsu mù gà le, ashop é dông gungsho zùm yap é hkyô kut shut sù,

a sansêng é sù eq hparà noq é sù nghut é myoqnoq sù ó yuq nghut kôlhang, Hkrisduq eq Garai Gasâng é mingdán má muizè a wó é hkyô lé, nungmoq sê nyí keq. ⁶ Ó yuq nghut kôle, dangsôm* dông mai nungmoq lé a wó mhaû kó sháng gaq; hkâsu mù gà le, haû hkyô pé é yanmai, Garai Gasâng é nhikmo-yo hkyô gi, haû jìno a gyo bâng é ahtoq má jé râ nghut lhê. ⁷ Haû mù luí, haû bâng chyáng hkâbo wang lòm kó.

⁸ Hkâsu mù gà le, nungmoq gi, hí hpyang mauchut tuq dut é bang nghut lhê; nghut kôlhang, ahkuí gi, haû Yhumsíng má maubó pé nghut bekô nghut ri. ⁹ Haû Yhumsíng ô nau é hkyô haí nghut é lé ho htoq yû mù, maubó é yhangzô pé dông asak dui keq. ¹⁰ Hkâsu mù gà le, haû maubó é ashí gi, ge é hkyô banshoq, dingmán é hkyô eq tengmán hkyô chyat nghut ri. ¹¹ Haû ashí a zuí é mauchut tuq muzó má a bo wang lom é za, yhangmoq é mara lé tân shit keq. ¹² Hkâsu mù gà le, haû jìno a gyo bang haq zaú kut é hkyô lé gi, taí htoq le lhang hoq hpo nghut ri. ¹³ Nghut kôlhang, junghkang jungmó lé, haû maubó eq tân shit jáng gi, wó byu-myang é chyat dut râ nghut lhê. ¹⁴ Hkâsu mù gà le, junghkang jungmó lé byu-myàng nhang é gi, maubó nghut ri. Hau é yanmai,

* 5:6 Dangsôm gà é gi, Garai Gasâng é nhikmo-yo hkyô a jé râ ga taí é dang nghut lhê.

"Yhup ngón nyî sũ ê, toq aq, haũ shi é mai dui toq aq hko; haũ jáng, Hkrisduq gi, nang lé duqbó byi rã nghut lhê."†

ga luĩ taĩ tô é nghut lhê.

15 Haũ mù luĩ, nungmoq hkãsu kut asak dui é hkyô mã gyai sidiq nyi keq; hpaqchyĩ a bò bang su a nghut é za, hpaqchyĩ bò bang su kut nyi keq. 16 Buinyi ahkying shĩ pé gi, agè ashop é yanmai, wó é ahko ahkáng banshoq lé ge dik é đông chung jai keq. 17 Hau é yanmai, byũ ngok pé a dut é za, haũ Yhumsing ô nau é hkyô gi, haĩ nghut é lé, sê gyô yu nyi keq. 18 Haũ achaq achyut é yubak hkyô lhoq htoq é i lé hkãshuq wut kó; Woinyĩ lé kũm bying nhang nyi keq. 19 Nungmoq gi, hkya-on kungtôn dang đông le, hkya-on mahkôn dang đông le, woinyĩ eq sêng é mahkôn đông le, rayuq eq rayuq dáng nyo lhum luĩ, nungmoq é i-myit unghkaũ mai, haũ Yhumsing lé mahkôn hkôn mù, lhoq ngón nyi keq. 20 Nga-nhũng é Yhumsing Yesuq Hkrisduq é mying lé lang luĩ, jung hkanmó é matú, haũ Iwa Garai Gasang lé, hkã-nhãm le jeju hkya-ôn nyi keq.

21 Hkrisduq lé hkungga hpautap é myit eq, rayuq eq rayuq hpautap lhum nyi keq.

Myi Eq Làng

22 Ikun myhĩ pê ê, haũ Yhumsing uphkan é đông chãng é su, nungmoq é ikun hpô pé uphkan é đông chãng nyi keq. 23 Hkãsu mù gã le, Hkrisduq gi, haũ noqkuq hpung é ulhum nghut é su, haũ ikun hpô gi, ikun myhĩ é ulhum nghut nyi ri; Hkrisduq gi, haũ Yhãng gungdu nghut é noqkuq hpung lé hkyi yũ Sũ nghut ri. 24 Haũ noqkuq hpung gi, Hkrisduq uphkan é đông chãng é su, ikun myhĩ pé le, hkyô hkat hkanmó mã, yhangmoq é ikun hpô pé uphkan é đông chãng nyi rã lhê.

25 Ikun hpô pé ê, Hkrisduq gi, haũ noqkuq hpung lé chyitdap luĩ, hau é matú Yhãnggũng lé Yhang ap pyãm é su, nungmoq é ikun myhĩ pé lé chyitdap nyi keq. 26 Yhang haũ su kut é gi, haũ noqkuq hpung lé, mungdang đông wui mã chĩ pyãm luĩ, lhoq sãn-yung yũ rã eq, 27 haũ noqkuq hpung gi, agè agau é eq a-ká akông é hkyô haĩ le a bo é za, mara hũn rã hkyô a bo é eq chyoyung é, hpungwup shinkang bo é noqkuq hpung đông, Yhãnggũng lé wó ap byi rã matú nghut lhê. 28 Haũ eq rajung za, ikun hpô pé gi, yhangmoq é ikun myhĩ pé lé, yhumsing gungdu lé su chyitdap rã dut lhê. Yhumsing é ikun myhĩ lé chyitdap é sũ gi, yhumsing gunglé le, chyitdap é sũ nghut bẽ. 29 Ó yuq le, yhumsing

† 5:14 Dang ngho shĩ gi, hí lhê é noqkuq hpung pé taĩ gyó lo é dang nghut lhê.

gùng lé a chyitdap a kut é za, Hkrisduq gi, haû noqkuq hpúng lé kut byî nyi é su, yhumsing gùng lé byi tso byi huq luí, rago wú zúng nyi é nghut lhê. ³⁰ Hkâsu mù gê le, nga-nhúng gi, Yhâng é gungdû é gungsho showui showang pé chyat nghut lhê. ³¹ Haû mù, "Hau é yanmai, yuqgè gi, înu îwa eq gang luí, yhangmyi eq zùm-yap mù, yhangnhik í yuq gi, gungsho ralhum za dut kó râ nghut lhê."* gê tô ri. ³² Haû hkyô gi, gyai yhang zaú tô é hkyô nghut ri. Nghut kôlhang, ngò gi, haû Hkrisduq é hkyô eq noqkuq hpúng é hkyô lé tai nyi é nghut lhê. ³³ Haû mù, nungmoq yuq hkangmó gi, yhumsing gùng lé chyitdap é su, yhumsing é ikun myhí lé le chyitdap râ dut lhê; haû ikun myhí le, yhâng é ikun hpó lé hkungga râ dut lhê.

6

Zo Wuí Eq Mó Wui É Hkyô

¹ Zoshâng wui ê, haû Yhumsîng má, nungmoq é mó wui é jìno gyo keq; hkâsu mù gê le, haû gi, kut gíng é hkyô nghut ri. ² "Náng é înu îwa lé hkungga aq. ³ Haû jáng, nàng, nyi ngón yuqyò mù, myidàm htoq má náng é asak chyungxe hing nyi râ nghut lhê."* gê é dang gi, danggidiq lom é sâng-hí lhum hkunmó nghut ri.

⁴ Îwa pé ê, nungmoq é zo wuí lé nhikjum a lhoq yô é za,

haû Yhumsing é mhoq kyo hkyô eq mhoqshit lhoq pun hkyô đông yhangmoq lé baú kô nyi keq.

Jùn Pé Eq Junsing Pé É Hkyô

⁵ Jùn pé ê, nungmoq gi, Hkrisduq é jìno gyô é su, gyoq hkunggâ é eq lhumzui é myit mai, nungmoq é myidàm htoq mâ é junsing pé é jìno gyo keq. ⁶ Nungmoq gi, yhangmoq é hí má za, myoqdong ho é đông kut é a nghut é za, Hkrisduq é jùn pé su, Garai Gasang ô nau é hkyô lé, nungmoq é i-myit unghkaû mai châng kut nyi keq. ⁷ Byù lé za dojaú é đông a nghut é za, haû Yhumsîng lé dojaú nyi é đông le, shirông myit eq dojaú nyi keq. ⁸ Hkâsu mù gê le, jùn nghut nghut, luthkyô wó sù nghut nghut, ge é hkyô kut nyi é nghut jáng, haû Yhumsîng gi, yuq hkangmó lé shigyau râ nghut é lé, nungmoq sê nyi lhê.

⁹ Junsîng pé ê, nungmoq le, nungmoq é jùn pé lé haû eq rajung za kut byî nyi keq. Yhangmoq lé hkâkyuq zo kó; nungmoq sê é eq rajung za, yhangmoq eq nungmoq é Yhumsîng hpó gi, mauhkung htoq má nyi é nghut luí, Yhang gi, myoqdong hkyin é hkyô a bo é sù nghut lhê.

Garai Gasâng É Gye Hking

¹⁰ Ló htâng má, tai nau é hkyô gi, haû Yhumsîng eq Yhâng é hpungwup a-tsam mó má wum-o bo nyi keq.

11 Haû nat Tsadán wá dâ é hpaqchyî pé lé, nungmoq wó he-ngik pyám kó sháng gaq, haû Garai Gasâng é gyè hking banshoq lé wut to keq.

12 Hkâsu mù gâ le, nga-nhúng gi, gungsho eq sui lé htuo htíng é bang a nghut é za, haû uphkâng bang, ahkáng ayá wó bang, mauchut tuq dut é mingkan shi é a-tsam pé eq mauhkúng htoq tsáng myhâng mâ é agè ashop é byò eq sêng é wum-o pé lé, htuo htíng é bang ru nghut lhê.

13 Haû mù luî, Garai Gasâng é gyè hking banshoq lé wut to keq; haû hkûn sheq, nungmoq gi, agè ashop hkyô jé é buinyî má, yhumsíng jowò má wó yap gíng to mù, hkyô hkat hkingmó lé ban kut jáng, wó yap gíng túng nyî kó râ nghut lhê.

14 Haû mù, nungmoq é hpyidum má tengmán hkyô hpyihit hit mù, dingmán hkyô wànggò-long lé gò luî, 15 nungmoq é hkyî má gi, haû simsaq hkyô byî é gabú danglù hkô râ rì rì kut to mù, gíng gíng yap nyî keq.

16 Hau htoq agó, haû agè ashop su é myiduoq é myoshi lhunglhang lé wó sat ung pyám râ matú, lumjíng hkyô nghu é golong lé chung to keq.

17 Hkyi yù hkyô shamtoq muq lé tsúng to luî, Garai Gasâng é mungdang nghut é, haû Woi-nyî é shâm lé wun chûng keq.

18 Ahkyíng hkingmó má, kyûdung dang eq dúng tôngbán é dang ajung jûng èq, haû Woi-nyî má kyûdung nyî luî, machya

nyî uchyang, sân-yúng bang banshoq é matú, hkâ-nhám le, xoq xoq kyûdung byî nyî keq.

19 Haû gabú danglu é yanmai, shamtoq-tui hut huî é lagyo rayuq ngò nghut nyî kôlhang, haû gabú danglù nghut é zaú tô é hkyô lé, a gyuq a wàm wó taî kyo luî, 20 ngò taî râ dut é lé, a gyuq a wàm wó taî sân kyo shoq, ngá nhut hpóng hkingmó, ngò taî râ mungdang pé lé byi sháng gaq, ngá é matú le, kyû bo dung byî nyî keq.

Shi-kyám Dang

21 Haû Yhumsíng má, chyitdap é gumang eq lhumzuî é dui-nhâng zoshâng nghut sù, Tuhkiku gi, nungmoq lé jung hkingmó taî kyo râ nghut luî, ngò hkâsu nghut nyî é hkyô eq haî kut nyî é hkyô lé, nungmoq wó sé kó râ nghut lhê.

22 Ngamoq hkâsu nghut nyî é hkyô lé, nungmoq wó sé râ eq, yhang, nungmoq lé myit wum wó byi râ matú za myit myoqbyù luî, yhang lé, ngò, nungmoq chyáng nhang kat é nghut lhê.

23 Íwa Garai Gasang eq Yhumsíng Yesuq Hkrisduq chyáng mâ é lumjíng hkyô má bo é chyitdap myit eq nguingón hkyô gi, haû gumang wui chyáng ru joq nyî sháng gaq ô!

24 A dat htûm é chyitdap myit mai, nga-nhúng é Yhumsíng Yesuq Hkrisduq lé chyitdap é lhunglhang bang chyáng, Garai jeju gi, ru joq nyî sháng gaq ô!

HPILIFI Pê Chyang Hun Kat é Laiká (Philippians)

¹ Hkrisduq Yesuq é jùn nhik, Poluq eq Timohti gi, Hpilipi wà mó má nyi é, Yesuq Hkrisduq má sân-yúng bang lunglhang eq, hpúng-up, hpungte pé lé, dang kyô kat lhê.

² Nga-nhung é Îwa Garai Gasang eq Yhumsing Yesuq Hkrisduq chyang má é jeju eq nguingón hkyô gi, nungmoq chyang ru joq nyi shang gaq ô.

Jeju Hkya-ôn É Hkyô

³ Ngò gi, nungmoq lé myit bún kat hkangmó, ngá é Garai Gasang lé jeju hkya-ôn nyi lhê. ⁴ Ngò gi, kyûdung hkangmó, hkâ-nhâm le nungmoq banshoq bang é matú gabú myit eq dung byi nyi lhê.

⁵ Hkâsu mù gâ le, nungmoq gi, sân-hí nyi mai ahkuí jé shoq, gabú danglù má ngò eq chôm zùm yap nyi é yanmai nghut lhê. ⁶ Haû nungmoq má ge é muzó kut hi é sù Garai Gasang gi, Yesuq Hkrisduq é buinyi jé shoq muzó haû lé lhoq pán râ nghut lhê nghû, ngò hkyak myit lum tô lhê.

⁷ Nungmoq banshoq bang gi, ngá é i-myt má bo to bê bang nghut é yanmai, nungmoq banshoq bang eq séng luí, ngò shí dông myit nyi é gi, gíng lhê; hkâsu mù gâ le, ngò kyum hut huí tô é u lé le, haû gabú danglù hkyô lé taí hung

luí, lhoq gíng é u lé le, nungmoq gi, ngò eq rahá Garai Gasang jeju chôm hkâm yu é bang nghut lhê. ⁸ Hkrisduq Yesuq é chyitdap myit dông, nungmoq banshoq bang lé, ngò hkâ-í myit chyit nyi é hkyô lé, Garai Gasang gi, ngá é saksé nghut lhê.

⁹ Hau htoq agó, nungmoq gi, je ge é hkyô lé dat gam hkoq mù, Hkrisduq é buinyi má sanséng luí mara a bo é za, ¹⁰ Garai Gasang é hpungwup shingkang eq hkya-on kungtôn hkyo é matú, Yesuq Hkrisduq é yanmai lo é dingmán hkyo é ashi wó byíng nyi shang gaq nghû le; ¹¹ nungmoq é chyitdap myit gi, tengmán é hpaqchyí eq wó sê é nyan banshoq má je riyhang kô jat lò shang gaq nghû le, ngò kyûdung nyi lhê.

Dui Nyi Le Gi, Hkrisduq É Matú

¹² Gumang wuì ê, ahkuí ngò nungmoq lé sé nhâng nau é hkyô gi, ngò má haí dut lai lò bê hkyô pé gi, gè gè yhang gabú danglù ríng jat lò rá matú dut lò bê nghut ri. ¹³ Hau é yanmai, haû hkohkâm-wâng zúng é lunglhang bang eq gotú banshoq bang é hí má, Hkrisduq é yanmai ngò kyum hut huí é hkyô, de de dut htoq bê nghut ri. ¹⁴ Hau htoq agó, ngò htóng lúng é yanmai, haû Yhumsing Yesuq má gumang wuì nghut é myo mi-myo gi, myit wum wó yú kômù, Garai Gasang é mungdang lé, je riyhang a

gyuq a kyum wám hko kyo bekô nghut ri.

15 Gè gè yhang byù ra-am gi, Hkrisduq é hkyô lé manon é myit eq lú lhum bat zik é myit mai hko kyô nyi bum akô. Nghut kôlhang, byù ra-am gi, ge é myit mai hko kyô bum akô nghut ri. 16 Ge é myit mai hko é bang gi, gabú danglù lé húng râ matú ngo lé hkyin é hkyô lé, yhangmoq sé kômù, chyitdap myit èq hko kyô é bang nghut akô. 17 Haù góbang chyaú gi, sansêng é i-myit eq a nghut é za, ngò kyum wut é hkyô má wuîhke jamjau jat byi râ matú, myit nyi bùm kô é nghut mù luí, Hkrisduq é hkyô lé yhumsing é wuizat é dông za, hko taî nyi bum akô nghut ri. 18 Nghut kôlhang, haù gi, haî râ ri lú? Yhumsing wuizat é dông hko é nghut nghut, tengmán é dông hko é nghut nghut, hkyô hkat hkangmó má Hkrisduq é hkyô lé hko pyo kat é nghut mù luí, ngò gi, hau é yanmai, gabú nyi lhê.

Gè gè yhang, ru gabú nyi shirá nghut lhê. 19 Hkâsu mù gâ le, nungmoq kyûdung byi é eq Yesuq Hkrisduq é Woinyí garúm é yanmai, ngò má dut lai lò bê hkyô gi, ngò wó luthkyô dut râ nghut é lé ngò sê lhê. 20 Ngò myit láng tô é eq myit myoqbyù tô é má, ngò gi, hoq nó haî a râ é za, hí hkun lhê su, ahkuí le, dui nyi kôlhang, shi byuq kôlhang, gyuq kyum myit a bo é hkyô lé wó yû mù luí, Hkrisduq gi, ngá gûng má hkya-

on waq toq é hui râ nghut lhê. 21 Hkâsu mù gâ le, ngò, asak dui nyi le gi, Hkrisduq é matú, shî jáng gi, ngá e amyat nghut ri. 22 Nghut kôlhang, ngò gi, gungsho má rú dui nyi mù, ngò kut é muzó má ashi zuí lo é nghut le gi, hká lhum lé sheq hkyin yu le gè râ lú? 23 Ngò gi, hkyô í hkat gyoro má hká hpyang le a hkap dut tô ri; shi ló luí Hkrisduq eq rahá nyi râ lé gi, ngò ô nau ri, hkâsu mù gâ le, haù gi, je ge é hkyô nghut ri. 24 Nghut kôlhang, ngò gungsho má dui nyi le gi, nungmoq é matú akyû je bò râ nghut lhê. 25 Haù mù, ngò gi, shí hkyô lé hkyak myit lum to luí, lumjín hkyô má nungmoq kô jat lo é eq gabú nyi râ matú, nyi gyó luí, nungmoq lunglhang bang eq nyi nyi râ hkyô lé, ngò sê lhê. 26 Haù mù luí, ngò nungmoq chyáng dum jé lé é hkún, ngá é yanmai, Hkrisduq Yesuq má nungmoq é gabú hkyô gi, je riyhang jat lò râ nghut lhê.

27 Haî wà dut kôlhang, nungmoq gi, Hkrisduq é gabú danglù eq gingdán é dông nyiyap keq. Haù jáng, ngò, nungmoq chyáng jé mù huí lhúm é hkún nghut nghut, we gang lhum tô é hkún nghut nghut, nungmoq gi, woi-nyí ralhumm má za yap gîng to mù, haù gabú danglù lé lumjín hkyô má, i-myit rahkat zâ èq shikut nyi kô é hkyô lé le; 28 nungmoq gi, hká hkyô má nghut kôlhang, gyè pè èq kyuq zô é lé a gyuq

lò kô é hkyô lé le, ngò sé râ nghut lhê. Haû gi, yhangmoq é matú htên byoq hui râ kumlhá dut lò bê nghut lhê; nghut kôlhang, nungmoq gi, hkyi yù hui râ nghut lhê. Haû gi, Garai Gasang kut é nghut lhê. ²⁹ Hkâsu mù gâ le, Hkrisduq má wó lumjîng râ é jeju za a nghut, Yhang é matú wuîhke jamjau hui râ jeju le, nungmoq hkam yù bekô nghut ri. ³⁰ Haû gi, hí hpyang nungmoq ngò má myang wú é eq, ahkuí nungmoq ngá é hkyô lé wó gyô wú é, ngò hui zô é jamjau hkyô eq rajung za nghut nyi ri.

2

Yesuq, Myit Lhoq Nyhum É Hkyô

¹ Hkrisduq eq rading ralhum za nghut nyi é yanmai, myit wum byî é hkyô, Yhâng é chyitdap myit mai nhik tîng é hkyô, Woi-nyí eq zùm yap é hkyô, nú-nhâm é myit eq shogyo nhikmyîn é hkyô rajung jung lé, nungmoq wó yu é nghut le gi, ² nungmoq gi, haû i-myit huí é hkyô rahkat za, chyitdap myit rajung za, myit nhiklhum eq myit é hkyô má ralhum za kut nyi é dông, ngá é gabú hkyô lé, byíng jup nhâng keq. ³ Yhumsîng é wuizat é dông le, akôm gyáng pyâm é dông le, haî le a kut é za, myit lhoq nyhum nyi mù, góbang gi, nungmoq htoq má je gyaú lhê nghû myit yu nyi keq. ⁴ Nungmoq yuq hkangmó gi, yhumsîng eq sêng é lé za a

nghut, góbang eq sêng é lé le, myit byi râ lhê.

⁵ Hkrisduq Yesuq má bo é myit yhang, nungmoq chyáng bò râ dut lhê.

⁶ Yhang gi, Garai Gasang su roq za nghut nyi kôlhang, Garai Gasang eq rawuí za nghut é hkyô lé lú zing nyi râ matú a myit é za,

⁷ Yhânggùng lé lhoq gôm pyám luí, dui-nhâng zôshang é gunghkyâng lé yu chûng mù, xângzo byù gùng roq lé dut bê nghut ri.

⁸ Xângzo byù rayuq dông nghut nyi é hkûn, Yhânggùng lé Yhang lhoq nyhum pyám luí, haû tapzîng htoq má lháng tap sat pyâm é hui shoq jîno gyô ri.

⁹ Haû mù luí, Garai Gasang gi, Yesuq é myîng lé mauhkûng htoq mâ é hkyihput,

myidàm htoq mâ é hkyihput eq moming mâ é hkyihput hkangmó htuoq paí luí,

¹⁰ haû Íwa Garai Gasâng é hpungwup shîngkâng é matú, Yesuq Hkrisduq gi, Yhumsîng nghut lhê nghû, nhut shô hkangmó yín yù sháng gaq ga,

¹¹ myhang htâng é jowò má Yhang lé lhoq toq tô é eq, myîng lhunglhâng é htoq má gyaú é myîng haû,

Yhang lé byí to bê nghut ri.

Kyí Pé Su Duqbo Nyí Râ Hkyô

¹²Haû mù luí, ngò chyitdap é luzúm wuí ê, nungmoq gi, hkâ-nhám le jìno gyô nyi é eq rajung za, ngò, nungmoq eq rahá nyi é u lé su za a nghut, ngò eq wê gâng tô é hkûn le, nungmoq hkyi yù hui bê hkyô lé, gyai gyuq hkunggâ é myit eq je riyhang lhoq htoq nyí keq. ¹³Hkâsu mù gâ le, Garai Gasang gi, Yhang ô nau é hkyô lé, kut naú râ myit èq wó kut râ hkyô lé nungmoq má lhoq htoq byí nyi é sù nghut lhê.

¹⁴Haí kut kôlhang, taí put lhûm é dông, haû a nghut jáng, dang jet jet lhûm é dông hkâkut kó. ¹⁵Haû jáng sheq, myit goí é, agè ashop é pyat hkaú má, nungmoq gi, mara a bo é, sân-yúng é, shut hkyô a bo é, Garai Gasang é yhangzô pé dut kó râ nghut lhê. ¹⁶Hau htoq agó, nungmoq gi, asak mungdang lé chung htoq uchyang, mauhkûng mâ é kyí pé su, yhangmoq chyáng wó duqbo nyí kó râ nghut lhê. Haú hkûn, ngò gi, ajè a din pyâm é, a nghut jáng, muzó lé akôm a zui pyâm é yanmai, Hkrisduq é buinyi má gumrông jowò wó berâ nghut lhê. ¹⁷Nghut kôlhang, ngò gi, shuq jung hkungga* ralhum su, nungmoq é lumjínq myit mai nhongjaú

byí é shigu hkungga ahtoq má hut gyûn pyâm é hui le lháng, gabú luí, nungmoq banshoq bang eq rahá chôm gabú nyi lhê. ¹⁸Haû eq rajung za, nungmoq le gabú luí, ngò eq rahá chôm gabú nyi râ dut lhê.

Timohti Eq Epahprodi Njik Lé Nhang Kat Râ Gâ É Hkyô

¹⁹Ngò gi, nungmoq chyáng Timohti lé hân za wó nhang kat râ lé, haú Yhumsing Yesuq má myit myoqbyu nyi lhê; haú hkûn sheq, nungmoq eq sêng é ludang lé ngò wó sé jáng, ngò myit ngón râ nghut lhê. ²⁰Nungmoq é hkyô lé, yhang su hkyak za ge myit chiq byí é byù gotû rayuq le ngò a wó. ²¹Hkâsu mù gâ le, yuq du jup gi, Yesuq Hkrisduq eq sêng é hkyô lé a nghut é za, ó le ó eq sêng é hkyô lé za ho nyi bum akò nghut ri. ²²Yhang kúm gi, zo rayuq mai îwa lé htuqbâng é su, haú gabú danglù hkyô má ngò eq rahá dojaú é yanmai, yhang lumluq é hkyô tân shit é lé, nungmoq sê nyi lhê. ²³Haû mù luí, ngò gi, ngò má hkâsu dut râ lé sê é hkûn yhang, yhang lé nhang kat râ matú ngò myit myoqbyu nyi lhê. ²⁴Hau htoq agó, hkâ-myháng a myáng má, ngò yhang le nungmoq chyáng wó jé nhâng râ nghut lhê nghú, haú Yhumsing má hkyak lum nyi lhê.

* **2:17** Shuq jung hkungga gâ é gi, tsibiyiq wing ragóm lé myi htoq má hut pyâm é dông Garai lé gyuq hkunggâ é hkyô lé tân shit é nghut lhê. Bun zo shí má shí hkâm é hkyô lé taí nau é nghut lhê.

25 Nghut kôlhang, ngò gi, ngá é gumang hpó le nghut mù, mù zui luzúm eq sarhé luzúm nghut é, ngò râ é hkyô má wú gon byi râ matú nungmoq nhang kat é, nungmoq é gunglik le nghut é sù, Epahprodi lé nungmoq chyáng dum nhang taù kat byi râ lhê nghú, ngò myit hpyit to bê nghut lhê.

26 Hkâsu mù gâ le, yhang gi, nungmoq lhunglhang bang lé myàng nau nyi é za a nghut, yhang no é hkyô lé nungmoq wó gyo bekô nghut é yanmai, gyai yhang myit myo myit chiq nyi ri. 27 Gè gè yhang, yhang gi, aluq shoí shí shoq no pyâm é nghut lhê. Nghut kôlhang, Garai Gasang gi, yhang lé shogyo nhikmyîn yu ri; yhang lé baù a nghut, ngò yón htoq yón a dut nyi râ matú, ngo lé le shogyo nhikmyîn yu ri. 28 Haù mù luí, yhang lé nungmoq lhom dum myàng jáng, nungmoq myang gabú râ matú le, ngò yón é hkyô yom ló byuq râ matú le, yhang lé ngò hân hân nhang kat byí nau ri. 29 Nungmoq gi, gyai yhang gabú é myit èq, haù Yhumsing má yhang lé lhom hkûlum yù mù, yhang su dut é bang lé hkungga keq. 30 Hkâsu mù gâ le, yhang gi, ngo lé nungmoq a wó garúm é hkyô lé garúm râ matú, yhang é asak lé lhang a ha loshoq kut mù, haù Hkrisduq é muzó é yanmai, aluq shoí shoí shi é

hui zô ri.

3

Gungsho Má Lumhkaù Râ Hkyô A Joq

1 Hau htoq agó, ngá é gumang wui ê, haù Yhumsing má gabú nyi keq! Rajung zâ é hkyô lé, nungmoq é matú dum puq ká byi râ gi, ngò má wui é hkyô haì a joq, nungmoq é matú akyû dut râ matú sheq ru nghut lhê.

2 Haù, hkuí pé lé le; agè ashop é muzó jizó kut é bang lé le; gungsho yâm é bang lé le; sidiq nyi keq.* 3 Hkâsu mù gâ le, Garai Gasâng é Woinyí èq noqkuq é bang, Hkrisduq Yesuq má gabú gumrong nyi é bang, gungsho má a lumhkaù é bang, nga-nhung gi, ahpyo-kuq hpyit hkam yu é bang akying† nghut lhê. 4 Ngò kúm gi, gungsho má lumhkaù râ hkyô wó ang sù nghut lhê.

Góbang rayuq yuq, haù gungsho má lumhkaù râ hkyô wó âng lhê ga myit é nghut le gi, ngò gi, je riyhang wó sù nghut lhê. 5 Ngò gi, hkú lé é htàng shit nyi nghú râ nyi má ahpyo-kuq hpyit bê sù; Israelaq amyû mâ é, Benyamyin é awut ashín nghut sù, Hebre byù mâ é Hebre rayuq nghut lhê; jep é tarâ dông ga jang, ngò gi, Hparishe rayuq nghut lhê; 6 shirong é hkyô eq séng luí ga jang, ngò

* 3:2 Bun zo shi lhum gi, ahpyo-kuq hpyit hkyô má noqzuq nyi é bang lé taí nau é nghut lhê. † 3:3 Ahpyo-kuq hpyit hkam yu é bang akying gâ é gi, Garai Gasâng é yhangzo hkyak nghut bê bang lé gâ lhê.

gi, haû noqkuq hpúng lé zing-rî wú bê nghut lhê; jep é tarâ mâ é dingmán hkyô eq séng luî ga jang, ngò gi, shut é hkyô a bo wú sù nghut lhê.

⁷ Nghut kôlhang, ngá é amyat nghu é pé lhunglhang gi, ahkuî, Hkrisduq é yanmai sùm byuq é chyat nghut bê nghû myit yù bê nghut lhê.

⁸ Hau htoq agó, ngò gi, ngá é Yhumsîng Hkrisduq Yesuq lé wó sê é ko dik é jeju lé sôn kat jáng, jung hkanmó lé buzaq dông myit yù bê. Hkâsu mù gâ le, lhunglhang lé ngò tô pyâm é gi, Yhang é yanmai nghut lhê. ⁹ Ngò gi, Hkrisduq lé wó yû râ eq, Yhang eq rahá wó nghut nyî râ matú, haû jung hkanmó lé buzaq nghû myit yu pyâm bê. Garai Gasâng chyáng mai lo é dingmán hkyô lé ngò jep é tarâ dông wó ho yu é a nghut, Hkrisduq lé lumjîng é yanmai za wó yu é ru nghut lhê; haû gi, lumjîng myit mai wó é nghut lhê. ¹⁰ Ngò gi, Hkrisduq lé le, Yhang dui toq hkyô é hpungwup a-tsam lé le, Yhang hpuzô é hkyô má wó zùm yap râ lé le, Yhang shî hkâm é hkyô lé wó cháng râ lé le, sé nau ri. ¹¹ Haû jáng gi, ngò le, shi byuq bê mai dum dui toq é hkyô lé wó myoqbyù râ nghut lhê.

Myit Myoqbyu Tô É Jowò Shut Din Nyî Râ Hkyô

¹² Ngò gi, haû pé banshoq lé wó gû bê le a nghû naù, ngò gumjup gù bê le a nghû naù. Nghut kôlhang, Hkrisduq Yesuq gi, ngò lé lhom

yù bê eq rajung za, ngò gi, haû lé wó lhom yù sháng gaq nghû, châng hkat nyi lhê.

¹³ Gumang wui ê, ngò yhang ngò gi, haû lé wó hap yù bê nghû a myit; nghut kôlhang, ngò kut é muzó ralhum gi, nunghtáng mâ é lé tô-myhî pyám mù, myoq hí mâ é lé wó yû shoq nghû shikut luî, ¹⁴ Hkrisduq Yesuq má Garai Gasâng eq ngo lé ahtoq shut ji yu é chyunghuq lé wó yû râ matú, myoqbyu tô é jowò shut châng hkat din nyi lhê.

¹⁵ Gumjup bê bang nga-nhúng lhunglhang gi, haû sù é myit bò râ lhê. Rajung jung má nungmoq myit é hkyô shai nyi kô é nghut le gi, haû lé le, Garai Gasang gi, nungmoq lé san za tûn shit râ nghut lhê. ¹⁶ Hká dông nghut kôlhang, nga-nhúng gi, ahkuî jé shoq châng nyi bê hkyô eq rajung za châng kut nyi sháng.

¹⁷ Gumang wui ê, nungmoq gi, ngò kut é dông chôm kut nyi keq, ngamoq mai nungmoq lé kut shit é alik eq rajung za châng é bang lé wú yû keq. ¹⁸ Hkâsu mù gâ le, hí hkûn ngò, nungmoq lé anum num taî kyô wú luî, ahkuî lhang, ngaù byî eq dum taî kyô é eq rajung za, Hkrisduq é tapzîng lé gyè kut é bang myo myo nyi bum akô nghut ri. ¹⁹ Yhangmoq é jhtûm gi, htên byoq hkyô nghut ri; yhangmoq é garai gi, yhangmoq é wam dau nghut ri; yhangmoq é aróng gi, yhangmoq hoq hpu hkyô nghut ri. Yhangmoq é i-myit

gi, mingkan zè htoq má za nghut ri. ²⁰ Nghut kôlhang, nga-nhông é yhummau gi, mauhkông mingdán má nghut lhê. Nga-nhông gi, haú má é Yhumsing Yesuq Hkrisduq gâ é hkyi yù Sù lé, myoqbyu láng nyi é bang nghut lhê. ²¹ Yhang gi, jung hkangmó lé, Yhang uphkan é a-ô má wó kut tô é Yhông é a-tsâm eq nga-nhông é htên byoq sê é gungdu lé htaî lhik pyám byi luî, Yhông é hpungwup bo é gungdu su dut nhông rá nghut lhê.

4

¹ Haú mù luî, chyitdap é luzúm wuî le nghut mù, ngò chyitdap bún nghâm nyi é, ngá é gabú jowò eq janmaú nghut nyi é, ngá é gumang wuî ê, haú gi, Yhumsing má nungmoq hkâsu kut yap gîng nyi rá hkyô nghut lhê.

Lhoq Pun Lhoq Kyîng É Hkyô

² Ngò gi, Uodia eq Suntuki nhik lé, haú Yhumsing má rayuq eq rayuq myit huî lhâm nyi rá matú, gyai yhang pying kat lhê. ³ Ngá é mù wùn luzúm kyîng ê, ngò gi, myiwe shí nhik lé garúm yú laq nghû, nang lé le dúng tôngbán kat lhê; yhangnhik gi, Klemen eq le, asak jihpán laiká buk má mying bo é, ngá é mù wùn luzúm wuî góbang eq le, haú gabú danglù hkyô má ngò eq rahá gyai shikut wú bê sù nhik nghut lhê.

⁴ Haú Yhumsing má hkâ-nhâm le gabú nyi keq! Ngò

dum taî lhê, gabú nyi keq! ⁵ Nungmoq nú-nhâm é hkyô, byù banshoq bang lé sé nhông keq. Haú Yhumsing gi, chyáng bê nghut ri. ⁶ Haí eq séng luí le, myit hkâ-myo hkâchiq kó; hkyô hkangmó má jeju hkya-on uchyang, kyûdúng é eq dúng tôngbán é dông, nungmoq dúng é hkyô pé lé, Garai Gasang chyáng shit kyô nyi keq. ⁷ Haú hkûn, sé gyô é nyan banshoq htoq má gyaú é, Garai Gasang é nguingón hkyô gi, nungmoq é myit nhiklum eq nungmoq myit é hkyô lé, Hkrisduq Yesuq má upzúng byi nyi rá nghut lhê.

⁸ Jihtum má, gumang wuî ê, tengmán é, hpautap gíng é, dingmán é, sansêng é, wó chyitdap é, hkungga gíng é, haí má nghut kôlhang, aróng wó dik é hkyô rajung jung, a nghut jáng, hkya-on gíng é hkyô rajung jung bo é nghut le gi, haú sù é hkyô pé lé myit nyi keq. ⁹ Nungmoq gi, ngá chyáng mai wó mhoq hkam yù bê hkyô pé, wó gyo wó myang yù bê hkyô pé, haí lé le châng kut nyi keq. Haú hkûn, nguingón hkyô byi é Garai Gasang gi, nungmoq eq rahá nyi nyi rá nghut lhê.

Jeju Bùn É Hkyô

¹⁰ Ahkuî kúm gi, ngá é hkyô lé nungmoq dum myit chiq byi kô é yanmai, ngò gi, haú Yhumsing má gyai yhang gabú nyi lhê; gè gè yhang, nungmoq myit chiq byi nyi kôlhang, haú lé tûn shit rá ahkáng a wó kó nghut

ri. ¹¹ Ngò ìsu nghû taì nyi é gi, ngò má rã é hkyô bo tô é yanmai taì é a nghut, hkâsu mù gâ le, ngò gi, ngò hui mihui má, nhik dik nyi rã matú mhoq yû bê nghut lhê. ¹² Ra châ tô u lé, hkâsu kut rã ngò sê lhê; agùn agó wó u lé, hkâsu kut rã ngò sê lhê; hkyô hkangmó eq dut tô é ahkyo lhum jup má, wam gyi kôlhang, zòmút kôlhang, agùn agó wó tô nyi kôlhang, ra châ to kôlhang, myit dik nyi rã hpaqchyî lé ngò wó mhoq yû bê nghut lhê. ¹³ Ngò gi, ngo lé wum-o a-tsam byi sù Hkrisduq é yanmai, hkyô hkat hkangmó wó kut lhê.

¹⁴ Nghut kôlhang, ngò wuîhke jamjau huî nyi é hkûn, nungmoq garúm yû kô é gi, ge é hkyô kut bekô nghut ri. ¹⁵ Hau htoq agó, Hpilipi byu pé nungmoq sê é eq rajung za, haû gabú danglù lé, ngò hkô mù nungmoq wó gyô yu hi é buinyi pé má, ngò Makedoni mau mai htoq ló rã hkûn, haû byi é hkyô eq lhom yu é hkyô má, nungmoq mai lai luî, noqkuq hpúng gotû ralhum lhang, ngo lé garúm kat é hkyô a bo é nghut lhê. ¹⁶ Ngò Htesaloni wà mó má nyi tô é hkûn lé lhang, nungmoq gi, ngò ra châ é hkyô lé adàm dàm hûn byi bekô nghut ri. ¹⁷ Ngò gi, chyunghuq chyunghtang lé ho nyi é a nghut, nungmoq mai ashi je myo zuî jat rã matú lé za sheq ho nyi é nghut lhê. ¹⁸ Ngò gi, haî le gúm shoq myang yu é htoq

agó, chyân shoq lhang nghut bê. Ahkuî, haû nungmoq hun kat é chyunghuq lé, Epahprodi chyáng mai ngò lhom myang yû luî, ngò má agùn agó nghut nyi bê. Haû pé gi, namngón jung hkungga su, Garai Gasang lé gabú nhang é, hap yû gíng é hkungga ralhum nghut ri. ¹⁹ Ngá é Garai Gasang gi, Yhang agùn agó wó sùt nyi é eq rajung za, nungmoq rã é hkyô banshoq lé, Hkrisduq Yesuq má lhoq gúm lhoq jup byi rã nghut lhê.

²⁰ Hpungwup shingkang gi, nga-nhûng é Îwa Garai Gasang chyáng pyat dedu ahtum abyuq ru joq nyi sháng gaq ô! Amen.

Shi-kyâm Dang

²¹ Hkrisduq Yesuq má sân-yúng bê bang banshoq lé bo shi-kyâm byi keq. Ngò eq rahá nyi é gumang wuî gi, nungmoq lé shi-kyâm kat akô nghut ri. ²² Sân-yúng bang banshoq gi, nungmoq lé shi-kyâm kat akô; Kehtaq é yhûm mâ é sân-yúng bang gi, je riyhang shi-kyâm kat akô nghut ri. ²³ Yhumsîng Yesuq Hkrisduq é jeju gi, nungmoq banshoq bang eq rahá ru joq nyi sháng gaq ô!

KOLOSE Pê Chyáng Hun Kat é Laiká (Colossians)

1 Garai Gasâng eq hkyin yù mù, Hkrisduq Yesuq é lagyo dut sù, ngò Poluq eq nga-nhông é gumang Timohti gi, 2 Kolose wà mó má nyi bang nghut é, Hkrisduq má chyoiyúng bang nghut é, lhumzuí é gumang wui chyáng dang kyô kat lhê. Nga-nhông é Íwa Garai Gasâng chyáng mâ é jeju eq nguingón hkyô gi, nungmoq chyáng ru joq nyí sháng gaq.

Jeju Hkya-ôn É Eq Kyûdung É Dang

3 Ngamoq gi, nungmoq é matú kyûdung byí é hkûn, nga-nhông é Yhumsing Yesuq Hkrisduq é Íwa nghut é Garai Gasang lé ayang jeju hkya-ôn lhê. 4 Haí mù gâ le, Hkrisduq Yesuq má nungmoq lumjǐng hkyô eq Yhâng é sâ-n-yúng bang banshoq lé nungmoq chyitdap é hkyô lé, ngamoq wó gyô é yanmai nghut lhê. 5 Lumjǐng myit eq chyitdap myit haú gi, nungmoq é matú mauhkûng htoq má hkong to byí é myit myoqbyù hkyô* mai lo é nghut lhê. Myit myoqbyù hkyô haú lé gi, nungmoq chyáng jé to bê gabú danglù nghut é tengmán mungdang mai, nungmoq wó gyô to gû nghut

lhê. 6 Nungmoq gi, gabú danglù haú lé wó gyo luí, Garai Gasâng jeju eq sêng é tengmán hkyô lé sê hkyang é buinyi mai, nungmoq chyáng ashi zuí é eq kô myhang nyi bê nghut é eq rajung za, gabú danglù haú gi, mingkan gón má ge é ashi zuí nyi é eq kô myhang nyi bê nghut ri. 7 Nungmoq gi, haú hkyô lé, ngamoq é chyitdap byinzùm Epahpra chyáng mai mhoq yu é nghut lhê. Yhang gi, ngamoq é gunglik dông, Hkrisduq é lhumzuí é hpúng mù wùn sù nghut lhê. 8 Yhang gi, haú Woi-nyí eq nungmoq lé byí tô é chyitdap hkyô lé, ngamoq lé taí kyo sù le nghut ri.

9 Haú nghut é yanmai, ngamoq gi, nungmoq eq sêng é hkyô lé wó gyô é nyí mai, nungmoq é matú ayang kyûdung byí nyi lhê. Garai Gasang ô nau é hkyô lé sé rá hpaqchyí lé, woi-nyí eq sêng é hpaqchyí byéng-yá eq sê gyô é nyan banshoq dông mai nungmoq chyáng lhoq pyíng byi sháng gaq nghù, Yhâng chyáng kyûdung byí nyi lhê. 10 Haú su kut kyûdung byí é gi, haú Yhumsing ô nau é hkyô eq gingdán é dông nungmoq asak wó duí luí, hkyô hkangmó má Yhang lé wó gabú nhâng rá matú nghut lhê. Hau dông mai, nungmoq gi, ge é muzó hkangmó má ashi zuí nyi luí, Garai Gasang lé sê é hpaqchyí má kô myhang nyi

* 1:5 Bun zo shí má bo é myit myoqbyù hkyô gi, Yesuq lé taí é nghut lhê.

kó rã nghut lhê. ¹¹ Hau htoq agó, nungmoq gi, Yhâng é hpungwup a-tsam đông mai a-tsam banshoq èq wum-o lhoq kúng byí é huí nyi kó rã nghut lhê. Haú mù, nungmoq gi, gyai hkam jân é hkyô eq myit hing é hkyô lé, gabú myit mai wó yú kó rã nghut lhê. ¹² Maubó é mingdán má, sân-yúng bang eq sêng é muizè lé wó bo hkam yù rã matú, nungmoq lé gingdán nhang é sù haú Íwa lé le, jeju wó hkya-on kó rã nghut lhê. ¹³ Hkâsu mù gâ le, Íwa haú gi, nga-nhúng lé, mauchut èq up é hkaú mai hkyi htoq yú luí, Yhang chyitdap é Yhang Zô é mingdán má shuí hâng é Sù nghut lhê. ¹⁴ Nga-nhúng gi, haú Yhang Zo đông mai, hkyi xe yu é huí mù, yubak mara hkyut pyám byí é huí bê nghut lhê.

Jung Hkangmó É Ushuq, Hkrisduq

¹⁵ Hkrisduq gi, myoq èq a byu-myàng é Garai Gasâng é gungghyâng isâm nghut luí, zomún đông hpan tô é lhunglhâng htoq má gyaú é sù nghut ri. ¹⁶ Hkâsu mù gâ le, mauhkúng eq myigùng htoq má joq é azíng zê pé, myoq èq byu-myang é eq a byu-myang é pé nghut kôle, hkohkâm ayá pé, a-tsam pé, uphkâng bang, ahkáng ayá wó bang nghut kôle, lhunglháng gi, Yhâng èq hpan to huí é chyat nghut lhê. Lhunglháng gi, Yhâng é matú, Yhâng èq hpan to huí é chyat nghut ri. ¹⁷ Yhang gi,

lhunglhâng é hí mâ é nghut mù, lhunglháng gi, Yhâng é yanmai joq gíng bum é chyat nghut lhê. ¹⁸ Yhang gi, noqkuq hpúng nghu é gungdú é ulhum nghut ri; Yhang gi, jung hkangmó má gyaú dik é ushuq dut sháng gaq ga, sâng-hi awang nghut sù eq shi é bang mâ é hí dui toq é zomún dut sù nghut ri. ¹⁹ Hkâsu mù gâ le, Garai Gasang gi, Yhâng é byíng jup hkyô banshoq, Yhang Zo má joq nyi rã lé myit nguí ô nau é nghut mù, ²⁰ haú tapzíng má htoq byí é Yhang Zô é sui đông mai nguingón hkyô kut byí é èq, myigùng htoq mâ é azíng zê nghut nghut, mauhkúng mâ é azíng zê nghut nghut, lhunglháng lé, Yhang Zo đông mai, Yhang eq nguingón simsaq hkyô xoq yú bê nghut ri.

²¹ Nungmoq gi, Garai Gasang eq wê gâng é bang dut wú kôluí, nungmoq é agè ashop nyi yap sâmlâi é yanmai, nungmoq i-myt má, Yhâng é gyè dut wú bekô nghut lhê. ²² Nghut kôlhâng, ahkuí, Garai Gasang gi, nungmoq lé, rã é hkyô a bo é eq mara hún rã hkyô a bo é za, chyoiyúng é đông Yhâng é hí má shit rã matú, Hkrisduq é gungsho gungdu shí hkâm é đông, nungmoq eq nguingón simsaq hkyô xoq yú bê nghut ri. ²³ Haú gi, gabú danglù mai wó yu tô é myoqbyù hkyô mai a htot byuq é za, kô myhang nyi é eq gíngtíng nyi mù, nungmoq

é lumjínq hkyô má xoq nyi nyi é nghut jáng sheq dut râ nghut lâ. Gabú danglù shî gi, nungmoq wó gyô wú bê nghut é htoq agó, mauhkûng ô má hpan tô é jung hkanqmó lé hko kyô nyi bê nghut lâ. Ngò, Poluq le, gabú danglù hau é dui-nhâng zoshâng dut é nghut lâ.

*Noqkuq Hpúng É Matú
Poluq Wùn Waq É Hkyô*

²⁴ Ahkuî, ngò gi, nungmoq é matú jamjau huî é má gabú lâ; hau htoq agó, Hkrisduq é gungdu nghut é, noqkuq hpúng é matú, râ tô ashî nghut é, Yhang hpuzô é hkyô lé, ngá é gùng má ngò lhoq gumjup yu nyi lâ. ²⁵ Ngò gi, Garai Gasâng é mungdang lé, nungmoq chyáng gumjup shoq hko kyo râ matú, Garai Gasang, ngo lé hun tô é wò mai, noqkuq hpúng hau é mù wùn sù dut é nghut lâ.

²⁶ Mungdang haû gi, gohkûn mai apyat pyat haq tô gyó lo é zaú tô é hkyô nghut kôlhâng, ahkuî gi, haû sân-yúng bang lé hpông shit bê nghut ri. ²⁷ Garai Gasang, haû su kut é gi, zaú tô é hkyô hau é agùn agó hpungwup shingkang, tungbaù pè chyáng hkâsu nghut é hkyô, yhangmoq lé sé nhâng râ matú nghut lâ. Zaú tô é hkyô haû gi, hpungwup shingkang lé myoqbyù é hkyô nghut é, nungmoq má Hkrisduq dui nyi bê hkyô lé gâ é nghut lâ.

²⁸ Hkrisduq má gumjup é đông, byù yuq hkanqmó lé wó

shuî jé sháng gaq nghû, ngamoq gi, Hkrisduq é hkyô lé taí pyô luî, yuq hkanqmó lé, hpaqchyî byéng-yá banshoq èq taí pun taí kyíng é eq mhoqshit nyi é nghut lâ. ²⁹ Ngò, haû-í yhang wó wùn waq shikut é gi, ngò má wum-o a-tsam byíng byíng mù zuî nyi Su é wum-o banshoq èq wùn waq shikut nyi é ru nghut lâ.

2

¹ Ngò gi, nungmoq é matú le, Ladoki wà mó bâng é matú le, ngò eq myoqdong hkyûm a huî wú shî é bang banshoq é matú le, hkâ-í yhang awui ahke shikut nyi é hkyô lé, nungmoq lé sé nhâng nau ri. ² Haû su awui ahke shikut é hkyô gi, yhangmoq, myit má wum-o byí é huî râ eq chyitdap myit má rading ralhum za wó dut râ matú nghut lâ. Haû hkûn, yhangmoq gi, Garai Gasâng é zaú tô é hkyô nghut é, Hkrisduq lé wó sé râ matú, sê gyô é nyan lhunglhang é isut byíng shoq lé wó yû kó râ nghut lâ. ³ Haû Hkrisduq má kúm gi, hpaqchyî byéng-yá eq sumsé hpaqchyí gâ é sutzè lhunglhang lé tsíng tô ri.

⁴ Nungmoq lé ngò haû hkyô taí kyô é gi, ó yuq le, dang ngón dang ngui èq mhoq hpyoq é đông, nungmoq lé a wó mhaù zo râ matú nghut lâ. ⁵ Hkâsu mù gâ le, ngá gungdu nungmoq eq rahá a nyi kôlhâng, ngá é myit gi, nungmoq eq rahá nghut nyí luî, nungmoq shuq shuq

tap tap za nghut nyi kô é eq Hkrisduq lé lumjǐng é má hkâ-í gingtǐng nyi kô é lé myàng mù, ngò gabú nyi lê.

Hkrisduq Đông Mai Wó É Gumjup É Asak Duì Hkyô

⁶ Haù mù luì, nungmoq gi, Hkrisduq Yesuq lé Yhumsǐng nghû hap yù bekô nghut é eq rajung za, Yhang má asak xoq duì nyi keq. ⁷ Yhang má apùn amyit chín gǐng nyi mù, kô myhang lò luì, nungmoq mhoq yù bê eq rajung za, lumjǐng hkyô má wum-o lhoq kǐng mù, jeju hkya-ôn é hkyô byǐng zan nyi keq.

⁸ Hkrisduq chyáng mâ é a nghut é za, mingkan shi mâ é uphkáng tarâ pé eq xângzo wui é htungli cháng luì, mhaú zô é myit sòn hpaqchyì eq akyú a bo é dang đông, ó yuq èq le, nungmoq lé a wó shui nghoq yù kó sháng gaq, sidiq nyi keq.

⁹ Hkâsu mù gâ le, Garai Gasâng é gumjup hkyô banshoq gi, Hkrisduq é gungdu hkyangmân má lúng nyi mù, ¹⁰ nungmoq gi, a-tsam bo é banshoq eq ahkáng ayá wó é banshoq é ushuq nghut é Hkrisduq eq sêng é bang nghut kômù, gumjup é bang dut bekô nghut ri. ¹¹ Yhang má, nungmoq gi, byu loq èq kut é ahpyo-kuq hpyit hkyô đông a nghut é za, ahpyo-kuq hpyit é su, Hkrisduq eq yubak gungsho mara lé hkyut sêng

pyâm é hkyô lé hkam yù bekô nghut ri. ¹² Nungmoq gi, wui-myhup hkâm é hkùn Hkrisduq eq rahá myhup yhùm é hui bekô nghut mù, Yhang lé shi é mai lhoq duì toq yu é, Garai Gasâng é a-tsam lé nungmoq lumjǐng kô é yan-mai, Yhang eq rahá lhoq duì toq yu é hui bekô nghut ri.

¹³ Nungmoq é yubak mara pê é yanmai le, nungmoq é yubak gungsho mara lé hui sêng pyâm é a hkam yu é yanmai le, nungmoq shi tô é hkùn, Garai Gasang gi, nungmoq lé, Hkrisduq eq rahá asak duì nhâng bê nghut ri. Yhang gi, nga-nhùng é yubak mara lhunglhang lé hkyut pyám byi luì, ¹⁴ nga-nhùng eq shai lhum mù, nga-nhùng lé htuq htǐng é, tarâ pé bo é jéyáng râ jihpán lé hui sêng pyám byi bê nghut ri. Yhang gi, haù lé tapzǐng htoq má dok tap pyâm é đông yu pyám byi bê nghut lê.* ¹⁵ Haù đông mai, a-tsam bò bang eq ahkáng ayá wó bâng a-tsam lé lang hkyut hkyô pyám mù, Yhang gi, tapzǐng eq yhangmoq lé ung pyâm é đông, byù pê é hí má yhangmoq lé de de kut to bê nghut ri.

¹⁶ Haù mù luì, nàng haì zo haì shuq é yanmai le, noqkuq htung eq sêng é poì buinyì, Lhoxan Lhosik poì, Bánno buinyì eq séng luì le, nungmoq lé, ó yuq èq le a wó

* **2:14** Yhang gi, haù lé tapzǐng htoq má dok tap pyâm é đông yu pyám byi bê nghut lê gâ é gi, Hkrisduq tapzǐng má shi hkâm byi é hkùn, nga-nhùng é yubak mara banshoq lé, Garai Gasâng eq hkyut pyám byi é lé taí nau é nghut lê.

jéyáng kó sháng gaq. ¹⁷ Haú pé gi, dut lò râ hkyô pê é wupzo chyat nghut lhê; haú gùng gyíng gi, Hkrisduq yhang nghut nyi ri. ¹⁸ Myit lhoq nyhum mhaú é eq maumang lagyô pé lé noqkuq é lé myit nguì é sù ó yuq èq le, nungmoq lé, chyunghuq eq a gingdán râ đông hkâkut nhâng kó. Haú su é yuq gi, yhumsíng byu-myang é lét† za taí shikut mù, yhumsíng é gungsho myit mai, akôm yhang nghut é lé gyáng dang taí é sù nghut ri. ¹⁹ Yhang gi, Garai Gasang kô myhâng nhang é su, gungdu gón é gungsho showui showang pé eq shogyi pé lé htuqbang byi mù rahá láng tsing tô é haú ulhum nghut é Hkrisduq eq xox é hkyô lé byoq ló nhâng bê nghut ri.

²⁰⁻²¹ Nungmoq gi, Hkrisduq eq rahá, mingkan shî mã é tarâ pé eq shi gang bekô nghut le nhíng, haí mù, haú eq sêng lhum nyi ashî kó lú? "Hkâzui, hkâchyâm, hkâzáng." gâ é tarâ ô mã nyi nyi ashî kó lú? ²² Haú pé gi, waxâng zô wui é hkunmó pé eq mhoqshit hkyô pé nghut é yanmai, jai chung é hkûn, htên byuq râ chyat nghut lhê. ²³ Haú sù é tarâ pé gi, yhumsíng yhang noqkuq shikut é, myit lhoq nyhum mhaú é eq gungdu lé gunjâng é pé nghut luí, hpaqchyí byéng-yá bo é su dut kôlhang,

gungshô é agè ashop yut yut ô nau hkyô lé wó hkûm zing pyám râ má, hai akyû a bò nghut ri.

3

Chyoiyúng É Đông Asak Dui Râ Hkyô

¹ Haú mù luí, nungmoq gi, Hkrisduq eq rahá lhoq dui toq é hui bekô nghut jáng, Garai Gasâng é loqyo hkyam* má zung tô é Hkrisduq é jowò má joq é, ahtoq mâ é azíng zê pé lé myit ô nau nyi keq. ² Nungmoq gi, myidàm htoq mâ é azíng zê lé myit tuí é a nghut é za, ahtoq mâ é azíng zê lé myit tuí nyi keq. ³ Hkâsu mù gâ le, nungmoq gi, shî bekô nghut luí, ahkuí, nungmoq é asak gi, Hkrisduq eq rahá, Garai Gasang má haq tô é hui bekô nghut ri. ⁴ Nungmoq é asak nghut sù, Hkrisduq htoq shit é hkûn, nungmoq le, Yhang eq rahá, hpungwup shingkang hkaú má htoq shit kó râ nghut lhê.

⁵ Haú mù luí, nungmoq é mingkan hkyô eq sêng é, ashop é đông gungsho zùm yap é hkyô, agot a-û nyi zô lhûm é hkyô, ye lhai nau é hkyô, agè ashop yut yut ô nau é hkyô eq, hparà noq hkyô nghut é myoqnoq hkyô pé haí lé le sat pyám keq. ⁶ Haú hkyô pê é yanmai, Garai Gasâng é nhikmo-yo hkyô gi, jino a gyo bâng é ahtoq má† jé rá

† 2:18 Byu-myang é lé gâ é gi, yhang myit htoq é shing-rán lé gâ lhê. * 3:1 Loqyo

hkyam nghû é gi, ahko ahkáng wó é jowò lé gâ é nghut lhê. † 3:6 Jino a gyo bâng é ahtoq má, gâ é dang, chyúmding ra-am má a bò nghut lhê.

za nghut lhê. ⁷ Lai lò bê hkûn, nungmoq le, haú hkyô pé dông sô wú kô é nghut lhê. ⁸ Nghut kôhang, ahkuí, nungmoq gi, nhikjum yô é, nhikmo-yô é, agè ashop é dông nô shoq kut é, lumù gansang é eq, nungmoq é nhutwuí mai hkunchoq tai é hkyô shí pé banshoq lé, yhumsing gùng yhumsing tô pyám rà dut lhê. ⁹ Rayuq eq rayuq hkâ-mhaú lhum kó; hkâsu mù gâ le, nungmoq gi, nungmoq é byù xau eq byù xaú é nyí yap hkyô lé hkyut pyám mù, ¹⁰ byù sik lé tú wut yú kô é nghut lhê; byù sik haú gi, sumsé hpaqchyí dông mai, yhang lé hpân Su é gungdu isâm má asik jat lò nhang é huí nyi ri. ¹¹ Byù sik má gi, Grik eq Yudaq byù nghu é, ahpyo-kuq hpyit hkâm bang eq a hkâm bang nghu é, byù bíng eq byù jum nghu é, jùn eq jùn a nghut sù nghu é a nyí lô é za, Hkrisduq gi, banshoq nghut mù, banshoq má nyi nyi ri.

¹² Haú mù luí, Garai Gasâng eq hkyin yù huí é bang, Yhâng eq gyai yhang chyitdap é huí é chyoiyúng bang dông, shogyo myit, gè hkyô shit é myit, lhoq nyhum é myit, nú nhâm é myit eq myit hing é hkyô pé lé, yhumsing gùng yhumsing mebu su wut to keq. ¹³ Nungmoq yhangchang mara kut shut é hkyô joq é nghut jáng, hkam jan byí lhum luí, rayuq eq rayuq mara hkyut byí lhum keq. Haú Yhumsing

gi, nungmoq é mara hkyut pyám byí é su, nungmoq le mara hkyut byi keq. ¹⁴ Haú ge é sâmlai banshoq wó é htoq agó, gumjup é rading ralhum za dut é hkyô má, banshoq lé rahá wó tuí zing tô é chyitdap myit lé puq wut to keq.

¹⁵ Nungmoq gi, nguingón hkyô wó rà matú ji yu é hui bekô nghut mù, gungdu ralhum mã é bang chyat nghut bekô yanmai, Hkrisduq é nguingón hkyô lé, nungmoq é myit má up nhang nyí keq. Haú mù, jeju hkya-ôn nyí keq. ¹⁶ Nungmoq, rayuq eq rayuq, hpaqchyí byéng-yá banshoq eq mhoqshit é eq lhoq pun lhoq kyíng lhúm é hkûn le, Garai Gasang lé nungmoq jeju bûn é myit mai, jihkyang dang, hkya-on mahkôn, woi-nyí eq sêng é mahkôn pé hkon é hkûn le, haú Hkrisduq é mungdang lé, nungmoq é myit nhiklhum má agùn agó bò nhang nyí keq. ¹⁷ Nungmoq haí wá kut kut, dang dông nghut nghut, zui saí é dông nghut nghut, banshoq lé Yhumsing Yesuq é myíng mai kut é hkûn, haú Íwa nghut é Garai Gasang lé Yhang dông mai jeju hkya-on keq.

Hkristan Ikun Byu Pé Nyi Yap Râ Hkyô

¹⁸ Ikun myhí pé ê, ikun hpô pé uphkan é ahkaú má nyí keq. Haú gi, Yhumsing é hí má kut gíng é hkyô nghut lhê.

¹⁹ Ikun hpô pé ê, ikun myhí pé lé chyitdap nyí keq.

Yhangmoq lé dang htân hkâ-nyô kó.

²⁰ Zo wui ê, jung hkgangmó má nungmoq é mó wui é jìno gyo keq; hkâsu mù gà le, haû gi, Yhumsîng ô nau é hkyô nghut lhê.

²¹ Îwâ pé ê, nungmoq é zo wui lé myit hkâ-nô nhâng kó, nò nhâng jáng gi, yhangmoq, myit wum gyui byuq kó râ nghut lhê.

²² Jùn pé ê, hkyô hkgangmó má nungmoq é myidàm htoq mâ é jùn sîng bang uphkgang é ahkaû má nyi nyi keq; yhangmoq é myoq hí má za zui saí luí, myoqdong ho é đông a nghut é za, haû Yhumsîng lé gyuq hkunggâ é eq lhumzui é myit mai zui saí nyi keq. ²³ Nungmoq haí wá kut kôle, byu é matú kut é a nghut, haû Yhumsîng é matú kut nyi é đông, nungmoq é myit nhiklhum banshoq eq zui saí nyi keq. ²⁴ Haí mù gà le, nungmoq gi, haû Yhumsîng chyáng mai, muizè lé chyunghuq đông wó yû kó râ nghut é lé, sé kô é yanmai nghut lhê. Nungmoq dojaú nyi é sù gi, Yhumsîng Hkrisduq ru nghut lhê. ²⁵ Kut shut sù gi, yhang kut shut é marâ matú dam byi é hui zo râ nghut lhê, haí mù gà le, Garai Gasang gi, myoqdong hkyin é hkyô a joq.

4

¹ Jùn sîng bang ê, nungmoq é jùn pé lé, tengmán é eq gîng âng é đông lajang byi

nyi keq; haí mù gà le, nungmoq le, mauhkûng htoq má Yhumsîng rayuq wó é lé sé kô é yanmai nghut lhê.

Xoq Lui Pying Kat É Hkyô

² Nungmoq gi, kyûdûng é má myit zìng zuq nyi mù, machyâ luí, jeju hkya-ôn nyi keq. ³ Ngò, shamtoq-tui hut huí nyi shoq dut é, Hkrisduq é zaú tô é hkyô lé ngamoq wó taí pyô sháng gaq, Garai Gasang gi, mungdang lé ngamoq taí râ hkyô hkum hpóng byi râ matú kyû bo dung byi kó laq. ⁴ Haû Hkrisduq é zaú tô é hkyô lé, ngò taí âng é đông san za wó taí pyô sháng gaq, kyû bo dung byi kó laq. ⁵ Nungmoq gi, a lumjîng bang eq zùm yap é hkûn hpaqchyí bo nyi keq; wó yu é ahkyíng hkgangmó lé rago yhang chung jaí keq. ⁶ Nungmoq gi, yuq hkgangmó lé hkâsu tù taí râ hkyô wó sé kó shoq, dâng nyo é má, xô èq nghâm nhang é su, hkânhâm le jeju byíng é dang bo nyi sháng gaq.

Ló Htâng É Shi-kyám Dang

⁷ Tuhkiku gi, ngá hkyô eq sêng é danglù banshoq, nungmoq lé taí kyo râ nghut lhê. Yhang gi, ngá é chyitdap gumang, haû Yhumsîng má, lhumzui é hpúng mù wùn sù eq byinzùm nghut lhê. ⁸ Ngò, yhang lé nungmoq chyáng nhang kat é hkyô gi, ngamoq chyáng dut nyi é hkyô lé nungmoq wó sé râ eq, nungmoq lé myit wum wó byi râ matú nghut lhê.

⁹ Yhang gi, nungmoq chyáng mâ é nghut é, ngamoq é lhumzui chyitdap é gumang Onesimu eq rahá lé lo é nghut lhê. Yhangnhik gi, shî má dut nyi é hkyô jung hkanmó lé tai kyo kó rá nghut lhê.

¹⁰ Ngò eq rahá htóng lúng sù Aristakuq gi, nungmoq lé shi-kyâm kat ri. Barnaba é yhâng za-aû Markuq le, nungmoq lé shi-kyâm kat ri. (Markuq eq séng luî pying kat é hkyô lé nungmoq wó yù to bê nghut mù, nungmoq chyáng, yhang jé lé é nghut jáng, lhom hkûlum yù keq.) ¹¹ Yustu le gâ é Yesuq le, nungmoq lé shi-kyâm kat ri. Garai Gasâng é mingdán matú ngá é byinzùm mù zui bang má, haú bang za Yudaq byu pé nghut kômù, yhangmoq gi, ngo lé nhik títng byî é bang nghut akô. ¹² Nungmoq chyáng mâ é byù nghut sù eq Hkrisduq Yesuq é mù wùn sù, Epahpra gi, nungmoq lé shi-kyâm kat ri. Nungmoq gi, Garai Gasang ô nau é hkyô lhunglhang má hkyak lùm to mù, gumjup luî wó gíngtítng nyi sháng gaq ga, Yhang gi, ayang nungmoq é matú kyûdung shikut byî nyi ri. ¹³ Nungmoq é matú le, Ladoki wà mó eq Herapoli wà mó bâng é matú le, yhang gi, gyai yhang mù zui shikut byî é hkyô lé, yhang é matú ngò saksé hkâm lhê. ¹⁴ Ngamoq é chyitdap chi sará Lukaq eq Demaq gi, nungmoq lé shi-kyâm kat akô nghut ri. ¹⁵ Ladoki wà mó mâ é gumang wuì lé le, Numhpa

eq yhâng yhûm mâ é noqkuq hpúng lé le, bo shi-kyâm byi keq.

¹⁶ Laiká shî lé, nungmoq lé nghap kyô é htâng má, Ladoki byu pé é noqkuq hpúng má le nghap nhâng mù, Ladoki wà bâng chyáng hûn kat é laiká lé le, nungmoq nghap wú keq.

¹⁷ "Haù Yhumsing chyáng mai nàng hap yù to bê é muzó lé rago za lhoq pán pyám aq." nghù, Arhkipo lé tai kyo keq.

¹⁸ Ngò, Poluq gi, ngá é loq èq yhang shi-kyâm dang shî lé kê kat é nghut lhê. Ngò, shamtoq-tui wut tô é lé bûn nyi keq. Jeju gi, nungmoq chyáng ru joq nyi sháng gaq ô.

HTESALONI Pê Chyang Hî Dàm Hun Kat é Laiká (1 Thessalonians)

1 Ngò Poluq, Sila* eq Tim-
ohti pé gi, Îwa Garai Gasang
eq Yhumsîng Yesuq Hkrisduq
má nghut nyî bê bang, haû
Htesaloni wà mó byu pê é no-
qkuq hpúng lé dang kyô kat
lhê. Garaî jeju eq nguingón
hkyô gi, nungmoq chyáng ru
joq nyî sháng gaq.

Jeju Hkya-ôn É Hkyô

2 Ngamoq gi, hkâ-nhám
le, nungmoq banshoq bâng
é matú, Garaî Gasang lé
jeju hkya-on luí, ngamoq é
kyúdung dang má nungmoq
lé bo dúng lhôm nyî lhê.
3 Nungmoq é lumjîng myit
mai zui sâi é nungmoq é
muzó lé le; chyitdap myit
é yanmai, nungmoq shikut
é hkyô lé le; nga-nhûng é
Yhumsîng Yesuq Hkrisduq
má myit myoqbyu tô é
yanmai, nungmoq hkam jân
é hkyô lé le, nga-nhûng é
Îwa Garaî Gasâng é hí má,
ngamoq ru bûn nyî lhê.

4 Garaî Gasang chyitdap
é gumang wui ê, Yhang
nungmoq lé hkyin yù bê
lé, ngamoq sê lhê. 5 Hkâsu
mù gâ le, ngamoq é gabú
danglù gi, nhutdang dông
za nungmoq chyáng jé é a
nghut, wum-o a-tsam dông
le, Chyoiyúng Woi-nyí dông

le, tengmán hkyô byíng Jup
é dông le, jé bê nghut é
yanmai nghut lhê. Ngamoq,
nungmoq eq rahá nyi é hkûn,
nungmoq é matú hkâsu kut
lái lo é hkyô lé, nungmoq sé
gù nghut lhê. 6 Nungmoq
gi, wuîhke jamjau myo myo
hui zo kôlhang, Chyoiyúng
Woi-nyí byí é gabú myit mai,
danglù haû lé lhom yù kôluí,
ngamoq lé le, haû Yhumsîng
lé le, alik kut yu é bang dut
bekô nghut ri. 7 Haû mù,
Makedoni mau eq Ahkaia
mau mâ é lumjîng bang
banshoq é alik, nungmoq dut
bekô nghut ri. 8 Nungmoq
chyáng mai, Makedoni mau
eq Ahkaia mau má, haû
Yhumsîng é mungdang hû
htoq ló e za a nghut, Garaî
Gasang má nungmoq lumjîng
hkyô gi, jowò hkanmó jam
ló bê nghut luí, ngamoq
gi, haî le taí nó a ra lo
nghut ri. 9 Hkâsu mù gâ le,
ngamoq lé nungmoq hká
dông lhom hkulum yu é
hkyô lé, yhangmoq yhang,
ngamoq lé shit kyo akô.
Nungmoq gi, hparà lhô pé
lé tô pyám luí, Garaî Gasang
shut hkâsu kut lhing lò mù, rû
dui nyi é eq tengmán é Garaî
Gasang lé dojaú nyi é hkyô
lé le; 10 mauhkûng mâ é haû
Yhang Zo lé lánng nyi é hkyô
lé le, yhangmoq taí kyô akô.
Yhangzo haû gi, Yhang èq shi
é mai lhoq dui toq yu é hui
luí, jé lô râ nhikmó yo hkyô
mai nga-nhúng lé hkyi yù sù,
Yesuq nghut ri.

* 1:1 Sila lé gi, Salwanu le gâ lhê.

2

Poluq, Htesaloni Wà Mó Má Garaí Mú Wùn Waq É Hkyô

¹ Gumang wuì ê, nungmoq chyáng ngamoq lé kùm é hkyô gi, akôm a nghut é lé, nungmoq yhang sê lhê. ² Nungmoq sê é eq rajung za, ngamoq gi, hí hkùn, Hpilipi và mó má wuìhke jamjau eq rhoi é huì wú bê nghut lhê; nghut kôlhang, nga-nhông é Garaí Gasang garúm é yanmai, gyai lhom htuq htúng é hui kôle, Garaí Gasâng é gabú danglù lé, a gyuq a kyum nungmoq lé wám tai kyô é nghut lhê. ³ Hkâsu mù gà le, ngamoq lhoq pun lhoq kyíng é hkyô gi, shut é, a nghut jáng, a sansêng é i-myt đông eq nungmoq lé mhaù zô é đông a nghut e za, ⁴ haù gabú danglù lé chùng gíng é bang ga, Garaí Gasâng chyáng mai ahkáng wó é đông za, ngamoq tai é nghut lhê. Ngamoq gi, byu pé lé gabú nhâng rã matú a nghut, ngamoq é myit lé chyam wú nyi é Garaí Gasang lé, gabú nhâng rã matú shikut é ru nghut lhê. ⁵ Hkâsu mù gà le, nungmoq sê é eq rajung za, ngamoq gi, lhoq ngón mhaù é dang le hkâ-nhám a chùng wú, nghop tô é myoqnoq myit le hkâ-nhám a bò, Garaí Gasang gi, ngamoq é saksé nghut lhê. ⁶ Ngamoq gi, byu pé mai le, nungmoq mai le, gotú ó yuq mai le hkya-on rã lé ho nyi é a nghut, Hkrisduq é lgyô pé nghut é eq rajung

za, nungmoq lé wòlai hùn naù jáng wó hun lhê; nghut kôlhang, ⁷ ìnu rayuq, yhang é zoshâng zô pé lé hku baù é su, nungmoq chyáng nú-nhâm é đông nyi lai lò bê nghut lhê. ⁸ Ngamoq gi, nungmoq lé gyai yhang chyitdap lui, Garaí Gasâng é gabú danglù za a nghut, ngamoq é asak pé nungmoq lé byi pyâm le lhang nhik dik lhê; hkâsu mù gà le, nungmoq gi, ngamoq chyitdap dik é bang dut bekô nghut é yanmai nghut lhê. ⁹ Gumang wuì ê, nungmoq gi, ngamoq gyai yhang mù zui shikut é hkyô lé, gè gè bun kó rã nghut lhê; Garaí Gasâng é gabú danglù lé, nungmoq chyáng ngamoq hko kyô é u lé, ó yuq lé le, ngamoq mai wòlai a byi sháng gaq nghù, ngamoq gi, nyi lé, myin lé, mù zuì é nghut lhê.

¹⁰ Ngamoq gi, lumjíng bê bang nungmoq é hí má, hkâsu chyoiyúng é eq dingmán é, mara hùn rã a bo é bang dut lai lo é hkyô lé, nungmoq le, Garaí Gasang le, saksé nghut lhê. ¹¹ Hkâsu mù gà le, ngamoq gi, ìwa rayuq mai yhumsing yhangzô pé lé kut byi é su, nungmoq yuq hkangmó lé, myit wum byi nyi é hkyô lé le, nhik tai tít nyi é hkyô lé le, ¹² Yhang é mingdán eq hpungwup shingkang má, nungmoq lé wut yu é Garaí Gasang eq gingdán é đông, nungmoq asak wó dui nyi sháng gaq nghù, nungmoq lé wum byi nyi é hkyô lé le, nungmoq

yang sê nyi lê.

¹³ Ngamoq gi, ngamoq chyáng mai nungmoq wó gyó yu é Garai Gasâng é mungdang lé, nungmoq lhom yu é hkûn, byu é dang lé lhom yu é dông a nghut e za, lumjîng é bang nungmoq má mù zuî nyi é, haû Garai Gasâng é mungdang lé yang, lhom yù kô é yanmai, Garai Gasang lé xoq xoq jeju hkyâ-ôn nyi lê. ¹⁴ Gumang wuî ê, nungmoq gi, Hkrisduq Yesuq má nghut nyi é, Yuda mau má joq é Garai Gasâng é noqkuq hpûng pé lé, alik kut yu é bang dut bekô nghut ri. Noqkuq hpûng haû pé gi, Yudaq byu pé zing-rî é lé hui zô é su, nungmoq le, yhumsing mau mâ é byu pé zing-rî é lé hui zô akô nghut ri. ¹⁵ Yudaq byu pé gi, haû Yhumsîng Yesuq eq myiqhtoî pé lé sat pyám kôluî, ngamoq lé le hkat htoq akô. Yangmoq gi, Garai Gasang a ô nau é hkyô kut é bang, byù lhunglhang eq gyè dut é bang nghut akô. ¹⁶ Tûngbaù pé hkyi yù hui râ matú, ngamoq hko kyô é hkyô lé, yangmoq hkûm akô; yangmoq gi, hkâ-nhám le, yhumsing é mara lé dik shoq haû dông lhoq jat myô yù akô nghut ri. Haû mù, Garai Gasâng é nhikmo-yô é hkyô gi, yangmoq ahtoq má jé bê nghut ri.

Htesaloni Byu Pé Lé Poluq Huî Nau Nyi É Hkyô

¹⁷ Gumang wuî ê, ngamoq gi, rayoq zo nungmoq eq myoqdong byam gâng to kôle, myit gi, a gâng é nghut lê;

nungmoq lé gyai bun-nghâm nyi luî, wó myang hui shoq nghû, ngamoq gyai yang shikut nyi lê. ¹⁸ Nungmoq chyáng ngamoq jé lé nau mù luî, ngò Poluq yang, adàm dàm shikut wú bê; nghut kôlhang, Tsadán gi, ngamoq lé hkûm tang pyâm ri. ¹⁹ Hkâsu mù gâ le, nga-nhûng é Yhumsîng Yesuq Hkrisduq é hí má, Yang jé lé é hkûn, ngamoq é myit myoqbyù hkyô, gabú hkyô eq gumrông râ janmaù gi, haî jung wá nghut lê gâ le, nungmoq yang nghut nyi lê a nghut kó lú? ²⁰ Gè gè yang, nungmoq gi, ngamoq é gumrông jowò eq gabú hkyô nghut nyi ri.

3

¹ Haû mù luî, ngamoq gi, haû lé a wó jân nyi lo jáng, Ahten myuq má ngamoq baù nyi gyó le je gè râ nghut lê nghû, myit hpyit yù mù, ² wuîhke jamjau shí pé é yan-mai, ó yuq le, myit a hten kó sháng gaq nghû, nungmoq é lumjîng hkyô má, nungmoq lé wum-o byi râ eq myit wum byi râ matú, ³ Hkrisduq é gabú danglù lé hko kyô é hkyô má, ngamoq é gumang eq Garai Gasâng é mù wùn luzúm nghut é Timohti lé, nhang kat é nghut lê. Nga-nhúng gi, wuîhke jamjau pé huî zo râ matú, hkyin to huî é bang nghut é lé, nungmoq yang rago sê nyi lê. ⁴ Nga-nhúng gi, zing-ri hui zo râ nghut lê nghû, ngamoq, nungmoq eq rahá

nghut nyi é hkûn, noq mai nungmoq lé ngamoq taí kyô nyi gù nghut bê. Nungmoq rago sê é eq rajung za, haú dông dut bê nghut ri. ⁵ Hau é yanmai, ngò a wó jân nyi lo jáng, haú gunglaú sù mai nungmoq lé gunglaú yû luí, ngamoq wùn waq bê muzó gi, akôm dut byuq râ lé, myit chiq mù, nungmoq é lumjîng hkyô lé wó sé râ matú, yhang lé ngò nhang kat é nghut lhê. Gunglaú sù gi, nat Tsadán nghut lhê.

Timohti Lo Shit Kyô É Wum Byi Dang

⁶ Ahkuí kúm, Timohti gi, nungmoq é lumjîng hkyô eq chyitdap myit eq sêng é gabú danglù pé lé, nungmoq chyáng mai ngamoq chyáng wun jé lô byi bê nghut ri. Nungmoq, hkâ-nhám le, ngamoq lé rago bûn nyi é hkyô lé le; ngamoq, nungmoq lé myàng nau nyi é eq rajung za, nungmoq, ngamoq lé myàng nau nyi é hkyô lé le, yhang lo taí kyo bê nghut ri. ⁷ Haú mù luí, gumang wuì ê, ngamoq myit myo uhkýí é hkyô eq zîng-ri huí é hkyô pé banshoq má, nungmoq é lumjîng hkyo é yanmai, nungmoq eq séng luí myit wum byí é hkyô lé ngamoq wó yû bê nghut lhê. ⁸ Ahkuí, ngamoq gi, haú Yhumsîng má nungmoq yap gîng nyi kô é yanmai, gè gè nyi ngón bê nghut lhê. ⁹ Nga-nhûng é Garai Gasâng hí má, nungmoq é yanmai, ngamoq myang hkam yu é gabú hkyô banshoq lé myit kat wú jáng,

ngamoq gi, nungmoq é matú Garai Gasang lé hkâsu kut jeju ûng hkya-on râ lhú? ¹⁰ Ngamoq gi, nungmoq lé dum myàng râ matú eq, nungmoq é lumjîng myit má langhpyut é hkyô lé wó lhoq hkúm byi râ matú, nyi, myín, gyai yhang lhumzui luí kyûdûng nyi lhê.

¹¹ Nungmoq chyáng ngamoq lé râ matú, nga-nhûng é Yhumsîng Yesuq eq nga-nhûng é Íwa Garai Gasang yhang ngamoq lé hkyô hpóng byi sháng gaq. ¹² Nungmoq lé ngamoq chyitdap nyi é su, haú Yhumsîng gi, nungmoq é chyitdap myit lé, rayuq eq rayuq é ahtoq má le, yuq hkangmó é ahtoq má le, lhoq kô jat, lhoq pyíng byi sháng gaq. ¹³ Nga-nhûng é Yhumsîng Yesuq gi, Yhâng é chyoiyúng bang banshoq eq rahá lé é hkûn, nga-nhûng é Íwa Garai Gasâng é hí má, nungmoq gi, mara hûn jowò a joq é eq chyoiyúng é bang dut râ matú, nungmoq é myit nhiklhum má, haú Yhumsîng mai wum-o lhoq kíng byí nyi sháng gaq. Yhâng é chyoiyúng bang gâ é gi, byù lé, a nghut jáng, maumang lagyô pé lé, taí záng lhê.

4

Garai Gasang Ô Nau É Đông Asak Duì Râ Hkyô

¹ Xoq luí taí nau é gi, gumang wuì ê, ngamoq gi, ahkuí nungmoq cháng nyi é eq rajung za, nungmoq hká dông nyi yap luí, Garai

Gasang lé gabú nhâng rã hkyô nungmoq lé mhoqshit byi bê nghut lhê. Ahkuê le, ngamoq gi, shí hkyô lé nungmoq hau htoq je wó châng jat rã matú, Yhumsing Yesuq má nungmoq lé dùng tôngbán luí, myit wum byi kat lhê. ²Hkãsu mù gã le, nungmoq gi, haú Yhumsing Yesuq é ahko ahkáng dông, ngamoq mai, nungmoq lé mhoqshit to byí é hkyô pé lé, sê akô nghut ri.

³ Garai Gasang ô nau é hkyô gi, haú nungmoq sãnyúng é hui rã matú le, ashop é dông gungsho zùm yap é hkyô lé koi pyám rã matú le; ⁴ nungmoq yuq hkgangmó gi, haú Garai Gasang lé a sê é, a lumjìng bang kut é su, gungsho yut yut ô nau é hkyô a châng e za, ⁵ haú chyoyúng é eq hkungga gíng é sú wó dut shoq, yhumsing gùng lé wó hkgang é hkyô mhoq yú rã matú le; ⁶ shí hkyô eq séng luí, ó yuq le, yhumsing é gumang lé, a ge shut, a ge lhungzo rã matú le nghut lhê. Ngamoq, nungmoq lé taí kyo mù, lhoq pun lhoq kying gù nghut bê eq rajung za, haú Yhumsing gi, haú hkyô shut é banshoq lé, dam byi rã nghut lhê. ⁷ Hkãsu mù gã le, Garai Gasang gi, nga-nhúng lé a sãnyúng é bang dut rã matú wut yu é a nghut, chyoyúng é dông asak dui nyi rã matú sheq wut yu é ru nghut lhê. ⁸ Haú mù luí, mhoqshit hkyô shí lé he-ngik pyâm é sú gi, byù lé he-ngik é a nghut, haú nungmoq lé, Yhâng é Chy-

oyúng Woi-nyí byí tô é sù, Garai Gasang lé he-ngik pyâm é sheq ru nghut lhê.

⁹ Rayuq eq rayuq chyitdap lhum rã matú, nungmoq yhang, Garai Gasang eq mhoqshit é hui bekô nghut é yan-mai, gumang yhangchang chyitdap lhum é hkyô eq séng luí, ngamoq gi, nungmoq chyáng kã kat byi a ra lo nghut ri. ¹⁰ Haú eq rajung za, nungmoq gi, Makedoni mau gón mã é gumang wui banshoq lé chyitdap nyi akô nghut ri. Nghut kôlhang, gumang wui ê, haú su je myo kut rã matú nungmoq lé ngamoq wum byí lhê.

¹¹⁻¹² Nungmoq é nyí wui lhê é asak dui hkyô má, gotú byu pê eq hkunggã é wó yú luí, ó yuq lé le, lumhkaú a ra wó dut sháng gaq, hí hkũn nungmoq lé ngamoq taí kyô tô é eq rajung za, num num byù zè rã hkyô lé le, yhumsing eq a séng é hkyô a kut wún rã lé le, yhumsing loq eq zui saí mù nyi rã lé le, nungmoq é myit myoqbyù jowò kut yú keq.

Haú Yhumsing Gyó Lé Rã Hkyô

¹³ Gumang wui ê, myit myoqbyù hkyô a wó é byù góbang su, nungmoq, iyon ningtsáng a dut kó sháng gaq, haú yhup ngón byuq é bang eq séng luí, nungmoq a sé rã lé, ngamoq a ô nau é nghut lhê. Yhup ngón byuq é bang gã é gi, lumjìng luí shí ló byuq é bang lé gã é nghut lhê. ¹⁴ Hkãsu mù gã le, Yesuq shí luí, dum dui

toq bê hkyô lé nga-nhúng lumjǐng é yanmai, Garai Gasang gi, Yesuq má yhup ngón byuq é bang lé, Yesuq eq rahá shuí lé râ nghut lhê nghũ, nga-nhúng lumjǐng é nghut lhê. ¹⁵ Haũ Yhumsǐng taĩ é dang eq rajung za, nungmoq lé ngamoq taĩ kyo kôlé, haũ Yhumsǐng dum lé é hkũn, asak dui nyi é eq myit gyo tô é bang nga-nhúng gi, yhup ngón byuq bê bâng htoq ratsuí le wó hí râ a nghut. ¹⁶ Hkâsu mù gâ le, haũ Yhumsǐng yhang gi, htê mó hkunmó eq le, maumang lagyo mó é hte eq le, Garai Gasang é tutmó mut hte eq le, mauhkũng mai gyó lé lô luĩ, haũ Hkrisduq má shi lô bê bang hí dui toq râ nghut lhê. ¹⁷ Hau htâng, asak dui nyi é eq myit gyo tô é bang nga-nhúng gi, yhangmoq eq rahá mhut htoq má shuí toq yu é hui luĩ, maulat má haũ Yhumsǐng eq hui râ nghut lhê. Haũ hkũn, nga-nhúng gi, haũ Yhumsǐng eq ahtum abyuq nyi nyi berâ nghut lhê. ¹⁸ Haũ mù luĩ, nungmoq gi, dang shí pé mai rayuq eq rayuq myit wum byĩ lhũm nyi keq.

5

¹ Nghut kôlháng, gumang wui ê, ahkyǐng buinyi eq séng luĩ, nungmoq lé ngamoq kâ hũn byi a ra lo nghut ri. ² Hkâsu mù gâ le, haũ Yhumsǐng é buinyi gi, myín lé hkau sũ wang é su jé lé râ nghut é hkyô lé, nungmoq rago za sê akô nghut ri. Yhumsǐng

é buinyi gi, Yesuq dum jé lé râ buinyi lé taĩ nau é nghut lhê. ³ Byu pé gi, 'Nguingón yuqyo ri.' ga taĩ nyi bũm kô é u lé, gũng laĩ é myiwe rayuq zohkũ-nò no lo é su, htên byoq hkyô gi, byodàn tung yhangmoq chyáng jé luĩ, hká dõng lé yhangmoq wó hpang lut kó râ a nghut.

⁴ Nghut kôlháng, gumang wui ê, nungmoq gi, mauchut hkaũ má nyi é bang a nghut é yanmai, buinyi haũ gi, hkau sũ lé é su, nungmoq é matú byodàn tung dut râ a nghut. ⁵ Nungmoq lhunglháng bang gi, maubó é yhangzô pé eq nyi é yhangzô pé nghut lhê. Nga-nhúng gi, myín eq mauchut hkaũ eq sêng é bang a nghut. ⁶ Haũ mù luĩ, nga-nhúng gi, byù góbang su a yhup nyi e za, machyâ luĩ, gying gying kut nyi sháng. ⁷ Hkâsu mù gâ le, yhup é bang gi, myín lé yhup akô; î shuq wut é bang le, myín lé shuq wut akô. ⁸ Nghut kôlháng, nga-nhúng gi, nyi eq sêng lhê nghut é yanmai, gying gying kut nyi luĩ, lumjǐng myit eq chyitdap myit lé gi, wànggò-long lé su gò to, hkyi yù hui râ lé myit myoqbyù tô é hkyô lé gi, shamtoq-muq lé su tsung to, kut sháng. ⁹ Hkâsu mù gâ le, Garai Gasang gi, Yháng nhikmo-yô é hkyô lé hkâm zo râ matú, nga-nhúng lé hkyin tô é a nghut e za, nga-nhúng é Yhumsǐng Yesuq Hkrisduq mai, hkyi yù hkyô lé nga-nhúng wó yù râ matú hkyin to bê nghut lhê. ¹⁰ Yesuq

gi, nga-nhúng yhup bûn nyi kôlhang, yhup ngón to kôlhang, Yhang eq rahá wó nyi nyi sháng gaq ga, nga-nhúng é matú shí hkám byi bê nghut ri. ¹¹ Haû mù luí, nungmoq gi, ahkuí, nungmoq kut nyi é eq rajung za, rayuq eq rayuq myit wum byi lhum mù, htuqluq htuqbáng kut lhùm nyi keq.

Ló Htâng Lhê É Mhoqshit Hkyô

¹² Gumang wui ê, nungmoq mâ é muzó shikut luí, haû Yhumsing má nungmoq lé up nyi é eq lhoq pun lhoq kyíng nyi é bang lé, nungmoq hkungga râ matú le; ¹³ yhangmoq zui saí é muzó jizó é yanmai, yhangmoq lé chyitdap myit dông gyai yhang hkungga râ matú le, nungmoq lé ngamoq sang kat lhê. Nungmoq le, rayuq eq rayuq nguingón lhùm nyi keq. ¹⁴ Gumang wui ê, nungmoq lé ngamoq wum byi kat nau é gi, lagôn é bang lé lhoq pun lhoq kying keq; nhiknge é bang lé myit wum byi keq; wum nyhôm é bang lé htuqluq htuqbáng kut keq; yuq hkangmó lé, i-myt hîng byi nyi keq; ¹⁵ ó yuq lé nghut kôlhang, a ge é hkyo é yanmai, a ge é dông a taû kut râ lé lhoq pun lhoq kyíng nyi keq; nungmoq rayuq eq rayuq le, góbang banshoq eq le, shikut luí, hkâ-nhám le, ge é hkyô kut byi lhum nyi keq.

¹⁶ Hkâ-nhám le, ru gabú nyi keq; ¹⁷ abyit alan kyúdûng nyi keq; ¹⁸ hkyô hkat hkangmó

má jeju hkya-ôn nyi keq, hkâsu mù gâ le, haû pé gi, Hkrisduq Yesuq má, nungmoq é matú Garai Gasang ô nau é hkyô pé nghut lhê.

¹⁹ Haû Woi-nyí lé hkâlhoq jôm pyám kó; ²⁰ myiqhtoi htoí é lé, haí su a ngàm hkâkut kó. ²¹ Jung hkangmó lé, chyam wú luí, ge é hkyô lé zui zing nyi mù, ²² agè ashop é hkyô hkangmó lé, koi pyám keq.

²³ Nguingón hkyo é apûn awang nghut é Garai Gasang yhang, nungmoq lé, lhunglhang lhoq sân-yúng pyám byi sháng gaq; nga-nhúng é Yhumsing Yesuq Hkrisduq dum lé é hkûn, nungmoq é woi-nyí, myit nhiklhum, gungdu gi, mara hûn râ hkyô a bò sháng gaq. ²⁴ Nungmoq lé ji yu é Sû gi, lhumzui é Sû nghut lhê mù, Yhang, shí hkyô lé kut râ nghut lhê.

²⁵ Gumang wui ê, ngamoq é matú kyû bo dung byi kó laq. ²⁶ Gumang wui banshoq bang lé, chyoiyúng é chyitpuq puq é dông bo shi-kyám byi kó laq. ²⁷ Gumang wui banshoq bang lé, hun kat é laiká shí nghap kyo râ matú, haû Yhumsing é myíng mai, ngò, nungmoq lé pyíng kat lhê.

²⁸ Nga-nhúng é Yhumsing Yesuq Hkrisduq é jeju gi, nungmoq chyáng ru joq nyí sháng gaq ô!

HTESALONI Pê Chyáng Htang Dàm Hun Kat é Laiká (2 Thessalonians)

1 Ngò Poluq eq Sila, Timohti pé gi, nga-nhông é Íwa Garai Gasang eq Yhumsing Yesuq Hkrisduq má nghut nyi bê bang, haù Htesaloni wà mó byu pé é noqkuq hpúng lé dang kyô kat lhê.

2 Haù Íwa Garai Gasang eq Yhumsing Yesuq Hkrisduq chyáng mâ é jeju eq nguingón hkyô gi, nungmoq chyáng ru joq nyi sháng gaq ô!

Jeju Hkya-on É Eq Kyûdûng É Hkyô

3 Gumang wui ê, ngamoq gi, hkâ-nhám le, nungmoq é matú Garai Gasang lé jeju hkya-on râ dut ri; haù gi, gíng lhê; hkâsu mù gâ le, nungmoq é lumjíng myit gi, je je kô jat lo nyi lui, nungmoq yuq hkangmó é chyitdap myit le, rayuq eq rayuq é ahtoq má je myô jat lo nyi é yanmai nghut lhê. 4 Haù mù lui, ngamoq gi, nungmoq zing-ri huí é hkyô pé eq wuîhke jamjau huí é hkyô pé banshoq lé, nungmoq wó jân nyi kô é yanmai, nungmoq é hkam jan hkyô eq lumjíng hkyô lé, Garai Gasang é noqkuq hpúng pé é hí má gumrong nyi lhê.

5 Shí hkyô banshoq gi, haù Garai Gasang dingmán é đông jéyáng é hkyô lé saksé tûn

shit é nghut lhê; haù mù lui, nungmoq gi, Garai Gasang é mingdán é matú wuîhke jamjau hui zo bekô nghut é yanmai, mingdán haù eq gingdán é bang gâ é hui kó râ nghut lhê; 6 Garai Gasang gi, tengmán Sû nghut lhê; haù mù, nungmoq lé jamjau byi é bang lé, Yhang mai jamjau byi râ eq, 7 jamjau huí nyi é bang nungmoq lé le, ngamoq lé le lhoq lhut byi râ nghut lhê. Shí hkyô gi, haù Garai Gasang lé a sê é bang eq nga-nhông é Yhumsing Yesuq eq sêng é gabú danglù lé a gyo a châng é bang lé, jéyáng râ matú, 8 haù Yhumsing Yesuq, wum-o a-tsam byíng é Yhâng é maumang lagyô pé eq rahá, myishâm eq mauhkung mai htoq shit é hkûn, dut râ nghut lhê. 9 Yesuq jé lé lô mù, Yhâng é chyoiyúng bang má hpungwup shíngkang wó yu é eq lumjíng bang banshoq mai mauhong é huí é buinyi má, yhangmoq gi, htên byoq hkyô lé ahtum abyuq jéyáng é hui zo kó râ nghut lhê. 10 Hau htoq agó, haù Yhumsing é hí mai le, Yhâng é a-tsam kô làm é mai le, lhoq kâng pyâm é hui kó râ nghut lhê. Ngamoq é saksé dang lé nungmoq lumjíng bekô nghut é yanmai, haù lumjíng bang má nungmoq le lòm bekô nghut lhê.

11 Haù mù lui, nga-nhông é Garai Gasang gi, nungmoq lé, Yhang ji yu é hkyô eq gingdán ri ga râ le, haù Yhang é wum-o a-tsam mai, nungmoq myit tô é ge é hkyô hkangmó eq

nungmoq é lumjng myit eq sêng é muzó lhumjup lé, lhoq dik byi sháng gaq nghu le, nungmoq é matú, hkânám le, ngamoq kyûdung byi nyi lhê. ¹² Ngamoq haú su dung byi nyi é hkyô gi, nga-nhung é Garai Gasang eq Yhumsing Yesuq Hkrisduq é jeju yanmai, haú nga-nhung é Yhumsing Yesuq é mying gi, nungmoq má hkya-on waq toq é wó hui mù, nungmoq gi, Yhang má hkya-on waq toq é wó hui kó râ matú nghut lhê.

2

A Tara É Sû

¹ Gumang wui ê, haú nga-nhung é Yhumsing Yesuq Hkrisduq dum lé râ hkyô, Yhang eq nga-nhung rahá zup nyi to râ hkyô eq séng luí, nungmoq lé ngamoq pying kat nau é gi, ² haú Yhumsing é buinyi gi, jé to gù nghut bê gâ é myiqhtoi dang, luhkyang, laiká pé rajung jung, ngamoq chyáng mâ é nghut lhê ga nungmoq chyáng jé é nghut jáng, nungmoq é myit lui za hkâduí kó, hkâgyuq dàn kó. ³ Hkâsu mù gâ le, haú htên byoq é yhangzo nghut é a tarâ Sû htoq shit luí, haú gumlau toq é hkyô hí a htoq htoq gi, buinyi haú jé râ a nghut, haú mù luí, nungmoq lé, ó yuq èq, hká dông mai mhaú kôhang hkâjng kó. ⁴ Haú yuq gi, Garai ga noqkuq huí é zê lhunglhang lé htuq htng luí, haú pé banshoq é htoq má yhanggung yhang lhoq gyaú yû râ nghut lhê; haú mù luí,

Garai Gasâng é noqkuq yhâm má zung to luí, yhanggung yhang Garai Gasang nghut lhê ga taí râ nghut lhê.

⁵ Ngò gi, nungmoq eq rahá nyi tô é hkûn, shí hkyô pé lé lhaq taí kyo kyo kut é hkyô lé, nungmoq a bun lo kó lú? ⁶ Haú yuq gi, ahkying yamyoq jé jáng sheq htoq shit sháng gaq ga, ahkuí, yhang lé hai èq hkûm zing tô é hkyô lé, nungmoq sê lhê. ⁷ Haú a tara é hkyo é haq dá é a-tsam gi, mù zui nyi gù nghut bê; nghut kôhang, haú lé hkûm zing nyi sù gi, hui htot pyám huí é hkûn jé shoq, haú lé hkûm zing nyi shirâ nghut lhê. ⁸ Haú hui htot pyám huí é hkûn, a tarâ Sû htoq shit râ nghut lhê; haú Yhumsing Yesuq kúm gi, Yhang nhut mâ é soq èq yhang lé sat pyám râ eq, Yhang gyó lo u lhê é hpungwup mó èq, yhang lé lhoq htên pyám râ nghut lhê. ⁹ Haú a tarâ Sû lé lo é gi, Tsadán a-tsam dông laklaí kumhá pé, kumhá pé, mauhpo muzó pé ajung jung kut mhaú é eq, ¹⁰ htên byoq huí nyi é bang lé mhaú zo râ agè ashop é hkyô jung hkangmó lé tûn shit râ nghut lhê. Yhangmoq htên byoq é gi, haú tengmán hkyô lé chyitdap luí hkyi yù hui râ nghut é hkyô lé he-ngik pyám kô é yanmai nghut ri. ¹¹ Hau é yanmai, Garai Gasang gi, haú tengmán hkyô lé a lumjng e za agè ashop hkyô má ô nau é lhunglhang bang mara byi é hui kó sháng gaq ga, ¹² mhaú

é dang lé jing kó râ matú, a-tsam mó bo é lum shut râ hkyô lé, yhangmoq chyáng nhâng byi bê nghut ri.

Mhoqshit é hkyô má gîng nyi râ hkyô

¹³ Nghut kôlhang, haû Yhumsîng chyitdap é gumang wuì ê, ngamoq gi, hkâ-nhám le, nungmoq é matú Garai Gasang lé jeju hkya-on râ dut ri. Hkâsu mù gâ le, haû Woi-nyí eq lhoq sân-yúng nyi é muzó đông le, tengmán hkyô lé lumjing é đông le, hkyi yù hui râ matú, Garai Gasang gi, nungmoq lé, sânghi mai hkyin yù bê nghut ri. ¹⁴ Yhang gi, nga-nhûng é Yhumsîng Yesuq Hkrisduq é hpungwup shingkang má, nungmoq wó bo lôm shoq ga, ngamoq é gabú danglù đông nungmoq lé shí hkyô má jì yù bê nghut lê. ¹⁵ Haû mù luí, gumang wuì ê, nhutdang đông nghut nghut, laiká đông nghut nghut, nungmoq lé ngamoq lhai byí é mhoqshit hkyô lé zui gîng nyi luí, ging ging yap nyi keq.

¹⁶ Yhâng é jeju yanmai, nga-nhûng lé, ahtum abyuq é myit wum byi hkyô eq ge é myit myoqbyu hkyô lé byí é, nga-nhûng lé chyitdap é, nga-nhûng é Íwa Garai Gasang eq nga-nhûng é Yhumsîng Yesuq Hkrisduq gi, ¹⁷ nungmoq é i-myt má wum byi luí, ge é muzó eq ge é nhutdang lhumjup má, nungmoq lé wum-o lhoq kîng byi sháng gaq ô!

3

Kyû Dung Byi Râ Matú Lung Kat É Hkyô

¹ Gumang wuì ê, je htâng má pying kat nau é hkyô gi, nungmoq chyáng dut wú bê eq rajung za, haû Yhumsîng é mungdang gi, hân hân byo myín lô mù, lhoq gyaú é hui sháng gaq, ngamoq é matú kyû bo dung byi kó laq. ² Yuq hkangmó gi, lumjing myit bo é a nghut é yanmai, haû achayut agè ashop é byu pê chyáng mai ngamoq wó lut râ matú le, kyû bo dung byi kó laq. ³ Nghut kôlhang, haû Yhumsîng gi, lhumzui é sù nghut é yanmai, Yhang nungmoq lé wum-o lhoq kîng byi mù, haû agè ashop su chyáng mai nungmoq lé hung yù râ nghut lê. ⁴ Nungmoq gi, ngamoq pying tô é dang pé lé kut nyí mù, xoq luí le kut nyí râ nghut lê nghû, haû Yhumsîng má ngamoq hkyak myit lum tô lê. ⁵ Haû Yhumsîng gi, nungmoq lé Garai Gasang é chyitdap hkyô eq Hkrisduq é hkam jân é hkyô má, shuí wàng sháng gaq ô!

Mû Zui Shikut Râ É Hkyô

⁶ Gumang wuì ê, ngamoq gi, ngamoq chyáng mai nungmoq hap yù bê ngamoq mhoqshit é hkyô đông a nyi yap é eq lagôn é gumang ó yuq eq le, we we nyi keq nghû, haû Yhumsîng Yesuq Hkrisduq é myìng mai nungmoq lé hkunmó hkyô kat lê. ⁷ Hkâsu mù gâ le,

ngamoq kut é alik lé hká dông cháng râ dut é gi, nungmoq yhang sê lhê. Ngamoq gi, nungmoq eq rahá nyi tô é hkûn, lagôn é hkyô a bo wú é htoq agó, ⁸ ó yuq é zoshuq lé le, ngùn a byí é a zo wú é nghut lhê. Nungmoq má ó yuq lé le wòlai a byi sháng gaq nghû, ngamoq gi, muzó shikut hkyô eq wuîhke hkyô má, nyí lé, myín lé, zui sai é nghut lhê. ⁹ Ngamoq gi, nungmoq lé garúm nhâng râ ahkáng a wó é a nghut, yhumsing gùng lé nungmoq cháng râ matú alik dut sháng gaq nghû sheq, haû su kut é ru nghut lhê. ¹⁰ Hkâsu mù gâ le, ngamoq, nungmoq eq rahá nyi é hkûn, "Mû a kâm zui sù gi, a zo sháng gaq." nghû, nungmoq lé ngamoq mai sang to bê nghut lhê.

¹¹ Hkâsu mù gâ le, nungmoq chyáng mâ é byù ra-am lagon luí, haí mù le a zui e za, mù châng lhoq gyô byí wún akô gâ é hkyô lé, ngamoq wó gyô é yanmai nghut lhê. ¹² Ngamoq gi, haû su kut é bang lé, zim za nyi mù zui sai luí, yhumsing é zoshuq ho nyi kó sháng gaq nghû, haû Yhumsing Yesuq Hkrisduq é myìng lé lang luí, hkunmó hkyô kat mù, wum byí kat lhê. ¹³ Gumang wuì ê, nungmoq kúm gi, ge é muzó kut é hkyô má, hkâ-nhám le, hkâ-ngú byuq bùm kó.

¹⁴ Byù rayuq yuq gi, laiká shí má ngamoq mhoqshit é hkyô lé, a châng é nghut jáng, haú yuq lé rago chôm matsing

yù mù, yhang hoq bun sháng gaq, yhang eq hkâzûm yap kó. ¹⁵ Nghut kôhang, yhang lé gyè rayuq dông a sôn e za, gumang rayuq dông lhoq pun lhoq kyíng nyi keq.

Ló Htâng Lhê É Shi-kyám Dang

¹⁶ Haû nuingón hkyo é Yhumsing yhang gi, ahkyíng hkangmó eq hkyô hkat hkangmó má, nungmoq lé nuingón hkyô byí nyi sháng gaq. Haû Yhumsing gi, nungmoq banshoq bang eq ru nyi nyi sháng gaq.

¹⁷ Ngò, Poluq gi, ngá é loq mai yhang shi-kyám dang shí lé kê kat lhê; shí gi, ngò kê é laiká banshoq má kumlhá nghut lhê. Ngò kê é gi, shí dông chyat nghut lhê.

¹⁸ Nga-nhùng é Yhumsing Yesuq Hkrisduq é jeju gi, nungmoq banshoq bâng chyáng ru joq nyi sháng gaq ô!

TIMOHTI **Chyáng Hî Dàm Hun** **Kat é Laiká** **(1 Timothy)**

¹ Nga-nhùng é hkyi yù Sû Garai Gasang eq nga-nhùng é myit myoqbyù jang nghut é Hkrisduq Yesuq é hkunmó eq rajung za, Hkrisduq Yesuq é lagyo nghut sù, ngò Poluq gi, ² haù lumjínghkyô má ngá zo sîng nghut sù, Timohti lé dang kyô kat lhê; haù Íwa Garai Gasang eq nga-nhùng é Yhumsîng Hkrisduq Yesuq chyáng mâ é, jeju eq shogyo nhikmyin hkyô, nguingón hkyô gi, náng chyáng ru joq nyí sháng gaq ô.

Sará Pyoq Pé Lé Sidiq Râ Hkyô

³ Ngò, Makedoni mau má jé wang ló é hkùn, pying to hkô é eq rajung za, Ehpesu myuq má nyi to shi aq; haù hkùn sheq, nàng gi, shut shai é mhoqshit hkyô lé mhoqshit é bang a mhoq xoq lo râ matú le, ⁴ myit htoq mhô-myi dang eq a dat htúm é byù xik labau má yhangmoq a ap nóng râ matú le, haù bang lé hkunmó wó hkyó râ nghut lhê. Haù hkyô pé gi, lumjínghkyô myit mai kut htoq é Garai Gasâng é muzó lé lhoq htoq râ malai, mabyoq jishúm za sheq lhoq htoq nyi é nghut lhê. ⁵ Haù hkunmó hkyó luí myit myoqbyu tô é hkyô gi, chyitdap

myit yhang nghut ri; chyitdap myit haù gi, sansêng é i-myit, mara a bò bûn é myit eq lumjínghkyô myit akying mai lo é nghut lhê. ⁶ Byù ra-am gi, haù hkyô pé mai htoq ló kôluí, dangsôm taí é hkyô shut lhing ló byuq bekô nghut ri. ⁷ Haù bang gi, jep é tarâ sará pé dut naù kôlhang, yhangmoq haù taí nyi é hkyô lé le, hkyak, haù lé mhoqshit é hkyô lé le, a sé kó nghut ri.

⁸ Rayuq yuq, jep é tarâ lé rago chung é nghut jáng, jep é tarâ gi, ge é hkyô nghut é lé, nga-nhúng sê lhê. ⁹ Haù jep é tarâ gi, dingmán bâng é matú tô tô é a nghut e za, tarâ lu lai é bang eq gumlau toq bâng é matú, tarâ a hkunggâ é bang eq mara kut bâng é matú, a chyoiyúng é bang eq lumjínghkyô a cháng bâng é matú, yhangmoq é yhangwa lé nghut nghut, yhangnu lé nghut nghut, sat pyám bâng é matú, byù sat bâng é matú, ¹⁰ ashop é dông gungsho zùm yap é bang eq yuqgè yhangchang nyi zo lhum bâng é matú, jùn dông byù ung zo bang, mhaù é bang eq dakam mhaù bâng é matú, tengmán mhoqshit hkyô eq shai lhum é lhunglhang bâng é matú sheq, jep é tarâ tô tô é nghut é lé, nga-nhúng sê lhê. ¹¹ Tengmán mhoqshit hkyô haù gi, hkungsô wó é Garai Gasâng eq ngo lé ap byi bê nghut é, Yhâng é hpungwup bo é gabú danglù eq rajung za nghut ri.

Poluq Chyáng Yhumsing É

Jeju Joq Nyi É Hkyô

¹² Ngò gi, ngo lé wum-o byi é, nga-nhông é Yhumsing Hkrisduq Yesuq lé jeju hkyáon lhê; hkâsu mù gâ le, Yhang gi, ngo lé lhumzui sù rayuq dông sôn yù luí, Yhâng é muzó jizó má hkyin kat yu é yanmai nghut lhê. ¹³ Hí hkûn, ngò gi, Garai Gasang lé taí hpoi sù, zing-ri sù eq byù rhoí sù nghut wú kôlhang, a sé shi mù lumjín myit a bo e za kut é yanmai, shogyo nhikmyin yu é hkyô lé ngò wó yu é nghut lhê. ¹⁴ Nga-nhông é Yhumsing é jeju lé le, Hkrisduq Yesuq eq séng é lumjín myit eq chyitdap myit lé le, ngá chyáng agùn agó hut hkyô kat byi bê nghut ri.

¹⁵ Yubak dap bang lé hkyi yù râ matú, Hkrisduq Yesuq gi, mingkan má jé lé bê gâ é dang gi, lumjín é mungdang nghut luí, gè gè yhang lhom yù gín é dang nghut lhê. Haú yubak dap bang má, ngò gi, yubak je ko sù nghut é nghut lhê. ¹⁶ Nghut kôlhang, Hkrisduq Yesuq gi, Yhang lé lumjín luí ahtum abyuq é asak lé wó yù râ bâng é alik dut râ matú, yubak dap bang má yubak je ko sù nghut é, ngá é ahtoq má, Yhâng é hkam jan hkyô lunglhang wó tân shit sháng gaq ga, Garai Gasang gi, ngo lé shogyo nhikmyin yu ri. ¹⁷ Haú mù, haú aróng eq hpungwup shingkang gi, ahtum abyuq é, a dat htên byoq é, myoq eq a byu-myang é Hkohlkâm nghut sù, rayuq

zâ é Garai Gasang chyáng pyat dedu ahtum abyuq ru joq nyi sháng gaq ô! Amen.

¹⁸ Ngá zo Timohti ê, nàng eq séng luí myiqhtoi dang joq wú é eq rajung za, ngò gi, nang lé haú dông mhoqshit kat lhê; haú mù, nàng gi, haú pé lé chung nyi luí, ge é majan zan mù, ¹⁹ lumjín myit eq mara a bò bûn é myit bo nyi sháng gaq. Byù ra-am gi, haú hkyô pé lé he-ngik pyám kô é nghut luí, yhangmoq é lumjín myit gi, wui-sanghpo htên byoq ló é su htên byoq byuq bekô nghut ri. ²⁰ Haú bang má, Humenu eq Alesander le bò kômù, Garai Gasang lé taí hpoi é dang a taí râ matú mhoq yù kó sháng gaq nghû, ngò, yhangnhik lé Tsadán é loq má ap pyám bê nghut lhê.

2

Noqkuq Hkyô Eq Séng Luí Mhoqshit Byi É Hkyô

¹ Haú mù luí, ngò, hí pying kat nau é gi, tarâ hkunggâ é eq hkungga gín é hkyô banshoq má, nga-nhông wó ngu-ingón yuqyo nyi sháng gaq, hkohlkâm pé eq ahkáng ayá wó bang banshoq é matú le, ² yuq hkangmó é matú le, dúng tóngbán byi, kyûdung byi, dúng xoq byi, jeju hkyáon byi, kut aq nghû nau ri. ³ Haú gi, ge é hkyô nghut mù, nga-nhông é hkyi yù Sù Garai Gasang ô nau é hkyô nghut ri. ⁴ Yhang gi, byù lunglhang bang hkyi yu é

hui mù, tengmán é mung-dang lé sê gyo râ lé, ô nau nyi ri. ⁵ Hkâsu mù gâ le, Garai Gasang gi, rayuq za nghut luî, Garai Gasang eq byu é gyoro má sô xoq byi sù le rayuq za nghut lhê; haú yuq gi, xângzo byù nghut é Hkrisduq Yesuq nghut ri. ⁶ Yhang gi, byù lhunglhang bâng é matú shîltaí gunglik hkungga dông Yhânggùng lé byî pyám bê nghut ri; haú gi, ahkyíng yam-yoqjé é hkûn, saksé htoq shit bê nghut lhê. ⁷ Ngò gi, tûngbaù pé lé, tengmán é lumjíng hkyô mhoqshit râ matú, hkô kyo sù rayuq eq lagyo rayuq dông hkyin tô é hui sù nghut lhê. Ngò, haú su taí é gi, mhaú taí é a nghut, têng é hkyô lé za taí nyi é ru nghut lhê.

⁸ Yuqgè wuì gi, nhikjum yô é hkyô eq dang htíng htíng lhûm é hkyô a bo e za, jowò hkangmó má chyoiyúng é loq tû mù kyûdung râ lé, ngò ô nau ri.

⁹ Myiwe wuì gi, xâm nik nik é, hîng zè, palhé, hpaù jung mebù èq a mhôn chung e za, siri bo é mebu wut chûng mù, tap tap za, shuq shuq za kut luî, ¹⁰ Garai Gasang lé noqkuq é myiwe wuì eq gíng shoq, ge é muzó èq yhumsing gùng lé mhôn nyi râ lé le, ngò ô nau ri.

¹¹ Myiwe gi, uphkang tô é dông châng nyi mù, zim za mhoq yû kó sháng gaq. ¹² Myiwe gi, yuqgè lé mhoqshit râ hkyô lé le, yuqgè lé

uphkang râ hkyô lé le, ngò ahkáng a byi; myiwe gi, zim za kut nyi ra râ nghut lhê. ¹³ Hkâsu mù gâ le, Adam lé hí hpan to mù, Ewaq lé hpan é ru nghut lhê. ¹⁴ Hau htoq agó, Adam gi, mhaú é hui zo sù a nghut; haú myiwe sheq mhaú é hui zo luî, mara kut shut é ru nghut lhê. ¹⁵ Nghut kôlhang, myiwe wuì gi, lumjíng myit, chyitdap myit eq chyoiyúng hkyô má, shuq shuq za kut mù, yhang-moq xoq châng nyi kô é nghut jáng, zoshâng hku é dông mai hkyi yu é hui kó râ nghut lhê.*

3

Hpúng-up Eq Hpungtê Kut Râ Bâng É Hkyô

¹ Rayuq yuq, hpúng-up ayá lé ô nau nyi é nghut jáng, haú yuq gi, aróng wó é muzó lé ô nau nyi ri gâ é dang gi, lumgíng é dang nghut nyi ri. ² Haú mù luî, hpúng-up rayuq gi, mara hûn râ hkyô a bo é sù, myiwe rayuq za wó é sù, dat sidiq é sù, yhumsing gùng lé wó hkang é sù, hkungga gíng é sù, byù bíng lé dat hku-lum é sù, dat mhoqshit é sù, ³ îhpé é jùn a dut é sù, byoq lhum byoq cheq a kut e za nûm é sù, mabyoq jishûm a lhoq htoq é sù, ngunzè lé a chyitdap é sù, nghut râ lhê. ⁴ Yhang gi, yhâng é ikun lé rago dat uphkang luî, yhang zô pé mai hkungga myit bo é èq yhâng dang lé gyo byî é sù le, nghut râ lhê. ⁵ Rayuq yuq, yhumsing é ikun lé lhang

a dat uphkanq é nghut le gi, Garai Gasâng é noqkuq hpúng lé gi, hkâsu kut wó wú gon râ lúh? ⁶ Chángzo dut é a myáng shi é sù gi, hpúng-up wó kut râ a nghut, kut é nghut jáng, yhang gi, nghutbùn lò luí, jéyáng é hkyô lé nat Tsadán hui zô é su hui zo abe. ⁷ Hpúng-up rayuq gi, tûngbaù pè hí má ge é myìng wó é sù le dut râ lhê; haù jáng, yhang gi, taí hpoí pyâm é lé le a hui, nat Tsadán é tuihkyó má le a myí, dut râ nghut lhê.

⁸ Haù eq rajung za, hpungtê pé gi, hkungga gíng é bang, shô-kó a xân é bang, îhpê é jùn a dut é bang, a tengmán é amyat lé a ho é bang, nghut râ lhê. ⁹ Yhangmoq gi, lumjínq hkyô mâ é nik é mauhpo tengmán hkyô pé lé, sansêng é i-myt eq châng nyi ra râ nghut lhê. ¹⁰ Yhangmoq gi, chyam é lé hí huí wú kó sháng gaq, hau htâng, yhangmoq lé mara hûn râ hkyô haí a bò lo jáng, hpungtê mù lé wùn kó sháng gaq.

¹¹ Haù eq rajung za, yhangmoq é yhumsîng myhî pé le, myit no nhang é dang a taí e za, dat sidiq é eq hkyô hkanqmó má lumgínq luí, hkungga gíng é myiwe wui, nghut ra râ dut lhê.

¹² Hpungtê rayuq gi, myiwe rayuq za wó é sù, yhangzô pé eq yhâng ikun lé rago za dat wùn waq é sù, dut ra râ nghut lhê. ¹³ Hpungtê mù lé rago za wùn waq bê bang gi, yhumsîng é matú aróng lé le,

Hkrisduq Yesuqlé yhangmoq lumjínq hkyô má, gyuq kyum é hkyô a bo é myit mó lé le, hkyak wó yu akô nghut ri.

¹⁴ Ngò gi, hkâ-myháng a myáng má náng chyáng lé jé râ matú, myit myoqbyu to kôlháng, ahkyíng du myáng pyâm le, ¹⁵ Garai Gasâng é ikun hkaù má, byu pé hká dông nyi yap râ é hkyô lé, nàng sé sháng gaq nghù, pying kat é dang shi pé lé ká byí kat lhê; ikun haù gi, rû dui nyi é Garai Gasâng é noqkuq hpúng nghut luí, tengmán hkyo é hkungmó-zîng eq apûn awang nghut ri. ¹⁶ Tarâ hkungga hkyo é zaù tô é hkyô gi, ko dik é nghut é lé, ó yuq le wó he-ngik pyâm é a nghut;

haù gi, Yhang, byù gungsho má htoq shit mù, haù Woi-nyí mai Yhang lé saksé hkám byi luí, maumang lagyô pé gi, Yhang lé myàng bê nghut ri;

byuhú ahú hú má Yhâng é hkyô lé hko kyo mù, Yhang lé mingkan byu pé lumjínq luí, hpungwup shíngkang eq Yhang lé mauhkûng shut shuí toq yû bê nghut ri.

4

Timohti Lé Mhoqshit É Hkyô

¹ Jihtûm buinyi pé má, byù ra-am gi, lumjínq hkyô mai htak htoq ló luí, mhaù zô é woi-nyí pè htâng cháng kó râ

eq nat gang mai lo é mhoqshit hkyô pé lé gyo byi kó râ nghut lâ ga, haú Woi-nyí gi, san za taí ri. ² Haú sù é mhoqshit hkyô pé gi, gegùn labyoq kut é byù-mhaú pè chyáng mai lo é nghut lâ; haú bâng é myit nhiklum gi, nyhê nhe tô é shamtoq èq nyhê man tô é su dut byuq bê nghut ri. ³ Haú bang gi, hâng lhum é hkyô lé hkâm tang é hkyô lé le, haú lumjîng luí tengmán hkyô lé sê é bang mai jeju hkya-on mù hap yù ge é, Garai Gasang hpan to byí é zoshuq lé koi pyám nhang é le, kut akò nghut ri. ⁴ Garai Gasang hpan tô é lhunglhang gi, ge é chyat nghut ri; Garai Gasang é mungdang eq kyûdûng é dang dông haú pé lé lhoq sân-yúng nyi é nghut é yanmai, ⁵ jeju hkya-on luí hap yu é nghut le gi, haí jung lé lhang he-ngik pyám râ hkyô a bò nghut ri.

⁶ Haú gumang wui lé, nàng haú hkyô pé lhoq pun lhoq kyîng é nghut le gi, nàng gi, haú nàng cháng bê ge é mhoqshit hkyô eq lumjîng hkyô mâ é tengmán hkyô má, kô myhâng sù nàng nghut râ htoq agó, Hkrisduq Yesuq é ge é hpungmû wùn sù le dut râ nghut lâ. ⁷ Garai a bo é myit htoq mhô-myi dang eq hpô-myhí mâng pè é mhô-myi dangsôm lé koi pyám luí, tarâ hkunggâ é hkyô má yhumsing gûng lé lhoq kûng yù aq. ⁸ Hkâsu mù gâ le, gungsho lé lhoq kûng é hkyô gi, akyû shau za htoq é

nghut lâ; nghut kôlhang, tarâ hkunggâ é hkyô kúm gi, jung hkangmó é matú akyû bo lâ nghut mù luí, shí ipyat má le, htang pyat má le, akyû bo nyi ri.

⁹ Haú gi, banshoq hap yù gîng é, lumgîng é mungdang nghut lâ. ¹⁰ Haú mù luí, xângzo byù banshoq bâng é hkyi yù Sù nghut é, je riy-hang, lumjîng bâng é hkyi yù Sù nghut é, rû dui nyi é Garai Gasang má, nga-nhúng, myit myoqbyu to bê nghut é yanmai, nga-nhúng gi, gyai yhang shikut nyi lâ.

¹¹ Haú pé lé, hkunmó hkyó luí mhoqshit byí nyi aq. ¹² Náng é zorâm pyat lé, ó yuq èq le a wú tiq pyám sháng gaq, dang taí é má le, nyi yap é hkyô má le, chyitdap é hkyô má le, lumjîng hkyô má le, sansêng é hkyô má le, lumjîng bâng é matú alik kut shit nyi aq. ¹³ Náng chyáng ngò jé lé é buinyi jé shoq, nàng gi, Chyúmdang nghap kyô é má le, hko kyô é má le, mhoqshit é má le, ap nóng nyi aq. ¹⁴ Nàng gi, hpúng suwún wui náng é ahtoq má loq ke byí é hkûn, myiqhtoi dang dông nang lé Garai Gasang byí to bê nghut é, woi-nyí hkyô eq sêng é chyunghuq lé, haí su a ngàm hkâkut pyám.

¹⁵ Haú hkyô pé lé, myit zîng zuq luí zui saí nyi aq; nàng kô myhang lo é hkyô lé, yuq hkangmó byu-myàng kó sháng gaq, náng gûng banshoq haú pé má ap nóng nyi aq. ¹⁶ Náng é asak dui hkyô

má le, nàng mhoqshit é hkyô má le, rago sidiq nyi aq. Háu pé má ru gîng nyi aq, hkâsu mù gâ le, nàng haû su kut é nghut jáng, nàng é asak lé le, nàng chyáng mai gyô yu é bang lé le, nàng wó hkyi yù rà nghut lhê.

5

Suwún Wuì, Chuimó Pé, Jùn Pé Eq Séng Luí Hpaqchyí Byí É Hkyô

¹ Asak ko sù lé dang htân a tân e za, yhumsing é îwa lé su, yhang lé lhoq pun lhoq kying aq. Zorâm wuì lé gi, gumang wuì lé su, ² asak kô é myiwe wuì lé gi, înu pé lé su zùm yap luí, zomyi wuì lé gi, nhammó wuì lé su sansêng é i-myt banshoq èq zùm yap nyi aq.

³ Gè gè yhang garúm rà dut é chuimó myhí pé lé, hkunggâ nyi keq. ⁴ Nghut kôlhang, chuimó myhí rayuq yuq gi, zoshâng nghut nghut, gashu nghut nghut, wó é nghut jáng, háu bang gi, yhumsing é ikun lé wú gon luí, înu îwa eq íchýí îwhoí pé lé jeju taû é dông, yhangmoq é lumjîng hkyô lé, zui saí é má lhoq mhán nhâng rà lé hí mhoq yû ra rà nghut lhê; hkâsu mù gâ le, haû gi, Garai Gasang ô nau é hkyô nghut ri. ⁵ Háu lùm rà ó yuq le a wó mù, gè gè yhang rà tô é chuimó myhí gi, Garai Gasâng chyáng myit myoqbyu nyi luí, nyí, myín xoq xoq kyûdung mù, Garai Gasang garúm rà hkyô lé

dûng nyi ri. ⁶ Nghut kôlhang, ngón hkyô za cháng luí asak dui é chuimó myhí gi, asak dui nyi kôlhang, shî gù nghut bê nghut ri. ⁷ Yhangmoq lé, ó yuq èq le mara a hûn kó sháng gaq, háu hkyô pé lé le mhoqshit byí nyi aq. ⁸ Rayuq yuq, yhâng é buinùm ji-myi wuì lé a baú é htoq agó, je luí yhumsing é ikun byù lé a baú é nghut le gi, haû lumjîng hkyô lé he-ngik pyám bê nghut luí, a lumjîng su htoq má je ashop é sù dut bê nghut ri.

⁹ Hkyuq xê zàn byíng bê é chuimó myhí za a nghut jáng, chuimó jihpán má wó kat rà a nghut; hau htoq agó, yhang gi, yuqgè rayuq za wó wú é sù; ¹⁰ zoshâng wuì lé hku baú é sù, bíng lé rago dat hku-lum é sù, sân-yúng bê bang é hkyí lé chi byí é sù, wuîhke huí tô é bang lé garúm luí, ge é muzó junghkangjungmó má yhumsing gùng yhang ap nóng nyi ri ga, yhang kut é ge é muzó má myíng hú é sù le, nghut rà lhê.

¹¹ Asak tiq é chuimó myhí pé lé, jihpán háu má hkâkat. Hkâsu mù gâ le, gungsho ô nau é hkyo èq Hkrisduq chyáng yhangmoq ap nóng tô é hkyô lé ung pyâm é hkûn, yhangmoq gi, myi ló naû kó rà nghut lhê. ¹² Háu mù, yhangmoq gi, sân-hi lé yhangmoq tô tô é danggidiq lé lhoq hpyoq pyám kô é yanmai, tarâ darâ é hui zo kó rà nghut lhê. ¹³ Hau htoq agó, yhangmoq gi, rayhûm

htâng rayhûm châng wang wún kômù, lagôn mán byuq kó râ nghut lhê. Lagôn é bang za dut kó râ a nghut, lumù gansang é bang eq yhangmoq taí a ge é pé lé taí kômù, yhumsîng eq a sêng é mù má châng wang nyo wún é bang le, dut kó râ nghut lhê. ¹⁴ Haû mù luí, gyè pé mai lumù gansâng dang a wó taí pyám kó sháng gaq, asak tiq é chuimó myhî pé gi, myi ló mù, zoshâng hkû luí, yhangmoq é ikun lé gôn lajang rà matú, ngò, yhangmoq lé hpaqchyí byí kat lhê. ¹⁵ Hkâsu mù gâ le, ra-am gi, lhing taû ló kôluí, Tsadán é htâng châng nyi lugù nghut bekô nghut ri.

¹⁶ Lumjîng é myiwe rayuq yuq gi, yhâng é ikun má chuimó myhí wó é nghut le, haú yuq é matú noqkuq hpúng lé wòlai a hun e za, yhang mai garúm yû ra rà nghut lhê; haú hkûn sheq, noqkuq hpúng gi, gè gè yhang rà tô é chuimó myhî pé lé wó garúm rà nghut lhê.

¹⁷ Haû noqkuq hpúng lé rago za shuí ú é hpúng suwún wuî gi, akyû í tú hkam yù gíng lhê; haû mungdang hko é hkyô eq mhoqshit é hkyô má shikut é suwún wuî gi, je riyhang hkam yù gíng lhê.

¹⁸ Hkâsu mù gâ le, "Guq nâng nyi é no lé, nhuttsung hkâ-tsûng to byi."* ga le, "Mù zui sù gi, yhâng é zuihpau wó yû gíng lhê."* ga le, Chyúmdang

má taí tô ri. ¹⁹ Hpúng suwún rayuq lé mara hun é hkyô lé, í yuq sum yuq mai saksé hkâm e za a nghut le gi, hkâlhóm yù. ²⁰ Nghut kôlhang, lhoq pun lhoq kyîng é hkyô lé góbang wó yû kó sháng gaq, mara kut shut é bang lé, shiwa byu pé hí má tân mhoqshit aq.

²¹ Pying kat é dang shi pé lé, gamhkuí myit a bo e za châng nyi râ eq, myoqdong hkyîn luí haí le a kut rà matú, Garai Gasang eq Hkrisduq Yesuq é hí má le, hkyîn yù huí é mau-mang lagyô pé é hí má le, ngò, nang lé pying kat lhê.

²² Ó yuq é ahtoq má le loq ke* byi râ lé hkâhân; góbang é mara hkaû má le hkâbo lòm. Yhumsîng yhang yhumsîng sân-yúng shoq kut nyi aq.

²³ Náng é wamdau ra luí, anum num no lò lò dut é yan-mai, nàng gi, wuî za shuq é hkyô lé nô pyám luí, tsibiyiq wing le ratsuí tsuí shuq byi aq.

²⁴ Byù ra-âm é mara pé gi, de de dut é nghut mù luí, tarâ jéyáng é jang má hí ló jé ri; ra-âm é mara kúm gi, hau é htâng má châng byông htoq lo ri. ²⁵ Haû eq rajung za, ge é muzó pé gi, de de nghut nyi luí, haû su de de a nghut é pé lé le, wó zaú to rà a nghut.

6

¹ Jùn dut é wòlai hkaû má nyi é lhunglhang bang gi, yhangmoq é yhumsîng wuî lé gyai yhang hkungga gíng

* 5:18 Tarâ Pun 25:4 * 5:18 Luk 10:7 * 5:22 Haú hkun lhê bang gi, hpúng suwún kut rà matú hkyîn to bê bang lé, loq ke kyúdung byí é nghut lhê.

lê nghu, myit yù râ dut
lê; haú hkûn sheq, Garai
Gasâng é myìng eq nga-nhúng
é mhoqshit hkyô gi, lumù
gansang é a hui râ nghut lê.
² Lumjìng é yhumsìng wuì é
jùn gi, gumang wuì nghut
é yanmai, yhangmoq lé a
wú myuq é za, yhangmoq
dojaú luí akyû myang hkâm
zô é bang gi, lumjìng bang eq
chyitdap gíng é bang nghut é
yanmai, yhangmoq lé je ge é
dông dojaú râ lê. Shí hkyô
pé lé, nàng gi, yhangmoq lé
mhoq byí nyi é eq lhoq pun
lhoq kyíng byí nyi aq.

Ngùn Lé Chyitdap É Hkyô

³ Rayuq yuq gi, shut é
lumjìng hkyô lé mhoqshit
luí, nga-nhúng é Yhumsìng
Yesuq Hkrisduq é tengmán
mhoqshit hkyô eq tarâ
hkunggâ é mhoqshit hkyô lé
a myit huí é nghut jáng, ⁴ haú
yuq gi, nghutbún é sù eq haí
lé le a sê gyô é sù nghut ri.
Yhang gi, htuq htíng lhùm é
hkyô pé lé ô nau é, a ge é
myit bò luí, dang eq séng mù
mabyoq lhoq htoq ri; haú
mai, manon é hkyô, byoq
lhùm byoq cheq é hkyô, lumù
gansang é hkyô, agè ashop é
dông myit ngam pyâm é hkyô
eq, ⁵ haú tengmán hkyô lé
lhoq hpyuq pyâm mù, tarâ
hkungga hkyô gi, ngùn zè wó
hkyô za nghut ri ga myit yu
é, i-myit lhoq htên pyâm bê
bâng é gyoro má, byìn a huí é
hkyô pé lé, lhoq htoq kat ri.

⁶ Nghut kôlhang, tarâ
hkunggâ hkyô má nhik dik
é hkyô bo é nghut le gi, amyat

mó nghut nyi ri. ⁷ Hkâsu mù
gâ le, nga-nhúng gi, mingkan
htoq má haí jung le a yu
wang lé, haú mai le haí wó
yu htoq ló râ a nghut. ⁸ Haú
mù luí, nga-nhúng gi, wutbu
wutmè eq zoshuq wó é nghut
jáng, hau eq nhik dik nyi
sháng. ⁹ Wó naú sùt nau é
byu pé gi, gunglaú hkyô eq
tuihkyó má le, haú byoq yeq
hkyô eq htên byoq hkyô má,
byu pé lé myup shí nhang
é, ngha é hkyô myo myo eq
myit nò nhâng nau é hkyô
má le, byit gyó wâng kó râ
nghut lê. ¹⁰ Hkâsu mù gâ
le, ngùn lé chyitdap é hkyô
gi, agè ashop hkyô ajung jùng
é apùn awang nghut nyi ri.
Byù ra-am gi, ngùn lé ô nau
luí, haú lumjìng hkyô mai sô
nghoq ló mù, yhumsing gùng
lé yhumsìng, haú yón kuq
hkyo eq htaú rot pyâm bekò
nghut ri.

Timohti Lé Pying Kat É Dang

¹¹ Nghut kôlhang, Garai
Gasâng é byù nàng gi, haú
pé banshoq lé koi pyâm luí,
dingmán hkyô, tarâ hkungga
hkyô, lumjìng hkyô, chyitdap
hkyô, hkam jan hkyô eq nú-
nhâm é hkyô pé lé châng hkat
nyí aq. ¹² Lumjìng hkyô eq
sêng é ge é majan le zân nyi
aq. Hap yù lumjìng bê ga,
saksé myo myô pê é hí má,
ge é dông nàng yín yu é hkûn,
wut yu é hui luí wó é ahtum
abyuq é asak lé, zú zing nyi
aq. ¹³ Haú lhunglhang lé asak
byí é Garai Gasâng é hí má
le, Pontu Pilat chyáng saksé

hkâm nyi é hkûn, ge é đông yín yu é Hkrisduq Yesuq é hí má le, ngò, nang lé pying kat lhê: ¹⁴ Yhâng é ahkyíng yam-yoq jé jáng, Garai Gasang htoq shit nhâng râ nghut é sù, nga-nhúng é Yhumsíng Yesuq Hkrisduq htoq shit é buinyì jé shoq, ¹⁵ nàng gi, agot a-u é hkyô eq mara hùn râ hkyô a bo e za, hkunmó shí lé châng nyì aq. Garai Gasang gi, hkungsô wó sù, Yhang za up sù, hkohkam pé é Hkohkâm, yhumsing pé é Yhumsíng, ¹⁶ Yhang za ahtum abyuq dui nyì sù, a ge chyâng htep e é maubó má dui nyì sù, ó yuq èq le a myang wú é, a wó myang é sù nghut nyi ri. Aróng eq hpungwup a-tsam gi, Yhâng chyâng ahtum abyuq ru joq nyì sháng gaq ô! Amen.

¹⁷ Shí ipyat má wó sùt é bang gi, a gumrông râ eq a gíng é sutzè má yhangmoq é myit myoqbyù hkyô a tô e za, nga-nhúng nguingón yuqyo nyì râ matú junghkang jungmó lé agùn agó byì é sù, Garai Gasâng chyâng za, yhangmoq myit myoqbyu nyì râ matú, hkunmó hkyó aq. ¹⁸ Ge é hkyô kut luí, ge é muzó má wó sùt nyì mù, a chum e za, gam chùng nau é myit bò râ matú, yhangmoq lé hkunmó hkyó aq. ¹⁹ Haú đông mai, yhangmoq gi, jé lô râ ipyat é matú gíng é apùn awang đông, yhangmoq é matú sutzè wó tsíng to kó râ nghut lhê; haú hkûn sheq, yhangmoq gi, asak kyíng

nghut é asak haú le wó zúing to kó râ nghut lhê.

²⁰ Timohti ê, nang lé ap to bê hkyô lé, zúng nyì aq. Tarâ a hkunggâ é po-ming ming bâng èq hpaqchyì nghut lhê ga myhíng shut é htuq htíng lhum lhum kut é hkyô lé, koi pyám aq. ²¹ Byù ra-am gi, haú lé hpaqchyì nghut lhê ga yín yù kôluí, haú lumjíng hkyô mai so nghoq htoq ló byuq bekô nghut ri.

Jeju gi, nungmoq chyáng ru joq nyì sháng gaq ô.

TIMOHTI **Chyáng Htang Dàm** **Hun Kat é Laiká** **(2 Timothy)**

¹ Hkrisduq Yesuq chyáng mã é asak byi râ gâ é danggidiq eq rajung za, Garai Gasang ô nau é dông, Hkrisduq Yesuq é lagyo nghut sù, ngò, Poluq gi, ngò chyitdap é ngá zo Timohti lé, dang kyô kat lhê.

² Haù Íwa Garai Gasang eq nga-nhùng é Yhumsing Hkrisduq Yesuq chyáng mã é jeju eq shogyo nhikmyin hkyô, nguingón hkyô gi, ru joq nyí sháng gaq ô!

Lumluq Râ Matú Myit Wum Byí É Hkyô

³ Ngò gi, ngá é kyûdung dang má, nyí, myín, abyit alan nang lé bún nyi uchyang, sân-yúng é i-myt mai, ngá é íchyí íwâ pé dojaú é su, ngò dojaú nyi é Garai Gasang lé, jeju hkya-ôn nyi lhê. ⁴ Ngò gi, ngò má gabú hkyô byíng jup sháng gaq nghû, náng é ngaubyi lé myit bún nyi mù, nang lé gyai yhang myàng nau nyi ri. ⁵ Ngò gi, nang é gyíng é lumjíng myit lé lhoq pùn yù mù, náng whoi Lu-i eq náng nu U-ni nhik chyáng má hí bo é lumjíng myit, ahkuí, náng chyáng le bo ri nghû, hkyak myit lum nyi lhê. ⁶ Hau é yanmai, ngò loq ke byí é dông, nàng má bo tô é Garai Gasang é chyunghuq lé, gyúng nhang nyi râ matú,

nang lé ngò lhoq pùn kat lhê. ⁷ Hkâsu mù gâ le, Garai Gasang gi, gyuq sê é myit nga-nhùng lé a kat byí e za, a-tsam bo é myit, chyitdap sê é myit, yhumsing gùng lé dat hkgang é myit sheq kat byí tô é ru nghut lhê.

⁸ Haù mù luí, nàng gi, nga-nhùng é Yhumsing eq séng luí saksé hkâm é hkyô má le, Yhâng é yanmai htóng byú dut to sù ngá é hkyô má le, hoq myit a bo é za, Garai Gasang é wum-o mai, haù gabú danglu é matú, ngò eq rahá wuîhke jamjau chôm hui goq. ⁹ Garai Gasang gi, nga-nhùng zui saí é muzó dông a nghut e za, Yhânggùng yhang myit sôn tô é hkyô eq Yhâng é jeju yanmai za, nga-nhùng lé, hkyi yù luí chyoiyúng é asak duí hkyô má ji yù bê nghut ri. Ahkyíng nghu é lháng a joq shi mai yhang, jeju haù gi, Hkrisduq Yesuq má nga-nhùng lé byi to gù nghut bê. ¹⁰ Nghut kôlhang, nga-nhùng é hkyi yù Sù, Hkrisduq Yesuq pô htoq é dông, ahkuí, haù lé lhoq htoq shit bê nghut ri. Yhang gi, shî-nò hkyô lé lhoq htên pyám luí, haù gabú danglù dông mai, asak lé le, a dat htên byoq é hkyô lé le, lhoq htoq shit bê nghut ri. ¹¹ Ngò gi, gabú danglu é matú hko kyo sù, lagyo eq mhoqshit sù dông, hkyin tô é hui sù nghut lhê. ¹² Hau é yanmai, ngò gi, wuîhke jamjau shî lé huí nyi é nghut lhê. Nghut kôlhang, ngò gi, ó yuq lé lumjíng bê nghut é hkyô lé, sê é htoq agó,

Yhang lé ngò ap tô é pé lé, haú buinyì jé shoq, Yhang wó zúng râ nghut lhê nghû hkyak myit lum tô é yanmai, ngò a hoq.

¹³ Nàng gi, ngá chyáng mai wó gyô yu é tengmán dang pé lé, Hkrisduq Yesuq má, lumjínq myit eq chyitdap myit mai alik kut yu nyi aq. ¹⁴ Nang lé ap byi to bê, haú ge é mungdang lé, nga-nhûng chyáng bo tô é Chyoiyúng Woi-nyí é wum-o mai zúng nyi aq.

¹⁵ Asia mau mâ é bang yuq hkanmó gi, ngo lé pyâm to kô é hkyô lé, nàng sê lhê; haú bang má, Hpugelu eq Heramoge nhik le bo akô nghut ri.

¹⁶ Haú Yhumsîng gi, Onesihpurû é yhumbyù lé shogyo nhikmyîn é hkyô tân shit sháng gaq; hkâsu mù gâ le, yhang gi, ngo lé anum num myit lhoq ngón é htoq agó, ngò wut é shamtoq-tuî é yanmai, a hoq e za, ¹⁷ yhang, Romaq myuq má jé nyi é hkûn, ngo lé myang hui shoq, ho shikut é sù nghut ri. ¹⁸ Haú Yhumsîng gi, haú buinyì má, yhang lé haú Yhumsîng é shogyo nhikmyin hkyô byi sháng gaq! Ehpesu myuq má, yhang ngo lé hkâ-myhó garúm bê nghut é gi, nàng rago yhang sê lhê.

2

¹ Haú mù, ngá zo ê, nàng gi, Hkrisduq Yesuq má é jeju hkaû má, wúm bo nyi aq. ² Nàng gi, saksé myo myô é hí má ngá chyáng mai wó gyô yù

bê hkyô pé lé, góbang lé dat mhoqshit é, wó lum é bang lé ap byi aq. ³ Hkrisduq Yesuq é ge é gyezo rayuq su, wuîhke hkyô lé chôm jan nyi sháng. ⁴ Gyezo rayuq dông gyè mù wùn waq nyi é sù, ó yuq nghut kôle, gotû muzó má a bo lom é za, yhang lé hkunmó hkyô nyi é gyezau lé, gabú nhâng nau é chyat nghut lhê. ⁵ Haú eq rajung za, shingjóng é sù rayuq le, shingjóng lhum poî wang é hkûn, tô tô é tarâ dông a châng e nghut le gi, ung é aróng chyunghuq lé wó yû râ a nghut. ⁶ Yo-mû zuî shikut é sù gi, kyôshi lé sâng-hi myang hkam yù râ sù nghut lhê. ⁷ Haú Yhumsîng gi, shí pé banshoq lé wó sê é nyan nang lé byi râ nghut é yanmai, ngò taí é hkyô pé lé myit wú aq;

⁸ Haú Dawiq é awut ashín nghut sù, Yesuq Hkrisduq gi, shi é mai dum dui toq bê hkyô lé myit bun aq; haú gi, ngá é gabú danglù nghut lhê. ⁹ Gabú danglù hau é yanmai, mara bò sù rayuq lé su, ngò gi, kyum hut é hui luî, hpuzô nyi é nghut lhê. Nghut kôlhâng, Garai Gasâng é mungdang gi, kyum hut huî é a nghut. ¹⁰ Haú mù luî, ngò gi, Hkrisduq Yesuq chyáng mâ é hkyi yù hkyô eq ahtum abyuq é hpungwup shingkanq lé wó yù kó sháng gaq nghû, haú hkyin yù hui bâng é matú, jung hkanmó lé hkam jân nyi lhê.

¹¹ A-ô mâ é dang gi, lumjínq é dang nghut lhê:

Nga-nhúng gi, Yhang eq rahá yù

shî bê nghut jáng,
Yhang eq rahá duì râ
nghut lhê.

12 Nga-nhúng gi, hkam jân é
nghut jáng, Yhang eq
rahá up râ nghut lhê.

Nga-nhúng gi, Yhang lé he-
ngik pyâm é nghut jáng,
Yhang le, nga-nhúng lé
he-ngik pyâm râ nghut
lhê.

13 Nga-nhúng gi, lhumzui
myit a bò kôlháng,
Yhang gi, lhumzui nyì
râ nghut lhê. Hkâsu
mù gâ le, Yhang gi,
yânggùng yhang wó
he-ngik pyâm é a
nghut.

*Garai Gasâng Hí Má Myoq-
dong Wó É Mû Zui Sû*

14 Nàng gi, yhangmoq lé,
shí hkyô pé xoq luí lhoq pûn
nyì aq. Dang pé eq séng luí,
a byoq lhùm nyì kó sháng
gaq, Garai Gasâng hí má
yhangmoq lé sidiq byi aq.
Haù gi, akyû a bo é htoq agó,
wó gyô é bang lé htên byoq
nhang é hkyô za nghut lhê.

15 Nàng gi, haù tengmán é
mungdang lé jo shoq chung
jai é eq, hoq nó a râ é mû zui
sû rayuq dông Garai Gasâng
hí má myoqdong wó shoq,
wó dut é myhó shikut aq.

16 Tarâ a hkunggâ é po-ming
ming bang lé koi pyám aq.
Hkâsu mù gâ le, haù su kut
é bang gi, tarâ a hkunggâ
é hkyô má je riyhang wang
nân ló byuq é bang dut kó
râ nghut lhê. 17 Yhangmoq
é mhoqshit hkyô gi, mong

ana su byo myín ló râ nghut
lhê; haù bang má Humenu eq
Hpilitu nhik le bò kôluí, 18 haù
tengmán hkyô mai sô nghoq
ló byuq akô. Yhangnhik
gi, haù dum duì toq hkyô
dut lai bê ga taí kômù, ra-
âm é lumjúng hkyô lé lhoq
htên pyám byi akô nghut
ri. 19 Nghut kôlháng, "Haù
Yhumsing gi, Yhang eq séng
é bang lé sê lhê."* ga luí le,
"Haù Yhumsing é mying lé
yín yu é bang yuq hkangmó
gi, agè ashop hkyô mai lhing
tau ra kó râ nghut lhê." ga
luí le, dizik haù htung tap tô
é, Garai Gasâng é ging túng é
apûn awang gi, gíng nyì ri.

20 Yhùm mó ralhum má gi,
híng auhkoq zè, ngùn auhkoq
zè baú za joq é a nghut, sik
auhkoq zè, tse auhkoq zè le
joq lhê; ra-am gi, aróng hkyo
é matú, ra-am gi, aróng hkyo é
matú a nghut. 21 Haù mù luí,
haù pé mai yhumsing gùng
lé lhoq sansêng pyâm é sù gi,
chyoiyúng luí, haù Yhumsing
chung jai gíng é sù, ge é muzó
hkangmó kut râ hen tô é sù
nghut é yanmai, aróng hkyo
é matú chungzè dut râ nghut
lhê.

22 Zoram é agè ashop é ô
naù hkyô lé koi pyám mù,
haù sân-yúng é myit mai,
Yhumsing lé wut dúng é
bang eq rahá, dingmán hkyô,
lhumzui hkyô, chyitdap
hkyô, nguínón hkyô pé lé,
cháng hkat nyì aq. 23 Go
é eq ngok é dông dang jet
jet lhùm é hkyô gi, mabyoq

lhoq htoq é hkyô nghut é lé, nàng sê lê nghut é yanmai, haú hkyô lé koi pyâm aq. ²⁴ Haú Yhumsing é dui-nhâng zoshâng gi, mabyoq a lhoq htoq é za, yuq hkangmó lé dat myit tê byi é, wó mhoqshit é, a dat nhik-yô é su dut ra râ nghut lê. ²⁵ Yhang gi, yhang lé htuq htîng é bang lé, nú-nhâm é dông mhoqshit byi ra râ nghut lê; haú hkûn, Garai Gasang gi, yhangmoq lé myit lêng hkyô byi mù, tengmán hkyô lé sê gyo nhâng lui, ²⁶ yhangmoq gi, bún gyîng lò mù, nat Tsadán ô nau é hkyô lé kut byi râ matú, chyup yû huí é, nat Tsadán é tuihkyó mai wó hfang lut ló kó abe nghû, myit lum kat lê.

3

Jihtûm Buinyi Pé Má Dut Lò Râ Hkyô

¹ Jihtûm buinyi pé má, wuîhkê é ahkyîng pé joq lò râ nghut é lé, nàng matsîng to aq. ² Hkâsu mù gâ le, haú u lé, byu pé gi, yhumsing gûng lé za chyitdap é bang, ngùn lé myoqnoq é bang, gumrong é bang, nghutbûn é bang, góbang lé taî hpoî é bang, înu îwa nyo é lé a gyô é bang, jeju a dat bûn é bang, a chyoiyung é bang, ³ chyitdap myit a bo é bang, mara hkyut byi a sê é bang, lumù gansang é bang, yhumsing gûng lé hkâng a sê é bang, byuwuî pé, ge é hkyô lé a ngui é bang, ⁴ haq gumlaû é bang, a bun a so dut wún é bang, yhumsing gûng lé za hkik bûn é bang, Garai

Gasang lé chyitdap é bang dut râ malaî ngón kún hkyô lé za chyitdap é bang, dut bùm kó râ nghut lê. ⁵ Yhangmoq gi, tarâ hkunggâ é bang su dut kôlhang, haú pé é a-tsam lé hengik pyâm akô nghut ri; haú sù é bang lé, nàng koi pyâm nyi aq.

⁶ Yhangmoq gi, hpaqchyî da mù yhûm pé má wàng kôluî, mara wòlai lé wun é, agè ashop é ô nau hkyô ajung jung má sô nghoq ló byuq é, ⁷ hkâ-nhâm le mhoq yu nyi kôlhang, haú tengmán hkyô lé a sê gyô é, myit nyhôm é myiwe wui lé wó lêng nghoq yu é bang nghut akô. ⁸ Yanne eq Yambre nhik gi, Mosheq lé htuq htîng é su, haú bang le, haú tengmán hkyô lé htuq htîng akô nghut ri; yhangmoq gi, myit é hkyô htên byuq kôluî, haú lumjîng hkyô má lhum a zuí é bang nghut akô. ⁹ Nghut kôlhang, haú nhik é hkyô byông htoq lo é su, yuq hkangmó é hí má, yhangmoq ngok é hkyô byông htoq lô râ nghut mù, haú mai lai lui yhangmoq wó kut jat kó râ a nghut.

Timohti Lé Pying Kat É Dang

¹⁰ Nàng kúm gi, ngá é mhoqshit hkyô, ngá é nyiyap hkyô, ngò myit myoqbyu tô é hkyô, ngá é lumjîng hkyô, myit hîng hkyô, chyitdap hkyô, hkam jan hkyô, ¹¹ zing-ri huí é hkyô eq wuîhke jamjau hkyô pé lé le, Antioku wà mó, Ikoni wà mó eq Lustra wà mó pé má ngò

hui zô é, zing-ri hkyô pé lé, ngò hkam jan bê hkyô lé le, nàng rago sê lhê. Nghut kôle, haû Yhumsîng gi, haû pé banshoq mai ngo lé xe yù bê nghut ri. ¹² Gè gè yhang, agè ashop é byu pé eq mhaû kut é bang gi, mhaû zô nyi bum é eq mhaû zô é huî nyi bùm kôluî, a ge é hkyô shut je riyhang myô jat lò kô é hkûn, ¹³ Hkrisduq Yesuq má tarâ hkunggâ é asak đông niyap nau é bang yuq hkangmó gi, zing-rî é hui kó râ nghut lhê. ¹⁴ Nghut kôlhàng, nàng gi, ô pê chyáng mai nàng mhoq yû bê hkyô lé le, Hkrisduq Yesuq lé lumjîng jáng hkyi yu é huî shoq, ¹⁵ nang lé hpaqchyî byéng-yá wó byî é chyoiyúng Chyúmdang pé lé, zoshâng hkûn mai nàng sê to bê hkyô lé le, nàng sê é yanmai, nàng mhoq yu to bê hkyô eq hkyak lumjîng to bê hkyô má, xoq kut nyî aq. ¹⁶ Chyúmdang hkangmó gi, Garai Gasâng é soq hâng tô é pé chyat nghut é yanmai, mhoqshit é hkyô, tân mhoq é hkyô, lhoq jo byî é hkyô eq dingmán hkyô lé tân shit byî é hkyô pê é matú, akyû bo ri; ¹⁷ haû mù luî, haû Garai Gasâng é byù gi, ge é muzó jizó hkangmó lé kut râ matú, wó gumjup râ nghut lhê.

4

¹ Garai Gasâng é hí má le, dui nyi bang eq shi byuq bang lé tarâ dara râ sù Hkrisduq Yesuq é hí má le, Yhang htoq shit râ hkyô eq Yhâng mingdán é yanmai,

ngò, nang lé pying kat é gi, ² haû mungdang lé hko kyo aq; ahkyíng yam-yoq ang kôlhàng, a ang kôlhàng, rì rì hen to aq; myit gyaí hing é eq rago za mhoqshit é đông, lhoq jo byi, tân mhoqshit é eq myit wum byi kut nyî aq. ³ Hkâsu mù gâ le, byu pé gi, tengmán mhoqshit hkyô lé a kâm gyô é ahkyíng jé mù, yhangmoq ô naû yut yut é hkyô cháng luî, yhangmoq é no yo bui nau é nohkyap gyô nau é hkyô tai nhâng rà matú, sará pé rajùm rayò lé lhinghkyuq má lhoq tsing to kó râ nghut lhê. ⁴ Yhangmoq gi, haû tengmán hkyô mai yhangmoq é nohkyap lé lhing pyâm mù, myit htoq mhô-myi dang shut lhing lò kó râ nghut lhê. ⁵ Nghut kôlhàng, nàng gi, dut tô é hkyô banshoq má rago sidiq nyi aq; wuîhke jamjau hkyô lé hkam jân nyi aq; gabú danglù hko kyô é muzó kut nyî aq; nàng é hpungmû banshoq lé wùn waq nyi aq.

⁶ Hkâsu mù gâ le, ngò gi, shuq jung hkungga ralhum đông hut pyâm é huî nyi gù nghut mù luî, mingkan mai ngò htoq lò râ ahkyíng jé bê nghut ri. ⁷ Ngò gi, haû ge é majan le zan bê; din shingjóng lhûm é hkyô le bàn bê; haû lumjîng hkyô le chang bê nghut lhê. ⁸ Ahkuî, haû tengmán é tarâ Agyi nghut sù, Yhumsîng gi, haû buinyi má ngo lé ap byi râ nghut é, haû dingmán hkyô é janmaú lé, ngá matú tô to byi bê nghut

lê. Haû gi, ngá é matú za a nghut, Yhang htoq shit râ hkyô lé myit láng nyi é bang banshoq é matú le nghut lê.

Timohti Lé Jì Kat É Hkyô

⁹ Nàng gi, ngá chyáng wó dut é í hân hân lé lô aq.

¹⁰ Hkâsu mù gâ le, Demaq gi, mingkan shî lé chyitdap é yanmai, ngo lé pyâm to luí, Htesaloni wà mó shut; Krezen gi, Galatiq mau shut; Tituq gi, Dalamati mau shut, e ló byuq bekô nghut é yanmai nghut lê. ¹¹ Lukaq za ngò eq rahá nghut nyi lê. Markuq lé, nàng eq rahá shuí lé lò aq; yhang gi, ngá é hpungmù má wó htugbáng rá sú nghut lê. ¹² Ngò gi, Tuhkiku lé Ehpesu myuq shut nhang kat bê nghut lê.

¹³ Nàng gi, lé lo é hkûn, Troa myuq má, Karpu chyáng ngò tô tô é buhîng haû lé le, ngá é chyúmding lé le, je luí eq haû shokuq chyúmding pé lé le, yù lé lô byi aq.

¹⁴ Haû ningdup hpó Alexander gi, ngo lé a ge é myo myo kut bê nghut ri; haû Yhumsîng gi, yhang kut é eq rajung za, yhang lé dam byi râ nghut lê. ¹⁵ Yhang gi, ngamoq é danglù lé wum kat htug htîng bê sú nghut é yanmai, nàng le, yhang lé sidiq ra râ nghut lê.

¹⁶ Sâng-hî dàm, ngá gûng lé ngò taî hung é hkûn, yuq hkangmó gi, ngá é hkyam shut a bo lom e za, ngo lé pyâm tô akô. Nghut kôlhang,

haû gi, yhangmoq ahtoq má mara a dut sháng gaq. ¹⁷ Nghut kôlhang, ngò dông mai danglù haû lé rago wó hko pyo kat luí, tûngbaù pé banshoq bang wó gyo kó sháng gaq ga, haû Yhumsîng gi, ngá hkyam shut yap to mù, ngo lé wum-o byi é nghut lê. Hau htoq agó, ngò gi, hkanghkyi é nhut mai le hkyi yù hui bê nghut lê.* ¹⁸ Haû Yhumsîng gi, ngo lé agè ashop é hkyô hkangmó mai hkyi yù luí, Yhang é mauhkûng mingdán má ngón za shuí jé râ nghut lê. Hpungwup shingkang gi, Yhâng chyáng ahtum abyuq ru joq nyi sháng gaq ô. Amen.

Shi-kyâm Dang

¹⁹ Priskila eq Akula nhik lé le, Onesihpuru yhumbyù wui lé le, bo shi-kyâm byi laq. ²⁰ Erastu gi, Korinhtuq myuq má nyi gyó to bê; Trohpimu lé gi, nò luí, Melitu wà mó má ngò nyhi pyâm to bê nghut lê. ²¹ Nàng gi, wó dut é í, gy-oqmyò a wàng shi lé, shî má jé lé lò aq. Ubulu gi, nàng lé shi-kyâm kat ri; haû eq rajung za, Pudén, Linu, Klodia eq gumang wui banshoq bang gi, nàng lé shi-kyâm kat akô nghut ri.

²² Haû Yhumsîng gi, náng é woi-nyí eq rahá nghut nyi sháng gaq. Jeju gi, nungmoq chyáng ru joq nyi sháng gaq ô.

* 4:17 Haû hkûn lé, Romaq byu pé, byù sat lé gi, hkanghkyi lé tsô pyâm lê.

TITUQ

Chyáng Hun Kat é Laiká (Titus)

¹ Garai Gasâng é dui-nhâng zoshâng eq Yesuq Hkrisduq é lagyo nghut é sù, ngò Poluq gi, haù ahtum abyuq é asak lé chôm myit myoqbyu é yan-mai, Garai Gasang hkyin yu to bâng é lumjínng hkyô jat râ eq, tengmán hkyô lé wó sé mù, tará hkungga sé nhâng râ matú, hkyin yù huí é sù nghut lhê. ² Haù ahtum abyuq é asak hkyô lé, mhaù a sê é Garai Gasang gi, ahkyíng nghu é lháng a joq shi mai danggidiq byi to mù, Yhang masat tô é ahkyíng yam-yoq má sheq mungdang hko kyô é đông lhoq htoq shit luí, ³ nga-nhông é hkyi yù Sù, Garai Gasang hkunmó hkyô tô é eq rajung za, haù mungdang hko é hkyô lé ngá é loq má ap byi bê nghut ri.

⁴ Nga-nhông chôm lumjínng é hkyô đông mai, ngá zo sîng nghut é Tituq lé laiká kâ kat lhê. Íwa Garai Gasang eq nga-nhông é hkyi yù Sù Hkrisduq Yesuq chyáng mâ é jeju eq nguínngón hkyô gi, náng chyáng ru joq nyí sháng gaq ô.

Kreti Zinlóng Má, Tituq Wùn Waq Râ Muzó

⁵ Ngò, nang lé Kreti zinlóng má nyhi hkyô tô é gi, ngò, nang lé pyíng tô é eq rajung za, ngò a ban zui saí é loqzó

pé lé lhoq pán râ matú eq, wà hkangmó má hpúng suwún ayá dáng to byi râ matú nghut lhê. ⁶ Haù hpúng suwún kut râ sù gi, mara hùn râ hkyô a bo é sù; yhangmyi rayuq za wó é sù; yhang zô pé le, agè ashop é eq jino a gyô é ga, mara hùn râ jowò a joq é lumjínng bang nghut é sù, nghut râ lhê. ⁷ Hkâsu mù gâ le, hpúng-up rayuq gi, Garai Gasâng é sùt zum sù rayuq đông nghut lhê mù, mara hùn râ hkyô a bo é sù nghut râ lhê; yhang gi, yhumsing myit a cháng; i-myt a lûm tot; íhpê é jùn a dut; mabyoq jishûm a kut; a sansêng é ngùn hîng lé a myit ô nau é sù nghut râ lhê. ⁸ Yhang gi, byù bíng lé dat hkulûm sù; ge é hkyô lé chy-itdap sù; nûm é sù, dingmán sù; chyoiyúng sù; yhumsing gùng lé wó hkang é sù; ⁹ mhoq yu to bê hkyô eq rajung za, lumjínng é mungdang lé ging ging zuí zing nyi é sù nghut râ lhê. Haù hkùn sheq, yhang gi, góbang lé tengmán é mho-qshit hkyô đông myit wum wó byí é eq, haù eq shai lhum é bang lé, shut é hkyô wó tân shit râ nghut lhê.

¹⁰ Hkâsu mù gâ le, gum-lau kut é bang, dangsôm tái é bang eq mhaù zô é bang myo myo nyi ri. Ahpyo-kuq hpyit é hpúng bang je riyhang myo akô. ¹¹ Haù bâng é nhut shô lé gi, xaù pyám byi râ lhê. Hkâsu mù gâ le, yhangmoq gi, a tengmán é đông sutzê lé wó yú shoq ga luí, mho-qshit a gíng é hkyô pé lé mho-

qshit mù, rayhum bang bang lé lhoq hpyoq lhoq htên nyi akô nghut ri. ¹² Kreti byù mâ é myiqhtoi rayuq lhang gi, "Kreti byu pé gi, ayang mhaù é bang, tân jung yosô dusak pé, lagôn é zo myoqnoq bang nghut akô." ga tai wú ri. ¹³ Saksé shí gi, têng ri. Haù mù luí, yhangmoq gi, Yudaq byu pé é myit htoq mhô-myi dang lé le; tengmán hkyô lé he-ngik pyâm é bang pying tô é dang pé lé le, a gyo kô é za, ¹⁴ haù lumjǐng hkyô má gǐng tǐng nyi kó sháng gaq, yhangmoq lé htân htân tân mhoqshit byí nyi aq. ¹⁵ Sân-yúng bǎng é matú gi, azǐng zê lhunglhang sân-yúng ri; a sân-yúng bang eq a lumjǐng bǎng é matú kúm gi, haí le a sân-yúng é chyat nghut nyi ri; hkâsu mù gâ le, yhangmoq é myit nhiklhum eq myit sôn sê é hkyô pé gi, gè gè yhang, a sân-yúng dut byuq bekô nghut ri. ¹⁶ Yhangmoq gi, Garai Gasang lé sê lhê ga kôlhang, yhumsǐng zui sai é loq zó dǒng, Yhang lé he-ngik pyâm é bang nghut akô. Yhangmoq gi, achaq achyut é bang, jìno a gyô é bang eq, ge é mù joq mijoq eq a htuk é bang nghut akô nghut ri.

2

Hká Dǒng Nyi Yap Râ Hkyô

¹ Nǎng kúm gi, tengmán é mhoqshit hkyô eq wuí é dǒng mhoqshit nyí râ dut lhê. ² Hpô-mǎng pé lé gi, i-myit shirâm sé râ hkyô; hkungga

gǐng é byù dut râ hkyô; yhum-sǐng gǐng lé wó hkǎng râ hkyô eq, lumjǐng myit gǐng râ, chyitdap myit gǐng râ, hkam jan hkyô gǐng nyi râ hkyô pé lé, mhoqshit byí nyi aq.

³ Haù eq rajung za, hpô-myhí mǎng pé lé gi, hkungga gǐng é a-kyang bo nyi râ hkyô; lumù gansǎng dang a tai râ hkyô; íhpê é jùn a dut râ hkyô eq ge é hkyô lé za dat mhoqshit é bang wó dut râ matú mhoqshit byi aq. ⁴ Haù hkûn, Garai Gasang é mungdang gi, lumu pyâm é a hui sháng gaq, yhangmoq gi, hpô-myhí zô pé lé, yhumsǐng yhanglǎng eq, yhangzô pé lé chyitdap é, ⁵ yhumsǐng gǐng lé wó hkǎng é, siri bo é, ikun lé dat wùn waq é, ge é myit wó tǔn shit é, yhumsǐng é yhanglǎng uphkang é dǒng dat chǎng é bang dut râ matú, ge mhoqshit é hpô-myhí mǎng pé dut râ nghut lhê.

⁶ Haù eq rajung za, zorâm wuí lé le, yhumsǐng gǐng lé wó hkǎng nyi kó sháng gaq, lhoq pun lhoq kyǐng nyi aq. ⁷ Hkyô hkat hkǎngmó má, yhangmoq lé nǎng yhang ge é muzó alik tǔn shit nyí aq. ⁸ Nǎng lé lhom htuq htǐng é bang gi, nga-nhǔng é hkyô má mara a wó hǔn kômù hoq hpú nyi kó sháng gaq, nǎng mhoqshit é hkyô má, tai pyám râ hkyô a bò shoq, têng é, siri bo é, eq sansǐng é dang tai nyi aq.

⁹⁻¹⁰ Nga-nhǔng é hkyi yù Sú Garai Gasang eq sǐng é mhoqshit é hkyô pé hkat

hkanmó yúng nyí sháng gaq, hkyô hkat hkanmó má, jun pé lé, yhangmoq é yhumsing wui pé é a-ô má nyi mù, yhumsing wui é i-myt ngón shoq dang a tu râ; a hkau râ; wó lum tô é bang dut râ hkyô pé lé, mhoqshit byi aq.

¹¹ Hkâsu mù gâ le, hkungso wó é myit myoqbyù hkyô ga é, nga-nhung é kô myhang é Garai Gasang eq hkyi yù Sù, Yesuq Hkrisduq gi, hpungwup shingkanq eq htoq shit râ hkyô lé láng nyi é hkûn, ¹² tarâ a hkunggâ é myit eq mingkan myit ô nau é hkyô koi pyám luí, shí ipyat má yhumsing gùng lé wó hkâng râ, dingmán râ eq, tarâ hkunggâ é hkyô wó cháng shoq, ¹³ nga-nhung lé mhoqshit byi râ matú, Garai Gasang jeju chyunghuq gi, htoq shit bê nghut mù luí, byù lhunglhang bang lé hkyi yù hkyô hpóng byi bê nghut ri. ¹⁴ Haù Yesuq Hkrisduq gi, agè ashop é hkyô banshoq mai nga-nhung lé hkyi yù mù, ge é muzó hkanmó lé châng kut nau é, Yhânggùng yhang sing é byuhú rahú dut râ matú wó lhoq sân-yúng yú shoq ga, nga-nhung é matú Yhânggùng lé ap byi pyám bê nghut ri.

¹⁵ Nang lé ó yuq èq le, a wú shôm pyám kó sháng gaq; nang gi, ahko ahkáng banshoq eq, yhangmoq lé shí hkyô pé mhoqshit nyi aq; myit wum byi é eq, tân mhoqshit é hkyô lé le kut nyi aq.

Ge É Muzo Zui Sai Râ Hkyô

¹ Nang gi, lumjing bang lé, zau wui eq ahko ahkáng wó bâng é a-ô má nyi mù, jìno gyô nyi râ eq, hkâ-nhám le ge é muzó hkanmó zui sai râ lé hen nyi uchyang, ² ó yuq lé le lù a mù râ; nguingón hkyô hô râ; myit tê byi é hkyô tún shit râ eq; byù banshoq lé nùm é i-myt tún shit nyi kó sháng gaq, lhoq pun lhoq kying nyi aq.

³ Hkâsu mù gâ le, nga-nhung le, hí hpyang gi, byù ngok pé, jìno a gyô é bang, mhaù zo huí é bang eq, gungsho ô nau é hkyô eq mingkan ngón hkyô ajung jùng èq jùn kut é hui bang, dut mù luí, agè ashop é eq manon lhum é hkyô kut nyi mù, rayuq eq rayuq a jú lhum é đông nyi lai lò bê nghut lè.

⁴ Nghut kôlhang, nga-nhung é hkyi yù Sù Garai Gasang jeju eq chyitdap myit htoq shit é hkûn, ⁵ nga-nhung yhang kut é dingmán é muzó èq a nghut é za, Yhâng é shogyo nhikmyin é jeju yanmai sheq, Garai Gasang gi, nga-nhung lé hkyi yù bê nghut ri. ⁶ Yhang gi, nga-nhung é hkyi yù Sù Yesuq Hkrisduq é yanmai, nga-nhung é ahtoq má agùn agó hut hkyó byi é Choyiyung Woi-nyí èq nga-nhung lé chí san chí sêng pyám byi mù, woi-nyí má dum hku é hui nhâng luí, myit sik htaí byi é hkyô đông nga-nhung lé hkyi yù bê nghut ri. ⁷ Haù mù luí, Yhâng é jeju mai mara hkyut san byi é hui bê nghut é yanmai, ahtum abyuq é

asak lé myit myoqbyu nyi é eq rajung za, nga-nhung gi, silí wunlí wó hkam yu é bang dut lò râ nghut lhê. ⁸ Dang shí pé gi, lumging é dang nghut lhê mù luí, Garai Gasang lé lumjing é bang gi, ge é muzó lé myit lòm luí rago zui saí nyi kó sháng gaq, haú hkyô pé lé nàng wum zuq tung mhoqshit byi râ lé, ngò ô nau nyi lhê. Shí pé gi, byù lunglhang bâng é matú ge é eq, akyû bo é hkyô nghut lhê.

⁹ Nghut kôlhang, ana apâ ga luí taí htíng lhûm é hkyô lé le; byùxik labaû gôn é hkyô lé le; nyo byoq lhûm é hkyô lé le; jep é tarâ eq séng mù byoq lhûm é hkyô pé lé le koi pyâm nyi aq, hkâsu mù gâ le, haú pé gi, akyû a bo é hkyô eq chûng a ge é hkyô pé nghut ri. ¹⁰ Gam hkuí é myit bò sù lé gi, í dâm mhoqshit wú mù, a wó jáng, yhang lé baú tô pyám aq. ¹¹ Haú su kut sù gi, yhang kut é muzó má mara wó to bê nghut mù, yhumsing gùng lé yhumsing mara hun é sù nghut é lé, nàng sê to lo aq.

Je Htâng Má Pying É Dang

¹² Ngò gi, Nikopoli wà má gyoqmyò lhoq lhai râ đông myit hpyit tô é yanmai, Artima lé, a nghut jáng Tuhkiku lé, náng chyáng nhang kat byi râ, jé eq yhang, nàng gi, shikut luí, haú wà shut ngá chyáng lé lô aq. ¹³ Nàng gi, tarâ sê é sù Zena eq Apolo nhik lé, yhangnhik é hkyowuì má râ é hkyô banshoq, shikut luí garúm kat aq. ¹⁴ Nga-nhung é byu

pé gi, nyí wuî râ é hkyô lé wó htuq é eq ashí zui é bang dut kó sháng gaq, ge é muzó lé myit lòm mù zui saí nyi râ hkyô lé mhoq yû râ lhê.

¹⁵ Ngò eq rahá nyi é bang yuq hkangmó gi, nang lé shi-kyâm kat akô. Lumjing hkyô má ngamoq lé chyitdap é bang lé, bo shi-kyâm byi aq.

Garai é jeju gi, nungmoq eq rahá joq nyi sháng gaq ô!

HPILEMON

Chyáng Hun Kat é

Laiká

(Philemon)

¹ Hpilemon ê, Hkrisduq Yesuq é yanmai htóng lúng nyi sũ, ngò Poluq eq nga-nhũng é gumang Timohti nhik gi, ngá-nhik chyitdap é mù wùn luzúm nghut é sũ nang lé le, ² ngá-nhik é gu-nhá Ahpiaq lé le, ngá-nhik é sarhé luzúm Arhkipò lé le, náng é yhũm má huí lhum lhum kut é noqkuq hpúng lé le, dang kyô kat lâ.

³ Nga-nhũng é Íwa Garai Gasang eq Yhumsing Yesuq Hkrisduq chyáng mâ é, jeju eq nguingón hkyô gi, nung-moq chyáng ru joq nyi sháng gaq ô!

Jeju Hkya-ôn É Hkyô Eq Kyûdung Dang

⁴⁻⁵ Ngò gi, Yhumsing Yesuq lé nàng lumjìng é hkyô lé le, sân-yúng bang banshoq lé nàng chyitdap é hkyô lé le, wó gyô é yanmai, ngò kyûdung é hkũn, nang lé myit bũn nyi luí, hkâ-nhám le ngá é Garai Gasang lé jeju hkya-ôn nyi lâ. ⁶ Ngò gi, Hkrisduq é matú nga-nhũng chyáng bô tô é ge é mù lhumjup lé sê gyô é hkyô lé, nàng wó yù sháng gaq nghũ, náng é lumjìng hkyô lé, nàng saksé hkâm é má akyû htoq râ matú, kyûdung byi nyi lâ. ⁷ Náng é chyitdap myit gi, ngo lé gyai gabú nhang é eq wum-o wó yù nhang ri; hkâsu

mù gâ le, gumang hpó ê, náng é yanmai, sân-yúng bâng é i-myit má nguingón yuqyo é hkyô wó yù bekô nghut ri.

Onesimu É Matú Tôngbán
Byi É Hkyô

⁸ Haũ su mù, nàng kut gíng é muzó hkyô, ngò, nang lé pying kat lâ. Hkrisduq má, ngò gi, a gyuq a kyum é za nang lé haũ wó kut nhang lâ nghut kôlhang, chyitdap myit đông za nang lé pying kat lâ. ⁹ Ngò, Poluq gi, mang bê htoq agó, ahkuí Hkrisduq Yesuq é yanmai htóng lúng sũ le nghut luí, ¹⁰ ngò kyum hut huí nyi é u lé ngá zo dut lo é Onesimu é matú nang lé ngò dũng tôngbán kat lâ. ¹¹ Yhang gi, hí hpyang náng é matú akyû a bo é nghut kôlhang, ahkuí gi, náng é matú le, ngá é matú le, akyû bô bê nghut ri.

¹² Ngò nhik htũng é Onesimu lé náng chyáng dum taũ nhang kat lâ. ¹³ Haũ gabú danglu é yanmai, ngò htóng lúng nyi é má náng é malaí ngo lé garúm râ matú, yhang lé ngò shuí nyi to naũ kôlhang, ¹⁴ ngò gi, nàng myit a huí le haí le a kâm kut. Hau é yanmai, ngò, nang lé kut nhang é đông a nghut e za, nàng ô nau é đông kut é san za nghut sháng gaq. ¹⁵ Hkâsu mù gâ le, náng chyáng mai yhang rayoq rabun zo gâng nyi é gi, yhang dum taũ lò mù hkâ-nhám le nàng eq rahá dum wó nyi nyi râ matú nghut lâ abe. ¹⁶ Yhang gi, htàng hpyang, jùn rayuq đông a nghut e za, jùn

htoq má je ge é chyitdap gumang hpó dut râ nghut bê; ngá matú, yhang gi, ngò chyitdap dik é sù nghut lhê; náng matú kúm gi, byù rayuq dông le, Yhumsíng Yesuq má gumang hpó rayuq dông le, je riyhang chyitdap râ sù dut bê nghut ri.

¹⁷ Haù mù luí, nàng, ngo lé luzúm rayuq sù ngam é nghut le gi, ngo lé hap yu é su, Onesimu lé le lom hap yù aq. ¹⁸ Yhang, nang lé rajung jung shut pyâm é nghut le le, chyín dap tô é nghut le le, haù gi, ngá chyáng dap é chyín nghû sôn yù aq. ¹⁹ Ngò, Poluq gi, chyín haù xap râ nghû luí, ngá loq èq yhang kâ kat kôlhang, nàng yhang lhang, ngo lé asak chyín xap râ sù nghut é lé bûn ngam aq. ²⁰ Nghut bê, gumang hpó ê, nang é yanmai, haù Yhumsíng má ngò gabú é hkyô wó yu nyí sháng gaq, Hkrisduq má ngá é i-myt lé lhoq ngui lhoq ngón byí é dông, shí, ngò pyíng kat é dang lé gyo byi laq. ²¹ Nàng gi, ngò taí kat é htoq má je lhom kut râ nghut é lé, hkyak za sé luí, ngò kâ kat é nghut lhê.

²² Hau htoq agó, ngá é matú nyí râ gok lajang lánq aq. Hkâsu mù gâ le, nungmoq kyúdung byí é yanmai, ngò gi, nungmoq chyáng dum wó jé râ lé myit myoqbyu nyi lhê.

²³ Hkrisduq Yesuq é yanmai, ngá é htóng lúng luzúm nghut é sù Epahpra gi, nang lé shi-kyâm kat ri. ²⁴ Ngá é htuq luq htuq bang nghut é

Markuq, Aristakuq, Demaq, Lukaq pé le, nàng lé shi-kyâm kat akô.

²⁵ Yhumsíng Yesuq Hkrisduq é jeju gi, nungmoq é woi-nyí eq rahá za ru joq nyí sháng gaq ô!

HEBRE Pê Chyáng Hun Kat é Laiká (Hebrews)

*Garai Yhangzo Gi, Mau-
mang Lagyô Pê Htoq Je Gyaú É
Hkyô*

¹ Láí ló bê ipyat pé má, Garai Gasang gi, nga-nhùng é îchyí îwâ pé lé myiqhtoî pé dông alhîng lhîng eq adông dông mai dáng nyo wú bê nghut lhê. ² Nghut kôlhâng, ló htâng é buinyì shí pé má, Yhang gi, Yhâng Zo dông mai nga-nhúng lé dang nyô bê nghut ri; Yhang gi, lhunglhang lé sîng sũ dut râ matú haú Zo lé masat to mù, Zo dông mai, nyì mi-nyì, joq mijoq lé hpan to bê nghut ri. ³ Haú Zo gi, Garai Gasâng é hpungwup shingkang duqbó é hkyô eq Yhâng é gunghkyâng isâm roq nghut nyi mù, lhunglhang lé Yhâng é a-tsam byîng é dâng eq zũ zing tô ri. Yhang gi, yubak mara lé lhoq sân-yúng é hkyô lé ban kut é htâng, mauhkûng htoq má Hkikhkam dik Sũ Garai Gasâng é loqyo hkyam má zung to bê nghut ri. ⁴ Haú mù luí, Yhang gi, maumang lagyô pé é myîng htoq gyaú é myîng lé wó sing yù bê nghut é eq rajung za, yhangmoq htoq je riyhang gyaú sũ dut bê nghut ri.

✧ 1:5 Hkya-on 2:7 ✧ 1:5 2 Sam 7:14
104:4

⁵ Hkâsu mù gâ le, Garai Gasang gi,
"Nàng gi, Ngá Zo nghut ri.
Hkû-nyí, Ngò gi, Náng
Wa dut bê nghut lhê."✧

ga le, dum,

"Ngò gi, Yhâng Wa dut râ
nghut mù, Yhang gi,
Ngá Zo dut râ nghut
lhê."✧

ga le, maumang lagyo hká
yuq lé hkâ-nhám wá tái wú é
nghut lhê lúh? ⁶ Dum, Garai
Gasang gi, Yhâng é zomún lé
mingkan shut nhang hângkat
é hkûn,

"Ngá é maumang lagyô pé
banshoq gi, Yhang
lé noqkuq kó sháng
gaq."✧

ga tái ri. ⁷ Maumâng pé eq
séng luí Garai Gasang tái é
má,

"Yhang gi, Yhâng é maumang
lagyô pé lé lai su dut
nhâng mù, Yhâng é
dui-nhâng zoshâng wuì
lé, myishâm pé su dut
nhang é nghut ri."✧

gâ ri. ⁸ Nghut kôlhâng, haú Zo
eq séng luí, Yhang gi,

"Garai Gasang ê, Náng é
hkohkâm-tanghkuq
gi, pyat dedu ahtum
abyuq gîng nyì mù,

Náng é dingmán hkyô
gi, Náng é mingdán lé
uphâng é hkyô dut râ
nghut lhê.

⁹ Nàng gi, dingmán hkyô lé
chyitdap bê nghut mù,
agè ashop é hkyô lé a
ngui byuq lô é nghut
lhê.

✧ 1:6 Tarâ Pun 32:43 ✧ 1:7 Hkya-on

Haû mù luí, Garai Gasang, náng é Garai Gasang gi, Nang lé, gabú nhang é xû but byí é dông, Náng é luzúm wui htoq je lhoq gyaú to bê nghut ri."*

ga taí ri. ¹⁰ Hau htoq agó, Yhang gi,

"Yhumsing ê, Nang gi, a-nham sâng-hi má myidàm é apûn awang lé hi tô é nghut mù,

mauhkûng pé gi, Náng é loqmú chyat nghut ri.

¹¹ Haú pé gi, htên byoq byuq râ nghut lê; nghut kôlhang, nang gi, ru gîng nyi râ nghut lê; haú pé banshoq gi, mebu su xau byuq râ nghut lê.

¹² Nang gi, haú pé lé, bumó lé su dîng yup râ nghut lê; Nang gi, haú pé lé, mebu su htaí pyám râ nghut lê.

Nghut kôlhang, Nang gi, rajung za ru gîng nyi râ nghut mù, Náng é zanjwut pé gi, hkâ-nhám le htûm râ a nghut."*

ga le taí ri. ¹³ Garai Gasang gi,

"Ngò, náng é gye pé lé, náng é hkyi nang tanghkuq kut pyám byí é hkying jé shoq,

Ngá é loqyo hkyam shut zung nyi shi aq."*

ga maumang lagyo hká yuq lé hkâ-nhám wá taí wú é lúh?

¹⁴ Maumâng pé banshoq gi, hkyi yù hkyô lé hkam yù râ nghut é bang lé dojàu

râ matú, nhang kat huí é mù wùn woi-nyí pé chyat za nghut akô, a nghut kó lúh?

2

Sadiq Byí É Hkyô

¹ Haû mù luí, nga-nhúng gi, châng nghoq ló byuq é a hui zo sháng gaq, haû nga-nhúng wó gyô yu to bê hkyô lé je riyhang rago châng nyi râ dut lê. ² Hkâsu mù gâ le, maumang lagyô pê eq taí bê mungdang gi, gîng nyi mù, shut shaí lu lai é hkyô eq jino a gyô é hkyô hkangmó kut é sù gi, yhumsing eq gíng é mara dam byí é hui zo kô é nghut le gi, ³ nga-nhúng gi, haû-í yhang gyaú é hkyi yù hkyô lé haí su a ngàm kut é nghut jáng, nga-nhúng hkâsu wó hfang lut râ lúh? Hkyi yù hkyô haú gi, haû Yhumsing eq hí taí pyo htoq é nghut mù, Yhâng chyáng mai wó gyô yu é bang gi, haú hkyô têng é lé, ngamoq chyáng saksé shit bekô nghut ri. ⁴ Garai Gasang le, kumlhá pé, mauhpo muzó pé, laklaí kumlhá myo myo eq, Yhang ô nau é eq rajung za Chyoiyung Woi-nyí chyunghuq pé lé gàm byí é dông mai, haú hkyô lé saksé shit bê nghut ri.

Hkyi Yù Hkyô Hpóng Byi Sú

⁵ Garai Gasang gi, maumang lagyô pé lé, ngamoq taí nyi é jé lô râ mingkan lé, uphkâng nhâng râ a nghut. ⁶ Rayuq yuq mai, rawò má saksé hkâm tô é gi,

"Byù gi, haì wá nghut mù, Nàng, yhang lé bûn nyi lê lúhú?

Byu Yhangzo gi, haì wá nghut mù, Nàng, yhang lé wú gôn nyi lê lúhú?

⁷ Nàng gi, yhang lé, maumang lagyô pê htoq ratsuí lhoq nyhum to bê nghut ri.

Nàng gi, yhang lé, hpungwup shing kang eq aróng bò nhâng mù,

⁸ jung hkan gmó lé, yhâng é hkyiwa ô má tô to bê nghut ri."*

gâ ri. Jung hkan gmó lé yhâng é a-ô má tô to bê gâ é gi, Garai Gasang, haì lhang a myhit to loshoq yhang uphkang é a-ô má tô to bê nghut é lé gâ lê. Nghut kôlhang, yhang é a-ô má tô tô é jung hkan gmó lé, ahkuí, nga-nhúng a myàng shí é za nghut lê. ⁹ Nghut kôlhang, nga-nhúng gi, maumang lagyô pê htoq ratsuí zo lhoq nyhum huí é sù Yesuq lé myang é nghut lê. Yhang gi, Garai Gasang jeju mai, yuq hkan gmó é matú shí hkám byí é hui zo sháng gaq ga, shí-nò jamjau hkyô lé hkám zo bê nghut é yanmai, ahkuí, Yhang lé hpungwup shing kang eq aróng bò nhâng bê nghut ri.

¹⁰ Zo wuí myo myo lé hpungwup shing kang wó hkam yù nhâng sháng gaq ga, jung hkan gmó lé Yhang é matú chyat eq Yhang đông mai chyat joq nyi nhang

é Garai Gasang gi, wuíhke jamjau hui nhang é đông, yhangmoq é hkyi yù Sù lé lhoq gumjup byi râ matú htuk âng nyi ri. ¹¹ Haù byu pé lé chyoiyúng nhang é Sù eq lhoq chyoiyúng huí é bang gi, ikun ralhum za mâ é bang chyat nghut lê. Haù mù, Yesuq gi, yhangmoq lé, gumang wui nghu râ lé a hoq é nghut lê.

¹² "Ngò gi, Náng myíng lé, Ngá gumang wui chyáng tái pyô râ nghut lê;

Ngò gi, shiwa hpông é myoq hí má, Nang lé hkya-on mahkôn hkôn râ nghut lê."*

ga, Yhang tái ri. ¹³ Yhang gi, "Ngò gi, Yhang lé lumhkau nyi râ nghut lê."*

ga le dum tái ri. Hau htoq agó,

"Ngò gi, Garai Gasang ngo lé byí é zoshâng wui eq shí má nyi nyi lê."*

ga, Yhang dum tái ri.

¹⁴ Haù zoshâng wui gi, sui sho eq nghut é yanmai, Yhang le, yhangmoq é xângzo gùng bo hkam yù bê nghut ri. Hau é yanmai, Yhang gi, Yhâng é shí-nò hkyô đông mai, shí-nò hkyô é a-tsam lé zui zing é sù nghut é nat Tsadán lé wó lhoq htên pyám râ eq, ¹⁵ yhangmoq é shí-nò hkyô lé gyuq é eq, yhangmoq é asak gón lé jùn đông zui zing to huí é bang lé, wó lhoq lhut râ nghut lê. ¹⁶ Gè gè yhang, Yhang gi, maumang lagyô pé lé garúm é a nghut

* 2:8 Hkya-on 8:4-6 * 2:12 Hkya-on 22:22 * 2:13 Esai 8:17 * 2:13 Esai 8:18

é za, Abraham é awut ashín pé lé garúm é sheq ru nghut lhê. ¹⁷ Haû nghut é yanmai, Yhang gi, Garai Gasang lé dojaú é má shogyo nhikmyîn é eq lhumzuí é hkyangjong mó wó dut râ eq, byu pé é yubak marâ é matú shîhtaí gunglik hkungga wó kut râ matú, hkyô hkangmó má Yhâng é gumang wuì eq dù shoq kut é hui râ dut é nghut lhê. ¹⁸ Yhang gi, gunглау huí é hkûn, Yhânggùn yhang jamjau hui zo bê nghut é yanmai, gunглау huí nyi é bang lé wó garúm yu é nghut lhê.

3

Yesuq Gi, Mosheq Htoq Gyaú É Hkyô

¹ Haû mù luí, mauhkûng mai wut yù huí é, chyoyúng é gumang wuì ê, lagyo eq hkyangjong mó nghû nga-nhúng yín yu é Yesuq é hkyô lé rago myit wú keq. ² Mosheq, Garai Gasâng é yhûm gón má lhumzuí é su, Yesuq le, Yhang lé masat yù sù Garai Gasâng chyáng lhumzui sù dut bê nghut ri.* ³ Yhûm kut sù gi, yhûm htoq je gyaú é aróng lé wó é su, Mosheq htoq, Yesuq gi, je gyaú é aróng lé wó gíng é lé myàng ri. ⁴ Hkâsu mù gâ le, yhûm hkangmó gi, rayuq yuq èq saí é chyat nghut ri. Nghut kôlhang, Garai Gasang gi, jung hkangmó lé saí é sù nghut lhê. ⁵ Mosheq gi, Garai

Gasâng é yhûm gón má dui-nhâng zoshâng rayuq đông lhumzui mù, Garai Gasang taí râ nghut é lé saksé hkám bê nghut ri. ⁶ Nghut kôlhang, Hkrisduq gi, lhumzuí é zo rayuq đông Garai Gasâng é yhûm lé up ri. Nga-nhúng kúm gi, nga-nhúng lé wám é myit bò nhang é hkyô eq nga-nhúng gumrong nyi é myoqbyù hkyô lé myhik zing nyi é nghut jáng, Yhâng é yhûm nghut nyi bê.

A Lumjínq Bang Lé Sidiq Byí É Hkyô

⁷ Haû mù luí, haû Chyoyúng Woi-nyí taí é eq rajung za,

"Hkû-nyí, nungmoq gi, Yhâng é danghtê lé wó gyo kô é nghut jáng, ⁸ yoso má Yhang lé chyâm kô é u lé,

gumlau toq é hkûn nungmoq é îchyí îwâ pé kut kô é su, nungmoq é i-myit lé hkâlhoq htan to kó.

⁹ Nungmoq é îchyí îwâ pé gi, myi xê zàn yhang Ngò kut é muzó lé myàng kôle, yoso haú má Ngo lé chyam lik bekô nghut ri.

¹⁰ Haû nghut é yanmai, Ngò gi, ipyat haú lé nhikjum yo mù,

'Yhangmoq é myit nhiklum gi, hkâ-nhám le hkyô ngoq byuq akô; yhangmoq gi, ngá é hkyô pé lé a sé kômù nghut

* **3:2** Bun zo shí eq bun zo 5, 6 lhum mâ é Garai Gasâng é yhûm gâ é gi, Garai Gasâng é byu pé lé gâ é nghut lhê.

ri.' nghũ taĩ é nghut lhê.

11 Haũ mù, 'Ngá é bánno jowò má yhangmoq hkâ-nhám le wó wâng kó rá a nghut.' nghũ, Ngò, nhikjum yô é eq dakâm dang taĩ bê nghut lhê."^{*}

gâ ri.

12 Gumang wuĩ ê, nungmoq mâ é ó yuq le, haũ rû dui nyĩ é Garai Gasâng chyáng mai, lhing taũ ló byuq sê é, yubak mara byíng é, a lumjíng é i-myit a bò sháng gaq, sidiq nyĩ keq. 13 Nungmoq gi, ó yuq le, yubak marâ é mhaũ zô é hkyo èq i-myit lhoq htan pyâm é a hui kó sháng gaq, "hkũ-nyĩ" nghũ ru wó taĩ nyĩ nyĩ gi, nyĩ wuĩ, rayuq eq rayuq myit wum byĩ lhũm nyĩ keq. 14 Nga-nhúng gi, sâng-hi mai wó to bê myit lùm hkyô lé, ló htáng shoq zuĩ gíng nyĩ é nghut jáng, Hkrisduq eq chôm zùm yap nyĩ é bang dut bê nghut ri. 15 Haũ gi,

"Hkũ-nyĩ, nungmoq, Yhâng é danghtê lé wó gyô é nghut jáng, gumlau toq é hkũn, nungmoq é íchyĩ íwâ pé kut kô é su, nungmoq é i-myit lé hkálhoq htan to kó."^{*} ga taĩ é eq rajung za nghut ri.

16 Wó gyô yù mù, gumlau toq é bang gi, ô pé nghut akô lhú? Haũ bang banshoq gi, Egutuq ming mai Mosheq èq shuĩ htoq lo é bang nghut bum lhê, a nghut kó lhú? 17 Myi xê zàn yhang Garai

Gasang lé nhikjum yô nhang é bang gi, ô pé nghut akô lhú? Haũ bang gi, mara kut shut mù, yoso má shi leq byuq é bang nghut bum lhê, a nghut kó lhú? 18 Jìno a gyô bùm kô é nghut jáng, Yhâng é bánno jowò má yhangmoq hkâ-nhám le wó wâng kó rá a nghut ga, Garai Gasâng èq dakam é bang gi, ô pé nghut akô lhú? 19 Haũ mù, yhangmoq a lumjíng kô é yanmai, a wó wâng kô é lé, nga-nhúng myang é nghut lhê.

4

Garai Gasâng É Byu Pé É Matú Bánno Buinyĩ Đông Nghut É Bánno Jowò

1 Haũ nghut mù luĩ, Garai Gasâng é bánno jowò má wàng rá danggidiq ru gíng nyĩ ashĩ nghut é yanmai, nungmoq mâ é ó yuq le, haũ má a hkyit hkap é a dut rá matú, nga-nhúng sidiq nyĩ sháng. 2 Hkâsu mù gâ le, yhangmoq lé gabú danglù haũ hko kyo bê su, ngamoq lé le hko kyo bê nghut lhê; nghut kôlhang, yhangmoq wó gyô é mungdang gi, yhangmoq é matú akyũ a bò, haĩ mù gâ le, haũ wó gyô é bang gi, lumjíng myit mai a lhom hap yù kô é yanmai nghut ri. 3 Nga-nhúng lumjíng bê bang za, bánno jowò haũ má wó wang é nghut lhê. Haũ hkyô gi,

"Haũ mù, 'Ngá é bánno jowò má yhangmoq hkâ-nhám le wó wâng ko

râ a nghut.' nghû,
Ngò, nhikjum yô é
èq dakâm dang taí bê
nghut lhê."[☆]

ga Garai Gasang taí bê eq ra-
jung za dut é nghut ri. Nghut
kôlhang, Yhâng é muzó gi,
mau htoq xâng hkun mai ban
kut to bê nghut lhê. ⁴ Hkâsu
mù gâ le, "Garai Gasang gi,
nyhit nyí nghû râ buinyì má
Yhâng é muzó banshoq mai
bánno bê nghut ri."[☆] gâ é
dang pé má, haû nyhit nyí
nghû râ buinyì eq sêng é hkyô
lé rawò má Yhang taí tô ri.
⁵ Bánno jowò joq é eq séng luí,
Yhang dum taí tô é gi, "Ngá
é bánno jowò má yhangmoq
hkâ-nhám le wó wâng kó râ a
nghut."[☆] gâ ri.

⁶ Bánno jowò haú má wàng
râ bang ra-am nyí é dang-
gidiq joq tô ashí nghut ri;
hí hkûn, gabú danglù haû
wó gyô wú bê bang kúm gi,
yhangmoq jìno a gyo kô é yan-
mai, a wàng kô é nghut lhê.

⁷ Haû mù luí,

"Hkû-nyí, nungmoq, Yhâng é
danghtê lé wó gyo kô
é nghut jáng, nungmoq
é i-myt lé hkâlhoq htân
kó."[☆]

gâ é lé, ngò hí lé taí bê eq
rajung za, Garai Gasang
gi, gyai myáng é htâng má
Dawiq dông mai taí é hkûn,
"Hkû-nyí" gâ é buinyì ra-nyí
dum masat to bê nghut ri.
⁸ Hkâsu mù gâ le, yhangmoq
lé, Yoshuq èq bánno jowò
byi bê ru nghut le gi, Garai
Gasang gi, htâng má, gotú

buinyì eq séng luí taí râ a
nghut lo. ⁹ Haû mù luí, Garai
Gasâng é byu pê é matú gi,
Bánno buinyì dông nghut é
bánno jowò ru joq tô ashí
nghut lhê. ¹⁰ Hkâsu mù gâ
le, Garai Gasang gi, Yhâng é
muzó mai bannô é su, Garai
Gasâng é bánno jowò má wàng
é sù gi, yhumsing é muzó mai
bánno râ nghut lhê. ¹¹ Haû
nghut mù, yhangmoq é jìno a
gyo hkyo é alik lé cháng mù
leqbat é, ó yuq le a bò sháng
gaq, nga-nhúng gi, bánno
jowò haú má wó wâng shoq,
a-tsam bo é í shikut sháng.

¹² Hkâsu mù gâ le, Garai
Gasâng é mungdang gi, rû dui
nyí é eq a-tsam bo é nghut
lhê. Haû gi, shamsó íshut
dap é sham htoq má je htoq
é nghut mù, myit nhiklum
eq woi-nyí lé le, wuimyoq
pé eq wui-nyún lé le, wó
gam hkoq hkyang rot é nghut
lhê; haû gi, nga-nhúng myit é
hkyô pé eq myit sôn é hkyô
pé lé wó jéyáng é nghut lhê.

¹³ Hpan tô é lhunglhang gi,
Garai Gasâng é hí mai wó haq
pyâm é haí le a joq é nghut
lhê. Jung hkangmó gi, nga-
nhúng, jihpán shit ra râ Su é
myoq hí má a wó nghop tô é
hkyô, de de dut é nghut lhê.

*Je Gyaú É Hkyangjong Mó
Yesuq*

¹⁴ Haû mù luí, nga-nhúng
gi, Garai Gasâng é Yhangzo
Yesuq nghut sù, mauhkung
pê shut hkyang doq ló bê
nghut é gyaú é hkyangjong

☆ 4:3 Hkya-on 95:11 ☆ 4:4 Apûn 2:2
95:7-8

☆ 4:5 Hkya-on 95:11 ☆ 4:7 Hkya-on

mó lé wó é nghut é yan-
mai, nga-nhúng yín yu to bê
lumjǐng hkyô lé ging ging my-
hik zing nyi sháng. ¹⁵ Hkâsu
mù gâ le, nga-nhúng gi, nga-
nhúng wum nyhôm é hkyô pé
lé a sê gyo byi é hkyangjong
mó wó é a nghut é za, nga-
nhúng su hkyô hkanmó má
gunglaú é huí wú kôlhang
mara a bo é sù hkyangjong
mó lé sheq wó é ru nghut
lhê. ¹⁶ Haú mù luí, nga-nhúng
gi, shogyo nhikmyín é hkyô
wó yú râ eq, nga-nhúng ra
chá é u má nga-nhúng le wó
garúm râ jeju lé myang hô
sháng gaq, hkyak lum é myit
mai Garaí jeju tanghkuq shut
chyâng htep ê sháng.

5

¹ Hkyangjong mó yuq
hkanmó gi, byu pê chyáng
mai hkyin htoq yú huí é
nghut mù, mara pê é matú,
chyunghuq pé eq hkungga
pé nhông byi hkyô nghut é,
Garaí Gasang eq sêng é muzó
pé má, yhangmoq é gunglik
dông, hkyin masat to huí é
bang nghut akô. ² Yhânggùng
yhang gi, wum nyhóm hkyo é
a-ô má nghut nyi é yanmai,
yhang gi, bun a bóng é eq
hkyô ngoq ló é bang lé nú-
nhâm é dông wó shuí-û é
nghut lhê. ³ Wum nyhôm é
yanmai, yhang gi, byu pê é
marâ é matú le, yhânggùng
yhâng é marâ é matú le,
hkungga nhông byi râ dut é
nghut lhê.

⁴ Ó yuq le, yhumsing gùng
yhumsing aróng haú lé wó
yu é a nghut; Arun lé su,
Garaí Gasang eq wut yu é hui
jáng sheq wó é nghut lhê.

⁵ Haú eq rajung za, Hkris-
duq le, hkyangjong mó dut
lo é hpungwup shingkang lé,
Yhânggùng yhang kut yu é a
nghut. Garaí Gasang sheq,
Yhang lé,

"Nàng gi, Ngá Zo nghut ri;
Ngò, hkû-nyí Náng Wa
dut bê nghut lhê."*

ga taí é nghut lhê. ⁶ Hau htoq
agó,

"Nàng gi, Melahkizedek wó é
hkyangjong ayá hkyô
dông mai ahtum abyuq
hkyangjong rayuq
nghut nyi ri."*

ga, gó wô má le, Yhang taí to
ashí nghut ri.

⁷ Yesuq gi, myidàm htoq
má asak dui nyi é buinyi pé
má, Yhang lé, shi é mai wó
hkyi yú Su chyáng, ngaubyi
ngau-nhap eq wut garú é eq,
kyúdung é eq dung tôngbán bê
nghut mù, Yhâng é hkungga
gíng é ap nóng hkyo é yanmai,
gyo byi é hui bê nghut ri.

⁸ Yhang gi, Zo rayuq nghut to
kôle, Yhang hui zô é wuíhke
jamjau hkyô mai jìno gyo
hkyô wó mhoq yú bê nghut
ri. ⁹ Yhang gi, lhoq gumjup
huí é hkún, Yhang é jìno
gyo bang banshoq é matú,
ahum abyuq é hkyi yú hkyo
é awang dut byuq bê nghut
é eq, ¹⁰ Melahkizedek wó é
hkyangjong ayá hkyô dông
mai hkyangjong mó dut râ

matú, Garai Gasâng eq hkyin masat é hui bê sù nghut ri.

Woi-nyí Má Wáng Ra Bê Hkyô

¹¹ Ngamoq gi, shí hkyô eq séng luí taí rã gyai joq lhê; nghut kôlhang, nungmoq gi, ra lui za a sê gyô é bang nghut kô é yanmai, taí sân kyo wuî ri. ¹² Gè gè ga jáng, ahkuî lhê ahkyíng má, nungmoq gi, sará dut gíng bê bang nghut lhê; nghut kôlhang, Garai Gasâng é mungdang mâ é tengmán hkyo é awang lé, rayuq yuq eq nungmoq lé dum taû mhoq byi rã ru dut nyi akô nghut ri. Nungmoq gi, htan é zoshuq rã é bang a nghut, naú wing rã é bang ru nghut nyi ashí kó myhi-nhung! ¹³ Naú wing shuq rã é sù ó yuq le, zonú nghut nyi ashí mù, dingmán é hkyô lé mhoqshit é má a mán shi nghut ri. ¹⁴ Nghut kôlhang, htan é zoshuq gi, ge é hkyô eq agè ashop é hkyô lé wó sê gam hkoq yû shoq, hkâ-nhám le yhumsing gùng yhumsing lhoq mhân yu nyi é, kô ding bê bâng é matú ru nghut lhê.

6

¹ Haû mù luí, nga-nhúng gi, Hkrisduq eq séng é mho-qshit hkyô awang lé tô to mù, myit kô ding é hkyô shut xoq sô é sháng. Nga-nhúng gi, shî-nò hkyô shut shuî jé é muzó mai myit lhîng hkyo é, Garai Gasang lé lumjîng hkyo é, ² baptisma pé, loq ke byi hkyô, shi é mai dum dui toq hkyô eq ahtum abyuq

jéyáng hkyô eq séng é mho-qshit hkyo é, apùn awang dum hî nó a ra lô é nghut lhê. ³ Garai Gasang gyô é nghut jáng, nga-nhúng gi, myit kô ding hkyô shut xoq so rã nghut lhê.

⁴ Myoq lhoq bóng é radàm hui bê bang, mauhkûng chyunghuq lé myang hap yû bê bang, haû Chyoiyúng Woi-nyí lé chôm hkam yû bê bang, ⁵ Garai Gasâng é mungdâng é gè hkyô eq jé lo nyi é ipyat é a-tsam pé lé myang chyam wú bê bang, ⁶ yhangmoq hpuq lhik ló byuq é nghut le gi, hká dông lé myit lhîng dum ge wó rã a nghut lo, haû mù gâ le, yhangmoq gi, Garai Gasâng é Yhangzo lé dum jén sat pyâm é dut mù, Yhang lé de de rhoi pyâm kô é nghut lhê.

⁷ Yhâng ahtoq má wo gyûn é mau wuî lé shuq yû mù, yò mù saí bâng é matú akyû bo é hôwa nuqhpyí lhoq htoq byí é maumyí gi, Garai Gasâng é shimân jeju myang hap yu é nghut ri. ⁸ Nghut kôlhang, zu gâm eq myoq gâm yuq htoq nhang é maumyí gi, akyû a bò mù, nhîng pyâm é hui zo rã lé chiq rã ri. Haû gi, ló htáng má nyhê hkyô pyâm é hui rã nghut lhê.

⁹ Nghut kôlhang, chyitdap é gumang wuî ê, ngamoq gi, haû su nghû taí é nghut kôlhang, nungmoq é hkyi yû hkyô eq séng é je ge é jung pé, nungmoq wó bekô rã nghû hkyak myit lum tô lhê. ¹⁰ Garai Gasang gi, a tara é sù a nghut. Yhang gi,

nungmoq é muzó lé le, Yhâng é byu pé lé nungmoq garúm bê eq xoq luí garúm nyi é dông, Yhang lé nungmoq chyitdap é myit shit kô é hkyô lé le, a tô-myhí râ nghut lhê. ¹¹ Ngamoq gi, nungmoq é i-myt myoqbyù hkyô wó byíng Jup râ matú, nungmoq yuq hkgangmó ipyat htum shoq xoq shikut nyi kó râ lé gyai ô nau ri. ¹² Ngamoq gi, nungmoq lagon bang dut byuq râ lé a ô nau é za, Garaí danggidiq byi to bê é lé, lumjíng myit eq myit hîng hkyô dông mai hkam yu é bang su châng kut kó râ lé ô nau é ru nghut lhê.

*Garaí Gasâng É Danggidiq
Gíng Nyi É Hkyô*

¹³ Garaí Gasang gi, Abraham lé danggidiq tô é hkûn, Yhâng htoq gyaú é dakâm myíng lang râ rayuq lhang a nyi é nghut mù, Yhânggùng lé Yhang lang luí dakam é gi, ¹⁴ "Ngò gi, nang lé teng yhang shimân byi mù, nang lé awut ashín myo myo byi râ nghut lhê." ✱ gâ ri. ¹⁵ Haú mù, Abraham gi, myit hîng hîng lánng yu é htâng má, byi tô é danggidiq lé wó yú bê nghut ri.

¹⁶ Byu pé gi, yhangmoq htoq gyaú su é myíng lé lang luí, dakâm kô é eq, yhangmoq dakam é dang lé saksé kut mù, dang-rháng é hkyô pé banshoq lé lhoq pân pyâm akô nghut ri. ¹⁷ Garaí Gasang gi, Yhang myit hpyit tô é hkâ-nhám le a htaí lhik é hkyô lé,

danggidiq byi tô é lé hkam yú râ bâng chyáng san za shit nau ri; haú mù luí, dakâm dang eq lhoq gíng to bê nghut ri. ¹⁸ Garaí Gasang gi, mhaú a ge é yanmai, hkâ-nhám le a htaí lhik é hkyô í hkat nghut é danggidiq eq dakâm dang joq é nghut mù, Yhang haú su kut é gi, nga-nhûng hí má tô to byi é myit myoqbyù hkyô lé myhik zîng râ matú gaú é jowò shut h pang wàng bê bang nga-nhûng lé wum mó byi é dut râ matú nghut lhê. ¹⁹ Nganhûng gi, myit nhiklhûm é shamtoq goknghe dông myit myoqbyù hkyô haú lé wó é nghut mù, haú gi, gíngtîng é eq gaú é hkyô nghut ri. Myit myoqbyù hkyô haú gi, mauhkûng noqkuq yhûm mâ é pân-gyang ahkaú mâ é sân-yúng gok má jé wang é nghut ri. ²⁰ Jowò haú gi, nganhûng é akyu é matú, nganhûng é hí má wàng byi é sù Yesuq wang jé é jowò nghut ri. Yhang gi, Melahkizedek wó é hkyangjong ayá hkyô dông mai, ahtum abyuq é hkyangjong mó dut bê nghut ri.

7

*Hkyangjong Melahk-
izedek É Hkyô*

¹ Melahkizedek gi, Salem myuq é hkohkâm eq Myhang Htâng é Garaí Gasâng é hkyangjong nghut ri. Yhang gi, hkohkâm pé lé sat ûng pyám luí dum taú lo é Abraham lé hui mù, shimân

byi bê nghut ri. ² Haû mù, Abraham gi, wó lo é jung hkanmó mâ é, xê gambùm mâ é ragambùm, yhang lé byi bê nghut ri. Sâng-hi lhê é Melahkizedek é mying lichyúm gi, "dingmán hkyo é hkohkâm" gâ é nghut mù, htâng lhê é "Salem é hkohkâm" gâ é gi, "nguingón hkyo é hkohkâm" gâ é nghut lhê. ³ Yhâng é înu îwa é hkyô eq byùxik labaù le, hi é buinyi eq asak htùm é hkyô le a kê to nghut ri. Yhang gi, Garai Gasâng é Yhangzo su, ahtum abyuq hkyangjong ru nghut nyi ri.

⁴ Yhang hkâ-í hkik lhê nghû é lé, myit wú keq. Haû îchyí îwa Abraham lháng gi, wó lo é mâ é xê gambùm mâ é ragambùm, yhang lé byi ri-nhung! ⁵ Hkyangjong dut bang Lewiq é awut ashîn pé gi, yhangmoq é gumang wui, Abraham mai nyi gyó lo é bang nghut kôle, tarâ má bo é eq rajung za, haú bâng chyáng mai xê gambùm mâ é ragambùm lé hkyui yù râ dut é bang nghut akô. ⁶ Nghut kôlhang, Melahkizedek gi, Lewiq mai gyó lo é amyû a nghut kôle, danggidiq pé wó to sù nghut é Abraham chyáng mai xê gambùm mâ é ragambùm hap yù mù, shimân byi ri. ⁷ Shimân byi sù gi, shimân byi é lé hkam yù sù htoq je gyaú sù nghut é lé, ó yuq le úng-áng râ hkyô a joq é nghut lhê. ⁸ Hkyangjông pé eq séng luí ga jang, shi byuq sê é byu eq, xê gambùm

mâ é ragambùm lé hkyui yu é nghut lhê; nghut kôlhang, Melahkizedek eq séng luí nghut jáng, asak dui nyi é ga taí pyô byí é huí su eq hkyui yu é nghut lhê. ⁹ Xê gambùm mâ é ragambùm hkyui yù sù, Lewiq lháng gi, Abraham dông mai xê gambùm mâ é ragambùm byi bê nghû wó taí ri. ¹⁰ Haí mù gâ le, Melahkizedek gi, Abraham lé huí é hkûn, Lewiq gi, yhâng é îchyí îké é gungdu hkaù má ru bo tô ashí nghut ri.

Melahkizedek Eq Dù É Yesuq

¹¹ Haû Lewiq hkyangjong amyû pé é ipyat má, byu pé gi, jep é tarâ lé wó yu bùm kô é nghut mù, hkyangjong ayá haû mai gumjup hkyô wó yù kô é nghut le gi, haí mù luí, Arun wó é hkyangjong ayá hkyo dông a nghut é za, Melahkizedek wó é hkyangjong ayá hkyo dông lo é sù gotû hkyangjong rayuq ra shirâ lhú? ¹² Hkâsu mù gâ le, hkyangjong amyû htaí é hkûn gi, tarâ le htaí yhang htaí râ dut é nghut lhê. ¹³ Haû su nghû taí é hkyô pé eq séng é Sù gi, gotû byuhú mâ é sù nghut mù, byuhú haû mai gi, ó yuq le hkungga gyap má dojaú wú é a nghut. ¹⁴ Hkâsu mù gâ le, nga-nhûng é Yhumsîng gi, Yudaq byuhú mai gyó lo é awut ashîn nghut é hkyô, san za nghut nyi ri. Mosheq kúm gi, byuhú haú eq séng é hkyô má, hkyangjong pé eq séng luí haí lé a taí é nghut

lhê. ¹⁵ Melahkizedek eq dù é gotû hkyangjong rayuq pô htoq bê nghû, ngamoq taí bê hkyô gi, je riyhang san za dut bê nghut ri. ¹⁶ Yhang gi, îwa rayuq é awut ashín pé nghut râ lhê gâ é tarâ dông hkyangjong rayuq lé dut é a nghut é za, a wó lhoq htên é asak é a-tsam eq rajung za lé dut é ru nghut lhê. ¹⁷ Hkâsu mù gâ le,

"Nàng gi, Melahkizedek wó é hkyangjong ayá hkyô dông mai, ahtum abyuq hkyangjong rayuq nghut nyi ri."*
ga Yhang eq séng luí taí pyo tô é nghut lhê.

¹⁸ Haû hí lhê é cháng râ tarâ gi, wum nyhôm é eq akyû a bo é yanmai, tô pyám bê nghut lhê. ¹⁹ Hkâsu mù gâ le, haû jep é tarâ gi, gumjup hkyô haí a wó kut byí é nghut lhê. Haû mù, je ge é myit myoqbyù hkyô lajang byí é nghut luí, nga-nhúng gi, myit myoqbyù hkyô haû mai Garai Gasâng chyáng wó chyâng htep ê é nghut lhê.

²⁰ Myit myoqbyù hkyô haû gi, dakâm hkyô a bo é a nghut myhi-nhung! Góbang gi, dakâm hkyô a bo é za hkyangjông pé wó dut bekô nghut ri. ²¹ Nghut kôlhang, Yesuq kúm gi,

"Nàng gi, ahtum abyuq hkyangjong rayuq nghut lhê.'
ga haû Yhumsing dakâm bê nghut mù, Yhang

myit é hkyô htaí râ a nghut."*

ga, Yhang eq séng luí Garai Gasang taí é hkûn, dakâm dang haû mai hkyangjong rayuq dut bê nghut ri. ²² Dakâm dang hau é yanmai, Yesuq gi, je ge é dangshikaq é pahkám wò yù sù dut bê nghut ri.

²³ Hkyangjông pé myo myo nyi râ dut é gi, yhangmoq é muzó a wó xoq zui shoq shi byuq hkyô eq hkûm zing pyám kô é yanmai nghut ri. ²⁴ Nghut kôlhang, Yesuq gi, ahtum abyuq dui nyi sù nghut é yanmai, Yhang gi, hkyangjong mô ayang ru zui nyí râ nghut lhê. ²⁵ Haû mù luí, Yhang gi, Yhang dông mai Garai Gasâng chyáng lé jé é bang lé, hkâ-nhám le wó hkyi yu é nghut lhê; haí mù gâ le, Yhang gi, yhangmoq é matú dúng tôngbán byi nyi râ matú, rû dui nyi é sù nghut lhê.

²⁶ Yesuq gi, chyoiyúng é sù, mara hún râ hkyô a bo é sù, sân-yúng é sù, yubak dap bang eq rahá a nghut shoq gotû san kut huí é sù, mauhkúng pé ahtoq má lhoq toq lhoq gyaú yu huí é sù nghut ri. Haû sù é hkyangjong mó gi, nga-nhúng râ é lé lajang byi râ htuk ang ri. ²⁷ Nyí nyí bui bui, yhumsing é marâ é matú hí hkungga nhông byi mù, byu pé é mara matú le hkungga nhông byí é gotû hkyangjong mó pé su, Yhang gi, a kut râ é sù nghut lhê. Yhang gi,

Yhânggùng lé Yhang nhông byi é hkûn, yhangmoq é yubak marâ é matú banshoq radàm za hkungga nhông byi pyám bê nghut ri. ²⁸ Hkâsu mù gâ le, haû jep é tarâ gi, wum nyhôm é byu pé lé hkyangjong mó pé dông masat é nghut ri. Nghut kôlhang, Garai Gasang gi, haû jep é tarâ é htâng má lé jé é dakâm dâng èq, Yhâng é Yuqzo lé masat to bê nghut mù, Yhang gi, ahtum abyuq lhoq gumjup hui bê nghut ri.

8

Dangshikaq Asik É Hkyangjong Mó Yesuq

¹ Ngamoq taí nyi é dangkâng gi, shí dông nghut lhê: Nga-nhúng gi, haû sù é hkyangjong mó lé wó é bang nghut lhê. Yhang gi, mauhkûng htoq má, Hkikhkam dik Sû Garaî é hkohkâm-tanghkuq é loqyò hkyam shut zùng to mù, ² byu èq saí é a nghut é za, haû Yhumsing èq saí é saksé zúm akying hkaû mâ é, sân-yúng dik gok má dojaú é sù nghut ri.

³ Hkyangjong mó hkan gmó gi, chyunghuq pé eq hkungga pé lé nhông byi râ matú wò hun to huí é chyat nghut lhê. Haû mù luí, hkyangjong mó shí yuq le, rajung jung nhông byi ra râ nghut lhê. ⁴ Yhang gi, mingkan htoq má nyi tô é ru nghut le gi, hkyangjong dut râ a nghut; hkâsu mù gâ le, jep é tarâ dông ga

jang, chyunghuq nhông jaú é byu pé nyi to gù bê nghut lhê. ⁵ Yhangmoq, sân-yúng dik gok má dojaú é hkyô gi, mauhkûng htoq má joq é azòng eq wupzo dông nghut ri. Haû nghut é yanmai, Mosheq gi, saksé zúm saí râ nghut é hkûn, "Nang lé, bùm má tún shit é azòng eq rajung za jung hkan gmó wó saí shoq kut aq."* ga sidiq byi huí é nghut lhê. ⁶ Nghut kôlhang, Yesuq, gyoro sô xoq byi é dangshikaq gi, axaû lhùm htoq má je gyaú é eq rajung za Yhang hap yu tô é dojaú hkyô gi, yhangmoq é dojaú hkyô htoq má je gyaú é nghut lhê. Haû mù, dangshikaq haû gi, je ge é danggidiq pê htoq má awang hi tô é nghut lhê.

⁷ Hkâsu mù gâ le, sân-hi lhê é dangshikaq má râ é hkyô haí a bo é ru nghut le gi, gotû ra râ a nghut lo. ⁸ Nghut kôlhang, Garai Gasang gi, byu pê chyáng mara bo é myàng mù, taí é gi,

"Haû Israelaq é yhumbyù wuì eq le, Yudaq é yhumbyù wuì eq le,

Ngò, dangshikaq asik to râ ahkyíng jé lo nyi ri ga haû Yhumsing taí pyo ri.

⁹ Haû gi, Ngò, yhangmoq é íchyí íwâ pé lé loq èq zui mù, Egutuq ming mai shuì htoq lo é hkûn,

yhangmoq eq tô tô é dangshikaq su dut râ a nghut.

Haî mù gâ le, yhangmoq gi,
Ngá é dangshikaq lé a
xoq cháng kô é nghut
mù,

Ngò gi, yhangmoq chyáng
mai lhing ló byuq
é nghut lhê ga haû
Yhumsing taî pyo ri.

10 Shî gi, ahkyíng haû laî
é htâng má, Israelaq
é yhumbyù wuì eq
Ngò to râ nghut é
dangshikaq nghut lhê
ga haû Yhumsing taî
pyo ri.

Ngò gi, Ngá é tarâ pé lé,
yhangmoq é i-myt má
kat byi mù, yhangmoq
é myit nhiklhum má kâ
to byi râ nghut lhê.

Ngò gi, yhangmoq é Garai
Gasang nghut mù,
yhangmoq gi, Ngá é
byu pé dut kó râ nghut
lhê.

11 'Haû Yhumsing lé sé keq.'
ga, yhâng é gumang
hpó lé nghut nghut,
yhâng é chyangnâm mâ
é sù lé nghut nghut,
mhoqshit é byù nyì râ
a nghut lo,

haî mù gâ lé, yhangmoq
lhunglhâng bang gi, tiq
htáng sù mai kô htáng
sù jé shoq Ngo lé sé kó
râ nghut lhê.

12 Hkâsu mù gâ le, Ngò
gi, yhangmoq é agè
ashop hkyô lé mara
hkyut pyám byi mù,
yhangmoq é mara pé

lé dum a bun byi lo râ
nghut lhê."☆

gâ ri.

13 Dangshikaq haû lé,
Yhang "asik" gâ é gi, sâng-
hî lhum lé, axau kut pyâm é
nghut ri; xau ló byuq é haî
le, hkâ-myháng a myáng má
byuq ló byuq râ nghut lhê.

9

*Myidàm Saksé Zúm Má No-
qkuq É Hkyô*

1 Sâng-hi lhê é dangshikaq
gi, noqkuq râ htúngtarâ pé eq
noqkuq râ myidàm sân-yúng
dik gok bo é nghut ri. 2 Saî
tô é saksé zúm é sâng-hi gok
má gi, haû myibung tsúng
jang, siboî eq haû nhông
byí é muk joq mù, haú gok
lé gi, Chyoiyúng Jowò ga
myhîng ri. 3 Í dang nghû râ
gok pán-gyang é ahkaû mâ é
gok lé gi, Chyoiyúng Htâng é
Jowò gâ é nghut lhê. 4 Gok
haû má gi, namngón jung
nyhê é hîng hkungga gyap
eq hîng shup dangshikaq
sidek joq ri. Dangshikaq
sidek haû má gi, mannaq
muk bo é hîng yam, ahaq
nyún tô é, Arun é dumbáng
eq, dangshikaq luqlong pé
bo tô ri. 5 Dangshikaq
sidek é ahtoq má gi, shîhtaî
gunglik hkungga byi jang
htoq má wup tô é, Hpungwup
shingkang bò Sù é hkerubim*
pé joq tô ri. Nghut kôlhang,
ngamoq gi, ahkuî haú pé lé

☆ 8:12 Yer 31:31-34 * 9:5 Hkerubim gâ é gi, byù su su, dusak su su dut é, dùng
dap é maumang lagyo rahú nghut lhê.

jihkúm nuqguq a wó taí san kyo é nghut lhê.

⁶ Haû dông jung hkgangmó ban lajang tô é hkûn, hkyangjông pé gi, ayang sâng-hi gok má wàng mù, yhangmoq é dojaú muzó lé wùn waq bekô nghut ri.

⁷ Nghut kôlhang, ahkaû gok má gi, hkyangjong mó za, yhânggùng é matú le, a sê é za byu pé kut shut é marâ é matú le, nhông byi râ sui chùng mù, razàn má radàm za wang é nghut lhê. ⁸ Haû Chyoiyúng Woi-nyí gi, haû pé dông mai, sâng-hi é saksé zúm ru joq nyi nyi, haû Chyoiyúng Htâng é Jowò wàng hkyô a hpông shit shi é lé, tân shit nyi ri. ⁹ Haû gi, ipyat shi é matú tân shit é azông nghut mù, nhông byí é chyunghuq pé eq shigu hkungga pé gi, dojaú sù é i-myt lé a wó lhoq sâng-yúng byí é hkyô lé taí nau é nghut lhê. ¹⁰ Haû pé gi, zojung, shuqjung eq chí san chí séng hking ahú hú eq za sêng é nghut mù, htungli asik, lé joq é ahkyíng jé shoq za tô tô é gungsho eq sêng é tarâ pé nghut ri.

Hkrisduq É Sui

¹¹ Hkrisduq gi, shí má joq to gù nghut é gè hkyô pé é hkyangjong mó dông lé jé é hkûn, hpan tô é má a lom nghû nau é, byu eq saí é a nghut é, je kô é eq je gumjup é saksé zúm mai wang lai bê nghut lhê. ¹² Yhang gi, Chyoiyúng Htâng é Jowò má wang é hkûn, bainám eq nojúng zo pé é sui lé chùng mù wang

é a nghut é za, Yhâng é sui èq yhang banshoq é matú radàm za ahtum abyuq é hkyi yù hkyô wó yù bê nghut ri.

¹³ Htungli dông agot a-û dut é bang lé lhoq sâng-yúng râ matú, bainám eq nohtó zo pé é sui eq no-pyâ é myi-mhop lé, yhangmoq é ahtoq má hpyun gyun é hkûn, yhangmoq gi, ahtoq gungsho pyâm wó lhoq sansêng é hui kô é nghut lhê. ¹⁴ Haû nghut jáng, Garai Gasâng é hí má ra a bo é Yhânggùng lé, ahtum abyuq é Woi-nyí dông mai nhông byí é Hkrisduq é sui gi, rû dui nyi é Garai Gasang lé nga-nhúng wó dojaú sháng gaq ga, shi é hkyô shut shuî jé é nyi yap sâmlai mai nga-nhúng é myit sôn sê é hkyô lé, je riyhang wó lhoq sanséng yu ri-nhung mhai!

¹⁵ Haû nghut é yanmai, Hkrisduq gi, danggidiq byi tô é ahtum abyuq é muizé lé, ji yù huí é bang wó hap yù kó sháng gaq ga, dangshikaq asik é gyoro sô xoq byi sù nghut nyi ri. Haû su wó kut é gi, sâng-hi lhê é dangshikaq ahkaû má mara kut shut é bang lé lhoq lhut yù râ matú, yubak chyín xap zê ralhum dông, Yhang shí hkám byi yanmai nghut ri.

¹⁶ Madat dang eq séng luí ga jang, madat dang taí sù haû shí bê hkyô saksé shit râ lhê.

¹⁷ Haî mù gâ le, madat dang gi, rayuq yuq shí jáng za sheq lichyúm htoq é nghut lhê. Madat dang taí sù rû dui nyi nyi, haû gi, hkâ-nhám le lichyúm htoq râ a nghut. ¹⁸ Haû

nghut é yanmai, sâng-hi lâ é dangshikaq lhang gi, sui a bo lòm jáng lichyúm a htoq é nghut lâ. ¹⁹ Mosheq gi, haû jep é tarâ má bo é hkunmó hkangmó lé, shiwa byù ban-shoq bang lé ban taí pyo é hkûn, zam zam ne é saumaú eq jam kyâng lé yù mù, nojûng zô é sui eq bainám sui eq wuì nyhò tô é lé, chyúmding má le, shiwa byù ban-shoq bang lé le, hpyun gyûn é nghut ri. ²⁰ Yhang gi, "Sui shî gi, nung-moq cháng râ matú, Garai Gasang, hkunmó hkyô to bê nghut é, dangshikaq tô tô é sui nghut lâ."* ga taí ri. ²¹ Yhang gi, saksé zúm eq do-jaú é má chung é zè pé má le, haû eq rajung za sui haû hpyûn gyûn ri. ²² Gè gè gi, haû jep é tarâ má bo é dông ga jang, azíng zê aluq ban-shoq gi, suí èq lhoq sân-yúng é hui râ dut é nghut mù, sui htoq hkyô a joq jáng, mara hkyut byi hkyô le joq é a nghut.

²³ Haû mù, mauhkûng zè pé é azông pé gi, hkungga haú pé èq lhoq sân-yúng é hui râ é nghut lâ. Nghut kôlhang, mauhkûng zè pé yhang gi, haú pé htoq je ge é hkungga pé èq lhoq sân-yúng é hui râ dut é nghut lâ. ²⁴ Hkâsu mù gâ le, akying lhûm é azông za nghut é, byu èq saí é chyoiyúng dik é jowò má Hkrisduq wang é a nghut é za, Yhang gi, mauhkûng má yhang wang é nghut mù, ahkuí gi, nga-nhûng é matú Garai Gasâng é hí má bo yap

byi nyi é nghut lâ. ²⁵ Yhang gi, haû hkyangjong mó mai yhumsîng é sui a nghut é sui lé chûng mù, Chyoiyúng Htâng é Jowò má zàn wuì wàng luí kut é su, yhânggùng lé dum nhông byi byi kut râ matú mauhkûng má wang é le a nghut. ²⁶ Haú dông ru nghut le gi, Hkrisduq gi, mau htoq xâng hkûn mai shî hkâm é adàm myo myo nghut berâ nghut lâ. Nghut kôlhang, ahkuí, Yhang gi, yubak mara huí sêng pyám byi râ matú, yhânggùng lé hkungga nhông byi râ ga ipyat pé lô htâng lô nyi é má, ban-shoq é matú radàm za htoq shit bê nghut ri. ²⁷ Byù gi, radá za shî râ nghut mù, hau htâng má tarâ jéyáng é hui râ nghut é eq rajung za, ²⁸ Hkrisduq gi, byù myo myô é yubak mara lé yu pyám byi râ matú, radá za hkungga nhông é hui bê nghut ri. Haû mù, Yhang gi, yubak mara wun pyám byi râ a nghut lo é za, Yhang lé lánng nyi é bang lé hkyi yù hkyô yu lé byi râ matú, htâng má í dâm nghû râ dàm htoq shit râ nghut lâ.

10

Hkrisduq É Gùng Lé, Ban-shoq É Matú Radàm Za Nhông Byi É Hkyô

¹ Haû jep é tarâ gi, jé lô râ nghut é gè hkyô pé é akyîng a nghut é za, wupzo za nghut ri. Haû nghut é yanmai, jep é tarâ gi, zàn wuì ru nhông byi byi kut nyi é eq rajung

zâ é shigu hkungga pé dông mai, noqkuq râ matú chyâng lé é bang lé hkâ-nhám lé wó lhoq gumjup é a nghut. ²Tarâ haû wó lhoq gumjup byî é ru nghut le gi, yhangmoq nhông byî é hkyô nô pyám kó râ a nghut lhi? Hkâsu mù gâ le, haû noqkuq é bang gi, banshoq é matú radàm za lhoq sanséng huí é nghut jáng, yhangmoq é yubak marâ é matú, hkâ-nhám le mara a bò bun lo kó râ nghut lhê. ³Nghut kôlhang, shigu hkungga haû pé gi, zàn wuì yubak mara pé lé lhoq pun byî é zè nghut ri. ⁴Haî mù gâ le, nohtó pé eq bainám pê é sui gi, yubak mara lé huí sêng pyâm é hkyô wó dut é a nghut.

⁵ Haû mù luí, Hkrisduq, mingkan má lé jé é hkûn, Yhang taí é gi,

"Shigu hkungga eq hkungga lé Nàng a o é nghut mù, Nàng kúm gi, Ngá é matú gungdu hen to byi bê nghut ri.

⁶ Myi nyhé hkungga pé eq mara hkyut hkungga pé gi, Nang lé gabú nhang é a nghut.

⁷ Hau htâng, Ngò gi, 'Garai Gasang ê, Ngò eq séng luí chyúmding má kê tô é eq rajung za,

Nàng ô nau é hkyô kut râ matú, Ngò, shî má nyi lhê.' nghû taí é. *⁸

gâ ri. ⁸ Sâng-hi má, Yhang gi, "Shigu hkungga eq hkungga pé, myi nyhé hkungga eq mara hkyut hkungga pé lé,

Nàng a o é htoq agó, haû pé lé Nàng a gabú é nghut lhê." ga taí ri. Haû jep é tarâ dông haû pé lé kut râ dut kôlhang taí é nghut ri. ⁹ Hau htâng má, Yhang gi, "Nàng ô nau é hkyô kut râ matú, Ngò, shî má nyi lhê." ga taí ri. Haû gi, Yhang, htang lhum dangshikaq lé htaí masat to râ matú, sâng-hi lhum lé tô pyâm é nghut ri. ¹⁰ Myit ô nau hkyô hau é yanmai, Yesuq Hkrisduq, Yhâng é gungdu lé hkungga dông banshoq é matú radàm za nhông byî é dông mai, nga-nhúng gi, lhoq chyoiyúng é huí bê nghut ri. ¹¹ Hkyangjong hkangmó gi, nyí nyí bui bui, yap mù, yhâng é hkyangjong muzó lé zui saí é nghut lhê. Yhang gi, yubak mara lé hkâ-nhám lhang a wó huí séng pyám byî é, rajung zâ é shigu hkungga lé, dum nhông byi byi kut é nghut lhê. ¹² Nghut kôlhang, hkyangjong mó nghut é Hkrisduq gi, yubak mara hkyut byi râ hkungga ralhum lé za, ahkyíng banshoq é matú ban nhông byî é hkûn jáng, Garai Gasâng é loqyo hkyam shut zung to bê nghut ri. ¹³ Haû hkûn mai, Yhang gi, Yhâng é gye pé lé, Yhâng é hkyi nang jang kut byi râ lé lánng nyi é nghut ri. ¹⁴ Haî mù gâ le, Yhang gi, lhoq chyoiyúng é huí nyi bang lé, hkungga ralhum eq za, pyat dedû é matú lhoq gumjup byi bê nghut ri.

¹⁵ Haû Chyoiyúng Woi-nyí

le, haú hkyô eq séng luí nga-nhúng lé saksé hkâm kyô ri. Sâng-hi má, Yhang taí é gi,
 16 "Haú Yhumsing taí ri, shí gi, ahkyíng haú lái htâng má, Ngò, yhangmoq eq to rá dangshikaq nghut lhê.

Ngò gi, Ngá é tarâ pé lé, yhangmoq é myit nhiklhum hkaú má kat byi mù, yhangmoq é i-myit má kê to byi rá nghut lhê."[☆]

gâ ri. 17 Hau htâng, Yhang taí jat é gi,

"Ngò gi, yhangmoq é yubak mara pé eq tarâ a chung é muzó pé lé, bûn lô rá a nghut."[☆]

gâ ri. 18 Haú mù, mara haú pé lé hkyut pyám byi bê nghut jáng, yubak marâ é matú hai hkungga le a ra lo nghut ri.

Hkam Jan Râ Hkyô

19 Haú mù luí, gumang wui ê, nga-nhúng gi, Yesuq é suí èq, haú Chyoiyúng Htâng é Jowò má wàng rá matú hkyak wó lum to bê nghut lhê. 20 Haú gi, Yesuq é gungdu nghut é pán-gyang dông mai, nga-nhúng é matú hpóng byi bê nghut é asik eq rû dui nyi é hkyô nghut lhê. 21 Haú nghut é yanmai le, Garai Gasâng é yhúm lé up é gyaú é hkyangjong lé nga-nhúng wó é yanmai le, 22 nga-nhúng gi, gíngtíng é lumjíng hkyô mai sanséng é i-myit èq, Garai Gasâng chyáng ê mù, mara bò bûn é myit sôn sê é hkyô mai, nga-nhúng lé lhoq sanséng rá

matú nga-nhúng é i-myit lé hpyun gyùn é hui nhâng luí, nga-nhúng é gungdu gi, sân-yúng wui èq chi byí é hui yù sháng. 23 Nga-nhúng gi, nga-nhúng yín yu é myit myoqbyù hkyô lé zúí gíngtíng nyi sháng; hkâsu mù gâ le, danggidiq byí to bê Sû gi, lhumzui Sû nghut lhê. 24 Chyitdap hkyô eq ge é muzó pé má, nga-nhúng gi, rayuq eq rayuq hkâsu kut myit nhaú toq byí lhum rá hkyô lé, dat myit nyi sháng. 25 Chôm huí zup lhúm nyi é hkyô lé, ra-am lhaq tô pyâm nyi kê é su, nga-nhúng gi, a tô pyâm é za, haú Buinyi chyâng lò bê nghut é lé nungmoq sê é eq rajung za, rayuq eq rayuq je riyhang myit wum byí lhúm nyi sháng.

26 Nga-nhúng gi, tengmán hkyô lé sê yu é htâng má, shíngé ngé mara dum kut shut shut kut é nghut jáng, mara hkyut byi rá hkungga a joq lo. 27 Tarâ jéyáng hkyô eq Garai Gasâng é gyè pé lé nyhê hkyô pyám rá nghut é nhikmo-yô é myi lé za, gyuq chiq myit mai lánng nyi rá dut bê nghut lhê. 28 Mosheq é tarâ lé he-ngik é sù ó yuq le, saksé í sum yuq é dâng é yanmai, shogyo nhikmyin a huí é za sat pyâm é hui bê nghut lhê. 29 Haú jáng, Garai Gasâng é Yhangzo lé hkyiwa ô má nâng pyeq bê sù, yhumsing lé lhoq sân-yúng byi bê nghut é dangshikaq é sui lé a chyoiyúng é zè dông kut pyám bê sù eq, jeju byí é Woi-nyí lé rhoi é sù gi, hkâ-í

yang gyaú é mara dam byí é hui gíng rã nghut lhê nghû, nungmoq wó myit akô lhu? ³⁰ Hkâsu mù gâ le, "Lató hpuq rã gi, Ngò ru nghut lhê; Ngò lató hpuq rã."* ga le, "Haú Yhumsíng gi, Yhâng é byu pé lé tarã jéyang rã nghut lhê."* ga le, taí é Sû lé, nga-nhúng sê lhê. ³¹ Haú rû dui nyi sù Garai Gasâng é loq hkaú má byit gyó wang é gi, gyuq chiq jung yang nghut ri.

³² Nungmoq, haú maubó lé hap yu é* htâng, wuîhke jamjau huí é má gyai yang shikut kôluí wó jân pyám bê nghut é, hí lhê buinyi pé lé myit bun keq. ³³ Ra-u u má, nungmoq gi, byu pê hí má de de rhoi shit é eq zing-rí é hui zo bekô nghut ri; ra-u u má, nungmoq gi, haú su hui zo bang eq rahá bo hui zo bekô nghut ri. ³⁴ Nungmoq yang, je ge é eq ru gíng nyi é zè pé wó é lé sé kô é yanmai, nungmoq gi, htóng lúng bang lé shogyo nhikmyin bekô eq, nungmoq é sutzè pé lé sing yu pyám byí é bang lé, gabú myit eq jân pyám bekô nghut ri.

³⁵ Haú mù luí, nungmoq é hkyak myit lum tô é hkyô lé hkâdú pyám kó; agùn agó chyunghuq shigyaú é hui kó rã nghut lhê. ³⁶ Nungmoq gi, Garai Gasâng é ô nau hkyô lé kut é hkûn, Yhâng danggidiq byí tô é lé wó hap yù rã matú, nungmoq hkam jan rã dut é nghut lhê. ³⁷ Hkâsu mù gâ le,

razup zo nghut jáng,
"Haú lé lô rã Sû gi, jé lé rã nghut mù, ahkyíng lhoq myáng rã a nghut.
³⁸ Nghut kôlháng, Ngá é dingmán sù gi, lumjíng myit mai asak dui rã nghut lhê.

Yang nungzut zut é nghut le gi, Ngò, Yang lé myit nguì rã a nghut."*

ga tô ri. ³⁹ Nghut kôlháng, nga-nhúng gi, nungzut zut mù htên byoq huí é bang a nghut é za, lumjíng mù hkyi yù huí é bang ru nghut lhê.

11

Lumjíng Myit Mai

¹ Lumjíng myit nghu é gi, nga-nhúng myit myoqbyu tô é lé hkyak wó rã nghu é eq nga-nhúng a myàng shî é lé joq lhê nghû hkyak sê é hkyô nghut lhê. ² A-nham lhê bang gi, lumjíng myit haú mai Garaí eq owaq é hui kô é nghut lhê.

³ Lumjíng myit mai, nga-nhúng gi, nyi mi-nyí, joq mijoq lhunglhang lé Garaí Gasâng é hkunmó eq hpan tô é hkyô sê gyô é nghut lhê. Haú mù, myoq eq wó myang é pé gi, byu-myang é pé mai saí htoq tô é a nghut.

⁴ Lumjíng myit mai, Abelaq gi, Ka-in kut é htoq je ge é hkungga, Garaí Gasang lé nhông byí é nghut ri. Lumjíng myit mai, yang gi, yhâng é hkungga eq séng luí Garaí

* 10:30 Tarã Pun 32:35 * 10:30 Tarã Pun 32:36 * 10:32 Haú maubó lé hap yu é gâ é gi, gabú danglú lé sâng-hi wó hap yu é lé gâ lhê. * 10:38 Hbk 2:3-4

Gasang hkya-ôn é hkûn, dingmán sù rayuq dông owaq é hui bê nghut ri. Haû mù, lumj́ing myit mai, yhang gi, shi byuq bê nghut kôlhang, dang rû nyo nyi ashî nghut lhê.

⁵ Lumj́ing myit mai, E nuk gi, shi é a hui zo shoq, asak shî mai mauhkûng shut shuí yu é hui bê. Yhang lé, Garai Gasang shuí ló byuq bê nghut é yanmai, yhang lé a wó myâng lo nghut ri. Hkâsu mù gâ le, yhang gi, shuí yu é a hui shî é hí má, Garai Gasang lé nguì nhâng sù rayuq dông owaq é hui sù nghut ri. ⁶ Lumj́ing myit a bo é nghut le gi, Garai Gasang lé a wó nguì nhang é nghut lhê. Haî mù gâ le, Yhâng chyáng shikut luí lé jé é sù gi, Yhang nyi é hkyô lé le, lhumzui myit mai Yhang lé hô bang lé, Yhâng eq shigyaú é lé le, lumj́ing râ dut é nghut lhê.

⁷ Lumj́ing myit mai, Noaq gi, a myang wú shî é hkyô pé eq séng luí sidiq byi huí é hkûn, yhâng é yhumbyù wui lé hkyi râ matú, gyuq hkunggâ é dông mai wui-sanghpo saí bê nghut ri. Yhâng é lumj́ing myit mai, mingkan lé mara byi é nghut mù, lumj́ing myit mai lo é dingmán hkyo é jeju lé hkam yù sù dut bê nghut ri.

⁸ Lumj́ing myit mai, Abraham gi, yhâng é muizè dông, htâng má yhang hap yù rà nghut é, Garai Gasang byi é jowò shut e ló râ matú ji yu é huí é hkûn, jìno gyo

mù, yhang hká shut e ló é a sé kôlhang, ê bê nghut ri. ⁹ Lumj́ing myit mai, yhang gi, gó ming má nyi é byù b́ing rayuq su, danggidiq byi tô é mau má nyi bê nghut ri. Yhang gi, zúm pé má lúng é nghut mù, rajung zâ é dang-gidiq é muizè lé hkam yu é Isak eq Yakup le, zúm pé má lúng bekô nghut ri. ¹⁰ Hkâsu mù gâ le, Abraham gi, Garai Gasâng eq azòng hên mù saí tô é, ǵing é apûn awang pé eq mu é myuq lé myit myoqbyu nyi é nghut ri.

¹¹ Lumj́ing myit mai, Abraham gi, yhâng é asak ipyat laí ló byuq é eq, Sarah le baùdung nghut to kôlhang, haû dang-gidiq byi Sù, lhumzui sù nghut lhê ga myit sôn yu é yanmai, îwa rayuq wó dut é hui bê nghut ri. ¹² Haû mù luí, yhang gi, shi gùng dông nghut kôle, yhang rayuq mai lo é awut ashín pé gi, mauhkûng mâ é kyí pé eq wuimau yàm mâ é a ung nghap é semui myhó myô lò bê nghut ri.

¹³ Byù haú bang banshoq gi, yhangmoq shi é hkûn jé shoq lumj́ing myit mai asak dui nyi kô é nghut lhê. Yhangmoq gi, danggidiq byi tô é pé lé a hap yù kó nghut ri; nghut kôlhang, haú pé lé myàng za myàng kômù, we mai te yu akô. Yhangmoq gi, myidàm htoq má gó ming byu pé eq byù b́ing pé nghut é lé yín yù bekô nghut ri. ¹⁴ Haû su yín yu é byu pé gi, yhangmoq yhumsing é ming lé ho nyi é bang nghut é lé tûn shit é

nghut akô. ¹⁵ Yhangmoq htoq lo é ming lé, yhangmoq myit tui nyi kô é ru nghut le gi, dum tau ló râ ahkáng wó kó râ nghut lhê. ¹⁶ Ahkuí kúm, yhangmoq gi, je ge é ming nghut é, mauhkúng mingdán lé myit tuí nyi akô nghut ri. Haú mù luí, Garai Gasang gi, yhangmoq é Garai Gasang nghu é hui râ lé a hoq é nghut lhê. Hkâsu mù gâ le, Yhang gi, yhangmoq é matú myuq ralhúm lajâng to byi bê yanmai nghut ri.

¹⁷ Lumjínj myit mai, Abraham gi, Garai Gasang eq yhang lé chyam é hkún, Isak lé hkungga ralhúm dông nhông byi bê nghut ri. Haú gi, danggidiq pé lé hap yu to bê sù gi, yhâng é yuqzo zote lé nhông byi râ dá é nghut lhê. ¹⁸ Garai Gasang gi, "Isak dông mai lo é lé, náng é awut ashín nghú són byi râ nghut lhê."* ga yhang lé danggidiq byi to bê nghut kôle, yhang haú su kut é nghut ri. ¹⁹ Abraham gi, shi é mai Garai Gasang wó lhoq dui toq lhê ga myit yu ri. Taí sháng ga jáng, Isak lé, shi byuq bê mai, yhang dum wó hap yu é nghut ri.

²⁰ Lumjínj myit mai, Isak gi, Yakup eq Eso nhik é htângnùng lhê é matú, shimân byi bê nghut ri.

²¹ Lumjínj myit mai, Yakup gi, yhang shi ló râ u má, Yosep é yhangzô nhik lé shimân byi mù, yhâng é dumbáng-u má ngè luí, noqkuq bê nghut ri.

²² Lumjínj myit mai, Yosep gi, yhâng asak htúm ló râ u lé, Israelaq byu pé Egotuq ming mai htoq lò râ eq séng luí tai mù, yhâng é showui pé eq séng luí hkâsu kut râ hkyô lé pying to bê nghut ri.

²³ Lumjínj myit mai, Mosheq é yhângnu eq yhângwâ nhik gi, yhang hku lé é htâng má, yhang lé lhamó sum hkyap haq to bekô nghut ri. Haí mù gâ le, yhangnhik gi, zoshâng haú yúng é myàng kômù, hkohkam é mungdang lé a gyuq kó nghut ri.*

²⁴ Lumjínj myit mai, Mosheq gi, yhang kô lo é hkún, Hpara-uq é byizô é yhangzo ga râ lé he-ngik pyâm ri. ²⁵ Yhang gi, yubak marâ é ngón hkyô má rayoq zo ngón kún râ malaí Garai Gasang é byu pé eq rahá hpuzô é hui râ lé sheq hkyin yù bê nghut ri. ²⁶ Yhang gi, haú Hkrisduq é matú rhoí huí é lé, Egotuq ming mâ é sutzè htoq má je riyhang hpaudap lhê ga myit sôn yu ri. Haí mù gâ le, yhang gi, yhâng é shigyaú chyunghuq lé myit myoqbyu nyi sù nghut ri. ²⁷ Lumjínj myit mai, yhang gi, hkohkâm hpó nhikjum yô é lé a gyuq é za, Egotuq ming mai htoq ló byuq bê nghut ri. Yhang gi, myoq eq a wó myang é sù Garai lé wó myang é sù dông, hkam jân é nghut ri. ²⁸ Lumjínj myit mai, yhang gi, haú zomún lé sat é maumang lagyô eq Israelaq

* 11:18 Apún 21:12 * 11:23 Haú-u lé, hkohkâm hpó gi, Israelaq pê é yuqzo zonú wuí lé sat pyâm râ hkunmó hkyô tô é nghut lhê.

byu pê é zomún lé a wó záng sháng gaq ga, Lhoqlhai Poî eq sui hpyûn é hkyô le kut hí bê nghut ri.

²⁹ Lumjîng myit mai, haû shiwa byu pé gi, Nhões Nè lé kyuq huî é myigùng htoq mai su lai byit bekô nghut ri; nghut kôlhang, Egutuq byu pé le, haû dông lai shikut wú kô é hkûn, yhangmoq gi, myup shi byuq bekô nghut ri.

³⁰ Lumjîng myit mai, shiwa byu pé, Yeriho myuq xêwâm lé nyhit nyí sô lhing é htâng má, xêwâm haû leq gyop byuq bê nghut ri.

³¹ Lumjîng myit mai, shiwa myhí Rahap gi, haû Israelaq jó wú bang lé nguínón é eq lhom hkulum yu é yanmai, jino a gyo bang eq rahá sat pyâm é a huî é nghut lhê.

³² Haû htoq lai lui, ngò haî tai jat ra shirâ lhú? Gidon, Barak, Samson, Yephtha, Dawiq, Samuelaq pé eq myiqhtoî pê é hkyô lé tai rá ahkyíng ngò a wó. ³³ Haû bang gi, lumjîng myit mai mingdán pé lé wó zân ung yù bekô, tengmán hkyô lé chung jai bekô, danggidiq byî to bê lé wó hap yù bekô, hkanghkyi pé é nhut lé wó myhî pyâm bekô, ³⁴ myidug myishâm lé wó sat pyâm bekô, shamsó mai le wó hfang lut bekô nghut ri. Yhangmoq é wum nyhóm hkyô gi, wum taû bo byuq é dut bekô nghut ri. Yhangmoq gi, majan má a-tsam mó bò bang dut mù, maigan gyè pé lé wó ung pyâm kô é nghut lhê.

³⁵ Myiwe wuî gi, yhangmoq eq sêng é shi byuq bê bang asak dum lhoq tuî huî é lé, wó yù bekô nghut ri. Góbang gi, je ge é dui toq hkyô wó yù kó sháng gaq ga, lhoq lhut é hui rá lé he-ngik pyâm kômù, zing-rî é gyai yhang hui zo bekô nghut ri. ³⁶ Ra-am gi, wuizui kut pyâm byî é eq nhuq bat é hui bekô, góbang gi, shamtoq kyum hut huî é eq htóng lhûng é hui bekô nghut ri. ³⁷ Yhangmoq gi, luqgok eq dú sat é, í túm dut shoq yik hpyit é, sham èq sat pyâm é hui bekô nghut ri. Yhangmoq gi, sau-kuq eq bainám-kuq wut mù, htot lhing wún lui, myung kyuq é, zing-rî é eq rhoi pyâm é hui bekô nghut ri. ³⁸ Yhangmoq lhumzui nyi kô é yanmai, mingkan gi, yhangmoq eq a gingdán nghut ri. Yhangmoq gi, yoso pé má, bùm pé má, luqhkýung pé eq myidong pé má nyi lhing wún bekô nghut ri.

³⁹ Haû bang banshoq gi, yhangmoq é lumjîng myit é yanmai, owaq é hui bê nghut kôle, yhangmoq ó yuq le, danggidiq byî tô é lé a myang hkam yù kó nghut ri. ⁴⁰ Haî mù gâ le, nga-nhúng eq rahá za nghut jáng sheq, yhangmoq lhoq gumjup é wó hui kó sháng gaq ga, Garai Gasang gi, nga-nhúng é matú je ge é hkyô lajáng to byi bê nghut ri.

12

Garai Gasang, Zo Wuî Lé

Mhoqshit É Hkyô

¹ Haû mù luí, nga-nhúng gi, haû myhô é saksé pé mhutdûm su nga-nhúng é lhinghkyuq má joq to bê nghut é yanmai, nga-nhúng lé hkâm tang é hkyô pé jung hkanmó eq, lui za lhoq nhúng byî é yubak mara lé dú pyám mù, nga-nhúng din râ matú tô tô é hkyô lé, hkam jan lui din e ló sháng. ² Nga-nhúng gi, nga-nhúng é lumjínng hkyo é apûn awang lé hí sù eq lhoq gumjup byi sù nghut é Yesuq lé wú tsuq nyî sháng. Yhang gi, Yhâng é hí má joq tô é gabú hkyo é yanmai, hoq hpû é hkyô lé haî su a ngam é za, tapzîng má shî hkâm é hkyô lé jân pyám lui, Garai Gasâng é hkohkâm-tanghkuq é loqyo hkyam shut zung to bê nghut ri. ³ Nungmoq gi, a ngu byuq râ eq myit wum a gyui byuq kó sháng gaq, yubak dap bâng chyáng mai haû su htuq htîng é hkyô lé jân pyâm é Yesuq chyáng mai myit wum yù keq.

⁴ Nungmoq gi, yubak mara lé htuq htîng shikut é hkyô má, nungmoq é sui shun pyám shoq yhang a kut shi kó nghut ri. ⁵ Hau htoq agó, nungmoq gi, zo wuî lé dông Garai Gasang nungmoq lé wum byî é dang lé tô-myhî pyám bekô lú? Wum byi dang haû gi,

"Ngá zo ê, haû Yhumsîng mhoqshit é hkyô lé agya alhá hkâkut pyám, Yhang, nang lé tân é hkûn, myit wum

hkâgyui,

⁶ haî mù gâ le, haû Yhumsîng gi, Yhang chyitdap é bang lé mhoqshit mù, zo rayuq lé dông, Yhang hap yu é bang yuq hkanmó lé dam byî é nghut lhê."^{*}
gâ é nghut ri.

⁷ Mhoqshit huî é hkyô má, wuîhkê é lé hkam jan keq. Garai Gasang gi, nungmoq lé, zo wuî lé dông kut é ru nghut lhê. Hkâsu mù gâ le, yhumsing é yhângwâ èq a mhoq é zo gi, ó wá nyi lhê lú? ⁸ Nungmoq gi, yuq hkanmó huî lai é mhoqshit hkyô lé, a huî kô é nghut jáng, dezô pé dông nghut byuq mù, zo sîng wuî a nghut lo kó. ⁹ Nga-nhúng banshoq bang gi, nga-nhúng lé mhoqshit é xângzo îwâ pé wó é bang chyat nghut mù, yhangmoq lé hkunggâ é nghut lhê. Haû nghut jáng, je riyhang, nga-nhúng é woi-nyî eq sêng é Îwâ é a-ô má nyi mù, asak duî râ dut ri myhi-nhung! ¹⁰ Nga-nhúng é xângzo îwâ pé gi, yhangmoq je ge dik bûn é lé, nga-nhúng lé rayoq zo mhoqshit é nghut ri. Nghut kôlhang, Garai Gasang gi, Yhâng é chyoiyúng hkyô má nga-nhúng wó bo lôm shoq, nga-nhúng é gè hkyô é matú, nga-nhúng lé mhoqshit ri. ¹¹ Mhoqshit é hkyô hkanmó gi, mhoqshit u lé ngón hkyô a nghut é za, nò hkâm hkyô nghut nyi ri. Nghut kôle, mhoqshit hkyô haû lé hkam yù bê bâng é

^{*} 12:6 Sângkyang 3:11-12

matú gi, htâng má, nguingón hkyô eq dingmán hkyo é ashi lhoq htoq byí ri.

¹² Haû mù luí, myûng byuq é nungmoq é loq pé eq wum nyhôm byuq é nungmoq é hkyihput pé lé wum-o lhoq kíng keq. ¹³ Hkyî hten bang a wó sô é a dut shoq, lhoq gê byí é wó hui kó sháng gaq, nungmoq so râ matú, hkyô lhoq nyhang nyi keq.

Garai Lé He-ngik Bang Dàm Byi Hui Râ Hkyô

¹⁴ Byù banshoq bang eq nguingón shoq nyi râ eq chyoiyúng râ matú wó dut é í shikut keq. Hkâsu mù gâ le, ó yuq le, chyoiyúng hkyô a bo é gi, haû Yhumsíng lé myàng râ a nghut. ¹⁵ Ó yuq le, Garai Gasâng jeju lé a tô pyám râ matú, sidiq keq. Haû, yuq htoq lô mù, wuîhke hkyô lhoq htoq é eq byù myo myo lé agot a-û dut nhang é nuì hko su, ó yuq lé le hkâdut nhâng kó. ¹⁶ Ó yuq le, ashop é dông gungsho zùm yap é hkyô nghut nghut, zang radún é matú, yhang wó tô é yuqzo zomún muizè ahko ahkáng lé ung zô pyâm é, Garai a lom é Eso su nghut nghut, a kut râ matú sidiq keq. ¹⁷ Nungmoq sê é eq rajung za, Eso gi, htâng má, shimân jeju haû lé hkam yù nau é hkûn, he-ngik pyâm é hui bê. Yhang gi, shimân jeju haû lé ngaubyi ngau-nhap èq hô kôlhang, yhang

kut é hkyô lé a wó htaí byi lo nghut ri.

¹⁸ Nungmoq gi, wó záng é eq myi duq nyi é Sinaq Bùm má le, mauchut tuq é, noq-singkyî dut é eq laidun lo é má le, ¹⁹ tut htê mying é eq, dang taí htê mying é má le, a jé é kó nghut ri. Dang htê haû lé wó gyô é bang gi, yhang-moq lé, dang a taí jat lo râ matú dung tôngbán akô nghut ri. ²⁰ Haî mù gâ le, yhang-moq gi, "Bùm haû má dusak pé záng jáng lháng, luqgok èq dú sat râ dut lhê."* ga Garai Gasang hkyô tô é hkunmó lé a wó hkâm kô é yanmai nghut ri. ²¹ Haû byu-myàng hkyô gi, lûm wú gyuq hpo dut é yanmai, Mosheq lháng gi, "Ngò, gyuq nán ri."* ga taí é nghut ri.

²² Nghut kôlhang, nungmoq gi, Zi-un Bùm eq rù dui nyi é Garai Gasâng é myuq nghut é mauhkûng Yerusalem má, maumang lagyô pé ajùm ayò gabú ratung zup zîng é jang eq, ²³ mauhkûng htoq má myìng kê to huí é, zomún pê é noqkuq hpúng joq jang má, jé lé bekô nghut ri. Haû mù, nungmoq gi, byù banshoq é tarâ agyi nghut sù Garai Gasâng chyáng le, lhoq gumjup huí é dingmán bâng é woi-nyí pê chyáng le, ²⁴ dangshikaq asik é gyoro so sù Yesuq chyáng le, Abelaq é sui htoq má je ge é danglù taí é, hpyùn gyùn é sui má le, jé

* 12:20 Htoq Lô 19:12-13 * 12:21 Tarâ Pun 9:19 * 12:24 Abelaq lé gi, yhangmang Ka-in èq sat é nghut luí, yhâng é sui gi, lató-hpuq râ matú nghut ri; nghut kôlhang, Hkrisduq é sui kúm gi, hkyi yù hkyô lajang byí ri.

lé é nghut bekô.*

²⁵ Nungmoq gi, dang nyô Sû lé a gyo a kut râ matú, sidiq keq. Myidàm htoq má sidiq byî é sù lé he-ngik pyâm é bang, a lut kô é nghut lhê. Haû mù, mauhkûng mai nga-nhúng lé sidiq byî é Su chyáng mai, nga-nhúng lhing ló byuq é ru nghut le gi, je riyhang nga-nhúng a wó lut râ a nghut kó lhi? ²⁶ Haû Garaî dang taî é u má, Yhâng é htê gi, mingkan lé lhoq nhûn kat ri, ahkuí kúm gi, "Ngò, mingkan lé za a nghut, mauhkûng pé lé le radàm dum lhoq nhûn râ nghut lhê."* ga Yhang danggidiq byî to bê nghut ri. ²⁷ "Radàm dum" gâ é dang gi, haû a wó lhoq nhûn é pé wó myit to sháng gaq ga, hpan to huí é zè pé nghut é, wó lhoq nhûn é pé lé huí sêng pyám râ lé gâ é nghut lhê.

²⁸ Haû mù luí, nga-nhúng gi, a wó lhoq nhûn é mingdán lé hap yu to bê nghut mù, jeju bun luí, hpautap é eq gyuq hkunggâ é myit mai Garaî Gasang hap yù gíng é dông noqkuq sháng. ²⁹ Hkâsu mù gâ le, nga-nhúng é "Garaî Gasang gi, nyhê jôm é myi nghut ri".*

13

Ló Htáng Má Lhoq Pun Kyîng É Hkyô

¹ Rayuq eq rayuq, gumang yhangchang dông chyitdap lhùm nyi keq. ² Byù bíng pé lé hkulùm râ hkâtô-myhí kó,

hkâsu mù gâ le, ra-am gi, haû su kut nyi kô é yanmai, a sê é za maumang lagyô pé lé hkulum záng bekô nghut ri. ³ Nungmoq gi, htóng lúng bang eq rahá htóng lúng luzúm wuí dông, htóng lúng bang lé le, nungmoq yhang jamjau hui zô nyi é dông, hpuzô é bang lé le, myit bun keq.

⁴ Myiháng hkyô gi, lhunglhâng bâng eq hpautap é hui râ dut é nghut mù, myiháng yhuphpú gi, sân-yúng râ dut lhê. Hkâsu mù gâ le, Garaî Gasang gi, su-myi sulàng lú é bang eq ashop é dông gungsho zùm yap é bang banshoq lé jéyáng râ nghut lhê. ⁵ Nungmoq é asak dui hkyô má, ngùn lé chyitdap é myit tô pyám mù, nungmoq wó é lé nhik dik nyi keq, haî mù gâ le, Garaî Gasang gi,

"Hkâ-nhám le, Ngò, nàng eq a gang râ; hkâ-nhám le, Ngò, nang lé a tô pyám râ."*

ga taî é nghut lhê. ⁶ Haû mù, nga-nhúng gi, hkyak lum é myit mai,

"Haû Yhumsîng gi, ngo lé garúm sù nghut lhê yanmai, ngò, gyuq râ a nghut. Ó yuq wá, ngo lé haî wó kut râ lú?"* nghû taî é nghut lhê.

⁷ Nungmoq lé Garaî Gasâng é mungdang taî kyô é, nungmoq é hkyô-u shê bang lé, myit bun keq. Yhangmoq asak htum shoq nyi lai lo é

* 12:26 Hagi 2:6

* 12:29 Tarâ Pun 4:24

* 13:5 Tarâ Pun 31:6

* 13:6

sâmlai lé myit wú mù, yhang-moq é lumjínng myit lé alik kut yù keq. ⁸ Yesuq Hkrisduq gi, a-nyí nap, hkû-nyí, htângnùng pyat dedu rajung za nghut nyi ri.

⁹ Maú nhô zâ é mhoqshit hkyô ajung jung maí eq shuí nghoq huí é bang hkâdut kó. Zo bang lé hai akyû a byí é, htûngli zoshuq èq a nghut é za, Garai jejû èq nga-nhúng é myit nhikhum lé wum-o lhoq kîng yu é gi, gè hkyô nghut lhê. ¹⁰ Nga-nhúng gi, saksé zúm má dojaú é hkyangjong pé zo râ ahkáng a wó é hkungga gyap ralhum wó é nghut lhê.

¹¹ Haú hkyangjong mó gi, dusak pé é sui lé, yubak mara hkungga dông Chyoiyúng Htâng é Jowò má yu wang ri; nghut kôlhang, gungsho pé lé gi, byù nyi jowò shinggan má nyhê hkyô pyâm ri. ¹² Haú eq rajung za, Yesuq le, Yhâng é sui dông mai byu pé lé wó lhoq chyoyúng râ matú, myuq hkum shinggan má jamjau hpuzo mù shí hkám bê nghut ri. ¹³ Haú mù luí, nga-nhúng gi, byù nyi jowò shinggan má Yhâng chyáng ê mù, Yhang hui zô é rhoi hkyô lé ê bo hui zo sháng. ¹⁴ Hkâsu mù gâ le, nga-nhúng gi, mingkan shí má ru gîng nyi é myuq wó bang a nghut é za, jé lé lô râ myuq lé ho nyi é bang ru nghut lhê.

¹⁵ Haú mù luí, nga-nhúng gi, Garai Gasâng é myîng lé yín yu é nhutwui é ashí nghut é, hkya-on hkungga lé,

Yesuq dông mai, Garai Gasâng chyáng xoq xoq nhông byí nyi sháng. ¹⁶ Ge é hkyô kut râ eq góbang lé shuí gam chùng râ hkyô lé, hkâtô-myhí kó; hkâsu mù gâ le, Garai Gasang gi, haú sù é hkungga pé lé ô ngui nyi ri.

¹⁷ Nungmoq é hkyô-u shê bâng é jîno gyo mù, yhang-moq é ahko ahkáng ô má nyi keq. Yhangmoq gi, jihpán shit râ dut é bang dông mai nungmoq lé upzúng nyi é nghut lhê. Yhangmoq é muzó pé gi, nungmoq é matú akyû a bo é wòlai a dut é za, gabú hkyô ralhum wó dut sháng gaq, yhangmoq é jîno gyô nyi keq.

¹⁸ Ngamoq é matú kyûdung byi kó laq. Ngamoq gi, sân-yúng é myit sôn sê é hkyô wó mù, hkyô hkangmó má ge é dông asak duì râ lé ô nau lhê nghû, hkyak wó myit ri. ¹⁹ Ngò gi, nungmoq chyáng hân za wó dum jé sháng gaq, hau é matú je riyhang kyûdung byi keq nghû wum taí tsuq kat lhê.

²⁰ Sau hpúng pé é sau zúng Sù mó nghut é, nga-nhúng é Yhumsîng Yesuq lé, haú ahtum abyuq é dangshikaq é sui dông, shí bê mai dum lhoq dui toq é sù, nuingón hkyo é Garai Gasang gi, ²¹ Yhang ô nau é hkyô kut râ matú ge é hkyô jung hkangmó nungmoq lé lhoq gumjup byi mù, Yesuq Hkrisduq dông mai Yhang lé gabú nhang é hkyô lé, nga-nhúng chyáng kut nyí sháng gaq.

Hpungwup shingkang gi,
 Yesuq Hkrisduq chyáng pyat
 dedu ahtum abyuq ru joq nyí
 sháng gaq. Amen.

²² Gumang wuì ê, ngò lhoq
 pûn kyîng é dang lé nungmoq
 wó hkam jan kó sháng gaq
 nghû, wum taî tsuq kat lhê;
 hkâsu mù gâ le, ngò gi, nung-
 moq lé, laiká ratot za kê kat é
 nghut lhê.

²³ Ngò gi, nga-nhông é gu-
 mang Timohti lhoq lhut kat é
 hui bê hkyô lé, nungmoq lé sé
 nhâng nau ri. Yhang shî má
 myap jé lé é nghut le gi, ngò,
 yhang eq rahá nungmoq lé, lé
 hui râ nghut lhê.

²⁴ Nungmoq lé shuî-u bang
 banshoq eq Garai Gasâng é
 byu pé banshoq lé bo shi-
 kyâm byi keq. Itali ming mâ
 é gumang wuì gi, nungmoq lé
 shi-kyâm kat akô nghut ri.

²⁵ Jeju gi, nungmoq ban-
 shoq bâng chyáng ru joq nyí
 sháng gaq ô.

YAKUQ Hun Kat é Laiká (James)

1 Garai Gasang eq Yhumsîng Yesuq Hkrisduq é jùn, ngò Yakuq gi, byo myín tô é Israelaq raxe í myû lé, nguingón dang shit kyô kat lhê.

Lumjîng Myit Lé Chyam É Hkyô Eq Hpaqchyí Byéng-yá

2 Ngá gumang wui ê, nungmoq é lumjîng myit lé chyam wú é hui jáng, shikut shirâng sê é myit jat nyi é lé, nungmoq sê nyi lhê nghut mù, ³ wuîhke jamjau ajung jung lé htûng huí é hkûn, gaù jowò mó nghut nyi lhê nghû luí myit yù keq. ⁴ Hau htoq agó, nungmoq banshoq gúm gumjup jut dut mù luí, haí le a langhpyut shoq, shikut shirang é myit gi, yhumsîng kut nyi é muzó lé wó lhoq gumjup nyi sháng gaq. ⁵ Nungmoq má rayuq yuq hpaqchyí byéng-yá langhpyut tô é nghut le gi, haù banshoq bang lé, mara a hun é za, agùn agó byi nyi é Garai Gasâng chyáng dúng nyi sháng gaq, haù jáng, Garai gi, yhang lé byi râ nghut lhê. ⁶ Nghut kôlhang, lum shut é myit a bo é za, lumjîng é myit èq dúng nyi sháng gaq, hkâsu mù gâ le, lum shut é sù gi, laidûn èq hik luí toq lo é nhông mâ é wuîlhêng eq wuí nyi ri. ⁷ Haù yuq gi, Yhumsîng Garaí chyáng mâ é haí le wó yû râ su a ngam nyi sháng

gaq. ⁸ Yhang gi, myit-kó xan sù nghut luí, yhâng é hkyô hkat hkangmó má, mù htâng a nyang é sù nghut nyi ri.

Myùng Sù Eq Wó Sù

⁹ Myung é gumang hpó gi, waq toq huí é má, wó sù gi, lhoq nyhûm huí é má, gabú gumrong nyi sháng gaq. ¹⁰ Hkâsu mù gâ le, wó sù gi, wàhu banbó su woí byuq ló rà nghut lhê. ¹¹ Bui gi, nyé é lai èq toq lô jáng, haù wàhu nyhuí byuq ló mù, abó le yoq gyó byuq é eq, hau é yúng sâm pé gi, htên byuq é su; wó sù le haù eq rajung za, yhang kut nyi é muzó má woí byuq ló rà nghut lhê.

Gunglaú É Hkyô

¹² Wuîhke jamjau huí le, wó shikut shirang nyi sù gi, hkungsô wó nyi ri; hkâsu mù gâ le, chyam wú é ban hui jáng, yhang gi, Garai Gasang lé chyitdap é bang lé, byi tô é danggidiq asak janmaú lé, wó yû râ nghut lhê.

¹³ Gunglaú huí é sù ó yuq nghut kôlhang, gunglaú huí é hkûn lé, "Garai Gasang, ngo lé gunglaú nyi ri." nghû luí, a taí sháng gaq, hkâsu mù gâ le, agè ashop é hkyô gi, Garai Gasang lé wó gunglaú é a nghut, ó yuq lé le Garai Gasang gunglaú râ a nghut. ¹⁴ Nghut kôlhang, ó yuq nghut le le, yhumsîng é gungsho ô nau é dông, shuí láng nghoq ló é nghut le gi, agúng alaú hui bê. ¹⁵ Gungsho ô nau é hkyô kúm gi, zogûng dut jáng, mara

lé hku htoq lo ri. Mara kô dîng jáng, shi é má jé râ nghut lhê.

16 Ngò chyitdap é gumang wuê ê, i-myt hkyô nghoq hkâ-nghoq nyî kó. 17 Gè réng é eq byíng Jup é chyunghuq lhunglhang gi, ahtoq shut mâ é nghut mù luî, maubó gung pé* é Yhângwa Garaí chyáng mai gyó lo é nghut ri. Yhang gi, ahpuq alik atau ahû dut é buishûm su dut râ a nghut. 18 Yhang hpan tô é amyû pé má, nga-nhúng gi, sâng-hi myhîng é ashi pé dut lo sháng gaq ga, Yhang gi, Yhang ô nau é hkyô cháng luî, haû tengmán é mungdang mai, nga-nhúng lé hkû to bê nghut ri.

Gyo Yu É Eq Cháng Kut É Hkyô

19 Ngò chyitdap é gumang wuê ê, shí hkyô lé nungmoq sê nyi akô. Byù ó yuq nghut kôlhang, gyô yù râ lé han nyi sháng; dang tái râ lé a hân sháng gaq; nhik-yo râ lé le hkâhân kó. 20 Hkâsu mù gâ le, byù nhik-yô é hkyô gi, Garaí Gasang ô nau é dingmán é dông asak dui hkyô wó lhoq htoq râ a nghut. 21 Haû mù luî, achag achyut é ban-shoq eq ladu laí agè ashop é pé lé lhoq san lhoq sêng pyâm luî, nungmoq é i-myt lé wó hkyi yù râ matú, i-myt unghkaû má Garaí Gasang hô tô é mungdang lé, nú-nhâm é myit eq hkam yu nyi keq.

22 Nungmoq gi, yhumsing gùng lé a mhaû pyâm sháng

gaq, haû mungdang lé wó gyô yu é bang za a nghut, haû dông châng kut é bang le nghut nyî sháng gaq. 23 Mungdang haû lé wó gyô yù mù, a châng kut é sù ó yuq le, yhumsing é gungdu lé myoqjâm má wú sù eq wuî ri. 24 Yhang gi, yhâng é gungdu lé wú yù mù, myoqdong lhik é eq, yhumsing gungdu hkâsu dut é lé tô-myhî pyâm ri. 25 Nga-nhúng lé wó lhoq lhut yu é gumjup é tarâ má, rago za wú tsuq nyî sù kúm gi, wó gyô yù mù tô-myhî pyâm é sù a nghut, muzó eq tûn shit é sù nghut é yanmai, haû yuq gi, yhang cháng kut é muzó má shimân jeju wó râ nghut lhê.

26 Byù rayuq yuq, "Ngò gi, noqkuq htung lé lhoq dik sù nghut lhê." ga luî, myit to kôlhang, yhumsing nhut shô lé a wó hkâng mù, yhumsing myit lé mhaû pyâm é nghut le gi, haû yuq é noqkuq htung gi, akôm za nghut nyi ri. 27 Íwa Garaí Gasang é hí má sansêng é eq, râ é hkyô a bo é noqkuq htung gi, wuîhke jam-jau huî é chuimó chuizô pé lé, châng wú garúm é hkyô eq, mingkan htoq mâ é achag achyut é hkyô lé koi pyâm é hkyô nghut ri.

2

Myoqdong A Wó Hkyin Lhum

1 Ngá é gumang wuê ê, hpungwup shingkang bo é nga-nhúng é Yhumsing Yesuq Hkrisduq lé lumjîng hkyô má,

* 1:17 Maubó gung pé gâ é gi, bui, kyî, lhamó lé gâ lhê.

byu é myoqdong lé hkâhkyin lhum kó. ² Dangké, hîng loqchyop chyop luî, réng é mebu wut é sù rayuq eq ajeq amyha é mebu wut é asho awuî é sù rayuq gi, nungmoq é tarajong má wang lò kô é nghut le, ³ haû réng é mebu wut é sù lé, nungmoq lhom wú mù je hkunggâ é èq, "Shî aróng wó é jowò má zùng aq." dum, haû asho awuî é sù lé nghut jáng gi, "Mhó má yap to aq." haû su a nghut jáng, "Ngá é hkyî htâng má zùng aq." ga taí kô é nghut le gi, ⁴ nungmoq rayuq eq rayuq gamhkuî lhum luî, a ge é i-myit èq doqdân é bang dut lò bekô a nghut kó lú?

⁵ Ngò chyitdap é gumang wuî ê, gyô yù keq, lumjîng hkyô má wó sùt nyì luî, gidiq tô tô é mingdân é silí wunlí lé, Yhang lé chyitdap bang wó hkam yù sháng gaq ga, Garai Gasang gi, myigùng htoq mâ é asho awuî é bang lé hkyin yù bê a nghut kó lú? ⁶ Nungmoq kúm gi, asho awuî é sù lé a hpau a yùm kut pyám bekô nhung; wó bang sùt bang kúm gi, nungmoq lé zik zo mù luî, yhumsing é loq èq yhang, tarâ tingnyâng shut she hkyut ló bekô, a nghut kó lú? ⁷ Nungmoq eq sêng é kô dik é myîng lé lhang, yhangmoq yhang rhoî dang taí bum akô, a nghut kó lú?

⁸ Haû mù luî, Chyúmdang má, "Náng gûng lé nàng chyitdap é su, náng é chyangnâm mâ é bang lé le chyitdap aq."*

ga luî, taí tô é hkohkam tarâ lé, nungmoq tsuq za châng é nghut le gi, nungmoq ge é hkyô lé kut nyì bê. ⁹ Nghut kôhlang, byu é myoqdong lé nungmoq hkyin nyì kô é nghut le gi, nungmoq mara kut nyì gû nghut bê yanmai, haû tarâ lé shut é bang lé su tarâ jéyáng é huî nyì bekô râ nghut lhê. ¹⁰ Byù ó yuq nghut le le tarâ banshoq lé cháng kôhlang, haû mâ é ralhum lhum lé shut pyám jáng gi, tarâ banshoq lé shut pyám sù dut byuq râ nghut lhê. ¹¹ Hkâsu mù gâ le, "Su-myi sulàng hkâlú."* ga luî, hkang tô é sù gi, "Byù lé hkâsat."* ga luî le, taí tô ashî. Nàng su-myi sulàng a lú kôhlang, byù sat é sù nghut le gi, tarâ lé shut é sù nghut bê.

¹² Haû su mù luî, nungmoq lé lhoq lhut kat é tarâ dông jéyáng doqdân é hui râ bang su, ru taí nyì keq; ru châng kut nyì keq. ¹³ Hkâsu mù gâ le, shogyo myit a bò sù gi, a shogyô é dông jéyáng doqdân é hui râ nghut lhê. Shogyo nhikmyîn é hkyô kúm gi, jéyáng doqdân é hkyô lé wó ông lut râ nghut lhê.

Lumjîng Myit Eq Zui Saî É Hkyô

¹⁴ Ngá gumang wuî ê, byù rayuq yuq, "Ngò gi, lumjîng myit bo lhê." ga taí nyì kôhlang, muzó a bo lom é nghut le gi, haî akyû bò râ lú? Lumjîng myit haû gi, yhang lé wó hkyi yù râ lú?

* 2:8 Nhong 19:18

* 2:11 Htoq Ló 20:14

* 2:11 Htoq Ló 20:13

¹⁵ Gumang, gu-nhá rayuq yuq a chin dut nyi é eq, nyi wui é zoshuq langhpyut tô é nghut le, ¹⁶ nungmoq chyáng má é rayuq yuq gi, yhangmoq é gungsho má râ é hkyô haí le a byí é za, yhangmoq lé, "Nungmoq wut é gùng lúm sháng gaq, zô é ùng gyi sháng gaq, ngui ngui ngón ngón ló keq." ga taí é nghut le gi, hai akyû bò kó râ lúhú? ¹⁷ Haû eq rajung za, lumjínng myit má muzó a bo é nghut le gi, shi é eq rajung za nghut nyi ri.

¹⁸ Dum rahkyô gi, "Nàng gi, lumjínng myit bo ri, ngò gi, muzo bo lhê. Muzó a bo é náng é lumjínng myit ngo lé tân shit wú aq, haú hkûn, ngá muzó èq ngá lumjínng myit lé, nang lé ngò tân shit râ nghut lhê." ga luí, rayuq yuq taí râ nghut lhê. ¹⁹ Garai Gasang rayuq za nghut é lé nàng lumjínng ri-nhung! Nghut bê, haú gi, jô é hkyô nghut nyi ri, nat gâng pé le haú su yhang lumjínng mù gyuq nán nyi akô nghut ri.

²⁰ Kyoq a bo é byù bam ê, lumjínng myit má muzó a bo le akôm za nghut é hkyô lé, nàng sé nau lhê a nghut lúhú? ²¹ Nga-nhúng é Íwa Abraham gi, hkungga gyap htoq má yhangzo Isak lé shigu hkungga kut é hkûn lé, zui saí é muzó mai dingmán é sù gâ é lé wó yû bê a nghut lúhú? ²² Haû mù luí, yhâng é muzó eq rahá za e ló é yanmai, lumjínng myit gi, jup byíng lo é lé, nàng wó

myâng bê nghut ri. ²³ Haû su mù, "Abraham gi, Garai Gasang lé lumjínng é nghut mù luí, yhang lé dingmán sù ga són byi bê."^{*} ga luí, kâ tô é Chyúmdang gi, dik to bê. Dum, yhang lé Garai Gasâng é buinùm hpó ga luí le myhíng byi bê. ²⁴ Haû mù luí, byù gi, lumjínng é myit èq baú za a nghut, zui saí é muzó èq mara hkyut san byi huí é lé, nungmoq bûn sê nyi akô.

²⁵ Haû eq rajung za, Rahap gâ é shiwa myhí gi, jowú su nhik lé lhom te yù mù luí, hkyô gó hkat đông nhang kat pyâm é hkûn le, yhang zui saí é muzó mai dingmán é sù gâ é wó yû bê a nghut lúhú? ²⁶ Haû su mù, gungdu má woi-nyí a bo le gi, shi é eq rajung za, haû lumjínng myit má muzó jizó a bo le gi, shí gû nghut bê nghut ri.

3

Mhé Wuí É Shô

¹ Ngá é gumang wui ê, byù myo myo sará hkâkut naú kó. Hkâsu mù gâ le, ngamoq sê é eq rajung za, sará pé gi, je riyhang htan é đông jéyáng doqdân é hui zo râ nghut lhê. ² Nga-nhúng banshoq bang gi, hkyô myo myo má myit lingbat é bang chyat nghut ri. Byù rayuq yuq dâng èq a lingbat é nghut le gi, yhang gi, jup byíng sù eq yhumsing é gùng lé wó hkang é sù nghut ri.

³ Nga-nhúng myang lé nhutkyáng kyáng byi jáng, myang hau é gungdu gón lé,

nga-nhung ô nau é đông wó cháng nhang lê. ⁴ Haû mai gotû, wuì-sanghpo pé lé wú wú keq, haû-í kô é sanghpo lé htan é laidûn eq mut é hui kôlhang, sanghpo hkâng sủ gi, gyai tiq é sanghpo shap eq za, yhâng ô nau é đông, haú pé lé wó hkang yu ri. ⁵ Haû eq rajung za, shô gi, tiq é gungsho za nghut kôlhang, gyai gumrông nghutbûn nyi ri; wú keq, tiq dik é myizik zo gi, yoso mhanpúng mó lé wó nyé gyó nhang ri-nhung. ⁶ Shô haû gi, myi eq wuí nyi ri. Nga-nhung é gungsho má, shô haû gi, agè ashop é mingkan dut lò mù, nga-nhung é gungsho asak lé achay achyut dut nhâng luí, gungsho asak lé nyhê tuq kat ri. Haû gi, ngaraí myí eq nyhê tuq kat é nghut bê.

⁷ Dusak ajung jung, nghoq ahú hú, myí má yê é jung eq wuì hkaû má nyi jung ban-shoq gi, wó mhê yu é jung chyat nghut mù, byu pé gi, haú pé lé mhê yu nyi akô. ⁸ Nghut kôlhang, shô lé kúm gi, byù ó le a wó mhê yù kó nghut ri. Haû gi, apyí abat, agè ashop, uphkâng a wó é eq, shi é jung duq eq byíng tô é jung nghut nyi ri.

⁹ Nga-nhung gi, shô hau eq nga-nhung é Yhumsing eq Iwa Garai lé hkya-on nyi lê; hau eq za, Garai Gasâng é gunglhô đông hpan tô é waxâng zo wuì lé le nhing pyâm nyi ri. ¹⁰ Nhut ralhûm za mai, hkya-ôn é dang eq nhing é dang htoq lo ri. Ngá é gumang

wuì ê, haû su kut é gi, a gè. ¹¹ Wuìbúm radong za mai, chuì nghâm é wuì eq hkô é wuì wó htoq râ lú? ¹² Ngá gumang wuì ê, maihpáng gâm mai tsanlun shi, tsibiyiq nú mai maihpáng shi, wó zui râ lú? Haû eq rajung za, xô ngam é wuì gi, chuì nghâm é wuì lé wó lhoq htoq byi râ a nghut.

Ahtoq Mai Lo É Hpaqchyí

¹³ Nungmoq má, hpaqchyí byéng-yá bo é sủ eq sê é dat é sủ, ó nghut lê lú? Haû yuq gi, yhang hpaqchyí bo é hkyô lé, hpaqchyí mai wó yu é, myit lhoq nyhum é hkyo eq, yhumsing zui saí é ge é muzó đông tân shit nyí sháng gaq. ¹⁴ Nghut kôlhang, nungmoq é myit má ladu lai é manon é i-myt eq, lú lhum bat zik é i-myt bo é nghut le gi, hkânghutbun kó, haû tengmán hkyô lé le hkâmhaû pyâm kó. ¹⁵ Haû sủ é hpaqchyí byéng-yá kúm gi, mauhkung htoq mai gyó lo é hpaqchyí byéng-yá a nghut, haû gi, myigùng htoq mâ é, gungsho ô nau é eq, nat é hpaqchyí byéng-yá chyat nghut nyi ri. ¹⁶ Hkâsu mù gâ le, manon é eq lú lhum bat zik é dut nyi le gi, ruk ruk rak rak é hkyô eq agè ashop é mù ajung jung jup hkúm nyi ri.

¹⁷ Mauhkung htoq mâ é hpaqchyí byéng-yá kúm gi, sâng-hi awang má sansêng nyi ri; hau htâng má gi, nguingón hkyô lé ô nau é, myit nûm é, jino gyô é, shogyo nhikmyin sê é eq ge é ashi zui nyi mù

luî, gamhkui a bò, ahpuq alik a dut é eq, kut mhaú a sê é hpaqchyî byéng-yá nghut nyi ri. ¹⁸ Hau htoq agó, nguingón é hkyô dat sô xoq é bang gi, nguingón é shijí lé sân kat é bang nghut mù, ge é ashi wó yú kó rá nghut lhê.

4

Yhumsing Gùng Lé, Garai Gasâng Chyáng Ap To Râ Hkyô

¹ Nungmoq má gyè dut lhùm é eq mabyoq jishùm gi, hkâmai htoq lo é l hú? Nungmoq ahkaú má gungsho ô nau é hkyô pé ngón hkyô hô mù, majan zân lhùm é yanmai, dut htoq lo é a nghut kó l hú? ² Nungmoq yut yut myit ô nau nyi kôlhang, haí le a wó yú kó. Nungmoq sat nyi é eq manon nyi kôlhang, a wó yú kó. Nungmoq byoq lhùm nyi é eq majan htoq lhùm nyi kôlhang, haí le a wó yú kó; hkâsu mù gâ le, nungmoq, Garai Gasâng lé a dung kô é yanmai nghut ri. ³ Nungmoq dung kôlhang, a myang yù kó nghut ri; hkâsu mù gâ le, nungmoq é ngón kún hkyô má jai chùng langsâ pyám rá matú, shut é đông dúng nyi kô é yanmai nghut ri.

⁴ Su-myi sulàng lú é bang su gidiq a gíng é bang ê, mingkan ô nau é hkyô lé buinùm du é myit gi, Garai lé a ngui é myit nghut é hkyô lé, nungmoq a sé kó l hú? Haú mù luî, mingkan ô nau é hkyô eq buinùm dù naú sù ó nghut kôlhang, Garai Gasâng é gyè

nghut nyi ri. ⁵ Dum ralhum, nga-nhúng má Garai Gasâng kat l húng tô é woi-nyí gi, manon é myit lúng nyi ri ga luî, Chyúmdang má taí é gi, akôm nghut ri nghú, nungmoq myit ngam nyi akô l hú?

⁶ Nghut kôlhang, Yhang gi, je kô é jeju ru byí nyi lhê. Haú eq rajung za, Chyúmdang má, "Garai Gasâng gi, nghutbùn é bang lé hkùm zing pyám kôlhang, myit lhoq nyhum é bang lé jeju byí ri."☆

ga taí tô ri.

⁷ Haú mù, Garai uphkan é a-ô má ru nyi nyi keq; Nat Tsadán lé hkùm tang pyám keq; haú hkùn, yhang nungmoq chyáng mai hpang byuq rá nghut lhê. ⁸ Garai Gasâng chyáng huí ê keq, haú hkùn, Yhang, nungmoq chyáng huí lé lô rá nghut lhê. Yubak kut é bang ê, nungmoq é loq pé lé chí san chí sêng pyám keq. Myit koq xân é bang ê, nungmoq é myit nhikhum lé lhoq chyoí lhoq yúng to keq. Yudaq htùng đông loq lé chí san chí sêng pyám keq gâ é lichyúm gi, i-myit, gungdu lé lhoq san lhoq sêng pyám é lé gâ lhê. ⁹ Nungmoq gi, myit yón é, iyon yón é eq ngaubyi ngau-nhap é kut nyí keq. Nungmoq é wuihá é hkyô lé gi, iyon đông, nungmoq é gabú é hkyô lé gi, yón kuq é đông htaí pyám keq. ¹⁰ Haú Yhumsing Garaí é hí má i-myit lhoq nyhum nyi keq, haú hkùn, Yhang gi,

nungmoq lé lhoq toq râ nghut lhê.

¹¹ Gumang wuì ê, nungmoq yhangchang a ge é dông hkâtaì hpoì lhum kó. Yhumsing é yhanggu yhangmang lé a ge é dông taì hpoì nyi é sù, haù a nghut jáng, jéyáng é sù gi, haù tarâ lé a ge é dông taì hpoì nyi mù luì, jéyáng é sù nghut nyi ri. Haù tarâ lé nàng jéyáng nyi é nghut le gi, tarâ lé châng é sù a nghut é za, tarâ jéyáng sù nàng dut nyi ri. ¹² Garai Gasang za tarâ byì tô é eq tarâ dara sù, wó hkyi yu é sù eq, wó lhoq htên é sù nghut nyi lhê. Hau é yanmai, náng é yhumkyo hpó lé jéyáng é sù nàng gi, ó yuq wa nghut lhê lú?

Gyáng Dang A Taì Râ Hkyô

¹³ "Ngamoq, hkû-nyì napmá ra-nyì nyì, wà rawà wà shut ê mù, haù má razàn kô ê nyì luì, hpugá wuiloq gá mù amyat wó myang yù rà." ga taì nyi é bang ê, gyô wú keq. ¹⁴ Napmá haì dut lô rà lé lhang, nungmoq gi, a sé ko. Nungmoq é asak gi, haì nghut nyi lhê lú? Haù gi, razup rahtâng za htoq shit luì dum byuq byuq lô mù é, nghansoq eq rajung za nghut nyi ri. ¹⁵ Haù mù luì, nungmoq haù su ga taì nyi râ malaì gi, "Yhumsing Garai dông é nghut le gi, ngamoq le ru wó dui nyi mù, shì le, mhô le, wó kut râ nghut lhê." nghu luì, wó taì râ nghut lhê. ¹⁶ Ahkuì kúm gi, nungmoq é

gyáng é dang dông gumrong nyi akô; haù su gumrong é hkyô banshoq gi, agè ashop é jung chyat nghut nyi ri. ¹⁷ Haù mù luì, ge é mù sê kut to luì, a kut é sù gi, mara kut sù dut bê nghut ri.

5

Sùt Wó Bang Lé Sidiq Byì É Dang

¹ Sùt wó é bang ê, gyo keq, nungmoq chyáng jé lé lô rà é wuìhke jamjau hkyo é yanmai, ngau garû nyi keq. ² Nungmoq é sutzè gi, htên bup byuq bê nghut ri; nungmoq é wutbu wutmè le manot eq zô pyám bê nghut ri. ³ Nungmoq é hìng eq ngùn má lhang, jogyik zuì byuq mù luì, haù jogyik gi, nungmoq é mara hkyam shut saksé dut byì é eq, nungmoq é gungsho lé myi su zô pyám râ nghut lhê. Nungmoq gi, jìhtùm buinyì shí pé má, sutzè lé za hkong to bekô nhung! ⁴ Wú keq, nungmoq é yohtung dùng yò yam nhâng mù luì, ahpau a byì é za, nungmoq mhaù zô tô é ahpau pé garû nyi é htê pé eq, mù zui bang garû é htê pé lé gi, haù a-tsam dik shoq bo é Garai wó gyo byi bê nghut ri. ⁵ Nungmoq gi, myigùng htoq má hkik hkik hkâm hkâm wó nyi é eq, i-myt ô nau é dông ngón hkyô chyat châng nyi bum akô. Nungmoq gi, sat râ buinyi matú yhumsing é gùng lé tsô myum to bekô nghut ri. ⁶ Haù

* 5:6 Dingmán é sù gâ é danghkun lé, Chyúmlaiká ra-am má gi, dingmán é bang gà ri.

dingmán é sũ* lé, nungmoq mara hũn mù, sat pyám bekô. Yhang kúm gi, nungmoq lé a lhom hkũm zìng nghut ri.

Myit Hĩng Hĩng Hkam Jan Ra Râ Hkyô

7 Haũ mù luĩ, gumang wuĩ ê, haũ Yhumsĩng dum jé lé é buinyĩ jé shoq myit hĩng é èq lánng nyĩ keq ô! Hkyâm saĩ sũ lé wũ wũ keq, yhang gi, myĩhpũn mai ahpau dán é ashi lé wó yũ shoq ga mau mún eq wò htáng htáng é mau wo gyũn é jé shoq myit hĩng hĩng lánng nyi ri. 8 Haũ eq rajung za, nungmoq le, Yhumsĩng Yesuq dum jé lé râ gi, chyáng lo nyĩ bê nghut é yanmai, myit hĩng é èq, i-myit lé lhoq ging lhoq tĩng to keq. 9 Gumang wuĩ ê, nungmoq jéyáng a hui sháng gaq, nungmoq yhangchang hkâ-nyung nyáng lhũm nyi ko. Wũ keq, Tarâ agyĩ gi, hkũmdong má jé nyi to bê nghut ri.

10 Gumang wuĩ ê, haũ Yhumsĩng Garaĩ é myĩng eq hko kyô é myiqhtoĩ pé wuĩhke jamjau huĩ é hkũn, jân pyám é myit lé, nungmoq gi, ge é alik agàn kut yũ keq. 11 Wũ keq, shikut shirang é bang lé, nga-nhúng gi, hkungsô wó é bang nghu é nghut lhê. Yobaq hkâm jân é yanmai, Yhumsĩng Garaĩ gi, yhang lé htáng má myo myo dum shimân byĩ é hkyô lé, nungmoq wó gyô wũ bê nghut lhê. Haĩ mù gâ le, haũ Yhumsĩng Garaĩ gi, gyai shogyo nhikmyĩn é sũ nghut nyi ri.

12 Ngá é gumang wuĩ ê, banshoq má ahkyak dik é gi, haĩ le le hkâdakâm kó. Mauhkũng lé a nghut jáng, myigũng lé lang luĩ le hkâdakâm kó. Dakam é dang gotũ lé le hkâtaĩ nyi kó. Nungmoq doqđân é a hui sháng gaq, nungmoq gi, nghut é le gi, "nghut lhê", a nghut é le gi, "a nghut", nghũ za, taĩ keq.

Lumjĩng Myit Eq Kyũdung Râ Hkyô

13 Nungmoq má rayuq yuq wuĩhke jamjau huĩ é nghut le gi, kyũdũng nyĩ sháng gaq; rayuq yuq myit ngón nyi é nghut le gi, hkya-on mahkôn hkon nyĩ sháng gaq. 14 Nungmoq má rayuq yuq nõhpyo huĩ é nghut le gi, noqkuq hpúng mã é nhik bô suwún wuĩ lé ji yũ mù, haũ bang gi, Yhumsĩng Yesuq é myĩng mai yhang lé xũ but byi luĩ, kyũdung byi kó sháng gaq. 15 Haũ su mù, lumjĩng myit èq kyũdũng é dang gi, haũ nõ sũ lé lhoq gê luĩ, Yhumsĩng Garaĩ gi, haũ yuq lé lhoq toq yũ râ nghut lhê. Yhang gi, yubak mara kut shut é nghut kôlháng, hkyut pyám byĩ é hui râ nghut lhê. 16 Haũ mù luĩ, nungmoq lhoq ge é hui kó sháng gaq, nungmoq é yubak mara lé rayuq eq rayuq yĩn lhum mù, kyũdung byĩ lhũm nyi keq. Dingmán su é kyũdung dang gi, wó dut nhâng râ a-tsam wum-o myo myo bo nyi ri.

17 Eliyaq gi, nga-nhúng su i-myit unghkaũ bo é xángzo

byù za nghut lhê. Nghut kôlhang, yhang gi, mau a wò sháng gaq ga, wum kat o kat kyûdung jáng, súm zan eq lhamó hkyuq hkyap tup myigùng htoq má mau a wò shoq dut byuq é nghut lhê.

¹⁸ Kyû dum dúng kat jáng, mauhkûng gi, maú wo hkyô kat byi mù, myigùng gi, yhâng é kyô shi mui shi lé lhoq htoq byí wú bê nghut lhê.

¹⁹ Ngá é gumang wuì ê, nungmoq chyáng mã é rayuq yuq, haù tengmán hkyô mai nghoq ló byuq é hkûn, rayuq yuq gi, yhang lé tengmán hkyô shut dum wó shuí taù lo é nghut le kúm gi, ²⁰ haù shuí taù yù sù gi, yubak mara kut é sù lé, shut shai é hkyô mai tengmán hkyô shut shuí taù yù mù, myit woi-nyí lé shi é mai hkyi yù bê nghut é yanmai, yubak mara myo myo lé shuí nghop pyám byí é sù dut berâ lé, bûn nyi keq ô!

PETRUQ

Hî Dàm Hun Kat é Laiká (1 Peter)

¹ Yesuq Hkrisduq é lagyo nghut sù, ngò Petruq gi, Pontuq, Galatiq, Kapadokia, Asia eq Bihtuni mau pé má byo myín tô bum é, Yesuq Hkrisduq é jìno gyo râ matú le, Yhâng é suí eq hpyûn gyûn é hui* râ matú le, haû Woi-nyí é lhoq sân-yúng nyi é muzó dông mai, Íwa Garai Gasâng é hî te sê tô é hpaqchyî má cháng luí, hkyin yù huí é bang nghut é, ² Garai Gasâng eq hkyin htoq yù luí, mingkân é byùbìng dut bâng chyáng dang kyô kat lhê. Jeju eq nguingón hkyô gi, nungmoq chyáng agùn agó joq nyi sháng gaq.

Dui Nyi É Myit Myoqbyù Hkyô

³ Hkya-on kungtôn hkyô gi, nga-nhúng é Yhumsing Yesuq Hkrisduq é Yhângwa nghut sù Garai Gasang chyáng nghut nyi sháng gaq! Yhang gi, Yesuq Hkrisduq, shi é mai dum dui toq é hkyô dông, Yhâng é gyai shogyo nhikmyîn é yanmai, nga-nhúng lé, asik hku é dum hui nhâng mù, rû dui nyi é myit myoqbyù hkyô lé wó nhang é htoq agó, ⁴ nungmoq é matú mauhkúng htoq má tô to byi bê nghut é, hkâ-nhám

le, a hten a byoq é, agot a-û a dut é, a hpoî byuq é muí lé le wó nhang é nghut lhê. ⁵ Nungmoq gi, lumjìng kô é yanmai, ló htâng é ahkyíng má lhoq htoq shit râ rì rì nghut é hkyi yù hkyô jé shoq, Garaí é hpungwup a-tsâm eq upzúng é hui bang nghut akô. ⁶ Haû mù, nungmoq gi, ahkuí razup zo, wuîhke hkyô junghkang jungmó má yón hpuzô é hui kó râ nghut kôlhâng, gyai yhang gabú nyí keq. ⁷ Wuîhke hkyô haú pé mai, nungmoq é lumjìng myit gi, jet é hkyô lé wó chyam htoq mù, myi mai jên yù kôlhâng htên byoq sê é hîng htoq je gyaú luí, Yesuq Hkrisduq htoq shit é hkûn, hkya-on kungtôn hkyô, hpungwup shing kang eq aróng sitang lé, nungmoq wó kó râ nghut lhê. ⁸ Nungmoq gi, Yesuq lé a myang wú kôlhâng, Yhang lé chyitdap bum akô; Ahkuí, nungmoq, Yhang lé a myàng kôlhâng, Yhang lé lumjìng kô é nghut mù, a ung htoq taí é eq hpungwup bo é gabú hkyô gi, nungmoq chyáng byíng jup nyi rì. ⁹ Hkâsu mù gâ le, nungmoq gi, nungmoq é asak woi-nyí lé hkyi yù hkyô nghu é, nungmoq é lumjìng myit é akyû lé wó yu nyi kô é nghut rì.

¹⁰ Hkyi yù hkyô haû eq séng luí, nungmoq chyáng jé bê nghut é jeju hkyô lé taí é myiqhtoí pé gi, gyai yhang sidìq myit eq jí jí

* **1:1** Yhâng é suí eq hpyûn gyûn é hui gâ é gi, Yhâng é suí eq mara chí sân pyám byi é lé gâ lhê.

chyun chyun ho gon wú bekô nghut ri. ¹¹ Yhangmoq gi, Hkrisduq wuîhke jamjau hui luî, hpungwup shingkang wó râ nghut é hkyô lé, yhangmoq má lúng nyi é, Hkrisduq é Woi-nyí mai te taí é hkûn, hkâ-nhám nghut râ eq hkasû é u má nghut râ hkyô lé ho gôn wú bekô nghut ri. ¹² Mauhkûng mai nhang kat é Chyoiyúng Woi-nyí èq, nungmoq lé gabú danglù hko kyo bê bang mai, ahkuî nungmoq lé taí kyo bê nghut é hkyô pé lé, yhangmoq taí kô é gi, yhumsing matú dojaú é a nghut é za, nungmoq matú nghut é hkyô lé, yhangmoq gi, htoq shit sé nhang é hui bekô nghut ri. Maumang lagyô pé lhang gi, haú hkyô pé lé gyai wú nau bum akô nghut ri.

Chyoiyúng Nyí Râ Hkyô

¹³ Haú mù luî, zui saí râ matú nungmoq é i-myt lé hen to keq; yhumsing gùng yhumsing hkang nyi keq; Yesuq Hkrisduq htoq shit é hkûn, nungmoq lé byi râ nghut é jeju lé, hkyak za myit myoqbyu nyi keq. ¹⁴ Jino gyô é zoshâng wuì su, myoq a bóng shí é pyat má nungmoq nyi tô é hkûn, nungmoq é agè ashop ô nau hkyô lé a châng kut é za, ¹⁵ haú nungmoq lé ji yu é Sû gi, chyoiyúng é su, nungmoq zui saí é hkyô banshoq má chyoiyúng nyi keq. ¹⁶ Hkâsu mù gâ le, "Ngò gi, chyoiyúng Sû nghut é yanmai, nungmoq le

chyoiyúng nyi keq."[☆] ga kâ tô ri.

¹⁷ Byù yuq hkangmó é muzó lé, myoqdong a hkyin é za tarâ jéyáng é sù Íwa lé, nungmoq wut dung kô é yanmai, byùbing dông shí má nyi é u lé, Garai lé gyuq hkunggâ é myit mai asak duì keq. ¹⁸ Hkâsu mù gâ le, nungmoq gi, nungmoq é íchyí íwâ pê chyáng mai bo gyó lo é hpau a dap é asak duì hkyô mai, htên byoq sê é ngùn, hing èq hkyi yù huì é a nghut é za, ¹⁹ gumjup é eq mara a bo é sauzo nghut sù, Hkrisduq é hpaù dik é suì èq sheq hkyi yù huì é ru nghut é lé, nungmoq sê lhê. ²⁰ Yhang gi, mau htoq xâng hkun mai hkyin yu é hui bê nghut kôlhang, jìhtùm ahkyíng shí pé má sheq, nungmoq é matú htoq shit nhang é hui bê nghut ri. ²¹ Yhang lé, shi é mai lhoq dui toq yù mù, hpungwup shingkang bò nhang é Garai Gasang lé, nungmoq gi, Hkrisduq dông mai lumjíng kô é nghut luî, nungmoq é lumjíng myit eq myit myoqbyù hkyô gi, Garai Gasâng chyáng nghut nyí bekô nghut ri.

²² Ahkuî kúm, nungmoq gi, haú tengmán hkyô lé châng é dông mai, yhumsing gùng yhumsing lhoq sân-yúng yù bekô nghut mù, nungmoq é gumang wuì lé, lhumzui é dông chyitdap bekô nghut luî, myit nhikhum mai, rayuq eq rayuq gyai yhang chyitdap

☆ 1:16 Nhung 11:44-45; 19:2; 20:7

lhum keq. ²³ Hkâsu mù gâ le, nungmoq gi, htên byoq sê é amyui mai dum hkû huî é a nghut é za, Garai Gasâng é, rû dui nyi é eq ru gîng nyi é mungdang dông, htên byoq a sê é amyui mai dum hku é huî bang ru nghut lhê. ²⁴ Hkâsu mù gâ le,

"Byù lhunglhang bang gi, wàhu mhan eq pung ri, yhangmoq banshoq bâng é hpungwup shingkang gi, yò mâ é banbó pé eq pung ri;

wàhu mhan gi, nyhuî kyuq byuq luî, banbó pé gi, yoq gyó byuq lhê;

²⁵ nghut kôlhang, haù Yhum-sing é mungdang gi, ahtum abyuq gîng nyi lhê.*

gâ tô ri. Haù gi, nungmoq lé hko kyo bê mungdang nghut lhê.

2

¹ Haù mù luî, i-myit dû é hkyô banshoq eq mhaù zô é hkyô banshoq, gegùn labyoq kut é hkyô, manon é hkyô eq lumù gansang é hkyô jung hkanmó pé lé tô pyám keq.

² Asik hku é zonú pé nau lé ô nau gadaú é su, woi-nyí eq sêng é jet é nau* lé ô nau gadaú nyí keq, haù jáng, nungmoq gi, hau é yanmai, nungmoq é hkyi yù hkyô má wó kô myhâng kó râ nghut lhê. ³ Hkâsu mù gâ le, haù Yhumsîng gi, gè sù nghut é

lé, nungmoq chyam wú bekô nghut ri.

Rû Dui Nyi É Luqgok Eq Hkyin Yù Huî É Byù Myù

⁴ Byù pé mai hkyin htoq pyám kôlhang, Garai Gasâng é matú hpaudap luî, Yhâng èq hkyin yù huî é, rû dui nyi é Luqgok nghut sù, haù Yhum-sing chyáng nungmoq jé lé é hkûn, ⁵ nungmoq le, rû dui nyi é luqgok pé su, woi-nyí eq sêng é yhûm† saí nyi é huî luî, Yesuq Hkrisduq dông mai, Garaî èq hap yù gîng é, woi-nyí eq sêng é hkungga nhông byi râ matú, chyoyúng é hkyangjong amyù dut bekô nghut ri. ⁶ Hkâsu mù gâ le, Chyúmdang má,

"Wú keq, hkyin yù huî é eq hpaudap é htungchyûn luqgok racham lé, Zi-un bùm má ngò lheq tô é nghut lhê;

Yhang lé lumhkau é sù gi, hkâ-nhám le hoq hpû é huî râ a nghut.*

ga taí tô ri. ⁷ Haù mù, lumjîng bang nungmoq é matú gi, luqgok haù hpaudap é nghut lhê. Nghut kôlhang, a lumjîng bâng é matú gi,

"Haù yhûm saí bang hkyin htoq pyâm é luqgok gi, htungchyûn mâ é ahkyak dik é luqgok‡ dut bê nghut ri.*

ga le,

* 1:25 Esai 40:6-8 * 2:2 Woi-nyí eq sêng é jet é nau gâ é gi, Garai Gasâng é mungdang lé taí é nghut lhê. † 2:5 Woi-nyí eq sêng é yhûm gâ é gi, noqkuq

hpúng lé taí nau é nghut lhê. * 2:6 Esai 28:16 † 2:7 Ahkyak é luqgok gâ é gi, Hkrisduq lé taí é nghut lhê. * 2:7 Hkya-on 118:22

8 "Byu pé lé, htûng leng râ luggok eq myit leqbat nhâng râ luq mó cham dut bê nghut ri."*

ga le, tâi tô ri. Yhangmoq gi, mungdang lé a cháng kô é yanmai, myit leqbat kô é nghut lhê. Haû dut râ lé, yhangmoq é matú masat to gû nghut bê nghut ri.

9 Nghut kôlhang, nungmoq gi, mauchut hkaû mai Yhâng é mauhpo maubó shut nungmoq lé wut htoq yû Su é mauhpo muzó lé wó tâi pyô kó sháng gaq ga, hkyin yû huí é byuhú, hkohkâm hkyangjong amyû, chyoyúng é byù myû, Garai Gasang eq sêng é byu pé nghut akô nghut ri. ¹⁰ Nungmoq gi, hí lé byù ra-myû a nghut wú kôlhang, ahkuí gi, Garai Gasâng é byù myû nghut bekô nghut ri; nungmoq gi, hí lé shogyo nhikmyin hkyô lé a wó yu wú kôlhang, ahkuí gi, shogyo nhikmyin hkyô lé wó yû bekô nghut ri.

¹¹ Chyitdap é luzúm wuí ê, nungmoq é asak woi-nyí lé majan zân nyi é, yubak mara byíng Jup é ô nau gadaú hkyô lé koi pyám keq nghú, gó míng byu pé eq byúbíng pé dông míngkan htoq má nyi é bang nungmoq lé, ngò, wum tâi tsuq kat lhê. ¹² Haû a lumjíng shí é byu pé gi, nungmoq shut nyi ri ga, nungmoq lé mara hun bùm kôle, nungmoq é ge é muzó lé myàng kômù, nganhúng lé Garai Gasâng eq lé kúm é buinyi má Garai lé shi-

gyaú kó sháng gaq, a lumjíng shí é byu pé é ahkaû má haû su ge é asak duí hkyô dông nyi yap keq.

Uphkâng Bang Eq Yhumsíng Wui É A-ô Má Nyi Râ Hkyô

¹³ Haû Yhumsing é yanmai, byu pé mâ é ahko ahkáng wó bang banshoq é a-ô má nyi keq; kô dik é ahkáng ayá wó é hkosêng é a-ô má nghut kôle, ¹⁴ shut é hkyô kut bang lé dam byi râ matú eq jô é hkyô kut bang lé shi-gyaú râ matú, hkosêng eq nhang tô é mauzaû pé é a-ô má nghut kôle, nyi nyi keq. ¹⁵ Hkâsu mù gâ le, ge é hkyô kut é dông, byù nâ pé é a sé a dat é dang lé nungmoq lhoq zím pyâm é gi, Garai Gasang ô nau é hkyô nghut lhê. ¹⁶ Lut bê bang dông nyi keq, nghut kôlhang, agè ashop é hkyô lé nghop pyám râ matú nungmoq é luthkyô lé hkâchûng kó; Garai Gasâng é dui-nhâng zoshâng wui dông nyi keq. ¹⁷ Yuq hkgangmó lé rago za hkunggâ é hkyô shit keq; lumjíng é gumang wui lé chyitdap keq; Garai Gasang lé gyuq hkgunggâ nyi keq; hkoséng lé hkungga keq.

¹⁸ Dui-nhâng zoshâng wui ê, hkungga myit banshoq eq, nungmoq é yhumsíng wui é a-ô má nyi keq; ge é eq nú-nhám bâng é a-ô má za a nghut, byuwuí pé é a-ô má le nyi keq. ¹⁹ Hkâsu mù gâ le, byù rayuq gi, Garai Gasang lé bûn nyi sù nghut é yanmai,

mara đông a nghut kôlhang, wuîhke jamjau huî é hkyô lé hpuzô é lé, jân pyâm é nghut le gi, hkyá-on gíng é sù nghut lhê. ²⁰ Nghut kôlhang, nungmoq gi, mara kut shut é yanmai, nhuq bat é hkâm zo luî, haû lé jân nyi é nghut le gi, hai aróng wó kó râ lhú? Nghut kôlhang, nungmoq gi, ge é hkyô kut luî, wuîhke hui zô é lé jân pyâm é nghut jáng, haû gi, Garai Gasâng hí má hkyá-on gíng é hkyô nghut lhê. ²¹ Nungmoq gi, haû hkyô é matú ji yù huî é nghut lhê; haî mù gâ le, Hkrisduq gi, nungmoq é matú wuîhke hkyô huî é má, nungmoq lé alik đông tô to byi bê nghut mù, nungmoq gi, Yhâng é hkyî-kâm pé lé cháng râ dut lhê.

²² "Yhang gi, hai mara le a kut shut, Yhâng é nhut mai mhaû é lé a myàng."*

²³ Yhang gi, rhoi é huî é hkûn, yhangmoq lé a dum taû rhoi; wuîhke hkyô huî é hkûn, kyuq é dang a taí. Haû kut râ malaî, tengmán é đông jéyáng é Su chyáng, Yhânggùng lé ap pyâm ri. ²⁴ Nga-nhung gi, yubak mara eq wó shi gang mù, dingmán hkyô é matú asak wó duí kó sháng gaq ga, Yhang gi, sik zing má, Yhânggùng èq yhang, nga-nhung é yubak mara lé Yhânggùng má wun pyám byi bê nghut ri; Yhâng é dâm pé é yanmai, nungmoq gi, lhoq gê byi é hui bekô nghut ri. ²⁵ Hkâsu mù gâ le, nungmoq gi, hkyô nghoq byuq é sau

pé su dut wú kôlhang, ahkuî, nungmoq gi, haû sau zúng Sù eq nungmoq é asak woi-nyí lé upzúng Su chyáng lhing taû lò bekô nghut ri.

3

Ikun Myhî Pé Eq Ikun Hpô Pé

¹ Ikun myhî pé ê, haû eq rajung za, yhumsing é ikun hpó uphkan é a-ô má nyi keq; haû hkûn, yhangmoq mâ é rayuq yuq, haû mungdang lé a lumjing kôlhang, ² yhumsing é asak duí hkyô mâ é sansêng é hkyô eq hkunggâ é hkyô lé myàng kôjáng, dang đông a nghut é za, yhâng é yhumsing myhî é nyi yap é sâmlai đông mai yhang lé wó lhoq lhiq yû râ nghut lhê. ³ Nungmoq yúng é hkyô gi, ahtoq pyâm za nghut é, xâmban nik é đông, hîng zè mhôn chung é eq réng é mebu wut é đông mai lo é a ge nghut. ⁴ Hau é malaî, haû gi, Garai Gasâng é hí má gù bo é, nú-nhâm é eq zim za dut é woi-nyí é, a dat hpoi é yúng hkyô nghut é nungmoq é i-myit unghkaû mâ é su é yúng hkyô sheq dut râ lhê. ⁵ Hkâsu mù gâ le, gó hkûn, Garai Gasâng chyáng myit myoqbyù bang nghut é, chyoiyúng é myiwe wui gi, yhangmoq gùng lé haû đông mhôn yù yù kut kô é nghut lhê. ⁶ Sarah gi, Abraham é jino gyo luî, yhang lé yhâng é yhumsing ga wut é su, yhangmoq gi, ó le ô é yhumsing é ikun hpó uphkan é a-ô má

* 2:22 Esai 53:9

nyi akô nghut ri. Nungmoq gi, jô é hkyô lé kut mù, gyuq é hkyô a bo é nghut jáng, Sarah é byizô pé nghut bê.

7 Ikun hpô pé ê, haû eq rajung za, yhumsing é ikun myhí eq rahá nyi yap e ló é hkûn, sê gyo byi mù, nungmoq htoq wum nyhôm é bang eq, nungmoq eq rahá asak jeju chyunghuq wunlí wó é bang dông, yhangmoq lé hkungga keq. Haú hkûn, nungmoq é kyûdung dang lé a he-ngik pyám byi râ nghut lhê.

Ge É Kut Luí, Jamjau Hkam É Hkyô

8 Dang htâng sat é má, nungmoq banshoq bang gi, rayuq eq rayuq myit huí lhúm nyi keq; myit wú nô mù, gumang nhiktâng wuì su chyitdap lhúm nyi keq; shogyo nhikmyin myit bò luí, i-myt nyhum nyi keq. 9 Agè ashop é lé, agè ashop é dông lató a hpuq é eq rhoi é lé rhoi é dông lató a hpuq é za, shimân byi keq; haí mù gâ le, nungmoq gi, haú pê é matú, shimân jeju mui wó hkam yù kó sháng gaq ga, ji yu é hui kô é ru nghut lhê. 10 Hkâsu mù gâ le,

"Asak duì râ lé chyitdap é eq ge é buinyi pé lé myàng nau é sù ó yuq le, yhâng é shô lé, agè ashop é mai, yhâng é nhutwuí lé, mhaú dang taí é mai, lhoq kâng pyám ra râ nghut lhê.

11 Yhang gi, agè ashop hkyô mai lhing tau mù, ge é kut ra râ nghut lhê; yhang gi, nguingón simsaq hkyô lé hô mù, châng hkat nyi ra râ nghut lhê.

12 Hkâsu mù gâ le, haû Yhumsing é myoqjí gi, dingmán bang lé wú nyi é nghut luí, yhangmoq é kyûdung dang lé, Yhâng é nohkyap èq gyo byí ri;

nghut kôlhang, haû Yhumsing é myoqdong gi, agè ashop hkyô kut bang lé gye dông myang pyâm ri."[☆]

gâ tô ri.

13 Ge é hkyô lé, nungmoq gyai yhang kut nau nyi é nghut le gi, ó yuq wá nungmoq lé wó gunjang râ lhú?

14 Nghut kôlhang, dingmán hkyo é matú, nungmoq wuìhke jamjau huí le lháng, nungmoq gi, hkungsô wó nyi ri. "Yhangmoq gyuq é hkyô lé hkâgyuq kó; hkâgyuq dàn kó."[☆] 15 Nungmoq kúm gi, myit nhiklhum má, Hkrisduq lé, Yhumsing dông jowò byi keq. Nàng wó é myit myoqbyù hkyô lé myí é sù yuq hkanmó lé, haí mù wó é hkyô tû taí kyo râ matú, ayang hen to aq. Nghut kôlhang, nú-nhâm é eq hkunggâ é dông haú lé kut nyi aq; 16 nungmoq é unghkaû myit san za dut nyi keq, haú hkûn, Hkrisduq dông mai nungmoq wó é ge

é a-kyang lé rhoi dang tai é bang gi, yhangmoq lumù gansang é yanmai hoq hpû é hui kó râ nghut lhê. ¹⁷ Garai Gasang ô nau é nghut le gi, agè ashop kut luí jamjau hkâm râ htoq má, ge é kut luí jamjau hkam le gi, je ge é nghut lhê. ¹⁸ Hkâsu mù gà le, nungmoq lé Garai Gasâng chyáng shuí jé shoq, Hkrisduq gi, byu pê é yubak marâ é yanmai, radàm za shî hkâm pyâm bê nghut ri; haû gi, dingmán Sû, a dingmán bâng é matú shî hkâm byí é nghut lhê. Yhang gi, gungdu shî bê nghut kôhlang, haû Woi-nyí má lhoq dui é hui bê nghut ri. ¹⁹ Yhang gi, Woi-nyí dông, htóng lúng tô é woi-nyí pé lé ê hko kyô ri. ²⁰ Woi-nyí haú pé gi, a-nham lé, Noaq é ipyat má wuì-sanghpo lé Noaq tsuq nyi é hkûn Garai Gasang myit hîng hîng láng nyi é u lé, jino a gyô é bang nghut akô. Wuì-sanghpo má wâng mù, wuì mai hkyi yù huí é byù shau luí, shit yuq za nghut akô. ²¹ Wuì haû gi, ahkuí nungmoq lé le hkyi yu é nghut é baptisma é azòng nghut ri; haû gi, gungdu mã é agot a-û lé huí sêng pyám byí é a nghut é za, sansêng é unghkaû myit mai Garai Gasâng é hí má gidiq tô é ru nghut lhê. Yesuq Hkrisduq é dum dui toq hkyô dông, nungmoq gi, baptisma hkâm yù luí, hkyi yu é hui kô é nghut lhê. ²² Yesuq Hkrisduq gi, mauhkûng má doq lô luí, Garai Gasâng é loqyò

hkyam má nyi tô é nghut mù, maumang lagyô pé, ahkáng ayá pé eq a-tsam pé gi, Yhâng uphkang é a-ô má nghut nyi bum akô.

4

Garai Gasâng É Matú Asak Dui Râ Hkyô

¹ Haû mù luí, Hkrisduq gi, Yhâng é gungdu má hpuzo bê nghut é yanmai, nungmoq le, Yhang i-myt sâmlai hau eq yhumsing gùng má gyehking dông wut to keq, haí mù gà le, yhâng é gungdu má hpuzo bê sù gi, mara eq gang bê nghut ri. ² Haû nghut é yanmai, yhang gi, yhang nyi tùm tô é mingkan asak dui hkyô má, agè ashop é xângzo byù ô nau é dông a nghut é za, Garai Gasang ô nau é dông asak dui é ru nghut lhê. ³ Hkâsu mù gà le, nungmoq gi, lai lò bê ahkyíng má, a lumjîng shî é byu pé hkyin kut nau é hkyô nghut é, shut é dông nyi zô lhum nau é i-myt, agè ashop é yut yut ô nau é hkyô, î shuq wut é hkyô, zo yê shuq yê mù achayut kut é hkyô, ye hai râ wut jung zoshuq lé yut yut ô nau é hkyô, achayut é hparà noq hkyô pé má, ahkyíng luq shoq nyi lai lò bê bang nghut akô. ⁴ Nungmoq gi, ladu lai shoq achayut kut é hkyô má, yhangmoq eq rahá a bo châng kut wún lo kô é nghut mù, yhangmoq gi, maú byuq luí, nungmoq lé lumù gansang pyâm akô nghut ri. ⁵ Nghut kôhlang, yhangmoq

gi, dui nyi é bang eq shî bê bang lé tarâ jéyang râ rì rì nghut to Sû lé jihpán shit kyo ra kó râ nghut lhê. ⁶ Hau é yanmai, ahkuî shi byuq bê bang lé lhang gabú danglù hko kyô é hui bekô nghut lhê; haû gi, gungdu eq séng luî ga jang, yhangmoq gi, byù dông mai tarâ jéyang é hui râ eq, woi-nyí eq séng luî ga jang, Garai Gasang dông mai asak wó duî râ matú nghut lhê.

⁷ Lhunglhang htum râ ahkyíng gi, chyáng bê nghut ri. Haû mù luî, nungmoq kyú wó dung kó sháng gaq, bûn gying luî, yhumsing gùng yhumsing hkanq nyi keq. ⁸ Banshoq htoq má ahkyak é gi, rayuq eq rayuq gyai yhang chyitdap lhúm é hkyô nghut lhê, haî mù gâ le, chyitdap myit gi, yubak mara myo myo lé wó nghop pyâm é nghut lhê. ⁹ Rayuq eq rayuq, taî nyung nyâng é hkyô a bo é za, rago hkulum lhum keq. ¹⁰ Yuq hkanqmó gi, yhumsing wó hkam yù bê chyunghuq eq rajung za, góbang lé dojaú râ lhê; Garai Gasang jeju chyunghuq ajung jung lé, lhumzui é èq rago chung jai râ lhê. ¹¹ Rayuq yuq taî é nghut jáng, Garai Gasang é mungdang haû eq yhang rajung za taî ra râ nghut lhê. Garai Gasang gi, lhunglhang má Yesuq Hkrisduq é yanmai hkya-ôn é hui sháng gaq, rayuq yuq dojaú é nghut jáng, Garai Gasang byí é wum-ô èq dojaú ra râ nghut lhê. Haû hpungwup shingkanq

eq a-tsam gi, Yesuq Hkrisduq chyáng pyat dedu ahtum abyuq joq nyi sháng gaq ô. Amen.

*Hkristan, Dut É Yanmai
Jamjau Huí É Hkyô*

¹² Chyitdap é luzúm wuî ê, wuîhke hkyô dông chyam é lé nungmoq hkâm zô nyi é hkûn, nungmoq chyáng maú nhô zâ é hkyô dut htoq bê dông, hkâgyuq dàn kó. ¹³ Hkrisduq é jamjau hkyô pé lé bo hui zô é yanmai kúm gi, nungmoq gabú keq, haû hkûn sheq, Yhang é hpungwup shingkanq eq rahá Yhang htoq shit é hkûn, nungmoq gi, gabú dik é hui kó râ nghut lhê. ¹⁴ Hkrisduq é myìng yanmai, nungmoq gi, rhoi é hui zô é nghut jáng, hkungsô wó nyi ri; hkâsu mù gâ le, hpungwup shingkanq bo é Woi-nyí nghu é, Garai Gasang é Woi-nyí gi, nungmoq chyáng nyi nyi ri. ¹⁵ Nungmoq mâ é rayuq yuq jamjau huí é nghut le gi, byù sat sù, hkau sù, gotù agè ashop kut sù, góbang é mù má cháng gunjang sù dông jamjau huí é a dut sháng gaq. ¹⁶ Nghut kôlhang, Hkristan rayuq dông nungmoq jamjau huí é nghut le gi, hkâhoq nyí kó, Garai Gasang lé kúm gi, myìng hau é yanmai hkya-ôn nyi keq. ¹⁷ Hkâsu mù gâ le, tarâ jéyang râ ahkyíng gi, jé bê nghut luî, Garai Gasang é ikun byu pé mai hî râ nghut lhê; haû gi, nga-nhúng mai hi é nghut jáng, Garai Gasang é gabú danglù lé a châng é bang

gi, hkâsu wá dut lò râ nghut
lê lú?

¹⁸ "Haû dingmán sù, hkyi yù
hui râ wuî é nghut le
gi, tarâ a hkunggâ é
eq yubak dap é sù gi,
hkâsu wá dut râ nghut
lê lú?"[☆]

gâ tô ri.

¹⁹ Haû nghut mù luî, Garai
Gasang ô nau é đông jamjau
huî é bang gi, yhumsing gùng
lé, lhumzuî é Hpân Su chyáng
ap byi mù, ge é lé xoq kut nyi
ra râ nghut lê.

5

Suwún Wuî Éq Zorâm Wuî

¹ Nungmoq mâ é hpúng
suwún wuî lé, ngò, nungmoq
é byinzùm suwún, Hkrisduq
é jamjau hkyô pè é saksé
nghut sù eq lhoq htoq shit
râ nghut é Yhâng é hpung-
wup shing kang lé bo hkâm râ
nghut sù đông mai sang kat
kôlé: ² Nungmoq lé ap to bê
nghut é Garai Gasâng é sau
hpúng* lé zúng rém bang dut
mù, shuî u bang đông dojaú
nyi keq; zúng rém é hkûn, a
kut a ge luî kut é a nghut é za,
Garai Gasang, nungmoq lé
dut nhâng nau é su, yhumsing
kâm é myit mai kut é nghut
râ lê; ngunzè lé a myoqnoq
é za, shirông myit mai dojaú
râ lê. ³ Nungmoq é loq má
ap byi to bê bang lé a up
zô é za, yhangmoq é hí má
alík dut nyi keq. ⁴ Haû jáng,
Sau zúng Agyi mó† htoq shit

é hkûn, nungmoq gi, hpung-
wup shing kang bo é, hkâ-
nhám le a shum a byuq é jan-
maú lé myang hap yù kó râ
nghut lê.

⁵ Zorâm wuî ê, nungmoq le,
nungmoq htoq ipyat ko bâng
é a-ô má nyi keq. Nungmoq
lhunglhâng bang gi, myit
lhoq nyhum é hkyô lé mebu
su wut to mù, rayuq eq rayuq
dojaú nyi keq, hkâsu mù gâ le,

"Garai Gasang gi, nghutbûn
é bang lé hkûm zing
pyám kôlhâng, myit
lhoq nyhum é bang lé
jeju byi ri."[☆]

ga tô ri. ⁶ Haû mù luî,
ahkýing jé jáng Garai Gasang
nungmoq lé waq toq sháng
gaq, nungmoq gi, Yhâng é
hpungwup a-tsam mó bo é
loq hkaû má, yhumsing myit
lé yhumsing lhoq nyhum nyi
keq. ⁷ Nungmoq é myit chiq
hkyô banshoq lé, Yhâng htoq
má dú kê pyâm to keq, haî mù
gâ le, Yhang gi, nungmoq é
matú chiq byi nyi sù nghut
lê.

⁸ Yhumsing gùng lé
yhumsing hkâng mù, machya
nyi keq. Nungmoq é gyè
nghut é nat Tsadán hpó gi,
rayuq yuq lé wó zô myui
pyám shoq ga, mying wún é
hkanghkyi su hkat gadaú jón
wún ri. ⁹ Yhang lé htuq hting
pyám mù, lumjúng myit má
gingting nyi keq, haî mù gâ le,
mingkan gón mâ é nungmoq
é gumang wuî le, rajung zâ é

[☆] 4:18 Sângghyang 11:31 * 5:2 Sau hpúng gâ é gi, lumjúng bang lé gâ lê. † 5:4
Sau zúng Agyi mó gâ é gi, Hkrisduq lé gâ é nghut lê. [☆] 5:5 Sângghyang 3:34

jamjau hkyô pé hui zô nyi kô é lé, nungmoq sê lhê.

¹⁰ Haû mù, jeju banshoq é Garai Gasang gi, Hkrisduq má ahtum abyuq joq nyi é Yhâng é hpungwup shingkâng matú nungmoq lé ji yù bê nghut luí, nungmoq razup zo jamjau huí é htâng má, Yhang yhang nungmoq lé gumjup nhâng mù, wum bô nhâng luí, ging ging tít tít dut nhâng râ nghut lhê.

¹¹ Haû hpungwup a-tsam banshoq gi, Yhâng chyáng pyat dedu ahtum abyuq rú joq nyí sháng gaq. Amen.

Ló Htâng É Shi-kyám Dang

¹² Lhumzuí é gumang nghû ngò sôn yu é Sila èq garúm luí, ngò gi, nungmoq lé myit wum byi dang eq, myit wum byi dang haú pé gi, Garai Gasâng é tengmán é jeju nghut é lé saksé hkâm é dang pé lé, tot za kê kat é nghut lhê. Tengmán é jeju haú má yap gíng nyi keq.

¹³ Babelon má nyi é, nungmoq eq rahá hkyin yù huí é Hpúng gi, nungmoq lé shi-kyâm kat ri; ngá zo dông nghut sù Markuq le, nungmoq lé shi-kyâm kat ri.

¹⁴ Rayuq eq rayuq, chyitdap bopuq puq é èq shi-kyâm lhum keq.

Nguingón hkyô gi, Hkrisduq má nghut nyi é nungmoq banshoq bâng chyáng ru joq nyí sháng gaq ô.

PETRUQ Htang Dàm Hun Kat é Laiká (2 Peter)

1 Yesuq Hkrisduq é dui-nhâng zoshâng eq lagyo nghut sù, ngò Simun Petruq gi, nga-nhông é Garai Gasang eq hkyi yù Sù nghut é Yesuq Hkrisduq é dingmán hkyô dông, ngamoq su, hpaû dik é lumjíng hkyô lé hap yù bê bâng chyáng dang kyô kat lhê.

2 Garai Gasang eq nga-nhông é Yhumsíng Yesuq lé, nungmoq sê jat nyi é hkyô má, jeju eq nguingón hkyô gi, nungmoq chyáng agùn agó ru joq nyí sháng gaq.

Ji Yu É Eq Hkyin Yu É Hkyô Lé Lhoq Gíng Lhoq Tíng Râ Hkyô

3 Yhâng é hpungwup shíngkang eq ge é hkyô dông nga-nhông lé ji yù Sù lé nga-nhông sê é dông mai, Garai Gasâng é hpungwup a-tsam gi, asak duì hkyô eq tarâ hkungga hkyo é matú nga-nhông râ é jung hkangmó lé byi bê nghut ri. ⁴ Haú pé dông mai, Yhang gi, Yhâng é kô dik, hpaû dik é danggidiq pé nga-nhông lé byi bê nghut ri; haú hkûn, nungmoq gi, haú danggidiq pé dông mai, Garaí é myit sâmlai lé wó bo hkam yù râ eq agè ashop hkyô lé yut yut ô nau é yanmai htoq lo é, mingkan má joq é htên byoq

hkyô mai wó lut kô râ nghut lhê.

⁵ Hau é yanmai yhang, nungmoq gyai yhang shikut luí, nungmoq é lumjíng hkyô má ge é hkyô lé jat yù keq; ge é hkyô má sumsé hpaqchyí lé, ⁶ sumsé hpaqchyí má yhumsing gùng yhumsíng hkgang é hkyô lé, yhumsing gùng yhumsíng hkgang é hkyô má jân shirang é hkyô lé, jân shirang é hkyô má tarâ hkunggâ é hkyô lé, ⁷ tarâ hkunggâ é hkyô má gumang chyitkâng myit lé, gumang chyitkâng myit má chyitdap myit lé, jat yù keq. ⁸ Hkâsu mù gâ le, hau pé lé nungmoq wó sing myô jat lo é nghut jáng, hau pé gi, nga-nhông é Yhumsíng Yesuq Hkrisduq lé nungmoq sê é hkyô má, nungmoq lé akôm a dut nhang é htoq agó, ashi a zui le dut nhâng râ a nghut. ⁹ Nghut kôlháng, rayuq yuq gi, hau pé lé a wó é nghut jáng, chyáng é lé za myang é eq myoqjit é sù nghut luí, laí lò bê yhâng é yubak mara pé mai lhoq sanséng byí é hui bê hkyô lé, tô-myhí pyám bê sù nghut ri.

¹⁰ Haú mù luí, ngá é gumang wui ê, nungmoq lé ji yu é hkyô eq hkyin yu é hkyô lé, je riyhang lhoq gíngtíng nyi keq. Hkâsu mù gâ le, hau hkyô pé lé nungmoq kut nyi é nghut jáng, hkâ-nhám le nungmoq myit leqbat kó râ a nghut; ¹¹ hau htoq agó, nga-nhông é Yhumsíng eq hkyi yù Sù nghut é Yesuq Hkrisduq é ahtum abyuq é mingdán má

agùn agó lhom pang yu é lé, nungmoq myang hap yù kó râ nghut lhê.

Chyúmdang Mâ É Myiqhtoi Dang

¹² Haù mù luí, nungmoq gi, hau pé lé sé kô é htoq agó, nungmoq wó tô é tengmán hkyô má gíngtíng nyì kô é nghut kôlhang, ngò, nungmoq lé hkâ-nhám le hau pé lé ru lhoq pùn nyì râ nghut lhê.

¹³ Shí gungdu má ngò rú dui nyì nyì gi, nungmoq lé lhoq pùn kying byì le ge ri nghû, ngò wó myit ri; ¹⁴ haì mù gâ le, nga-nhùng é Yhumsíng Yesuq Hkrisduq gi, ngo lé san za sé nhâng bê eq rajung za, hkâ-myháng a myáng má, ngò gi, gungdu shí lé tô pyâm to râ nghut é lé sê lhê. ¹⁵ Ngò htoq ló byuq é htâng má, nungmoq, hkâ-nhám le haù pé lé ru wó bûn nyì râ lé myàng nau mù, ngò, wó dut é í shikut nyì râ nghut lhê.

¹⁶ Nga-nhùng é Yhumsíng Yesuq Hkrisduq é a-tsam eq lé lo é hkyô eq séng luí, nungmoq lé ngamoq taì kyô wú é hkûn, ngamoq gi, kut htoq yu é labyoq mhô-myi lé a châng é za, Yhâng é kô làm hkikhkâm hkyô lé myoq eq myang é saksé pé nghut lhê. ¹⁷ Hkâsu mù gâ le, haù Kô Làm Hkikhkâm Hkyo é Hpungwup Shíngkang mai, "Shí yuq gi, Ngò chyitdap é Ngá zo nghut lhê; Yhang má Ngò nhik dik nyì lhê."* ga taì é htê, Yhâng chyáng jé é hkûn,

haù Íwa Garai Gasâng chyáng mâ é aróng eq hpungwup shíngkang lé Yhang wó hap yù bê nghut ri. ¹⁸ Ngamoq yhang, chyoyúng bùm má Yhang eq rahá nyì tô é hkûn, htê haù mauhkúng mai htoq lo é lé wó gyô é nghut lhê.

¹⁹ Haù mù luí, myiqhtoi pé dang lé je lhoq gíng bê hkyô, ngamoq wó é nghut lhê; haù mù, maubó lô luí, nungmoq é myit má bó-myhû htoq lo é hkûn jé shoq, mauchut tuq dut é jowò má duq nyì é myibung lé su, myiqhtoi dang haù lé, nungmoq gyo mù rago châng kut râ dut lhê. ²⁰ Banshoq htoq má, Chyúmdang mâ é myiqhtoi dang gi, haù myiqhtoi pé mai ó le ó lichyúm lhoq htoq yu é dông a nghut é lé, nungmoq sê to râ dut lhê. ²¹ Hkâsu mù gâ le, myiqhtoi dang gi, byù ô nau é dông hkâ-nhám lé a htoq wú é za, haù Chyoyúng Woi-nyí eq shuí u huí é bang mai, Garai Gasâng chyáng mâ é dang taì é ru nghut lhê.

2

Sará Apyoq Pé É Hkyô

¹ Nghut kôlhang, myiqhtoi pyoq pé gi, Israelaq byù haù bâng é ahkaù má nyì wú bê nghut lhê, haù eq rajung za, nungmoq é ahkaù má le sará apyoq pé nyì râ za nghut lhê. Yhangmoq gi, htên byoq hkyô nghut é byoq gang râ mhoqshit hkyô pé lé, haq lhoq pyo é htoq agó, yhangmoq lé wuì yu é, Yhumsíng lé lhang

* 1:17 Mht 17:5; Mrk 9:7; Luk 9:35

he-ngik pyám kó râ nghut lhê. Haú mù, yangmoq gi, yhumsing gùng yhumsing byòdàn tung htên byoq hkyô jé nhâng bekô râ nghut lhê. ² Byù myo myo gi, haú bâng é ahoq ahí hkyô má cháng kó râ eq, tengmán hkyô lé tai hpoî pyám nhâng kó râ nghut lhê. ³ Sará apyoq haú bang gi, yangmoq myoqnoq é hkyô má, yangmoq kut htoq tô é mhô-myi dông nungmoq lé mhaú zo kó râ nghut lhê. Yangmoq lé mara dam byi hkyô gi, gohkûn mai yangmoq ahtoq má lhâng to gù bê nghut é htoq agó, yangmoq é htên byoq hkyô gi, yhup myhî tô nyi é a nghut.

⁴ Hkâsu mù gâ le, Garai Gasang gi, mara kut shut é maumâng pé lé lháng a ha bún é za, ngaraî ming má hkyô pyám luí, tarâ jéyáng é hui râ hkûn jé shoq, yangmoq lé tuq tuq chut é dong hkaú má kat tô é nghut lhê. ⁵ Yhang gi, tarâ a hkunggâ é byu pé lé dowuí tîng é hkûn, gohkun lhê é mingkan lé a ha bun nghut ri, nghut kôlhang, dingmán é hkyô lé hko kyô é sú Noaq eq gotû nyhit yuq lé hung yu é nghut ri; ⁶ Yhang gi, Sodom eq Gomoraq myuq lé, myi-mhop dut shoq nyhê hkyô pyâm é dông mara dam byi luí, tarâ a hkungga bâng chyáng dut lò râ hkyô é azòng kut tô é nghut ri; ⁷ nghut kôlhang, tarâ a chûng bâng é achayut asak ùi hkyô é yanmai myit wui myit hke huí é,

haú dingmán sú Lot lé hkyi htoq yu é nghut ri; ⁸ (hkâsu mù gâ le, dingmán sú haú gi, nyí hkangmó yangmoq ahkaú má nyi nyi é nghut luí, tarâ a chûng é muzó hkyô lé, yang wó myâng wó gyô é yanmai, yhâng é dingmán myit má gunjâng é hui sú nghut ri.) ⁹ Haú su nghut é nghut jáng, Yhumsing gi, tarâ hkunggâ é byu pé lé, wuíhke hkyô mai hkâsu kut hkyi htoq yu râ eq, a dingmán é bang lé, tarâ jéyáng é buinyi jé shoq, dam byi é hkyô lé xoq kut nyi é u má hkâsu kut zuí zing to râ lé sê lhê. ¹⁰ Haú yubak gungshô é htên byoq sê é yut yut ô naù hkyô châng é eq ahko ahkáng lé wú tiq bâng chyáng, haú hkyô hkyak dut râ nghut lhê.

Byù haú bang gi, ngegánghtu é eq nghutbún é bang nghut kôluí, mauhkûng bang lé lumù gansâng râ lé a gyuq kó nghut ri; ¹¹ nghut kôlhang, maumang lagyô pé lháng gi, wum je bo é eq a-tsam je bo é nghut kôle, haú Yhumsing é hí má, haú mauhkûng bang lé mara hun é dông lumù gansâng hkyô a wám kut kó nghut ri. ¹² Nghut kôlhang, haú sará apyoq pé gi, yhumsing a sê gyô é hkyô pé lé rhoi dang tai akô. Yangmoq gi, haú chyup yu é hui luí, lhoq htên pyâm é hui râ matú za hku lé lo é, nhik a bo é tân jung dusak dông nghut akô; dusak haú pé su, yangmoq le, htên byoq byuq kó râ nghut lhê.

¹³ Yhangmoq gi, nò shoq kut bekô nghut é yanmai, nò shoq kut é hui zo kó râ nghut lhê. Yhangmoq é ngón kún nau é myit gi, nyí mó káng lé lhang gungsho yut yut ô nau hkyô lhoq dik râ matú nghut ri. Yhangmoq gi, nungmoq eq rahá zoshuq poí kut kô é hkún, mhaú é lé yhangmoq é ngón hkyô kut kômù, agè agaú é eq achauq achyut é bang nghut akô.

¹⁴ Yhangmoq é myoqjí pé má gi, su-myi sulàng lú hkyô byíng zan to kômù, mara kut é hkyô lé hkâ-nhám le a hkying kó nghut ri; yhangmoq gi, a gingting é bang lé mhoq hpyoq yu akô; yhangmoq gi, myoqnoq é hkyô má kung é bang nghut kômù, nhing pyâm é hui bang nghut akô.

¹⁵ Yhangmoq gi, haú dítng é hkyô lé tô pyâm to kômù, Beora é yhangzo nghut é, agè ashop hkyo é ahpaú lé chyitdap sù Balam é hkyô má châng yông wún bekô nghut ri. ¹⁶ Nghut kôlhang, Balam gi, yang kut shut é hkyo é yanmai, logúng eq tân mhoqshit é hui ri; dang a dat nyo é logúng haú gi, byu é htê dông dang taí lò mù, myiqhtoi hpó a gyíng é hkyô lé hkúm tang pyâm ri.

¹⁷ Byù hau bang gi, wuì a bo é wuìhtung eq, laidún eq mut tâng ló é nghansoq eq pûng kômù, yhangmoq é matú gi, tuq tuq chut é mauchut hkaú lé lajang to bê nghut ri. ¹⁸ Hkâsù mù gà le, yhangmoq

gi, asôm gyáng dang lé taí mù, yubak gungshô é yut yut ô nau é hkyô dông mai, haú shut shai é hkyô má asak dui nyi é mai asik za hpang htoq lo é bang lé, mhoq hpyoq yù akô nghut ri. ¹⁹ Yhangmoq gi, haú bang lé luthkyô byi râ gidíq byi kô é nghut kôle, yhangmoq gùng gi, htên byoq hkyô lhoq htoq é gungsho yut yut ô nau hkyo é jùn dut nyi akô; haí mù gà le, byù rayuq gi, yhumsíng lé hai eq up sing le, hai é jùn nghut lhê. ²⁰ Byu pé gi, nga-nhùng é Yhumsíng eq hkyi yù Sù nghut é Yesuq Hkrisduq lé sê é dông mai, mingkân é agè ashop hkyô mai wó hpang lut htoq bê nghut kôle, yhangmoq lé hau eq tuí yup tô é dum hui luí, ung pyâm é hui kô é nghut jáng, yhangmoq é matú, hí lhê htoq má je wuì byuq kó râ nghut lhê. ²¹ Haú dingmán é hkyô lé yhangmoq sé luí, yhangmoq lé ap byi to bê nghut é chyoiyúng hkunmó lé tô pyâm to mù lhing taú ló byuq kô é htoq má, haú hkyô lé a sê é gi, yhangmoq é matú je gè kó râ nghut lhê. ²² "Hkui gi, yang hpat tô é lé dum taú zô lhê." gà é eq, "Waq gi, chí pyâm byi é htâng, yhâng é galhu htum má dum taú lhu lhê."* gà é sanghkyang gi, yhangmoq chyáng dik bê nghut ri.

3

Haú Yhumsíng Jé Lé Râ Buinyì

¹ Chyitdap é luzúm wuî ê, shî gi, nungmoq lé ngò í dá nghû râ dàm ká byî kat é laiká nghut lhê. Laiká shî í lhum má, nungmoq é sansêng é i-myit lé lhoq toq râ matú tai pún kat é laiká nghut lhê. ² Haú gi, chyoiyúng myiqhtoî pé mai lai lò bê hkún tai tô é dang pé eq, nga-nhung é Yhumsing eq hkyi yù Sú mai, nungmoq é lagyô pé đông byî to bê nghut é hkunmó lé, ngò, nungmoq lé bun nhâng nàu luî nghut lhê.

³ Sâng-hi má, ló htâng é buinyi pé má yhumsing é agè ashop ô nàu hkyô má cháng luî tai hpoi bang htoq lô râ nghut é lé, nungmoq sê gyô to ra râ nghut lhê. ⁴ Haú bang gi, "'Dum jé lé râ' ga Yhang gidiq byî é gi, hkámá lú? Nga-nhung é ichyí iwâ pé gi, shi byuq ló bekô nghut mù, junghkang jungmó gi, mau htoq xâng hkun mai dut é su roq dut nyi ri." ga tai kó râ nghut lhê. ⁵ Nghut kôlhang, yhangmoq gi, a-nham lé, Garai Gasâng é hkunmó mai, mauhkung pé joq é eq, myigùng gi, wui mai dut htoq nhâng mù, wui đông hpan tô é hkyô lé, a sé gùn kut pyâm akô nghut ri. ⁶ Wui hau èq sheq, haú hkun lhê é mingkan lé dowui tít mù, lhoq htên pyâm é nghut lhê. ⁷ Ahkui lhê é mauhkung pé eq myigùng lé gi, tarâ a hkungga bang htên byoq hui râ nghut é, tarâ jéyáng é buinyi jé shoq, myi má nyhé râ matú, hkunmó hau èq Yhang hkong

to bê nghut ri.

⁸ Nghut kôlhang, chyitdap é luzúm wuî ê, haú Yhumsing é hí má, ra-nyí gi, zanwut rahkying đông, zanwut rahkying gi, ra-nyí đông nghut é hkyô shî lé, hkâtô-myí kó. ⁹ Haú Yhumsing gi, Yhâng é danggidiq lé hân a lhoq dik ga byù ra-am myit ngam pyâm é su, nyhâm é Sú a nghut. Yhang gi, ó yuq le htên byoq byuq râ lé a ô nau é yanmai, yuq hkangmó myit lhung râ lé za ô nàu mù, nungmoq lé myit hng byi nyi é nghut lhê.

¹⁰ Nghut kôlhang, haú Yhumsing é buinyi gi, hkau sù su a bân nùng má jé râ nghut lhê. Haú buinyi má, mauhkung pé gi, mying hum htê eq byuq byuq râ nghut lhê; duqbó-gùng pé gi, myi èq lhoq htên pyâm é hui luî, myigùng eq haú mâ é joq mijoq gi, nyé gyó byuq râ nghut lhê.

¹¹⁻¹² Joq mijoq gi, haú hkyô đông lhoq htên pyâm é hui râ nghut é yanmai, nungmoq gi, hkasú é byu pé dut ra râ lú? Nungmoq gi, haú Garai Gasâng é buinyi lé ho nyi é eq buinyi haú hân za jé râ lé ô nau nyi é hkún, chyoiyúng é eq tarâ hkunggâ é asak duì hkyô đông nyi ra râ nghut lhê. Buinyi haú gi, mauhkung pé lé, myi èq lhoq htên pyâm luî, duqbó-gùng pé le, lùm nyé luî, nyé yui pyâm é buinyi dut râ nghut lhê. ¹³ Nghut kôlhang, nga-nhung gi, Garai é danggidiq nghut é, dingmán hkyô

é yhûm, mauhkûng asik eq myigùng asik lé, myoqbyu nyi é bang nghut lê.

¹⁴ Haû nghut mù luí, chyitdap é luzúm wuí ê, nungmoq gi, haú hkyô lé myoqbyu é bang nghut kô é yanmai, Yhang é hí má achag achyut a dut é eq mara hûn râ hkyô a bo é za, Yhang eq nguínón nyi râ hkyô lé gyai yhang shikut nyi keq. ¹⁵ Nga-nhûng é chyitdap gumang Poluq gi, yhang lé, Garai Gasang byi tô é hpaqchyí byéng-yá èq, nungmoq chyáng ká byi bê eq rajung za, nga-nhûng é Yhumsing é myit hîng hkyô gi, hkyi yù hkyô nghut é lé matsîng to keq. ¹⁶ Poluq gi, yhang kâ é laiká pé banshoq má, haú hkyô pé eq séng luí rajung za kâ shít tô ri. Yhang é laiká hkaû pé má, ra-am gi, sê gyo wuí é hkyô pé bo é yanmai, a mhoq wú é bang eq a gingtîng é bang gi, gotú Chyúmdang pé lé lichyúm htaí lhik pyám kô é su, yhangmoq lichyúm htaí lhik pyám kômù, yhumsîng htên byoq hkyô kut yu nyi akô nghut ri.

¹⁷ Haû mù luí, chyitdap é luzúm wuí ê, nungmoq gi, shí hkyô lé sê to gù nghut é yanmai, tarâ a chûng bâng é shut shaí hkyo èq nungmoq lé a wó shuí nghoq yû râ eq, nungmoq é gaû é jowò mai a wó byit gyó byuq sháng gaq, yhumsing gùng yhumsîng upzúng nyi keq. ¹⁸ Nga-nhûng é Yhumsîng eq hkyi yù Sû nghut é Yesuq Hkrisduq é jeju eq hpaqchyí hkyô má, nung-

moq kô myhang lò kó sháng gaq. Hpungwup shingkaq gi, Yesuq Hkrisduq chyáng, ahkuí le, ahtum abyuq le, ru joq nyi sháng gaq ô! Amen.

YOHAN Hî Dàm Hun Kat é Laiká (1 John)

Asak Mungdang

¹ Ngò gi, haû sâng-hi mai joq nyi mù, ngamoq wó gyô wú bê é, ngamoq é myoq èq myang wú bê é, ngamoq rago za wú wú bê é, ngamoq é loq eq záng wú bê é, asak mungdang eq sêng é hkyô lé, nungmoq lé taí kyô kat lhê.

² Asak haû gi, htoq shit bê nghut mù, ngamoq gi, haû lé myang wú luí, saksé hkám bê; haû Íwa eq rahá nyi wú é, ngamoq chyáng htoq shit bê nghut é ahtum abyuq é asak haû lé nungmoq lé taí kyô lhê.

³ Ngamoq eq zùm yap é hkyô lé, nungmoq le wó sháng gaq nghû, ngamoq gi, myang wú bê eq wó gyô wú bê hkyô lé, nungmoq lé taí kyô lhê. Ngamoq gi, haû Íwa eq le, Yhâng zo Yesuq Hkrisduq eq le, zùm yap nyi é bang nghut lhê.

⁴ Ngamoq é gabú hkyô byíng jup sháng gaq nghû, ngamoq gi, nungmoq lé shí hkyô ká byí kat lhê.

Maubó Hkaû Má Sô Nyi Râ Hkyô

⁵ Garai Gasang gi, maubó nghut lhê; Yhâng chyáng mauchut ratsuí lháng a bò nghut ri. Shí hkyô gi, Yhangzô chyáng mai ngamoq wó gyô yù luí, nungmoq lé taí kyô é danglù nghut lhê.

⁶ Nga-nhúng gi, Yhang eq zùm yap nyi lhê nghû taí kôlhang, mauchut hkaû má ru sô nyi bum é nghut jáng, nga-nhúng gi, mhaû é bang dut mù, haû tengmán hkyô đông asak a dui é bang nghut ri. ⁷ Nghut kôlhang, Yhang gi, maubó má nghut nyi é eq rajung za, nga-nhúng le haû maubó má sô nyi é nghut le gi, nga-nhúng rayuq eq rayuq zùm yap nyi bê nghut luí, Yhang zo Yesuq é sui gi, nga-nhúng é mara banshoq lé lhoq sân-yúng pyám byi râ nghut lhê.

⁸ Mara a bò nghû nga-nhúng taí é nghut le gi, yhumsing gùng yhumsing mhaû pyám luí, haû tengmán hkyô gi, nga-nhúng chyáng a bò nghut ri. ⁹ Nghut kôlhang, nga-nhúng gi, yhumsing é mara lé yín yu é nghut jáng, Yhang gi, wó lum é sù eq tengmán é sù nghut é yanmai, nga-nhúng é mara lé hkyut pyám byi luí, a ding a mán é hkyô banshoq mai le, nga-nhúng lé lhoq sân-yúng byi râ nghut lhê. ¹⁰ Nga-nhúng gi, mara a kut shut nghû taí é nghut jáng, nga-nhúng mai Yhang lé mhaû sù nghû chyo pyám é nghut luí, Yhâng é mungdang gi, nga-nhúng má a bò nghut ri.

2

Hkrisduq Gi, Nga-nhúng Lé Garúm Sù

¹ Ngò chyitdap é zo wuí ê, ngò gi, nungmoq mara a kut shut kó sháng gaq nghû, nungmoq lé shí hkyô ká

byi kat lhê. Nghut kôlhang, rayuq yuq mara kut shut é nghut le gi, nga-nhông é matú haú Íwâ chyáng bo taí xoq byi é, Yesuq Hkrisduq gâ é Dingmán Sû lé, nga-nhông wó lhê. ² Yhang gi, nga-nhông é yubak marâ é matú, shihtai gunglik hkungga nghut nyi ri. Nga-nhông é yubak marâ é matú baú za a nghut, mingkan gón mâ é byu pê é yubak marâ é matú le nghut nyi ri.

³ Nga-nhông gi, Yhang hkyô tô é hkunmó pé lé châng kut é nghut jáng, Yhang lé nga-nhông rago sé bê nghut é hkyô lé, wó sé bê nghut ri. ⁴ Byù rayuq yuq mai, "Ngò gi, Yhang lé rago sê lhê." ga taí kôlhang, Yhang hkyô tô é hkunmó lé a châng kut é nghut jáng, haú yuq gi, byù mhaú nghut luí, tengmán hkyô gi, yhang má a bò nghut ri. ⁵ Ó yuq nghut kôlhang, Garai Gasâng é mungdang lé châng kut nyi é nghut jáng, Yhang lé chyitdap é myit gi, haú yuq má gè gè bying jup bê nghut ri. ⁶ Yhang má asak dui nyi lhê ga taí é sù ó yuq nghut kôlhang, Yesuq kut bê eq rajung za, châng kut râ lhê. Haú hkûn sheq, nga-nhông gi, Yhang má nghut nyi bê hkyô lé, wó sê lhê.

Hkunmó Asik

⁷ Chyitdap é luzúm wui ê, ngò gi, nungmoq lé hkunmó asik ká byi kat é a nghut é za, haú sâng-hi mai nungmoq wó to bê hkunmó axau sheq ru nghut lhê. Hkunmó axau

shî gi, nungmoq wó gyô wú bê mungdang nghut nyi ri. ⁸ Nghut kôlhang, ngò gi, nungmoq lé hkunmó asik ká byi kat lhê; hau é tengmán hkyô lé, Yhang má le, nungmoq má le, byu myàng ri; hkâsu mù gâ le, haú mauchut gi, lai ló byuq luí, haú tengmán é maubó gi, duq nyi gù bê nghut ri.

⁹ Ngò gi, maubó hkaú má nghut nyi lhê ga luí, yhumsing é gumang lé a jú é sù ó yuq nghut kôlhang, haú mauchut hkaú má ru nghut nyi ashî. ¹⁰ Yhumsing é gumang lé chyitdap é sù ó yuq nghut kôlhang, haú maubó má asak dui nyi é nghut mù luí, yhang má myit leqbat nhâng râ hkyô hai le a bò nghut ri. ¹¹ Nghut kôlhang, yhumsing é gumang lé a jú é sù kúm gi, haú mauchut hkaú má nghut nyi luí, haú má sô lhing jón wún ri; haú mauchut gi, yhang lé myoq lhoq chit to byi é yanmai, yhang gi, hká shut e ló nyi é hkyô lé a sé nghut ri.

¹² Chyitdap é zo wui ê, Yhâng mying é yanmai, nungmoq é mara pé hkyut pyám byi hui bekô nghut luí, nungmoq lé ngò kê kat é nghut lhê.

¹³ Íwâ pé ê, nungmoq gi, haú sâng-hi mai nyi é Sû lé sé bekô nghut é yanmai, nungmoq lé ngò kê kat é nghut lhê.

Zorâm wui ê, nungmoq gi, haú agè ashop sù lé ùng pyám bekô nghut

é yanmai, nungmoq lé
ngò kê kat é nghut lhê.

Chyitdap é zo wuî ê, nung-
moq gi, haû Íwa lé sé
bekô nghut é yanmai,
nungmoq lé ngò kê kat
é nghut lhê.

14 Íwâ pé ê, nungmoq gi, haû
sâng-hi mai nyi é sù lé
sé bekô nghut é yan-
mai, nungmoq lé ngò
kê kat é nghut lhê.

Zorâm wuî ê, nungmoq gi,
wum-o bo é eq, haû
Garai Gasâng é mung-
dang nungmoq chyáng
dui nyi é nghut mù,
haû agè ashop sù lé
ung pyám bekô nghut
é yanmai, nungmoq lé
ngò kê kat é nghut lhê.

Míngkan Lé A Chyitdap Râ Hkyô

15 Míngkan eq míngkan
htoq mã é haî le lé,
hkâchyitdap kó. Byù rayuq
yuq, míngkan lé chyitdap é
nghut le gi, haû Íwa lé chy-
itdap é myit, yhâng chyáng
a bò nghut ri. 16 Hkâsu mù
gâ le, míngkan htoq má joq
é lhunglhang gi, gungsho ô
nau é hkyô, myoqjí yut yut ô
nau é hkyô, yhumsing wó é
eq kut é hkyô lé gumrong é
pé chyat nghut ri. Haû gi, Íwâ
chyáng mai htoq lo é a nghut,
haû míngkan mai htoq lo é
ru nghut lhê. 17 Míngkan eq
míngkan ô nau hkyô pé gi, laî
ló byuq râ nghut lhê; nghut

kôlhang, haû Garai Gasang
ô nau é hkyô lé kut é sù
gi, ahtum abyuq dui nyi râ
nghut lhê.

Hkrisduq É Gye Pé

18 Chyitdap é zo wuî ê, shí
gi, ló htâng é ahkyíng nghut
bê; haû anti-hkrisduq* gi, lé
lo nyi ri gâ é lé, nungmoq
wó gyô wú bê eq rajung za,
ahkuî lháng, anti-hkrisduq
myo myo gi, jé lé bekô nghut
ri. Hau é yanmai, nga-nhúng
gi, ló htâng é ahkyíng nghut
bê hkyô lé wó sé bê nghut
ri. 19 Yhangmoq gi, nga-
nhúng é hpúng mai htoq ló
byuq bê bang nghut kôle,
gè gè ga jang, nga-nhúng eq
a sêng é bang nghut akô.
Hkâsu mù gâ le, nga-nhúng eq
sêng é nghut jáng, yhangmoq
gi, nga-nhúng eq nyi to râ
nghut lhê, nghut kôlhang,
yhangmoq htoq ló byuq bekô
nghut é yanmai, yhangmoq
rayuq lháng nga-nhúng eq
a sêng é hkyô lé tûn shit bê
nghut ri.

20 Nghut kôlhang, nungmoq
gi, haû Chyoiyúng Sù mai xú
but byî é hui† bekô nghut mù
luî, nungmoq banshoq bang
haû tengmán hkyô lé sê akô
nghut ri. 21 Haû tengmán
hkyô lé nungmoq a sé kôluî,
nungmoq lé ngò kê kat é a
nghut; haû hkyô lé nungmoq
sé gù nghut luî le, haû mhaú é
hkyô gi, tengmán hkyô mai lo
é a nghut é lé nungmoq sé gù

* 2:18 Anti-hkrisduq nghú é lichyúm gi, Hkrisduq lé gyê kut é sù lé gâ lhê † 2:20 Xú but byî é hui gâ é lichyúm gi, Hkrisduq chyáng mai, Chyoiyúng Woi-nyí lé myang hap yu é lé gâ lhê.

nghut lui le, nungmoq lé ngò
kâ kat é nggut lhê. ²² Mhaû
é sù gi, ó yuq nggut lhê lú?
Haû Yesuq gi, Hkrisduq a
nggut ga he pyâm é sù nggut
ri. Haû Íwa eq Yhangzo lé
he-ngik é sù gi, anti-hkrisduq
yhang nggut nyi ri. ²³ Haû
Yhangzo lé he-ngik sù ó yuq
nggut kôle, haû Íwa lé sé sù a
nggut. Haû Yhangzo lé hap
yu é sù kúm gi, haû Íwa lé le sé
bê sù nggut lhê.

²⁴ Haû sâng-hi mai nung-
moq wó gyô wú bê é hkyô
pé lé, nungmoq i-myt má ru
bo nyi keq. Haû nggut jáng,
nungmoq gi, haû Yhangzo eq
Íwâ chyáng nyi nyi râ nggut
lhê. ²⁵ Haû gi, nga-nhung lé
Yhang byi tô é ahtum abyuq é
asak wó yû râ gâ é danggidiq
nggut ri.

²⁶ Ngò gi, nungmoq lé hkyô
shuí nghoq shikut nyi bâng
é hkyô eq séng lui, nungmoq
lé shí gû kâ kat é nggut lhê.
²⁷ Nungmoq chyáng kúm gi,
Yhâng chyáng mai xû but
jeju lé nungmoq wó yù bekô
nggut mù lui, mhoqshit râ
góyuq a ra lo nggut ri. Nggut
kôlhang, haû Yhâng é xû but
jeju gi, hkyô hkangmó má
nungmoq lé mhoqshit byi
mù, haû gi, tengmán nyi é
nggut lui, mhaû é hkyô haî
le a bo é za, nungmoq lé
mhoqshit byi nyi é eq rajung
za, Yhâng chyáng nungmoq
nyi nyi keq.

²⁸ Chyitdap é zo wui ê, nga-
nhung gi, Yhang jé lé mù htoq
shit é hkûn, Yhâng é hí má a

gyuq a kyum é, hoq a hpu é,
wó dut râ matú Yhâng chyáng
ru nyi nyi keq.

²⁹ Yhang gi, dingmán sù
nggut é lé, nungmoq sé bê
yanmai, dingmán hkyô lé kut
é sù ó yuq nggut kôle, Garai
Gasang mai hkû kat é sù
nggut é hkyô lé, nungmoq sé
akô nggut ri.

3

Garai Gasâng É Yhangzô

Pé

¹ Nga-nhung gi, haû Garai
Gasâng é yhangzô pé ga wut
râ hui bê nggut é yanmai, haû
Íwâ é chyitdap myit gi, nga-
nhung ahtoq má hkâ-í yhang
ko nyi ri myhi-nhung! Nga-
nhung gi, yhangzô pé yhang
nggut bu-nhung! Mingkan
gi, Yhang lé a sé é yanmai,
nga-nhung lé le a sé nggut
ri. ² Chyitdap é luzúm wui
ê, ahkuí, nga-nhung gi, Garai
Gasâng é yhangzô pé nggut
nyi to kôlhang, nga-nhung
hkâsu dut râ hkyô lé, a tân shit
shi nggut ri. Nggut kôlhang,
Hkrisduq htoq shit é hkûn,
nga-nhung gi, Yhang su dut
râ nggut é hkyô lé, nga-nhung
sé lhê; hkâsu mù gâ le, Yhang
hkâsu nggut é hkyô lé roq
yhang, nga-nhung myàng râ
nggut lhê. ³ Myit myoqbyù
hkyô shi lé, Yhâng chyáng má
wó tô é bang ó yuq nggut kôle,
Yhang sân-yúng é eq rajung
za, yhumsing gung lé lhoq san
lhoq yúng nyi ri.

⁴ Mara kut é sù ó yuq nggut
kôle, tarâ lu lai é sù nggut
ri; gè gè ga jang, mara gi,

tarâ lu lai é hkyô nghut nyi ri. ⁵ Nghut kôlhang, Yhang gi, nga-nhông é yubak mara lé hkyut pyâm byi râ matú, pô htoq bê hkyô lé nungmoq sé akô; Yhâng chyáng mara a bò nghut ri. ⁶ Yhang má dui nyi é sù ó yuq nghut kôle, mara a xoq kut nyi nghut ri; mara xoq kut nyi sù ó yuq nghut kôle, Yhang lé a myàng, a sé shi nghut ri.

⁷ Chyitdap é zo wui ê, nungmoq lé ó yuq èq le hkyô a shui nghoq kó sháng gaq; Yhang gi, dingmán é eq rajung za, dingmán é hkyô lé kut é sù ó yuq nghut kôle, dingmán nyi ri. ⁸ Mara kut nyi é sù gi, nat Tsadán chyáng mâ é nghut nyi ri; hkâsu mù gâ le, Tsadán haù gi, sâng-hi mai yhang mara kut nyi bê nghut ri. Haù Garai Gasâng é Yhangzo gi, Tsadán é muzó lé lhoq hpyoq lhoq hten râ matú pô htoq le é nghut lhê. ⁹ Garai Gasâng chyáng mai hku kat é sù ó yuq nghut kôle, Yhâng é amyui bo to é nghut é yanmai, mara a xoq kut lo nghut ri; haù yuq gi, Garai Gasang chyáng mai hku kat é hui bê nghut é yanmai, mara wó xoq kut lo râ a nghut. ¹⁰ Ó yuq nghut kôle, dingmán é hkyô a kut é eq, yhâng gumang lé a chyitdap é sù gi, Garai Gasâng yhangzo a nghut. Hau é yanmai, ó pé gi, Garai Gasâng é yhangzô pé nghut é, ó pé gi, nat Tsadán é yhangzô pé nghut é hkyô lé, san za nga-nhông wó sê yu ri.

Rayuq Eq Rayuq Chyitdap

Lhum Râ Hkyô

¹¹ Nga-nhông rayuq eq rayuq chyitdap lhum râ lhê gâ é hkyô haù gi, sâng-hi mai nungmoq wó gyô yù bê danglù nghut ri. ¹² Haù agè ashop sù eq le sêng é, yhanggu lé sat pyâm é Ka-in su a ge kut. Yhang gi, haù mù luí yhanggu lé sat pyâm lhê lú ga le, yhâng é muzó pé gi, agè ashop hkyô, yhanggu é muzó pé gi, dingmán é hkyô nghut é yanmai nghut ri. ☆ ¹³ Ngá é gumang wui ê, nungmoq lé mingkân èq a ngui a jú kut kôlhang, hkâmaù kó. ¹⁴ Nga-nhông gi, nga-nhông é gumang wui lé chyitdap é yanmai, shi byuq é mai wó lut luí asak dui é hkyô lé, wó sê é nghut lhê. Chyitdap myit a bò sù gi, shi é hkyô má lúng tô ashí nghut ri. ¹⁵ Yhâng é gumang lé a ngui a jú é sù gi, byù sat sù dut râ nghut lhê; byù sat sù ó yuq chyáng nghut kôle, ahtum abyuq é asak a bo é hkyô lé, nungmoq sê nyi akô.

¹⁶ Yesuq Hkrisduq gi, nga-nhông é matú Yhâng é asak byi pyâm bê lé wú jáng, chyitdap myit hkasù é nghut é hkyô lé, nga-nhông wó sê ri. Nga-nhông le, gumang wui é matú, nga-nhông é asak lé byi pyâm gíng ri. ¹⁷ Ó yuq nghut kôlhang, mingkan sutzè wó to luí, yhâng gumang hpó asho awui dut nyi é lé myàng kôlhang, a shogyô yu é nghut jáng, haù Garai Gasâng é chyitdap myit gi,

yhâng chyáng hkâsu wó bô râ lúh? ¹⁸ Chyitdap é zo wuî ê, nga-nhúng gi, dang nhut shô mai za a nghut, muzó eq tengmán é đông le chyitdap nyî sháng. ¹⁹ Háu hkûn, nga-nhúng gi, tengmán hkyô eq séng bê bang nghut é lé wó sê é eq, nga-nhúng é i-myt mai nga-nhúng lé mara hun lò hkgangmó, Garai Gasâng é hí má nga-nhúng i-myt wó ngón nyî bê nghut ri. ²⁰ Hkâsu mù gâ le, Garai Gasang gi, nga-nhúng myit é htoq má je kô é sù nghut mù, jung hkgangmó lé sê nyi ri.

²¹ Chyitdap é luzúm wuî ê, nga-nhúng é i-myt mai nga-nhúng lé mara a hun é nghut le gi, Garai Gasâng hí má nga-nhúng gyuq kyûm râ hkyô a joq lo nghut ri. ²² Nga-nhúng gi, Yhang hkyô tô é hkunmó pé lé châng kut é eq Yhang lé gabú nhang é hkyô haî lé le kut é yanmai, nga-nhúng dúng é hkyô lhunglhang lé, Yhâng chyáng mai wó yû râ nghut lê. ²³ Yhang hkunmó hkyô tô é eq rajung za, Yhâng zo Yesuq Hkrisduq é myìng má lumjìng é eq, rayuq eq rayuq chyitdap lhùm é hkyô gi, Yhang hkyô tô é hkunmó yhang nghut bê. ²⁴ Yhang hkyô tô é hkunmó pé lé, châng kut é bang gi, Yhang má dui nyi bê nghut mù, Yhang le háu bâng chyáng dui nyi bê nghut ri. Yhang nga-nhúng chyáng dui nyi bê hkyô lé, nga-nhúng lé Yhang byî tô é Woi-nyí đông nga-nhúng wó sê yu é nghut lê.

4

Woi-nyí Pé Lé Gôn Wú Râ Hkyô

¹ Chyitdap é luzúm wuî ê, woi-nyí hkgangmó lé hkâlumjìng ko, woi-nyí háu pé gi, Garai Gasâng chyáng mâ é nghut é, a nghut e lé gôn wú keq; hkâsu mù gâ le, myiqhtoi pyoq pé myo myo gi, mingkan htoq má jón wún bekô nghut ri. ² Garai Gasâng é Woi-nyí lé nungmoq wó sê yù râ hkyô gi, shí đông nghut lê: háu Yesuq Hkrisduq gi, gungsho đông jé lé bê ga, yín yu é woi-nyí hkgangmó gi, Garai Gasâng chyáng mâ é nghut lê. ³ Nghut kôlhang, Yesuq Hkrisduq lé a yín yu é woi-nyí hkgangmó gi, Garai Gasâng chyáng mâ é a nghut. Woi-nyí háu gi, lé lo nyi ri ga nungmoq wó gyô wú bê; ahkuî lhang mingkan htoq má nyi to gù nghut é anti-hkrisduq é woi-nyí nghut ri.

⁴ Chyitdap é zo wuî ê, nungmoq gi, Garai Gasâng chyáng mâ é nghut mù luî, yhangmoq lé ung pyám bekô nghut ri. Hkâsu mù gâ le, nungmoq má lúng to Sù gi, mingkan má nyi to su htoq je kô ri. ⁵ Yhangmoq gi, mingkan eq séng é bang nghut lê mù luî, mingkan hkyam đông taî bum akô; mingkan zo wuî le yhangmoq é dang lé gyo byî akô nghut ri. ⁶ Nga-nhúng gi, Garai Gasang eq séng é bang nghut lê; Garai Gasang lé sê é sù ó yuq nghut kôle, nga-nhúng é dang lé gyô ri; nghut kôlhang, Garai Gasang eq a

sêng é sũ gi, ngamoq é dang lé a gyo nghut ri. Shí hkyô lé wú jáng, tengmán hkyo é Woi-nyí eq hkyô shuí ngoq é woi-nyí lé, nga-nhúng sê gam hkoq yû bê nghut ri.

Garai Gasang Gi, Chyitdap Myit

⁷ Chyitdap é luzúm wuê ê, nga-nhúng gi, rayuq eq rayuq chyitdap lhùm nyi sháng; hkâsu mù gâ le, chyitdap myit gi, Garai Gasang chyáng mã é nghut ri. Chyitdap myit bò sũ ó yuq nghut kôle, Garai Gasang chyáng mai hku kat é hui bê sũ nghut luí, Garai Gasang lé sé sũ nghut ri. ⁸ Chyitdap myit a bo é sũ ó yuq nghut kôle, Garai Gasang lé a sé sũ nghut ri; hkâsu mù gâ le, Garai Gasang gi, chyitdap myit nghut lhê. ⁹ Garai Gasang gi, Yhang Zô é yanmai nga-nhúng asak wó duí sháng gaq ga, Yhang Zo zote lé mingkan htoq mã nhang kat byi bê nghut ri. Haú gi, Garai Gasang mai nga-nhúng lé, Yhâng é chyitdap myit tân shit é hkyô nghut ri. ¹⁰ Nga-nhúng gi, Garai Gasang lé chyitdap é a nghut, Garai Gasang sheq nga-nhúng lé chyitdap luí, nga-nhúng é yubak marâ é matú, shíhtai gunglik hkungga dut sháng gaq ga, Yhang Zo lé nhang kat byi é nghut ri; haú gi, chyitdap myit yhang nghut bê. ¹¹ Chyitdap é luzúm wuê ê, Garai Gasang gi, nga-nhúng lé haú-í yhang chyitdap é nghut jáng, nga-nhúng le rayuq eq

rayuq chyitdap lhum râ dut lhê. ¹² Garai Gasang lé ó yuq èq le, hkâ-nhám lhang myang wú é a nghut; nghut kôlhang, nga-nhúng rayuq eq rayuq chyitdap lhùm nyi é nghut jáng, Garai Gasang gi, nga-nhúng mã nyi nyi bê nghut luí, Yhâng é chyitdap myit gi, nga-nhúng mã gumjup râ nghut lhê.

¹³ Garai Gasang gi, nga-nhúng lé, Yhâng é Woi-nyí byi to bê nghut é yanmai, Yhâng chyáng nga-nhúng dui nyi bê hkyô lé le, Yhang nga-nhúng mã nyi nyi bê hkyô lé le, nga-nhúng sé bê nghut ri. ¹⁴ Haú Íwa gi, Yhang Zo lé mingkân é hkyi yù Sũ dut sháng gaq ga nhang kat é hkyô lé, ngamoq myàng luí, saksé hkâm lhê. ¹⁵ Ó yuq nghut kôlhang, Yesuq gi, Garai Gasang é Yhangzo nghut ri ga yín yu é nghut le gi, yhang mã Garai Gasang nyi nyi bê nghut luí, yhang le Garai Gasang chyáng dui nyi bê nghut ri. ¹⁶ Nga-nhúng gi, Garai Gasang èq nga-nhúng lé chyitdap é hkyô lé, sé luí lumjínng nyi lhê; Garai Gasang gi, chyitdap myit nghut lhê; chyitdap myit mã nyi nyi é sũ ó yuq nghut kôle, Garai Gasang chyáng dui nyi bê nghut luí, Garai Gasang le haú yuq mã nyi nyi bê nghut ri. ¹⁷ Haú đông mai, chyitdap myit gi, nga-nhúng chyáng gumjup bê nghut luí, nga-nhúng gi, tarâ jéyáng é buinyi mã a gyuq a kyum é myit wó yû râ nghut lhê; hkâsu mù gâ le, nga-nhúng gi, mingkan

shî má Yhang su dut nyi bê nghut ri. ¹⁸ Chyitdap myit má gyuq é hkyô a bò nghut ri; gyuq é hkyô gi, mara dam byí é hkyô eq sêng é nghut mù luí, gumjup é chyitdap myit gi, gyuq é hkyô lé hkat htoq pyâm ri. Haû gyuq é myit bò sù gi, chyitdap myit má gumjup sù a nghut.

¹⁹ Yhang hí nga-nhung lé chyitdap bê nghut é yanmai, nga-nhung le chyitdap nyi lhê. ²⁰ Byù rayuq yuq gi, "Ngò, Garai Gasang lé chyitdap lhê." ga taí kôlhang, yhang é gumang lé a jú é nghut jáng, haú yuq gi, byù mhaú rayuq nghut ri; hkâsu mù gâ le, yhumsing byu-myang é gumang lé lhang a chyitdap é sù gi, a byu-myang é Garai Gasang lé wó chyitdap râ a nghut. ²¹ Garai Gasang lé chyitdap é sù ó yuq le, yhumsing gumang lé le chyitdap râ lhê gâ é dang haú gi, nga-nhung é matú, Yhang mai hkyô tô é hkunmó nghut lhê.

5

Garai Gasâng É Yhangzo Lé Lumjǐng Hkyô

¹ Yesuq gi, haú Hkrisduq nghut ri ga lumjǐng é sù ó yuq nghut kôle, Garai Gasâng chyáng mai hku kat bê sù nghut ri; îwa lé chyitdap é sù ó yuq nghut kôle, yhang zo lé le chyitdap é nghut bê. ² Garai Gasang lé chyitdap nyi mù, Yhang hkyô tô é hkunmó pé

lé châng kut nyi é nghut le gi, Garai Gasâng é yhangzô pé lé le, chyitdap nyi é hkyô lé, nga-nhung wó sê yu é yanmai, ³ Garai Gasang hkyô tô é hkunmó pé lé châng kut é gi, Yhang lé chyitdap é hkyô nghut ri. Yhang hkyô tô é hkunmó pé gi, wòlai mó a nghut. ⁴ Hkâsu mù gâ le, Garai Gasâng chyáng mai hku kat bê sù ó yuq nghut kôle, mingkan lé ung pyâm bê nghut ri. Nga-nhung é lumjǐng myit gi, mingkan lé nga-nhung ung pyâm é ong-dang hkyô nghut ri. ⁵ Yesuq gi, Garai Gasâng é Yhangzo nghut é lé lumjǐng é sù mai lai luí, mingkan lé wó ung pyâm é sù gi, ó yuq wá nghut lhê lú?

⁶ Haú yuq gi, wuì eq sui* mai lé é sù, Yesuq Hkrisduq yhang nghut nyi ri. Yhang gi, wuì mai za lé é a nghut, wuì mai le, sui mai le, lé é sù nghut lhê. Woi-nyí gi, tengmán hkyô nghut é yanmai, shí hkyô lé saksé hkâm byí ri. ⁷ Hkâsu mù gâ le, Woi-nyí le, wuì le, sui le, haú sùm lhùm é saksé hkâm akô nghut ri; ⁸ haú sùm lhum gi, rajung za nghut akô. ⁹ Nga-nhung gi, byu é saksé lé lhom yu lhê; nghut kôlhang, Garai Gasâng é saksé gi, haú htoq je kô nyi ri. Hkâsu mù gâ le, Garai Gasang gi, Yhang Zo eq sêng é hkyô lé saksé byí é yanmai nghut ri. ¹⁰ Garai Gasâng é Yhangzo lé lumjǐng é sù gi, saksé haú lé yhang

* **5:6** Wuì eq sui nghu é gi, Yesuq baptisma hkam yu é hkyô eq shí hkâm é hkyô lé taí nau é nghut ri.

é i-myt má wó bê nghut ri; Garai Gasang lé a lumjǐng é sǔ kúm gi, Yhang lé byù mhaú rayuq ga chyo pyám bê nghut ri; hkâsu mù gâ le, Garai Gasang mai Yhang Zo eq sêng é hkyô saksé hkâm é lé, yhang a lumjǐng é yanmai nghut ri. ¹¹ Nga-nhúng lé, Garai Gasang byî é ahtum abyuq é asak gi, saksé haú nghut nyi ri. Asak haú gi, Yhang Zô chyáng bo ri. ¹² Garai Gasang é Yhangzo lé wó sǔ gi, asak haú lé wó bê; Yhang Zo lé a wó sǔ gi, asak haú lé le a wó nghut ri.

Ahtum Abyuq Asak

¹³ Garai Gasang é Yhangzô é myǐng lé lumjǐng é bang nungmoq gi, ahtum abyuq é asak wó bê hkyô lé, nungmoq sé kó sháng gaq nghû, shí hkyô pé lé ngò ká byî kat é nghut lhê. ¹⁴ Nga-nhúng haú dǔng le le, Garai Gasang ô nau é dǔng nghut jáng gi, Yhang gyo byi râ nghut lhê; haú gi, Yhâng é hí má nga-nhúng a gyuq a kyum wó wâng râ matú nghut ri. ¹⁵ Haú mù, nga-nhúng haú dung kôlhang, Yhang gyo byî é lé nga-nhúng sê é nghut le gi, Yhâng chyáng nga-nhúng dǔng é hkyô lé, nga-nhúng wó yu é lé, nga-nhúng sê lhê.

¹⁶ Ó yuq nghut kôle, yhum-sing é gumang hpó mai shí a gǐng é mara kut shut é lé, myang é nghut le gi, haú yuq é matú kyûdung byi râ lhê. Haú hkûn, Garai Gasang gi, haú yuq lé asak byi râ nghut lhê. Haú gi, shí a gǐng é mara

wó bâng é matú taí é nghut lhê. Shí gǐng é mara le joq lhê; nghut kôlhang, hau é matú dung râ lhê nghû, ngò taí nyi é a nghut. ¹⁷ A dingmán é hkyô lhunglhang gi, mara nghut lhê; nghut kôlhang, shí a gǐng é mara le joq lhê.

¹⁸ Garai Gasang chyáng mai hku kat bê sǔ ó yuq nghut kôle, mara a xoq kut lô é hkyô lé nga-nhúng sê lhê; hkâsu mù gâ le, haú Garai Gasang é Yhangzo gi, haú yuq lé wú zúng nyi é nghut mù luí, haú agè ashop sǔ gi, haú yuq lé wó záng htung râ a nghut. ¹⁹ Nga-nhúng gi, Garai Gasang é yhangzô pé nghut é lé le, mingkan gón lé haú agè ashop su èq up tô é hkyô lé le, sê lhê. ²⁰ Hau htoq agó, Garai Gasang é Yhangzo jé lé luí, haú tengmán Sǔ lé sé sháng gaq ga, nga-nhúng lé sê gyô é nyan byi bê hkyô lé le, nga-nhúng sê lhê. Nga-nhúng gi, Yhang Zo Yesuq Hkrisduq má nghut nyi bê eq rajung za, haú tengmán Sǔ má le nyi nyi bê nghut lhê. Yhang gi, haú tengmán é Garai Gasang eq ahtum abyuq é asak nghut nyi lhê.

²¹ Chyitdap é zo wuî ê, hparà lhó pé lé koi pyám nyi keq.

YOHAN Htang Dàm Hun Kat é Laiká (2 John)

¹ Ngò suwún hpó gi, tengmán hkyô má ngò chyitdap é, hkyin yù huí é nàng hpô-myhí eq nung zô pé lé, dang kyô kat lhê; ngò báu za a nghut, haù nga-nhúng chyáng lúng to luí, ² nga-nhúng eq ahtum abyuq ru joq nyí rá nghut é tengmán hkyo é yanmai, haù tengmán hkyô lé sê é lhunglhang bang le, nungmoq lé chyitdap nyí lhê.

³ Haù Íwa Garai Gasang eq Íwá é Yhangzo Yesuq Hkrisduq chyáng mâ é jeju, shogyo nhikmyin hkyô eq nguingón hkyô gi, haù tengmán hkyô eq chyitdap hkyô má, nga-nhúng eq rahá joq nyí sháng gaq.

⁴ Haù Íwa mai nga-nhúng lé hkunmó hkyô tô é eq rajung za, nung zô pé ra-am gi, haù tengmán hkyô má châng nyí é hkyô lé, ngò wó sê é yanmai, gyai yhang gabú nyí lhê. ⁵ Chyitdap é hpô-myhí é, nga-nhúng rayuq eq rayuq chyitdap lhum sháng nghû, ahkuí, ngò, nang lé dúng kat lhê; shí gi, sâng-hi mai nga-nhúng wó gyô yù bê hkunmó lé sheq, nang lé ngò ká byí kat é nghut lhê; hkunmó sik ralhuma a nghut. ⁶ Yhang hkyô tô é hkunmó eq rajung za, nga-nhúng cháng kut é nghut

ráng gi, chyitdap é hkyô nghut bê. Sâng-hi mai nungmoq wó gyô yù bê eq rajung za, Yhang hkyô tô é hkunmó gi, nungmoq chyitdap myit bo nyí rá matú nghut lhê.

⁷ Hkâsu mù gâ le, Yesuq Hkrisduq gi, gungsho đông jé lé é hkyô lé a yín yu é, mhaù zô é byù myo myo gi, mingkan htoq má jón wún bekô nghut ri; haù sù é byù gi, haù mhaù zo sù eq anti-hkrisduq dut rá nghut lhê. ⁸ Nungmoq zui saí bê muzó é akyù lé a lhoq hpyuq é za, gumjup é shigyau chyunghuq lé, nungmoq wó hkam yù kó sháng gaq, yhumsing gùng sidiq nyí keq. ⁹ Hkrisduq mhoqshit é dang lé a châng é za, laí chyan é sù ó yuq nghut kôle, Garai Gasang lé a wó é sù nghut ri; haù mhoqshit é dang lé ru châng nyí é sù kúm gi, haù Íwa lé le, Yhangzo lé le, wó bê sù nghut ri. ¹⁰ Mhoqshit é dang haù lé a wun é byù rayuq yuq, nungmoq chyáng jé lé é nghut le gi, haù yuq lé nungmoq é yhúmkaù má hkâwâng nhâng kó; yhang lé hkâlhom xoq yù kó. ¹¹ Hkâsu mù gâ le, haù yuq lé lhom xoq yu é sù gi, yhâng é agè ashop é muzó má lôm bê sù nghut ri.

¹² Ngò gi, nungmoq lé ká byí kat rá hkyô myo myo joq kôlhang, laiká hkyap eq kajung-chí lé a kâm chùng naù. Nga-nhúng é gabú hkyô wó gumjup sháng gaq, ngò, nungmoq chyáng tsuq za lé jé mù, nungmoq eq myoqdong

hkyâm kut nyo lhum râ lé
myit myoqbyu nyi lhê.

¹³ Hkyin yù huî é náng nhâ
é yhangzô pé gi, nang lé shi-
kyâm kat akô nghut ri.

YOHAN Súm Dam Dàm Hun Kat é Laiká (3 John)

¹ Ngò suwún hpó gi, haù tengmán hkyô má ngò chyt-dap é, ngá é chyitdap luzúm Ge-u lé dang kyô kat lhê.

² Chyt-dap é luzúm hpó ê, ngò gi, haù náng é asak woi-nyí nyì-ngón yuqyo nyi é eq rajung za, nàng nguingón wángzán râ eq hkyô hkat hkangmó má, nyì-ngón yuqyo nyi sháng gaq nghû, kyûdung byí kat lhê. ³ Hkâsu mù gà le, ngò gi, gumang wui ram, ngá chyáng lé jé mù, haù tengmán hkyô má nàng lhumzui é hkyô lé le, haù tengmán hkyô má nàng hkâsu kut xoq châng nyi é hkyô lé le, lé taí kyo kô é hkûn, gyai yhang gabú é yanmai nghut lhê. ⁴ Haù tengmán hkyô má, ngá zô pé châng nyi é hkyô lé, ngò wó gyô é hkûn gabú é í, gotû gabú hkyô a wó lo nghut ri.

⁵ Chyt-dap é luzúm hpó ê, haù gumang wui gi, mau we bíng pé nghut to kôlhang, nàng yhangmoq lé lhom garúm yu é hkyô má, nàng gi, lhumzui nyi ri. ⁶ Yhangmoq gi, haù noqkuq hpúng mâ é bang lé, náng é chyitdap myit eq séng lui taí kyo bekô nghut ri. Nàng gi, Garai Gasâng hí má gingdán é dông, yhangmoq é hkyowui matú garúm lui, dé kat é nghut jáng, ge é muzó jizó kut é nghut bê.

⁷ Hkâsu mù gà le, yhangmoq gi, Hkrisduq é myìng hau é matú htoq lô kôluí, a lumjìng bâng chyáng mai haí lhang a hap yù kó nghut ri. ⁸ Haù mù lui, nga-nhúng gi, haù tengmán hkyô é matú rahá za wó chôm zui saí sháng gaq, haù sù é byu pé lé lhom hkûlum yù râ lhê.

⁹ Ngò gi, haù noqkuq hpúng lé laiká ká byí kat bê nghut lhê; nghut kôlhang, haù ushuq kut nau é sù Diotrehpi gi, ngamoq lé a lhom hap yù nghut ri. ¹⁰ Haù mù lui, ngò lé jé jáng gi, ngamoq lé a jo a âng é dang taí é eq lumù gansang é, yhang kut é muzó lé, taí hpyí kyo râ nghut lhê; yhang gi, haù hkyô lé myit a dik shí é nghut mù lui, yhang yhang le gumang wui lé a lhom hkûlum yù, lhom hkûlum yù naù bang lé le, yhang mai hkûm zing pyám lui, yhangmoq lé haù noqkuq hpúng mai hkat htoq pyâm ri.

¹¹ Chyt-dap é luzúm hpó ê, agè ashop hkyô lé alik a yu é za, ge é hkyô lé yù aq; ge é hkyô kut é sù gi, Garai Gasâng chyáng mâ é nghut bê; agè ashop é hkyô kut é sù gi, Garai Gasang lé a myàng shí é sù nghut ri. ¹² Demetri ge é hkyô lé, yuq hkangmó mai le, haù tengmán hkyô èq le, saksé hkám byí akô nghut ri; ngamoq le, yhang ge é hkyô lé saksé hkám byí lhê; haù ngamoq hkâm é saksé gi, têng é hkyô nghut é lé, nàng sê lhê.

¹³ Ngò gi, nang lé ká kat ra hkyô myo myo joq kôlhang,

kâjung eq kâjung-chi đông a kâ
 kat naù lo. ¹⁴Ngò gi, a myáng
 má, nàng eq myang huì lhum
 râ lé myit myoqbyu tô lhê.
 Haú hkún sheq, ngá-nhik my-
 oqdong hkyûm myang nyo
 lhum râ nghut lhê.

¹⁵Nàng nguingón yuqyo nyì
 sháng gaq; shî mâ é luzúm
 wuì gi, nang lé shi-kyâm kat
 akô nghut ri. Nàng le, haú mâ
 é luzúm wuì lé, myìng du htau
 lû bo shi-kyám byi laq.

YUDE Hun Kat é Laiká (Jude)

¹ Yesuq Hkrisduq é dui-nhâng zoshâng nghut sù eq Yakuq é yhanggu, ngò Yude gi, haù Íwa Garai Gasâng èq ji yù mù, chyitdap é hui luí, Yesuq Hkrisduq èq upzúng é hui bâng chyáng dang kyô kat lhê.

² Shogyo nhikmyin hkyô, nguingón hkyô eq chyitdap hkyô gi, nungmoq chyáng agùn agó joq nyì sháng gaq ô!

Garai A Wó Bâng É Yubak Mara

³ Chyitdap é luzúm wuî ê, ngò gi, nga-nhúng chôm wó é hkyi yù hkyô haù eq séng luí, nungmoq lé gyai yhang kê kat byí nau é nghut lhê wá, haù sân-yúng bang lé, radá dâm jâng ap byí to bê nghut é lumjúng hkyo é matú nungmoq htuq htíng râ dut é lé, myit wum byi râ hkyô ká râ dut é lé, ngò byu-myang ri.

⁴ Hkâsu mù gâ le, haù mara dam byí é hui zo râ hkyô lé, a-nham pyat mai kê matsíng tô é hui bê bang ra-am gi, nungmoq chyáng hkaù wang lò bekô nghut ri. Yhangmoq gi, Garai a wó é bang nghut luí, haù nga-nhúng é Garai Gasâng jeju lé, mingkan ngón hkyo eq htaí lhik pyám kô é htoq agó, Yhang za nga-nhúng é Yhumsíng nghut sù eq Ahko ahkáng lhunglhang

wó sù, Yesuq Hkrisduq lé he-ngik pyám akô nghut ri.

⁵ Nungmoq kúm gi, shí pé banshoq lé sê to gù nghut kôlhâng, ngò mai nungmoq lé taí pún nau é hkyô gi, a-ô mâ é pé nghut lhê: Haù gi, Yhumsíng Garai mai, Yhâng é byu pé lé, Egutuq ming mai hkyi htoq yù kôlhâng, a lumjúng é bang lé gi, htâng má dum lhoq htên pyám é nghut lhê. ⁶ Hau htoq agó, haù yhumsing é ayá lé tô pyám luí, yhumsing é nyi jowò lé pyám tô é maumâng pé lé, Yhang gi, haù tarâ jéyáng é hui râ Buinyì mó jé shoq, ahtum abyuq é to-qjâng tuí èq tui luí, mauchut hkaù má lhúng tô é nghut lhê.

⁷ Haù eq rajung za, Sodom eq Gomoraq myuq eq hau é awui ayám mâ é wà pé mâ é bang gi, ashop é đông gungsho zùm yap é hkyô shut é eq myiwe yhangchang yuqgè yhangchang nyi zô lhúm é hkyô kut kô é nghut mù, yhangmoq gi, ahtum abyuq é myi má dam byí é hpuzo bâng é alik dut bekô nghut ri.

⁸ Haù eq rajung za yhang, yhupmoq moq é byù shí bang gi, yhumsing é gungsho lé agot a-ù kut kômù, ahkáng ayá wó sù lé he-ngik pyám kôluí, mauhkúng bang lé lumù gansang akô nghut ri.

⁹ Nghut kôlhâng, haù mau-mang lagyo agyi Mihkaelaq lhang gi, Mosheq é gùng eq séng luí, haù nat zau eq dang rhâng lhúm é hkùn, yhang lé rhoi é đông mara hùn dang

a wám taí é za, "Nang lé, haú Yhumsíng nhik-yo sháng gaq!" ga za taí ri. ¹⁰ Nghut kôlhang, byù haú bang gi, yhangmoq a sê gyô é hkyô pé lé rhoí dang taí pyám akô nghut ri; yhangmoq gi, haú myit woi-nyí a bo é dusak pé su, yhumsing myit mai sê gyô é hkyô pé má lhang, yhumsing gùng lé lhoq htên yu akô nghut ri.

¹¹ Yhangmoq gi, dingnyé wó râ! Hkâsu mù gâ le, yhangmoq gi, Ka-in* kut é agè ashop é hkyô đông cháng kô é yanmai le, akyû wó râ matú, Balam† shut é đông bo shut kô é yanmai le, Kora‡ é gumlau toq hkyô kut kômù, yhang su htên byoq byuq é hui kô é yanmai le nghut ri.

¹² Yhangmoq gi, nungmoq é chyitdap zoshuq poí má nungmoq lé agot a-û wó dut nhang é bang nghut mù, gyuq hoq a bo é za, nungmoq eq rahá chôm zoshuq kô é hkûn, yhumsing gùng lé za yhumsíng lhoq gyí yu é sau zúng bang nghut akô; yhangmoq gi, lai eq mut tâng wún é, mau a bo é mhut pé su nghut é htoq agó, ashi a zui mù, amyit eq roq hpûn pyám luí, í dâm shi é, xung nám lhê é sigâm pé su nghut akô. ¹³ Yhangmoq gi, yhumsing é hoq jung lé, tsû-myup su htoq nhang é, haú wuimau mâ é kô é wuilhêng pé eq, tuq tuq

chut é mauchut hkaú má tarâ jéyáng hui râ matú, ahtum abyuq tô to hui é, yông wún é kyí pé su nghut akô.

¹⁴ Byù haú bang eq séng luí, Adam mai byuxik nyhit xik má nyi é E nuk, myiqhtoi htoi tô é gi, "Wú keq, haú Yhumsíng gi, Yhâng é chyoiyúng bang mun mun sen sen eq rahá gyó lé lo nyi bê nghut ri. ¹⁵ Yhang gyó lé lo é gi, yuq hkangmó lé tarâ jéyáng râ matú eq, haú tarâ a hkunggâ é lunglhang bang, tarâ a hkunggâ é đông kut é muzó pé banshoq lé le, tarâ a hkunggâ é yubak byu pé, Yhang lé taí shut é dang htân pé banshoq lé le, mara byi râ matú nghut lhê." gâ ri. ¹⁶ Byù haú bang gi, put dang taí é bang eq mara hûn dang taí é bang nghut akô; yhangmoq gi, yhumsíng ô nau é agè ashop hkyô cháng kô é htoq agó, yhumsing gùng yhumsíng nghutbún é dang taí é eq yhumsing maiwáng zat é đông, góbang lé owaq é bang nghut akô.

Hkam Jân Râ Hkyô

¹⁷ Nghut kôlhang, ngò chyitdap é luzúm wuí ê, nungmoq gi, haú nga-nhông é Yhumsíng Yesuq Hkrisduq é lagyô pé mai te taí tô é dang lé, bún nyi keq. ¹⁸ Hkâsu mù gâ le, yhangmoq gi, "Haú ló htâng é ahkyíng pé má, tarâ a hkunggâ é yhumsíng ô nau

* **1:11** Ka-in gi, yhanggu lé sat sù nghut lhê. Apûn 4:1-8 † **1:11** Balam gi, myiqhtoi nghut lhê, nghut kôlhang, ngunzê lé myoqnoq mù, Garai lé shut sù nghut lhê. Gyung So 22:1-35 ‡ **1:11** Kora gi, Garaí byù nghut é hkyô-u shê sù Mosheq lé gumlau toq é hkyangjong nghut lhê. Gyung So 16:1-33

é hkyô đông châng é, rhoijap-dap dang tai é byu pé nyi to râ nghut lê." ga, nungmoq lé tai wú kô é nghut lê. ¹⁹ Byù haù bang gi, nungmoq lé gam hkoq é bang, mingkan hkyô lé baù za châng é bang, haù Woi-nyí a bo é bang nghut akô.

²⁰ Nghut kôlhang, ngò chyit-dap é luzúm wui ê, nungmoq gi, haù Chyoiyúng Woi-nyí má kyûdúng é đông, nungmoq é chyoiyúng é lumjínghkyô má, yhumsing gùng yhumsing lhoq kô yu nyi keq.

²¹ Ahtum abyuq é asak lé wó yû râ matú, haù nga-nhông é Yhumsing Yesuq Hkrisduq é shogyo nhikmyin hkyô lé láng uchyang, nungmoq gi, Garai Gasâng é chyitdap myit má, yhumsing gùng yhumsing nyi nyi keq.

²² Lumjínghkyô má úng-âng é bang lé, shogyo nhikmyin nyi keq; ²³ góbang lé gi, myi mai she htoq yû mù, hkyi yù keq; dum, góbang lé gi, sidiq myit èq shogyo nhikmyin hkyô tân shit mù, haù gungshô é achay achyut dap é yhangmoq é mebu lé chay nyi keq.

Hkya-on Kungtôn Dang

²⁴⁻²⁵ Nungmoq lé, a lingbat shoq wó upzúng lui, nungmoq lé, mara hùn râ hkyô a bo é za, gabú dik é đông mai Yhang é hpungwup shingkang bo é myoq hí má wó shui shit é, nga-nhông é hkyi yù Sù, rayuq za nghut é Garai Gasâng chyáng, hpungwup shingkang, hkikhkam

hkyô, hpungwup a-tsam eq ahkáng ayá gi, nga-nhông é Yhumsing Yesuq Hkrisduq đông mai, lai lò bê ipyat pé má le, ahkuí pyat má le, pyat dedu ahtum abyuq má le, rujoq nyi sháng gaq ô! Amen.

YOHAN É SHING-RÁN Laiká (Revelation)

Dang-hi Hpóng

¹ Yesuq Hkrisduq é shing-rán shí gi, adê myáng má dut lò râ hkyô pé lé, Yhâng é dui-nhâng zoshâng wui lé tân shit nhâng râ matú, Garai Gasâng èq Yesuq Hkrisduq Yhang lé byî tô é nghut lhê. Yhang gi, Yhâng é maumang lagyo lé nhang kat luî, Yhâng é dui-nhâng zoshâng Yohan lé, shing-rán haû sé nhang ri.

² Yohan gi, Garai Gasâng é mungdang eq Yesuq Hkrisduq é saksé lé, yhang myang é gû banshoq eq rajung za saksé hkâm kyô é nghut ri.

³ Haû ahkýing gi, chyâng lò bê nghut é yanmai, myiqhtoi dang shí pé lé, nghap kyô é sù eq, gyô yù luî, haû má kê tô é gû lé châng kut é bang gi, hkungsô wó nyi akô.

Noqkuq Hpúng Nyhit Lhum Lé Dang Kyô Kat É Hkyô

⁴ Ngò Yohan gi, Asia mau mâ é noqkuq hpúng nyhit lhum lé dang kyô kat lhê. Ahkui pyat le, a-nham pyat le, htang pyat má le rû nyi nyi é Su chyáng mai le, Yhâng é hkohkâm-tanghkuq hí mâ é nyhit woi-nyí chyáng mai le,

⁵ lhumzuí é saksé nghut sù, shi byuq é mai sâng-hi dui toq é zomún dut sù, myidàm htoq mâ é hkohkam pé lé up sù, Yesuq Hkrisduq chyáng mai le, jeju eq nguingón hkyô gi, nungmoq chyáng joq nyí sháng gaq.

Nga-nhúng lé chyitdap luî, Yhâng é suí èq, nga-nhúng lé, nga-nhúng é mara pé mai lhoq lhut byî é eq, ⁶ Yhâng é Garai Gasang eq Íwa lé dojaú râ matú, nga-nhúng lé, mingdán byu pé eq hkyangjông pé* dut nhang é Su chyáng, duqwup shingkang eq hpungwup a-tsam gi, pyat dedu ahtum abyuq ru joq nyí sháng gaq ô! Amen.

⁷ Wú keq, Yhang gi, mhut mai lé lo nyi é nghut luî, myoqjí hkanmó gi, Yhang lé myàng kó râ nghut lhê;

haû Yhang lé htaû rot bang† lhang, myàng kó râ nghut lhê;

haû myidàm htoq mâ é byù lunglhang bang gi, Yhâng é yanmai, yón ngau é hui zo kó râ nghut lhê.

Haû đông nghut sháng gaq! Amen.

⁸ "Ngò gi, Alhpa eq Omega‡ nghut lhê. Ahkui pyat le, a-nham pyat le, htang pyat má le rû nyi nyi é, wum-o a-tsam dik shoq bò Sù nghut lhê." ga,

* **1:6** Htoq Ló 19:6 † **1:7** Htaû rot bang gâ é gi, Yesuq tapzîng má jén to huí é hkûn, Yhâng é namcham má lham èq htaû é bang lé gâ lhê. ‡ **1:8** Alhpa eq Omega gi, Grik laiká myhí mâ é sâng-hí cham eq ló htâng cham nghut lhê; haû tai nau é gi, rû dui nyi sù gâ é nghut lhê.

haû Yhumsîng Garai Gasang taî ri.

Byu Yhangzo Su Dut Su É Hkyô

⁹ Yesuq é, wuîhke jamjau hkyô má le, mingdán má le, jân shirang é hkyô má le, nungmoq é byinzùm nghut sù, ngò nungmoq é gumang hpó, Yohan gi, Garai Gasang é mungdang eq Yesuq é saksê é yanmai, Patmo zinlóng má nyi nyi é nghut lhê. ¹⁰ Haû Yhumsing é BuinyiS má, ngò gi, Woi-nyí eq shuí moq byuq ló é nghut mù, "Nàng myang é eq rajung za, chyúmding ralhú má ká luí, Ehpesu, Samurna, Pergamu, Htuatira, Sardi, Hpiladehpi eq Ladoki wà pé má joq é, ¹¹ noqkuq hpúng nyhit lhúm chyáng hun kat aq." ga, tut htê su gâ é htê mó, ngá é nunghtáng má mying é lé, ngò wó gyô ri.

¹² Haû ngo lé nyo nyi é htê yhumsîng lé wú râ matú, ngò, gùng lhing kat é nghut lhê. Ngò gi, gùng lhing kat é hkún, hîng myi-kok tsungjang nyhit lhum lé le, ¹³ myi-kok tsungjang haú pé é agùng má, byu yhangzo su dut é Sù rayuq nyi tô é lé le, myang kat ri; haú yuq gi, hkyigoq htoq jé é buhîng wut to luí, wànggàng má hîng wànggò le wut tô ri. ¹⁴ Yhâng é ulhum eq xâm gi, sau hpyû maú eq gyo su hpyu zan tô ri; Yhâng é myoqjí gi, myishâm su duq nyi ri. ¹⁵ Yhâng é hkyî gi, myi

bunghkyûng má jên yu é jet é gyi su dut ri; Yhâng é htê gi, wuî myo myo mying hûm é htê su gâ ri. ¹⁶ Yhâng é loqyo loq má gi, kyî nyhit cham chung tô ri; Yhâng é nhut mai gi, shamsó í shut dap é shâm htoq lo ri. Yhâng é myoqdong gi, htan dik é nyí gûng bui su tso nyi ri.

¹⁷ Yhang lé myang é hkún, ngò gi, shí gùng su, Yhâng é hkyî wang má lêng leq tô é nghut lhê. Haú hkún, Yhang gi, Yhâng é loqyo loq ngá ahtoq má ke byi mù, taî é gi, "Hkâgyuq, Ngò gi, Sâng-hi eq Jihtúm nghut lhê. ¹⁸ Ngò gi, dui nyi Sù le nghut lhê; Ngò gi, shî bê nghut kôle, wú keq, pyat dedu ahtum abyuq dui nyi é nghut lhê! Hau htoq agó, Ngò gi, shí hkyô eq momîng é zoqshi pé lé chûng Su nghut lhê.

¹⁹ Haû mù, nàng myang é lé le, ahkui dut é hkyô eq htângnùng le dut lò râ hkyô lé le, kâ to aq. ²⁰ Nàng myang é, Ngá é loqyo loq mâ é kyî nyhit cham eq hîng myi-kok tsungjang nyhit lhúm é zaú tô é hkyo é lichyúm gi, isu nghut lhê. Kyî nyhit cham gi, noqkuq hpúng nyhit lhúm é maumang lagyo nyhit yuq nghut ri; myi-kok tsungjang nyhit lhum gi, noqkuq hpúng nyhit lhum nghut ri.

2

*Ehpesu Myuq Mâ É No-
qkuq Hpúng Lé Kâ Kat É Laiká*

¹ Ehpesu myuq mâ é noqkuq hpûng é maumang lagyo lé isu nghû kê kat aq:

Haû yhâng é loqyo loq má kyî nyhit cham chûng luí, hîng myi-kok tsungjang nyhit lhûm é gyoro má sô nyi Su é dang gi, ² 'Ngò gi, náng é a-kyang, nàng shikut é hkyô, nàng hkam jân é hkyô pé lé, sê lhê. Agè ashop é byu pé lé, nàng a jân pyâm é hkyô lé le, haû lagyo a nghut kôlhang, lagyo pé nghut lhê gâ é bang lé, nàng chyam wú mù, yhangmoq lagyo apyoq pé nghut é lé wó sê yù kô é hkyô lé le, Ngò sê lhê. ³ Nàng gi, shikut shirâng bê nghut é htoq agó, Ngá mying é yanmai, wuîhke hkyô lé hkam jan bê nghut kôle, nú byuq é hkyô a bò nghut ri.

⁴ Nghut kôlhang, nàng gi, náng é sâng-hi lhê é chyt-dap myit lé tô pyâm é yanmai, ngò, nang lé mara hûn râ hkyô joq ri. ⁵ Nàng hká mai byit gyó é lé, myit bun aq! Myit lhîng luí, sâng-hi nàng kut é muzó pé lé, kut aq. Nàng myit a lhîng é nghut jáng, ngò, náng chyáng lé jé mù, náng é myi-kok tsungjang lé, hau é jowò mai huí pyâm byi râ nghut lhê. ⁶ Nghut kôlhang, Ngò a jú é, Nikola é chángzô pé kut é hkyô lé, nàng le a jú kut é yanmai, náng chyáng ge é hkyô ralhum bo ashî nghut ri.

⁷ Gyo râ nohkyap dap sù gi, haû Woi-nyí mai no-

qkuq hpûng pé lé taí é hkyô lé, gyô yù sháng gaq. Wó ung é sù lé gi, haû Garai Gasâng é hparadisu má joq é asak siggâm mâ é ashî zo râ ahkáng, Ngò byi râ nghut lhê.' gâ ri.

Samurna Myuq Mâ É Noqkuq Hpûng Lé Kê Kat É Laiká

⁸ Samurna myuq mâ é noqkuq hpûng é maumang lagyo lé isu nghû kê kat aq:

Haû Sâng-hi eq Jihtûm nghut é eq, shi byuq luí, asak dum dui Su é dang gi, ⁹ 'Nàng hui zô é wuîhke jamjau hkyô eq nàng myung é hkyô lé, Ngò sê lhê; nghut kôlhang, nàng gi, wó sù nghut ri! Tsadán é tarajong bang nghut to luí, Yudaq byu pé a nghut kôlhang, Yudaq byù nghut lhê gâ é bang taí hpoi é hkyô lé le, Ngò sê lhê. ¹⁰ Nàng hui zo râ nghut é wuîhke hkyô lé, hkâgyuq. Ngò, nungmoq lé taí kyo kôlé, haû nat Tsadán gi, nungmoq lé chyam wú é dông, nungmoq chyáng mâ é ra-am lé, htóng má hkyô pyâm râ nghut lhê; hau htâng, nungmoq gi, raxê nyi tup zing-rí é hui zo kó râ nghut lhê. Shî shoq lhumzui nyi aq, haû hkûn, Ngò, nang lé, asak janmaû byi râ nghut lhê.

¹¹ Gyo râ nohkyap dap sù gi, haû Woi-nyí mai noqkuq hpûng pé lé taí é hkyô lé, gyô yù sháng gaq. Í dâm

nghû râ shi é hkyô* gi, wó ung é sù lé, wó záng htung râ a nghut.' gâ ri.

*Pergamu Myuq Mâ É No-
qkuq Hpúng Lé Kâ Kat É Laiká*

¹² Pergamu myuq mâ é noqkuq hpông é maumang lagyo lé isu nghû kâ kat aq:

Haû shamsó í shut dap é shâm wó Su é dang gi,
¹³ 'Nàng nyi é jowò lé, Ngò sê lhê; haû gi, Tsadán é hkohkâm-tanghkuq joq é jang nghut ri. Nghut kôlhang, nàng gi, Ngá mying má lumhkau nyi é nghut luí, Tsadán nyi é jang nghut é nungmoq é myuq má, Ngá é lhumzui é saksé hpó Antipa sat huí é hkûn lhang, nàng Ngo lé lumjing é hkyô lé, a he-ngik pyám nghut ri.

¹⁴ Nghut kôlhang, Ngò, nang lé mara hûn râ hkyô ratsuí joq ashí; hkâsu mù gâ le, hparà lhô pé lé tîng byi é zoshuq zô é eq, ashop é đông gungsho zùm yap é mara kut shut râ matú, Israelaq byu pé lé mhoq hpyoq râ hpaqchyí, Balak lé mhoq byi é Balam é mhoqshit hkyô lé myhik zing é byu pé, náng chyáng nyi ri. ¹⁵ Haû eq rajung za, haû Nikola é chángzô pé mhoqshit é hkyô lé myhik zing é byu pé le, náng chyáng nyi ri. ¹⁶ Haû mù luí, myit lhang aq! Haû a nghut jang, Ngò gi, náng chyáng hân jé lé mù, haû Ngá nhut mai htoq é sham

eq yhangmoq lé zan râ nghut lhê.

¹⁷ Gyo râ nohkyap dap sù gi, haû Woi-nyi mai no-
qkuq hpông pé lé taí é hkyô lé, gyô yù sháng gaq. Wó ung é sù lé gi, haq tô é mannaq muk lé le, mying asik kâ tô é luqgok hpyú racham lé le, Ngò byi râ nghut lhê, lhom hap yu é sù za sheq, mying haû lé sé râ nghut lhê.' gâ ri.

*Htuatira Myuq Mâ É No-
qkuq Hpúng Lé Kâ Kat É Laiká*

¹⁸ Htuatira myuq mâ é noqkuq hpông é maumang lagyo lé isu nghû kâ kat aq:

Haû myishâm su duq nyi é myoqjí eq jet é gyi su dut é hkyi dap é Sù, Garai Gasâng é Yhangzô é dang gi, ¹⁹ 'Náng é a-kyang, chyit-dap myit, lumjing myit, do-
jaú é hkyô, hkam jân é hkyô pé lé le, nàng gi, hí lhê htoq má ahkuí je myô zui sai é hkyô lé le, Ngò sê lhê.

²⁰ Nghut kôlhang, yhum-sing gùng yhumsing my-
iqhtoi myhí nghut lhê gâ é myiwe Yzebulaq lé, nàng nyi nhang tô é yanmai, Ngò, nang lé mara hûn râ hkyô joq ri. Yhang gi, Ngá é dui-nhang zoshâng wui lé, ashop é đông gungsho zùm yap râ eq hparà lhô pé lé tîng byi é zoshuq zo râ hkyô lé mhoqshit luí, yhangmoq lé hkyô shuí nghoq ri. ²¹ Ngò gi, yhang lé, ashop é đông

* 2:11 Í dâm nghû râ shi é hkyô gâ é gi, naraí ming wang é lé gâ lhê.

gungsho zùm yap é hkyô mai myit lêng râ ahkyíng byi kôhang, yhang gi, a myit lêng naù nghut ri. ²² Haù mù, Ngò gi, yhang lé, jamjau hui râ yhupchong má dú lheq pyám râ nghut é htoq agó, yhang eq sumyi sulàng lú hkyô kut é bang, yhangmoq kut é hkyô lé myit lêng kô é za a nghut jáng, wuìhke jamjau mó hui zo nhâng râ nghut lhê. ²³ Ngò gi, yhang zô pé lé sat pyám râ nghut lhê; haù hkùn, Ngò gi, myit nhikhum eq myit é hkyô lé sé Sù nghut é lé le, nungmoq kut é muzó eq rajung za, nungmoq yuq hkangmó lé, Ngò tau byi râ nghut é lé le, haù noqkuq hpûng pé banshoq wó sé kó râ nghut lhê. ²⁴ Mhoqshit hkyô haù lé a châng é eq Tsadán é nik é hkyô lhaq gâ é lé a mhoq yu é, Htuatira myuq má myit gyó tô é bang nungmoq lé, Ngò taí kôlé, nungmoq lé gotû wòlai Ngò jat byi râ a nghut. ²⁵ Ngò jé lé é jé shoq, nungmoq wó tô é lé za myhik zing nyì keq.

²⁶⁻²⁷ Wó ung é eq Ngò ô nau é hkyô lé jìhtùm jé shoq châng é sù lé gi,

"Yhang gi, yhangmoq lé, shamtoq dumbáng èq up† râ nghut lhê;
Yhang gi, tso-au hkoq pé lé su, yhangmoq lé bat hkyop pyám râ nghut

lhê."[☆]
gâ tô é eq rajung za, Ngò, Ngá Wâ chyáng mai ahko ahkáng wó yu é su, mingdán pé lé up râ ahko ahkáng, Ngò byi râ nghut lhê. ²⁸ Ngò gi, yhang lé, haù bó-myhû byi râ nghut lhê. ²⁹ Gyo râ nohkyap dap sù gi, haù Woi-nyí mai noqkuq hpûng pé lé taí é hkyô lé, gyô yù sháng gaq.' gâ ri.

3

*Sardi Myuq Mâ É Noqkuq
Hpûng Lé Kâ Kat É Laiká*

¹ Sardi myuq mâ é noqkuq hpûng é maumang lagyo lé isu nghû kâ kat aq:

Haù Garai Gasâng é woi-nyí nyhit woi-nyí eq kyí nyhit cham lé chûng Su é dang gi, 'Ngò gi, náng é a-kyang lé sé lhê; nàng gi, asak dui nyì sù ga kôhang, shi byuq sù nghut ri. ² Gyíng lò aq! Myit gyó tô é, shi byuq râ za nghut é pé lé, wum-o lhoq kîng yù aq; hkâsu mù gâ le, Ngá é Garai Gasâng é hí má, náng é a-kyang a gumjup é hkyô lé, Ngò myang ri. ³ Haù mù, nàng hkâsu kut wó hap yu é eq wó gyô yu é hkyô lé, myit bun aq; haù dông cháng luí, myit lêng aq. Nàng a bûn gyíng é nghut le gi, Ngò hkau sù su lé râ nghut luí, nàng gi, Ngò hká u lé râ lé, sé râ a nghut.

⁴ Nghut kôhang, Sardi myuq má, yhumsing é

† 2:26-27 Shamtoq dumbáng èq up gâ é gi, ahko ahkáng banshoq wó luí, up é lé gâ lhê. ☆ 2:26-27 Hkya-on 2:9

mebu lé agot a-û a kut é byù ra-am nyi akô. Háu bang gi, hpyu é mebu wut luí, Ngò eq rahá sô wún kó râ nghut lhê; hkâsu mù gâ le, yhangmoq gi, gingdán é bang nghut akô. ⁵ Wó ung é sù gi, háu bang su, hpyu é mebu myang wut râ nghut lhê. Ngò gi, háu yuq é myìng lé, hkâ-nhám le, asak jihpán laiká buk mai yu pyám râ a nghut; hau htoq agó, Ngá Wâ é hí má le, Yhâng é maumang lagyô pé é hí má le, háu yuq é myìng lé, Ngò yín yû râ nghut lhê. ⁶ Gyo râ nohkyap dap sù gi, háu Woi-nyí mai noqkuq hpûng pé lé taí é hkyô lé, gyô yù sháng gaq.' gâ ri.

Hpiladehpi Myuq Mâ É Noqkuq Hpúng Lé Kâ Kat É Laiká
⁷ Hpiladehpi myuq mâ é noqkuq hpûng é maumang lagyo lé isu nghû kâ kat aq:

Háu chyoiyúng é eq tengmán é, Dawiq hkohkam é zoqshi chung é, ó yuq le a wó myhi loshoq hpông é eq, ó yuq le a wó hpóng loshoq myhî é Su é dang gi, ⁸ 'Nàng kut é muzó pé lé, Ngò sê lhê. Wú aq, ó yuq le a wó myhî é hkum ralhum, Ngò náng hí má hpông to byí lhê. Nàng gi, wum-o ratsuí za bò kôlhang, Ngá é dang gyo luí, Ngá é myìng lé a he-ngik pyâm é hkyô lé, Ngò sê lhê. ⁹ Háu tarajong má noqkuq kôlhang, Tsadán lé dojaú bang nghut é, Yudaq

byù a nghut kôlhang, nghut lhê gâ é byù mhaù pé lé, Ngò, náng é hkyí wang má, lé paí gop nhâng luí, Ngò, nàng lé chyitdap é hkyô, yhangmoq lé sé nhâng râ nghut lhê. ¹⁰ Nàng gi, myit hîng hîng hkam jan râ é Ngá é hkunmó lé châng nyi bê nghut é yanmai, myidàm htoq má nyi é bang lé chyam lik wú râ matú, mingkan gón má jé râ nghut é wuîhke jamjau ahkyíng mai, Ngò, nang lé lhoq lhut yû râ nghut lhê.

¹¹ Ngò gi, a myáng má jé lé lô râ nghut lhê. Náng é jan-maú lé, ó yuq eq le a wó yu pyám byi sháng gaq, nàng wó tô é pé lé myhik zing nyi aq. ¹² Wó ung é sù lé gi, Ngá é Garai Gasâng é noqkuq yhûm mâ é hkungzing mó dut nhâng râ nghut lhê. Háu yuq gi, hkâ-nhám le háu mai dum htoq ló râ a nghut. Ngò gi, Ngá é Garai Gasâng é myìng lé le, Ngá é Garai Gasâng chyáng mai htoq luí, mauhkûng mai gyó lé lo é, Yerusalem wà mó Asik ga é, Ngá é Garai Gasâng é myuq myíng lé le, Ngá é myìng sik lé le, yhâng chyáng kâ tap byi râ nghut lhê. ¹³ Gyo râ nohkyap dap sù gi, háu Woi-nyí mai noqkuq hpûng pé lé taí é hkyô lé, gyô yù sháng gaq.' gâ ri.

Ladoki Myuq Mâ É Noqkuq Hpúng Lé Kâ Kat É Laiká
¹⁴ Ladoki wà mó mâ é noqkuq hpûng é maumang lagyo lé

isu nghû kê kat aq:

Haû lhumzûi é eq tengmán é saksé nghut é, Garai Gasang hpan tô é lé up é, Amen gá Su é dang gi, ¹⁵ 'Ngò gi, nàng kut é muzó lé sê lê; nàng gi, gú le a nghut, nye le a nghut dut ri. Nàng gi, gú jáng jâng gú, nye jáng jâng nye dut râ lé, Ngò ô nau ri. ¹⁶ Nghut kôlhang, nàng gi, gú le a nghut, nye lé a nghut, lumnye nghut é yanmai, Ngò gi, nang lé, Ngá é nhut mai byé htoq pyám râ za nghut bê. ¹⁷ "Ngò gi, wó sù nghut lê; ngò gi, sutzè gyai wó bê nghut lui, haí lhang a ra lo." ga nàng taí ri. Nghut kôlhang, nàng gi, wuîhke jamjau hui sù, asho awui dut sù, myùng sù, myoqjit sù eq achîn dut sù nghut é lé, nàng a sé myhi-nhung. ¹⁸ Haû mù lui, nàng gi, wó sù sùt sù wó dut sháng gaq, myi má jên yu é hîng lé le, nàng achîn dut é hoq hpu hkyô lé, wó nghop pyám sháng gaq, wut râ matú, mebu hpyû lé le, nàng myoq wó myâng sháng gaq, náng é myoqji má kat râ matú, myoq chi lé le, nàng, Ngá chyáng mai wui yù râ matú, Ngò, nang lé hpaqchyí byi lê.

¹⁹ Ngò chyitdap é bang lé gi, tan lui, mhoqshit lê. Haû mù, nàng gi, hân bûn gyîng lui, myit lîng aq. ²⁰ Wú aq! Ngò gi, hkum yâm má yap to lui, hkum lé kok nyi lê. Rayuq yuq,

Ngá é htê lé wó gyo lui, hkum hpóng byi é nghut jáng, Ngò gi, wàng mù, haû yuq eq rahá zo shuq râ nghut lê; haû yuq le, Ngò eq rahá zo shuq râ nghut lê.

²¹ Ngò gi, ûng lui, Ngá Wa eq rahá Yhâng é hkohkâm-tanghkuq má zung é eq rajung za, wó ung é sù lé gi, Ngò eq rahá Ngá é hkohkâm-tanghkuq má zùng râ ahkáng, Ngò byi râ nghut lê. ²² Gyo râ nohkyap dap é sù gi, haû Woi-nyí mai noqkuq hpûng pé lé taí é hkyô lé, gyô yù sháng gaq. 'gá é nghut ri.' gá ri.

4

Mauhkûng Htoq Má Hkohkâm-tanghkuq Joq É Hkyô

¹ Hau htâng má, ngò wú kat le, mauhkûng má hkum ralhum bóng tô é lé myang ri. Ngò sâng-hî dàm wó gyô é tut htê su gá é danghtê ngo lé taí é gi, "Shî má doq lò aq, htângnùng má dut lò râ hkyô pé lé, Ngò, nang lé tân shit bá." gá ri. ² Haû hkûn jáng yhang, ngò gi, Woi-nyí má moq byuq ló lui, mauhkûng htoq má hkohkâm-tanghkuq ralhum joq é lé myàng ri; tanghkuq haû má, byù rayuq zung tô ri. ³ Haû má zung to Su é isâm gi, huhpé eq ne yúng lungsêng su dut ri. Huí nyui lungsêng su dut é woqgan síng-yang gi, haû hkohkâm-tanghkuq má hkông lîng tô ri. ⁴ Hkohkâm-tanghkuq hau

é lîngkhyuq má, hkohkâm-tanghkuq gotû í xe myî lhum le joq to luî, hpyu é mebu wut mù, ulhum má hîng janmaú tsûng tô é suwún í xe myi yuq gi, haú má zung tô bum akô.
 5 Haú hkohkâm-tanghkuq mai, lhap hpyat é, mying hûm é eq maugum gûm é pé dut htoq lo ri. Haú hkohkâm-tanghkuq hí má, myi-kok nyhit lhum le duq tô ri; haú pé gi, Garai Gasâng é woi-nyí nyhit woi-nyí nghut ri. 6 Hau htoq agó, san zâ é myoqjâm su dut mâ é wui-nhông le, haú hkohkâm-tanghkuq hí má dîng tô ri.

Haú hkohkâm-tanghkuq agùng má le, lîngkhyuq má le, hí-u nunghtáng lîngkhyuq myoqjí dap é dui é dusak myî du nyi tô ri. 7 Dui é dusak sâng-hî du gi, hkanghkyi su dut ri; í du nghû râ du gi, nohtó su dut ri; sûm du nghû râ dû é myoqdong gi, byu myoqdong su dut ri; myî du nghû râ du gi, dâng wún é zunbung su dut ri. 8 Dui é dusak myî du haú gi, du hkangmó dùng hkyuq lhum lhum dap é htoq agó, lîngkhyuq má myoqjí kôm dap luî, dùng hkaú má lhang dap ri. Yhangmoq, nyí myín hkâ-nhám a no loshoq taí nyi kô é gi,

"A-nham pyat le, ahkuí pyat le, htang pyat má le, rû nyi nyi é, haú wum-o a-tsam dik shoq bò Sû Yhumsîng Garai Gasang gi, chyoiyúng, chyoiyúng, chyoiyúng nyi ri."

gâ akô. 9 Haú dui é dusak myî du gi, hkohkâm-tanghkuq má zung é, pyat dedu ahtum abyuq dui nyi Su chyáng, hpungwup shíngkang, aróng eq jeju bun hkyô byî é hkangmó, 10 haú suwún í xe myi yuq gi, hkohkâm-tanghkuq má zung é, pyat dedu ahtum abyuq dui nyi Su é hí má, ngóm gop luî, Yhang lé noqkuq akô. Yhangmoq gi, yhangmoq é hkohkâm-janmaú lé, haú hkohkâm-tanghkuq hí má hkyut to mù, taí kô é gi,

11 "Ngamoq é Yhumsîng eq Garai Gasang é, nyi mi-nyí, joq mijoq lé, Nàng hpan to bê nghut luî, haú pé gi, Nàng ô nau é dông hpan tô é hui bê nghut mù, nyi to joq tô bùm bê nghut é yanmai, Nàng gi, hpungwup shíngkang, aróng eq hpungwup a-tsam lé, hap yù gíng Sû nghut ri." gâ akô.

5

Chyúmding Eq Sauzo

1 Hau htâng, ngò gi, hkohkâm-tanghkuq má zung to Su é loqyo loq má, í shut é laiká kê to é, dizik nyhit lhum tap tô é chyúmding le myang ri. 2 Hau htoq agó, a-tsam mó bo é maumang lagyo rayuq gi, "Haú dizik pé lé hí pyám râ eq chyúmding lé hpóng râ gi, ó yuq wá gíngdán lhê lhú?" ga luî, htê mó èq wut taí nyi é lé le, ngò myang ri. 3 Nghut kôlháng, mauhkúng

htoq má le, myigùng htoq má le, myigùng ô má le, haû chyúmding lé wó hpóng râ eq ahkaû má wó wú râ byù rayuq lháng a nyi nghut ri. ⁴ Haû chyúmding lé hpóng mù, ahkaû má wú râ gingdán é byù rayuq hkâlháng a nyi é yanmai, ngò gyai yang ngau pyâm é nghut lê. ⁵ Haû hkûn, haû suwún wui má é rayuq, ngo lé tai é gi, "Hkângaû! Wú aq, haû Yudaq byuhú má é Hkanghkyi nghu é, haû Dawiq é Amyit nghut Sû gi, ûng bê nghut lui, haû chyúmding eq haû má é dizik nyhit lhum lé wó hpông lê." gâ ri.

⁶ Hau htâng, haû dui é dusak myi du eq suwún wui é agùng má é, hkohkâm-tanghkuq agùng má, sat hui bê su dut é Sauzo radu yap tô é lé, ngò myang ri. Sauzo haû gi, hkyui nyhit lhum eq myoqji nyhit lhum dap ri. Myoqji haû nyhit lhum gi, myidàm htoq gón má nhang htoq kat é, Garai Gasâng é woi-nyí nyhit woi-nyí nghut ri. ⁷ Haû Sauzo gi, lé mù, hkohkâm-tanghkuq má zung to Su é loqyò má é chyúmding lé yu ri. ⁸ Haû chyúmding lé yu é hkûn jáng, haû dui é dusak myi du eq suwún í xe myi yuq gi, Sauzô é hí má ngóm gop akô. Yhangmoq yuq hkangmó gi, ting eq sân-yung bâng é kyúdung dang gâ é namngón jung bying mui tô é hing góm pé le chung bum akô nghut ri. ⁹ Yhangmoq gi, "Nàng gi, haû chyúmding lé

yù râ eq hau é dizik pé lé hpóng râ gingdán Sû nghut ri.

Haî mù gâ le, Nàng gi, sat hui bê nghut lui, byuhú hkangmó mai le, mying hkangmó mai le, byù myú hkangmó mai le, mingdán hkangmó mai le, Garai Gasâng é matú, Nàng é sui eq byù pé lé wui hpyit yú bê nghut ri.

¹⁰ Nga-nhung é Garai Gasang lé dojaú râ matú, Nàng gi, yhangmoq lé, mingdán byu pé eq hkyangjông pé dut nhâng bê nghut lui, yhangmoq gi, myidàm htoq má up kó râ nghut lê."

ga lui, mahkôn sik ralhum hkon akô nghut ri.

¹¹ Haû hkûn, ngò wú kat le, haû hkohkâm-tanghkuq lhinghkyuq má le, dui é dusak pé eq suwún wui é lhinghkyuq má le, nyi tô bum é maumang lagyo ajùm ayò mun mun sen sên é htê lé wó gyô ri.

¹² Yhangmoq gi, "Haû sat hui bê Sauzo gi, hpungwup a-tsam, sutzè, hpaqchyí byéng-yá, wum-o, aróng sitang,

hpungwup shingkang eq hkya-on kungtôn hkyô lé, hap yù gíng ri."

ga lui, htê mó eq ton bum akô nghut ri.

¹³ Hau htoq agó, mauhkung htoq má nyi é, myigùng htoq

má nyi é, myigùng ô má nyi é, wuiming má nyi é, hpan to huí é lhungháng gi,

"Hkya-on kungtôn hkyô, aróng sitang, hpungwup shingkang eq hpungwup a-tsam gi, haú hkohkâm-tanghkuq má zung tô é Sû eq Sauzô chyáng,

pyat dedu ahtum abyuq ru joq nyí sháng gaq ô!" ga luí, ton nyi bùm kô é lé, ngò wó gyô ri. ¹⁴ Haú dui é dusak myí du gi, "Amen" ga taí jang, haú suwún wuí gi, ngóm gop luí noqkuq akô nghut ri.

6

Dizik Nyhit Lhúm É Hkyô

¹ Haú Sauzo gi, dizik nyhit lhum mâ é sâng-hî lhum lé hpông kat é hkûn, ngò myang é nghut lhê. Hau htâng, haú dui é dusak myí du má é radu gi, maugum su gâ é htê mó èq, "Lé aq." gâ é lé, ngò wó gyô ri. ² Ngò wú kat é hkûn, ngá é myoq hí má myang hpyû radu nyi tô é lé myang ri! Haú má jî to sù gi, lai rahpu chung tô é htoq agó, yhang lé, jan-máú ralhum tsùng to byí luí, ùng budang wó rá matú ùng sù rayuq dông htoq ló ri.

³ Haú Sauzo gi, í lhum nghû râ dizik lé hpông kat é hkûn, haú í du nghû râ dui é dusak gi, "Lé aq." ga taí é lé, ngò wó gyô ri. ⁴ Hau htâng, myang nè radu htoq lo ri; haú má jî tô é sù gi, myidàm htoq mâ é ngu-ingón simsaq hkyô lé wup yù rá eq, byù yhangchang rayuq eq rayuq sat lhum nhâng rá

a-tsam byí é hui sù nghut luí, yhang lé shâm mó rahkyam le byí to bê nghut ri.

⁵ Haú Sauzo gi, sùm lhum nghû râ dizik lé hpông kat é hkûn, haú sùm du nghû râ dui é dusak gi, "Lé aq." ga taí é lé, ngò wó gyô ri. Ngò wú kat le, myang noq radu ngá myoq hí má nyi tô é lé myang ri! Haú má jî tô é sù gi, yhâng é loq má jàng rahpu chung to ri. ⁶ Haú hkûn, "Ra-nyí é zuihpau gi, sungso rabyé, ra-nyí é zuihpau gi, muk-yo guq sum byé nghut lhê; haú tsan-lun xù eq tsibiyiq wing lé kúm gi, hkâlhoq hten kó." gâ é htê, haú dui é dusak myí du hkaú mai htoq ló é su gâ é lé, ngò wó gyô ri.

⁷ Haú Sauzo gi, myí lhum nghû râ dizik lé hpông kat é hkûn, haú myí du nghû râ dui é dusak gi, "Lé aq." ga taí é lé, ngò wó gyô ri. ⁸ Ngò wú kat é hkûn, ngá é myoq hí má, myang muí radu nyi tô é lé myang ri! Haú má jî to su é mying gi, Shí hkyô gâ ri; Moming le, yhâng é htâng má châng tô ri; yhangnhik gi, sham èq, mutmó gyó é èq, wúm gyó é èq, tân é yosô-ze èq, myidàm htoq myí tú mâ é ratú má nyi é bang lé sat pyám rá ahkáng wó yu to bekô nghut ri.

⁹ Sauzo gi, ngo lhum nghû râ dizik lé hpông kat é hkûn, Garai Gasâng é mungdâng é yanmai le, yhumsing hkâm é saksê é yanmai le, sat hui bâng é sobyô pé gi, hkungga gyap a-ô má nyi tô bùm kô é lé,

ngò myang ri. ¹⁰ Yhangmoq gi, "Chyoiyúng é eq tengmán é, ahko ahkáng lhunglháng wó é Yhumsîng ê, myidàm htoq má nyi é byu pé lé, ngamoq é sui manglat dam a byi é eq tarâ a jéyáng é za, hkâ-myháng jé shoq nyi nyi râ lú?" ga, htê mó èq garu bum akô. ¹¹ Haú hkûn, yhangmoq yuq hkangmó gi, bu hpyû hîng radung dung hut é hui lûi, yhangmoq su sat hui râ bang, yhangmoq é byinzùm dui-nhâng zoshâng wui nghut é gumang wui sat huî ngap é hkûn jé shoq, razup zim za nyi shi keq ga taí é lé wó gyô akô nghut ri.

¹² Hkyuq lhum nghû râ dizik lé, Yhang hpông kat é hkûn, ngò myang ri; haú u lé, layàng mó le nún lo ri; haú bui gi, saumaú noq èq woq é pán su noq byuq ri; haú lhamó lhum gón gi, sui su ne byuq ri; ¹³ maihpáng gâm lé, lai mó èq lo mut nhùn kat é hkûn, a myhîng shî é maihpáng-shi yoq gyó é su, mauhkûng mâ é kyí pé gi, myidàm htoq má byit gyó lo bum ri. ¹⁴ Haú mauhkûng gi, laiká lé dîng lhûm é su htot pyâm é hui lûi, bùm hkang bùm mó eq zinlóng lhumjup pé gi, yhâng é jowò mai huî pyâm é huî ri.

¹⁵ Haú hkûn, haú myidàm htoq mâ é hkohkam pé, uphkâng bang, gyezaû pé, sut wó bang, wum-o a-tsam bò bang, jun pé eq luthkyô wó é lhunglháng bang gi, bùm dong pé eq bùm pé mâ é luqgok gyoro pé má haq tô

bùm uchyang, ¹⁶ haú bùm pé eq luqgok pé lé, "Ngamoq é gùng htoq má gyó ke kó laq! Haú hkohkâm-tanghkuq má zung to Su é myoq hí mai le, haú Sauzô é nhikmo-yô é hkyô mai le, ngamoq lé haq pyám kó laq. ¹⁷ Hkâsu mù gâ le, haú Yhangnhik nhikmo-yô é buinyi mó gi, jé bê nghut ri; ó yuq wá wó jân yap nyi râ lú?" ga garû taí bum akô nghut ri.

7

144,000 Yuq Masat Lô Tap Hui Kô É Hkyô

¹ Hau htâng má, maumang lagyo myi yuq gi, maumyî myi chyûn má yap to mù, myigùng htoq má le, wui ming htoq má le, sîkgâm pé má le, lai a hik sháng gaq ga, myi shut mâ é lai lé zû zing to kô é lé, ngò myang ri. ² Haú hkûn, haú dui nyi é Garai Gasâng é masat lô chung é maumang lagyo gotû rayuq gi, buihtoq hkyam mai htoq lé lo é lé, ngò dum myang ri. Yhang gi, haú myigùng eq wui ming lé lhoq hten râ ahkáng wó tô é maumang lagyo myi yuq haú lé, ³ "Nganhûng é Garai Gasâng dui-nhâng zoshâng wui é ngelang má, ngamoq mai masat lô a tap byi byi gi, haú myigùng, wui ming eq sîkgâm pé lé hkâlhoq hten shi kó." ga htê mó èq wut taí kat ri. ⁴ Haú hkûn, masat lô tap huî é bang byù hkâ-myhó yuq nghut é lé, ngò wó gyô ri.

Israelaq byuhú banshoq mâ é 144,000 yuq nghut ri.

⁵ Masat lhô tap huî yu é,
Yudaq up mâ é bang gi,
12,000 yuq,
Rubin up mâ é bang gi, 12,000
yuq,
Gat up mâ é bang gi, 12,000
yuq,

⁶ Ashe up mâ é bang gi, 12,000
yuq,
Nahtali up mâ é bang gi,
12,000 yuq,
Manase up mâ é bang gi,
12,000 yuq,

⁷ Simeon up mâ é bang gi,
12,000 yuq,
Lewiq up mâ é bang gi, 12,000
yuq,

Yishahka up mâ é bang gi,
12,000 yuq,

⁸ Zebulun up mâ é bang gi,
12,000 yuq,

Yosep up mâ é bang gi, 12,000
yuq,

Ben-yamyin up mâ é bang gi,
12,000 yuq,
nghut bum akô.

*Bu Hpyû Hing Wut Bâng É
Hkyô*

⁹ Hau htâng, ngò wú kat é
hkûn, mingdán hkanmó mai
le, byuhú hkanmó mai le,
byù myû hkanmó mai le,
myíng chângjup mai le, lé é
bang, ó yuq lháng a ung ng-
hap é byù moq mó gi, haû
hkohkâm-tanghkuq é hí má le,
Sauzô é hí má le, yap nyi
bùm kô é lé myang ri; yhang-
moq gi, bu hpyû hing wut lui,
yhangmoq é loq má byùm-haq
chung tô bùm kômù,

¹⁰ "Hkyi yù hkyô gi, haû
hkohkâm-tanghkuq má
zung tô é nga-nhúng é

Garai Gasang eq Sauzo
chyáng mâ é nghut ri
ô!"

ga lui, htê mó èq garû bum
akô nghut ri. ¹¹ Haû mau-
mang lagyo lhunglhâng bang
gi, haû hkohkâm-tanghkuq
é lhînghkyuq má le, suwún
wuî eq dui é dusak myí du
é lhînghkyuq má le, yap tô
akô nghut ri. Yhangmoq
gi, hkohkâm-tanghkuq hí má
myoqdong ngóm gop mù,
Garai Gasang lé noqkuq
uchyang,

¹² "Amen! Hkya-on kungton
hkyô eq hpungwup
shîngkang,

hpaqchyî byéng-yá eq jeju
bun hkyô,

aróng, hpungwup a-tsam eq
wum-o gi,

nga-nhúng é Garai Gasâng
chyáng pyat dedu
ahtum abyuq ru joq
nyî sháng gaq ô!

Amen!"
ga tai bum akô.

¹³ Haû hkûn, suwún wuî
mâ é rayuq gi, "Shî bu hpyû
hing wut é bang gi, ô pé lúh?
Yhangmoq gi, hkâmai lé é
bang nghut akô lúh?" ga ngo
lé myí ri.

¹⁴ Ngò gi, "Suwún hpó é,
nàng sê lhê." nghû tû tai jáng,
yang gi, "Shí bang gi, haû
wuîhke jamjau mó mai wó lut
htoq lô lui, yangmoq é bu
hing lé, haû Sauzô é sui má
chî hpyû yù bê bang nghut
akô. ¹⁵ Haû mù, yangmoq
gi, Garai Gasâng é hkohkâm-
tanghkuq hí má nyi mù, Yhâng
é noqkuq yhúm má, nyí,
myín Yhang lé dojaú nyí kô

é nghut lhê; haû hkohkâm-tanghkuq má zùng Sû gi, Yhâng é jonghpang lé, yhangmoq é ahtoq má nghop byi râ* nghut lhê. ¹⁶ Yhangmoq gi, hkâ-nhám le, zòmut wuìshit hui râ a nghut lo; buì lhap é le, hkyíng hkyíng nyé é le, yhangmoq lé wó záng râ a nghut. ¹⁷ Hkâsu mù gâ le, haû hkohkâm-tanghkuq agùng mâ é Sauzo gi, yhangmoq é sau-rém sù dut râ nghut luí, Yhang gi, yhangmoq lé, asak wuìbúm jé shoq shuí é râ nghut lhê. Hau htoq agó, Garai Gasang gi, yhangmoq é ngaubyi sháng shoq sut pyám byi râ nghut lhê." ga tai ri.

8

Nyhit Lhum Nghû Râ Dizik Eq Namngón Jung Nyhê É Hing Góm

¹ Haû Sauzo gi, nyhit lhum nghû râ dizik lé hpông kat é hkûn, mauhkûng htoq má hkyíng hkum rawuí kô zím byuq ri.

² Haû hkûn, Garai Gasâng é hí má yap tô é maumang lagyo nyhit yuq lé, ngò myang ri; yhangmoq lé, tut nyhit lhum byi tô ri.

³ Namngón jung nyhê é hing góm chung é maumang lagyo gotû rayuq gi, haû hkungga gyap yàm má lé yap tô ri. Haû hkohkâm-tanghkuq hí mâ é hing hkungga gyap má, sân-yúng bang banshoq é kyúdung dang eq rahá nhông byi râ matú, namngón jung

gyai myo shoq, yhang lé byi tô ri. ⁴ Haû namngón jung é myihkau gi, sân-yúng bâng é kyúdung danghtê eq rahá, maumang lagyo haû yuq é loq mai Garai Gasâng chyáng hkyang rot ló bê nghut ri. ⁵ Hau htâng, maumang lagyo haû yuq gi, góm lé yù mù, hkungga gyap má é myi lhoq pyíng yù luí, myidàm htoq má dú hkyô kat é hkûn, maugum mó gûm é, mying hûm é, lhap hpyat é eq layàng nún é pé dut htoq lo ri.

Tut Mut É Hkyô

⁶ Hau htâng, tut nyhit lhum wó é maumang lagyo nyhit yuq gi, tut mut râ hen akó nghut ri.

⁷ Sâng-hi yuq nghû râ maumang lagyo gi, yhâng é tut lé mut kat ri; haû hkûn, sui nyó é likwò eq myi htoq lô mù, haû lé myidàm htoq má lhoq hkyô kat jáng, maumyî sum tú mâ é ratú eq sikgâm sum tú mâ é ratú nyé gyó byuq é htoq agó, wàhu mhanzo banshoq le nyé gyó byuq bê nghut ri.

⁸ Í yuq nghû râ maumang lagyo gi, yhâng é tut lé mut kat ri; haû hkûn, myi dap tô é bùm mó su é lé, wuìshuq lung-aû má dú hkyô kat ri. Wuìshuq lung-aû sum tú mâ é ratú gi, sui dut byuq bê nghut ri; ⁹ wuìshuq lung-aû mâ é dui jung sum tú mâ é ratú gi, shi byuq luí, wuì-sanghpo pé sum tú mâ é ratú gi, htên byuq bê nghut ri.

* 7:15 Yhâng é jonghpang lé, yhangmoq é ahtoq má nghop byi râ, gâ é gi, yhangmoq eq rahá nyi mù, yhangmoq lé upzúng nyi râ gâ é nghut lhê.

¹⁰ Sum yuq nghû râ mau-mang lagyo gi, yhâng é tut lé mut kat ri; haú hkûn, myihu dùm su duq é kyî mó racham gi, mauhkûng mai byit gyó lô mù, wuìlàng sum tú mâ é ratú eq wuìbúm pê htoq má lo gyó záng ri. ¹¹ Kyî hau é mying gi, Kyî Kyî Hko gâ é nghut ri. Wuìlàng sum tú mâ é ratú hkô byuq luí, wuì haú hkô byuq é yanmai byù myo myo shi byuq bekô nghut ri.

¹² Myi yuq nghû râ mau-mang lagyo gi, yhâng é tut lé mut kat ri; haú hkûn, buì sum tú ratú, lhamó sum tú ratú, kyî sum tú ratú gi, hten luí, haú pê é sum tú ratú gi, mauchut byuq bê nghut ri. Hau htoq agó, nyí sum tú mâ é ratú le, myín sum tú mâ é ratú le, maubó a joq dut byuq ri.

¹³ Ngò wú nyi le, zunbung radu gi, maulat má dâng wún mù, "Gotû maumang lagyo sum yuq eq mut râ nghut é, tut hte é yanmai, myidàm htoq má nyi bâng é matú, dingnyé, dingnyé, dingnyé nghut ri." ga luí, htê mó eq garú taí ri.

9

¹ Ngo yuq nghû râ mau-mang lagyo gi, yhâng é tut mut kat é hkûn, mauhkûng mai myidàm htoq má byit gyó tô é kyî racham lé, ngò myang ri. Haú nik dik htâm é Lasang-dông é zoqshi gi, kyî haú lé byí tô ri. ² Kyî haú gi, nik dik htâm é Lasang-dong lé hpông kat é hkûn, myi bughkyúng mó mai

htoq lo é myihkau dùm sù é myihkau gi, dong haú mai htoq lo ri. Nik dik htâm é Lasang-dong haú mâ é myihkau dum é yanmai, buì eq maulat gi, mauchut byuq bê nghut ri. ³ Myihkau dùm haú mai dinggám pé htoq lô mù, myidàm htoq má gyó lé akô; myidàm htoq má é gogok é a-tsam sù é a-tsam le, yhangmoq lé byí to bê nghut ri. ⁴ Myidàm htoq má é wàhu pé lé le, mhan-haq hpoqnoq pé lé le, sikhgám pé lé le a lhoq htên é za, yhumsing é ngelang má Garai Gasâng é masat lhô a dap é byu pé lé baú zing-ri râ matú, yhangmoq lé taí tô ri. ⁵ Nghut kôlhang, haú bang lé sat pyám râ ahkáng kúm gi, yhangmoq a wó e za, lhamó ngo hkyap tup haú bang lé zing-ri râ ahkáng za ru wó akô nghut ri. Haú bang hui zô é shí-nò jamjau gi, gogok eq pat hkûn no hpú é su yhang nghut ri. ⁶ Haú buinyi pé má, byu pé gi, shí hkyô hô kôlhang, myàng kó râ a nghut; shí nau dik kôlhang, haú shí hkyô gi, yhangmoq chyáng mai hpang byuq râ nghut lhê.

⁷ Dinggám haú pé gi, ma-jan zan râ matú buí tô é myang pé su dut akô. Yhang-moq é ulhum má gi, hîng janmaú sù é tsûng tô é htoq agó, yhangmoq é myoqdong gi, byu myoqdong su dut bum akô nghut ri. ⁸ Yhangmoq é xâm gi, myiwe wui é xâm su dut luí, yhangmoq é zui gi, hkanghkyi zui su dut ri.

⁹ Yhangmoq é wànggò-long gi, joqtoq wànggò-long su dut ri; yhangmoq é dùng mying é htê gi, majan pá shut din yán wang ló é myang jùm eq myanglhêng pé mying hùm é htê su gâ ri. ¹⁰ Yhangmoq é sho-myi gi, nyin dap é gogok é sho-myi su dut ri; yhangmoq é sho-myi má, lhamó ngo hkyap tup byu pé lé zing-ri râ a-tsam bo ri. ¹¹ Yhangmoq é hkohkâm gi, nik dik htôm é Lasang-dong mâ é maumang nghut ri; haù é mying gi, Hebre mying dong Abadon ga, Grik mying dong Apolion* gâ ri.

¹² Sâng-hî lhum dingnyé gi, laí ló byuq bê nghut ri; nghut kôhang, dingnyé í lhum jé lô shirâ nghut lhê.

¹³ Haù hkyuq yuq nghû râ maumang lagyo gi, yhâng é tut mut kat ri. Haù hkûn, Garai Gasâng é hí má joq é hîng hkungga gyap é hkyuî myî lhum mai htê htoq lo é gi, ¹⁴ "Uhprat wui mó lâng má tuî lhûng tô é maumang myi yuq lé, nhang pyám aq." ga tut chung tô é hkyuq yuq nghû râ maumang lagyo lé taí é lé, ngò wó gyô ri. ¹⁵ Haù hkûn, xângzo byù sum tú mâ é ratú lé sat pyám râ matú, ahkyíng, buinyì, lhôhkyap, zanwut lé, rì rì hen to bê nghut é haù maumang myi yuq lé nhang kat bê nghut ri. ¹⁶ Myang jì jì é gyè jum gi, byù du sen í hkyíng bo é hkyô lé, ngò wó gyô ri.

¹⁷ Ngò, shing-rán myang é má, myang jùm eq haù pé má jì bâng é wànggò-long pé gi, myi su ne é, shing shing nyui é eq hang su hui é nghut ri. Myáng jum é ulhum gi, hkanghkyî pê é ulhum su dut luí, yhangmoq é nhut mai, myi, myihkau eq hang pé htoq lo ri. ¹⁸ Haù yhangmoq é nhut mai htoq lo é myi, myihkau eq hang gâ é wúm ihkyup sùm jûng é yanmai, xângzo byù sum tú ratú gi, sat hui bekô nghut ri. ¹⁹ Myang haù jum é sho-myi gi, lhangmuì su dut luí, ulhum dap mù, hte sê é yanmai, yhangmoq é a-tsam gi, nhut eq sho-myi pé má nghut ri.

²⁰ Wúm ihkyup haù sùm jung mai wó lut luí, myit gyó tô é xângzo byu pé gi, yhangmoq é loq pê eq zui sai é muzó mai, myit a lhîng shi kô é htoq agó, nat gâng pé lé le, a wó myâng, a wó gyo, a wó sô é, hîng, ngùn, gyi, luqgok, sik pé é alhô lé le, noqkuq é hkyô lé a tô pyám shi kó nghut ri. ²¹ Hau htoq agó, yhangmoq gi, byù sat é mù mai le, myoqheq hpaqchyí mù mai le, ashop é đông gungsho zùm yap é hkyô mai le, hkaù é mai le, myit a lhîng shi kó nghut ri.

10

Maumang Eq Laiká Dîng É Hkyô

¹ Hau htâng, ngò gi, wum-o bo é maumang lagyo gotú rayuq, mauhkûng mai gyó lé

* 9:11 Apolion gâ é lichyúm gi, lhoq hten lhoq hpyoq sù gâ é nghut ri.

lo é lé myang é nghut lhê. Yhang lé gi, mhut èq htop yup to luí, yhâng é u htoq má woq-gan síng-yang gyân tô ri; yhâng é myoqdong gi, bui su dut luí, yhâng é hkyí gi, myi zíng su dut ri. ² Yhâng é loq má gi, hpông tô é laiká ding zo ral-hum chung tô ri; yhâng é loqyo hkyí gi, wuìshuq lung-aû má nang, yhâng é loqpaí hkyí gi, myigùng htoq má nâng to luí, ³ hkanghkyi mying é htê su ga, htê mó èq garû kat ri. Yhang garu kat jáng, mau-gum htê nyhit lhum tú gûm kat ri. ⁴ Haû maugum htê nyhit lhum tú gûm kat é hkûn, ngò ká rã da jáng, "Haû maugum htê nyhit lhum tú gûm é hkyô lé zaú pyám aq; haú pé lé hkâkã to." ga, mauhkûng mai danghtê htoq lo é lé ngò wó gyô kat ri.

⁵ Haú hkûn, wuìshuq lung-aû eq myigùng htoq má nâng yap tô é lé, ngò myang é mau-mang lagyo haú gi, yhâng é loqyo loq lé mauhkûng shut tu toq kat ri. ⁶ Haû mù, yhang gi, mauhkûng eq haú má nyí é lhunglhang lé le, myidàm htoq eq haú má nyí é lhunglhang lé le, wuìshuq lung-aû eq haú má nyí é lhunglhang lé le, hpan tô é, pyat dedu ahtum abyuq dui nyí Su é myìng lé lang luí, dakam é gi, "Ahkyíng ratsuí le, lhoq myáng nyí lo rã a nghut! ⁷ Nghut kôlhang, Garai Gasang mai Yhâng é dui-nhâng zoshâng wuì nghut é myiqhtoí pé lé taí to bê é danglù eq rajung za, Yhâng

é zaú tô é hkyô gi, nyhit yuq nghû rã maumang lagyo èq yhâng é tut lé mut myhâng é buinyí pé má, shit rã nghut lhê." gã ri.

⁸ Hau htoq agó, ngò wó gyô wú bê mauhkûng má é htê, ngo lé dum taí é gi, "Haû wuìshuq lung-aû eq myidàm htoq má nâng yap tô é mau-mang lagyo loq má hpông tô é laiká ding lé, è yù aq." gã ri.

⁹ Haû mù, ngò gi, è luí, laiká ding zo haû, ngo lé byi rã matú maumang lagyo haû lé è dung le, yhang gi, "Shi lé yù mù, zo kat aq. Náng é wam má hko rã nghut lhê; nghut kôle, náng é nhut má gi, byo-í su yhang chui rã nghut lhê." gã ri. ¹⁰ Haû mù, ngò gi, laiká ding zo haû lé, mau-mang lagyo é loq mai yù mù, zô é nghut lhê; haú hkûn, ngá é nhut má gi, byo-í su yhang chui nghâm ri; nghut kôle, bàn zô kat é hkûn, ngá é wam hkaû má hkô bê nghut ri. ¹¹ Haú hkûn, "Nàng gi, byù myú myo myo eq séng luí le, mingdán myo myo eq séng luí le, myíng ahú hú eq séng luí le, hkohkam pé myo myo eq séng luí le, myiqhtoí dum htoi ra rã nghut lhê." ga, ngo lé taí kyô ri.

11

Saksé Í Yuq É Hkyô

¹ Ké rã jung dumbáng su dut é jàm-yang rahkat ngo lé byi luí, ngo lé taí é gi, "Ê mù, haú Garai Gasang é noqkuq yhûm lé le, hkungga gyap lé

le, kê wú luí, haú má no-
 qkuq é bang lé nghap wú aq.
² Nghut kôlhang, shinggan mâ
 é wâng lé gi, a kê é za lhai
 pyâm to aq; hkâsu mù gâ le,
 haú gi, tûngbaù pé lé byí to bê
 nghut lhê. Yhangmoq gi, haú
 chyoiyúng myuq lé, lhamó
 myixe í hkyap tup chôm nang
 kó râ nghut lhê. ³ Hau htoq
 agó, ngò gi, ngá é saksé í yuq
 lé a-tsam byi râ nghut luí,
 yhangnhik gi, ji mebu wut*
 mù, buinyì 1260 nyí tup my-
 iqhtoi htoi kó râ nghut lhê."
 gâ ri. ⁴ Yhangnhik gi, haú
 myidàm Yhumsing é hí má
 yuq tô é tsanlun gàm í gâm
 eq myibung tsungjang í lhum
 nghut ri. ⁵ Byù rayuq yuq,
 yhangnhik lé zing-ri nau é
 nghut jáng, yhangnhik é nhut
 mai myi htoq lô mù, yhangn-
 hik é gye pé lé nyhê hkyô
 pyám râ nghut lhê. Yhangn-
 hik lé kâm zing-ri é sù gi, haú
 su kut sat pyâm é hui zo râ
 nghut lhê. ⁶ Yhangnhik gi,
 yhangnhik myiqhtoi htoi nyi
 é buinyì pé má mau a wò
 râ matú, mauhkûng lé myhî
 pyám râ a-tsam wó akô; hau
 htoq agó, wui pé lé sui dut
 nhâng râ eq, nau é hkûn, wúm
 ajung jûng eq myidàm htoq lé
 ihkyup hkyó byi râ a-tsam le,
 wó akô nghut ri.

⁷ Yhangnhik gi, saksé ban
 hkâm é hkûn, haú nik dik
 htùm é Lasang-dong mai
 htoq lo é tân jung dusak gi,
 yhangnhik lé htim mù, ûng
 luí, sat pyám râ nghut lhê.
⁸ Yhangnhik é mâng lé gi,

danghîng dông Sodom eq
 Egutuq gâ é, yhangnhik é
 Yhumsîng lé le, tapzîng má
 jén sat pyâm é myuq mó
 é hkyô gùng má, leq to râ
 nghut lhê. ⁹ Haú hkûn, byù
 myû hkangmó mâ é bang,
 byuhú hkangmó mâ é bang,
 myíng hkangmó mâ é bang,
 mingdán hkangmó mâ é
 bang gi, yhangnhik é mâng
 lé myhup pyám râ matú a gyo
 kô é za, sum nyí eq rahkyuí
 tup chôm wú nyí kó râ nghut
 lhê. ¹⁰ Myidàm htoq má nyi é
 bang gi, yhangnhik shi byuq
 é yanmai gabú nguingón luí,
 rayuq eq rayuq chyunghuq
 byí lhùm é dông ngón poí kut
 kó râ nghut lhê. Hkâsu mù
 gâ le, myiqhtoi haú nhik gi,
 myidàm htoq má nyi nyi é
 bang lé, wuîhke jamjau byí lai
 bê su nhik nghut akô.

¹¹ Nghut kôlhang, sum nyí
 eq rahkyuí tup lai é htâng
 má, Garai Gasâng chyáng mâ
 é asak soq gi, yhangnhik
 chyáng wàng mù, yhangnhik
 gi, toq yap tô kô é nghut
 luí, yhangnhik lé myang é
 bang gi, gyai yang gyuq nán
 bûm bekô nghut ri. ¹² Haú
 hkûn, "Shí má doq lò keq." ga,
 mauhkûng mai yhangnhik lé
 wut é htê mó lé wó gyo kômù,
 yhangnhik é gye pé wú tô é
 u lé, mhut ji mù mauhkûng
 shut doq ló bekô nghut ri.

¹³ Haú u lé yhang, layàng
 mó nún lô luí, myuq hkaú
 raxê tú mâ é ratú gi, htên gyop
 byuq bê nghut ri. Hau htoq
 agó, byù nyhit hkyîng yuq shi

* 11:3 Ji mebu wut gâ é gi, iyon yôn é lé gâ lhê.

byuq bê nghut luí, myit gyó
tô é bang gi, gyai yhang gyuq
nán bùm kômù, mauhkûng
mâ é Garai Gasang lé hkyá-on
shigyaú bum akô nghut ri.

¹⁴ Í lhum nghû râ dingnyé
gi, laí byuq bê nghut ri; sùm
lhum nghû râ dingnyé gi, jé
râ za nghut bê.

*Nyhit Lhum Nghû Râ Tut
Mut É Hkyô*

¹⁵ Nyhit yuq nghû râ
maumang lagyo gi, yhâng
é tut mut kat ri; háu hkûn,
mauhkûng htoq má htê mó
pé htoq lo é gi,

"Mingkan htoq mâ é mingdán
gi, nga-nhông é
Yhumsing eq Yhâng é
Hkrisduq é mingdán
dut bê nghut luí,

Yhang gi, pyat dedu ah-
tum abyuq up nyi râ
nghut lhê."

gâ ri. ¹⁶ Háu hkûn, yhumsing
é hkohkâm-tanghkuq má zùng
mù, Garai Gasang é hí má nyi
tô é suwún í xe myi yuq gi,
yhangmoq é myoqdong ngóm
gop mù, Garai Gasang lé no-
qkuq uchyang tái kô é gi,

¹⁷ "Ahkuí pyat, a-nham pyat
rû dui nyi é, wum-
o a-tsam dik shoq bò
Sû Yhumsing Garai
Gasang ê!

Nàng gi, hpungwup a-tsam
mó chùng mù, up nyi
bê nghut é yanmai,
ngamoq, Nang lé jeju
hkyá-on lhê.

¹⁸ Byù myû pé gi, nhikjum
yo bùm kôluí, Náng é

nhikmo-yo hkyô gi, jé
bê nghut ri.

Shí bê bang lé, tarâ jéyáng râ
eq, Náng é dui-nhông
zoshâng myiqhtoí pé lé
le,

Náng é sân-yúng bang lé le,
Náng é mying lé gyuq
hkunggâ é tiq ko lé le,

shigyaú chyunghuq byi râ eq,
myidàm htoq lé lhoq
hten bang lé lhoq hten
râ, ahkying gi, jé bê
nghut ri."

gâ akô.

¹⁹ Háu hkûn, mauhkûng
htoq má, Garai Gasang é
noqkuq yhùm hpông to luí,
Yhâng é noqkuq yhúmhmaú
má, Yhâng é dangshikaq eq
sêng é saksé sidek lé byu-
myang ri. Háu hkûn jáng,
lhap hpyat é, mying hùm é,
maugum gùm é, layàng nún é,
likwò mó gyó é pé dut htoq lo
ri.

12

*Myiwe Myhí Eq Manjung É
Hkyô*

¹ Hau htoq agó, mauhkûng
má limik kumlhá mó htoq
shit é gi: myiwe myhí rayuq
gi, buí lé wut chùng mù,
lhamó má hkyí ke luí, kyí
raxe í cham dap é janmaú lé,
yhâng é ulhum má tsúng tô
ri. ² Yhang gi, zogûng dut tô
é nghut luí, zo hkû râ matú,
zohkû-nò no nyi é yanmai,
gyai yhang ngau garû nyi ri.

³ Hau htâng, mauhkûng má
gotû kumlhá dum htoq shit é
gi: gyai kô é manjung nè mó*

* 12:3 Manjung nè mó gâ é gi, Tsadán lé tái nau é nghut lhê.

radu gi, ulhum nyhit lhum
 eq hkyuî raxê lhum dap luî,
 yhâng é ulhum hkanmó má
 janmaú tsûng tô ri. ⁴ Yhâng é
 sho-myi gi, mauhkûng mâ é
 kyî sum tú mâ é ratú lé shûm
 tsîng yù mù, myidàm htoq má
 he hpyit hkyô kat ri. Manjung
 haú gi, zoshâng hku htoq kat
 eq wó myui hâng kat shoq
 ga, haú myiwe myhî é hí má
 lán yap tô ri. ⁵ Myiwe myhî
 haú gi, mingdán banshoq lé
 shamtoq dumbáng eq up râ
 nghut é yuqzo rayuq lé hkû
 bê nghut ri; yhâng é zoshâng
 lé gi, Garai Gasâng é hí má le,
 Yhâng é hkohkâm-tanghkuq hí
 má le bún toq yù bê nghut ri.
⁶ Myiwe myhî haú gi, yhâng
 é matú Garai Gasang lajâng
 to byî é yoso hkaú má hpang
 wang ê bê nghut ri; haú jowò
 má, yhang gi, 1260 nyí tup
 lhom baú é hui râ nghut lhê.

⁷ Mauhkûng htoq má ma-
 jan htoq bê nghut ri. Mihkae-
 laq eq yhâng é maumang
 lagyô pé gi, manjung lé ma-
 jan é zan kôluî, haú manjung
 eq yhâng é maumâng pé le,
 tau zân akô. ⁸ Nghut kôlhâng,
 yhangmoq gi, a ûng kômù,
 mauhkûng mâ é yhangmoq
 nyi jowò lhoq hpyuq pyám
 bekô nghut ri. ⁹ Haú mingkan
 gón lé hkyô shuî ngoq é,
 natzau eq Tsadán ga é, a-
 nham lhê é lhangmuî nghut
 é manjung mó haú gi, yhâng
 é maumang pé eq rahá
 myidàm htoq má dú hkyô
 pyám é hui bê nghut ri.

¹⁰ Haú hkûn, mauhkûng
 htoq má htê mó dông taí é lé,

ngò wó gyô é gi,
 "Ahkuî gi, nga-nhûng é Garai
 Gasâng é hkyi yù hkyô,
 hpungwup a-tsam eq
 mingdán le,

Yhâng é Hkrisduq é ahko
 ahkáng le, jé bê nghut
 ri.

Hkâsu mù gâ le, nga-nhûng é
 Garai Gasâng é hí má,
 nga-nhûng é gumang
 wui lé,

nyí, myín mara hun nyi é
 sù gi, dú hkyô pyám é
 hui bê nghut ri.

¹¹ Yhangmoq gi, haú Sauzô
 é suí é yanmai le,
 yhangmoq saksé hkâm
 é mungdâng é yanmai
 le,

yhang lé ung pyám bekô
 nghut luî, shi byuq é
 jé shoq yhumsing asak
 lé a ha kó nghut ri.

¹² Haú mù luî, mauhkûng eq
 haú má nyi é bang é,
 gabú nyí keq!

Nghut kôlhâng, myidàm htoq
 eq wuîshuq lung-aû gi,
 dingnyé wó ri;

hkâsu mù gâ le, haú natzau gi,
 yhâng é ahkyíng yàm-
 yoq tot za ru joq alô
 nghut é lé sê é yanmai,
 nhikmo-yô é èq, nungn-
 hik chyáng gyó lé lô bê
 nghut ri."

gâ ri.

¹³ Haú manjung gi, myidàm
 htoq má dú hkyô kat hui
 é lé myàng luî, haú yuqzo
 hku é myiwe myhî lé zing-
 rî ri. ¹⁴ Myiwe myhî haú gi,
 lhangmuî chyáng mai wó lut
 luî, yhang é matú lajâng tô
 é yoso má wó dang jé mù,

ahkyíng ralhú, ahkyíng í lhum, ahkyíng rawuí hkup† lhom baú nyi é huí sháng gaq ga, zùn mó é dùng í lhum byí é huí ri. ¹⁵ Haú hkûn, haú lhangmuí gi, myiwe myhí haú lé wó lhoq myhú pyám shoq ga, myiwe myhí é nunghtáng má, yhâng é nhut mai wuì mó lêng í é wuì lhoq htoq kat ri. ¹⁶ Nghut kôlhang, manjung nhut mai lhoq htoq kat é wuì mó lêng haú lé, myigùng gi, yhâng é nhut há mù myui pyám byí é dông, myiwe myhí haú lé garúm yu ri. ¹⁷ Haú mù, manjung haú gi, myiwe myhí hau é yanmai, gyai yhang nhikmo-yo luí, Garai Gasâng é jep é tarâ lé châng é bang eq Yesuq é saksé lé myhik zing nyi é bang nghut é, myit gyó tô é, myiwe myhí é awut ashín pé lé, majan zan râ matú htoq e ri. ¹⁸ Manjung haú gi, wuìshuq lung-aú yàm má yap tô ri.

13

Tân Jung Dusak Radu Wuìshuq Lung-aú Mai Htoq Lo É Hkyô

¹ Haú hkûn, haú wuìshuq lung-aú mai tân jung dusak radu htoq lo é lé, ngò myàng ri. Dusak haú má, hkyuì raxê lhum eq ulhum nyhit lhum dap to luí, yhâng é hkyuì pé má gi, janmaú raxê lhum tsung to mù, ulhum hkangmó má gi, Garaí aróng lhoq hpoi

é myìng dap tô bum ri. ² Ngò myang é tân jung dusak haú gi, bauze-lo su dut ri; nghut kôlhang, hkyí gi, wàm hkyí su dut luí, nhut gi, hkanghkyí nhut su dut ri. Haú manjung gi, yhâng é a-tsam eq yhâng é hkohkâm-tanghkuq lé le, ahko ahkáng mó lé le, tân jung dusak haú lé ap byí ri. ³ Tân jung dusak hau é ulhum ralhú gi, shí râ í é dàm dap huí é su dut kôlhang, damhkô haú gi, yâ ge pyám bê nghut luí, mingkan gón gi, mauhong byuq kômù, yhâng htâng châng bùm bekô nghut ri. ⁴ Manjung gi, tân jung dusak lé ahko ahkáng ap byí é yanmai, byu pé gi, manjung haú lé noqkuq é htoq agó, tân jung dusak haú lé le, noqkuq kômù, "Ó yuq wá, tân jung dusak shí du su dut ri lú? Ó yuq wá, yhang lé wó zan ùng râ lú?" ga bum akô.

⁵ Gyáng dang taí râ eq Garaí aróng lhoq hpoi dang taí râ nhut gi, tân jung dusak haú lé byi to bê nghut é htoq agó, lhamó myí xe í hkyap tup, yhâng é ahko ahkáng lé chùng râ ahkáng wó bê nghut ri. ⁶ Yhang gi, yhâng nhut hpóng mù, Garaí Gasâng aróng lé lhoq hpoi dang taí é htoq agó, Garaí Gasâng é myìng eq nyi jowò lé le, mauhkung htoq má nyi é bang lé le, lumù gansang é sù nghut ri. ⁷ Haú sân-yúng bang lé majan zân ung yù râ a-tsam, yhang lé byi bê nghut ri. Hau

† 12:14 Ahkyíng ralhú, ahkyíng í lhum, ahkyíng rawuí hkup gâ é gi, "razàn, í zân, lhamó hkyuq hkyap" lé gâ é nghut lhê; haú gi, 1260 nyí nghut ri.

htoq agó, byuhú hkangmó lé le, byù myû hkangmó lé le, myíng hkangmó lé le, mingdán hkangmó lé le, up râ ahkáng, yhang lé byi bê nghut ri. ⁸ Haú sat hui bê Sauzo eq sêng é asak jihpán laiká buk má, mau htoq xâng hkun mai, myíng a kâ lhôm é, myidàm htoq má nyi é lhunglhâng bang gi, haú tân jung dusak lé noqkuq kó râ nghut lhê.

⁹ Gyo râ nohkyap dap sù gi, gyô yù sháng gaq.

¹⁰ Shúm zung é hui râ sù gi, shúm zung é hui râ za nghut lhê.

Sham èq sat é hui râ sù gi, sham èq sat é hui râ za nghut lhê.*

Haú mù, sân-yúng bang gi, hkam jân é hkyô eq lhumzui hkyô bò kó râ nghut lhê.

Tân Jung Dusak Radu Myigùng Mai Htoq Lo É Hkyô

¹¹ Hau htâng, ngò gi, tân jung dusak gotû radu† myigùng mai htoq lo é lé myang ri. Yhang gi, sauzô é hkyuí su dut é hkyuí í lhum yuq ri; nghut kôhang, yhang gi, manjung su ga dang nyo ri. ¹² Yhang gi, tân jung dusak hí lhê dù é ahko ahkáng lhunglháng lé, haú du é hí má chûng mù, shî râ î é damhkô ge byuq é tân jung dusak haú lé, haú mingkan eq mingkan htoq má nyi é bang lé noqkuq nhang ri. ¹³ Hau htoq agó, yhang gi, byu pê é myoq hí

má, mauhkûng mai myigùng shut myi lé lháng wó lhoq hkyô é, limik kumhá mó kut shit ri. ¹⁴ Yhang gi, tân jung dusak hí lhê dù é hí má, kumhá haú pé kut râ ahkáng wó é yanmai, myidàm htoq má nyi é bang lé mhoq hpyoq yú luí, haú shâm damhkô dap kôhang, dui nyi é tân jung dusak haú lé, hkunggâ é dông, yhangmoq lé, yhâng é alhô sai nhang ri. ¹⁵ Yhang gi, haú tân jung dusak hí lhê dù é alhô lé, soq wó mut kat byí é a-tsam lé wó yú sù nghut ri; haú mù, alhô haú gi, dang wó taí luí, yhang lé a noqkuq é bang lé, sat hui nhang ri. ¹⁶ Hau htoq agó, yhang gi, byù mó byù zo, wó sù myúng sù, luthkyô wó bang eq jùn pé, yuq hkangmó lé, yhumsing é loqyo loq má nghut nghut, ngelang má nghut nghut, masat lhô zik tap yú nhang ri. ¹⁷ Haú hkûn, haú tân jung dusak é myíng, a nghut jáng, yhâng myíng é masat námbat dap sù mai lai luí, ûng é, wui é hkyô, ó yuq le wó kut râ a nghut.

¹⁸ Hpaqchyí byéng-yá gi, shî má bo râ ri. Hpaqchyí bò sù gi, haú tân jung dusak é námbat lé sôn wú sháng gaq; hkâsu mù gâ le, haú gi, byù rayuq é námbat nghut lhê. Yhâng é námbat gi, 666 nghut ri.

14

Sauzo Eq 144,000 Yuq É

* **13:10** Chyúmding ra-am má gi, Byù rayuq yuq lé, shúm kut é sù gi, shúm zung é hui râ nghut lhê. Sham èq byù sat é sù gi, sham èq sat é hui râ nghut lhê, ga bo tô ri.

† **13:11** Tân jung dusak gotû radu gâ é shî gi, myiqhtoi pyoq lé gá nau é nghut lhê.

Hkyô

¹ Hau htâng, ngò wú kat le, haù Sauzo gi, Zi-un bùm má yap tô é lé myang ri; Yhâng mying eq Yhâng Wá é mying lé, yhumsing é ngelang má kâ tap tô é byù 144,000 yuq le, Yhang eq rahá yap tô bùm ri.

² Haù hkûn, ngò gi, wuì pé mying hûm é htê eq maugum mó gûm é htê su gâ é htê, mauhkûng mai htoqlo é lé wó gyô ri. Ngò wó gyô é htê haù gi, tíng bat bang, yhangmoq é tíng lé bat myhîng é htê su gâ ri. ³ Yhangmoq gi, haù hkohkâm-tanghkuq é hí má le, dui é dusak myî du eq suwún wui pé hí má le, mahkôn sik lé hkon akô nghut ri. Haù myidàm htoq mai hkyi yù huì é byù 144,000 yuq mai lai luì, ó yuq le, mahkôn haù lé a wó mhoq sê yù kó nghut ri. ⁴ Haù bang gi, myiwe wuì eq gungsho a zum é bang nghut luì, yhangmoq gi, zorâm jet pé nghut bum akô. Yhangmoq gi, haù Sauzo hká shut é le hká shut châng é bang nghut akô. Yhangmoq gi, byu pé chyáng mai wui yu é hui luì, sâng-hi myhîng é ashi lé su, haù Garai Gasang eq Sauzo lé ap byî é hui akô nghut ri. ⁵ Yhangmoq é nhut má, mhaù é hkyô haì le a taí kó; yhangmoq chyáng mara hûn râ hkyô le a bò kó nghut ri.

Maumang Sum Yuq É Hkyô

⁶ Hau htâng, maumang lagyo gotû rayuq gi, maulat

má dâng wún é lé ngò myang ri; yhang gi, haù mingkan htoq má nyi é, mingdán hkangmó mâ é bang, byuhú hkangmó mâ é bang, mying hkangmó mâ é bang, byù myû hkangmó mâ é bang lé, hko kyo râ ahtum abyuq é gabú danglù wó ri. ⁷ Yhang gi, "Garai Gasang, tarâ jéyáng râ ahkyíng jé bê nghut é yanmai, Yhang lé gyuq hkungga luì, Yhâng é hpungwup a-tsam lé shigyaú keq. Haù mauhkûng eq myigùn, wuìshuq lung-aù eq wuìbúm pé hpan tô é Sù lé, noqkuq keq." ga luì, htê mó eq taí ri.

⁸ Í yuq nghû râ maumang lagyo gi, htâng má châng lé mù, "Haù mingdán pé* lhunglháng lé, yhang kut shut é ashop é dông gungsho zùm yap é hkyô, nhik lhoq yô é tsibiyiq wing shuq nhang é, Babelon myuq mó gi, lêng gyop bê! Lêng gyop bê!" ga taí ri.

⁹ Sum yuq nghû râ maumang lagyo gi, yhangnhik é htâng má châng lé mù, "Haù tân jung dusak eq yhâng é alhô lé, noqkuq luì, yhumsing é ngelang má nghut nghut, loq má nghut nghut, yhâng é masat lô lé tap yu é sù, ó yuq nghut kôle, ¹⁰ Garai Gasâng é nhikmo-yo nghu é góm má hut kat tô é, nhik-yô é tsi-biyiq wing jet lé shuq râ nghut lhê. Hau htoq agó, haù chyoiyúng maumang lagyo pé hí má le, Sauzô é hí má le, yhang gi, duq nyi é myi eq hang

* 14:8 Mingdán pé gâ é gi, a lumjîng bang lé gâ é nghut lhê.

èq zing-rî é hui zo râ nghut lhê. ¹¹ Yhangmoq zing-ri huí é myihkau gi, pyat dedu ah-tum abyuq htoq nyi râ nghut lhê. Haû tân jung dusak eq yhâng é alhô lé, noqkuq é bang eq yhâng mying é masat lhô tap yû sù é matú gi, nyí, myín, no râ ahkyíng wó râ a nghut." ga luí, htê mó èq taí ri. ¹² Garai Gasâng é jep é tarâ cháng luí, Yesuq lé lhumzui nyi é bang nghut é, sân-yúng bang gi, hkam shirang é hkyô bò rá lhê.

¹³ Hau htâng, "Ahkuí mai gi, haû Yhumsíng má shí é sù, hkungôsô wó nyi ri nghû kê to aq." gâ é htê, mauhkúng mai htoq lo é lé, ngò wó gyô ri.

Haû hkûn, haû Woi-nyí gi, "Nghut rô, yhangmoq kut é muzó é akyú gi, yhangmoq htâng cháng râ nghut é yan-mai, yhangmoq gi, yhumsíng zuí ngu é muzó mai myang hkyíng bekô râ nghut lhê." ga taí ri.

Myidàm Htoq Mâ É Kyôshi Shû É Hkyô

¹⁴ Ngò dum wú kat le, mhut hpyû rahtui ngá hí má joq tô é lé myang ri; mhut hpyû htoq haû má Byu Yhangzo su dut é byù rayuq zung tô ri; Yhâng é ulhum má gi, hîng janmaú tsûng to luí, Yhâng é loq má gi, htoq é zaiyik ralhum chung tô ri. ¹⁵ Haû hkûn, gotû maumang lagyo gi, noqkuq yhûm mai htoq lô mù, "Haû myidàm htoq mâ é kyôshi gi, myhîng zan to bê nghut luí, kyôshu

yoq jé bê nghut é yanmai, náng é zaiyik chûng mù, yik shû yù aq." ga, haû mhut htoq má zung tô é Sû lé, htê mó èq taí garû kat ri. ¹⁶ Haû mù, mhut htoq má zung tô é Sû gi, Yhâng é zaiyik lé, myigùng htoq má dú hkyô kat luí, myidàm htoq mâ é kyôshi lé, ban shû yù bê nghut ri.

¹⁷ Maumang lagyo gotû rayuq gi, mauhkúng htoq mâ é noqkuq yhûm mai htoq lo ri; haû yuq le, htoq é zaiyik ralhum chung tô ri. ¹⁸ Haû, myi lé up é maumang lagyo gotû rayuq gi, hkungga gyap mai htoq lô mù, htoq é zaiyik chûng sù lé, "Myidàm htoq mâ é tsibiyiq shi gi, myhîng bê nghut é yanmai, náng é htoq é zaiyik yù mù, tsibiyiq shipaû haû pé lé, yâm tsíng yù aq." ga, htê mó èq taí garû kat ri. ¹⁹ Maumang lagyo haû gi, yhâng é zaiyik lé, myidàm htoq má dú hkyô kat mù, haû mâ é tsibiyiq shi pé lé yâm tsíng yù luí, Garai Gasang nhikmo-yô é tsibiyiq wing pyik jang mó má hut kat bê nghut ri. ²⁰ Myuq shinggan mâ é tsibiyiq wing pyik jang haû má, tsibiyiq shi haû pé lé nâng nyhoq luí, tsibiyiq wing pyik jang haû mai suí yui htoq lo é gi, myang lunghtúng myháng jé shoq jé lô mù, 180 déng† kô we shoq yui ló bê nghut ri.

15

Ló Htâng É Wúm Nyhit

† 14:20 180 déng gi, Grik pé é stadia 1600 kô bo ri.

*Lhum Chung É Maumang
Lagyo Nyhit Yuq É Hkyô*

¹ Ngò gi, mauhkûng má gotû limik kumlhá joq é lé, dum byu-myang ri; haû gi, wúm nyhit lhum chung é maumang lagyo nyhit yuq nghut ri; wúm haû pé gi, lô htâng é wúm pé nghut ri; hkâsu mù gâ le, Garai Gasang nhikmo-yô é hkyô gi, haû gû mai bàn râ nghut lhê. ² Hau htoq agó, myi eq nyhô tô é myoqjâm wui-nhông su dut é lé le, ngò myang ri; haû tân jung dusak eq yhâng é alhô lé le, yhâng mying é námbat lé le, wó ung pyám bê bang gi, wui-nhông yâm haû má yap tô bum akô; yhangmoq gi, Garai Gasang byi é tít pé lé chung to kôlu, ³ Garai Gasâng é dui-nhâng zoshâng Mosheq é mahkôn eq haû Sauzô é mahkôn lé hkôn kô é gi,

"Wum-o a-tsam dik shoq bò Sû Yhumsing Garai Gasang ê, Nang kut é muzó gi, hkik é eq mauhpo yhang nghut ri.

Pyat pyat zaí zaí é Hkohkâm ê, Nang é hkyô gi, dingmán é eq tengmán é nghut ri.

⁴ Yhumsing ê, Nang lé a gyuq a hkungga râ eq Nang mying lé a lhoq gyaú râ gi, ó yuq wá nyi râ lúh?

Hkâsu mù gâ le, Nang za chyoiyung é Sû nghut ri.

Nang kut é dingmán hkyô gi, tân shit bê nghut é yanmai,

byù myû lhunglhang gi, Nang hí má lé noqkuq kó râ nghut lhê."

gâ akô nghut ri.

⁵ Hau htâng, ngò wú kat le, mauhkûng má, saksé zúm joq é noqkuq yhûm bóng tô é lé, myang ri. ⁶ Haû wúm nyhit jung chung é maumang lagyo nyhit yuq gi, noqkuq yhûm haû mai htoq lo ri; yhangmoq gi, sân-yung duqbo é nú nhâm mebu wut lui, yhangmoq é wànggàng má hîng hpyihit baíyup tô akô nghut ri.

⁷ Haû hkûn, haû dui é dusak myi du má é radu gi, pyat dedu ahtum abyuq dui nyi é Garai Gasâng é nhikmo-yo hkyô bying tô é hîng góm nyhit lhum, haû maumang lagyo nyhit yuq lé byi ri. ⁸ Garai Gasâng é hpungwup shingkang eq hpungwup a-tsâm é yanmai, haû noqkuq yhûm gi, myihkau bying zan to bê nghut lui, haû maumang lagyo nyhit yuq é wúm nyhit jung za a bàn bàn gi, noqkuq yhûm haû má ó yuq le a wó wâng kó nghut ri.

16

*Garai Gasâng É Nhikmo-yo
Hkyô Bo É Góm Nyhit Lhum*

¹ Hau htâng, maumang lagyo nyhit yuq lé, "Htoq ê mù, haû Garai Gasâng é nhikmo-yo hkyô bo é góm nyhit lhum lé, myigùng htoq má hut hkyô kat keq." ga, noqkuq yhûm mai htê mó èq taí é lé, ngò wó gyô ri.

² Haû hkûn, sânghî yuq nghû râ maumang lagyo gi,

htoq ê mù, yhâng é góm lé,
myigùng htoq má hut hkyô
kat jáng, haû tân jung dusak
é masat lhô dap é eq yhâng é
alhô lé noqkuq é bâng chyáng,
achaq achyut é eq hkê-nho
dik é, yapjeq ana dap tô bùm
bê nghut ri.

³ Í yuq nghû râ maumang
lagyo gi, yhâng é góm lé,
wuishuq lung-aû má hut hkyô
kat ri; haû gi, shî bê byù
rayuq é sui su dut byuq é htoq
agó, haû má lúng é dui jung
lunglhang gi, shi byuq bê
nghut ri.

⁴ Sum yuq nghû râ mau-
mang lagyo gi, yhâng é góm
lé, wuilàng pé eq wuibúm pé
má hut hkyô kat jáng, haû
pé gi, sui dut byuq bê nghut
ri. ⁵ Haû hkûn, haû wui lé
upzúng é maumang lagyo taí
é lé, ngò wó gyô é gi,

"A-nham pyat le, ahkui pyat
le, rû nyi nyi é Chy-
oiyúng Sû ê,

Nàng haû su kut jéyáng bê
nghut é yanmai, Nàng
gi, tengmán Sû nghut
ri;

⁶ hkâsu mù gâ le, yhangmoq
gi, Nàng é sân-yúng
bang eq myiqhtoí pê é
sui lé, lhoq htoq pyám
bekô nghut luí,

Nàng gi, yhangmoq lé sui
shuq nhang é nghut ri;
haû gi, yhangmoq hui
zo gíng é hkyô nghut
ri."

gâ ri. ⁷ Haû hkûn, haû
hkgungga gyap mai,

"Nghut rô! Wum-o a-tsam dik
shoq bò Sû Yhumsing

Garai Gasang ê, Nàng
jéyáng é hkyô pé gi,
tengmán é eq dingmán
é nghut ri."

ga le, taí kat é htê lé, ngò dum
wó gyô ri.

⁸ Myi yuq nghû râ mau-
mang lagyo gi, yhâng é góm
lé, bui é ahtoq má hut hkyô
kat é hkûn, bui gi, byu pé lé
myí èq nyhê kyuq râ ahkáng
wó bê nghut ri. ⁹ Haû mù,
yhangmoq gi, nyé dik é èq
nyhê kyuq é hui zo luí, wúm
shí pé lé up nyi é Garai Gasang
é mying lé nhing akô; haû-í
yhang hpuzo kôlhang, yhang-
moq gi, myit le a lhing kô,
Garai Gasang lé le a shigyau
kó nghut ri.

¹⁰ Ngo yuq nghû râ mau-
mang lagyo gi, yhâng é góm
lé, tân jung dusak é hkohkâm-
tanghkuq htoq má hut hkyô
kat jáng, yhâng é mingdán
gi, mauchut tuq dut byuq bê
nghut ri. Mingbyû wui gi,
yhumsing é shô lé lhang, ngat
tân bùm shoq shî-nò jamjau
hui zo kôluí, ¹¹ yhangmoq no
hpû é eq jeq é ana dap é yan-
mai, mauhkûng mâ é Garai
Gasang lé nhing akô; haû-í
yhang hpuzo kôlhang, yhang-
moq gi, yhangmoq kut é hkyô
mai myit a lhing shi kó nghut
ri.

¹² Hkyuq yuq nghû râ mau-
mang lagyo gi, yhâng é góm lé,
Uhprat wui mó llang má hut
hkyô kat jáng, wuilàng haû
gi, kân byuq luí, haû bui-
toq hkyam mâ é hkohkam pé,
lé lô râ hkyô dong bê nghut
ri. ¹³ Haû hkûn, po su dut

é, agè ashop é byò sum woi-nyí lé, ngò myang ri; haú pé gi, manjung, tân jung dusak, myiqhtoi pyoq pé é nhut mai htoq lô kô é bang nghut akô. ¹⁴Woi-nyí haú pé gi, nat gâng pé é woi-nyí nghut luí, limik kumlhá pé kut shit kômù, haú wum-o a-tsam dik shoq bò Sû Garai Gasâng é buinyí mó má majan zan râ matú, mingkan gón mâ é hkohkam pé lé lhoq tsîng yù râ ga, htoq e ló akô nghut ri.

¹⁵"Wú keq, Ngò gi, hkau sù su jé lé é nghut lhê! Su hí má gungchîn a so râ eq hoq hpu hkyô a lhoq htoq shit sháng gaq ga, yhumsing é wutbu wutmè lé, zúng nyí luí, gying gying kut nyi é sù gi, hkungsô wó nyi ri."*

¹⁶Haú mù, nat haú bang gi, hkohkam pé lé, Hebre myíng dông Armagedon gâ é jowò má, rahá ji tsîng tô akô nghut ri.

¹⁷Nyhit yuq nghû râ maumang lagyo gi, yhâng é góm lé, maulat má hut hkyô kat ri; haú hkûn, haú noqkuq yhûm mâ é hkohkâm-tanghkuq mai, "Bàn bê!" gâ é htê mó htoq lo ri. ¹⁸Hau htoq agó, lhap hpyat é, mying hûm é, maugum gûm é eq layàng mó nún é pé dut htoq lo ri. Myidàm htoq má, xângzo byù lé nyi é hkûn mai, layàng haú su nún é eq haú-í htan é gi, a joq wú shí é nghut lhê. ¹⁹Haú mù, haú myuq mó gi, sûm hkyam byak goq byuq luí, mingdán pé mâ é myuq

pé le, gyop byuq bê nghut ri. Garai Gasang gi, Babelon myuq mó lé le myit bun luí, Yhâng é nhikmo-yô é tsi-byiq wing byíng shoq bo é góm lé shuq nhâng bê nghut ri. ²⁰Zinlóng hkangmó gi, hpang byuq bê nghut luí, bùm pé le byuq byuq bê nghut ri. ²¹Haú hkûn, myi xê joí kô lai é likwò mó gi, mauhkûng mai byu pé htoq má wo gyó gyûn ri; likwò wúm gi, gyai yhang wuîhke jamjaú é wúm nghut é yanmai, byu pé gi, Garai Gasang lé nhîng bum akô nghut ri.

17

Shiwa Myhí Mó É Hkyô

¹Haú góm nyhit lhum chung tô é maumang lagyo nyhit yuq mâ é rayuq gi, lé lô mù, "Lé aq, haú wuî myo myô pé htoq má zung tô é shiwa myhí mó lé dam byi râ hkyô, ngò, nang lé tân shit bá.

²Myidàm htoq mâ é hkohkam pé gi, yhang eq rahá ashop é dông gungsho zùm yap é hkyô kut shut kôluí, myidàm htoq má nyi é bang gi, yhang kut shut é myiwe yuqgè nyi zô lhúm hkyo é tsibyiq wing lé shuq wut bùm bekô nghut ri." ga luí, ngo lé taí ri.

³Haú mù, maumang lagyo haú gi, Woi-nyí má, ngo lé yoso shut shuí wang e ló ri. Haú ulhum nyhit lhum eq hkyuî raxê lhum dap luí, taí hpoí é myíng kôm dap tô é, zam zam ne é tân jung dusak htoq má zung tô é myiwe

* 16:15 Dang shí hkun gi, Yesuq taí é dang nghut lhê.

myhí rayuq lé, ngò myang ri.
 4 Myiwe myhí haû gi, me me dut é eq zam zam ne é mebu wut luí, hîng, lungsêng, palhé pê eq mhôn chung ri; yhâng é loq má gi, yhâng é myiwe yuqgè nyi zô lhum hkyo é agot a-û hkyô eq achayut é zè pé bying tô é hîng góm ralhum chung tô ri.

5 NIK DIK É HKYÔ, MYIDÀM HTOQ MÂ É ACHAQ ACHYUT HKYÔ PÉ EQ SHIWA MYHÎ PÊ É YHÂNGNU, BABELON MYUQ MÓ.

gâ é myîng gi, yhâng é ngelang má kê tap tô ri. 6 Myiwe myhí haû gi, sân-yúng bâng é sui eq Yesuq é saksé hkám bâng é sui shuq wut tô é lé, ngò myang ri.

Haû mù, ngò gi, gyai yhang maú byuq é nghut lhê. 7 Haû hkûn, maumang lagyo haû ngo lé taí é gi, "Nàng, haû mù maú lhê lhu? Myiwe myhí haû eq, yhang jî tô é, ulhum nyhit lhum eq hkyuî raxê lhum dap é tân jung dusak é zaú tô é hkyô lé, ngò, nàng lé taí kyo râ nghut lhê. 8 Nàng myàng é tân jung dusak haû gi, hí hkûn nyi wú bê, ahkuî a nyi lo, nghut kôlhang, nik dik htûm é Lasang-dong mai htoq lô mù, htên byoq é hui râ nghut lhê. Mau htoq xâng hkun mai, asak jihpán laiká buk má myîng a kê tô é, myidàm htoq má nyi é bang gi, tân jung dusak haû lé myàng kô é hkûn, maú byuq bùm kó râ nghut lhê. Hkâsu mù gâ le, haû gi, nyi wú bê, ahkuî a nyi lo, nghut kôlhang,

dum lé râ nghut é yanmai nghut ri.

9 Hpaqchyî byéng-yá bo é nyan gi, shî má râ ri. Haû ulhum nyhit lhum gi, myiwe myhí zung é bùm nyhit lhum nghut ri; hau htoq agó, hkohkâm nyhit yuq le nghut ri. 10 Ngo yuq gi, byit gyó byuq bê; rayuq gi, ahkuî nyi to ashî; myit tô é rayuq gi, a jé lé shi nghut ri; haû yuq jé lé é hkûn, yhang gi, ahkyíng razup zo za wó nyi râ nghut lhê. 11 Hí hkûn nyi wú bê, ahkuî a nyi lo dut é tân jung dusak haû gi, shit yuq nghû râ hkohkâm nghut ri. Yhang gi, haû nyhit yuq eq sêng é yanmai, yhâng é htên byoq hkyô shut e ló râ nghut lhê.

12 Haû nàng myàng é hkyuî raxê lhum gi, mingdán a myang yù shî é hkohkâm raxê yuq nghut ri; nghut kôlhang, yhangmoq gi, haû tân jung dusak eq rahá za, hkyíng hkum rahkum kô hkohkâm ayá lé wó yù kó râ nghut lhê. 13 Yhangmoq gi, myit myoqbyù hkyô ralhum za nghut kômù, yhangmoq é a-tsam eq ahko ahkáng lé, haû tân jung dusak lé byi kó râ nghut lhê. 14 Yhangmoq gi, haû Sauzo lé majan chôm zan kó râ nghut lhê; nghut kôlhang, Sauzo haû gi, yhumsing pê é Yhumsîng eq hkohkam pê é Hkohkâm nghut é yanmai, yhangmoq lé ung pyám râ nghut lhê. Haû Sauzo eq rahá nghut é bang gi, jî yù huí é bang, hkyin yù huí é bang eq lhumzuí é bang nghut akô."

gâ ri.

¹⁵ Hau htâng, maumang lagyo haû ngo lé dum taí é gi, "Nàng myang é, shiwa myhí zung tô é wui pé gi, byù myû pé, byù ajùm ayò pé, mingdán pé eq myíng lhumjup nghut ri. ¹⁶ Haû nàng myang é tân jung dusak eq hkyuî raxê lhum gi, shiwa myhí haû lé a jú kut kó râ nghut luî, yhâng é sutzè banshoq shang yu pyám byi mù, mebu lhang a dap loshoq achîndum kut to kó râ nghut lhê; hau htoq agó, yhâng é sho lé zo luî, myî eq nyhê hkyô pyám kó râ nghut lhê. ¹⁷ Hkâsu mù gâ le, Garai Gasang gi, haû bang mai, i-myit rahkat zâ èq, yhumsing é a-tsam, haû tân jung dusak lé byi râ myit, yhangmoq lé kat byi Sû nghut ri. Haû mù, yhangmoq gi, Garai Gasâng é mungdang lhoq dik é hkûn jé shoq, haû su kut kó râ nghut lhê. ¹⁸ Nàng myang é myiwe myhí haû gi, myidàm htoq mâ é hkohkam pé lé up zô é myuq mó nghut ri." gâ ri.

18

Babelon Lêng Gyop É Hkyô

¹ Hau htâng, maumang lagyo gotû rayuq mauhkûng mai gyó lo é lé, ngò myang ri. Yhang gi, ahko ahkáng mó wó é nghut luî, haû myidàm htoq lé, yhâng é hpungwup èq duqbó to byî ri. ² Yhang, hté mó o mó èq garû taí kat é gi, "Babelon myuq mó gi, lêng gyop bê, lêng gyop bê! Myuq haû gi, nat gâng pé é yhûm eq agè ashop é

nat hkangmó é hkyûng dut byuq é htoq agó,

a sansêng é eq achaq achyut é nghoq pé nyi é sùt dut byuq bê nghut ri.

³ Hkâsu mù gâ le, haû byù myû lhunglhang gi, yhang kut shut é ashop é dông gungsho zùm yap é hkyo é nhik lhoq yô é tsibiyiq wing shuq wut bùm bekô nghut ri.

Haû myidàm htoq mâ é hkohkam pé gi, yhang eq myi shut làng shut hkyô kut bekô nghut é htoq agó,

myidàm htoq mâ é hpugá wuiloq gá bang gi, yhâng é ladu lai shoq ngón kûn é hkyo é yanmai, sutzè wó bôm bekô nghut ri."

gâ ri.

⁴ Hau htâng, mauhkûng mai htoq lo é hté gotû lé ngò dum wó gyô é gi,

"Ngá é byu pé ê, myuq hau é mara pé má nungmoq a bo lòm râ matú le,

yhâng é wúm pé lé nungmoq a hui zo kó râ matú le, haû mai hân hpang htoq lò keq;

⁵ hkâsu mù gâ le, yhâng é mara gi, mauhkûng htung shoq bum zang to bê nghut luî,

Garai Gasang gi, Yhâng é a dingmán é hkyô lé myit bun bê nghut ri.

⁶ Yhang kut byî é eq rajung za, yhang lé tau kut byi keq; Yhang kut bê muzó eq rajung za,

yhang lé í tú taû kut
keq.

Yhang nyhó byí é góm
má, í tú taû nyhó byi
keq.

⁷ Yhang gi, yhumsing gùng lé
yhumsîng lhoq gyaú yû
luí, ladu lai shoq ngón
kún nhang é í,

wuîhke jamjau hkyô eq
iyon hkyô myo myo,
yhang lé taû byi keq.

Hkâsu mù gâ le, yhang gi,
yâng é myit má,

'Ngò gi, hkohkâm myhí
nghut lê; ngò gi,
chuí mó a nghut;

hkâ-nhám le iyon hui râ
a nghut.' ga gumrong
nyi ri.

⁸ Haû mù luí, yâng é wúm
nghu é shí hkyô, iyon
hkyô eq mutmó gyó
hkyô gi,

ra-nyí bui má za, yâng
chyáng jé râ nghut lê.

Hau htoq agó, yhang gi, myí
èq nyhê hkyô pyâm é lé
hui râ nghut lê;

hkâsu mù gâ le, yhang lé
jéyáng é, haû Yhumsîng
Garai Gasang gi, wum-
o a-tsam bò Sû nghut
ri.

⁹ Haû yhang eq rahá myiwe
yuqgè nyi zô lhum hkyô kut
shut é eq yâng é ladu lai
shoq ngón kún hkyô má bo
lom é, haû myidàm htoq mâ é
hkohkam pé gi, yhang lé nyhê
hkyô é myihkau lé myàng
kôjáng, ngaubyi ngau-nhap
eq iyon yôn é huí bùm kó râ
nghut lê. ¹⁰ Yhangmoq gi,
yhang no jamjaú nyi é lé wú

gyuq kôluí, we we má yap to
kômù,

'Hkik é myuq mó, a-tsam bo
é Babelon gi, dingnyé
wó ri-nhung!

Dingnyé wó ri-nhung!
Hkyíng hkum ralhum
má za, dam byí é hkyô
gi, náng chyáng jé bu-
nhung!'

ga luí, taí garu kó râ nghut
lê.

¹¹ Myidàm htoq mâ é hpugá
byu pé gi, yhang é yanmai,
ngaubyi ngau-nhap é eq iyon
yôn é huí kó râ nghut lê;
hkâsu mù gâ le, yhangmoq
é gài zè lé, ó yuq le a wui
byi lo kô é yanmai nghut
ri. ¹² Gài zè haú pé gi, hîng,
ngùn, lungsêng eq palhé, nú-
nhâm é pán, me me dut é
pán, láí hkyîng eq zam zam
ne é pán; namngón jung sik
ajung jung, maguí zû lé saí
é, gùloq hpaû jung sik lé saí
é, gyi lé saí é, shamtoq lé saí
é, luq hpyû lé saí é jung ajà
jà nghut ri. ¹³ Hau htoq agó,
changhpyik gâm, xunmân,
namngón jung, mura, loban,
tsibiyiq wing, tsanlun xû, mún
eq sunsô, nojûng eq sau,
myang eq myanglêng pé;
byù é gungdu eq asak pé
nghut ri.

¹⁴ Yhangmoq gi, 'Nàng myit
ô nau nyi é hkyô pé gi, náng
chyáng mai gâng ló byuq bê
nghut ri. Nàng wó é sùt é
hkyô eq hkikhkam é hkyô pé
banshoq gi, byuq byuq bê
nghut luí, hkâ-nhám le dum
wó taû yù râ a nghut.' ga
taí kó râ nghut lê. ¹⁵ Gài

zè haú pé lé ung luí, yhâng
chyáng mai sutzè wó yu é byù
pé gi, yhang hpuzô é jamjau
hkyô lé wú gyuq kô é yan-
mai, we we má yap to kômù,
ngaubyi ngau-nhap eq iyon
yon uchyang,

16 'Nú-nhâm é pán, me me dut
é pán eq zam zam ne
é mebu wut luí, hîng,
lungsêng eq palhé pé lé
nhôn tô é myuq mó gi,
dingnyé wó ri-nhung!
Dingnyé wó ri-nhung!

17 Hkyíng hkum rahkum má
za, haú-í yhang wó
é sutzè pé htên byoq
byuq bu-nhung!
ga taí kó râ nghut lhê.

Wuì-sanghpo agyì yuq
hkanmó eq wuì-sanghpo mai
jón wún é bang banshoq,
wuì-sanghpo hkâng bang eq
wuìshuq lung-aú mai wam
baú hkyô wó yu é bang
banshoq gi, we we má yap
to kômù, ¹⁸ myuq haú nyé
gyó nyi é myihkau lé myàng
kôjáng, 'Myuq mó shí eq
pûng é myuq gi, hkâmá joq
shirâ lú?' ga taí garu kó
râ nghut lhê. ¹⁹ Yhangmoq
gi, yhumsing é ulhum má
hpuilhup kyaq gyun mù,
ngaubyi ngau-nhap eq iyon
yon uchyang,

'Myuq mó gi, dingnyé wó ri-
nhung! Dingnyé wó ri-
nhung!

Wuìshuq lung-aú má wuì-
sanghpo pé wó é bang
gi, yhâng é sutzè pé é
yanmai, sutzè wó bum
akô.

Nghut kôhang, hkyíng hkum
rahkum má za, htên
byoq hkyô gi, yhâng
chyáng jé bu-nhung!

20 Mauhkûng ê, yhang é
yanmai hkye gabú aq!
Sân-yúng bang, lagyô
pé eq myiqhtoí pé ê,
hkye gabú keq!

Hkâsu mù gâ le, yhang, nung-
moq lé kut é eq ra-
jung za, Garai Gasang
gi, yhang lé jéyáng bê
nghut ri.'

ga taí kó râ nghut lhê." gâ ri.

21 Hau htâng, wum-o a-
tsam mó bo é maumang
lagyo rayuq gi, luqluí long mó
sú é luqgok racham waq toq
yú mù, wuìshuq lung-aú má
dú hkyô kat luí, taí é gi,

"Haú Babelon myuq mó gi,
haú su kut wum kat
dú hkyô pyâm é hui râ
nghut luí,

hkâ-nhám le dum myàng
râ a nghut lo.

22 Haú tîng bat é bang, dat gó
dat ye é bang, sampyí
mut é bang eq tut mut
é bâng é htê lé,

náng chyáng hkâ-nhám le
dum wó gyo lo râ a
nghut.

Loq hpaqchyí ajung jung
kûng é byù lé, náng
chyáng hkâ-nhám le
dum myàng lo râ a
nghut.

Luqluí luí é htê lé, náng
chyáng hkâ-nhám le
dum wó gyo lo râ a
nghut.

23 Haú myibung duq é my-
ishâm lé, náng chyáng

hkâ-nhám le dum wó
duq lo râ a nghut.

Myisik lusik é htê lé, náng
chyáng hkâ-nhám le
dum wó gyo lo râ a
nghut.

Náng é hpugá byû pé gi,
mingkân é byù mó pé
nghut ri.

Náng é myoqheq hpaqchyi èq
mingdán banshoq mâ
é bang lé, hkyô shuí
nghoq bê nghut ri.

²⁴ Haû myiqhtoî pé é sui,
sân-yúng bâng é sui eq
myidàm htoq má sat
hui bang banshoq é sui
pé gi,
yhâng chyáng chyat byu-
myàng bê nghut ri."

gâ ri.

19

Haleluya!

¹ Hau htâng, mauhkûng
htoq má, byù ajùm ayò garû é
htê mó su gâ é lé, ngò wó gyô
é gi,

"Haleluya!*

Hkyi yù hkyô eq hpungwup
shing kang, a-tsam gi,
nga-nhûng é Garai
Gasang eq sêng é nghut
lhê.

² Hkâsu mù gâ le, Yhang
tará jéyáng é hkyô gi,
tengmán é eq dingmán
é yanmai nghut ri.

Yhang gi, myidàm htoq mâ
é bang lé, haû yhâng
é ashop é dông gung-
sho zùm yap é hkyo èq
mara kut shut nhang

é shiwa myhí mó lé,
mara byi luí,

Yhâng é dui-nhâng
zoshâng wuì é sui
yuichyín dam byi bu-
nhung ô!"

gâ ri.

³ Dum radàm, yhangmoq
taì garu kô é gi,

"Haleluya!

Myuq hau é myihkau gi, pyat
dedu ahtum abyuq ru
îng doq nyì sháng gaq
ô!"

gâ bum akô nghut ri.

⁴ Haû suwún í xe myi yuq
eq dui é dusak myí du gi, haû
hkohkâm-tanghkuq má zung
tô é Garai Gasang lé paí gop
luí, noqkuq uchyang,
"Amen, Haleluya!"

ga, taì garû bum akô.

⁵ Haû hkûn,

"Garai Gasâng é dui-nhâng
zoshâng wuì nghut
é, yhang lé gyuq
hkunggâ é tiq ko
banshoq bang é!

Nga-nhûng é Garai Gasang lé,
hkya-on kungtôn keq
ô."

gâ é htê, haû hkohkâm-
tanghkuq mai htoq lo ri.

⁶ Hau htâng, byù ajùm ayo é
htê su ga, wuì myo myo my-
ing hûm é htê su ga, maugum
mó é htê su ga, taì garû é htê
lé ngò wó gyô é gi,

"Haleluya!

Hkâsu mù gâ le, wum-o a-
tsam dik shoq bò Sû
nga-nhûng é Yhumsîng
Garai Gasang gi, up nyi
ri.

* **19:1** Haleluya gâ é gi, Hebre myíng dông, "Yhumsîng Garai Gasang lé hkya-on kungton lhê" gâ é dang nghut ri.

⁷ Nga-nhúng gi, ngón gabú luí, Yhâng é hpungwup shingkanlé lhoq gyaú sháng ô!

Hkâsu mù gâ le, haú Sauzo myiháng poí gi, jé bê nghut luí, Yhâng é myisik gi, rì rì mhôn to bê nghut ri.

⁸ Sân-yúng duq wik nú-nhâm é mebu le, wut râ matú, Yhang lé byí to bê nghut ri."

gâ ri. (Nú-nhâm é mebu haú gi, sân-yúng bang kut é dingmán é muzo nghut ri.)

⁹ Hau htâng, maumang lagyo gi, ngo lé, "'Haú Sauzô é myiháng zoshuq poí má ji yu é hui bang gi, hkungsô wó nyi ri.' nghû ká aq." ga taí luí, "Dang shí pé gi, Garai Gasâng é tengmán mungdang yhang nghut lhê." ga xoq taí ri.

¹⁰ Haú hkûn, ngò gi, yhang lé noqkuq râ nghû, yhâng é hkyí wang má paí gop kat é nghut lhê. Nghut kôlhang, yhang gi, "Haú su hkâkut! Ngò gi, nàng eq haú Yesuq é saksé lé hkâm é náng gumang wuè eq rahá, byinzùm dui-nhâng zoshâng ru nghut lhê. Garai Gasang lé noqkuq aq! Hkâsu mù gâ le, Yesuq é hkyô lé saksé hkâm é gi, myiqhtoi htoi é Woi-nyí é myit đông nghut ri." ga, ngo lé taí hkûm ri.

Myang Hpyû Jì To Su É Hkyô

¹¹ Hau htâng, ngò gi, mauhkûng bóng tô é lé le, ngá é myoq hí má myang hpyû radu nyi tô é lé le, myang

ri. Myang hpyû haú má jì tô é gi, Lhumzui eq Tengmán gâ é Sû nghut ri. Yhang gi, tengmán é đông tarâ jéyáng luí, majan zan Sû nghut ri.

¹² Yhâng é myoqjí gi, myishâm su dut mù, Yhâng é ulhum má gi, janmaú myo myo tsúng tô ri. Yhang mai lai luí, ó yuq le a bo sê é myìng, Yhâng chyáng kâ tap tô ri.

¹³ Yhang gi, sui má jum yù bê nghut é buhîng radung wut to luí, Yhâng é myìng gi, Garai Gasâng é mungdang gâ ri. ¹⁴ Haú mauhkûng gye pé gi, hpyu é eq sanséng nú-nhâm é mebu wut mù, myang hpyû jì kôluí, Yhâng htâng má châng bum akô nghut ri.

¹⁵ Byù myû haú pé lé zan râ matú, htoq é shâm gi, Yhâng é nhut mai htoq lo ri. Yhang gi, yhangmoq lé, shamtoq dumbáng eq up râ nghut lhê. Yhang gi, wum-o a-tsam dik shoq bò Sû Garai Gasâng é nhikmo-yô é tsibiyiq shi pyik jang má, yhangmoq lé pyik râ nghut lhê. ¹⁶ Hkohlkam pê é Hkohlkâm eq yhumsing pê é Yhumsîng gâ é myìng gi, Yhâng é buhîng eq Yhâng é tangbaú má kâ tap tô ri.

¹⁷ Dum, maumang lagyo rayuq gi, buí má yap tô é lé ngò myang ri; yhang gi, maulat mâ é nghoqzô pé ban-shoq lé, "Lé keq, Garai Gasâng é zoshuq poí mó matú, lé zup zing keq; ¹⁸ haú hkûn, nungmoq gi, hkoohlkam pê é, gyezaù pé é, wum-o a-tsam mó bò bâng é, myang jûm eq jì bâng é gungsho, luthkyô wó

bang eq jùn pê é, byù mó byù zo pé lhunglhâng é gungsho pé lé, myàng zo kó râ nghut lhê." ga, htê mó eq wut garû tâ ri.

¹⁹ Hau htâng, haû tân jung dusak eq myidàm htoq mã é hkohkâm eq yhangmoq é gyezô pé gi, haû myang htoq mã jî to Sû eq Yhâng é gyezô pé lé, majan zan râ matú chôm zîng bùm kô é lé, ngò myang ri. ²⁰ Nghut kôlhâng, haû tân jung dusak gi, chyup yu é hui bekô nghut ri; hau htoq agó, haû tân jung dusak é masat lhô lé hkam yù luí, yhâng é alhô lé noqkuq é bang lé, mhaú zo râ matú, tân jung dusak hau é gunglik dông limik kumlhá pé kut shit é myiqhtoi pyoq le, chyup yu é hui bê nghut ri. Yhangnhik gi, hang myi duq nyi é myi nhông mã duì gù dú hkyô kat é hui bekô nghut ri. ²¹ Haû myit gyó tô é bang gi, myang gûng mã jî to Su é nhut mai htoq lo é sham eq sat pyâm é hui bekô nghut luí, nghoq pé lhunglhâng gi, haû bâng é gungsho lé, gyi gyi dau dau myàng zô bùm bekô nghut ri.

20

Rahkyîng Zàn

¹ Dum, maumang lagyo rayuq gi, nik dik htûm é Lasang-dông é zoqshi eq joqtoq tui mó lé, yhâng é loq mã chûng mù, mauhkûng mai gyó lé lo é lé, ngò myang ri. ² Yhang gi, natzau eq Tsadán nghut é, a-nham lhê é lhangmui gâ é manjung lé,

zanwut rahkyîng lhûng to râ matú, chyup tui yù bê nghut ri. ³ Haû mù, maumang lagyo haû gi, rahkyîng zàn a byîng shî é gyoro má, manjung haû, byù myù pé lé a wó mhaú zo sháng gaq ga, nik dik htûm é Lasang-dong má yhang lé dú hkyô hâng kat luí, zoq myhî to mù, hau é ahtoq mã dizik htûng tô ri. Haû rahkyîng zàn lai eq, yhang lé, ra yoq zo hpông htoq kat ra râ nghut lhê.

⁴ Ngò gi, haû tarâ jéyáng râ ahko ahkáng wó é bang zung tô bum é hkohkâm-tanghkuq pé lé, dum myang ri. Hau htoq agó, haû Yesuq é hkyô lé saksé hkâm é yanmai le, Garai Gasâng é mungdâng é yanmai le, ulhum hpyit hui bâng é sobyô pé lé, ngò myang ri. Haû bang gi, haû tân jung dusak eq yhâng é alhô lé a noqkuq é htoq agó, yhumsing é ngelang eq loq mã hau é masat lhô lé a htûng tap yù bâng é sobyo pé nghut ri. Yhangmoq gi, dum dui toq mù, zanwut rahkyîng tup Hkrisduq eq rahá up nyi bekô nghut ri. ⁵ Haû gi, sâng-hî dâm dum dui toq é hkyô nghut ri. (Shi byuq bê myit gyó tô bang gi, rahkyîng zàn haû a byîng byîng wó dum dui toq kó râ a nghut.) ⁶ Sâng-hî dâm dum dui toq é hkyô mã lom é bang gi, hkungsô wó bang eq chyoiyúng bang nghut ri. Í dâm nghû râ shi é hkyô gi, haû bang lé up râ ahkáng wó é a nghut; haû bang gi, Garai Gasang eq Hkrisduq é

hkyangjông pé dut râ nghut é htoq agó, Hkrisduq eq rahá zanwut rahkyîng tup up kó râ nghut lâ.

Tsadán Htên Byoq Huí É Hkyô

⁷ Rahkyîng zàn haû lai jáng, Tsadán gi, htóng mai nhang htoq kat é hui luí, ⁸ majan zan râ matú, myidàm htoq myi chyûn má nyi é, Goga eq Magoga gâ é byù myû pé lé mhaû shuí tsíng yù râ ga, htoq ê râ nghut lâ. Byù haû bang gi, wuîshuq lung-aû yàm mâ é semuî myhó myo kó râ nghut lâ. ⁹ Yhangmoq gi, maumyí htunghtáng hkap shoq chôm yán doq lò kômù, haû Garai Gasâng é byu pé nyi é dap nghut é, Garai Gasang chyitdap é myuq lhînghkyuq má, lé lóm tô bùm bekô. Nghut kôlhang, mauhkûng mai myi gyó lô luí, yhangmoq lé nyhê hkyô pyám bê nghut ri. ¹⁰ Haû tân jung dusak eq myiqhtoi pyoq pé lé dú hkyô kat jang nghut é, hang myi duq nyi é nhông má, yhangmoq lé mhoq hpyoq yu é natzau haû le dú hkyô pyâm é hui bê nghut ri. Yhangmoq gi, nyí, myín, pyat dedu ahtum abyuq wuîhke jamjau hui zô nyi kó râ nghut lâ.

Ló Htâng É Tarâ Doqdan Hkyô

¹¹ Hau htâng, hkohkâm-tanghkuq hpyû mó ralhumm eq haû má zung tô é Sû lé, ngò myang ri. Haû mauhkûng eq myigùng gi, Yhâng é hí mai hpang lô bê nghut mù,

yhangnhik é matú jowò a joq lo nghut ri. ¹² Hau htoq agó, shi byuq bê nghut é, tiq é kô é bang gi, hkohkâm-tanghkuq hí má yap tô bum é eq laiká buk pé hpông é lé, ngò myang ri. Asak jihpán laiká buk gâ é gotú laiká buk le, hpông tô ri. Haû shi byuq bê bang gi, yhumsîng kut é eq rajung za, laiká buk pé má kâ tô é dông, tarâ doqdan é huí bùm bekô nghut ri. ¹³ Haû hkûn, wuîshuq lung-aû gi, yhang má lúng tô é, shi byuq bê bang lé ap byi luí, haû shi é hkyô eq Moming le, yhangnhik chyáng lúng tô é, shi byuq bê bang lé ap byi akô nghut ri; yuq hkangmó gi, yhumsîng kut é eq rajung za tarâ doqdan é hui bekô nghut ri. ¹⁴ Hau htâng, shi é hkyô eq Moming gi, myi nhông má dú hkyô kat é hui bekô nghut ri. Myi nhông haû gi, î dâm nghû râ shi é hkyô nghut lâ. ¹⁵ Asak jihpán laiká buk má, myìng a bo é sù ó yuq nghut kôle, myi nhông haû má dú hkyô kat é hui bekô nghut ri.

21

Yerusalem Asik

¹ Hau htâng, mauhkûng asik eq myigùng asik lé, ngò myang ri; hkâsu mù gâ le, hí lâ é mauhkûng eq myigùng gi, lai lô byuq bê nghut luí, wuîshuq lung-aû le, dum joq râ a nghut lo. ² Haû hkûn, Chyoiyúng Myuq gâ é Yerusalem asik gi, lusik é matú mhôn yúng tô é myisik su, hen lajâng yù luí, Garai

Gasâng chyáng mâ é nghut mù, mauhkûng mai gyó lé lo é lé, ngò myang ri. ³ Hau htoq agó, hkohkâm-tanghkuq mai htoq lo é danghtê mó lé, ngò wó gyô é gi, "Ahkuí, Garai Gasâng é nyi jowò gi, xângzo byu pé eq rahá nghut luí, Yhang gi, yhangmoq eq rahá nyi nyi rá nghut lhê. Yhangmoq gi, Yhâng é byu pé dut rá nghut luí, Garai Gasang yhang, yhangmoq eq rahá nyi mù, yhangmoq é Garai Gasang dut rá nghut lhê. ⁴ Garai Gasang gi, yhangmoq é myoq mã é ngaubyi lunglhang lé, sut pyám byi rá nghut lhê. Htângnùng má gi, shî-nò hkyô, iyon hkyô, ngaubyi ngau-nhap hkyô eq no hpu hkyô nghû é joq rá a nghut lo; hkâsu mù gâ le, hí lhê é hkyô pé gi, lai ló byuq bê nghut ri." gâ ri.

⁵ Haû hkohkâm-tanghkuq má zung to Sû gi, "Wú aq, jung hkangmó lé, Ngò asik kut nyi bê nghut lhê." ga tai luí, "Shî lé kâ to aq, hkâsu mù gâ le, dang shí pé gi, lumgíng é dang eq tengmán é dang nghut lhê." ga tai ri.

⁶ Hau htoq agó, Yhang gi, "Haú pé gi, ban kut bê. Ngò gi, Alhpa eq Omega nghut lhê; Sâng-hi Awang eq Ló Htáng Sû le nghut lhê. Wuì shit sù lé gi, ahpau a dúng é za, asak wuíbúm mã é uchyam lé, Ngò byi huq rá nghut lhê. ⁷ Wó ung é sù ó yuq nghut kôle, Garai é silí wunlí haú pé ban-shoq lé síng rá nghut mù, Ngò gi, yhâng é Garai Gasang dut

luí, yhang gi, Ngá zo dut rá nghut lhê. ⁸ Nghut kôlhang, gyuq myit bò bang, a lumjíng bang, achayut dut bang, byù sat bang, ashop é dông gungsho zùm yap é hkyô shut é bang, myoqheq hpaqchyí kut é bang, hparà noq é bang eq mhaú bang lunglhang é jowò gi, haû hang myi duq nyi é nhông nghut rá nghut lhê. Haû gi, í dâm nghû rá shi é hkyô nghut ri." ga ngo lé tai ri.

⁹ Ló htâng é wúm nyhit jung byíng tô é góm nyhit lhum chung tô é maumang lagyo nyhit yuq mã é rayuq gi, lé mù, "Lé aq, haû Sauzô é yhangmyi gâ é myisik lé, ngò tân shit rá nghut lhê." ga ngo lé tai ri. ¹⁰ Hau htâng, yhang gi, ngo lé Woinyí mai bùm myhâng mó ralhum má shuí jé luí, Garai Gasâng chyáng mã é nghut mù, mauhkûng mai gyó lé lo é, haû Chyoiyúng Myuq gâ é Yerusalem lé tân shit ri. ¹¹ Myuq haû gi, Garai Gasâng é hpungwup shingkang hû é htoq agó, haû maubó gi, hpaû dik é huhpé lungsêng su dut luí, myoqjâm su sân-yúng ri. ¹² Myuq xêwâm gi, kô myhang é htoq agó, hkum raxe í lhum hpông tô ri; hkum haú pé má, maumang lagyo raxe í yuq zúng tô ri. Hau htoq agó, Israelaq byù myû raxe í hu é myíng lé, hkum haú pé má kâ tap to bum ri. ¹³ Hkum haú pé gi, buihtoq hkyam shut sùm lhum, buiwàng hkyam shut sùm lhum, maupyí shut sùm

lhum, mautsûng shut sûm lhum kut hpông tô ri. ¹⁴ Myuq xêwâm haû gi, awang raxe í lhûm èq hi tô é nghut lui, awang haú pé má, Sauzô é lagyo raxe í yuq é mying dap tô bum ri.

¹⁵ Haû ngo lé nyo é mau-mang lagyo gi, myuq lé le, hau é hkum pé lé le, xêwâm pé lé le, ké râ matú, kê é jung hîng jàm-yang ralhum chung tô ri. ¹⁶ Myuq haû gi, myi chyûn dut mâ é nghut lui, hîng hpyang làm hpyang rawuí wuí za dut mâ é nghut ri. Maumang haû gi, myuq lé jàm-yang hau èq kê wú é hkûn, hîng hpyang, làm hpyang, myhâng hpyang banshoq 1400 déng* kê bo ri; ¹⁷ yhang gi, haû byù kê é jung eq wuí é maumang lagyo é kê jung lé chûng mù, myuq xêwâm lé kê wú é hkûn, rasho myí xê myi dúng bo ri.

¹⁸ Myuq xêwâm haû gi, huhpé lungseng èq saí é nghut ri; myuq gi, hîng gyíng èq saí é nghut mù, myoqjâm su yhang sân-yúng ri. ¹⁹ Myuq xêwâm haû é awang pé gi, hpau jung lungsêng ajung jûng èq mhôn tô é nghut ri. Sâng-hî lhum gi, huhpé lungseng èq, í lhum nghû râ gi, nila (mauhkûng nyuì su dut jung) lungseng èq, sûm lhum nghû râ gi, mahuya (noq é isâm myo jung) lungseng èq, myí lhum nghû râ gi, myaq (huí nyuì nyuì é jung) lungseng èq, ²⁰ ngo lhum nghû râ gi, nyhaú myoqjí su dut jung

lungseng èq, hkyuq lhum nghû râ gi, pate-mya (nè é jung) lungseng èq, nyhit lhum nghû râ gi, huí muí muí é su dut jung lungseng èq, shit lhum nghû râ gi, myek-yoi (wuimau nyuì su dut jung) lungseng èq, gaú lhum nghû râ gi, utohpaya (bó huí hui é jung) lungseng èq, raxê lhum nghû râ gi, mahuya nyuì lungsêng èq, raxe ralhum nghû râ gi, wakintu (mhan-haq nyuì eq mauhkûng nyuì nyhò tô é su dut é jung) lungsêng èq, raxe í lhum nghû râ gi, (me me dut é jung) htihtu-nila lungseng èq mhôn tô ri. ²¹ Haû myuq hkum raxe í lhum gi, palhé raxe í cham nghut ri; hkum ralhum gi, palhé rachâm èq saí é nghut ri. Haû myuq é hkyô mó gi, hîng jet èq saí é nghut lui, myoqjâm su duq san é hkyô nghut ri.

²² Ngò gi, myuq haú má noqkuq yhûm joq é lé a myàng, hkâsu mù gâ le, haû wum-o a-tsam dik shoq bò Sû Yhumsîng Garai Gasang eq Sauzo gi, myuq hau é noqkuq yhûm nghut nyi é yanmai nghut ri. ²³ Haû Garai Gasâng é hpungwup shingkang gi, myuq haú má duqbó byí é htoq agó, Sauzo gi, myuq hau é myibung nghut é yanmai, myuq haú má gi, buì eq lhamó tsô byi a ra nghut ri. ²⁴ Haû byù myû pé gi, myuq haú duqbó é hkaú má hkyô wó so kó râ nghut lhê; haû myidâm htoq mâ é hkohkam

* 21:16 1400 déng gi, Grik pé é stadia 12000 kê nghut ri.

pê gi, yhangmoq é hkikhkâm hkyô lé, myuq haú má yù lé kó râ nghut lhê. ²⁵ Myuq haú má gi, myín nghû é a joq é yanmai, myuq hkum myhî é le joq râ a nghut lo. ²⁶ Haú byù myû pê é hpungwup shing kang eq aróng lé, myuq haú má yu lé kó râ nghut lhê. ²⁷ Myuq haú má, a sansêng é hkyô haî le wó wàng râ a nghut é htoq agó, hoq hpu hkyô eq mhaú zô é hkyô kut é sù ó yuq le wó wàng râ a nghut; haú Sauzô é asak jihpán laiká buk má mying bo é bang za wó wàng râ nghut lhê.

22

Asak Wui Mó Lâng

¹ Hau htâng, Garai Gasang eq Sauzô é hkohkâm-tanghkuq mai yui htoq lô lui, myuq hkaú mâ é hkyô mó gûng đông yui lô é, myoqjâm su sân-yúng é asak wui mó lâng lé, maumang lagyo haú, ngo lé tân shit ri. ² Wuilàng í hpoq é má, ashi raxe í myû zuí é asak shigâm yuq tô é nghut lui, lhohkyap hkangmó ashi zuí ri. Hau htoq agó, shigâm haú pé mâ é ahaq pé gi, byù myû pé lé yâ gè râ matú nghut ri. ³ Nhing é haî le a joq lo râ nghut lhê. Garai Gasang eq Sauzô é hkohkâm-tanghkuq gi, myuq hkaú haú má joq nyi râ nghut mù, Yhâng é dui-nhâng zoshâng wui gi, Yhang lé noqkuq dojaú kó râ nghut lhê. ⁴ Yhangmoq gi, Yhâng é myoqdong lé myàng kó râ nghut

é htoq agó, yhangmoq é nge-lang má, Yhâng é mying kê tap é hui kó râ nghut lhê. ⁵ Myín nghû é le joq râ a nghut lo. Myibung duqbó byí é le, bui tsô byí é le, yhangmoq ra kó râ a nghut lo, hkâsu mù gâ le, haú Yhumsing Garai Gasang gi, yhangmoq lé duqbó byí nyi râ nghut lhê. Hau htoq agó, yhangmoq gi, pyat dedu ahtum abyuq up nyi kó râ nghut lhê.

⁶ Maumang haú gi, ngo lé, "Dang shí pé gi, lunging é dang eq tengmán é dang nghut lhê. Myiqhtoî pê é woi-nyí lé up é Yhumsing Garai Gasang gi, adê myáng má dut lò râ hkyô pé lé, Yhâng é dui-nhâng zoshâng wui lé tân shit râ matú, Yhâng é maumang lagyo lé nhang kat é nghut ri." ga taí ri.

Yesuq Jé Lé Lô Râ Hkyô

⁷ "Wú keq, Ngò gi, a myáng má jé lé lô râ nghut lhê! Laiká shí má bo é myiqhtoî dang pé lé châng kut é sù gi, hkungsô wó nyi ri."* gâ é lé, ngò wó gyô ri.

⁸ Haú hkyô pé lé wó myâng wó gyô é sù gi, ngò Yohan nghut lhê. Ngò gi, haú hkyô pé lé wó myâng wó gyô é hkûn, ngo lé, shí hkyô pé tân shit é maumang lagyo é hkyi wang má noqkuq râ matú paí gop é nghut lhê. ⁹ Nghut kôlhang, yhang gi, ngo lé, "Haú su hkâkut! Ngò gi, nàng eq le, nàng é gumang myiqhtoî pé eq le, laiká shí

* 22:7 Dang shí hkun gi, Yesuq taí é nghut lhê.

mâ é mungdang pé lé châng kut é lhunglhâng bang eq le rahá, byinzùm dui-nhâng zoshâng ru nghut lhê. Garai Gasang lé noqkuq aq!" ga taí ri.

¹⁰ Hau htâng, yhang gi, "Laiká shí má bo é myiqhtoi dang pé lé, hkâzaú to lo, hkâsu mù gâ le, haú ahkyíng gi, chyâng lò bê nghut ri. ¹¹ A dingmán é sù gi, a dingmán é dông xoq kut nyí sháng gaq; a sansêng é sù gi, a sansêng é dông xoq dut nyí sháng gaq; dingmán é sù gi, dingmán é dông xoq kut nyí sháng gaq; chyoyúng é sù gi, xoq chyoyúng nyí sháng gaq." ga ngo lé taí kyô ri.

¹² "Wú keq, ngò gi, a myáng má jé lé lô râ nghut lhê! Ngò gi, yuq hkanmó lé, yhumsíng kut é eq rajung za byi râ shigyau chyunghuq chung tô lhê. ¹³ Ngò gi, Alhpa eq Omega nghut lhê, Sâng-hi eq Jihtùm nghut lhê, Sâng-hi Awang eq Ló Htáng Sù le nghut lhê.

¹⁴ Asak shigâm má jé râ eq myuq hkaú shut hkúmdong mai wó wang jé râ ahkáng wó yú shoq, yhumsíng é buhíng lé chí sâp é bang gi, hkungsô wó nyi ri. ¹⁵ Shinggan má gi, hkui dông nyi é bang, myoqheq hpaqchyí kut é bang, ashop é dông gungsho zùm yap é hkyô shut é bang, byù sat é bang, hparà noq é bang eq mhaú é hkyô lé ô nau luí châng kut é bang lhunglháng nyi bum akô nghut ri.

¹⁶ Ngò, Yesuq gi, haú noqkuq hpûng pé lé, shí hkyô pé saksé hkâm shit sháng gaq nghû, Ngá é maumang lagyo lé, nungmoq chyáng nhang kat bê nghut lhê. Ngò gi, Dawiq é Amyit eq Awut Ashín le, haú duqbó é Bó-myhû le nghut lhê."† gâ é lé, ngò wó gyô ri.

¹⁷ Haú Woi-nyí eq myisik gi, "Lé aq!" gâ akô. Haú wó gyô é sù gi, "Lé aq!" ga sháng gaq. Wuí shit sù ó yuq nghut kôle, lé sháng gaq; shuq nau é sù ó yuq nghut kôle, ahpau byi a ra é asak wuí lé, shuq sháng gaq.

¹⁸ Laiká shí má bo é myiqhtoi dang pé lé wó gyô é bang yuq hkanmó lé, ngò sidiq byí é gi: dang haú pé má, rajung jung kat jat é sù ó yuq chyáng nghut kôle, Garai Gasang gi, laiká shí má kê tô é wúm pé lé jé nhâng râ nghut lhê. ¹⁹ Myiqhtoi laiká shí má bo é dang pé lé, yu pyâm é sù ó yuq lé nghut kôle, Garai Gasang gi, laiká shí má kê tô é asak shigâm eq chyoyúng myuq mâ é yhang eq sêng é gû lé, yu pyâm byi râ nghut lhê.

²⁰ Shí hkyô pé lé saksé hkâm byí é Sù gi, "Nghut bê, Ngò gi, a myáng má jé lé lô râ nghut lhê." ga taí ri.

Amen. Yhumsíng Yesuq é, lé lô aq ô!

²¹ Haú Yhumsíng Yesuq é jeju gi, Garai Gasâng é byu pé chyáng joq nyí sháng gaq ô! Amen.

† 22:16 Dang shí hkun gi, Yesuq taí é nghut lhê.